

K213 980
3

საქართველოს სსრ-ის სახელმწიფო უნივერსიტეტი



საქართველოს
სახელმწიფო უნივერსიტეტი

3





აქვს მას ძალი მოზარდობისა
და აღორძინებისა
და მშობელობისაი.

იოანე დამასკელი

და მან განგრაგნა წიგნი იგი წინაშე
ჩემსა და იყვნეს მას შინა დაწერილ:
„გოდება, გმინვა და ვაება“.

ეზეკიელი, 2, 10.

ლევან სანიკიძე

უცხოეთის
სმელეი

პარტვალთა
ისტორიულ-გეოგრაფიული
თავგადასახველი

ნონი
მოსკოვი

სპუბ-2000
ფართობის მქონე

9(1922)

63.3 (2F)
L 262

საქართველოს ისტორია



„უქარქაშო ხმლები“ გათვალისწინებული იყო სამ წიგნად, მაგრამ სა-
ისტორიო მასალების ახალმა კვლევა-ძიებამ ავტორს უქარნახა ცალ-ცალკე
დაეწერა III და IV წიგნები.

წინამდებარე III წიგნი მოიცავს XVII საუკუნის საქართველოს თავ-
გადასაქალს.

რედაქტორი ლაშარა თვრამანიძე


K 213.980

4702017200—180
ს ————— 89
მ 604 (08) — 91

© გამომცემლობა „მერანი“
კოლპერატივი „წყარო-89“

საქართველოს
ისტორიის
ბიბლიოთეკა

◆ კარგი მემრვე ◆



ა ზ მ ა კ ი რ ვ ე ლ ი

მორღვეული კარიბჭეები

ნაჯვარი სისხლი

რამეთუ სისხლი არს სული.

მეორე სჯულის კანონი, 12, 23.

პიეტრო დელა ვალე რომის პაპს — ურბანუს მერვეს:

„უნეტარესო მამაო!

ქვეყანა, რომელსაც დღეს ჰქვია საქართველო, შეიცავს ყველა იმ მხარეს, რომელთაც ძველი ხალხები უწოდებდნენ კოლხეთს და იბერიას; იგი მიითვლის აგრეთვე სომხეთსა და ალბანეთის ნაწილებს... ამ სახით საქართველოს უჭირავს სული ქვეყანა, რომელიც იწყება შავი ზღვის აღმოსავლეთის ნაპირიდან და აღწევს თითქმის კასპიის ზღვამდე... მთელი ეს ქვეყანა დღეს ხმარობს მხოლოდ ერთს მისს საკუთარ ენას, რომე-

ლიც ყველა იქ მცხოვრები ხალხების საზოგადო ენაა. ქართველებს, განსაკუთრებით თავადაზნაურობას, ფრანგი წარჩინებულების მსგავსად, უფრო სოფლებში ცხოვრება მოსწონთ, ვიდრე ქალაქებში. აღმოსავლეთის ბარბაროსულ ხალხთაგან განსხვავებით, ქართველებს, ჩვენ, ევროპელთა მსგავსად, ჰყავთ თავისი თავადაზნაურობა, რომელსაც ჰსცნობენ და არჩევენ მდაბიო ხალხისაგან... თავად-აზნაურები, ვამბობ მე, არ ჰსცნობენ ქალაქებში. მათი აზრით, ქალაქებში უნდა იცხოვრონ მდაბიო ადამიანებმა — ხელოსნებმა, ვაჭრებმა, აღებ-მიცემობის საქმოსნებმა. ეს აზრი ისე გავრცელებულია ქართველებში, რომ იმისთანებსაც, რომელნიც არ არიან აზნაურები, ეძაგებათ ქალაქში ცხოვრება და ხელოსნობისა და ვაჭრობის ვარჯიში. როგორც ხელოსნობას, ისე ვაჭრობას ქართველები უთმობენ უცხო ქვეყნელებს, მაგალითად, სომხებს და ებრაელებს, რომელნიც ბლომად არიან მათს ქვეყანაში... თვითონ კი თავის ცხოვრებას ატარებენ ომში და მიწათმოქმედებაში... სოფლის მამული, ბევრი თუ ცოტა, თითქმის ყველას აქვს. ამიტომაც ძველი ბერძნები საფუძვლიანად უწოდებდნენ ქართველებს „გეორგოსს“, რაც მიწის მუშაკს ჰნიშნავს... ამ ქვეყანას, რომელსაც ჩვენ ვუწოდებთ ჯორჯიას და იქაურები კი საქართველოს, უწინ ჰფლობდა მხოლოდ ერთი მეფე, ხოლო ახლა...“.

• • • • •
დამდგარა მეჩვიდმეტე საუკუნე.

ისევე ატუზულა მარად დაუღვენელი სიკვდილის აჩრდილი ქართულ კერასთან.

ისევე ბოროტობს მრუდე ქარი ქართულ ცისგვამში.

მცხეთის წმინდა მიწას შერთვია მამა-შვილი — ლუარსაბ და სვიმონ დიდ-მოწამენი, უპირველესი გმირები მრავალგვემული სამშობლოსა, უიღბლო ეპიგონები ვახტანგ გორგასალისა, დავით აღმაშენებლისა და გიორგი ბრწყინვალისა.

ავთვისებიანი ოსმალური მარწუხები ჩაჰფრენია და ჩასჭიდებია საქართველოს და სრულიად კავკასიას.

საქართველო არის ისევე დაწიწკნილი და „დაპანტული“ ცალკე „საქართველოებად“.

ქართლში მეფედ ზის ძე სვიმონ დიდისა -- გიორგი მე-
ათე (1600—1605 წწ.).

კახეთში — ისევ ალექსანდრე მეორე (1574—
1605 წწ.).

იმერეთში — როსტომ კონსტანტინეს ძე (1590—
1605 წწ.).

ოდიშ-აფხაზეთში — მანუჩარ დადიანი (1590—
1611 წწ.).

გურიაში — მამია მეორე გურიელი (1600 —
1625 წწ.).

სამცხეში — აღარავინ ქართველთაგანი, რამეთუ ეს დიდებუ-
ლი ქართული ქვეყანა, სამშობლო დიდი რუსთველისა, ოს-
მალეთს თავის პროვინციად უქცევია, „გურჯისტანის ვილაიე-
თად“ მოუნათლავს და მის გამგებლად ოსმალთა ფაშა დაუნიშ-
ნავს.

თვითონ ოსმალეთის სასულთნოს ტახტზე ზის მეკმედ
III (1595—1603 წწ.), რომელსაც იმჟამინდელ მსოფლიოში
უპირველეს ხელმწიფედ მიაჩნია თავისი თავი.

აკი მის წინაშე ცახცახებენ ევროპელი გვირგვინოსნები.

აკი რუსეთსაც ამოუკვეთა ფეხი კახეთიდან და ჩრდილო
კავკასიიდან თურქეთის სულთანმა.

აკი ოსმალთა „საკუთრებად“ ქცეულა საქართველო და
სრულიად კავკასია.

აკი თვითონ ერანისა და მესოპოტამიის უმეტესი საწილიც
ოსმალთა სამბრძანებლო სამანებში მოქცეულა!

მაგრამ...

მაგრამ ნურავის დაავიწყდება, რომ ერანის ტახტზე დაბრძა-
ნებულა შაჰ აბასი — ბადალი ლეგენდარული კიროს დი-
დისა, სპარსთა სახელმწიფოს ოდინდელი დამაარსებლისა.

მას ჯერ კიდევ არ უთქვამს თავისი სიტყვა, — სიტყვა, რო-
მელმაც მსოფლიო უნდა შეარყიოს.

მალე კი იტყვის.

მალე იტყვის, რამეთუ მას გვერდით უდგას ქართველი —
ალავერდი-ხან უნდილაძე.

.

ნაჯვარი სისხლი დაედინება შაპ აბასის ძარღვებში — სისხლი ქართველ-მესხისა და თურქმან-ყიზილბაშისა.

ხოლო, ნაჯვარი სისხლი მრავალმღელვარე, მრავალსახე და ზომიერებადარღვეული ხასიათებით აღსავსე სულს დაჰბადებს ხოლმე.

აღბათ ამიტომ დაბუდებულა „ერანის ლომის“ სულში ესოდენ ერთიმეორის მომტერე თვისებანი: ნიჭიერება და უგუნურება, სიქველე და სიბოროტე, სიძამაცე და სიმზდალე, ვაჟკაციური პირდაპირობა და ლაჩრული მუხანათობა, უშურველობა და შურიანობა, ანგარიშიანი წინდახედულობა და ანგარიშგაუწყობელი სიბეცე, „კაცთმოყვარული“ გულმოწყალება და მარად შემართული ავზნიანი კაცთმძულვარება, ნათელგონიერი განსჯა-გარკვევა და ბნელთაბნელი ეჭვიანობა, უტყუარი მართლმსაჯულება და ყოვლად გაუმართლებელი სისხლის დამაქცევარი უსამართლობა.

დიდ სიამოვნებას ჰგვრიდა ბრძოლის ველზე და საჭიდაო „მეიდანზე“ მავანი მხედრისა თუ ფალავანის ჭეშმარიტი ვაჟკაცობა.

მაგრამ მაინც ადამიანის „დახვეწილი“ წამების ხილვა უფრო ატკობდა.

საგანგებო ჯალათთა დასტები ჰყავდა შაპ აბასს — „თაჯიბიუკ“ და „ჩი-იან“. სისხლისფერი ჯალათები ემოსათ, სისხლისფერი წოწოლა ქუდები ეხურათ, წეროსა და ბუს ფრთებით გაწყობილი. შემზარავი შესახედაობისა იყვნენ — ტანად ბუმბერაზნი, მიმრეც-მომრეცნი, ნამდვილი დევები, პირად საზიზღარნი, ლოშქრიან-დორბლიანნი, სისხლიანი გადმოკარკლული თვალებით, ყურებამდე ჩახეული ლაშებით, ალესილი კბილებით, მქშინავი ნესტოებით, ზარდამცემი ხმითა და ამაზრზენი სიმყრალით.

გადაჰარბებულ ჰიპერბოლად ნუ ჩათვლი, ჩემო მკითხველო, თვითონ შაპ აბასის თანამედროვე ისტორიკოსის (გუნაბადი) მონათხრობს: თაჯიბიუკელი და ჩი-იანელი ჯალათები პირდაპირ სჰამდნენ ადამიანის ხორცს, — ერთიმეორეს ხელიდან ჰგლეჯდნენ სიკვდილმისჯილს, ერთიმეორეს ასწრებდნენ კბილებით მოეკბიჩათ განწირულის ცხვირი, ყური, ლოყა, ძუძუმკერდი თუ საწულღო-სავაჟკაცო ასონი, და მანამ სჰამდნენ, სა-

ნამ ნახევრად შექმული კაცის სხეულს სული არ გაეყრებო-
და.

„მომხიბლავი სანახაობა“ იყო ამნაირი ხორცთაგლეჯა და
ადამიანის ცოცხლად შექმა შაპ აბასისთვის.

ჯალათებისა და ჯაშუშების სუნთქვით სუნთქავდა ერანის
სასახლე და სრულიად ერანის სახელმწიფო. შაპის ყური „დი-
დის ტრფიალებითა და გატაცებით“ ისრუტავდა ყოველგვარ
კორს, დაბეზღებას, ცილისწამებას. ეჭვიან შაპს ცუდად რომ
ვინმე დასიზმრებოდა, ესეც კმაროდა სიზმრად ნახულის სა-
სიკვდილო განჩინებისთვის. მკირედი ეჭვის გამოისობით შაპი
არ დაინდობდა არც დიდნამსახურს, არც მისთვის თავდადე-
ბულსა და ნაამაგარს, არც უახლოეს სისხლიერ ნათესავს —
არც ძმას, არც შვილს და არც ძირს.

შაპის ტახტზე იგი ერანის გამოჩენილმა სარდალმა მურ-
შიდ-ყული-ხანმა აიყვანა. დიდ დროს არ გაუვლია და, რომე-
ლილაც ჯაშუშმა „მკირე რამ სიტყვა“ ჩააწვეთა და მაშინვე,
გამოუძიებლად და განუსჯელად, ცოფით ატანილმა აბასმა
ერთგული მურშიდ-ყული-ხანი ჯალათებს დააგლეჯინა და შეაქ-
მეგინა.

შაპ აბასს ყველაზე უფრო ის მოსწონდა და უხაროდა, რო-
ცა მისი ბრძანებით მამას შვილი უნდა მოეკლა, ან შვილს —
მამა. სანახაობა „მდარედ“ ეჩვენებოდა, როცა მამა-შვილი
ერთმანეთზე ხელს არ აღმართავდნენ და მათთვის წესი ისევ
ჯალათებს უნდა აეგოთ.

ქვემოთ მკითხველი მრავლად იხილავს შაპ აბასის სადიზმის
შემაზრუნ სურათებს.

ერანის არმიის მთავარი ძარღვი არის ქართველთა მხედრობა.

პ ი ე ტ რ ო დ ე ლ ა ვ ა ლ ე

სპარსეთში, შაჰიდან დაწყებული და უმდაბლესი ქვეშევრდომით დამთავრებული, იშვიათად შეგახვდებათ ადამიანი, რომელსაც დედა ან მამა ქართველი არ ჰყავდეს; ან, უკიდურეს შემთხვევაში, ქართული სისხლი არ ერიოს ძარღვებში.

ქ ა ნ - ბ ა ტ ი ს ტ ა ვ ე რ ნ ი ე

ისფაჰანში, სპარსეთის მაშინდელ სატახტო ქალაქში, ქართველები უფრო „სჩანდნენ“, ვიდრე თვითონ სპარსელები.

კიდევაც ამბობდნენ ხშირად:

ისფაჰანი საქრისტიანო სამეფო ქალაქია, რადგან იქ უფრო ბევრი ქართველი ცხოვრობს, ვიდრე მთელს საქართველოშიო, თვითონ შაჰ აბასს დიდად ეამაყებოდა, რომ მის ძარღვებშიც ქართული სისხლი დაედინებოდა.

თავი მოსწონდა ქართული ენის სრულქმნილი ცოდნით.

ერანის „საზებურო ერში“ (მაღალ საზოგადოებაში) ქართულად ლაპარაკობდა.

ამიტომ ერანის იმ „მაღალმა საზოგადოებამაც“ ძალიან „შეიყვარა“ და შეითვისა ქართული ენა.

უცხოელი — აზიელი თუ ევროპელი — ელჩების მიღების დროს შაჰ აბასი ხშირად ქართულად იწყებდა ლაპარაკს, კარისკაცებიც ქართულად აპყვებოდნენ და ელჩებიც იძულებული ხდებოდნენ რაღაცნაირად „ჩაწვდომოდნენ“ ერანის ამ ახალ, უცნაურ „სახელმწიფო ენას“.

ქართველები უყვარდა შაჰ აბასს, — უყვარდა იმიტომ, რომ ქართველები ძლიერები იყვნენ და ერთგული, „თავგადასკვდარი“ სამსახური იცოდნენ.

ქართველები სძულდა შაჰ აბასს, — სძულდა იმიტომ, რომ ქართველები ძლიერები იყვნენ და არასოდეს ბოლომდე არ შეეძლოთ „უცხო თესლთა“ მბრძანებლობის დათმენა.

ქართველების ე შ ი ნ ო დ ა შ ა პ ა ბ ა ს ს, — ე შ ი ნ ო დ ა ი მი ტ ო მ, რომ ქართველები ძლიერები იყვნენ და არასოდეს არავინ იცოდა, როდის შემართავდნენ ისინი შურისმგებლურ უქარქაშო ხმლებს მტერთა მათთა შესამუსრავად.

და ქართველების დ ი დ ი ი მ ე დ ი ჰქონდა შ ა პ ა ბ ა ს ს, — იმედი ჰქონდა იმიტომ, რომ ქართველები ძლიერები იყვნენ და მათი თანადგომით შეეძლო დაკნინება-დამხობის გზაზე შემდგარი ერანის გამობრუნება, კვლავ გამძლავრება, აღორძინება და აღზევება.

მაშ -- კიდევაც უყვარდა და კიდევაც სძულდა, კიდევაც ე შ ი ნ ო დ ა და კიდევაც იმედოვნებდა, — ასეთი „ერთიმეორის გამომრიცხველი განწყობილებანი“ მარტო „ნაჯვარი სისხლის“ ბრალი აღარ უნდა ყოფილიყო.

ყოველივე ისევ და ისევ ქართველთა სიძლიერეს, მათდამი „ანგარიშის გაწევას“, მათ „საჭიროებისამებრ გამოყენებას“ უკავშირდებოდა.

ძლიერნი არიან ქართველნი, ძალიან ძლიერნი!

და რამდენად სასიხარულოა შ ა პ ა ბ ა ს ს ი ს თ ე ს ი ს, რომ ქართველები არიან აგრეთვე... ს უ ს ტ ნ ი!

ხოლო, ს ი ს უ ს ტ ე მ ა თ ი არის ის, რომ ქართველები ც ა ლ - კ ე უ ლ ა დ ა რ ი ა ნ ძ ლ ი ე რ ნ ი, ც ა ლ - ც ა ლ კ ე, თითოეულად, სამან-სამანად, ხოლო ერთმანეთის გვერდით დგომა ძალიან უჭირთ, -- ისე უჭირთ, როგორც ბუმბერაზ ხეებს ტყეში ერთმანეთთან მიჯრით ცხოვრება.

მაშ, ორივე კარგად იცის შ ა პ ა ბ ა ს მ ა — ს ი ძ ლ ი ე რ ე ც და ს ი ს უ ს ტ ე ც ქართველებისა და... თავთავის დროზე ორივეს კარგად გამოიყენებს...

განსაკუთრებით „გათათრებული ქართველობა“ მოსწონდა შ ა პ ა ბ ა ს ს, ხოლო ქრისტიანულ ქართველობას ვერასგზით ვერ ურიგდებოდა.

ვერ ურიგდებოდა და ვერ ითმენდა, რადგან ცბიერმა შ ა პ ა მ ა ძალიან კარგად იცოდა: ქრისტიანობა ქართველი ხალხის დამოუკიდებელი არსებობის ნიშანსვეტი იყო, მათი სახელმწიფოებრიობის, მათი კულტურის, მათი „თავისთავადობისა“ და „სხვად-ყოფნის“ საფარველიც და საფუძველიც.

ასეთივე თვლით უცქერდა შ ა პ ა ბ ა ს ი ს ო მ ხ ე ბ ს და ს ო მ ხ ე თ ს:

„გათათრებული სომხები“ მოსწონდა, ქრისტიანი სომხების გახსენებაზე გული უსაზღვრო მძულვარებით აღევსებოდა.

მაინც ასეთი რა შეიქნა ამ თითო მუჟა ქართველთა და სომეხთა ქრისტიანიზმი?!

არსად აზიაში ქრისტიანის ჭაჭანება არ ისმის ამ ორი „მეტიჩარა ხალხის“ გარდა!

ასე იყო დასაბამითგან და ასეა დღესაც!

მთელს კონტინენტზე ეს ორი ხალხი იჩემებს შეშის (ხის ჯვარის) თაყვანისმცემლობას და ამნაირი „ახირებულობითა“ და „აკვიატებით“ დღემდე ორივე ახერხებს თავისი „განსაკუთრებულობისა“ და „სხვანაირობის“ შენარჩუნებას!

ვიღაც ნამსკვალევი ნაზარეველი ებრაელის თაყვანისცემა ევროპის საქმეა, ხოლო აზია — დიდი ისლამის „მშობლიური სამყარო“ — თავის წიაღში ვერავითარ შემთხვევაში ვერ დაითმენს ქრისტიანულ „უცხო სხეულებს“!

ვერ დაითმენს თუნდაც იმიტომ, რომ ამ ბოლო დროს ჩრდილოეთიდან დიდმა ქრისტიანულმა სახელმწიფოებმაც გადმოჰყო ხელი აზიისაკენ, — მანდ ჩემი თანამორწმუნე და ქრისტესმიერი ძმები ცხოვრობენ და მათი მფარველობაც ქრისტესმიერ მოვალეობად მაწევს კისრადო!

ერთი სიტყვით, ბოლო უნდა მოელოს ამ „უცხო სხეულს“ — ქრისტიანიზმს — აზიაში!

ქართველები და სომხები ერთხელ და სამუდამოდ უნდა „განზავდნენ“ და „განსახოვანდნენ“ სრულიად აზიის ერთსახოვან ისლამიტურ ხალხთსაბრუნავში..

ყველაფერი ასე უნდა მოხდეს, მაგრამ საქართველოსთან ომის გარეშე ეს „დიდი საქმე“ არ გადაწყდება. ხოლო საქართველოსთან ომი თაობების ქლეტას მოითხოვდა ყოველთვის...

არა, ჯერჯერობით შაჰ აბასს საქართველოსთან ომი კი არა, ქართველთა თანადგომა, „თანაძმობა“ და „თანამოყვრობა“ სჭირდება. ჯერ მან „გათათრებული ქართველობა“ უნდა იკმაროს და მისი მხარდაჭერით „უახლოესი ამოცანები“ განასრულოს: ერანის საომარი აღორძინება და თურქეთთან ანგარიშის გასწორება.

ისედაც, — ისტორია კარნახობს შაჰ აბასს: თურქეთ-ერანის სამკედრო-სასიცოცხლო ჭიდილში თითქმის ყოველთვის ის მხა-

რე იმარჯვებს, ვის მხარეზე და ც აღმოჩნდება სკ-
ქართველო.

ამიტომ საქართველოსთან „ძმობა“ სჭირდება ჯერჯერობით
შაპ აბასს.

ჯერჯერობით!

ხოლო შემდგომ... ყველაფერი მოესწრება და მოეწყობა...

შაპ აბასმა გამეფებისთანავე სატახტო ქალაქი ჩრდილოეთი-
დან — ყაზვინიდან — სამხრეთისაკენ — ის ფაჰანში გადაი-
ტანა.

ეს იმას ნიშნავდა, რომ შაპი თურქმან-ყიზილბაშ გვარტო-
მობას ზურგს აქცევდა და ძველთაძველ მკვიდრ „ფარსის“
ტომთა დაწინაურებას აპირებდა.

ეს მართლაც ასე მოხდა. შაპ აბასი დარწმუნდა, რომ ერა-
ნის დაქვეითებისა და დაკნინების მიზეზი ყიზილბაშური სამ-
ხედრო-ფეოდალური წყობილება იყო. ყიზილბაში ფეოდალე-
ბი თავიანთი, „საკუთარი“ ჯარებით თვითნებურად, თუნდაც
შაპისაგან დაუკითხავად მოქმედებდნენ, ერთმანეთს ებრძოდ-
ნენ, სახელმწიფოს შიგნით მომტერე ფეოდალზე ლაშქრობ-
დნენ, ერანულ ქალაქებსა და სოფლებს ძარცვავდნენ, ანგრევ-
დნენ, აწიოკებდნენ; ხშირ შემთხვევაში ისინი თვითონ ხელმ-
წიფეს საომარ წვევაზე უარის თქმასაც უბედავდნენ.

ყიზილბაში ფეოდალები ყიზილბაშური ტომების მეთაურე-
ბი იყვნენ და თავიანთ სატომოში ყოველი მათგანი ცალკე და-
მოუკიდებელ მბრძანებლად გრძნობდა თავს. მათ შორის დიდი
ქიში და მტრობა სუფევდა. ყოველი მათგანი სასახლის კარზე
დაწინაურებასა და შაპის „მარჯვენა ხელად“ გადაქცევას მიეს-
წრაფოდა. ეს „მიკრომონარქები“ თავიანთი სატომო ჯარებით
გამუდმებით ერეოდნენ სასახლის კარის შინაურ საქმეებში,
მონაწილეობდნენ მრავალრიცხოვან უფლისწულთა ტახტისმა-
ძიებლურ ინტრიგებში და დინასტიურ სისხლთა თხევაში.

შაპ აბასმა მტკიცე, შეუვალი ნებით დათრგუნა ყიზილბა-
შური არისტოკრატია და მის ნაცვლად უმადლეს სამხედრო და
სახელმწიფო თანამდებობებზე მკვიდრ ერანელთა („ფარსელ-
თა“) და გათათრებულ ქართველთა ოჯახის შვილები დააწინა-
ურა.

დიდ გარდაქმნებს დიდი ფული სჭირდებოდა და შაპ აბასმა დასაყრდენ ძალად ვაჭართა და ხელოსან-მწარმოებელთა საზოგადოებრივი შრომებიც მოიშველია. მან ბევრი შეღავათი და სარგებლობა მიანიჭა სავაჭრო და საქალაქო წრეებს. მათთან საქმიან ურთიერთობაში შეუღდა შაპი ერანული პროვინციების აყვავებას — გზების, ხიდების, არხების, სავაჭრო ქარვასლები-სა და სრა-სასახლეების აშენებას.

ერანი ნივთიერად ღონიერდებოდა და კულტურულად მალ-ლდებოდა.

მაგრამ მთავარი მაინც სამხედრო რეფორმა იყო.

შაპ აბასმა გადაწყვიტა ძირფესვიანად შეეცვალა ერანის მთელი საომარი განწყობა, ყაიდა და ნაქცეურობა.

და ესოდენ დიდი საქმის მეთაურობა და ხელმძღვანელობა მიანდო ისევ ქართველს — ყრმობიდან გათათრებულ ალ-ა-ვ-ე-რ-დ-ი-ხ-ან-უ-ნ-დ-ი-ლ-ა-ძ-ე-ს.

ქართველ სამხედრო რეფორმატორს შაპმა თანაშემწეებად ინგლისელები დაუნიშნა — ავანტიურისტი და „ფათერაკების მაძიებელი“ ძმები ანტონ და რობერტ შერლები.

უნდილაძემ ყიზილბაშ-მომთაბარული ლაშქარი შეამცირა, 60 000 მეომრიდან 30 000-ზე დაიყვანა და მის გვერდით ახალი, მკაცრად ჩაწყობილი, მაღალი საომარი წრთვით გაწაფული და თოფ-ზარბაზნებით (10 000 ხელთოფი და 500 ზარბაზანი) აღჭურვილი მხედრობა შექმნა.

„შაპისევანი“, ანუ „შაპის მეგობარი“ — ასე დაარქვა შაპ აბასმა ამ ახალ ჯარს.

„შაპისევანი“ არსებითად მარტო სამხედრო კი არა, სატომო გაერთიანებაც იყო. ამ „ახალმა ტომმა“, თავისი მაღალი წარჩინებითა და უფლებებით, სავსებით დააჯინა და დაასიკვდილა ძველი ყიზილბაშური სატომო გაერთიანებანი.

შაპ აბასი ზოგიერთი ყიზილბაშური მოდგმის სავსებით განადგურებასაც არ მოერიდა. მაგალითად, თექვლუს ტომის ყიზილბაშობა დედამუდიანად ამოაწყვეტინა.

„შაპისევანის“ ტომის მეთაურიც და მთავარსარდალიც ერთდროულად იყო თვითონ შაპ აბასი.

მაგრამ აბასი აქ არ შეჩერებულა.

მან იცოდა, რომ ოდესღაც სპარსეთის დიდმა ხელმწიფემ,

დარიოს I-მა (ძვ. წ. 521—485 წწ.) მუდმივი ჯარი შექმნა 10 000 რჩეული მეომრისაგან. „უკვდავნი“ უწოდა დარიოსმა იმ მეომრებს. თანამედროვე სახელით რომ მოვნათლოთ, — ეს იყო იმდროინდელი „გვარდია“, რომელსაც ეკისრებოდა მეფის „ღვთაებრიობისა“ და მისი სასახლის დაცვა, ომის დროს ყველაზე რთულ შთანაფიქრთა განსრულება, ქვეყნის შიგნით სავარაუდებელ აჯანყებათა ჩახშობა, საერთო წესრიგისა და მშვიდობიანობის მოვლა-შენახვა.

სწორედ ამნაირ „რჩეულ უკვდავთა გვარდია“ შექმნა (უნდილაძის რჩევითა და განრიგებით) შაჰ აბასმა და უწოდა მას „ღ უ ლ ა მ თ ა“ („შაჰის მონათა“), ანუ ყ უ ლ ი ს / ჯარი — 10 000 რჩეული მხედარი.

ხოლო დღულამთა „გვარდია“ თითქმის მთლიანად ყრმობიდანვე ტყვედ წაყვანილი და გათათრებული ქართველებისგან შედგებოდა. აქვე, ქართველთა გვერდით აქა-იქ ირიცხებოდნენ გამაჰმადიანებული სომხები და ჩერქეზები.

ღულამთა მთავარსარდალად, ანუ ყ უ ლ ა რ ა ლ ა ს ა დ შაჰმა დანიშნა თვითონ ალავერდი-ხან უნდილაძე.

მაშასადამე, ალავერდი-ხან უნდილაძე ერანში დამკვიდრდა, ვითარცა „ვიციე-კოროლი“ (როგორც უყვარდათ თქმა ევროპელებს). იგი იყო შაჰის პირველი მრჩეველი, პირველი ვეზირი, მთავარი სპასალარი, „კლასიკური ერანის“ — ფარსის ბეგლარბეგი და შაჰის „გვარდიის“ დამაარსებელიც და ყულარადასიც.

(დაიმახსოვრე, ჩემო მკითხველო, ამიერიდან მთელი ას ოცდახუთი წლის მანძილზე სპარსეთის რჩეული ჯარების მთავარსარდალი, „როგორც წესი“, ყოველთვის იქნება ქართველი).

აურაცხელი სიმდიდრის პატრონი იყო უნდილაძე. 100 000 ეკიუ მარტო ფარსის საბეგლარბეგოდან შემოსდიოდა. ამას გარდა, მეორე პროვინცია, გულფაიგანი, „სახარჯოდ“ ჰქონდა ქართველ ყულარადასს.

უნდილაძეს და შემდგომში მის შთამომავლობას ეკუთვნოდა უამრავი ქარვასლა, ფუნდუკ-დუქანი და ბაზარი. მის ხელს ეპყრა საქარავნო და სამხედრო გზები ერანისა და ისფაჰანისა.

უნდილაძე და შემდგომში მისი მონაგარი ერანში აგებდა გზებს, ხიდებს, წყალსადინარებს, კაშხალებს, ქარვასლებს, საფოსტო სადგურებს, მეჩეთებსა და მედრესეებს. დღესაც მოქ-

მედქს ისფაჰანში ალავერდი-ხან უნდილაძის ნაშენები უზარ-
ნაზარი ხიდი.

ალავერდი-ხანის ცოლმა, ქართველმა ქალმა, საკუთარი ფუ-
ლადი სახსრებით შუაგული ერანის მთები მრავალგან უღელ-
ტეხილებით გადასტეხა, გზები გაიყვანა, მდინარეებზე და ხევ-
ხუეებზე ხიდები გასდო.

დიდი „კულტურტრეგერიც“ ყოფილა უნდილაძე (და შემ-
დგომში მისი ნაგრამი). კულტურულ აღმშენებლობას ელტვო-
და შეუსვენებლივ: აშენებდა, აჩუქებდა, აქანდაკებდა,
ხატავდა.

ისფაჰანში ჩეჰელ-სუთუნის სასახლის კედლები ბრწყინვალე
ფრესკებით მოახატვინა.

იქვე ქართული წარწერაც „შეაპარა“ ქართველყოფილმა.

ეტანებოდა ერანულ, არაბულ, ბერძნულ და... ქართულ
მწიგნობრობას.

უყვარდა ფირდოუსი, ჰომეროსი, პლატონი, არისტოტელე
და... ლოცულობდა რუსთველზე.

.

მაშ ღულამთა გვარდია — ქართველთა მხედრობა, ქართვე-
ლი მთავარსარდლით სათავეში — „მთავარი ძარღვია“ ერანის
საომარი ძალებისა!

ძალიან ენდობოდა შაჰ აბასი გათათრებულ ქართველებს.

ძალიან ენდობოდა, რადგან სჯეროდა:

გათათრებული ქართველი ქრისტიან ქართველისათვის ყო-
ველ თათარზე უარესია!

.

„მთელი სპარსეთი მე მემორჩილება, ხოლო მე უნდილაძეს
გემორჩილება“ — იტყოდა შაჰ აბასი და ყურებამდე გადამ-
ტკავლულ უღვაშებს გაუწყებოდა.

შაპ აბასი თურქეთთან ომის გასაახლებლად უკვე მზად იყო. მაგრამ ჭერხნობით კახეთში დატრიალებულმა ამბებმა მიიპყრო მისი ყურადღება.

მკითხველს ახსოვს წინასწრობილად ნათქვამი: ალექსანდრე კახთა მეფეს ხუთი ვაჟი ჰყავდა — ერეკლე, დავითი, გიორგი, კონსტანტინე და როსტომი.

როსტომი ყმაწვილობაშივე მოკვდა. ერეკლე თურქეთში „გაიქცა“ (იგულისხმე — მამამ გაგზავნა საიდუმლოდ) და იქვე გარდაიცვალა. კონსტანტინე ერანს ჰყავდათ მძევლად წაყვანილი.

ასე რომ — კახეთის ტახტის დასაუფლებლად, მოხუცი მამის აღსასრულის შემდგომ, ერთმანეთს ექიშებოდნენ დავითი და გიორგი.

თვითონ ალექსანდრე, როგორც ეტყობა, გიორგის მხარეს იქერდა.

არც ერთი მათგანი კი არ ფიქრობდა, რომ შაპ აბასი კახეთის ტახტისათვის ამზადებდა უკვე საესებით გათათრებულ კონსტანტინეს.

1601 წელს შამახის თურქმა ფაშამ ალექსანდრეს ხარკის გადახდა მოსთხოვა; წინააღმდეგ შემთხვევაში ომით იმუქრებოდა ხონთქრის მოხელე. ალექსანდრე მუქარას შეუშინდა და თურქებს მოთხოვნილი ხარკი პირწმინდად გაატანა.

ამან ძალიან შეაშფოთა შაპ აბასი. როგორ თუ ჩემმა ქვეშევრდომმა ხონთქრის მოხელეს ხარკი გაუგზავნაო! ეს ხომ იმას ნიშნავს, ალექსანდრე კახთა მეფე თურქეთის ყმობაში აპირებსო შესვლას!

შაპ აბასს არ სურდა ანგარიში გაეწია სინამდვილისათვის: კახეთი თურქეთს და ერანს თავისად მიაჩნდა ცალკეულად, ხოლო თვითონ კახთა მეფე რუსეთის მფარველობის ქვეშ იგულებდა თავს.

ალექსანდრე მეფეს სპარსელები ეშმაკსა და მოხერხებულ „ბებერ მგელს“ ეძახდნენ. მაგრამ შაპ აბასთან მისი „ეშმაკობა“ და „ილათიანობა“ ბალღურ მიამიტობად თუ გამოჩნდებოდა.

K 213980
3

შაჰმა რისხვა გულს დაიქვავა და კახეთში კონსტანტინე-მირზა გამოგზავნა ძვირფასი ძღვენით. გაათარებული შვილი მამას ეახლა, შაჰის „წყალობა-საბოძვარი“ მიართვა, მისი სახელით „დიდი სიყვარულითაც“ მოიკითხა და ბოლოს ეს მოახსენა: მომავალ გაზაფხულზე ერანის დიდი მზრძანებელი ურიცხვი მხედრობით მიეშურება თავრიზის, განჯის, შამახის, დარუბანდისა და ერევნის დასალაშქრავად და დასაპყრობად!

მთავარიც სწორედ ეს იყო.

დაე, ყველა თრთოდეს და კრთოდეს, ვინც კი, ნებით თუ უნებლიედ, ერანთან „ძმობას“ თურქეთთან, ან სხვა რომელიმე „მესამე ქვეყანასთან“ (რუსეთს გულისხმობდნენ) ყმობას ამჯობინებს!

გარედან „ტკბილად მოტანილ“ მუქარას კახეთის სასახლის კარზე შინაური ტრაგედია მოჰყვა. კონსტანტინე-მირზა სასახლიდან ახალი ფეხგადგმული იყო, რომ მამამისი ალექსანდრე მეფე ლოგინად ჩავარდა „რაღაც“ მძიმე ავადმყოფობით ხელ-დარეული.

შვილებმა, დავითმა და გიორგიმ, მამის სიკვდილს აღარ დაუცადეს და ტახტის დასაუფლებლად თავიანთი „დასებით“ ერთმანეთს დაეტაკნენ.

უფროსი უფლისწულის — დავითის მომხრენი უფრო ძლიერნი აღმოჩნდნენ და გიორგიმ თურქეთში გასაქცევად შეკაზმა ცხენი.

დავითის „თანამოდასენი“ თურქეთს შეუშინდნენ, გიორგის ფეხებში ჩაუვარდნენ და ძმასთან შერიგება სთხოვეს.

გიორგიმ ჭერჭერობით დათმო, დავითის მეფობა სცნო და თვითონ საუფლისწულოს დასჯერდა.

მოულოდნელად ალექსანდრე მეფე სიკვდილს გამოექცა და ფეხზე დამდგარმა ისევ შეაბიჯა სამეფო სადარბაზოში.

მაგრამ დავითმა მეფობის დათმობა აღარ მოისურვა და მამას სამეფო ინსიგნიები — დროშა, გვირგვინი, ზოსტერ-სარტყელი და ხმალი — მკაცრი სიტყვით გამოსთხოვა.

მკითხველს ახსოვს ავგიორგი, რომელმაც 1511 წელს კახეთის ტახტისათვის თავისი მამა მოკლა — მეფე ალექსანდრე I. ხოლო ახლად გამეფებული დავითი პატივმოყვარეობით, სიფიცხითა და ავზნიანობით ძალიან ჰგავდა ავგიორგის. ამნაირი ბუნების კაცს მართლა შეეძლო მამის მოკლა.

(ვაითუ, ცუდად იყო დაცდილი კახეთის ტახტზე სახელი „ალექსანდრე“ — აუცილებლად შვილს რომ უნდა მოეკლა იგი!).

შეშინდა მოხუცი მეფე და გაუგზავნა მოძალადე შვილს სამეფო დროშა, გვირგვინი, ზოსტერი და ხმალი.

მეფობა აიყარა, ბერის ჩოხა ჩაიცვა და ალავერდის მონასტერს მიაშურა.

ახალმა მეფემ თავი დამშვიდებულად იგრძნო.

მაგრამ ისევ აიშალნენ დავით მეფის მოწინააღმდეგე თავადები, შეუჩინდნენ გიორგი ბატონიშვილს: ოლონდ შენ გვიბრძანე, დავითს ყელს გამოვჭრით და მეფედ დავსვამთ, თუ არა და, არც შენ დაგინდობთ სასიკვდილოდო.

გიორგიმ ჭერ უარი თქვა: ძმას ხატზე და ჯვარზე შევფიცე და ახლა როგორღა ვუღალატო!

მაინც არ ეშვებოდნენ თავადები. საარაგვოს დიდი მფლობელი ნ უ გ ზ ა რ ე რ ი ს თ ა ვ ი ც მიიმხრეს და მისი ძალმოსილებით დაიმედებული გიორგი მეფე ძმის წინააღმდეგ აამხედრეს.

ერთ დღეს ქართლის მეფე გიორგი მეათეს მიეწვია ტფილისში სტუმრად კახელი ნათესავები — დავით მეფე და მისი ძმა გიორგი ბატონიშვილი.

ორივე ძმა თავთავისი ამალით გამოცხადდა ნადიმზე.

რამდენიმე დღე ინადიმეს და ინადირეს.

უკანასკნელ დღეს სანადიმო სუფრაზე დავითმა შენიშნა, რომ გიორგი ღვინოს იპარავდა და თანაც ლამაზ სახეზე რალაც მღელვარების დაღიც აღბეჭდვოდა.

სტუმარმასპინძლობა დასრულდა.

უკვე დამდებოდა, როცა სტუმრები ტფილისიდან გავიდნენ და კახეთის გზას დაადგნენ.

დავით მეფე წინ მიდიოდა თავისი ამალით.

გიორგი და მისი მომხრენი ფეხს ითრევდნენ და უკან რჩებოდნენ.

თურმე ახლა უნდა აღსრულებულიყო მათი განაზრახი: ცოტა კიდევ ეცლიათ და როცა ნაღვინებ მეფეს გზა და ღამე მოთენათავდა, უეცრად უნდა დასცემოდნენ და მის ამალასთან ერთად აეკუწათ.

მაგრამ გიორგის მხლებლებს ერთი კაცი ჩამოშორდა და გაუჩინარდა — ბ ა რ ა მ ჩ ო ლ ო ყ ა შ ე ი ლ ი. დავით მეფეს წამოეწია და აცნობა მისი ძმის განზრახვა.

შემოტრიალდა დავით მეფე და ჯიქურ დაეტაკა შეთქმულებს.

— ძმაო, ძმის მოსაკლავად იარაღი აგისხამს და აჰა, აქა ვარ და, თუ ვაეკაცი ხარ, შემომკარი! — შესძახა დავითმა გიორგის.

წახდა გიორგი.

მისი ამაღაც დაიბნა და დადებდა.

დავითმა თავისიანებს ანიშნა და ყველანი შეიპყრეს.

დავითმა ძმა თორლას ციხეში ჩააგდო და ჩაჰკეტა. მისი მომხრენი ჭოეთის ციხეში ჩაჰყარა, რამდენიმე დღის შემდეგ იმათგან თორმეტი აარჩია და ამავე ციხის კედლებზე გადასჩეხა, ხუთს თავები დააყრევინა, დანარჩენები ბნელსა და მყრალ ჭურღმულებში ჩააქვესკნელა.

ბერად შემდგარი ალექსანდრე ალავერდის ტაძრად იდგა და მისი ოჯახის უბედურებას ცხარე ცრემლით დასტიროდა.

დავითი გრძნობდა, მამა მის საქციელს აუგად რომ იხსენიებდა და მოხუცის სიკვდილს მოუთმენლად ელოდა. ალექსანდრე კი სიკვდილს ასე იოლად არ აპირებდა. შვილს ისედაც ეჩვენებოდა, რომ ბებერი მამა უკმაყოფილო წარჩინებულთა „მომავალი საიმედო გმირი“ უნდა ყოფილიყო. შესაძლოა, ეჭვით დასნეულებული დავით მეფე მოხუცი მამისგან შეთქმულებასაც გამოელოდა.

დავითმა ალავერდის ტაძარში სიარულს მოუხშირა. მამაზე თვალს ფხიზლად იჭერდა. ხოლო მამა შვილს გაურბოდა.

ერთხელ გაანჩხლებულმა დავით მეფემ ზედ ტაძრის შესასვლელში ალექსანდრეს ერთი უახლოესი კაცი თავის მხლებლებს ხმლებით ააჩეხვინა.

გაცოფებულმა ალექსანდრემ ცოდვილი შვილი საშინელი წყევლით გადასცა ხატზე.

მამა-შვილის მტრობა ისევ „რუსეთის საკითხმა“ გაანელა.

ალექსანდრეს, სანამ იგი ბერად შედგებოდა, მოსკოვში მორიგი ელჩობა ჰყავდა გაგზავნილი, ს ო ლ ო მ ო ნ ი ს ა დ ა ლ ე ვ ა ნ ი ს მოთავეობით. რუსეთის მაშინდელ მეფეს, ბორის გო-

დუნოვს, ალექსანდრე ისევ ჯარს სთხოვდა, მტრად გადაკიდებული ჩრდილოელი მეზობლის -- საშამხლოს დასაპყრობად.

ელჩები მოსკოვიდან სწორედ მაშინ მობრუნდნენ, როცა კახეთში ახალი მეფე, დავითი, შემონაზვნებულ მამასთან ესოდენ დანასისხლობაში ჩაეარდნილიყო.

სოლომონსა და ლევანს მოსკოვიდან ბორის გოდუნოვის ელჩებიც ჩამოპყვნენ — ნ ა შ ჩ ო კ ი ნ ი და ლ ე ო ნ ტ ი ე ვ ე — დავითმა სტუმრებს ოჯახური ორომტრიალის ამბავი დაუმალა და მამამისი მათან შესახვედრად მოიწვია.

ალექსანდრეს მისგან დაწყებული დიდი „ჩრდილოური საქმისაგან“ გულგრილად გვერდის აგლა არ შეეძლო და რუს სტუმრებს დიდის ამბით შეხვდა.

ბორის გოდუნოვი კახეთის მეფეს ჯარით დახმარების მორიგ პირობას უთვლიდა, სამაგიეროდ იგი კახეთის სამეფო კარისაგან ახალ ერთგულების ფიცს ითხოვდა.

ქართველებმაც ხელახლა შეუთვალეს ერთგულება რუსთ ხელმწიფეს.

ამჯერად ერთგულების ფიცს ხელი მოაწერეს: მეფე დავითმა, მისმა მცირეწლოვანმა ძემ თ ე ი მ უ რ ა ზ მ ა და ალექსანდრე მეფედ ყოფილმა.

ის იყო, რუსი ელჩები კახეთიდან უნდა გაბრუნებულიყვნენ, რომ შიკრიკებმა ამბავი მოიტანეს: ნუგზარ ერისთავს დარიალის კარი დაუკეტნია და კახელთაგან არც სტუმარს და არც მასპინძელს გატარებას არ უპირებსო.

დავითმა ლაშქარი შეპყარა და არაგვისაკენ გაემართა. ნუგზარი დაფრთხა და მოლაპარაკება ითხოვა. კახთა მეფემ მკაცრად მოითხოვა ერისთავის მორჩილება და მძევლად მისი შვილის გაგზავნა. ნუგზარი დათანხმდა. კახეთის ხელმწიფის ქვეშევრდომობაც აღიარა, დარიალიც გახსნა და თავისი ძე ზ უ რ ა ბ ი მძევლად გაგზავნა გრემის სასახლეში.

1602 წლის 16 ოქტომბერს დავით მეფე რუს ელჩებს უკანასკნელად შეხვდა და რუსეთისაკენ სწრაფად გასტუმრებას შეჰპირდა. მაგრამ იმავე დღეს მოულოდნელად ავად გახდა და 21 ოქტომბერს გარდაიცვალა.

ოთხი თვეც ვერ მოათია სამეფო ტახტზე.

დარჩა ქვრივი დედოფალი --- ქ ე თ ე ვ ა ნ ი (აშოთან მუხ-

რან-ბატონის ასული, უმრწემესი დაი მკითხველისათვის ცნობილი დედისიმედისა — ქაიხოსრო ათაბაგის მეუღლისა), ძე — თ ე ი მ უ რ ა ზ ი და ასული — ე ლ ე ნ ე .

ტახტი, კაცმა რომ თქვას, ცამეტი წლის თეიმურაზს ეკუთვნოდა, მაგრამ პაპამისმა მონაზვნის ჩოხა მაშინვე გაიძრო და ისევ მეფობას დაუბრუნდა.

ხელახლად გამეფებულმა ალექსანდრემ შვილი, გიორგი ბატონიშვილი, თორღას ციხიდან გამოუშვა და მასთან ერთად ისევ „რუსეთის საქმეს“ მიუბრუნდა.

ჩრდილო კავკასიიდან შიკრიკებმა ამბავი მოიტანეს: დაპირებული რუსის ჯარი, საშამხლოზე რომ უნდა ელაშქრა, არსად ჩანსო.

ალექსანდრე გაბრაზდა და საყვედურებით აავსო ნაშროკინი და ლეონტიევი.

ელჩებმა „მოვლენათა განსჯა“ სცადეს, მაგრამ მეფემ აღარ მოუსმინა მათ.

მერე ისევ მოღბა და ჩრდილოელი სტუმრები დიდის პატივით და „ფიცის წიგნით“ გაისტუმრა.

ეს მერამდენედ იცვლებოდა „წყალობის სიგელი“ რუსეთიდან და „ფიცის წიგნი“ კახეთიდან!

კვლავ გაატანა ალექსანდრემ რუს ელჩებს თავისი დესპანეზი — ბერძენი არქიმანდრიტი კ ი რ ი ლ ე ქ ს ა ნ თ ო ზ უ ლ ო და მდივანი ს ა ბ ა .

გამობრუნდნენ ქართველი ელჩები. ისევ გამოაყოლა ბორის გოდუნოვმა თავისი დიპლომატები — ტ ა ტ ი შ ჩ ე ვ ი და ი ვ ა ნ ო ვ ი . ამათ ალექსანდრეს დიდი საჩუქრები მოართვეს და „ახარეს“: რუსთა ჯარი ემზადება საშამხლოზე სალაშქროდ და, როგორც კი ჩრდილოეთიდან რუსები ამხედრდებიან, სამხრეთიდან შენ გაეშურეო შენის კახელებით!

მაგრამ ყოველგვარი პოლიტიკური განაზრახვი და მონახავი სავესებით უნდა აშლილ-დაშლილიყო ევროპა-აზიის კავკასიურ გზაკვანძთა გასწვრივ, რადგან...

რადგან შაჰ აბასი უკვე აღმჯდარიყო სალაშქრო უნაგირზე!

იმკამად კიდევ ერთი, — მკითხველისათვის დიდად საყურადღებო ამბავი მოხდა.

დავით მეფის ქვრივმა დედოფალმა ქეთევანმა გადაწყვიტა, რომ კახეთის სასახლის კარზე დატრიალებული უბედურებანი მისი შვილებიანთის, თეიმურაზისა და ელენესთვის, ღიდი ხიფათის მომასწავებელი უნდა ყოფილიყო. მართლაცდა, - - რაკი პაპამ შვილიშვილს „კანონიერი ტახტი“ წაართვა და თავისი შვილიც გიორგი ციხიდან გამოუშვა, ეს იმას ნიშნავდა, რომ მოხუცი ალექსანდრე მეფობას გიორგის დაუტოვებდა, ხოლო გიორგი შეეცდებოდა თავისი ძმისწული თეიმურაზი, ვითარცა „კანონიერი ტახტის მემკვიდრე“, როგორმე თავიდან მოეშორებინა (სასახლის კარზე კარგად იციან „თავიდან მოშორების“ საშუალებანი...).

ქეთევანს მისი დაობლებული ოჯახის ქომაგად საერთოდ აღარავინ ეგულებოდა კახეთში. დავითის მომხრე თავადები, ალექსანდრესა და გიორგის შიშით, სპარსეთში გადახვეწილიყვნენ და შაჰ აბასის „მწყალობელი კალთისათვის“ შეეფარებინათ თავი.

ერთადერთი, ვინც ქეთევანს „ყველასგან უშიშრად“ ერთგულებდა, იყო ქ ა ი ხ ო ს რ ო ჩ ო ლ ო ყ ა შ ვ ი ლ ი-ო მ ა ნ ი-შ ვ ი ლ ი (ეს ბოლო გვარი მამის --- ომანის --- საპატიოდ დაირქვა).

ბრწყინვალე ვაჟკაცი იყო ქაიხოსრო, ასოვანი და პირამვენიერი, ნიჭიერი სარდალი და მამაცი მხედარი, ღვთივმომადლებული პოეტი („ომანიანის“ ავტორი). იგი მზად იყო სიცოცხლეს გაეწირა „საოცარი, ღვთაებრივი ქეთევანისთვის“.

მაგრამ ქეთევანი გაურბოდა მაღალზნეობრივი რაინდის სამსახურსა და სიახლოვეს, რადგან... უკვე კანტიკუნტად ისმოდა ავი ენის სისინი...

თეიმურაზისა და ელენეს გულისათვის ერთბაშად რუსმა და სპარსელმა ელჩებმა გამოიდგეს თავი. ისედაც, ტატიშჩევსა და ივანოვს დავალებული ჰქონდათ საქართველოში შეერჩიათ საცოლეს ბორის გოდუნოვის ვაჟისათვის და საქმრო ასულისათვის. ელენე და თეიმურაზი პირდაპირ „ზედგამოჭრილი“ სადედოფლო და სასიძო იქნებოდნენ რუსეთის ტახტისათვის.

მაგრამ შაჰ აბასის ელჩი მაჰმად-ბეგი არ თმობდა: თეიმურაზი და ელენე სპარსეთს უნდა წავიყვანოო უთუოდ, რადგან შაჰს სურს თეიმურაზი იშვილოს და ელენე ცოლად შეირთოს!

„მოყვრობის სასწორი“ სპარსეთმა გადასწონა.

ქეთევანმაც ამ სათნო და ჭკვიანმა ქალმა, სხვა გამოსაველი ვეღარ იპოვნა და, მამამთილ-მამზლის შიშით, შვილები ლომის პირში ჩაჰყარა: მოიხმო შერმაზან ჩოლოყაშვილი (კიდევ ერთი ჩოლოყაშვილი, რომელსაც ის ენდობოდა), ფიცის ქვეშ ჩააბარა ორივე შვილი — თეიმურაზი და ელენე — და გაატანა ერანს, შაჰ აბასთან შესავრდომებლად და შესაფარებლად!

სხვა რაღა უნდოდა შაჰ აბასს?!

თავისი ნებით მოდიოდნენ საქართველოდან „იოსებ მშვენიერის მსგავსი ჭაბუკები და მთვარის სახის მქონე ქალწულები“. რაც მთავარია, ახლა მას ორი კახელი უფლისწული ჰყავდა თავის „ქართულ საბუღარში“ — ბიძა-ძმისწული, კონსტანტინე და თეიმურაზი. პირველი უკვე სავსებით „გათათრებინა“ შაჰ აბასს. მეორესაც, იმედია, მალე გაათათრებდა!

პირველი შეხვედრისთანავე ძალიან დაუყვავა და მოუალერსა აბასმა თეიმურაზს. ქართულად გამოელაპარაკა, ქართულად გამოჰკითხა ყოველივე.

ლექსების შეთხზვა შესძლებია ქართველ „მირზას“.

მამაც თურმე „პოეტი“ ჰყოლია, — დავითს „ქილილა და დამანა“ უთარგმნია ქართულად.

თურმე დედამისიც „პოეტობს“, — „ანბანთქება“ დაუწერია ქეთევანს.

(თვითონაც პოეტობდა „ერანის ლომი“).

ძალიან ჭკვიანი და დამჯერე იქნება ეს მეოცნებე ქართველი ყრმაო, — იფიქრა შაჰმა.

პირველი დღიდანვე ხელმწიფემ „კეთილად შეიწყნარა და პატივსა უყოფდა თეიმურაზს და ასწავებდა წიგნსა და ენასა სპარსთასა“.

თეიმურაზიც დიდის გატაცებით ერთვოდა „სპარსული ენის სიტკბოსა და მუსიკობასა“.

1603 წელს შაჰ აბასმა ომი აუტეხა ოსმალეთის სულთანს. ორი ურჩხულის რკენა-ჭიდილი ამჯერად, მცირე შესვენებებით, 1639 წლამდე გაგრძელდა.

ამ ომში შაჰ აბასის თავიდათავი ამოცანა ეს იყო: დაებრუნებინა თურქეთისაგან წართმეული ერანული მიწები და ამიერკავკასია მთლიანად; გამორჩევით, საქართველო დაეპყრო ისე მტკიცედ, რომ აღარასდროს მისი დაუფლების იმედი აღარ დარჩენოდათ არც მოსისხლე ოსმალეთს და არც „მეგობარ“ რუსეთს.

პირველად ერანელები და თურქები ერთმანეთს დაეტაკნენ 1603 წლის ზაფხულში, სოფელ სუფიანთან, სალმასის ოლქში. თურქები დამარცხდნენ და უკუიქცნენ. შაჰი ჭენებით დაედევნა, თავრიზს დაეძგერა, აქაური ბეგლარბეგი ალი ფაშა ზარხოში ტყვედ ჩაიგდო და თვრამეტდღიანი ალყის შემდგომ ქალაქსაც დაეუფლა.

თავრიზიდან არაქსისაკენ წამოემართა შაჰ აბასი, მდინარე გადმოლახა, ჯულფა აიღო, ნახიჭევანიც მიაყოლა და 16 ნოემბერს ერევანთან დასცა ბანაკი.

ერევანში დიდძალი თურქობა იდგა. ციხეც ძლიერ გაემაგრებინათ და გაემაგრებინათ მტრის მოსაგერიებლად.

შაჰმა ერევანს ალყა შემოარტყა. „ეს ალყა გაგრძელდა სრულად ცხრა თვე და ათი დღე“.

პირველმა იერიშებმა უნაყოფოდ ჩაუარა „ლომს“. სპარსული ჯარების წინ ადგილობრივი სომხური მოსახლეობა გაირეკა და თურქთა ზარბაზნებს უსაზმნოდ შეაეღიტა.

დეკემბრის მიწურულს შაჰ აბასმა სულთან მეჰმედ III-ის სიკვდილი შეიტყო. თურქეთის ტახტზე გარდაცვლილის შვილი ასულიყო. — თოთხმეტი წლის აჰმედ I (1603-1617 წწ.). სახელმწიფო საქმეების მოთავეობა თურმე აჰმედის დედას აუღია ხელთ.

გაიხარა შაჰ აბასმა, — სადღედაკაცოდ გამხდარა ოსმალთა მკვეყანაო.

მაგრამ ორი კვირის თავზე ახალი ამბავი ჩამოუტანეს აეშა-

გვმა სტამბოლიდან: გურჯი მეჰმედ ფაშა დაუწინაურებიათ ოსმალთა სატახტოში — სასახლის აღად დაუნიშნავთ და იღუმალ მისთვის მიუწოდებიათ თურმე სახელმწიფოს მოვლავატრონობა. ყრმობისას საქართველოდან გატაცებული და გამაჰმადიანებული ქართველი ყოფილა მეჰმედ ფაშა, დიდად ჭკვიანი და მამაცი ვაჟკაცის სახელი ჰქონია დავარდნილი მთელს თურქეთში.

უუჰ, ეს ქართველები!..

და შაჰ აბასმა ალექსანდრე მეორესა და გიორგი მეათეს შემოუთვალა, — თქვენ-თქვენი კახელებითა და ქართლელებით სასწრაფოდ მომეშველეთო.

ალექსანდრეს ჩამოსაყვანად მისი შვილი კონსტანტინე-მირზა გაგზავნა, ხოლო გიორგისთან — თავისი უახლოესი ღულამი, გათათრებული ქართველი თამაზ-ყული-ხანი.

გიორგი მაშინვე წავიდა ერევანს ქართლელთა ჯარით, შაჰს ეახლა, მასთან „საუბრით განდიდებული შეიქნა, ხელმწიფური წყალობით შეიმოსა და ყველასაგან გამორჩეული ვახდა“.

ხოლო ალექსანდრე აგვიანებდა. სულ ცოტა ხნის წინათ ისევ „შეეშალა“ კახეთის მეფეს, თურქეთის საამებლად და ერანის გასაჯავრებლად: ვანჯის ბეგლარბეგს ქაიხოსრო ფაშას დაუმოყვრდა ალექსანდრე, — მისმა შვილმა გიორგიმ ქაიხოსროს ასული შეირთო ცოლად. ქაიხოსრო ფაშა ყვარყვარე ათაბაგის შვილი იყო და ოჯახშიც ყველა ქრისტიანი ჰყავდა, მაგრამ ფაშა მაინც თურქეთის მოხელე იყო და მასთან დამოყვრება დიახაც უნდა სწყენოდა ერანის ხელმწიფეს...

მძიმე ზამთარი იდგა და ერევნის მოალყეებს ყინვა ისე უტყერდა, რომ „ტანში სული იყინებოდა“.

კახთა მეფისა და კონსტანტინე-მირზას დავგიანების გამო უემური შეჰყოდა შაჰ აბასს.

მხოლოდ ერთხელ გაიხსნა წარბი დაბოღმილმა „ლომმა“ იმ დღეებში. ინდოეთის ხელმწიფეს — ჯელალ-ად-დინ მოჰამედ აქბარის დიდძალი ძღვენი გამოეგზავნა მისთვის.

ძღვენის გადაცემას დაესწრო შაჰ აბასის ელჩი ინდოეთში მანუჩარ-ბეგი, ესეც გათათრებული ქართველი.

მთელს ამ მისართმეველში ერთი ნივთი მოიწონა ყველაზე მეტად შაჰ აბასმა — ოქროსქარქაშიანი ხმალი, სულ ერთიანად

ქვირფასი თვლებითა და წვრილი აღმასით მოქედნილ-მოსეცადებულნი.

— ილბლიანი არის ეს ხმალი, — უთხრა შაჰს მანუჩარ-ბეგმა, — ყველაფერი სასიკეთოდ წარიმართება, როცა მას ხელში მოიმარჯვებ.

და ამ ინდური ჯადოსნური ხმლის „პირველ სიკეთედ“ კახეთის მეფისა და კახელთა ჯარის მოსვლა მიიჩნიეს სპარსელებმა.

კონსტანტინემ თურმე „ტკბილი სიტყვით, დაპირებებითა და მუქარით დაითანხმა მამამისი“, წამოსულიყო ერევანს და ჰხლებოდა შაჰს.

დიდის პატივითა და ზარზეიმით შეაგება შაჰ აბასმა ერანელთა ბანაკი კახელ სტუმრებს. „ყველა ამირები და სახელმწიფოს წარჩინებულნი ალექსანდრეს შესახვედრად გაეშურნენ და ის სრულის დიდებითა და პატივით მოიყვანეს“.

შევიდა ალექსანდრე შაჰის კარავში, მიეახლა ტახტზე მჯდარ აბასს და მის სახელზე გრემის ზარაფხანაში მოჭრილი ოქროს ფულები სულ ბლუჯა-ბლუჯად აყარა და აფრქვია თავზე.

ფეხზე წამოიჭრა სახეგაბრწყინებული ერანის „ლომი“ და „გულწრფელი სიყვარულით“ გადაეხვია კახეთის „ბებერ მგელს“.

რაკი „ორივე გურჯისტანის“ — ქართლისა და კახეთის — ჯარები თავისად დაიგულა, შაჰ აბასმა საიერიშო სამზადისი ბრძანა.

ჯერ ლალუმები ჩაუდეს და ჩაუფეთქეს ციხის ბალავერებს. მერე საიერიშო უბნები გაუნაწილა ჯარებს აბასმა.

შაჰ აბასმაც კარგად იცოდა ძველი ქართული საომარი განაწესი: „წესადცა არს წინამბრძოლობა ქართველთა“. და მეწინავე-მოიერიშე ჯარებად, გვერდიგვერდ ქართლელთა და კახელთა რაზმები წაიმძღვარა.

სამი დიდი ჯგარი გამოიტანეს ქართველმა ჯვარისმტვირთველებმა გამჭვირვალე ქსოვილებით შებურვილნი და წინ აღუმართეს ქართლისა და კახეთის ჯარებს.

— ამ ქართულმა ჯვრებმა უნდა გვიწინამძღვროს ბრძოლაში, — მშვიდად და მტკიცედ თქვეს ქართველმა მეფეებმა.

შაჰს ხმა არ ამოუღია.

ბრძოლა დაიწყო.

ქართველები მოწყდნენ და გაქანდნენ ყოყინითა და იარაღის ზრიალით.

გამოუხტნენ თურქები „აღლაჰ-ილაღლაჰის“ ბღავილით.

უკუაქციეს ქართველებმა სასტიკი ჩეხვით.

შებრუნდნენ და უკანვე შეცვივდნენ ციხეში თურქნი.

ქართველებიც მიჰყვნენ სულმოუთქმელად.

და „მაშინ უმეტესად ყოველთა ქართველთა მოიჭირვეს და გარდავიდნენ ვალაგნებში და იომეს დიდად და სანამდი ყიზილბაშნი შევიდოდეს, ქართველთა აიღეს სიმაგრენი, აჩვენეს ძალი და მოჭირვება ყაენსა და აღიღეს ციხე“.

! უკვე აღებულ ციხე-ქალაქში ერანელებიც შეცვივდნენ „აღლაჰ-ილაღლაჰის“ ყივილით.

იდგა 1604 წლის აგვისტოს მიწურული.

ქართველებმა ერევანი ოსმალებს გამოჰგლიჯეს და სპარსელებს მიართვეს.

საზღვარი აღარ ჰქონდა შაჰ აბასის სიხარულს.

მორღვეული კარიზმეები

აღტაცებულმა შაჰ აბასმა ნაომარი ქართველი მეფეები კარავში მიიწვია.

! ორივე გულში ჩაიკრა — „მხურვალედ“, „ძმურად“; გულ-ამომჯდარი „სიყვარულით“.

ორივე აღავსო უსაზღვრო მადლობით.

ორივე „განაძლო“ უძვირფასესი ძღვენითა და მისართმეველით.

! გიორგის სამი ერანული სოფელი აჩუქა — ფუშთუქუნი, გილიანი და ლაჰიჯანი; თანაც ყოველწლიურ ჯამაგირად სამასი თუმანი დაუნიშნა ქართლის მეფეს.

! ალექსანდრეს კი შეიდასი თუმანი აღუთქვა ყოველწლიურ ჯამაგირად.

! არც ერთ მეფეს აზრი არ დაუკრავს, რომ ჯამაგირის დანიშვნა ერანის შაჰის სამსახურში ჩვეულებრივ „მოხელედ“

შესვლასა და დამოუკიდებელ მეფობაზე ხელის აღებას მოასწავებდა.

შაჰს ხითხითი აეშალა, როცა ამოდენა „წყალობით“ გაოცებული გიორგი და ალექსანდრე მის წინაშე ოდრიკალად მოიკეცნენ და თავები მიწას დაატაკეს.

მერე აიშართნენ და გამოსამშვიდობებლად გაემზადნენ სიხარულით სახელაღწილნი.

მაგრამ რატომ ჩქარობენ გურჯები?!

ნუ იქნებიან ასე უმადურნი და ასე ერთბაშად ნუ მიატოვებენ მათ „მწყალობელ“ და „მოყვარულ“ სპარსეთის ხელმწიფეს.

ამოდენა „პატივი და წყალობა“ რომ მიიღეს, ახლა იქნებ „მწყალობელსაც“ აქვს „მცირე რამე სათხოვარი“ სამაგიეროდ?

დიახ, თურმე ჰქონია!

და უთხრა ქართლის მეფე გიორგის შაჰ აბასმა:

— ოსმალეთის სულთანი, მართალია, ჩემი მტერია, მაგრამ უფრო მეტად შენი მოსისხლე გახლავს. ჰოდა, მე მოველ, შენი სისხლის დამაქცევარი გავანადგურე და საჩუქრად არაფერი მეკუთვნის?

— ?! — გაოცებული და გაოგნებული შეაშტერდა შაჰს გიორგი.

რა ხელად დაუვიწყნია შაჰ აბასს წელანდელი ბრძოლის სურათი! აკი თურქებს ერევანი ქართველებმა დააგდებინეს ხელიდან და სპარსელებიც მზამზარეულ სუფრაზე მობრძანდნენ, მაგრამ... ვაი შენ, მცირე ხალხო და მცირე ხალხის პატრონო!.. ლომთან ბატკნები რას გააწყობენ!.. მაინც რა სურს და საით უმიზნებს ერანის ლომი?!

და ისევ შაჰმა „დაიხსნა“ ქართველი მეფე „უხერხული გაოგნებისგან“:

— დებედის ხეობა — ლორე და აღჯაყალა უნდა მომცე საჩუქრად! — ბრძანა მკვეთრი, ცივი ხმით.

— ეს ჩემი თხოვნაა! — მაშინვე დასძინა „ტკბილად.“

გული დაელახვრა და ტვინი დაეწვა გიორგის.

„ვაი, შენ, ჩემო თავო და ჩემო ქვეყანა! ლორე, თეთრციხე — აღჯაყალა, ბერდუჯი — დებედა!.. ორასი წელიწადი

წყდება ქართველი ხალხი ამა სამხრეთული კარიბჭეების და-
საცავად და შესანახავად. მათი შენახვა ინახავდა ამდენ ხანს
სრულიად ქართლის მიწა-წყალს... ხოლო ახლა... ნუთუ ახლა
უნდა ღაირღვეს და დაილეწოს საქართველოს სამხრეთული
ციხე-გალავანნი?!”

— უნდა მაჩუქო! — ისევ გაისმა ბრაზჩაღვრილი ყინიანი
ხმა.

გიორგიმ შაპს თვალი უტეხად მიაპყრო და მწუხარე ღიმი-
ლით სახედასერილმა მიუგო:

— მე შენგან, მამიჩემისა და ჩემის სამსახურისთვის, ჯილ-
დოდ სხვა ქალაქს ველოდი და არა ჩემი საზღვრებისა და ქა-
ლაქების წართმევას!

ეს სწორედ გაბედულად იყო ნათქვამი, მაგრამ სავსებით
უსაზმნოდ.

შაპ აბასის „თხოვნა“ ბრძანებას ნიშნავდა. თუნდაც „სა-
ჩუქრად წაღებას“ წართმევა რქმეოდა!

ახლა ალექსანდრეს ეუბნებოდა აბასი, ისევ მკვეთრი და
ცივი „ქართულით“:

— შენ კაკ-ენისეღინ მხარე უნდა მომცე საჩუქრად!
ენა ჩაუვარდა „ბებერ მგელს“.

მაშ, ქართული ხელიდან მიდის კაკ-ენისელი, დიდი ქარ-
თული მხარე, საინგილო!

კახეთის სამეფოს აღმოსავლეთის კარიბჭეები ერღვევა!

პასუხიც აღარ იყო საჭირო. შაპის „თხოვნა“ ხომ ბრძანე-
ბას ნიშნავდა, შეუვალ ბრძანებას!

ეს „ქართული“ უნდა შეეგნოთ ქართველ მეფეებს, თო-
რემ... თორემ შაპ აბასი არ გახლავთ რომელიმე შაპ თამაზი,
შაპ ხუდაბენდე, თუ რომელიდაც აყროლებული სუნიტი ზონ-
თქარი, — აქამდე რომ კბილები ემსხვრეოდათ და წვივები
ელეწებოდათ ქართულ მიწა-წყალზე იერიშების ქამს!..

ლორეს მხარეს ერანის პროვინციულ სახანოდ აცხადებს
შაპ აბასი და აქ მმართველად ნიშნავს გათათრებულ ქართველ
ფეოდალს.

! (არავენ ისე კარგად არ იცის, როგორც შაპ აბასმა: გათათ-
რებული ქართველი ქართველებისთვის სისხლით თათარზე
უარესია).

სულ მალე ლორეს მხარეში შაჰი სპარსულ „ბორჩალუს“ მომთაბარე ტომს ჩამოასახლებს დედაწულიანად და ამ ქართულ ქვეყანას ერთხელ და სამუდამოდ ერთიანად გაათათრებს...

კაკ-ენისელს, გინა საინგილოს, აგრეთვე ერანის პროვინცია-სასულთნოდ აცხადებს შაჰი, აქაც ერთ დიდ თურქმანულ მომთაბარე ტომს შემოასახლებს და აქაურობასაც პირწმინდად გაამუსლიმებს. აქაც მმართველად გაათათრებულ კახელ თავადს ნიშნავს აბასი (აკი გაათათრებული ქართველი ქართველებისთვის...).

პირველი „საჭადრაკო ხელი ქართულ დაფაზე“ შაჰს მოგებული ჰქონდა.

მაშ, ლორე და კაკ-ენისელი!

შაჰ აბასს ხელთ ეპყრა ორი მარწუხი, რომლითაც, როცა მოისურვებდა, მოუჭერდა და სულს ამოხდიდა საქართველოს! აღმოსავლურ და სამხრეთულ კიდურებზე დამბლა დასცემოდა ქართველთა ქვეყანას.

.

შაჰის ახალმა ბრძანებამ გამოარკვია ქართველი მეფენი. გიორგის ეუბნებოდა „ტკბილ-ქართულად“:

— მამაშენი სვიმონ მეფე დიდი მხედართმთავარი იყო, და ჩემი დიდი მეგობარი. ძალიან მიყვარდა მე ის. ძალიან მიყვარხარ შენც, ჩემო გიორგი. ჩვენ ერთად უნდა მოვსპოთ და მოვინელოთ ჩვენი მოსისხლე ოსმალნი. ახლა წადი, წაიყვანე ნუგზარ ერისთავი, შენი გურჯები და ოსმალური ციხიონები გამოყარე ქართლის ციხეებიდან და ამოწყვიტე დაუნდობლად!

ესა თქვა შაჰმა და იქვე მდგომ მეჰმანდარს (მესტუმრე) ანიშნა.

მეჰმანდარმა დიდი თასი მოართვა, შარბათით სავსე.

შაჰმა ჩამოართვა და გიორგის გაუწოდა:

— დალიე, ჩემო გიორგი, ჩვენი ძმობისა და სიყვარულის სადღეგრძელოდ დალიე!

გამოართვა და დალია გიორგიმ გულდანდობილად.

უსიამოდ აუზრიალდა ტანი.

„ხომ არ მომწამლეს ამ ურჯულოებმა?!“ — გაუელვა მეფეს.

კარვიდან გამოვიდა გიორგი მძიმე ნაბიჯით.

ქართველი დიდებულები ელოდებოდნენ გარეთ ჩარაზ-მულნი. ნუგზარ ერისთავიც იქ იყო.

ღულამები გამოცვივდნენ კარვიდან, გათათრებული ქართველები. გიორგის თვალ-მარგალიტით სავსე ტომარაკი გამოუტრბენინეს, — შაჰის „წყალობის“ წამოღება დაგვიწყნიაო — უთხრეს.

კიდევ ორი ღულამი გამოიჭრა კარვიდან. ხელში შაჰის „ახალი წყალობა“ ეჭირათ — ოქრომკედლითა და ზეზით ნაქარგი ხალათი.

წესი მოითხოვდა, — თავისი „ეროვნული ტანსაცმელი“ უნდა გაეძრო და სპარსული ხალათი შემოეცვა შაჰისაგან ნაწყალობევს.

მაგრამ გიორგიმ ქართული ჩოხა არ გაიხადა, ისე შემოიცვა გარედან სპარსული ხალათი, ამრეზილად და გულზიზლად. მისცვივდნენ დიდებულები და უჩუჩულებს: ნუ იზამ მაგას, თორემ „მწყენარ იქმნების“ და გარისხდებოაო შაჰი მწარედ გაეცინა მეფეს.

„ეწყინება და ეწყინოს! ასეც სჯობია, თორემ კიდევ რაღაცას მოგვთხოვს „საჩუქრად“! — თქვა, ცხენს მოახტა და გულჯავრიანად სწყვიტა მათრახი.

ყველანი ამხედრდნენ.

კარვიდან შაჰ აბასის ბოროტი თვალი მიშტერებოდა გაქმნებულ ქართველთა ახოვან ზურგებს.

„მშვიდობით, გიორგი მეფევე, სამუდამოდ მშვიდობით!“

— შენი შვილი და შვილიშვილები ჩემთან ცხოვრობენ და კახეთში რა დაგრჩენია, ასე რომ მიიჩქარი, — უთხრა ცბიერი ქირქილით შაჰ აბასმა ალექსანდრეს და ერთ ხანზე ასე „დააბა“ თავისთან „ლომმა“ „ბებერი მგელი“.

ალბათ, რაღაც ახალ „წყალობას“ უმზადებდა შაჰ აბასი კახელებს.

ერევნის ბეგლარბეგად შაჰ აბასმა დანიშნა ამირგუენ-ხანი, სიმამაცისთვის „ყვითელ ავაზად“ წოდებული ყიზილბაში.

თვითონ თავრიზს გადავიდა გამოსაზამთრებლად.

აქვე შაჰმა შეიტყო, რომ ოსმალთა ლაშქარი დაძრულა საომრად, ჯიღალ ოღლუსინან ფაშას სარდლობით.

მაშინვე ბრძანა შაჰ აბასმა: მდინარე არაქსის მარჯვენა ნაპირი გაამაგრეთ, ხოლო მარცხენა — დედაბუდიანად აპყარეთ, ყოველგვარი ნაშენები დაანგრეთ, ნათესები მოსპეთ, ყველაფერი კაცის ნახელავ-ნაამაგარი დასწვით და გააცამტვერეთ.

ეს ძველი, „ნაცადი საშუალება“ იყო მუსლიმანური სტრატეგიისა — კულტურულ დასახლებათა აყრა, გადაყრა, იავარქმნა, გაუდაბურება და გაუდაბნობება, რამეთუ მტერმა „ფეხი ვერ მოიკიდოს“ და „საზრდელი“ ვერ იშოვნოს გაუკაცრიელებულ და ნაცართუტად ქცეულ მიწაზე.

მძიმედ დააზარალა სომეხი ხალხი შაჰ აბასის ამ ურჯუტმა ბრძანებამ. მთელი აღმოსავლეთ სომხეთი, არაქსის მარცხენა მხარე, ერევანი, ჯულფა, ნახიჭევანი და მათი შემოგარენი სპარსელებმა დედაწულიანად აპყარეს და ერანის „დაწყევლილ გზებს“ გაუყენეს. კულტურული ხალხის ყოველგვარი ნახელავი, რაც წაიღეს — წაიღეს, რაც არადა, დაანგრის, დასწვეს და წარხოცეს პირისაგან მიწისა.

გარდა იმისა, რომ ეს გადამწვარ-გადალეკილი ქვეყანა ოსმალთა წინსვლას შეაკავებდა, — შაჰს ასეთი საზარელი ღონისძიებით მეორე დიდი საქმის გაკეთებაც სურდა: მკვიდრ მიწათმოქმედებას და ვაჭრობა-ხელოსნობას შეჩვეული სომხური მოსახლეობა სპარსეთის მრავალ უქმ მიწა-წყალზე სოფლის მეურნეობასა და ფულად აღებ-მიცემობას ააყვავებდა!

350 000 სომეხი გადაასახლეს.

დიდმა ნაწილმა მშობლიური კუთხის დაკარგვა და უცხო მიწის სიმწარე ვერ აიტანა და დაიღუპა...

სპარსელებმა დიდძალი ხალხი გარეკეს აზერბაიჯანიდანაც.

გეშინოდეს მარტის იდუსისა.

ქ ე ი ს რ ი ს ი ს ტ ო რ ი ა

ერთ საუბარში შაჰ აბასმა ალექსანდრე ვანთა მეფეს ვითომც „სხვათა შორის“ ჰკითხა: შენ და განჯა-ყარაბაღის ფაშა როგორ დაუმოყვრდით ერთმანეთს?

განჯის ფაშა ქართველი გახლავსო, ყვარყვარე ათაბაგიშვილი, — მაშინვე შეაგება ალექსანდრემ.

ქართველია, მაგრამ გათურქებული ქართველი და თურქეთის მოხელეო, — შეამყრალა პირში აბასმა.

ამის მეტი არაფერი უთქვამს მაშინ შაჰს. ან თქმა რაღა საჭირო იყო, შაჰი ალექსანდრეს ისევე არ ენდობოდა, მორჩა და გათავდა.

მაგრამ შაჰ აბასი ალექსანდრეში „ოსმალეთის მიმდგურობის“ გარდა რუსეთის ყმასა და აგენტსაც ხედავდა.

იმ ხანად ცინცხალი ცნობა მიეღო შაჰს კახეთიდან: თურმე რუსმა ელჩებმა — ტატიშჩევმა და ივანოვმა — თეიმურაზი და ელენე კი დაჰკარგეს, მაგრამ გიორგი ბატონიშვილს ბორის გოდუნოვის სახელზე ფიცის პირობა დაადებინეს (1605 წლის 1 იანვარი).

ალბათ, ახლა სულ აღარ გამიშვებსო შაჰი კახეთში, — გადაიწურა იმედი ალექსანდრემ.

მაგრამ ერთი თვის თავზე შაჰმა ქართველი მეფის გამგზავრების სამზადისი ბრძანა. მან ალექსანდრეს „ხელმწიფური პატივი სცა“, შეამკო „ძვირფასი ხალათებით, თაჯით, ჯილით, მურასა-ქამრით და სხვა საკადრისი საჩუქრებით“...

— შენ შენს კახეთში წახვალ და შვილსაც გაიყოლებ, შენს შვილს! — უთხრა შაჰმა ალექსანდრეს მოულოდნელად.

— ჩემს შვილს?!

— ჰო, შენს შვილსა და ჩემს გაზრდილს, დიდ ბატონიშვილ კონსტანტინე-მირზას.

ეს ისეთი მოულოდნელი ელდა იყო, რომ ალექსანდრე ვე-

ლარც კი მიხვდა, გაუხარდა თუ ეწყინა დაკარგული შვილის „დაბრუნება“.

„რატომ მატანს შვილს?!“ — დაუტრიალდა თავში გაოგნებულ მეფეს.

შაჰი თითქოს მიუხვდა და მაშინვე „აუხსნა“: კონსტანტინე-მირზა დანიშნულია შირვანის ბეგლარბეგად (ალბათ, მამას უნდა გაუხარდეს შვილის ასეთი აღზევება!), მას დღეიდან ჰქვია ხანი და ამირათა ამირა. იგი სპარსელთა ჯარებით მიეშურება შირვანის ციხე-ქალაქებიდან ოსმალთა გასაძევებლად; ამ საქმეში მამა შვილს უნდა დაეხმაროს, — ალექსანდრე კახელთა ჯარით უნდა წაჰყვეს შირვანში კონსტანტინეს!

ახლა, რაკი ყველაფერი გასაგები შეიქნა, ალექსანდრეს შეეძლო „დამშვიდებულიც და გახარებულიც“ ყოფილიყო.

მაგრამ ალექსანდრემ არ იცოდა მთავარი: წინაღამით შაჰ აბასს კონსტანტინე-მირზა თავისთან ჩაეკეტა და დიდხანს რაღაცას ეზრახებოდა მარტოდმარტოს.

ნაწყვეტ-ნაწყვეტად იბნეოდა შაჰის პირიდან იღუმალი სიტყვანი:

„ბებერი მგელი...“

„აღარ დაადგა საშველი სიკვდილს...“

„გიორგი ბატონიშვილიც ხომ...“

„უკვე დაუწყია, მეფობა...“

„ხოლო, შენ?!“

„ძალად ვინ გაგდებს...“

„უნდა მოჰკლა...“

„ორივე... ორივე...“

„შენი იქნება... კახეთიც, შირვანიც...“

1 თებერვალი იდგა, 1605 წლისა.

სისხამი, სუსხიანი დილა.

ალექსანდრე მზად იყო გასამგზავრებლად.

ამხედრებულიყო მისი მხლებელი კახთა ჯარიც.

გამოვიდა „დიდი ბატონიშვილი კონსტანტინე-მირზა“, შირვანის ბეგლარბეგი, ხანი და ამირათა ამირა.

მიეახლა და აკოცა ალექსანდრეს.

მამამ ვერ იგრძნო შვილის ბაგეთა სითბო.



„ძალიან ჰყინავდა. ალბათ ამიტომ“, იფიქრა ალექსანდრემ.

რატომღაც მაინც გაუელვა, — როგორ აკოცა იუდამ ქრისტეს...

მზად იყო კონსტანტინეს მხლებელი სპარსელთა ჯარი.

მზად იყვნენ მისი თანაშემწე სარდლები:

შაჰშირ-ხანი,

შამსი-ხან ყაზაყლარი,

ალი-ხან მოვაფეყი,

ბექთაშ-სულთანი,

ფიზრუ-სულთან მოყადამი,

ახი-სულთან ჯაგირი,

ალი-ხან სულთან შამს ადდინლუ,

ალი-სულთან არეში...

იღუმალი მზერით ზვერავდა შაჰის ბოროტი თვალი მიმავალთა ზურგებს — ქართველთა და სპარსთა, — რომელთაც მამა-შვილი მიუძღოდა — ქრისტიანი მამა და გათათრებული შვილი.

სიცივე იდგა ქვეყანაზე.

სიცივე იდგა ადამიანთა გულ-გვამში.

მ მარტს კახეთის საზღვარს მოადგნენ...

გიორგი ბატონიშვილი შემოეგებათ ორი ათასი კახი მეომრით.

მამა-შვილი მხურვალედ გადაეხვივნენ ერთმანეთს.

ძმები — კახეთის ტახტის მოცილენი — ცივად შეეგებნენ ერთმანეთს.

გიორგიმ მამას მოახსენა: რუსი ელჩები ეშურებიან შენთან შეხვედრასო.

— ოთხი დღის შემდგომ მივიღებ ძაგემში, — ბრძანა ალექსანდრემ და მაშინვე გაეშურა ძაგემისაკენ.

კონსტანტინეც გაჰყვა მცირე ამალით.

სპარსელთა ჯარი საზღვარზე შეგუბდა და დადგა.

გიორგი ბატონიშვილი თორღას ციხეში ავიდა, ჯარი დაშალა და რუს ელჩებს შეატყობინა: ძაგემს გაეშურეთ და 12 მარტს იქ მივიღებთო ალექსანდრე მეფე.

მაშინვე რუსმა ელჩებმა ერთი ფრიად საგანგაშო ამბავი გუნობეს გიორგი ბატონიშვილს: ჩვენ შევიტყვეთ, რომ კონსტანტინე-მირზა, შაჰის დავალებით, შეპყრობას ან სიკვდილს გიმზადებსო; ამიტომ ჩვენი რჩევაა, ყიზილბაშებს მოერიდო და საერთოდ ძაგემს წასვლაზედაც ხელი აიღეო.

გიორგიმ სისხლიერისგან ასეთი მუხანათობა არ ირწმუნა და ძაგემს მარტოდმარტო გაეშურა, უჯაროდ და უამალოდ.

10 მარტს ალექსანდრეს მანუჩარ დადიანისგან წარმოგზავნილი კაცი ეწვია და ლევან ბატონიშვილის წაყვანა ითხოვარდიშს (მკითხველს ახსოვს წინასწრობილად ნათქვამი: მანუჩარ დადიანს ცოლად ჰყავდა ალექსანდრე კახთა მეფის ასული ნესტან-დარეჯანი, რომელსაც შეეძინა ლევანი. თვითონ ნესტან-დარეჯანი მშობიარობას გადაჰყვა, ხოლო ყრმა ლევანი კახეთის სასახლის კარზე იზრდებოდა).

შეწუხდა ალექსანდრე, მაგრამ მაინც გაისტუმრა შვილიშვილი ოდიშს, დატვირთული „ნიჭითა დიდითა“.

რუსი ელჩებიც მოვიდნენ, მეფის სამყოფის ახლოს დაბინავდნენ და აუდიენციის დღეს — 12 მარტს დაელოდნენ.

11 მარტს ალექსანდრეს და გიორგის კონსტანტინე ეწვია, ყიზილბაშთა მცირე ამალით.

მეფემ შაჰის ნაჩქარი ხალათი ჩაიცვა — გაყიზილბაშებულის შვილის სასიამოვნოდ.

თითქოს სანაწეროდ იყო ატანილი იმ დღეს მოხუცი მეფე. იცინოდა, ოხუნჯობდა, „იშვებდა და იხარებდა“.

უსაზღვროდ უხაროდა მამას:

ისევ ჰყვარებიათ ერთმანეთი მის შვილებს, გიორგისა და კონსტანტინეს, ისე ტკბილად ესიტყვებიან, ექილიკებიან და ეხუმრებიან ერთმანეთს, როგორც ყრმობის ჟამს სჩვეოდათ; ისე თავდავიწყებით მისცემიან ძმები ძმურ სიყვარულს, თითქოს არასოდეს მათი ბავშვური სმენა არ წაურყვნია არც ქრისტეს, არც მაჰმადს და არც შაჰ აბასის სახსენებელს...

იმ დღეს კახეთის მეფესთან სადარბაზოდ იყვნენ რუსთველი ეპისკოპოსი, მისი ძმა, ცხენოსანი ჯარის სარდალი (ყორჩიბაში) აბელი ანდრონიკაშვილი და კიდევ ხუთი კახი თავადი. მაგრამ ისინი მალე გაეცალნენ მამისა და შვილების „ოჯახურ სიამტკბილობას“...

ის დღეც განესრულა.

გამომშვიდობებისას შაჰ აბასის გაზრდილმა „სხვათა შორის“ ჰკითხა მამასა და ძმას: ხვალ რასა იქმთ და რას ამირებთო?

--- ხვალ რუსის ელჩები გვესტუმრებიან, --- მიამიტური ღიმილით უთხრა ალექსანდრემ.

--- რა დროს? --- ისევ „სხვათა შორის“ იკითხა კონსტანტინემ.

--- ასე, საშუადღეოზე.

კონსტანტინემ მამა და ძმა მხურვალედ გადაკოცნა და წავიდა.

12 მარტი გათენდა.

ზარნაშოს კივილმა გამოაღვიძა ალექსანდრე.

მზე ჯერ არ ამოწვერილიყო და მოახსენეს: კონსტანტინე, მირზა გეახლათ ყიზილბაში ხანების, სულთნებისა და ამირების თანხლებითო!

მეფე გაოცდა.

შვილის ასე ადრიან წვევას არ მოელოდა.

თანაც, წუხანდელი გამომშვიდობების უამს, ასე უთენიად სტუმრობის თაობაზე არაფერი დაუბარებია კონსტანტინეს.

მაშინვე გიორგი ბატონიშვილი იხმო ალექსანდრემ.

გიორგიც სასწრაფოდ შემოვიდა.

კონსტანტინე მოვიდაო?!

ყიზილბაში სარდლები ახლანო?!

ალბათ, ერანიდან რაღაც ახალი ამბავი მოსულაო, - - დაასკვნეს მამა-შვილმა და მაშინვე სადარბაზო წვევა გაუგზავნეს სასულიერო და საერო რჩეულთ.

მაშინვე მოვიდნენ რუსთველი ეპისკოპოსი, მისი ძმა აბელ ანდრონიკაშვილი და ხუთი კახელი თავადი.

რუსი ელჩები გაახსენდა ალექსანდრეს. აკი მათი მიღება დღეისათვის ჰქონდა დანიშნული.

მაგრამ აღნათ მანამდე მოასწრებენ სპარსელებთან დარბაზობას...

კონსტანტინე-მირზა შემოვიდა ჯიქური ნაბიჯით, იარაღში ჩასილაღებული.

თავხედური გამოხედვა და მიმოხვრა ჰქონდა. იგი უკვე აღარ ჰგავდა გუშინდელ „ალექსანდრეს ძვირფას შვილს“ და გიორგი ბატონიშვილის „საყვარელ ძმას“.

თანაშემწე სარდლები — ხანები, სულთნები და ამირები — შემოჰყვენენ, ყველანი სრული აღჭურვილობით დალესილნი.

ალექსანდრე ღიმილით მიეგება სტუმრებს.

სპარსელებმა სალამი ძლივს გაიმეტეს და შეთავაზებას არ დაუცადეს, ისე მოირთხეს ფეხი ხალიჩებზე, იარაღის ქორილით.

„ზომ არ შევცდი, რომ ჯარი განვუტევე!“ — ავად გაუელგა გიორგის.

უცებ სასახლის მცველი შემოვიდა და ალექსანდრესა და გიორგის წაულაპარაკა: ყიზილბაშთა ჯარი შემოვიდა ქალაქში!

ყიზილბაშთა ჯარო?!

„ვთუ დედასა, ეს რა ჩავიდინე? რუსებს რატომ არ დავუჯერე და უჯაროდ მოვედი ძაგემში!“ — ისევ აეწეა ტვინი გიორგის.

ალექსანდრე მაინც არ ელეოდა სიმშვიდესა და სიღინჯეს.

კონსტანტინემ და „მისიანებმა“ აზრი დაიკრეს, რაზედაც უნდა ჰქონოდა ლაპარაკი კარისკაცს თავის მეუფეებთან.

აწრიალდა კონსტანტინე-მირზა. არაფერი მოხდესო მოულოდნელი, რუსებმაც არ მომისწრონო და, — ცივად, უტეხად უთხრა ალექსანდრეს: შირვანს ლაშქრობის თაობაზე მოვედითო სათათბიროდ!

ეს არ ყოფილა მოულოდნელი ალექსანდრესთვის.

აკი შაჰ აბასმაც დააბარა ერანიდან გამოსტუმრების ეამს: კონსტანტინე-მირზასთან ერთად შირვანს უნდა ილაშქრო შენის კახელებითო.

მაგრამ რაღა მაინცდამაინც რუსებთან შეხვედრას დაასწრეს და ახლა აიჩემეს შირვანს ლაშქრობა ყიზილბაშებმა და მათმა ბელადმა — გაყიზილბაშებულმა კონსტანტინე ბატონიშვილმა?!

აგერ, მეორე საათი ჩამოიქცა და ჩამოიწრიტა მშფოთვარე სიტყვა-სროლაში.

დარბაზში სიკვდილის გერში ტრიალებდა.

კონსტანტინე-მირზას ხმა ჩახლეჩოდა, ხმლის ვადას ჩაპფრენოდა და შიგ სახეში ჩაპყიოდა ალექსანდრეს: თუ მართლა შაპის მოლაღატე არა ხარ, დაუყოვნებლივ უნდა შეპყარო კახეთის ჯარი შირვანს სალაშქროდო.

ალექსანდრემ ეს მერამდენედ უპასუხა შვილს: შირვანს სალაშქროდ ჯერ ვერ შოვიცილი, — ჯერ სამეფოს შინაური საქმეები მაქვს გასაწყობი და გასამართავიო.

აიწყვიტა კონსტანტინემ.

ის იყო, მამისკენ წაუცდა ფეხი, რომ უცებ გიორგი ბატონიშვილი აელანძა წინ.

თითქოს ამას ელოდა კონსტანტინე.

და ერთბაშად „სისხლისმღვრელი მახვილი იშიშვლა შურისძიების ქარქაშიდან“.

იშიშვლა, აღმაცერად მოიქნია და შიგ საფეთქელში შემოპკრა მთელის ძალით.

უსულოდ დაირეცა გიორგი ბატონიშვილი.

— მომეშველეთო!!! — დაიბღავლა ალექსანდრემ და გაექანა შვილისაკენ, რომელმაც მას მოუკლა შვილი!

გაიბრკიალეს და ისტვინეს ხმლებმა.

ალი-ხან მოვაფეყმა და შაპმირ-ხანმა ასჩეხეს ალექსანდრე, მეფე კახეთისა.

ხმლები გაეძროთ ქართველ დიდებულებს.

დარბაზი უკვე გაქედლილიყო ყიზილბაშებით.

დაიგრიალეს ხელთოფებმა და დამბაჩებმა.

.

ფეხზე წამოიჭრნენ რუსი ელჩები.

ტატიშჩევი მივარდა კამენევს:

— ვგონებ, მეფეს რაღაც უბედურება დაატყდა თავზე. ახლავე გაიქეც და კონსტანტინე-მირზა გააფრთხილე, სისხლი არ დაიღვაროს, თორემ!..

კამენევმა უფროსი დიასპანის ბრძანების დასრულებას აღარ დაუცადა და სასწრაფოდ გარეთ გაგვარდა.

ყიზილბაშთა ჯარი ქალაქის ქუჩებსა და სახლებს გასეოდა და შეუწყნარებლად ხოცავდა დიდსა და პატარას.

ქუჩა გადაირბინა კამენევმა, ყიზილბაშთა ჯგრო გაარღვია და სასახლეში შეიჭრა.

შემზარავმა სურათმა გააქვავა კამენევი:

სისხლში გათხერილი იდგა კონსტანტინე-მირზა. მის წინ რომელიღაც ყიზილბაშ მხედარს ალექსანდრე მეფის მოკვეთილი თავი ეპირა, წვერით ჩაბღუჯული. შვილი გველის უძვრელი თვალებით მიშტერებოდა მამის ჩამქრალ თვალებს. ფეხებთან ალექსანდრეს უთავო ტანი ეგდო, დაჩეხილი და დასახიჩრებული.

იქვე გიორგი ბატონიშვილი იწვა, საფეთქელშელეწილი.

მოშორებით ეყარნენ მკერდშენგრეული რუსთველი ეპისკოპოსი, მისი ძმა აბელ ანდრონიკაშვილი და ხუთი კახელი თავადი...

უცებ ყმაწვილის განწირულმა კვილმა შესძრა გარემო.

კიბეზე ბიჭი ამორბოდა, ყიზილბაშები მოსდევდნენ ხმალ-შემართულნი.

— მიშველეთ, მიშველეთო! — მოჰკიოდა და მაშველი არსაიდან ჩანდა.

ეს მოკლული გიორგი ბატონიშვილის ვაჟი იყო, იესე უფლისწული.

დარბაზში შემოასწრო და კონსტანტინეს შივარდა:

— მე რისთვის მკლავენ, ბიძაჩემო, რისთვის, რისთვის?! —

და სისხლიან ფეხებში ჩაუვარდა მამის მკვლელს.

— ხელი არ ახლოთ! — დაიღმუვლა კონსტანტინემ.

ყიზილბაშებმა ხმლები დაუშვეს.

პაპის სანთიობოში შევარჯა იესე და კარი გადაარაზა.

ამაზრზენი ჭახანი მოესმა კამენევს.

შეტრიალდა და რას ჰხედავს:

კონსტანტინე-მირზას ხმლის დარტყმით თავი განეკვეთა გიორგისათვის.

„თათარმა ძმამ“ თმებში ხელი ჩაავლო და მალა ასწია „ქრისტიანი ძმის“ თავი.

მამისა და ძმის თავები კონსტანტინემ ერანს წარგზავნა მი-

სი მწყალობელი და აღმზრდელი შაჰ აბასის „ძვირფას ძღვენად“.

ხოლო თავგანკვეთილი ცხედრები აქლემს მანდიკურად გადაჰკიდა და ალავერდის ტაძარში გაგზავნა „საბოლოოდ დასამარხავად“.

გათათრებული უფლისწულის მხეცობით გაოცებულმა და შეძრწუნებულმა კახელებმა დიდის წუხილით დაიტირეს და დაკრძალეს წამებული მამა-შვილის ნეშთები.

„დასხდნენ მგოსანნი გლოვისანი“.

იდგა ზარდამცემი ერემიიდა.

ხოლო, მთავარი ჭირისუფალი — ქეთევან დედოფალი, ჭკრივი დავით მეფისა.

განლიგებული უცქერდა ხალხი, როგორ დასტიროდა საოცარი ქალი მამამთილს, მაზლს და... საქართველოს...

შპრისმგებლური

ძმანო კახელნო, ნამდვილ ქართველნო!
ნიკოლოზ ბარათაშვილი

კახეთის სამეფო ტახტი, სახელმწიფო საგანძურები და სრა-სასახლენი სისხლიანმა კონსტანტინე-ხანმა დაიჭირა.

ეს მეორე შემთხვევა იყო, რომ გრემის სასახლეში მამისა და ძმის მკვლელი დამჯდარიყო ტახტზე: პირველად — ავგიორგი, ახლა — კონსტანტინე.

ღვიძლმა შვილებმა მოჰკლეს ალექსანდრე პირველიც და ალექსანდრე მეორეც (მართლაც, ავბედითად ყოფილა „დაცდილი“ სახელი „ალექსანდრე“ კახეთის ტახტზე!..).

ხალხში უტყუარი ხმა იყო დაეარდნილი — კონსტანტინე-მირზამ მამისა და ძმის მკვლელობა შაჰ აბასის ჩაგონებითა და დავალებით მოახდინაო.

კონსტანტინე მხოლოდ საზიზღარი ჯალათი იყო სადისტი

აბასის ხელში. მან ყველაფერი ისე მოიმოქმედა, როგორც „თაჯიბიუკელი“ და „ჩი-იანელი“ ჯალათები აკეთებდნენ, მხოლოდ ეს იყო, რომ მათებრ ცხვირ-პირი არ დაუჭამია მისგანვე წამებული მამა-ძმისათვის.

თვითონ კონსტანტინე დაქინებით გაიძახოდა, შაჰი არაფერ შუაშია, მკვლელობა ჩემის ნებით ჩავიდინეო.

რუსი ელჩები სასტიკად იყვნენ გაჯავრებული კონსტანტინეს გაუგონარი მხეცობის გამო. ისინი „მკვლელ-მეფეს“ ეწვივნენ და თავისი გულისწყრომა მოახსენეს.

კონსტანტინემ შაჰის „უცოდველობაში“ ისევ თავი გამოიღო, ელჩებს რუსეთ-ერანის მეგობრობა გაახსენა და კახეთ-რუსეთის დაახლოების პირობაც აღუთქვა.

ტატიშჩევსა და ივანოვს კარგად ჰქონდათ შეგნებული, რომ გასპარსელებული ქართველის ხელით რუსეთის მეგობარი მეფისა და მისი შვილის მოკვლა კახეთში რუსეთის მარცხსა და სპარსეთის გამარჯვებას მოასწავებდა.

ელჩებმა კახეთი გულმწყრალად დასტოვეს და ქართლს გადავიდნენ გიორგი მეთათთან.

აქ მოლაპარაკება იმედის აღმოქმელად დაიწყო, მაგრამ ჩრდილოეთიდან მოულოდნელი ამბავი მოვიდა: ყირიმის ხანი შამხალის გავლით თურმე შირვანისკენ დაძრულა დიდძალი ჯარებით.

რუსი ელჩები სასწრაფოდ გაეშურნენ სამშობლოსაკენ.

შამხალმა ოსმალების დახმარებით ჩრდილო კავკასიაში გაანადგურა შვიდიათასიანი რუსული არმია. ბრძოლაში დაიღუპა სარდალი ბუტურლინი.

ჩრდილოური „ხსნის გზა“ ხანგრძლივად დაიკეტა საქართველოსთვის.

ეჭვი არავის ეპარებოდა, რომ ყიზილბაში კონსტანტინეს გამეფება კახეთის „გათათრებასა“ და ერანის „თათრულ სახანოდ“ გადაქცევას მოასწავებდა.

მაგრამ სულ მალე კონსტანტინეც და შაჰ აბასიც დარწმუნდნენ, რომ კახეთის „გათათრება“ არც ისე იოლი საქმე იყო. აქაური ხალხი სიკვდილს არჩევდა და ქართველობაზე ხელს არ აიღებდა.

კახეთში უქარქაშო ხმლების წკრიალი ისმოდა.

პატრიოტებმა აჯანყების მთავარ გმირად ჯერ ბ ა გ რ ა ტ იესეს ძე მოინიშნეს — ალექსანდრეს ძმისწული.

(მკითხველს წინარე წიგნიდან ახსოვს იესე, ანუ სპარსელთაგან გამაჰმადიანებული ისა-ხანი, სწორედ სპარსელთა მხარდაჭერით თავის ძმას, ალექსანდრეს, რომ ეტოქებოდა კახეთის ტახტისათვის... იესეს სიკვდილის შემდეგ მისი შვილი ბაგრატი ალექსანდრეს შეუწყალებია, მამულიც მიუცია და ბიძაძმისწული ერთმანეთთან უღალატოდ ცხოვრობდნენ ალექსანდრეს აღსასრულამდე).

კონსტანტინემ საშიშროება იგრძნო და გაწაფული მზაკვრობით მეტოქის მოსპობა გადაწყვიტა.

კახელებმა დაასწრეს და ბაგრატ ბატონიშვილი მოსკოვს ვავზავნეს, რუსთ ხელმწიფესთან შესაფარებლად.

აჯანყების ნაკვერცხალი შეუჩერებლივ ღვივდებოდა.

კონსტანტინემ იგრძნო, რომ კახეთის მამულიშვილური ძალები ქალის გარშემო იყრიდა თავს.

ხოლო ქალი „ესე იყო ღვაწლ-მრავალი და სამგზის სანატრელი, დედათა შორის ახოვანი დედოფალი და მოწამე ყოვლად ქებული ქეთევანი“.

კონსტანტინემ ქეთევანის დაუფლება გადაწყვიტა.

ხოლო „დაუფლება ესე“ იქნებოდა არა მარტო ცოლად შერთვა მშვენიერი ქალისა, არამედ „სრულქმნილი დაუფლება“ მტრად გადაკიდებული კახთა ქვეყნისა.

კონსტანტინე ქეთევანის მაზლი იყო, მაგრამ მუსლიმანთა საოჯახო სამართლით მაზლისა და დაქვრივებული რძლის შეუღლება სააუგო და საძრახისი კი არა, დიდ „სამადლო ქმედებად“ ითვლებოდა.

და შეუთვალა კონსტანტინემ ქეთევანს:

„მე დამიბყრია კახეთი ნებითა ყენისათა, ვარ მე ხელმწიფე და იყავ შენ დედოფალი; მაჰმადის სჯულით ჯერ-არს შეუღლება რძლისა და მაზლისა; ხოლო უკეთუ არა ინებო, მე ძალით ვპყო ესე!“

უსაზღვრო ზიზღმა, აღშფოთებამ და გაოცებამ მოიცვა ქეთევანის გული. სასწრაფოდ კახელი დიდკაცობა შეპყარა და აუწყა კონსტანტინეს „უკეთურება უკეთურებასა ზედა“.

თუ მტკიცედ არ ამომიდგებით მხარში და ამ საზიზღარ კანს არ ვაზღვევინებთ, მე კახეთიდან სულ წავალ და ქართლს დავბრუნდები, მუხრანს, ჩემს თავისსახლობაზეო, თქვა დედოფალმა.

დიდებულებმა დაიმუხლისთავეს სათაყვანო ქალის წინაშე და შეჰფიცეს, „რომე შენს მეტი ბატონი ჩვენ არ გვინდა“ და ვაზღვევინებთ შენს შეურაცხყოფელსა და ჩვენი ქვეყნის დამაქცევარსო...

დაიწყო ქიზიყიდან.

აქაურმა ქართველობამ ერთბაშად უარი გამოაცხადა „თათარი მეფის“ მორჩილებაზე.

ქეთევანის უარით გაბოროტებული კონსტანტინე ყიზილბაშური მხედრობით სასწრაფოდ გაჩნდა ქიზიყში.

ქიზიყელებიც დაუხვდნენ მტერს საომრად დალესილნი.

კონსტანტინე დაფრთხა და ჩაქრა.

„რას მოითხოვთ?“ — იკითხა „დაყვავებით“...

„ან ქრისტიანობა დაიბრუნე, ან შენის ყიზილბაშებით კახეთიდან გადაშენდი“, — იყო პასუხი.

კონსტანტინემ აჯანყების მოთავეები გაინაპირა და მოლაპაპარაკება გაუმართა.

ყველას დიდძალი მისართმეველი მიართვა, დიდი „სასიკეთო“ დაპირებები დაურიგა და ასე მოსყიდულნი უკანვე, საომრად შემართულ ხალხთან გააბრუნა.

აჯანყების მოთავეებმა აჯანყებულები დაამშვიდეს და დააშოშმინეს.

მეფემ ბრძანაო, ჯერ შირვანს ვილაშქროთ და მერე ყველაფერს ისე გავაკეთებ, როგორც „ჩემს მოძმე“ კახელებს მოესურვებო!

ხალხის მოლორებას ერთხანზე ადვილად ახერხებენ ხოლმე მათი მეთაურები, ქიზიყელებიც მოტყუედნენ და იმის ნაცვლად, რომ მოსისხლე მტერს საომრად შებმოდნენ, იგივე მტრის საომარი დროშის სამსახურში ჩადგნენ.

კონსტანტინე ქიზიყიდან გრემს დაბრუნდა, ყიზილბაშთა თავაშვებულობა ალაგმა, ქრისტიანთა დევნა და შეურაცხყოფა აკრძალა, კახელი თავადები უხვი წყალობით აავსო და კახთა ჯარები შირვანს სალაშქროდ „გაიმარაგა“.

ქეთევანმა და მისმა თანამდგომმა დიდებულებმა კარგად იცოდნენ, რომ შირვანს ლაშქრობაზე უარის თქმა თვითონ შაჰ აბასის წინააღმდეგ აშკარა აჯანყებას ნიშნავდა. ამიტომ, სანამ კონსტანტინე ვერ მოეშორებინათ, მის ნებას უნდა აპყოლოდნენ და საომარ წვევაზე დათანხმებულიყვნენ.

ათი ათასი კახელი მხედარი დაუყენა გვერდით კონსტანტინემ ყიზილბაშთა ლაშქარს და 1606 წლის მაისში შირვანი-საკენ ვაქუსლა.

კონსტანტინეს თან მიჰყავდა თავის ძმისწული იესე გიორგის ძე და მისი მცირეწლოვანი ძმა, მიჰყავდა მძევლებად, „ყოველ შემთხვევისათვის“.

ჯერ შაქში შეიჭრნენ კახელები და სპარსელები.

გამოუხტათ აქაური თურქი ბეგლარბეგი მოჰამედ მინ ფაშა ოსმალთა მხედრობით, მაგრამ დამარცხდა და თვითონაც რომელიღაც კახელის ხმალს შეაკვდა.

ქართველებმა და ყიზილბაშებმა ჯერ არეში აიღეს, მერე ყაბალას შემოადგნენ ალყად.

ყაბალას კედლებთან დიდი ომი გაჩაღდა.

„შეიქნა ძალმიცემით ცემა და ბრძოლა. ნამეტნავათ კარგად იყვნენ კახნი და კოხტაურად იბრძოდნენ. შიგნიდამ ურუმთა (თურქთა) და გარედამენ ყიზილბაშნი გაკვირვებულნი შექმნილიყვნენ ქართველთა გალომებისასა და შეუპოვრად მხიარულად ომსა“.

შირვანის ბეგლარბეგი მოჰამედ ფაშა, ჯილალ ოღლუ სინან ფაშას შვილი, დიდი მხედრობითა და არტილერით შემახადან გამოვიდა და ყაბალასკენ გაემართა თურქთა ციხიონის მისაშველებლად.

კონსტანტინემ ჯარის ერთი ნაწილი თვითონ აიყოლია და მაჰმუდ ფაშას მდინარე აღ-სუს პირზე დაუხვდა.

„ბრძოლისა და ხოცვის ცეცხლი გაჩაღდა“.

თურქებმა ფლანგებიდან შემოუტყეს და ყიზილბაშები ბრძოლიდან გააქციეს, მაგრამ შუაში მდგარმა კახელებმა მოპირდაპირის შეაკერძი გაარღვიეს და გადაქელეს. კახელთა წინსვლათ გულმოცემული ყიზილბაშები ბრძოლას შეუბრუნდნენ.

თურქები დამარცხდნენ.

შეფოთებულმა და გაუბედურებულმა მაჰმუდ ფაშამ ბრძოლის ველი მიატოვა და გაიქცა.

გაქცევისას კონსტანტინეს შეეფეთა მაჰმუდ ფაშა.

კონსტანტინემ ის იყო შუბი გამართა, რომ უეცრად რომელიღაც თურქის ხელით გასროლილი ისარი მოხვდა და ცხენზე ჩაიკეცა.

გამხნეებული შემოტრიალდნენ თურქები.

მაგრამ ისევ მძლავრად შეუტიეს კახელებმა.

ისევ უკუიქცნენ თურქები.

ძლივს შეასწრო მაჰმუდ ფაშამ შემახას ციხეში.

ორი ათასი ოსმალი დარეცილიყო ბრძოლის ველზე.

შირვანის ფაშას მიაჩნია რომ შეიტყვეს, ყაბალის მეციხოვნეებმა ქალაქი მიატოვეს და გაიქცნენ.

მკვლელი სიკვდილს გადაურჩა და ყაბალაში შევიდა. მან თურქთაგან გაწმენდილ შაქის გამგებლად შაჰმირ-ხანი დანიშნა, ის შაჰმირ-ხანი, რომლის ხმალმაც მოინელა მამამისი ალექსანდრე...

კონსტანტინემ შირვანში მოხვეჭილი გამარჯვებები სასწრაფოდ აცნობა შაჰ აბასს.

შაჰი თავრიზის მთავარ მოედანზე იდგა ქართველი და ჩერქეზი ღულამებით გარშემორტყმული, როცა კონსტანტინესაგან გამოგზავნილი დეიქები ეახლნენ და თურქული დროშები, თურქთა წარმოებული თავები და თურქი ტყვეები ერთად ჩაუყარეს ფეხში...

„თურქულში სიხარულის ნალარა დაჰკრეს.“

შაჰმა მკვდრს მხოლოდ ქართველებთან ინადიმა, — ქართველ ღულამებთან.

მერე კონსტანტინეს „გაუგზავნა დიდებული საჩუქრები და ჯილდოები — მურასა თავი, მურასა ქამარ-ხანჯალი, მურასა ხმალი და მურასა ლაგამ-უნაგირით დარაბტული არაბული ცხენი“.

კონსტანტინე ცას ეწია სიხარულით.

ჭრილობაც მალე მოუშუშდა და ახალი სალაშქრო სამზადისი ბრძანა.

კახელები და სპარსელები ამჯერად შირვანის მთავარ ქალაქს, შემახას, შემოერთებენ ალყად.

თურქები მედგრად იცავდნენ თავს.

კონსტანტინემ ერანიდან ზარბაზნის ჩამომსხმელნი და ტყვია-წამალი გამოითხოვა. ყველაფერი მიიღო, მაგრამ არც ზმან უშველა საქმეს.

ალყა ძალზე გაჭიანურდა.

კახელთა ჯარი „უქმად დგომას“ შეუწყობდა და დრტვინვა დაიწყო.

შამა-ძმის მკვლელი იმდენად გათამამებულია და გათავზედებულია, აზრიც ვერ დაუკრავს, რომ შურისმგებლური სიკვდილის აჩრდილი დღე და ღამე მოუშორებლად უჯდა ყურს უკან.

უკვე მოქმედებდნენ შეთქმულნი.

გადაწყვეტილი იყო: კონსტანტინე უნდა მოეკლათ, გიორგის ვაჟები გაეტაცნათ, ყიზილბაშთა ბანაკს გასცლოდნენ და ჯარით კახეთს დაბრუნებულიყვნენ.

კონსტანტინემ კახელთა უკმაყოფილების ამბავი შეიტყო და სარდალ-თავადებთან თავისი „ვეზირი“ — ხოჯა ზიადედინ ქაში მიაგზავნა სათათბიროდ.

თავადებმა ჯარის უკმაყოფილების მიზეზად ომის გაჭიანურება დაასახელეს. ეს იყო და ეს. ვეზირმა კონსტანტინე-ხანის სახელით ერთი თვის შემდგომ სახლში გაშვება და დიდი საჩუქრები აღუთქვა კახელებს.

კონსტანტინეს ეგონა, რომ ამით „ყველაფერი ჩათავდა...“ მაგრამ...

ერთ ღამეს ქართველი აზნაურები „ქეშიკში“ (ყარაულში) იდგნენ.

ხოლო კონსტანტინეს ეძინა თავის კარავში.

ქართველები შიშველი ხმლებით შეიჭრნენ კარავში. ზედ კარებთან წაძინებული ყიზლბაში წამოიჭრა და დაიდრიალა ისტერიულად, კონსტანტინე სარეკლიდან წამოვარდა, ხმლით კარვის უკანა მხარე გახია, გარეთ გაფრინდა და ალი-ხან მოვაფეყის კარავში შევარდა გულგახეთქილი.

შეთქმულებმა, სანამ კონსტანტინეს გაქცევას შეიტყობდნენ, მანამ კარავში „ორი მთვარისსახიანი ახალგაზრდა“ დალანდეს მძინარი და ერთი მათგანი მაშინვე აჭყუწეს, რაკი კონსტანტინე ეგონათ იგი.

ამასობაში შეთქმულთა მეორე ჯგუფმა იესე გიორგის ძე და მისი ძმა გამოიტაცეს მეზობელი კარვიდან.

ალი-ხან მოვაფეყის კარავთან ბუჯის ცემა ატყდა.

ქართველები მიხვდნენ, რომ ბრმა შემოხვევის წყალობით კონსტანტინე სიკვდილს გადაარჩენოდა. ყიზილბაშებიც საომრად გროვდებოდნენ. ამჯერად ისევ გაცლა სჯობდა ყველაფერს.

ქართველთა ჯარი სასწრაფოდ ამხედრდა და ბანაკიდან გაქუსლა.

კონსტანტინე მცირე ხანს ყოყმანობდა ცხენზე აღმჯდარი. მერე ცხენს ქუსლი ჰკრა და კახელებს გამოედევნა ჯარით.

დილით, შუის ამოსვლისას წამოეწივნენ ყიზილბაშები ქართველებს.

ქართველები ფიცხლავ შემოტრიალდნენ და საომრად ჩალაგდნენ.

კონსტანტინემ ჯარი შეაყენა და თვითონ ათიოდე ნაბიჯით წინ გავიდა.

ქართველებმა ხმის ამოღება არ დააცალეს:

— შენ მუსლიმანი ხარ, გათათრებული და ქართველობა დაკარგული; შენ მკვლელი ხარ და მკვლელი მშობელი მამისა, მკვლელი ღვიძლი ძმისა; შენ მოღალატე და გამყიდველი ხარ შენი ქვეყნის და შენი ხალხისა!.. ამიტომ არ შეგვიძლია მეფედ დავისვათ ამნაირი ღვთისპირისგან გადავარდნილი! ამიტომ გირჩევთ, უკან გაბრუნდე, თორემ სულ ერთია, დავიბოცებით და კახეთის მეფობას მაინც არ დაგანებებთ!

ეს იყო ერთხმივი ძახილი, ნება და ძალა მძვინვარე ხალხისა...

კონსტანტინე გაბრუნდა.

ქართველთაგან მიტოვებულმა ყიზილბაშებმა შემახაზე ბრძოლის გაგრძელება უიმედოდ ჩათვალეს, გასაქცევად აიშალნენ და მალე სავსებით დაიფანტნენ და დაიკარგნენ.

შემახა, ბაქო და დარუბანდი ხელუხლებლად ოსმალებს ღარიხათ.

განადგურებული და დამცირებული კონსტანტინე არდებილს ჩავიდა, შაჰ აბასს თავს გადამხდარი უბედურება სიმარ-

თლით აუწყა და შირვანისა და კახეთის ხელახლა დასაპყრობად ახალი ჯარები სთხოვა.

კონსტანტინეს იღბალი, რომ შაჰ-აბასმა მისი მარცხის ამბავი სწორედ მაშინ შეიტყო, როცა იგი „ყველაზე დიდი გათათრებული ქართველისაგან“ იყო გახარებული და აღტაცებული.

თურქეთის დიდი მხედრობა, რომელსაც ჯიღალ იღლუ სინან ფაშა მოუძღოდა, შეუჩერებლივ მოიწვედა თავრიზისაკენ. შაჰ აბასს ალავერდი-ხან უნდილაძისთვის მიუხდევია ოსმალთა შეკავება.

დაძრულა უნდილაძე 30 000 ყიზილბაშით, ქართველი შაჰისევანითა და ლულამით.

ვანის კედლებთან დასძგერებიან ერთმანეთს უნდილაძე და სინან ფაშა.

გათათრებულ ქართველთა მეწინავე ჯარით გაურდევვია თურქთა შუაკერძი უნდილაძეს. ნახევარმთვაროსანი სახელმწიფო დროშა თავისი ხელით დაუთრევია ერანელთა „გურჯ მთავარსარდალს“.

ბრძოლას გაჰქცევია თვითონ სერასქერი ჯიღალ-ოდლუ. განახევრებული ლაშქარი მიჰყოლია უგზო-უკვლო სრბოლაჰენებით.

თავრიზი დიდის ზემით შეახვედრა შაჰ აბასმა „სწორუპოვარ გურჯს“, მის „მარჯვენა ხელს“.

უნდილაძეც იქ იყო, როცა კონსტანტინეს მარცხის ამბავი მოვიდა არდებილიდან. გუნება არ წაიხდინა შაჰ აბასმა. არც გაიკვირვა: ოსმალებს კი არა, ქართველებს დაუმარცხებიათ ქართველი კაციო; დიდი არაფერი დაშავებულა, კონსტანტინე ჯერ კიდევ ახალგაზრდაა და ზევრ რამეს მოესწრებაო.

ხითხითებდა და უნდილაძეს ელაციცებოდა შაჰი:

როცა მე და ჩემი ალავერდი-ხან უნდილაძე ოსმალებს ერთჯერ კიდევ ძმარს ვადენთ, მერე ყარაბაღისკენ გავილაშქრებთ და მაშინ ერთ რაზმს კონსტანტინესაც ვაჩუქებთ, რათა ხელახლა დასაპყროს შირვანი, და მაშინ საქართველოს საქმეებიც ესე მოეწყობა, როგორც მე და ჩემს ალავერდი-ხანს მოგვიხდება...

იცინოდა შაჰი და უნდილაძეს შესციცინებდა.

მკრთალად ილიმებოდა უნდილაძე.

მეორე დღეს კახეთიდან ელჩობა ეწვია შაჰ აბასს. კახელები შაჰის მორჩილებაზე თანხმობას აცხადებდნენ, ოღონდ მამა-ძმის მკვლელი კონსტანტინე მოგვაშორე და მეფედ „შენი მაღალი ტანტის“ ახლო მყოფი თეიმურაზი გამოგვიგზავნეო.

შაჰის „მაღალი გონება“ მაშინვე მიხვდა, რომ კახეთს კონსტანტინე მისი „თათრობისთვის“ არ სურდა, ხოლო თეიმურაზს „ქრისტიანობისთვის“ (ანუ ქართველობისთვის) იწონებდა. იგი საბოლოოდ დარწმუნდა, რომ „კახეთის საქმეს“ მეტი სიფრთხილე და წინდახედულობა სჭირდებოდა. ყოველ შემთხვევაში, სანამ თურქეთთან ომში გადაწყვეტ ძლევამოსილებას ვერ მოიპოვებდა, მანამ შაჰს კახეთისათვის „დიპლომატიური ბაწარი“ უნდა ეთრია. ამჯერად „სახელმწიფოს მისწრაფებანი მოითხოვდნენ, რომ შაჰს ქართველები ხელმწიფური წყალობით დაეიმედებინა, რათა ქართველებს ერანის ლაღატი და ურჩობა არ გაებედათ“.

შაჰმა ელჩებს აღუქსანდრესა და გიორგის დაღუპვის გამო სამძიმარი უთხრა, კონსტანტინეს საქციელი კი ძალიან დაიწუნა... კონსტანტინეს ჩამოცილებისა და თეიმურაზის კახეთს გაგზავნის საქმესაც მალე გადაწყვეტო, აღუთქვა ელჩებს. მერე ქეთევან დედოფლისა და კახეთის წარჩინებულ მესვეურთა სახელზე „წყალობის წიგნი“ შეადგინა, თავის ელჩს პოსტინ-ბეგ ჯარჩი ზულ-ყადარს ჩააბარა და ქართველ მოციქულებთან ერთად კახეთისაკენ გამოისტუმრა.

კონსტანტინემ შაჰის წყალობას აღარ დაუცადა და არდებილში ახალი ჯარების შეყრას შეუდგა. აქაური ვაჭრებისაგან დიდი ფული აიღო — „ზოგი სესხად, ზოგიც ჯარიმად“. იმ ფულით ჯარისკაცები დაიქირავა — ყიზილბაშები, თურქმანები, შირვანელები, ლეკები, მეჯოგეები, მომთაბარენი, მკვლელები, მძარცველები და ნაძირალები.

ამხედრდა, ეს ნაყიდი ლაშქარიც ამხედრა და საქართველოსაკენ წამოემართა. თანაშემწეებად ისევ ის ხანები და სულთნები მოჰყვებოდნენ, კახეთსა და შირვანში ლაშქრობათა ეამს რომ ახლდნენ.

შაქი გამოიარა და აქ მისგანვე დატოვებული შაჰმირ-ხანი აიყოლია თავისი ჯარით.

ძაგემს მოვიდა კონსტანტინე, ბანაკად დადგა და გრემში მოციქული აფრინა ქეთევან დედოფალთან და მის სადარბაზოსთან.

მე სამტროდ არ მოვსულვარო, ითვლევინებოდა კონსტანტინე, არც თქვენს შორის მეგულება მტერიო, იმ სამი-ოთხი კაცის გარდა, მოკვლა რომ დამიპირეს და ამდენი შფოთი და დავიდარაბა აგვიტეხესო. მიმიღეთ, ყველაფერში თქვენი სურვილისამებრ მოვიქცევი, ჩემს ნათესავ უფლისწულებსაც მამასავით მოვუვლი და, სხვას რომ თავი დავანებოთ, იმ ჩემი მოკვლის მოსურნეებსაც მივუტევებ ესოდენ მტრობასო. თუ ასე შემონათვალს არ დაიჯერებთ, ვინც გენებოთ გამომიგზავნეთ და იმის წინაშე დავიფიცებ ყოველ ჩემს აღთქმასო.

გრემში სასაცილოდ არ ეყოთ კონსტანტინეს ფიცი და მტკიცე.

შაჰის „წყალობის წიგნმაც“ მოუსწრო და კახეთის მესვეურები დარწმუნდნენ, რომ კონსტანტინე შაჰის გამოგზავნილა არ ყოფილა „კახეთის დასაპყრობად“...

სასწრაფოდ აისხა იარაღი კახთა მხედრობამ.

ქეთევანმა ქართლშიც აფრინა შიკრიკი დახმარების სათხოვრად.

მეფე გიორგი მეათემ პ ა პ უ ნ ა ა მ ი ლ ა ხ ო რ ი წარმოგზავნა ზემო ქართლის ჯარით.

ლაშქარი დალოცა ალავერდელმა.

ქეთევან დედოფალი გაუძღვა, ვითარცა ერთ დროს დიდი თამარი შვიდმნათობიერი მიუძღოდა „ყოველი საქართველოს“ მხედრობას.

ჯალაბით, ქალებით და ბავშვებით მოდიოდნენ კახელი მეომრები.

ბელაქნის წყალზე მოვიდნენ.

მალლობზე კახეთის სახელმწიფო დროშა აღმართეს და მის ქვეშ ქალები და ბავშვები დააბანაკეს.

აქვე დადგა ქეთევან დედოფალიც, იესე გიორგის ძისა და მისი ძმის თანხლებით.

მეომრებმა დედოფლისა და ცოლ-შვილის წინაშე შეჰფი-

ეს მამულიშვილური თავგანწირვა, რაინდული ვაჟკაცობა და მოყვასური თანადგომა და თანალმობა. მერე წინ გავიდნენ და საომრად დაირაზმნენ.

კონსტანტინეც გამოჩნდა თავისი მხედრობით.

შუაგულს მოუძლოდა სამივე მკვლელი მეფე მამა-შვილისა — თვითონ კონსტანტინე, შაჰმირ-ხანი და ალი-ხან მოვაფეყი. ფლანგებზე მიდგნენ დანარჩენი ხანები, ამირები და სულთნები.

მოვიდნენ და ქართველთა პირისპირ დადგნენ.

1605 წელი, 22 ოქტომბერი, ბრძოლა ბელაქნის წყალზე.

უმძაფრესი ძვერებით დაეძვერნენ ერთმანეთს.

დიდხანს წონასწორად ქანაობდა ბრძოლის სასწორი.

პირველი ბზარი მუსლიმანთა მარჯვენა განაკიდურს გამოაჩნდა. აქ კონსტანტინეს ერთგული ღულამი იბრძოდა — ყარჩიხა სულთანი. იგი დამარცხდა და უკუიქცა თავისი მხედრობით.

კონსტანტინემ შუაყერძი მიატოვა და გაქცეულთა შესაკავებლად „გააქენა სიმაძაცის ცხენი“.

მეწინავე ქართველებმა წინ გამოჭრილი კენი იცნეს და ზურგიდან გზა ჩაუჭრეს.

სამი სარდალი მიეჭრა ერთად — დავით ჯანდიერი, თამაზ და ბებურ ვაჩნაძენი.

სამი მხრიდან შუბები აძვერეს და უნაგირიდან ასხლიტეს.

მამისა და ძმის წარკვეთილმა თავებმა გაიელვეს კონსტანტინეს გონსარბიელზე.

და უმაღვე ჩაქრა დაუდგრომელი, ბოროტი სული.

.

ქეთევან დედოფლის განასაჯი აცნობა ქართველმა მაცნემ მუსლიმანთა სარდლობას:

— მოკლული არის თქვენი მბრძანებელი კონსტანტინე-ხან, რომელიც შაჰის ნების წინააღმდეგ წამოსულა ჩვენთან საომრად; აწ ჩვენ მზადა ვართ დაგიზავდეთ, უკეთუ თქვენც დაეთანხმებით სამშვიდობო ნალარის დაკვრას!

მუსლიმმა სარდლებმა არ ინებეს მშვიდობის ჩამოგდება. მათ სურდათ ბრძოლა მოეგოთ, იესე ბატონიშვილი მოეტაც-

ნათ და ყოველმხრივ პირშეურცხვენელი ჰხლებოდნენ მბრძანებელ შაჰს.

ისევ აგრიალდა და აინთო ბრძოლის ველი.

თავგანწირვით ეტევებოდნენ ქართველები.

აკი ზურგში ქართული დროშა ფრიალებდა, იქვე „სამგზის სანატრელი დედოფალი“ და ქართველთა ოჯახები იდგა!..

გატყდნენ და უკუიქცნენ მუსლიმანნი.

გამოედევნენ ქართველები.

ურიცხვი მტერი დახოცეს, დარეცეს და დაამიწეს.

შედეგად მიმდინარეობის

შაჰ აბასი ისევ თავრიზში იყო.

უნდილაძეს ეთათბირებოდა.

ოსმალთა ახალი დიდი მხედრობა დაძრულა, სერასპერ ჯილალ ოღლუსა და ნასიფ ფაშას სარდლობით. აზერბაიჯანი-საკენ მოეშურებოდნენ თურქები, სალმასისა და თასუჯის გზებით.

რამდენი არის თურქთა ლაშქარი, — ეს მერამდენედ ეკითხებოდა შაჰი უნდილაძეს.

— ასი ათასი მეომარი, — ისევ მიუგო უნდილაძემ.

— მერე, ჩვენ? ჩვენ რამდენი გვყავს?

— სამოცი ათასი.

— უნდა დავუცადოთ ახალი ჯარების შეყრას.

— მაგრამ თურქები დაგვიცდიან? — ღიმილით ჩაუქრა უნდილაძემ.

— მაშ, როგორ? სამოცი ათასით შევხვდეთ ასი ათასს?!

— დიახ! — მტკიცედ მოსკრა ქართველყოფილმა.

— მერე?!

— მერე ის, რომ ისინი ოსმალები არიან, ჩვენ კი ერანელები.

ძალიან მოეწონა შაჰს, ქართველმა რომ თქვა ეს: „ჩვენ ერანელებიო“.

მასუხი ველარ მოასწრო, ისე მოახსენეს მოულოდნელად: კახელები შებრძოლებიან ბელაქნის წყალზე სპარსელებს, კიდევაც დაუმარცხებიან, და კონსტანტინე-ხანიც ბრძოლაში მოუკლავთო.

ფეხზე წამოვარდა შაჰ აბასი ასპიდცემულივით.

კონსტანტინე მოუკლავთო?!

მერე მომახსენეთ, ახლა მაგისტვის არა მცალიათ, მძიმედ თქვა შაჰმა და ისევ ჩაიკეტა უნდილაძესთან განმარტოებით.

— მაშ, შენ იმედი გაქვს, რომ სამოცი ათასით ასი ათასი დამარცხდება.

— ალლაჰისა და შაჰის შეწევნით, — თქვა უნდილაძემ.

ბრძოლა მოხდა 1605 წლის 7 ნოემბერს, სუფიანთან, ურმიის ტბის ახლოს.

ისევ უნდილაძე შეიქნა საშინელი ხოცვა-კლეტის მთავარი გმირი.

თურქები სასტიკად დამარცხდნენ და გაიქცნენ.

თვითონ სერასქერი ჯიღალ ოღლუ სინან ფაშა არც ახლა „დაუწვავს“ სირცხვილს, ისე მოჰკურცხლა ბრძოლის ველიდან.

მრავალი ტყვე და ნადავლი ჩაიგდეს ხელში სპარსელებმა (არაეინ ამბობდა — ქართველებმა!).

ოცი ათასი თურქის წარკვეთილი თავი დაახვევეს შაჰის წინაშე.

ურმიიდან უნდილაძე ყარსისაკენ გაემართა ჯარის ნაწილით, ხოლო შაჰი დანარჩენი მხედრობით ყარაბაღისკენ წამოვიდა, ყარაბაღი დაიჭირა, მერე განჯას მოადგა და ალყაში მოაქცია.

აქ შაჰ აბასს კახეთის ელჩობა ეახლა, ქეთევან დედოფლისგან გამოგზავნილი.

კახელები სპარსეთის ლაშქრის „უნებლიე ხელყოფისათვის“ ბოდიშს იხდიდნენ, ხოლო მოკლული კონსტანტინეს სანაცვლად კახეთის ტახტზე „შაჰის გაზრდილი“ თეიმურაზ ბატონიშვილის დანიშვნას ეაჯებოდნენ.

ყველაფერს მიხვდა ცბიერი აბასი.

კახელებთან გაშლილ საჭადრაკო დაფაზე „მეორე ხელი“ წაგებული ჰქონდა: „ნამდვილ ქართველებმა“ გათათრებული კონსტანტინე არ დაისვენს კისერზე; კახეთის გათათრება „კონსტანტინე-პაიკის სვლით“ არ გამოვიდა.

თეიმურაზს ითხოვენ მეფედ ქართველები, ქრისტიან თეიმურაზს...

რა გაეწყობა! ამჯერად ჩათრევას ჩაყოლა სჯობია. წინ კიდევ რამდენი „ხელი“ უნდა „ითამაშოს“ შაჰ აბასმა კახურ (და საერთოდ — ქართულ) „დაფაზე“!

მთავარი მაინც ეს არის, — რუსეთისაკენ არ გამეჭვცესო კახეთი!

მაინც ძალიან იქაჩებიან რუსეთისაკენ ქართველები! ვაი თქვენ, ქართველებო!

— მაშ, კონსტანტინე მოჰკალით, არა? — იკითხა შაჰმა.

— დიახ... მოჰკლეს.

— აჰა, კი არ მოჰკალით, არამედ მოჰკლეს! — ხითხითი აეშალა შაჰს.

— დიახ, მოჰკლეს, მოჰკლეს! — ჩაიდმუვლა რომელიღაც კახელმა.

შაჰმა სიცილი დაითრგუნა. ერთხანს ხმლის ვადას აწვალვებდა. მერე „წყნარად“ ამოიხრიალა:

— ხელიმც შერჩების მოღალატის მკვლელს... მე რომ მკითხოთ, მამის სისხლის დამაქცევარს უარესიც უნდა დაეშართოს!

ქართველები დინჯად, „შეურყევლად“ უსმენდნენ შაჰ აბასის „ქართულს“.

ყველა მიხვდა, რომ შაჰს ქართველთა ხელით „თათარი კონსტანტინეს“ სიკვდილი ნამეტნავად ეწყინა, მაგრამ სოფლის საფერისათ“ თქვა: ხელიმც შერჩების მამის მკვლელსაო.

შაჰმა შეატყო, ქართველებს ჩემი „ქართული“ არ „ერწმუნათო“ და უცებ ეს იკითხა:

— რამდენ ხანს იყო კონსტანტინე-ხანი კახეთის ბატონ-პატრონი?

— ექვსი თვე ძლივს მოათავა, — შეაგება რომელიღაც ქართველმა ელჩმა.

— ექვსი თვე? — გაუკვირდა შაჰს და მაშინვე ეს ლექსი დასძინა სპარსულად:

„ფეიღარ ქუშ ფაჩაპირა ნაშაათ
 აგერ შაჰთ ბეჟუბ შუშ შაა ნაფაიათ“
 (მამის მკვლელი ხელმწიფობას ვერა იქმს;
 კიდევაც იქმნას, ექვს თვეს ვერ გადაამეტებს)

ეს თქვა შაჰმა და ქართველთა სახეებს დაადგა მჩხიბავი თვალი.

აზრი ვერ დაიკრა, რომელი უფრო „მოეწონათ“ ქართველებს — მისი „ქართული“, თუ მისი „სპარსული“.

ბოლოს და ბოლოს, რაკი „მეტი გზა“ აღარ იყო, ბრძანა შაჰ აბასმა:

— მომიყვანეთ თეიმურაზ ბატონიშვილი — სპარსული „მირზა“ არ უხსენებია, „ბატონიშვილი“ თქვა, ქართულად.

შემოვიდა თეიმურაზი.

ღერტანადი, ძვალთხელი, ქლალშერეული სპილოს ძვლის სახით, მხარგაშლილი, ნაღვლიანი ფართო თვალებით. ღინღლი აშლოდა ლოყა-ნიკაპზე, -- მეთექვსმეტე წელიწადში გადამდგარიყო.

მიიხმო და უთხრა შაჰმა „მამაშვილურად“:

-- დიდი უბედურება დატრიალდა, შვილო ჩემო, საყვარელი კახეთის მიწაზე. შენც კარგად უწყი, მე კახეთში მშვიდობის ჩამოსაგდებად და მამა-ძმის მოსაკითხად ბიძაშენი კონსტანტინე გავგზავნე. კონსტანტინეს ორივე მოუკლავს — მამაც და ძმაც. მადლობა ალლაჰს, კახელებს სამაგიერო მიუზღავთ და მოუკლავთ კონსტანტინე... ახლა ესე არს ბრძანება ჩემი: შენ უნდა წახვიდე კახეთს, შვილო ჩემო, ექმნე გამგებელი, გინა მეფე და არარაი შფოთი აღეძრას ამიერიდან კახეთსა შინა!

თქვა და მარჯვენა ფეხი წინ წამოაცურა.

თეიმურაზმა იგრძნო, ვიღაცამ უბიძგა ზურგიდან.

იგრძნო და იცნო: რომელიღაც ქართველი მიანიშნებდა „მისანიშნებელს“.

დაიმუხლისთავა თეიმურაზმა და ემთხვია წინ გამოცურებულ ოქრომოჭედილ ფერხთსაცმელს.

მზემ გაიცინა „ლომის“ სახეზე.

— დღეის წალმართ ყმაწვილს ეწოდების თეიმურაზ-
ხან და კახეთის მბრძანებელი — ბრძანა აბასმა.

სპარსელებმა თავი დაუკრეს „კახეთის ხანს“.

ქართველებმა თეიმურაზის წინ დაიმუხლსთავეს, წელში
გაიმართნენ და გადაეხვივნენ.

ჩემი გაზრდილი ტახტზე ქართული წესით უნდა ავიყვა-
ნოო, ბრძანა შაჰმა და დანიშნა საამისოდ „ბედნიერი საათი,
იხმო სახელოვანი ამირები და სახელმწიფოს წარჩინებულნი
და სამოთხისებურ მეკლისში მეფური ზეიმი გამართა“. სა-
დღაციდან ერთი ქრისტიანი ბერიც გამოჩხრიკეს და შეუღ-
გნენ მეფურ კურთხევას „ქართული წესით“.

გაშალეს ოქრონემსული ხალიჩა. შუაგულზე თეიმურაზი
დასვეს და ხელში ოქროს თასი დააჭერინეს. მის წინაშე ქედი
დაიდრიკეს და მუხლი მოიყარეს. წამოიმართნენ და ოქრო-
ვერცხლის ფულით გავსებული თაბახები აღმართა ყველამ —
ქართველებმაც და სპარსელებმაც. პირველობა აქაც არავის
დაანება შაჰმა — „მისმა უდიდებულესობამ ოქრო და ძვირ-
ფასი თვლები გადააფრქვია თავზე“ თეიმურაზს. მერე სპარ-
სელი დიდებულები დაწინაურდნენ და რიგრიგობით, მაღალ-
დაბლობით, „თავისი ხარისხისა და პატივის შესაფერისად
თავზე გადაყრის წესი შეასრულეს“. ბოლოს ქართველები მი-
ეახლნენ თეიმურაზს, თავზე ოქრო-ვერცხლის წვიმა დაუშვეს
და კიდევ ერთი ოქროს თასი მიართვეს თვალ-მარგალიტით
აღვსებული.

შაჰმა სანადიმო სუფრის გაშლა ბრძანა, „გონების გასამხი-
არულებლად და აზრის მოსაღხენად“.

სუფრის თავში თვითონ დაბრძანდა.

გვერდით დაისვა თეიმურაზი.

ერთიმეორის პირისპირ მიუხსდნენ ქართველები და სპარ-
სელები.

გახურდა სმა, ზმა და სიმღერა.

„უცხო რამ იყო სიმღერა და საუბარი ქართველთა“.

ბრძენმა და ხატოვანმა ქართულმა სიტყვამ იმძლავრა
სპარსულ სუფრაზე.

სპარსული ბაიათი სავსებით დათრგუნა და დააქნინა ქართულმა „მრავალყამიერმა“.

ერანის მიწა უკან ჩამოიტოვეს კახელებმა.

ქართულ მიწაზე შემოსდგეს ფეხი.

მაშინვე გაიძვრეს შაჰის ნაჩუქარი ოქრონემსული ხალათები.

თეიმურაზი ცხენიდან გარდახდა, თავდამხე დაეცა და დაეკონა ქართულ მიწას...

ქიზიყი გამოიარეს. ერთმა აქაურმა გლეხმა ისტუმრა მეფე და მისი ამაღა.

ამ ოჯახში ცხრა ვაჟი იხილა, ცხრა აკვანში ჩაკრული, თეიმურაზმა.

„უეჭველად ფეხბედნიერი იქნება ჩემი მეფობაო“, — გაუელვა ჰაბუკ ხელმწიფეს და სიხარულით აღვსილი თვალი ჩამოატარა ცხრა ქართველი წულით დატვირთულ ცხრა აკვანს. გრემის სასახლეზე იღვინებდა ელოდა მეფეს.

ელოდა ქეთევან დედოფალი — შვილს, ხელმწიფეს.

ბოდბეს ეკურთხა კახეთის მეფედ თეიმურაზ პირველი, წმინდა ნინოს საფლავთან მუხლმოყრილი.

ეს მეოთხე თვე იდგა შაჰ აბასი განჯის კედლებთან. ამოიყვანა ალყაც და იერიშიც.

თან ერთი თურქი სუნიტი დერვიშის წერილს გაეჯავრებინა ერანის ხელმწიფე. ის დერვიში სპარსელებზე წერდა: განკითხვის ეამს დიდი ალლაჰი თქვენ, შიიტ სპარსელებს, აყროლებული ურიების ვირებად გადაგაქცევთო, რათა ამ საზიზღარმა და მთელს მსოფლიოში მოძულეებულმა ხალხმა ვირებზე იმედი შეგკაზმონ, ზედ შეგჯდნენ და პირდაპირ ჯოჯოხეთში შეგაჯირითონო.

შაჰმა შიიტი დერვიშები გამოიძახა და უბრძანა: ამ წერილის სამაგიეროდ, აქოთებულ ოსმალო სუნიტებს ისეთი წერილი მისწერეთ, ოცდათორმეტი ჩაღრმავებული ადგილიდან არც ერთი შეუგინებელი არ დაუტოვოთ, თორემ არც ერთს მხრებზე თავი არ შეგრჩებათო.

მერე ალავერდი-ხან უნდილაძე გამოიძახა შაჰ აბასმა ყარსიდან. მომეშველე, ეგებ მოვულო ბოლო განჯასო,

სასწრაფოდ მოიჭრა უნდილაძე.

ყოველის მხრიდან ერთიანი იერიშით მიუხია ჯარები ქალაქის გალაგნებს.

1606 წლის 5 ივლისს განჯა დანებდა ერანის მბრძანებელს.

მისი ბრძანებით ქალაქი გაძარცვეს და საძირკველამდე დაანგრიეს.

განჯიდან ქართლისაკენ წამოემართნენ სპარსელები.

გზაზედ ქართველი დიდებულები შემოეგებნენ შაჰ აბასს და გიორგი მეფის სიკვდილი აცნობეს.

აჰა, როგორც არის, გაუჭრია შარბათსო, გაუელვა აბასს და მაშინვე „დიდი წუხილი“ გამოთქვა „ძვირფასი ძმის“ გარდაცვალების გამო.

მაინც რა დამართნია გიორგი მეფესო, ფრთხილად იკითხა შაჰმა.

მეჭვრისხევს ყოფილა გიორგი ერთ დღეს, თაფლს მიირთმევდა თურმე, ფუტკარი შეყოლია თაფლს, შიგნიდან დაუკბენია, თავ-პირი გასივებია მეფეს, და ასე მომკვდარა ფუტკრის შხამისგანო. მეჭვრისხევიდან წამოუსვენებიათ და მცხეთას დაუკრძალავთ გიორგი.

გაუხარდა შაჰს: ასე სჯობიაო, დააბრალონ ფუტკარს გიორგის სიკვდილი და „შარბათის ამბავი“ მიაფიწყდებოთ ხალხს.

ქართველები ახლა გიორგის პირმშო ვაჟს ითხოვენ მეფედ, თოთხმეტი წლის ლუარსაბს. ამასვე ეაჯება „დიდებულ შაჰ აბასს“ ლუარსაბის დედა, ქვრივი დედოფალი მარიამი.

აბასმა ყოველივე შემწყნარებლური სახით მოისმინა, ქართველი ელჩები უხვად დააჯილდოვა და ისე გამოისტუმრა. თან თავისი მოციქულიც გამოატანა. მოჰამედ-ბეგ ბიქდელი შამლუ, რომელსაც დაავალა: ჩემი სახელით სამძიმარი მოახსენე გარდაცვლილი მეფის მეუღლეს, შვილებს, ნათესაებს და დაამედე, ყველაფერს თქვენი სურვილისამებრ გავარიგებ-თქო...

ქართლში შემოვიდა შაჰ აბასი და მისი „ცის სფეროსავით დიდებული ურდო“.

უბრძოლველად სტოვებდნენ თურქები ქართულ ციხე-ქალაქებს. ჭერ ლორე ჩააბარეს ერანელებს. მერე, როცა შაჰ აბასი ალგეთზე მოვიდა, დმანისის ციხეც სიცოცხლის შენარჩუნების საფასურად მიართვა ოსმალო ციხიონმა. დმანისშიც ერანელები ჩადგნენ.

ტფილისის ჭერი დადგა.

დაასწრო ტფილისის მმართველმა აბდ ალ-ლათიფ ფაშამ და მოციქული მიუგზავნა შაჰ აბასს. ოღონდ მე და ჩემს ციხიონს უვნებლობის ფირმანი გამოგვიგზავნე და მაშინვე ჩაგაბარებ ტფილისის გასაღებსო.

შაჰმა ალი-ყული-ხან შამლუ გაგზავნა თურქი მეციხოვნეებისადმი უვნებლობის ფირმანით.

საქართველოს სატახტო თურქებმა დატოვეს და ერანელებმა დაიკავეს.

ამის შემდეგ შაჰ აბასი თვითონ ეწვია ტფილისს.

დიდის გულმოდგინებით, წადნიერებით და „სიფრთხილის თვალით“ დაათვალიერა და დაჩხრიკა „გურჯისტანის“ ლეგენდარული ქალაქი. გააოცა „ცის სფეროს თანასწორი ციხის კოშკების“ ხილვამ. დიდად განისვენა და „განიწმინდა“ ტფილისის „ღვთაებრივ“ აბანოებში.

ტფილისის ციხიონის უფროსად შაჰმა დანიშნა ყიზილბაში მოჰამედ-სულთან შამს ად-დინლუ, რომელსაც უფრო დელუ-მუჰამედის სახელით იცნობდნენ სპარსელთა და ქართველთა შორის.

ქართლის სამეფო მემკვიდრეობის საკითხს მიუბრუნდა შაჰ აბასი.

მეფედ დასვა ლუარსაბ გიორგის ძე, თოთხმეტი წლის ყმაწვილი, „ვით თოთხმეტი დღის მთვარე, მშვენებით სავსე“.

დააგვირგვინა და „შვილობის“ რაყამიც უბოძა „მამობრივად მზრუნველმა“ აბასმა.

მერე, შაჰმა, „თავისი მწყალობელი ბუნების გამო“, ქართლის სამეფო საგვარეულოს დანარჩენი წევრები, „მათი ხარისხისა მიხედვით“, აავსო დიდი წყალობით, ყველას „შა-

ჰური მოკითხვით მიუალერსა, ხელმწიფური საჩუქრებით და-
აჯილდოვა“, ყველა „გაახარა“ და „გაალაღა“.

ასე იწყებდა მეფობას ქართლის ახალი მეფე ლუარსაბ
მეორე (1606—1614 წწ.).

მაგრამ რა მეფობა იყო ეს?!

ტფილისში, აღჯაყალაში, ლორეში, დმანისში თურქების
ნაცვლად სპარსელები ჩამსხდარიყვნენ და ჩამკვიდრებულყ-
ვნენ. მხოლოდ ეს იყო „სიახლე“ და სხვა არაფერი.

ესეც ახსოვდეს აქედანვე ლუარსაბ მეფეს: შაჰ აბასს, კა-
ხეთისა არ იყოს, არც ქართლისათვის გაუჭირდება „სამეფო
კაცების“ გამოძებნა. ლუარსაბის დასაშინებლად მარტო ორი
„გურჯი-მირზაც“ საკმარისი იქნებოდა — ბაგრატი-მირზა და
ხოსრო-მირზა, ლუარსაბის პაპის (სვიმონ დიდის) ძმის (და-
ვით, იგივე დაუდ-ხანის) ძენი.

მკითხველს ახსოვს წინარე წიგნიდან: ქართველი ხალხის
მოღალატე დაუდ-ხანს ორი შვილი ჰყავდა — ბაგრატი და
ხოსრო. პირველი მამამ თვითონ წაიყვანა სპარსეთში, მეორე
სპარსეთში შეეძინა თან წაყვანილ ხარჭასთან, წაგვისელ გლე-
ხის ქალთან... ახლა შაჰ აბასის კარზე ვაჟკაცდებოდნენ და
„წინაურდებოდნენ“ გათათრებული „გურჯი-მირზები“.

ფრთხილად და ჭკვიანად იყოს ლუარსაბ მეფე, თორემ...

კიდევ ეს „სიახლე“ დაერთო ლუარსაბ მეორის გამეფებას:
ბორჩალოს ველური ტომი მოდიოდა დედაწულიანად და ლო-
რე-დებედას ხეობაში სახლდებოდა და იბუდრებდა.

დამბლავდებოდა ქართული მიწის განაკიდურნი.

და ვინ იცოდა, რას მოასწავებდა ეს ხვალ, ზეგ, მაზეგ...
ასეულ წელთა სარბიელზე...

ისევ ვერ დაისვენებდა ქართული ქურა — მკედელი უქარ-
ქაშო ხმლისა...

ქართლიდან წასულმა შაჰ აბასმა თავისი ჯარების ყველაზე მკლე ნაწილი ერევნის ციხის გასამაგრებლად გაგზავნა, ხოლო თვითონ მთავარი ძალებით შირვანისაკენ გაემართა.

გზაზედ ფაიქები წამოეწივნენ და მოახსენეს: თურქი ელჩები მოისწრაფიან შენს შესახვედრად.

თურქი ელჩებიო?!

გაუხარდა შაჰ აბასს. ალბათ, ძალიან მისჭირვებია სტამბოლის უმაღლეს კარს... ორი მზრისკენ იქნევს მახვილს თურქთა სულთანი — ევროპისკენ (ავსტრია) და აზიისკენ (ერანი). უმჯველად გასჭირვებია.

შედგა და სტუმართა შესახვედრად გაემზადა აბასი.

მოახლოვდა თურქთა ელჩონი.

ეს იყო ყველასათვის მოულოდნელი: ქალი აღმოჩნდა თურქთა დიასპანი — ქალი, სახელად გულჩარა, ქართველი ქალი!

გახსოვს, მკითხველო, გულჩარა, ქართლის მეფე გიორგი მეათის მშვენიერი ასული, დატყვევებული სვიმონ მეფის გამოსახსნელად რომ გაგზავნა მძევლად მამამისმა სტამბოლს? ოთხი წელიწადი გასულიყო მას შემდეგ.

სახელოვანი პაპის გამოხსნა ვერ მოასწრო გულჩარამ: სიკვდილმა უსწრო სვიმონ მეფეს... ხოლო შემდგომ სწრაფად დაწინაურებულა ჰკვიანი, სათნო და პირმშვენიერი ქართველი ქალი თურქთა სასახლის კარზე. სულთან აჰმედ I-ის დედას შეუყვარებია გულჩარა, თურქეთის ნამდვილ მბრძანებელს, კალთაზე ჰყოლია გამოკერებული, — უმისოდ არაფერს მოისურვებდა, არაფერს გადაწყვეტდა. სარწმუნოების გამოცვლაც არ მოუთხოვია ქრისტიანი ქალისთვის, ისე ჰყვარებია ფადიშაჰის მშობელს „გურჯი-ხათუნი“.

როცა თურქეთს „ორ ფრონტზე“ ბრძოლა ძალიან გაუჭირდა, დამსხდარან ფადიშაჰის დედა და დიდი ვეზირი დერვიშ ფაშა და გადაუწყვეტიათ: შაჰ აბასთან ზავის შესაკრავად გულჩარა გაგზავნოთ და ჩაუშად (მცველად) მურად ალა გაკატანოთ.

და აი, ახლა შაჰ აბასის წინაშე წარსდგა ელჩი-ბანოვანი, თავისი ჩაუშით.

დიდის კრძალვით, პატივის მიგებითა და საბოძვარ-მისარ-თმეველით მიიღო შაჰ აბასმა საოცარი ქალი-დიასპანი.

მერე დასხდნენ და შეუდგნენ საზავო ბჭობას.

დიდხანს გაგრძელდა დიპლომატიური კიდილი ქართველ ქალსა და სპარსეთის ხელმწიფეს შორის.

შაჰ აბასი მშვიდობიანობის ჩამოგდების მთავარ პარობად 1555 წლის ამასიის ზავის აღდგენას მოითხოვდა (მკითხველს ახსოვს: ამ ზავით ამიერკავკასიის აღმოსავლეთი ნაწილი ერანს „ეკუთვნოდა“, დასავლეთი — თურქეთს).

თავის მხრივ გულჩარა 1590 წლის ზავის სამართლიანობას ასაბუთებდა (ამ ზავით ამიერკავკასია მთლიანად თურქეთს „ეკუთვნოდა“).

არც ერთმა მხარემ არ დათმო. მოლაპარაკება ჩაიშალა. გულჩარა სტამბოლს გაბრუნდა.

შაჰს გული დასწყდა, რომ ეს საოცარი „გურჯი-ხათუნი“ მის სახელმწიფო კარს არ ამშვენებდა და საძულველი სასულ-თნოს მესვეურთა შორის იმყოფებოდა.

გულჩარას დაბრუნებიდან მცირე ხნის შემდგომ — 1606 წლის 11 ნოემბერს — თურქეთმა ავსტრიასთან ზავი შეჰკრა და მომავალი წლისთვის მთელი საომარი ძალებით ერანთან გადამწყვეტი ომის სამზადისს შეუდგა.

„გაზრდილი“ მურჩიბა „გაგზრდილს“

გულჩარას დაშორებული შაჰ აბასი მთელის მხედრობით შირვანს შეიჭრა და შემახას ძლიერ ციხე-ქალაქს ალყა შემოარტყა.

თურქული ციხიონი მედგრად დაუხვდა მტერს.

მთავარ მოიერიშეებად შაჰს ალავერდი-ხან უნდილაძე და ყარჩიხა-ხანი ჰყავდა დანიშნული.

არ გაჭრა არც ერანული ზარბაზნების ცეცხლმა, არც უნა-
დილაძის დულამთა თავზეხელაღებულმა იერიშებმა.

1607 წლის გაზაფხული წვიმიან-ჭინჭულიანი დადგა შირ-
ვანში. გადაუღებელმა კოკისპირულმა ვზები სავსებით მოშა-
ლა. მიმოსვლა შეწყდა. ქალაქები შიმშილმა მოიცვა.

შაჰ აბასს ცნობა მოუვიდა — ბაქოს მოსახლეობა აჯანყე-
ბია ოსმალურ ციხიონს. აჯანყებულებს ციხიონის უფროსი
კიდევაც მოუტკლავთ. აბასმა მაშინვე ჯარი აფრინა ბაქოს.
სპარსელები ქალაქში შეიჭრნენ, ოსმალები ამოწყვეტეს და
ბაქო თვითონ დაიჭირეს. ბაქოელთა „სიახლეს“ ეს იყო: ოს-
მალური უღელი მოიშორეს და მის სანაცვლოდ სპარსული
დაიდგეს.

ბაქოს დერბენდი მიჰყვა. დერბენდელებიც აუჯანყდნენ
ოსმალებს. შაჰ აბასმა „აჯანყებულთა დასახმარებლად“ ისევ
გაგზავნა ლაშქარი, რომელსაც „მ ა ნ უ ჩ ა რ-ბეგი უსარდლა,
სახელოვანი მანუჩარ II ათაბაგის 16 წლის ვაჟი (მკითხველს
წინარე წიგნიდან ემახსოვრება მანუჩარ ათაბაგი, ოსმალთ
სარდალი რომ „თავიდან ჭიბამდე“ გააპო ხმლის დარტყმით).

შეიჭრა ყმაწვილი მანუჩარ-ბეგი დერბენდში, თურქთა ცი-
ხიონი ამოყლიტა და ახალ ციხიონად სპარსელები ჩაუყენა
„გათავისუფლებულ“ ქალაქს.

ხოლო შემახას ალყა ისევ ჭიანჭურდებოდა.

ზაფხულში წვიმები მშრალმა ამინდებმა შეცვალა. ჯარე-
ბისა და არტილერიის მიმოსვლა და მიმოტანა გაადვილდა,
მაგრამ შემახა მაინც ვერ იქნა და ვერ გამოჰკლიჯეს ხელიდან
ოსმალებს ერანის უპირველესმა სარდლებმა — თვითონ შაჰ
აბასმა, ალავერდი-ხან უნდილაძემ და ყარჩიხა-ხანმა.

„უფრო მეტი არიან საჭირო ქართველებით“, იფიქრა შაჰ-
მა და თეიმურაზს შემოუთვალა: ძალიან მენატრები, ძალიანაც
მჭირდები და სასწრაფოდ კახელთა „გაწყობილი ჯარით“ გა-
მომეტყხადეო შემახასთან.

ერანის ლომი მოუთმენლად ელოდა „თავის გაზრდილს“
და უმამაცეს კახელთა ლაშქარს.

და მოვიდა... უარი!

ღიახ, თეიმურაზი უარს ამბობდა შირვანს ლაშქრობაზე!
მხოლოდ ეს იყო — ბოდიშს უხდიდა შაჰს: ამჯერად არ

შემიძლია სალაშქროდ გამოსვლა და გთხოვთ გამათავისუფლოთ „მაღალ კარზე სტუმრობისგან“.

უარიო?!

აიშალა და აზვავდა შაპ აბასი.

ნუთუ ეს თავისი ნებითა და ჭკუით გამიბუდაო თეიმურაზმა?!

არა, უეჭველად დედამისის, ქეთევან დედოფლის ჩავონებით იქნებაო...

რა გაეწყობოდა! მდგომარეობა კარნახობდა და ისევ უნდა მიეღო შამათი „კახურ დაფაზე“.

და შეუთვალა „გამზრდელმა“ „გაზრდილს“: ჩვენ წინააღმდეგი არა ვართ შენი თხოვნისა, ვთქვათ და, ნუ მოხვალ ამჯერად ჩვენთან, მაგრამ ვაითუ შენი გამოუცხადებლობა „ზერელე ჭკუის აღამიანებს, შაჰინაღმი ერთგულებისა და მორჩილების ნაკლებობად მოეჩვენოთ“, ან ღალატად ჩათვალონ და „სხვა მხარეების მმართველებმაც“ შენის მიბაძვით განდგომა და ღალატი განიზრახონ! ამიტომ გთხოვთ, მაინც მოხვიდე მცირე ხნით, მოხვიდე „მარტო, მსუბუქად“. მალე უკანვე გაგაბრუნებ კახეთს, საიდანაც მერე დედაშენს გამოგზავნი იმდენი ლაშქრით, რამდენსაც თვითონ დედოფალი შესაძლებლად ჩათვლის!

მაინც არ გამოცხადდა თეიმურაზი. მან „საპატიო მიზეზის გარეშე“ ისევ „უარი თქვა მოსვლაზე და შაჰის სამსახურის ბედნიერებას არ ეზიარა“.

რისხვის ცეცხლზე იხრაკებოდა შაპ აბასი.

განვლო მცირე დრომ და კახეთიდან მოვიდა დედოფალი ქეთევანი, სულ რაღაც ათასი კახელის თანხლებით. თეიმურაზი კი ისევ არ ჩანდა.

შაჰს შეეძლო დაცინვად მიეღო ქართველთა ეს უცნაური (გინა — „ავდებული“) სტუმრობა, მაგრამ არაფერი შეიმჩნია და დიდის პატივით მიიღო კახეთის დედოფალი და მისი ამალა.

კახელები მისვლისთანავე საომრად გაეწყვენენ და უნდილადის „სიბას“ შეუერთდნენ.

მაგრამ შაპ აბასმა „სტუმრების შეწუხება“ არ ინება. კახელთა რაზმი ბრძოლის ხაზიდან უკანვე გამოიწვია. დედო-

ფალ ქეთევანს თავისი ცოლები აახლა დიდის ალერსითა და პატივით“.

მალე კახეთს გაბრუნდა დედოფალი თავისი ამალით.

ბოდმა ბოლავდა შაჰ აბასის გულში.

ხოლო, ეს კი სრულის სიწრფეობით უნდა ითქვას ალლაჰის წინაშე: მართლაც დიდებული ქალი ყოფილა ქეთევან დედოფალი...

თეიმურაზს შაჰ აბასის ბოდმა სულაც არ ედარდებოდა, — ნადირობდა, ნადიმობდა და ლექსებს თხზავდა „რუსთაველთან შეპაექრებით“.

იმავე 1607 წელს, ჩვიდმეტი წლის ქაბუკმა ცოლად შეირთო მამია გურიელის ასული ანა, ქალი „დიად ჰკვიანი, ტანად კარგი და შუენიერ, სახით ტურფა და ლამაზი, ზნე საქციელ კარგი, საქმით სათუთი და წმინდა საყდართა და მონასტერთ ამშენებელი და მრავლის შემწირავი, მრავალთ მომთმენი, არ გამჯავრებელი, ყველას შმა-შვილურად მიმპყრობელი, დედათ დედურად გამწყო, დედამთილის მორჩილი და ნამეტნავად მოშიშარი და ქმრის მოყვარული...“.

ქორწილი თორღას გაიმართა.

სამი თვე გაგრძელდა ღვინო, ნადირობა, ბურთაობა და ბოეტური პაექრობა სტუმართა და მასპინძელთა შორის.

გურული მაყრიონი აღტაცებული და განცვიფრებული იყო კახეთის სიმშვენიერითა და სიმდიდრით, კახელთა დარბაისლობით, სიუხვითა და ხელგაშლილობით.

ორი ვაყი აჩუქა ანამ თეიმურაზს: ჯერ ლევანი, შემდგომ — ალექსანდრე.

შაჰ აბასს კი, თეიმურაზის ურჩობის გამო, გველის კაპრობა დამართოდა.

„დიდებული მანდილოსანი“

1607 წლის 27 ივნისს უნდილაძემ ზარბაზნების უწყვეტი ცეცხლით შეანგრია შემახას კედლები და ქალაქში შეიჭრა.

სპარსელებმა სულ ერთიანად ამოწყვიტეს ოსმალონი.

შირვანის ყველა ციხე-ქალაქში ოსმალთა ნაცვლად უკვე სპარსელები იდგნენ.

„ოსმალობა“ დამთავრდა და „ყიზილბაშობა“ დაიწყო.

შემახის ციხე ახალი დაცემული იყო, რომ სამცხე-საათაბაგოდან მესხი ფაიქები ეახლნენ შაჰს.

„დიდებულ მანდილოსანს“ — ელენეს წარმოეგზავნა ისინი.

მკითხველს წინარე წიგნიდან ემახსოვრება ელენე: იგი დიდი სვიმონ მეფის ასული იყო, მანუჩარ II ათაბაგის მეუღლე და დედა ახლახან მოხსენიებული ჭაბუკი მანუჩარ-ბეგისა (დერბენდი რომ წაართვა თურქებს).

მამაცი ქმრის სიკვდილის შემდგომ ელენე ჩასდგომოდა სათავეში მესხი პატრიოტების თავგამოდებულ ბრძოლას თურქთა უმძიმესი უღლის დასამზობად.

მაგრამ ეს ბრძოლა იყო აგონია, მოკლებული ყოველგვარ იმედს დახსნისას.

ქალის სუსტი ხელები ებრძოდა ტარტაროზულ ძალას, რომელთან ჭიდილი მისი ქმრის გოლიათურ მხარ-მკლავებსაც დიდად მისჭირვებოდა.

გათურქების უღმობელ ცეცხლში ჩანთქმულიყო მესხეთი — დიდი ქართული ქვეყანა, სამშობლო ექვთიმე და გიორგი ათონელებისა, ბექა და ბეშქენ ოპიზარებისა, შალვა და ივანე ახალციხელებისა, აკენის დამრწვევი შოთა რუსთველისა...

ელენემაც კარგად იცოდა, რომ „აღია და ოსმანა ორივე თათარია, ერთი ბაბრია და მეორე ფოცხვერი“. მაგრამ „დიდებული მანდილოსანი“ მაინც იძულებული გახდა, ფოცხვერის წინააღმდეგ ბაბრისათვის დახმარება ეთხოვა.

დახმარების სათხოვნელად წარმოეგზავნა ფაიქები ელენეს „ღვთის ჩრდილ“ შაჰ აბასთან.

აკი ელენეს ვაჟი მანუჩარ-ბეგიც აქ იყო, „შაჰის ბედნიერ კარზე“. ძალიანაც „უყვარდა“ ერანის მბრძანებელს მესხი ჭაბუკი, „ჩემს ძარღვებშიც ხომ მესხური სისხლი დაედინება“, — ფიქრობდა შაჰი. განსაკუთრებით მას შემდეგ „შეიყვარა“ მანუჩარი შაჰმა, რაც ამ „საოცარმა ბიჭმა“ ერთის დაკვრით დააგდებინა თურქებს დერბენდი.

შაჰ აბასმა დიდის გულმოდგინებით შეიწყნარა ელენეს თხოვნა, მაგრამ მხოლოდ ყიზილბაშთა მცირე ლაშქარი გამოჰყო, მანუჩარ-ბეგს ჩააბარა და მესხეთისაკენ გამოუშვა.

„მთავარი იმედი“ მაინც ღვიძლი ქართველებისა ჰქონდა ელენეს, და სანამ სპარსელთაგან რაიმე პასუხს მიიღებდა, მანამ დახმარება თავის ძმისწულს — ლუარსაბ II ქართლის მეფეს სთხოვა.

ლუარსაბმაც აფრინა ქართლის ჯარი სამცხისაკენ.

1607 წლის ზაფხულში ქვრივმა ქალმა ქართველთა ირგვლივი იერიშით აიღო ქალაქი ახალციხე. აქაური ბეგლარ-ბეგი, გათურქებული ქართველი იუსუფფაშა ასორმოცდაათ ოსმალოსთან ერთად ტყვედ მიჰგვარეს ელენეს.

ახალციხე არ იკმარეს და თურქებს ხელიდან გამოჰგლიჯეს „აგრეთვე იქაური ადგილების უმრავლესობა“.

ახალციხის გამგებლად, ელენეს თხოვნით და შაჰის დასტურით, დაჯდა მანუჩარ-ბეგი, გინა — მანუჩარ III ათაბაგი.

შაჰ აბასის მომხიბი

1608 წლის 24 დეკემბერი იდგა.

შაჰ აბასი ინახად იჯდა.

სუფრა ისევ „ჭრელი“ იყო: სპარსელნი, ქართველნი, სომეხნი, ჩერქეზნი — ყველანი მაჰმადიანნი, ან გამაჰმადიანებულნი.

„თათრებს“ გარდა სამი კათოლიკე ქრისტიანი ბერიც ესწრებოდა იმდღევანდელ პურობას: პორტუგალიელი მისიონე-

რები და მოგზაურები — პატრი გოვეა, პატრი გილჰერტი
მი და პატრი ბელშიორი.

ინდოეთიდან ახალი დაბრუნებულნი იყვნენ „წმიდა მამე-
ბი“ და იქაურ ამბებს ჰყვებოდნენ.

მერე შაჰმა ჰკითხა ქრისტიან სტუმრებს: ერანში როგორ
გრძნობთო თავს, თქვენს სამისიონერო მოღვაწეობაში ხელი
ხომ არ გეშლებათო, ხომ არავინ გაწუხებთ და გავიწროებთო.

ბერებმა დიდი მადლობა მოახსენეს შაჰს: თქვენის უზენა-
ესი ხელმწიფობის წყალობით და მფარველობით ყოველივე
კარგად მიდისო.

— ეგროპაში როდის აპირებთ დაბრუნებას? — ჰკითხა
შაჰმა სტუმრებს მოულოდნელად (ეს კი აღარ გამოუვიდა
„ქართულად“ აბასს, — მასპინძელმა სტუმარს არ უნდა ჰკი-
თხოს, სახლში როდისღა მიბრძანდებიო!).

— სამშობლოში მაშინ გავემგზავრებით, როცა ქრისტეს
შობის დღესასწაულს მოვრჩებით, — უპასუხა გოვეამ, რომე-
ლიც შაჰთან ყველაზე ახლოს იჯდა.

— ქრისტეს დაბადების დღე ხომ ხვალ არის, 25 დეკემ-
ბერს, — თქვა შაჰმა.

— დიახ, ხელმწიფეო.

— მაშ, თქვენ, ქრისტიანებს, ხვალ დიდი დღესასწაული
გაქვთ, არა?

— დიახ, ხელმწიფეო.

— ახლა ეს მითხარით, ჩემს სპარსეთშიც ისე დღესასწაუ-
ლობთ ქრისტეშობას, როგორც თქვენს პორტუგალიაში? —
იკითხა შაჰმა წადნიერი თვალებით.

წმინდა მამები შეიშმუშნენ.

ისევ გოვეამ დაასწრო:

— ჰო, დაახლოებით, თუმცა... ჩვენს ქვეყანაში მეფე და
უფლისწულები მონაწილეობენ ქრისტეს დაბადების დღესას-
წაულში.

შაჰს გულიანად გაეცინა: ეგ ძალიან ძნელი და გამოუსწო-
რებელი დანაკლისი გქონიათო, რადგან ხვალამდე, ამ ერთ
დღეში, არც პორტუგალიის მეფისა და მისი ოჯახის ჩამოყვა-
ნა მოხერხდებაო ერანში და არც თქვენი გადაფრენა პორტუ-
გალიაშიო.

როცა მბრძანებელი ხუმრობს, ქვეშევრდომნი აუცილებლად სიცილით უნდა „დაიხოცნონ“ (მნიშვნელობა არა აქვს, როგორი იყო „ხუმრობა“ — მახვილი თუ ბლაგვი).

და სიცილით გადაფიჩინდნენ შაჰის ხუმრობით „აღტაცებული“ მოსადილენი.

შაჰ აბასმაც სიცილი ჩაითავა და ახლა სერიოზულად და დიდსულოვნურად ჰკითხა მისიონერებს: თქვენ სხვა რამ მითხარით, სხვა ხომ არაფერი გაკლიათ ხვალინდელ დღესასწაულზეო.

უცებ მამა გილჰერმმა რალაც უჩუროხულა ჯერ გოვეას, მერე ბელშიორს და სამივეს სიცილი აუტყდა.

შაჰს გაუკვირდა.

სხვებიც განცვიფრდნენ, — დიდი კადნიერება იყო, როცა ხელმწიფეს არ ეცინებოდა და „სხვა კვდებოდა სიცილით“.

— ასეთი რა თქვი, რომ სიცილი ველარ შეგიაკვებიათ? — ჰკითხა შაჰმა გილჰერმს.

გილჰერმი აიწურა და ხმა ველარ ამოიღო.

— რა გეცინება-მეთქი?! — თქვა ხელმწიფემ სიმკაცრე-შერეული ხმით.

— შენ უთხარი და დამიხსენი, — უჩუროხულა ფერდაკარგულმა გილჰერმმა გოვეას.

გოვეამ გაბედულება მოიკრიბა და ნაჯახირევი ღიმილით მოახსენა შაჰს:

— როცა თქვენმა უდიდებულესობამ იკითხა, ხომ არაფერი გაკლიათო ქრისტეშობის დღესასწაულისას, მამა გილჰერმმა გაიხსენა გოჭები, რომლებსაც ჩვენში აუცილებლად კლავენ შობა-დღესასწაულზე. მაგრამ სპარსეთში ეს შეუძლებელია, რადგან აქ საერთოდ არა ჰყავთ გოჭები.

სამარისებური სიჩუმე ჩამოვარდა.

არავინ იცოდა, უნდა გაეცინათ თუ არა მაშინ, როცა მაჰმადიანი ხელმწიფის სუფრაზე ახსენებდნენ გოჭებს...

— გოჭებიო?! — უცებ წამოიძახა აბასმა და სახე გაუბრწყინდა.

— დიახ, თქვენო ბრწყინვალეებავ! — წამოსცდა გოვეას.

— ვინ მოგახსენათ, რომ მე არა მყავს გოჭები? მე ისინი მყავს იმდენი, რამდენიც გინდა! — ბრძანა ამაყად.

— საიდან? — ისევ წამოსცდა გოვეას.

— საიდან და, საქართველოს მეფეები მიგზავნიან გოჭებს.

— საქართველოს მეფეები?!

— დიახ. აქვე მახლობელ სოფელში ვინახავ საქართველო-დან გამოგზავნილ გოჭებს, — თავმომწონედ დაასრულა შაჰმა, მაშინვე ერთი კარისკაცი მიიხმო და უბრძანა: დღესვე, სადილის შემდგომ, ჩემი ღორების კოლტიდან პორტუგალიელ სტუმრებს იმდენი გოჭი მიაართვით, რამდენიც თვითონ მოითხოვონო.

„ისე ეტყობა, შაჰ აბასი თვითონაც მიირთმევს ღორის ხორცს“, — ფიქრობდნენ გახარებული ევროპელები.

მეორე დღეს ის კარისკაცი უამბობდა ხელმწიფეს:

როცა პორტუგალიელებს ხუთი გოჭი გადავუთვალეთ და იმათაც სიხარულით გაირეკეს ჭყვიტინ-ჭყვიტინით, აუარებელი ხალხი მოაწყდა თვალსასეიროდო. ხოლო, როდესაც დაკლეს და შეწვეს, ქართველები და სომხები ჩაეზიარნენ ევროპელებს შემწვარ გოჭის ხორცს. ამიტომ პორტუგალიელებმა კიდევ ითხოვეს ერთი გოჭი და ჩვენც მაშინვე მივეცითო.

— მაშ, ქართველებმა და სომხებმა მიირთვეს გოჭის ხორცი, არა? — იკითხა შაჰმა დიმილგარეული სიმკაცრით.

— დიახ, მბრძანებელო.

წადიო, — ანიშნა ხელმწიფემ.

კარისკაცი გავიდა, შუამოკეცილი.

შაჰ აბასი მარტო დარჩა.

— არა, არასოდეს არც ქართველი და არც სომეხი გულით არ გაათათრდება! — დაიღმუვლა „ლომმა“.

წიგნი „შქლები შვილისა“

თუ ვერ ვიგუებთ, ვერ შევიფრებთ,
 კარგი შვილები რად გვებადება?

• • • • •
 ცრემლები მალრჩობს, ველარას ვამბობ;
 კარგის დალუპვა რად გვენატრება?

ვ ა ქ ა - ვ შ ა ვ ე ლ ა

Он в Риме был бы Брут, в Афинах Периклес.
 А. Пушкин

„ახალ კაცი“

იღვა 1609 წელი.

შაჰ აბასი იყო 38 წლისა.

მეფე ლუარსაბ მეორე — 17 წლისა.

მეფე თეიმურაზ პირველი — 19 წლისა.

ხოლო მოურავი გიორგი სააკაძე — 29 წლისა.

გიორგი სააკაძე!

წოდებრივი წარმომავლობით — აზნაურთა შრე.

სამშობლო მისი — შიდა ქართლი. ატენის ხეობა, მდინარე
 ტანას მიდამოები, „ძველი სამკვიდრო სოფელი ფელი“.

შორეული წინაპარი — ჯ ა ნ ზ უ რ ა ბ სააკაძე. იხსენიება
 თამარ მეფის დროს, მეთორმეტე საუკუნის მიწურულს.

შემდგომ — დ ო ნ ა სააკაძე, ბაგრატ V-ის თანამებრძოლი.
 ტფილისის დაცემის ეამს მეფესთან ერთად ტყვედ ჩაუვარდა
 თემურ-ლენგს (1386 წელი, 21 ნოემბერი).

მერე — გ ი ო რ გ ი სააკაძე, მოხსენიებული 1547 წელს.

ამა გიორგის ჰყოლია ოთხი ვაჟი ქეშთელ, სიაუშ, ზურაბ და ივანე.

ამათგან სიაუშ სააკაძეს უკვე იცნობს ჩემი მკითხველა წინარე წიგნიდან: იგი სახელოვანი სვიმონ მეფის მოურავი, მრჩეველი და მოლარე იყო.

სიაუშსა და მის მეუღლეს თამარს (ბარათაშვილის ქალს) ჰყავთ ოთხი შვილი: სამი ვაჟი — გიორგი, ქაიხოსრო და სახელით უცნობი, და ერთი ქალი — სახელით ისიც უცნობი. იგი ჯერ გაუთხოვარია და დიდ საბედოს ელოდება.

სწორედ სიაუშ სააკაძის უფროს ვაჟს არგუნა საისტორიო ბედისწერამ დიდი გიორგი სააკაძის, გინა — დიდი მოურავის სახელი.

აზნაური სააკაძენი დასაბამითვე აზნაურობას აღარ კადრულობენ და დიდგვარიან თავადობას უტოლებენ თავს.

ხოლო გიორგი სააკაძე თვითონ ქცეულა დიდ ფეოდალად. იგი თემის ხეობაში ჩამოსახლებულა. სოფელი ნოსტე ფეოდალურ „რეზიდენციად“ უქცევია. იქვე სრა-სასახლე, ციხესიმაგრე და ეკლესია აუშენებია. სოფელ ერთაწმინდაში საგვარეულო ეკლესია და საძვალე გაუმართავს. მრავალი სოფელი, ყმა და მამული მოუხვეჭია „გათავადებულ აზნაურს“.

გიორგის ცოლად შეურთავს იმჟამინდელ ფეოდალთა შორის უპირველესის, ნუგზარ არაგვის ერისთავის მშვენიერი ასული — მარეხი, რომელმაც სახელოვან მეუღლეს რვა შვილი შესძინა: ავთანდილი, პაატა, ივანე, ზურაბი, იორამი და სამი ასული, სახელებით უცნობი. ამათგან უფროს ქალს თეიმურაზ მუხრან-ბატონი შეირთავს, მეორეს — იასე ქსნის ერისთავი, ხოლო მესამეს — ფერად ფაშა, ერთ დროს ჯაყელი, გათათრებული ქართველი.

მოურავ გიორგი სააკაძეს ეკუთვნის:

თემის ხეობაში: ნოსტე, ახალშენი, ნოსტის ოძისი, გველდეს ორბეთი, ცხირეთი, ერთაწმინდა, ფავნისი, ეზატი, გუდალეთი, კავთისხევი, წინარეხი, მარჯანაანთ უბანი, ტყემლოვანა, მზვარე, კოტმანი, ზემო ვერხვეული, ქვემო ვერხვეული, გავაზური, სამტრედო, გოსტიბე, კაბერი, გარგარი, მერია, ჭავჭავისი, კვირიკა, გოგოთი;

მანგლისის ხეობაში: ზემო ოძისი, ტყის უგუდეთი, მინდვრის უგუდეთი;

ატენის ხეობის ზემო წელზე: ფელი, ღვეწი, ხანდისი, სიქალეთი, ღვედრეთი, კიკანათბერი;

ალის ხეობაში: ნაბახტევი, კლდის წყარო;

ტფილისის ახლოს: ლისი, ნახშირგორი, წოდორეთი;

ქვემო ქართლში: კრწანისი, ყიშლალი, ბერდიკი.

სვიმონ მეფის ეამს დაწყებული აღზევება ჰაბუჯი სააკაძისა. მერე გიორგი მეათის ხანმოკლე მეფობის დროს „ამღერებდა“ უქარქაშო ხმაღს, ხოლო ახლა მეფე ლუარსაბ მეორესთან მისულიყო, ტახტთან სულ ახლოს, ვითარცა მოურავი ტფილისისა და ქართლისა.

ტანად მძლავრია და ჩაკირული გიორგი სააკაძე, ახოვანი, მხარმკლავკუნთოვანი, მკერდგაშლილი. მაღალ და მაგარ ქედიანი, სახე — მკაცრი, ნიკაპი — ნებიანი, მზერა ორბისა — მზის დამკორტნავი, ცხვირი — კეხდაკრული და უღვაშები — ყურებამდე გადამტკავლული.

ბასრია მისი გონება, ვითარცა სიბასრე მისი ხმაღისა.

უშიშარია მისი გული, ვითარცა გული უსხეულო ლუციფერისა.

მიზანსწრაფულია მისი ვნება, ვითარცა მიზანსწრაფვა ვნებანი და ნებანი დაიმონისა.

მის შფოთიან სულში ერთად დაბუღებულა დიდი მამულიშვილობაც და დიდი პატივმოყვარეობაც, დიდსულოვანი შემწყნარებლობაც და სულსწრაფი შურისმგებლობაც, ბავშვური გულჩვილობაც და მძვინვარე დაუნდობლობაც.

ძალიან მაღლა აფრენილიყო homo novus — „ახალკაცი“.

მტრული თვალით სჭამდნენ თავადები მათ წრეში — „სახებურო ერში“ გარეულ და სამეფო კარზე აღზევებულ „მდაბიოს“.

შადიმან ბარათაშვილი, ფარსადან ციციშვილი და ქაიხოსრო ჯავახიშვილი გიორგი სააკაძეს ტახტისმაძიებელ უჯიშო მედროვედ სთვლიდნენ. ამნაირი ვიგინდარა, ამნაირი „ტარაკუჭა“, ამნაირი „მეცამეტე გოჭი“,

პიტაღორის აღზევებისა და მოხვეჭისათვის არც ქვეყანას დაინდობს, არც ხალხს და არც მეფესო.

სანამ გვიან არ არის, ჩამოიშორე, თორემ ერთხელაც იქნება, ყველას დაგვლუპავსო ეს ცბიერი, ვერაგი, მჭურჩნელი (ყურში მოჩურჩულე მამუზლარი) და დაუნდობელი კაციო, ჩასჩინებდნენ ისინი ლუარსაბ მეფეს.

1607 წელს შაჰ აბასმა ცოლად წაიყვანა ლუარსაბ მეფის დაილელა (თინათინი), რომელსაც სპარსულად მესამე სახელი დაარქვეს — ფათმა სულთან ბეგუმ.

ისფაჰანში მიმავალ მაყრიონს გიორგი სააკაძეც ახლდა.

ძალიან მოეწონა შაჰ აბასს გიორგი.

„მე მგავს“, — გაიფიქრა „ლომმა“, როცა მისებრ უღვაშ-გადაგრებილი ქართველის სახეზე მალული მძვინვარება ამოიკითხა.

„თათრად უფრო გამოდგება“, — გაუელვა შაჰს და მარჯვნივ გადაუმიზნა მიმინოს თვალი.

მარჯვენა მხარე სულ გათათრებულ ქართველებს დაეჭირათ:

„ის უნდილაძეა, სულ წინ რომ დგას. მარჯვნივ ბაგრატიმირზე უდგას — დაუთ-ხანის შვილი, ხოლო ის ჭაბუკი, უნდილაძის მარცხნივ — როსტომ სააკაძეა, ალბათ, შენი სისხლი და ხორცი თერთმეტი წლისა მოვიდა ჩემთან საქართველოდან გამოქცეული, მაშინვე ჩემს პირად ღულამად ავიყვანე, დიდის ერთგულებით მემსახურა; ახლა უკვე სოჰბათ-იასაულია თვრამეტი წლის ჭაბუკი; მალე სპასალარობასაც გაიკრავს, ალბათ, ბეგლარბეგობასაც... მამამაგისიც გათათრებული ქართველი იყო — ბეჟან სააკაძე... ძალიან იმშვენებენ თათრობას სააკაძეები!“

გველის გესლივით დაედგენთა გულზე გიორგის ეს სიტყვები — „ძალიან იმშვენებენ თათრობას სააკაძეებიო“.

ვაი დედასა, გიორგი სააკაძეც, საით მიგანიშნებენ?!
შაჰს თვალი მოარიდა და ქართველებს გახედა.

არც ერთი ქართველი მისკენ არ იცქირებოდა.

ჭაბუკ როსტომ სააკაძეს დაადგა თვალი.

მამამისი გაახსენდა — ბეჟან სააკაძე, დიდი სიმამაცისა და

ვაჟკაცობისთვის ყარა-ბეჟან-ბეგს რომ ეძახდნენ თათრები. დაუთ-ხანის ერთგული აზნაური იყო ბეჟანი, დაუთ-ხანს სპარსეთში ახლდა ჭაბუკობისას, იქვე თვითონაც გაათათრდა თავისი მეუფის წამხედურობით. სპარსეთში დიდი გმირისა და სარდლის სახელიც გაიგდო, მაგრამ მაინც დარია ხელი სამშობლოზე წუხილმა და დაბრუნდა ქართლში; გორის ახლოს, მტკვრის პირას, სახლი აიშენა და კერა გაიმართა ცოლ-შვილთან ერთად. მაგრამ არ დააყენა ბეჟან სააკაძე ფარსადან ციციშვილმა: ღამით დაეცა თავისი აზნაურებით, მძინარე ბეჟანი ზედ სარეცელზე დააკვლევინა, ოჯახი გაუძარცვა და აუწიოკა (შადიმან ბარათაშვილის შემდგომ არავის ისე არ სწყურია სააკაძეების სისხლი, როგორც ფარსადან ციციშვილს). ცოლი, სამი მცირეწლოვანი ვაჟი და ერთი ძროხა დარჩა მოკლულ სააკაძეს. ფარსადან ციციშვილის შიშით ვერავინ გაბედა ობლებისა და ქვრივ-ობრის მფარველობა. ისინიც ადგნენ და ისევ სპარსეთს მიაშურეს (კაცმა რომ თქვას, აბა რა უნდა ექნათ?!). გზაზე ყაჩაღებმა ის მარჩენალი ძროხაც წაართვეს, დედა და ორი შვილი გზაზე შიმშილით დაიხოცნენ. მესამემ, როსტომმა, მძლავრსხეულიანმა და უტეხ-ნებიანმა ბიჭმა, მაინც მიიტანა სული შაჰის კარამდე. და აჰა, აქა დგას ახლა როსტომ სააკაძე, დიდი შაჰ აბასის გვერდით, შაჰისგან მოაღერებული და აღზევებული!

არა, რაც გინდათ თქვით და აქ, სპარსეთში დიხაც რომ იციან ქართველი კაცის ფასი!

„მეტადრე ისეთი ქართველისა, როგორიც შენ ხარ, გიორგი სააკაძე!“

„რაო? საიდან იყო ეს ხმა“, — შაჰმა თქვა, თუ თვითონ გიორგი სააკაძის გულში გახშიანდა?!

მოსვლა „მგლის-ტაოსანთა“

მ.შ. იდგა 1609 წელი.

მეფე ლუარსაბ მეორე მცირე ამალით ცხირეთს დამდგარიყო, საზატხულო განსასვენებელში.

მოურავ გიორგი სააკაძესთან და სარდალ ზაზა ციციშვილ-
თან ბჭობდა ხელმწიფე.

საშფოთარი ამბავი მოეტანათ მესხეთიდან შიკრიკებს: ოს-
მალები წინა წლის მარცხს არ შერიგებიან და მანუჩარ-ბეგის
და დედამისის, ელენეს დასასჯელად დიდძალი ლაშქრით წა-
მოსულან ახალციხისაკენ.

თურქთა ურდოს ასდევნებოდა ყირიმელ თათართა ლაშქა-
რი, რომელსაც ქართველები „თათარ ხანის ჯარს“, ანუ
„მგლის-ტყაოსნებს“ ეძახდნენ.

ცეცხლითა და მახვილით შემოსევიან სამცხეს.

აუღიათ და დაურბევიათ ახალციხე.

ტყესა და ღრეში გახიზნულან მანუჩარი და ელენე.

აღმათ, თურქები ლუარსაბ მეფესაც გაუხსენებდნენ სამ-
ცხის შემწეობას და ქართლისაკენ წამოვიდოდნენ სიკვდილის
თესვით.

თადარიგი დაეჭირათ მეფესა და მოურავს: ზ ა ქ ა რ ი ა და
ი ა რ ა ლ ი - ბარათაშვილნი გაუგზავნიათ მცირე ჯარით მესხე-
თიდან ქართლისაკენ მომავალი გზების სათვალთვალოდ.

ქართლისაკენ მტრის ურდო მოგორავდა.

ერთად შეყრილიყვნენ ოსმალო-თურქნი, სამცხის, შავშე-
თის, ნიგალისხევის ფაშები, „თათარ-ხანის მგლის-ტყაოსანნი“
და ახალციხის აღების შემდგომ „მთავარი გურჯისტანის“
ასაკლებად მოთქარუნობდნენ.

ურდოს ფ ე რ ა დ ფ ა შ ა მოუძლოდა, გამაჰმადიანებულ
ქართველი. „მარჯვენა ხელად“ მოჰამედ ფაშას ვაჟი მოს-
დევდა.

გადმოიქროლეს ჯავახეთი, თრიალეთი და მანგლისს მოიჭ-
რნენ ანაზღეულად.

შაქარიასა და იარალის რაზმებმა გვიან შეიტყვეს მტრის შე-
მოსევა. თურქებმა უკვე მოასწრეს რამდენიმე სოფლის აოხ-
რება, ამოწყვეტა და წარტყვევნა.

გამოედევნენ ზაქარია და იარალი.

ახლომაზლო სოფლის მოსახლეობაც გონს მოეგო და
მტერს გამოენთო, ნამგლით და ცელით აღჭურვილი.

თურქებს სადღაცადან ცნობა ჰქონიათ, რომ ლუარსაბ მე-

ფე ცხირეთს იდგა და თვითონაც ცხირეთისკენ მოიღტგოდ-
ნენ დაოთხებულნი. ქართველთა მეფის მონადირება და შიდა
ქართლის მოთარეშება ჰქონდათ გულს ამოჭრილი. საგულის-
გულოდ ყირიმელი „მგლის-ტყაოსანი“ მოქენაობდნენ „სა-
ოცნებო გურჯისტანის“ მოსაძარცვაად და „მოსაჭმელად“.
ბევრჯერ გაეგონათ: ვერსად იმდენ ტკბილსა და ხვავრიელ
ნადავლს ვერ მოინადავლებ, როგორც საქართველოშიო; მხო-
ლოდ ქართლში შეგიძლია დასტურ გულქართლად* გამდიდ-
რდეო!

ვის რა ეთქმოდა,--„გემოვნება“ დიახაც ჰქონიათ „მგლის-
ტყაოსნებს“!..

თევდორე

მე ვარ მწყემსი კეთილი: მწყემსმან კეთილმან
სული თვისი დადვის ცხოვართათვის.

ქოანე, 10, 11.

სამოცი ათასი ოსმალო და „მგლის-ტყაოსანი“ მოჰქროდა
შიდა ქართლისკენ.

გზა არ იცოდნენ და მეგზურს ეძებდნენ.

მანგლისი, ოძისი და კველთა რომ გადასწვეს, სწორედ აქ,
კველთაში, ერთი მღვდელი მოიხელთეს, სახელად თევდო-
რე, და იმას უბრძანეს წინ გაგვიძებ და გაგვიყვანე ცხირე-
თისკენო.

თევდორემ ცივად იუარა.

უარი გაგვიბედაო?!

* სხვათა შორის: განა საინტერესო არ არის, ჩემო მკითხველო, რომ
სიტყვა „გულქართლი“ იგივეა, რაც „მდიდარი“, „უხვი“, „ხვავრიე-
ლი“, „ბარაქიანი“, „დოვლათიანი“?

და შემოჰკრეს ლახტი ანაზღაითად.

მღვდელი ჯანმაგარი გამოდგა. არც დაცემულა, არც დაუქ-
ენესია, ისე ნირშეუცვლელად შესჭამა უსაშველო ტკივილი.

შეორედ შემოუქნიეს, მაგრამ თევდორემ დარტყმას დაას-
წრო და თქვა: კარგი, წაგიძღვებითო მეგზურად.

მხარ-მკლავი გაუთოკეს, -- არ გაგვექცესო, და ორმა ახ-
მახმა იანიჩარმა გაიგდო წინ.

მიდიოდა და ფიქრობდა ახალგაზრდა მღვდელი, პირზე
ღიმილგადაფენილი:

„საწუთრო ესე ცალკე კაცისა არს წამიერი და წარმავა-
ლი, ხოლო ცხოველი მარადქამეულ არს საქართველო, სამ-
შობლო ჩემი...“

„მე ვარ მწყემსი კეთილი... და სულსა ჩემსა დავსდებ
ცხოვართათვის... მე ვარ მწყემსი სოფელ კველთის მცირე სამ-
წყსოსი, ხოლო სული ჩემი უნდა დავსდვა დიდი სამწყსოს-
თვის — საქართველოსთვის...“

„რამეთუ საქართველო არის თვითონ ღმერთი ჩვენი...“

„მადლობელი ვარ შემოქმედო, რამეთუ შემქმენ ჩემი
ქვეყნისა და ჩემი ხალხის მსხვერპლად, ზვარაკად...“

იანიჩარმა შუბის ტარი აძგერა ზურგიდან.

ფიქრი ჩაუწყდა თევდორეს,

კითხვა შემოესმა:

— ეს სად მოვედით?

თვალი მოავლო იჭაურობას თევდორემ,

— გოსტიბეში ვართ, — თქვა მშვიდად.

— აქედან ცხირეთი შორს არის?

— არც ისე შორს,

— აბა, გასწი!

და გასწიეს.

და ისევ გაუყვა ფიქრის გზას თევდორე:

„დგება ქამი აღსრულებისა და, სულს ჩემო, განიცადე,
რომ ხორცი შენი ჯერ ისევ ცხოველად ებჯინება ესოდენ მრავალ
საოცრებებით აღსავსე მიწას, რამეთუ მიწა ესე არს ქარ-
თული“...

„განიცადე, რომ თვალნი შენნი ჯერ ისევ ხედვენ ესოდენი

სიმშენიერიოთა და იღუმალეზით აღსავსე ცის გვამს, რამეთუ
ცაი ესე არს ქართული...“

ისევ ჩაუწყდა ფიქრი თევდორეს.

მის წინ ახმახი ოსმალთა ატუხულიყო, მდიდრულად მორ-
თულ-მოკაზმული, თქრო-ვერცხლით მოსევალებული აღჭურ-
ვილობით ჩასილადებული.

„უეჭველად ფაშა იქნება“, -- გაუელვა თევდორეს.

ხშირი, ცეცხლისფერი წვერი და მაღალი, ღერღეტივით
აწვართული კისერი ჰქონდა ოსმალთა ფაშას.

— სადა ვართ ახლა და რა ჰქვია ამ სოფელს? — დანჯღრე-
ული ქართულით შეამყარა თურქმა სახეში ქართველს.

— ერთაწმინდა, — მოკლედ მოკვეთა თევდორემ.

— აქედან ცხირეთი კიდევე შორს არის?

— არც ისე შორს.

— აქ ორი გზაა.

— ჰო, ორი გზა.

— ცხირეთისკენ რომელი მიდის?

— მარჯვენა გზა... აკი მე თვითონ მიგიძღვებით.

— აბა, გასწი!

და გასწიეს.

ცხირეთი ხელმარცხნივ დარჩა.

თევდორეს სოფელ ქვენადრისკენ მიჰყავდა მტრის ურდო.
ხოლო ქვენადრისი ჯერ კიდევე შორს იყო.

„სანამ ქვენადრისს მივალთ, მანამ ცხირეთს მდგარი მეფე
უეჭველად შეიტყობს მტრის შემოსევის ამბავს... შესაძლოა
შეტყობილიც აქვს... ღმერთმა ინებოს“.

მოიხედა და ისევ დაღანდა მაღალკისერა და წითელწვერა
ფაშა.

თვითონაც არ იცოდა თევდორემ, რატომ აეკვიატა ეს სა-
ფიქრალი: „მე რომ მომკლავენ, ერთი დღეც თუ გაივლის და
ამ ფაშასაც მოკლავენ; ქართული ხმალი მოკვეთავს იმ აწო-
წილ კისერს და მოკვეთილ თავს იმ წითელი წვერით აიტაცე-
ბენ... აიტაცებენ ხელით, თუ კბილებით... ასე იქნება...“

„მე თავს გამაგდებინებენ, ალბათ. ჯერ მაწამებენ და მე-

რე მომკვეთენ თავს... და მალე იმ ფაშასაც გააგდებინებენ თავს ჩემი სისხლიერნი“...

„თუმცა მე ვერ მაწამებენ, არამედ აწამებენ მხოლოდ სხეულს, ჩემადყოფილს... და არ მეტკინება სხეული ჩემადყოფილი; არ მეტკინება, რამეთუ არავის ძალუძს მატკინოს სხეული, სული ჩემი, ჭეშმარიტი „მე“... ესე არს, რამეთუ თქმულა ჭეშმარიტად: „და ნუ გეშინიან მათგან, რომელთა მოწყვიდნენ ხორცი, ხოლო სულისა ვერ ხელ-ეწიფების მოკლვად“.

.

„არა, არ მეშინის, არა, „რამეთუ უღელი ჩემი ტკბილ არს, და ტვირთი ჩემი სუბუქ არს“... რამეთუ მე, თევდორე, ტომით ქართველი, მწირი და გლეხი, ვკვდები ჩემი საქართველოსთვის!.. ხოლო შენ გვედრებ, უფალო, რამეთუ ვერ მოიხილონ ვერასოდეს დამხობილი ჩემი სამშობლო ვერა კაცთაგანა — ვერცა აღმოსავლელთა, ვერცა დასავლელთა, ვერცა სამხრეთელთა, ვერცა ჩრდილოელთა...“.

.

სოფელი გამოჩნდა.

— რა ჰქვია ამ სოფელს? — ისევ ჰკითხა წითელწვერა ფაშამ ნაჯახირევი ქართულით.

— ამ სოფელს ჰქვია ქვენადრისი, — მშვიდად თქვა თევდორემ.

— ქვენადრისი?!

— ჰო.

— მერე?!

— რა მერე?

— ცხირეთი?

— რა ცხირეთი?

— სად არს ცხირეთი?!

— იქ, სადაც არს! — უცნაური ღიმილით თქვა თევდორემ.

ცის გვამი შეარყია თურქთა ბლავილმა.

შემოესივნენ და შემოეჭვდნენ მეწინავე იანიჩარნი.

წამით გაირინდა ყველა და ყოველივე.

კოშკივით ჩამდგარიყო თევდორე ჯგროდ და ჯუჩქად შე-
 მრქდელ ოსმალთა შორის.

და დაიქუხა „კოშკმა“:

— რაო, გველნო და ნაშობნო იქედნეთანო! ღეთის გარე-
 განი გული რისთვის დაილახერენით? განა იმისთვის, რომ
 ქართველმა კაცმა საქართველოს არ უღ...

მძიმე დარტყმამ ჩააწყვეტინა.

საშინელმა ტკივილმა ისევ მოაბრუნა გონს.

სტკიოდა და ვერ მიმხვდარიყო, სად სტკიოდა. ალბათ,
 ტკივილად ქცეულიყო მთელი სხეული საღმობიერი.

„არა მტკივა, რამეთუ სხეულგანრღვეულობა ჩემი არ არის
 ჩემი. მე აღარ ვარ სხეული, მე ვარ სული, მხოლოდ სული,
 ჭეშმარიტი „მე“, ხოლო ღმობა მისი არ ძალუძს არა ხელსა
 მიწიერსა...“

თვალი გაახილა.

თავდაღმა ეგდო, ბეჭობზე გადამხობილი.

ზემოდან ჯალათები ასხდნენ და იატაკანებით აუჩქარებ-
 ლად უსერავდნენ ძარღვებს.

წამებულს წამებისათვის აღარ ეცალა. ბეჭობს ქვემოთ
 წყარო ჩანდა, ცისფერი წყარო. გულწითელა ჩიტები ჩამ-
 სხდარიყვნენ და მეწამულ ფერს (თუ სისხლს?! იბანდნენ
 ფრთების ფათქუნით.

პირი მტკბარი სისხლით აევსო.

„ესე არს გემო სიკვდილისაი...“

„ხოლო მე, თევდორე, ტომით ქართველი, გლეხი და მწი-
 რი, გკვდები ჩემი საქართველოსთვის... ხოლო შენ გვედრი,
 რამეთუ სამშობლო ჩემი... ვერცა სამხრეთელთა... ვერცა
 ჩრდილ...“

შემზარავი ჭახანი გაისმა.

უწინარეს ყოვლისა ჩიტებმა იხილეს ფერდობზე დაგო-
 რებული თავი ადამიანისა, მათი მეწამული გულისფრად შე-
 დებილი.

გულგახეთქილი აფრინდნენ გულწითელები.

ხოლო სული წამებული მამულიშვილისა უკვე შორს გაფ-
 რეწილიყო, შორს ცისად-ცისად...

ხუთმან თქვენგანმან წარიქციოს ასი და ასმან
თქვენგანმან ბევრეული.

ლ ე ვ ი ტ ე ლ თ ა, 26, 8.

თევდორეს მამულიშვილური თანგანწირვა შეიქნა ცხოველმყოფელური წინამძღვარი გიორგი სააკაძის გმირობისა. სანამ თევდორე მტერს მტყუანი გზით მიატარებდა და ბოლოს და ბოლოს მისი კეთილშობილი თავი გვემულ სხეულს გაშორდებოდა, მანამ მეფემ და მოურავმა მტრის შემოსევის ამბავიც შეიტყვეს და საომარი სამზადისიც მოასწრეს.

ლუარსაბ მეფე სააკაძის თხოვნით ცხირეთის ციხეში ჩადგა. თვითონ გიორგიმ გზირები აფრინა და საომრად გამოიწვია თეიმურაზ მუხრან-ბატონი, ამილახორი, არაგვისა და ქსნის ერისთავები, ბარათაშვილები და ტფილისის სპარსული ციხიონის უფროსი დელუ-მუჰამედი (მუჰამედ-სულთან შამსად-დინლუ).

სანამ ომს მოწვეული ფეოდალები მოგროვდებოდნენ, გიორგი ახლომახლო სოფლებში გაეარდა, შვიდ საათში ოთხასი მეომარი შემოიყარა და მეფესთან მობრუნდა.

მცირე ბჭობის შემდგომ გიორგი სააკაძე, ზაზა ციციშვილი და თამაზ მაჩაბელი სახელდახელოდ შეყრილი ლაშქრით მტერთან შესახვედრად გაფრინდნენ.

ოსმალთა მხედრობა თემის ხეობაში იდგა, ნიაბის ბოლოს, სხერტის ჭალაზე.

სწრაფი სრბოლით უახლოვდებოდნენ სააკაძე და ციციშვილი, მაგრამ დაასწრეს ზაქარია და იარალიმ, რომელთაც უკვე მიეგნოთ მტრის კვალისათვის.

წამოეწივნენ და დაეძგერნენ ზაქარია და იარალი ოსმალთა უკანაკერძს.

ბრძოლა ნაწვიმარ ჭალაზე გაიშალა, მიწა აიზილა და მეომრები მუხლდაკვეთილნი და აბორძიკებულნი ეხეთქებოდნენ ერთმანეთს.

რიცხვმრავლობით დაიხელთავეს თურქებმა და „მგლის-ტყაოსნებმა“ ქართველები.

ხმლები დაუმოკლდათ ტალახში დაფლულებს.

თურქებმა ისრის ბარანით დაცხრილეს და დააწვინეს ზაქარია და იარალი.

მოიჭრნენ სააკაძე და ციციშვილი, მოიჭრნენ და ეკვეთნენ მძვინვარედ.

მხნედ შემოეგებნენ თურქნი, ზაქარია-იარალის ძლევით გათამამებულნი.

საარაკო შემმართებლობით უტევდნენ გიორგი სააკაძე, მისი ძმა ქაიხოსრო, ზაზა ციციშვილი და თამაზ მაჩაბელი.

ქართველებმა ჩახოცეს და გადაქელეს „მგლის-ტყაოსანთა“ მეწინავენი.

თურქთა ფაშა გამოჰირითდა სიკვდილის ხაზზე, მძიმედ აღტურვილი, მაღალკისერა და წითელწვერა.

ხმალი აწვართა და ცხენი გააჭენა ზაზა ციციშვილმა.

დაასწრო და გაექანა თამაზ მაჩაბელი შუბგაწვართული.

დამბაჩა შემოაგება თურქმა.

დროზე შეაგდო ყალყზე ცხენი მაჩაბელმა. ტყვიამ გულში გაუარა და მიწას დაენარცხა ცხენი მხედართან ერთად.

წამსვე დაკლილი დამბაჩა გასტყორცნა და ხმალი აღმართა ფაშამ.

ელვასავეით შუა ჩამოიჭრა ზაზა ციციშვილი.

ახლა ციციშვილს შემოუტია ოსმალო ფაშამ უცხო ყვირლით.

გაიბრკიალეს ხმლებმა, განაკრთეს ცეცხლი.

წითელწვერა, ჩალმიანი თავი დაგორდა უნაგირს წამიერად ჩაყინულ ტანზე.

მიწამდე ვერ დაასწრო წარკვეთილმა თავმა, მარცხენა ხელით აიტაცა ზაზამ.

— შეჯექ ცხენზედ! — დაუღრიალა ციციშვილმა მაჩაბელს, რომელსაც ის-ის იყო ძლივს დაედწია თავი ძირს დაცემული ცხენისაგან. წამსვე ზურგზე მოექცა მოკლული თურქის ცხენს მაჩაბელი.

შემოესიგნენ და შემოერტყნენ გავეშებული ოსმალები.

ერთი ხმალი აღარ იკმარა ციციშვილმა: ფაშას წარკვეთი-

ლი თავი წვერით კბილებში ჩაიჭირა, სატევარი გაიძრო და შეუტია ორივე ხელით შეჭურვილმა.

მაჩაბელიც წამოეშველა ციციშვილს.

სააკაძემაც მოუსწრო დროზე.

მტრის შუაგულისკენ მიიკაფავდა გზას გიორგი.

უკუიქცნენ თურქნი.

სანამ ქართველთა მთავარი ძალები არ მოსულიყვნენ, მანამ გიორგიმ თურქთა ურდოს გამოდევნება სახიფათოდ ჩათვალა და ცხირეთისაკენ შემობრუნდა.

ოსმალთა ფაშების თავები დაუყარეს წინ ლუარსაბ მეფეს სააკაძემ და ციციშვილმა (ასეთი იყო მუსლიმანური სამყაროდან მოტანილი „მოდა დროისა“!).

სხერტის ქალაზე დამარცხებული თურქთა არმია ფერად ფაშამ ყარაღაჯის გზით გორისაკენ წაიყვანა.

საომარი წყობით მიდიოდნენ, ღინჯად და შიშრეულად, — ვაითუ, კიდევ დაგვეცნენ ქართველები ანაზდეულადო!

მტკვარზე ხიდი უნდა გადაეგლოთ და ისე შეჭრილიყვნენ გორში თურქები.

მაგრამ დაასწრო ერთმა სომეხმა ტერტერამ. იგი თურმე გორიდან სოფელ დოესში მიდიოდა რაღაც საქმეზე. მტკვრის მარჯვენა მხარეს მტრის ჯარები რომ შეუნიშნავს, მაშინვე ხიდს დასტაკებია, ფიცარ-ფიცარ აუყრია და შემოსევის საცნობარო განგაშიც აუტეხია.

(თითქოს მღვდლების გმირობის თვე დამდგარიყოს — 1609 წლის ივნისი!).

თურქებმა ხიდის აღდგენა დააპირეს, მაგრამ მოპირდაპირე მხრიდან გორელები მოცვივდნენ და ისრის ბარანი დაუშინეს.

ქართველთა მთავარი ლაშქარიც გამოჩნდა მტკვრის მარცხენა მხარეს. უკვე ყველა მოსულიყო თავისი ჯარით: თეიმურაზ მუხრან-ბატონი, ამილახორი, ნუგზარ არაგვის ერისთავი, შალვა ქსნის ერისთავი, ზაზა ციციშვილი, ბარათაშვილები. ტფილისის ციხისთავი დელუ-მუჰამედიც აქ იყო შვიდასი სპარსელით და გათათრებული ქართველით. ლუარსაბ მეფე და გიორგი სააკაძე მოუძლოდნენ ქართულ მხედრობას.

თურქებმა ხიდს თავი მიანებეს და ისევ მტკვრის მარჯვენა
განაკიდურს გაუყვნენ.

ახლა მათ ლუარსაბ მეფის დატყვევება და ქართლის აოხ-
რება კი არა, საქართველოდან ცოცხლად გაღწევა და ნა-
ძარცვ-ნატყვევნავის გაძლოლიება შემორჩენოდათ საფიქრალ-
საზრუნავად.

მითქარუნობდნენ და საციციანოს სოფლებს მიიძარცვა-
დნენ.

სოფელ ბრბონას რომ ჩააღწიეს, შედგნენ და ისევ ხიდის
გამართვას შეუდგნენ. სოფელში სახლები დაანგრიეს და დაგ-
როვილი ხის მასალით მტკვარზე მართლაც მოახერხეს ხიდის
გადება.

მტკვარზე გადავიდნენ, ტაშისკარის ბოლოს ჩავიდნენ და
ნახევტაში დასცეს ბანაკი.

სააკაძემ და ლუარსაბ მეფემ ახალდაბას ჩაიყვანეს ჯარი
ქენებით.

იქ ხიდი ეგულებოდათ, მაგრამ აღიდებულ მდინარეს გაე-
ტაცნა იგი. ის ღამე დაითმინეს, ხოლო დილით სისხამზე გი-
ორგომ მდინარის გადალახვა ბრძანა.

ქართველებმა ჯერ ილოცეს; ღვთისმშობელი, სვეტიცხო-
ველი და მის საძირკველში დამარბული კვართი ქრისტესი მო-
რხსენიეს, მკლავიც დაილოცეს და მეფისა და მოურავის კვალ-
დაკვალ თვითონაც გადაეშენნენ მტკვარში ცხენებით.

ძალზე საშიში იყო დიდროობით უსაშველოდ აზვირთე-
ბულ მდინარესთან ბრძოლა, მაგრამ მაინც მშვიდობით გააღ-
წიეს მეორე ნაპირს.

ტანსაცმელი დაიწურეს, იარაღი აისხეს და საომრად გა-
ემზადნენ.

უკვე გული საგულეს დაიგულეს მეფემ და მოურავმა: ვე-
ლარსად გაექცეოდათ თურქთა ურდო.

შალვა ქსნის ერისთავი თავისი ჯარით კორტანეთს ჩააყე-
ნეს და ამით ახალციხისკენ გასასვლელი გზა ჩაუკეტეს მტერს.

ხოლო, თურქთა ზურგიდან, სურამის ბოლოს, შიდა ქარ-
თლის ჯარი იდგა საომრად შემართული.

მტრის ურდოს გასასვლელი აღარსაით ჰქონდა და ისლა
დარჩენოდა, ბრძოლა მიეღო. საომარ სამზადისს დაუტრიალ-

დნენ ოსმალნი. სანგრები და თხრილები გათხარეს, მიწაყრილები აღმართეს, ტომრები სილით აავსეს და კედლებად დაისადაგეს...

ლუარსაბ მეფემ თათბირად შემოიყარა სარდლები.

პირველი წამოდგა ნუგზარ ერისთავი, სიმამრი გიორგი სააკაძისა, და თქვა: მთიელ ქართველთა საომარ ჩვევას ხშირად გაუმარჯვნიაო, ხოლო მთიელები ღამით ამჯობინებენ მტერზე დაცემასო.

ციციშვილმა და ამილახორმა არ მოიწონეს არაგვის ერისთავის თათბირი: ღამეს ისევ დღე სჯობს და დღის დამდეგს, სისხამ დილაზე მივუხტეთო მტერს.

ბოლოს გიორგიმ თქვა თავისი საომარი განაზრახვი: ღამის ჩაწურულს, დღე-ღამის განსადრეკელზე, წელში ოდრიკალად მოკეცილნი, უხმაუროდ მივუახლოვდეთ მტრის მიწაყრილებს, ერთბაშად თოფები დავუშინოთ და უმაღვე ამხედრებულნი ხმლითა და შუბით ჩავუხტეთ თოფის კვამლით გატენილ მინდორში ოსმალთა ბანაკსო...

მიიღეს ეს მარტივი და თამამი განასაჯი სააკაძისა და სარდლობაც მასვე მიანდვეს.

იმ ღამით გიორგიმ მეწინავე გუნდი გააწყო. სამეთაურობ უველაზე ერთგული მდაბიონი — გლეხნი და წვრილ-ახნაურნი დააყენა: ლომი ჩრდილელი, პაპუნა ვაშაყაშვილი, როსიტა გედევანიძე, პაპუნა ჩივაძე, თამაზ ქარციძე, მათარსი შიხაიდრიძე, ქვლივიძე, ინაშვილი.

ესენი გიორგი სააკაძის „მოკიდებულნი“ (მიმდევარნი, თანამოდასენი) იყვნენ.

27 ივნისი 1609 წლისა, დილა სისხამი, ტაშისკარი, ნახევტას მინდორი.

ომის ღმერთს საომარი სასწორის ერთ პინაკზე 60 000 თურქი და „მგლისტყაოსანი“ დაესვა, მეორეზე — 10 000 ქართველი.

თოფების გრიალმა და კლდეებზე ასხლეტილმა ნახმევმა შეარყია მტკვრის ხეობა.

ომის მოლოდინით ღამენათევი შემოეგებნენ ოსმალები მოიერიშე ქართველობას.

ბოლო ქართველები უკვე ჩაჭრილიყვნენ ყოველის მხრი-
დან მათგანვე ანაზღაითად ნათოფარ მტრის ბანაკში.

თოფისწამლისა და სისხლის სუნი შეერთვნენ ერთურთს.
ბრძოლა გახურდა სასტიკი და სისხლდამდინარი.

„ფიცხად იბრძოდეს ქართველნი“.

სააკაძე ყველაზე სქლად შეკრულ თურქობას „არჩევდა“
და მისკენ მიჰქროდა გავეშებული. შუაგულს იჭრებოდა შუბ-
გამართული და იბრძოდა დინჯად, „გულმყაფრად“. საგანგე-
ბოდ თურქთა ჯილოსან სარდლებს ეტევეზოდა გიორგი. უსუ-
ლოდ ირეცებოდნენ მისი ხელით დანაკარავნი.

„გულსრულად“, დიდი სიმამაცითა და სიჩაუქით იბრძოდა
ლუარსაბ მეფე, ჭაბუკი „ტანსარო“, „თამამად მიმხდომელი“,
ლახტის მცემელი და შუბის მაძგერებელი.

„მაშინ იქმნა ომი დიდი იქით და აქეთ, და დიდად მოჭირ-
ვებით და გულსრულად შეიბნენ, — ძველთა გმირთაგანცა
ძნელად შესაძლებელად საგონებელ იყო, რომე მაშინ მეფე
და მოურავი და სრულად ქართველნი იბრძოდნენ“.

მზე საშუადღეოზე მიიწვედა და მწვავედ აწვებოდა ტა-
შისკარის საომარ თონეს.

„ომი გახშირდა“.

მეომრები გახელდნენ, გამხეცდნენ.

მესამეჯერ შეემსხვრა შუბი ხელში სააკაძეს.

ლახტი მიართვა ლომი ჩრდილელმა. კვლავ მიეტევა მძაფ-
რად გიორგი.

ლახტიც გადაუტყდა.

ხმალი „ამომღერა“ მოურავმა.

შორიდან ნატყორცნი ისრები ასხმოდა ზორბა ტანზე.

ზედიზედ თორმეტ რჩეულ ოსმალოს დააყრევინა გიორ-
გიმ იარაღი და ტყვედ მიუგდო ინაშვილსა და ქვლივიძეს.

ფერად ფაშას დაეძგერა მოურავი.

მხნელ შეეგება გათათრებული ქართველი ჯერ კიდევ ქრის-
ტიან ქართველს.

ხმალი დააგდებინა გიორგიმ.

ორმა პაპუნამ (ჩივაძემ და ვაშაყაშვილმა) მხარ-მკლავი
გაუთოკა თურქთა მთავარსარდალს.

მეცხრე საათი დადგა ჯოჯოხეთური ხმალოაკვეთებისა.

სასწორი აეშალა ხელში ომის ღმერთს.

ბრძოლა ქართველთა ძლევამოსილებით გადაწყვეტილიყო, თურქთაგან უმრავლესნი ჩაწყდნენ და ჩაირეცნენ.

ვინც ქართველთა შურისმგებლურ მახვილს გადურჩა, „და-შინებულთა და დანქრეულთა“, ტყესა და ღრეს მიაშურეს ფხოქა-გლეჯით და თავპირის მტვრევით.

ბრძოლის შემდგომ სამი დღის მანძილზე „საშოვარზე“ გადიოდნენ ახლო-მახლო სოფლელები, კაცნი და ქალნი, ტყე-მალნარებსა და ხევსუგებში: იქ შეფარებულ და ჩაჩუმქრულ თურქებს იჭერდნენ, დედნობილად ატიტვლებდნენ, მაგრამ ცოცხლად კი უშვებდნენ, — ახლა საშიში აღარ არიანო, ეგენიც ადამიანის ძენი ყოფილანო...
* * * * *

ახალგაზრდა, პირმშვენიერი შეფე მიუძღოდა გამარჯვებულ ჯარს.

უკან ფერად ფაშა და მოჰამედ ფაშას ძე მოჰყვებოდნენ დატყვევებულნი.

წარკვეთილი თავებიცა და თავწარუკვეთელი ტყვე სარდლებიც ქართველებს მათი „მოყვრისა და მოკეთისათვის“ უნდა გაეგზავნათ — შაჰ აბასისათვის.

* * * * *
ამრეზილი ჩაყინულიყვნენ თავადები უნაგირებზე.

რამეთუ... ისევ „უჯიმო სააკაძე“ მიჰყვებოდა გვერდით ხელმწიფეს.

„ისევ ქართველს უჯოგანია“

შაჰ აბასს ლუარსაბ მეფისაგან წარგზავნილმა გარასპი ფავლენიშვილმა მიჰგვარა თურქი ტყვეები და წარკვეთილი თავები.

აფოფინებული იყო ერანის ლომი.

ფავლენიშვილი საბოძვარით აავსო და ლუარსაბ მეფესთანაც შეძვირფასესი საჩუქრები და მისართმეველი გამოატანა.

თან ეს ჩაილაპარაკა „თავისთვის“: ძალიან, ძალიან მენატრებიან ქართველი მეფეებიო..

1610 წელს აზერბაიჯანში ჩამოსულმა შაჰმა ლუარსაბი და თეიმურაზი „სამეჯლისოდ“ მიიწვია.

ლუარსაბს თავისი სათხოვარი (თუ მოსათხოვარი) ჰქონდა და დიდის ამალით გაეშურა „მოყვარესთან“ შესახვედრად. დედამისიც, დედოფალი თამარი, თან წაიყვანა ქართველ მანდილოსანთა ასაბიით.

ქართლის „საპატრონოდ“ გიორგი სააკაძე დარჩა.

„...ალბათ, მეფის გვირგვინს იზმანებს თავზე სააკაძე“, — იბოლმებოდნენ თავადიშვილნი.

.

შაჰ აბასმა ლუარსაბ მეფისა და თამარ დედოფლის შესახვედრად დიდი მოხელე გამოგზავნა — მოჰამედ ამინ-ბეგი. ქართველ სტუმრებს იგი „ყოველი სადგურიდან სადგურამდე შესაფერისად ემსახურა და ბატვისცემით და მოწიწებით შაჰის ტახტთან მიიყვანა“.

აბასი „დიდი სიხარულით“ მიეგება ლუარსაბ მეფეს, დიდი პატივით, „მრავალგვარი ხელმწიფური წყალობითა და ალერსით დააჯილდოვა“ იგი. „უსაზღვრო მადლობა“ მოახსენა თურქთა წარკვეთილი თავებისა და დატყვევებული სარდლების მიძღვნისათვის.

ეს ყველაფერი კარგი, მაგრამ ლუარსაბ მეფეს თავისი სათხოვარი აქვს „სამოთხის დამამშვენებელთან“ და „ალლაჰის ჩრდილთან“.

სათხოვარი?! რა სათხოვარი?!

ლუარსაბმა ფერად ფაშას გათავისუფლება სთხოვა აბასს.

ძალიან მოეწონა შაჰს ქართველის „რაინდული ქცევა“: განა თვითონ არ შეეძლო ჩემთან არ გამოეშვა და ისე გაუთავისუფლებინა ფერად ფაშა! მაგრამ ჯერ მე გამომიგზავნა, ჩემი უზემოესი მეუფება აღიარა, ხოლო ახლა პირადად მთხოვს ქართველყოფილი სარდლის გათავისუფლებას... ალბათ, სწორედ იმიტომ მთხოვს, რომ ფერად ფაშას ქართული სისხლი უდგას ძარღვებში. უცნაურია, ალლაჰის მადლმა: ქართველებმა მაინცდამაინც არ იციან ერთმანეთისათვის თავის გამოდება და ამ ქრისტიან მეფეს რაღა კუჭი ეწ-

ვის გათათრებული და გადამტერებული ქართველის განტე-
ვებაზე? მაგრამ ეს თხოვნა უნდა შეუსრულოს, ოღონდ კი
სხვა „სათხოვარი“ (თუ მოსათხოვარი) არ ექნეს სტუმარს.

ბრძანა აბასმა: ფერად ფაშა გათავისუფლდეს, ხოლო მო-
ჰამედ ფაშას შვილი სიკვდილით გათავდეს!

ქართველთა მეფე დიდ მადლობას უძღვნის „ქვეყნის და-
მამშვენებელ შაჰს“ ფერად ფაშას გათავისუფლებისათვის,
მაგრამ, კაცმა რომ თქვას, ნამდვილი სათხოვარი (თუ მოსა-
თხოვარი) ახლა აქვს ლუარსაბს.

— რა სათხოვარი?! — თვალეზი დაეჭრუტა აბასს.

— ტფილისი, — მოკლედ ისროლა ლუარსაბმა.

— ვერ გავიგე! — ავად დაიბუხუნა „ლომმა“.

— ჩვენ ხომ ერთნი ვართ — ქართველნი და ერანელნი.
ჰოდა, რაღა საჭიროა ტფილისში ერანელთა ციხიონი?! —
წყნარად, ნირშეუცვლელად თქვა ქართველმა.

— მაშ, შენ მეუბნები, რომ ჩემი ჯარი გავიყვანო ტფილი-
სიდან! — ყინულის ნატეხებივით გადმოყარა სიტყვები სპარ-
სელმა.

— დიახ! — ყინვას ყინვა შეაგება ლუარსაბმა.

— და სამაგიეროდ შენ ჩადგები ტფილისში, არა?

— დიახ! — ისევ უჯიათოდ ჩამოჭრა ქართველმა.

ენის კლიტე გაუელმდა შაჰს.

ერთხანს მდუმარედ უყურებდა ყმაწვილი კაცის საოცრად
წყობილ სახეს.

„ვინ წარმოიდგენდა, რომ ეს ქალის სახიანი ბიჭი ასე გაუ-
ბზარავი სიტყვით გამიბედავდა ლაჰარაკს“, — ფიქრობდა შაჰი.
უცებ გიორგი სააკაძე გაახსენდა და ეს ჩასძახა გულს უბ-
მოდ:

„უეჭველად ის ჩააგონებდა!“

გაიფიქრა და მაშინვე ილავერდი-ხან უნდილაძე მოიკითხა.
სასწრაფოდ შემოვიდა უნდილაძე.

მარტო ჩაიკეტნენ...

მეორე დღეს შაჰ აბასმა დიდის სინარულით ახარა ლუარ-
საბ მეფეს:

— იმის გამო, რომ პაპაშენი სვიმონ მეფე ერანის დიდ
მეგობარი და კეთილისმყოფელი ბრძანდებოდა, მისი ხსოვნის

საპატივცემულოდ შენ, მის შვილიშვილს, გიძღვნიტ ტფილისს. უკვე გაეგზავნა ბრძანება დელუ-მუჰამედს, რამეთუ გაიყვანოს ტფილისიდან ერანული ციხიონი და მის ნაცვლად საქართველოს მთავარ ქალაქში ჩადგეს ქართული ციხიონი.

უსაზღვრო აღტაცებით აენტო სახე ჰაბუჯ ხელმწიფეს.

ეს დიდი გამარჯვება იყო.

გულში კი ეცილებოდა: რაღა ახლა გაახსენდაო შაჰ აბასს პაპაჩემის პატივისცემა! თუ მართლა ასე გიქდებოდა სვიმონ მეფის ხსოვნისათვის, რატომ მაშინ არ მოავონდა, ოთხი წლის წინათ სპარსული ჯარი რომ ჩაგვიყენაო ტფილისში!..

აქ სულ სხვა რამე იყო საცნაური: შაჰს ოსმალეთთან ომი ჯერ კიდევ ვერ მოეთავებინა. ის კი არა და, დღე დღეზე ოსმალეთის დიდი ვეზირის, მურად ფაშას შემოსევას ელოდებოდა შაჰი. ამიტომ ისევე ძნელი და სახიფათო იყო ქართველების გადამტერება.

შაჰ აბასი იძულებული იყო კიდევ დაეთმო „ერთი ხელი“ ქრისტიან გურჯებთან „გაწყობილ დაფაზე“.

მაგრამ რა იციან ამ უბედურმა ქართველებმა, რომ შაჰ აბასი სულ მალე აღარ იქნება ასეთი „დათმობისა“ და „წაგების“ ხასიათზე.

იჯდა ის ქ ა ნ დ ე რ მ უ ნ შ ი და წერდა „ქვეყნის დამამშვენებელი აბასის ისტორიაში“: ...და მისცა შაჰ აბასმა ლუარსაბ მეფეს ტფილისის ვილაიეთი, საქართველოს განთქმული ქალაქი, რომლის ციხესიმაგრეს თავი მარჩბივის ვარსკვლავედის თაღამდე ჰქონდა აღმართული... ხოლო ხსენებული ლუარსაბი იყო საოცრად მომხიბლავი, მშვენიერი სახისა, მოხდენილი ყმაწვილი. ჩვიდმეტი წლისა იქნებოდა, შაჰს რომ ეახლა. ჭეშმარიტად, ასეთია თითქმის ყველა ქართველი ბატონიშვილი. ის კი არა და, საქართველოს მთელი ხალხი, ყოველი კაცი და ყოველი ქალი, იქაური ჰავა-ჰაერის სინაზის გამო, ნატიფ დაწვთა და ლოყათა სიტურფითა და სინარნარით, ნაკვთებისა და ხელების მოხდენილობით, ყველა სხვა ადგილთა და ქვეყანათა ხალხებს სჯობია. ყველანი სამოთხის ბინადარი ქალის, ჰურიას, მსგავსნი და იოსებ მშვენიერის დაწვთა მკონენი არიან, მოსეს შუქმფენი ხელის სხივები გამოკრთის მათი

სახეებიდან და ქრისტიანული სასწაულიც ცხადად ჩანს მათი საოცარი ენატკბილობიდან და საამური ქცევებიდან. თუმცა საქართველოში ქრისტიანობაა გავრცელებული და ქართველები მოკლებული არიან ჭეშმარიტ სარწმუნოებას, მაგრამ თავისი სიმშვენიერით, პავის სიჯანსაღით და მიწა-წყლის უმწიკვლობით და ნაყოფიერებით ქვეყნიერების ვერც ერთი მხარე საქართველოს ვერ შეედრება. სწორედ ქართველთა სამშობლოზე შეიძლება ითქვას ეს ლექსი:

„ყოველ წუთში თითო იესო დაიბადება,
ყოველ სახლში იესოს მშობელი მარიამი ჩასახლებულა“.

თეიმურაზმაც მოატანა კახეთიდან, კახთა ამალით და დიდი ძღვენით.

შაჰმა არც კახთა მეფეს დააკლო პატივი და „ხელმწიფური წყალობანი“. მერე „გაზრდილის“ სათხოვარიც მოიკითხა „გამზრდელმა“.

— მე ისევ იმ ურჩი კახელი თავადების დასჯას გთხოვ, ამასწინათ რომ შემოგიტვალე, — უთხრა თეიმურაზმა.

— ეგ თხოვნა დაუყოვნებლივ აღესრულება, — მწყალობელი სახით ბრძანა აბასმა (მე რა მენადვლება, ან რატომ დავუშლი, თუ ქართველი ქართველს სასიკვდილოდ გაიმეტებსო, თავისთვის ამას ფიქრობდა შაჰინშაჰი).

ერთხანს იგი მდუმარედ ათვალეობდა თეიმურაზს და მის ამალას, მუხის კორომივით ჩამდგარსა და ჩაგუბებულს.

უცებ სპარსულად ჰკითხა შაჰმა თეიმურაზს: ყველაზე ერთგული რომელი გყავს შენს ამალაშიო.

— ადამ აბელიშვილი, — ისე წამოისროლა თეიმურაზმა, აზრიც არ დაუკრავს, საით უშიზნებდა ცბიერი სპარსელი.

— აბა, წინ წამოვიდესო ადამ აბელიშვილი, — ბრძანა შაჰმა.

დაწინაურდა ალვასავით აწვართული ვაჟკაცი.

— შენ ხარ ადამ აბელიშვილი? — ქართულად ჰკითხა შაჰმა.

— დიახ, აბელიშვილიც და ანდრონიკაშვილიც, — ოდნავი დაცივნით უპასუხა ქართველმა.

შაჰმა თეიმურაზს გადაჰკრა თვალი.

— აბელ ანდრონიკაშვილის ძე გახლავთ და გვარიც მამის სახელისაგან მიიღო, მისდა საპატიოდ, — მძიმედ თქვა თეიმურაზმა.

დღემილი ჩამოწვა.

გაახსენდა შაჰს: მისმა „გაზრდილმა“, კონსტანტინე-მირზამ, ძაგებში რომ მამა და ძმა მოჰკლა, ზედ რუსთველი ეპისკოპოსი და მისი ძმა აბელ ანდრონიკაშვილიც დააკლეს ყიზილბაშებმა.

„იმ აბელის შვილი ყოფილაო“, — გაუელვა შაჰს. ერთხანს კიდევ უცქირა აბელიშვილ-ანდრონიკაშვილს და მერე ბრძანა მკაცრი, „დაბეჭდული“ სიტყვებით:

— ეს კაცი ჩემთან დარჩება!

— ვერ ვიზამ მაგას! — იყვირა თეიმურაზმა.

თვალეები სისხლით გაეცსო აბასს.

— ნუ მიზამ მაგას! — გაასწორა წინარე ნათქვამი თეიმურაზმა. — ნამსახურ კაცად მყავს, მაგისი მამა და ბიძა პაპაჩემს თავზე დააკვდნენ. თვითონ ყველაზე ერთგულად მემსახურება ადამ აბელიშვილი და გეაჭები ნუ წამართმევ ყველაზე ერთგულ კაცს! — ძლივს იმაგრებდა ცრემლებს თეიმურაზი.

— არც მე მაწყენს ერთგული კაცები, — თქვა შაჰმა, — ადამ აბელიშვილ-ანდრონიკაშვილი ჩემთან დარჩება! — ბრძანა და ნასწრაფევად გავიდა დარბაზიდან.

„უნდა ერთგული ადამიანებისაგან გამძარცვოს და მარტოდ დაგდებულს ჩემივე ხალხით მომიღოს ბოლო!“ — გაივლო თეიმურაზმა, ტუჩები დაიკბინა გაოგნებულმა.

მეორე დღეს შაჰ აბასმა თეიმურაზი ცალკე გაინაპირა და ცბიერად თვალდაწურულმა ჰკითხა:

— ჭიხოსრო ჩოლოყაშვილის დაკარგვა თუ გეწყინებოდა ისე, როგორც ადამ აბელიშვილის წართმევა გემწუთხა?

ეს კიდევ ახალი ლაზვარი იყო თეიმურაზისთვის. ჭიხოსრო ჩოლოყაშვილ-ომანიშვილი უპირველესი კაცი იყო იმეამად კახეთის სასახლის კარზე, მარტყოფის სადროშოს მოურავი და სარდალი, მამაცი მხედარი, „ახოვანი და შემმართე-

ბელი“ ვაჟკაცი. გამორჩევით ქეთევან დედოფალი აფასებდა ქაიხოსროს ერთგულებას და მამულიშვილობას.

ვაითუ ჩოლოყაშვილიც წამართვასო, ავად გაუელვა თეიმურაზს და მაშინვე შაჰიც ამეტყველდა:

— სხვებთან არ გითხარი, რადგან თავი მოგეჭრებოდა შენც და დედაშენსაც, ქეთევან დედოფალს...

— ?!

— ცნობები მაქვს, ქაიხოსრო ჩოლოყაშვილი ქეთევან დედოფალს ეტრფიალება შორიდან. შესაძლოა დედაშენსაც მოსწონდეს ესოდენ მომხიბლავი ვაჟკაცი. ხომ იცი, ქალი მაინც ქალია. ჰოდა, ხომ შეიძლება შეერთდნენ და კახეთის ტახტს ახალი მემკვიდრე გაუჩინონ — უფრო კანონიერი, ვიდრე შენ?!

ლამის მიწა გაქცეოდა ფეხებიდან თეიმურაზს.

ეჭვსი თვე „ვერ შეელია“ შაჰ აბასი „ძვირფას სტუმრებს“ გურჯისტანიდან.

ეჭვსი თვის შემდგომ ორივე დიდძალი მისართმეველით დატვირთული გამოისტუმრა „თავთავის საქართველოში“.

წამოსვლის წინ მეფეებმა ეს სთხოვეს შაჰს: როცა თქვენი უდიდებულესობა სამოთხისებურ მაზანდარანს გაემგზავრება სანადიროდ და თვალსასეიროდ, შეგვატყობინეთ, რათა ჩვენც სანადიროდ აღკავშული გეახლოთ და თქვენთან დროსტარებით გაგვაბედნიეროთო.

თქვენს თხოვნას არ დავეიწყებო, ბრძანა შაჰმა.

მართლაც დიდებული მეხსიერება ჰქონდა ერანელ ხელმწიფეს.

და ქართველ ხელმწიფეებსაც „თავის დროზე“ გაახსენებენ მათ თხოვნას.

ტფილისი აღფრთოვანებით შეეგება ქართველ გვირგვინოსანს.

ეს მერამდენედ მოიკვეთა საქართველოს წმინდა სატახტომ უცხო უემური!

მაგრამ ისევ გაერიო შხამი საზეიმო წეჭტარით სავსე ფილაში.

ლუარსაბ მეფეს ბავთი ამბავი აახლეს ფაიქებმა: ყაზახის მმართველი მოჰამედ-ხან ყაზაყლარი შემოსევია ქართულ სოფლებს ცეცხლითა და მახვილით.

ნუთუ შაჰ აბასის დაუკითხავად გაბედა ომის დაწყება ყაზახის ხანმა?!

გაოგნებული ისხამდა იარაღს ლუარსაბ მეფე და ფიქრადაც არ უფიქრია, რომ მოჰამედ-ხან ყაზაყლარს უბეში სწორედ შაჰ აბასის წერილი ედო.

„სასწრაფოდ ჯარი შეჰყარე, ქართლში შეიჭერ და კალთხავით გალეწე და გააცამტვერე, ლუარსაბ მეფეს თავი გაგდებინე და მოკვეთილი თავი მე გამომიგზავნე!“ — ეწერა იმ წერილში.

„ნუთუ შაჰის თანხმობით“, — ეს კითხვა უწევდა გონებას ლუარსაბს. როცა ახალი, სრულიად მოულოდნელი ამბავიც გაჩნდა: თვითონ შაჰ აბასის წერილი!

„შევიტყვე, რომ ყაზახის ხანი მოჰამედ-ხან ყაზაყლარი მოღალატეა, თურმე ძალღმობის ოსმალო ფაშებთან გაუმართავს მიწერ-მოწერა, ამიტომ სასწრაფოდ გაეშურე ქართველთა ჯარით, ყაზახში შეიჭერ, ააოხრე და გააცამტვერე, ხოლო მოღალატე ყაზაყლარი მოჰკალ, თავი მოჰკვეთე და გამომიგზავნე!“ — ეწერა ამ წერილშიც.

არც ერთმა — არც ქართლის მეფემ და არც ყაზახის ხანმა — ცალკეულად არ იცოდნენ, რომ იყო ორი წერილი, ერთ დღეს ერთი ხელით დაწერილი, და იყო ორი „ადრესატი“ — ერთმანეთზე ერთიკაცისგან სასიკვდილოდ წაქეზებული.

თვითონ შაჰ აბასი ერთ რამეში გულწრფელად იყო დარწმუნებული: ქართლის მეფეც და ყაზახის ხანიც — ორივე მისი ორგული იყო.

ძალიან კი მოსწონდა და ენდობოდა თავისი გონების სიმახვილეს: ერთ-ერთის წარკვეთილი თავი უეჭველად დაგორდებოდა მის ფეხებთან — ან ლუარსაბისა, ან მოჰამედ-ხანისა; ერთ-ერთის, ხოლო მეორეს... მეორესაც მალე მოულებს ბოლოს ერანის ლომი!

მაინც რა მომხიბლავი და საწადნელია, რომელი დაასწრებს და რომლის თავი მოგორდება შაჰის ფეხებთან!

„ისე კი... ქართლის მეფის თავი მერჩივნა“, — გულწრფე-

ლად გაიფიქრა აბასმა (გულწრფელობაც უყვარდა „თავს დროზე“ შაჰ აბასს).

და მოხდა ასე:

მოჰამედ-ხან ყაზაყლარის გასისხლიანებული თავი მიუგორეს ფეხებთან.

„ისევ ქართველს უჯობნია!“ — მწარედ თქვა შაჰმა და ულვაში კბილით ჩამოიწიწკნა.

წელიწადი ქორწინებათა

ჯოჯობეთური მოძახილი შეგვიმოხვს ქორწილს.

შ ე ქ ს პ ი რ ი

შაჰ აბასს „ორი წერილის ფანდი“ მაინც ძალიან დასჯდომოდა ჭკუაში და იფიქრა იქნებ თვითონ ქართველ მეფეებს დავაკვლევინო ერთმანეთით.

და მისწერა ლუარსაბ მეფეს ერანის შაჰმა: მე მირჩევნია ქართლიც და კახეთიც ორივე შენ გემორჩილებოდეს; ამიტომ თეიმურაზი მოჰკალი და კახეთი დაიჭირეო.

იმგვარივე წერილი იმ დღესვე გაუგზავნა თეიმურაზს: მე მირჩევნია, კახეთიც და ქართლიც ორივე შენ გემორჩილებოდეს; ამიტომ ლუარსაბი მოჰკალი და ქართლი დაიჭირეო.

მაგრამ ქართველი მეფენი შაჰ აბასის მზაკვრობას ადვილად მიხვდნენ, წერილები ერთმანეთში გაცვალეს და ამით „ეს საქმე“ გაათავეს.

შაჰს მხოლოდ გაუკვირდა: როგორ მოხდა, რომ ქართველებმა ამჯერად ერთმანეთის ტყავი არ დახიესო.

იმავე 1610 წელს თეიმურაზ მეფეს მეუღლე გარდაეცვალა — დედოფალი ანა, მამია გურიელის ასული.

სამი წელი ძლივს მოათია ერთად ყმაწვილმა მეფე-დედოფალმა.

წვრილი ობლები დარჩნენ — ლევანი და ალექსანდრე.
დიდ საგლოველს მიეცა გრემის სასახლე.

სულ დაიჯაბნა და დაიბეჩავა მწუხარებამ თეიმურაზი.

შეიტყო შაჰ აბასმა კახეთის დედოფლის სიკვდილი და შემოუთვალა დაქვრივებულ „გაზრდილს“: ვაჟკაცი ხარ, გლოვა იკმარე, მეწვიე და ჩემთან განიქარვე მწუხარებაო.

ელჩად შაჰ აბასს იტალიელი კარმელიტი გამოეგზავნა —
ბატრი ფ რ ა ჯ ო ვ ა ნ - თ ა დ ე ო .

კახეთის სამეფო კარი დიდის პატივით შეხვდა ჯვალს ფიჩოსან ფეხშიშველა ევროპელ ბერს. თეიმურაზმა და ალავერდელმა მიტროპოლიტმა ალავერდის ლავრაში აწირვინეს კათოლიკე ჯოვან-თადეოს.

შაჰის წვევაზე უარი ველარ თქვა და წავიდა თეიმურაზი „შავით მოსილი“.

მიეგება და მიუტრემლა შაჰ აბასმა. მერე თალხები ძალით გაჰხადა და სამეჯლისოდ მორთო თავისი ხელით. სანადიმო სუფრა გაუწყო, მერე სანადიროდ წაიყვანა ტყე-ველად.

ასე „ანადიმებდა და ანადირებდა მარად-დღე“ აბასი თეიმურაზს.

ერთ დღეს, როცა ნადირობით დაქანცული მონადირენი ნანადირევს შეეჭცეოდნენ, მასპინძელმა უთხრა სტუმარს:

— გეყოფა გლოვა, ჩემო თეიმურაზ, მეფე ხარ და ქვეყანას დედოფალი სჭირდება. დროა, ცოლის თხოვაზე იფიქრო.

— მერე, ვის მირჩევ სადედოფლოდ?! — ლუკმა შეეყინა პირში თეიმურაზს.

— შეირთე ხორეშანი.

— ხორეშანი?!

— ჰო, ლუარსაბ მეფის დაი. შეირთე და იყავ ქვისლი ჩემი და სიძე ქართლის მეფისა. ასე ვიქნებით სამივე მოყვარენი და მოისპობა ჩვენს შორის ყოველი ეჭვი, შური და უნდობლობა.

ცივად იუარა თეიმურაზმა:

— ეგ არასგზით არ შეიძლება, რადგან ხორეშანი და ლუარსაბი ჩემი პეპერა ლევან მეფის ასულის შვილისშვილები არიან.

გადაფიჩინდა შაჰ აბასი: რას არ მოიგონებთ ქართველ-

ბი — ყვაფი ჩხიკვის მამიდაო! ის კი არა და, ქალს შეუძლია ცოლად წაჰყვეს მახლს, გინა ძმას!

ლამის უკანვე გადმონათხია თეიმურაზმა ყელს გადაცდებ ნილი საქმელი.

— ეგ ჩვენის სჯულით წარმოუდგენელია, — ძლივს ამოიბრიალა.

— ჩვენი სჯული? მალე თქვენი სჯულიც ჩვენი სჯული იქნება! — თქვა ცივად შაჰმა.

მიხვდა თეიმურაზი, რასაც ნიშნავდა ცბიერი სპარსელის ეს ორპირული სიტყვა: რასაკვირველია, მაჰმადიანური ერანის გაქრისტიანებას არ იგულისხმებდა შაჰი... გათათრებისკენ გვექაჩება თათრის ყველაზე დიდი მბრძანებელი და ვაი ჩვენ, ქართველთა!.. ახლაც ეს არის: უნდა ნათესავეები შეგვაუღლოს და მერე გვიკიეინოს, — აჰა, რაღა დარჩენილა, აკი თქვენც გათათრებულხართო!

ერთხელ კიდევ მიუბრუნდა და „მიუგო ვედრებით“ თეიმურაზმა: ნუ იქმ და ასეთ უზნეო გზაზე ნუ შეგვაყენებო.

ფეხზე წამოიჭრა აბასი, სანადირო მშვილდი აიღო და თქვა სუსხიანად:

— ლუარსაბ მეფესთან წერილი უკვე გაგზავნილი მაქვს, ჩემი ცოლისძმა საქორწინოდ ამზადებს დას!..

1611 წლის გაზაფხულზე დიდი ქორწილი გაიმართა გრემის სასახლეში.

კახეთის მეფე თეიმურაზ პირველი ცოლად ირთავდა ქართლის მეფე ლუარსაბ მეორის დას — ხ ო რ ე შ ა ნ ს.

მაინც დაერთო სისხლი ქორწილს.

გზირებმა ამბავი შემოუტანეს სიძედ მჯდარ მეფეს: ლეკები გამოჩენილან ყადორის მთაზეო.

წამოიჭრა თეიმურაზი და მოითხოვა საჭურველი.

მივარდა ქაიხოსრო ჩოლოყაშვილ-ომანიშვილი: შენ ნუ გაირჩები და მე მოვეუვლი ლეკებს. ძალით დასვა მეფე ტახტზე. გავარდა და შეჰყარა თავისიანთა გუნდი, ამხედრდა, ამხედრა და გაქუსლა მთისკენ.

ვილაც მივიდა თეიმურაზთან და უჩურჩულა იღუმალის ხმით: რად გაუშვი ჩოლოყაშვილი, დიდი ხანია მას შენი ღალატი უდევს გულშიო.

შაპ აბასის ნათქვამი გველივით აუცოცდა გულზე თეიმურაზს: ქეთევანი და ქაიხოსრო შეერთდებიან და ტახტს წაგართმევენო!

აიშალა და ავარდა მეფე. ველარაგინ დააკავა. იარალი აისხა, აშალა აიყოლია და თვითონაც გაქენდა ყადორისაკენ.

იმ დროს მივიდა, როცა ქაიხოსრო ჩოლოყაშვილ-ომანიშვილს ლეკები დაემარცხებინა, გაქცეულებს დაღესტნამდე ჩაპყოლოდა და მათი სააბრაგო საბუღარებიც ძირფესვიანად მოეთხარა.

შემოეგება გამარჯვებული ქაიხოსრო მეფეს და მოახსენა: ლეკები განადგურებული არიან; ახლა სამეფო ბუკს თუ მიბოძებ, მისი ძახილით დავაშინებ და სამუდამოდ თარეშის მადას მოვუსპობ ლეკებსო.

ამის თქმა და, მისცვიდნენ მეფეს „მისიანები“: ქაიხოსროს სამეფო ბუკის დაძახილით შეთქმულთა შეყრა და შენი მოკვლა აქვს გადაწყვეტილიო.

პასუხსაც აღარ დაუცადეს, — ქაიხოსროს დაეტაკენ და ძირს დაანარცხეს.

ბევრი იყვირა და იფიცა ჩოლოყაშვილ-ომანიშვილმა, მეფის ღალატი ფიქრადაც არ გამივლიაო, მაგრამ ვინ შეისმინა! თავი გააგდებინეს.

ბევრ თავადს შეუყრეოლდა იმ დღეს კისერი — ორგულსაც და ერთგულსაც.

• • • • •

1611 წლის ზაფხულზე მეორე ქორწინება მოხდა: შაპ აბასმა კიდევ ერთი ცოლი შეირთო — ე ლ ე ნ ე, თეიმურაზ კახთა მეფის დაი.

ამნაირად, გუშინდელი ქვისლები სიძე-ცოლისძმობითაც დაუმოყვრდნენ ერთმანეთს.

• • • • •

თეიმურაზისა და ხორეშანის ქორწინებამ არაგვის ერისთავთა ოჯახი ააფორიაქა საშინლად. თურმე ხორეშანი ნუგზარის ვაჟზე — ზურაბზე ყოფილა დანიშნული. ახლა ისე გამოდიოდა, რომ ლუარსაბმა პირი უშალა არაგვის მბრძანებელს, ხოლო თეიმურაზმა აშკარად წაართვა საპატარძლო ერისთავთა სახლეულს.

ამას დაიმახსოვრებენ ნუგზარ და ზურაბ ერისთავები,

.

1611 წლის შემოდგომაზე კიდევ მოხდა ერთი ქორწინება, — უფრო „მრავლისმნიშვნელი“ და „მრავლისმომასწავლებელი“.

გიორგი სააკაძემ ნოსტეში, თავის ციხე-დარბაზში, ლუარსაბ მეფის ბატონსაყვამად დიდი წვეულება გამართა.

მასპინძელმა მეფეს მწდედ (მერიქიფედ) ახალგაზრდა ქალი დაუყენა, საოცრად მომზიბლავი, ტანნაკეთოვანი და სახემშვენიერი.

მოურავის დაი აღმოჩნდა ის ქალი (სახელი არ არის ცნობილი).

ქაბუკი მეფე პირველი თვალის დაკვრისთანავე დაატყვევა ქალის სიმშვენიერემ. მისი ნახელავი ღვინოც ძალიან გაუტკბა, მალე კიდევაც დათვრა და გული სატრფიალოდ აეშალა და აუზვავდა.

სხვა რაღა უნდოდით მოურავზე ბალანაშლილ თავადებს! იმ დღესვე შექმნეს მითქმა-მოთქმა და მიეთ-მოეთი: ვიგინდარა სააკაძემ წვეულება განზრახ გააწყო, მეფე განზრახ მიიტყუა, დაი თვისი განზრახ შეატყუა და ამნაირი უკადრისი გზით უნდა მეფეს კიდევ უფრო დაუახლოვდეს და მიეტმასნოსო.

წვეულება როგორც იქნა ჩათავდა, მაგრამ გამიჯნურებულმა მეფემ ნოსტეს სიარულსა და ქალთან შეხვედრებს მოუხშირა.

ჭორი გაფუჟდა, გასივდა, გასკდა და სამეფო სახლიდან გლეხის ქოხის კარამდე შხამად და დარდუბალად დაინთხა.

დიდსა და მცირეს მეფისა და მოურავის დის „რომანი“ გაგვრა პირზე.

ოჯახი უბახდებოდა სააკაძეს.

გიორგის დედა თამარი ლამის ჭკუიდან გადამცდარიყო მისი ქალისადმი მეფის „უსაქციელობის“ გამოისობით.

გიორგი მიხვდა, რომ მწარე შეცდომა დაუშვა. იგი ვერავის დააჭერებდა, მეფისა და მისი დის შეხვედრა განზრახ რომ არ ყოფილა მოწყობილი.

მიხვდა და მაშინვე შეუდგა გამრუდებული საქმის გასწორებას.

მეფეს შეუთვალა: საკადრისი არ გახლავთ თქვენი ასეთი საქციელი და უმორჩილესად გთხოვთ, გულისთქმას ნულარ აპყვებით, ქალს თავი დაანებეთ, თორემ უეჭველად თავს შემოგაკლავთო.

ლუარსაბი მოულოდნელი პასუხით შეხვდა მოურავს:

მე შენი დაი ჩემს სულზე უფრო შევიყვარე, ცოლად უნდა შევიერთო და ქართლის დედოფლად დავსვა!

ეს კი მეტისმეტი იყო. გიორგის ერთ ხანზე სიტყვა ველარ ეპოვნა საპასუხოდ. მაგრამ მისმა ძლიერმა გონებამ ისევ მალე განსაზღვრა, რა უნდა მოჰყოლოდა გულისთქმას აღევნებულ ჭაბუკი გვირგვინოსანის აჩემებას.

— მეფეო, მე ერთი მდაბალი ყმა ვარ თქვენი, თქვენსევე წყალობითა და კეთილი საბოძვარით გამდიდრებული და აღზევებული. ამიტომ ჩვენი ასეთი დამოყვრება შეუძლებელი გახლავთ. კიდევაც რომ მოხდეს, თავადები და მათი სახლეულნი ჩემს დას დედოფლად არ დაისვამენ, იმასაც მოგაშორებენ, ჩემს თავსაც შეგაძულებენ და დაგაკარგვინებენ. მართო ერთი თქვენი მამა-მძძე და სუფრაჯი შადიმან ბართაშვილი ეყოფა ჩვენს გადამტერებას. ამიტომაც გეაჩები, ხელი აიღოთ, მეფეო, ჩემი ოჯახის შერცხვენაზე და დალუპვაზე! — შეჰლაღადა გიორგიმ.

— ასეთი რა დაუშავე ჩემს გამზრდელსა და სუფრაჯს, გიორგი? — ჰკითხა ლუარსაბმა.

— თქვენთან ჩემი სიახლოვე ვერ აუტანია შადიმან ბართაშვილს. მითომაც მემტერება და მექიშპება. ერთხელაც, როცა ხმლის ხმარებაზე ატრაბახდა, მე ვუთხარ: შადიმან, შენ ხმალს კვეთა არა აქვს-მეთქი. და მის შემდგომ სულ გაცოფდა და დაეხარბა ჩემს სისხლს, — თქვა გიორგიმ.

— ძალიან მწარე სიტყვა კი გითქვამს, ჩემო გიორგი, შადიმანისთვის.

— ვუთხარ, რადგან ასედაც გახლავთ... მაგრამ სიტყვას ბანზედ ნუ მიგდებთ, მეფეო. მუხლმოყრილი და ქვედავრომილი გემუდარებით, ხელი აიღოთ ჩემის ოჯახის დამცირებასა და დალუპვაზე!

— მე და შენი დაი უცოდველნი ვართ, ჩემო გიორგი, და ასედაც დავრჩებით ქორწინებამდე, ხოლო ქორწინება სულ მალე განესრულება! — ბეჯითად დაასრულა ლუარსაბმა.

გაოგნებულმა გიორგიმ მეფე მიატოვა და დედამისთან წავიდა — დედოფალ მარიამთან.

— თქვენი შვილი ჩემს დას მთხოვს ცოლად, მე უარს ვეუბნები, ის თავისას არ იშლის და ვინძლო თქვენ მომეხმაროთ და კაის საქმით გადამარჩინოთ! — მოახსენა გიორგიმ ქართლის დედოფალს.

მარიამს უკვე სცოდნოდა „მდაბიო ქალზე“ შვილის გამიჯნურების ამბავი. დიდი საყვედურებიც იფრქვეოდა თურმე დედა-შვილს შორის. მარიამი სამეგრელოს მთავრის ასულს ურიგებდა ლუარსაბს (თვითონაც ზომ მეგრელი ლიბარტიანის ასული იყო დედოფალი), ხოლო „მდაბიო სააკაძის ქალის“ რძლად მოყვანა ვერასგზით ვერ წარმოედგინა გვირგვინოსნის დედასა და ქართლის „მთავარ დედოფალს“.

მაგრამ სამეფო ტახტის ერთგულ მსახურსა და მოამაგე მოურავს მაინც დიდსულოვნად შეხვდა მარიამი.

ლუარსაბ მეფე მე აღარ მეკითხებაო ცოლის შერთვას, ყველაფერს მის ნებაზე აკეთებს და, რაც არ უნდა მოხდეს, თქვენი ერთგულებისა და თავდადების დავიწყება ჩვენის ოჯახისაგან არასგზით არ მოხდებაო, ასეთი სიტყვით გამოისტუმრა მარიამმა მოურავი.

ისევ ლუარსაბს მიაწყდა გიორგი, ისევ ვევედრა, ჩემს დას დაეხსენიო, ცუდად ნუ გამათავებინებ ცხოვრებასა და შენდამი ერთგულ სამსახურსო.

არაფერმა გასჭრა. მეფეს შეურყეველად გადაეწყვიტა საყვარელი ქალის ცოლად შერთვა.

გიორგი გატყდა. მხოლოდ ფიცი სთხოვა ხელმწიფეს, ფიცი, რამეთუ არასოდეს ეღალატნა მისი დისათვის, არც არავის წაქეზებით გამოეგდო ცოლობიდან და დედოფლობიდან.

ღვთის პირით შეჰფიცა ლუარსაბმა.

1611 წლის შემოდგომა. ქორწილი. ქართლის მეფე ლუარსაბ მეორე ცოლად ირთავს მოურავ გიორგი სააკაძის დას. ნოსტედან ქვათახევს წაიყვანა ნეფემ დედოფალი.

მაყრიონს წინამძღვრად მიუძღოდა ნასიძე.

ქვათახევის მონასტერში მღვდელმა იოსებ კანდელაკმა დასწერა ჯვარი ლუარსაბ ბაგრატიონს და სააკაძის „მდაბიო ქალს“.

ოთხასი წელი გასულიყო მას შემდეგ, რაც გიორგი ლაშამ „უქანონო გზით“ და „ქეშმარიტი სიყვარულით“ მოიყვანა ქალი „სახლსა სადავითოსა“. და მას შემდგომ ლუარსაბ მეფე ქართველ გვირგვინოსანთა შორის მეორე იყო, რომელმაც ისეთივე „უზნეო ქორწინებით“ და „ქეშმარიტი სიყვარულით“ შეირთო ცოლი.

ლუარსაბ მეფე სიტურფით და მომხიბვლელიობით დიხანაც არ ჩამოუვარდებოდა თამარ შვიდმნათობიერის საოცარ ძეს, მაგრამ ვაჟკაცობით, ნებისყოფით, დიდსულოვნებით, „თვითბუნებაობით“?!

.

საწორწილო სუფრა ახალი ალაგებული თუ იქნებოდა, რომ ერთბაშად ისევ ერთმანეთის საჯიჯგნად აიშალა და ახვავდა ორი მოსისხლე „ბანაკი“ — შადიმან ბარათაშვილისა და გიორგი სააკაძისა.

სააკაძეს საქართველოს გაერთიანება ჰქონდა გულში ამოჭრილი. ეს უზარმაზარი მამულიშვილური ოცნება „აზნაურული გზით“ უნდა შეესრულებინა „წვრილი ერის“ სათაყვანო გმირს: აზნაურები თავადთა ქვეშევრდომობას უნდა დასხლტომოდნენ და ყმაგლეხების გაყოლებით ერთიანი სამეფო ხელისუფლების უშუალო სამსახურში შესულიყვნენ. ასეთი იყო სააკაძის „მოკიდებულ კაცთა“ (მიმდევართა, თანამოდასეთა) საბრძოლო განაზრახი.

აზნაურთა, ყმაგლეხთა, ხელოსანთა და წვრილ ვაჭართა გარდა, „დიდი მოურავის მოკიდებულთა“ შორის, აშკარად ან იდუმალ, ზოგიერთი თავადიც შედიოდა: ნუგზარ არაგვის ერისთავი, თეიმურაზ მუხრან-ბატონი, იასე ქსნის ერისთავი, ზაზა ციციშვილი, ბააკა ხერხეულიძე, ბერუკა და ქაიხოსრო ჯავახიშვილები (თუმცა მერე ორივე ჯავახიშვილი სააკაძეს განუდგა და შადიმანის „დასს“ დაუბრუნდა).

ლუარსაბ მეფის ქორწინება სააკაძის „დასის“ დიდი გამარჯვება იყო.

მაგრამ არ ეძინა შადიმან ბარათაშვილსა და ფარსადან ციციშვილის თავადურ წრეს.

აიშალნენ თავადები. აიშალნენ ოჯახებით, ცოლ-შვილით, ქალ-რძალით და შეუტყეს ლუარსაბ მეფეს: ცოცხალის თავით არ შევურიგდებით „უგვარო დედოფლის“ მბრძანებლობას და თავზე წამოსკუბებასო. „და უმეტესად სუფრაჟმან შადიმან ბარათაშვილმან დაუცადებლად დაუწყო ბეზღობა მოურავსა“.

ნახევარი წელიწადი ლანძღეს და თათხეს მოურავი და მისი ოჯახი, ნახევარი წელიწადი უჩიჩინეს მეფეს: განუტევე „უჭიშო დედოფალი“ და მოჰკალი „მოღალატე მოურავიო“.

ლუარსაბი ერთხანს მაგრობდა, საყვარელი ქალისა და ერთგული მოურავის ჩამოშორება არ უნდოდა; სახარებასაც იშველებდა — „რომელნი ღმერთმან შეაუღლნა, კაცნი ნუ განაშორებენო“ — მაგრამ ნახევარწლოვანმა „ფერდალურმა ღიჯინმა“ ბოლოს მაინც თავისი გაიტანა.

„ქარგი, გავუშვებ დედოფალს!“ — ამოიგმინა მეფემ.

უფრორე მიეძალნენ და მიეტანენ თავადები: მარტო დედოფალის განტეგება რას უშველის, თუ სააკაძეც არ მოკვდებაო. ის კი არა და, დის დამცირებით გაბოროტებული სააკაძე ფათერაკს, რაიმეს გადაყრის ჯერ შენ და მერე ჩვენც მოგვადგებაო. ამიტომ სააკაძე უნდა მოკვდეს დაუნდობლად და დაუყოვნებლივ!

მეფე გაჯიქდა. გიორგი სააკაძისაგან სიკეთისა და ერთგულების მეტი არაფერი მახსოვს და ამნაირი კაცი ასე უბრალოდ სასიკვდილოდ როგორ გავიმეტო.

მაშინ შადიმან ბარათაშვილმა და ფარსადან ციციშვილმა ბერუჯა ჯავახიშვილი გამოიძახეს მეფესთან.

ბერუჯა ჯავახიშვილი გიორგის „შვილივით ნაზარდი“ ჰყოლია, მაგრამ ახლა მისი მტრების ბანაკს მიჰკედლებია და სული ეშმაკისთვის მიუყიდნია.

და უამბო ბერუჯა ჯავახიშვილმა ლუარსაბ მეფეს:

— ეს ხუთი წელიწადია, რაც გიორგი სააკაძეს შაჰ აბასის კართან კავშირი აქვს გაბმული. ეს მას შემდეგ, რაც თქვენი დის მაყრიონს გაჰყვა ისფაჰანში. მაშინ ძალიან ტკბილი საუბარი ჰქონიათ შაჰს და მოურავს. იქაურ გათათრებულ ქართ-

ველებთან ფაქტები დაუდის სააკაძეს. ხოსრო-მირზას — შენი პაპის ძმისწულს — ქართლის ტახტს ჰპირდება თურმე...

ძარღვები გაუშრა და სახსრები დაელეწა ლუარსაბ მეფეს. შადიმანს ამღვრეული თვალეები მიაპყრო და ამოიხრიალა:

დაე იყოს განტეგება დედოფლისა და სიკვდილი და ამოწყვეტა მისი ძმის გიორგი სააკაძისა!

ისე ბრძანა, არც სამართალი გახსენებია, არც საბუთი, არც რაიმე გამოძიება მალემრწმენ მეფეს,

„საიდუმლო სირობა“

1612 წლის მაისი იყო.

ლუარსაბ მეფე წაგვისს იდგა, საზაფხულო სასახლეში.

მისი მამა-მძუძეც აქ ბრძანდებოდა — შადიმან ბარათაშვილი, თავისი „დასით“.

სალამო ხანი, გუთნეულის გამოხსნის ყამი.

ფარეშთუხუცესმა ბააკა ხერხეულიძემ საღარბაზოსთან შემთხვევით გაიარა და შიგნიდან შემთხვევითვე შემოესმა ნაწყვეტი სიტყვა:

„ხვალ... ნადირობისას... უნდა მოვკვლო...“

?!

ნეტავ ვის მოკვლას აპირებენ?!

აჰა, ხვალ სანადიროდ მიდის მეფე ყარაიაში და იქ მოკვლისა და დაჭრა-დაჭერის მეტი რაღა იქნება... ნადირთა და ფრინველთა... თუმცა ასე უცნაური იდუმალეებით რატომ გაისმა ეს წყეული სიტყვა — „ხვალ მოვკვლათო?“ ვაითუ...

მონადირეთა გუნდიც ძალიან ემრავლა თვალში ხერხეულიძეს. „გუნდი“ კი არა, უფრო ჯარს ჰგავდა — საომრად დასილალებულ ჯარს.

• • • • •

ეზოში გიორგი სააკაძე შემოვიდა.

ერთმანეთს ტკბილად მიეგებნენ.

საკაძემ თვითონ უამბო ხერხეულიძეს ასე დაგვიანებით

მოსკლის მიზეზი: მეფემ შემომითვალა, დღესვე წავეის მოვ
დი და ხვალ დილით ადრე ყარაიას გავიდეთო სანადიროდ.

გულმა რეჩხი უყო ბააკა ხერხეულიძეს: გიორგის ხომ არ
ემუქრება ის ავბედითი სიტყვაო. და გადაწყვიტა ფხიზლად
ყოფილიყო იმ ღამეს.

მეფემ და მისმა ამაღამ შეიტყვეს მოურავის მოსვლა.

გამოეგებნენ „სიყვარულით“.

ლუარსაბმა სერობად ჯდომა ბრძანა.

მიუსხდნენ სუფრას.

მეფე მხიარულ ხასიათზე იყო. სმაში უნდა შევეჯიბრო
ჩემს ცოლისძმასო, იცინოდა და ღვინოს აძლებდა გიორგის.

სხვებიც „ეძალებოდნენ“ ღვინოს — შადიმან ბარათაშვი-
ლი, ფარსადან ციციშვილი, ბერუკა ჯავახიშვილი.

ბააკა ხერხეულიძე ხედავდა, რომ სააკაძის გარდა ყველა
იპარავდა ღვინოს.

თვითონაც იღუმალ ნაკლული სასმურით სვამდა და საა-
კაძის თვალებს ჩხრეკდა თვალებით.

გიორგის უკვირდა, ნადირობის წინა ღამეს ღვინის სმა
როგორ შეიძლებაო, მაგრამ მეფის ხათრით მაინც პატიოსნად
სვამდა სასმურებს.

ყველამ იცოდა, თუ „აუცილებელი“ იქნებოდა, სააკაძე
ხარივით სვამდა ღვინოს.

„უნდათ ღონისაგან მცირედად მაინც დასცალონ და ადვი-
ლად მოერიონ“, — გაუელვა ხერხეულიძეს და, როგორც იქნა,
დაიჭირა გიორგის თვალი.

მიხვდა მოურავი, რასაც ანიშნებდა ერთგული „მოკიდე-
ბული კაცი“.

ღვინით აკიაფებული თვალებით დაკორტნა თანამესუფ-
რენი.

ყველა ფხიზელი ეჩვენა.

გონება დაიმძლავრა და სიმთვრალე დაითრგუნა გიორგიმ.
ფეხზე წამოდგა, ნადირობა და ნადიმობა ერთმანეთს არ
მოუხდებიანო, დროც გახლავს მოვისვენოთო და მეფეს გან-
ტევება სთხოვა.

სუფრა აიშალა.

.

მამლის მეორე ყვილზე გაეღვიძა ახლად ჩათვლემილ ბააკა ხერხეულიძეს.

ნასწრაფევემა ნაბიჯებმა, ნერვიულმა ჩურჩულმა და იარაღის ჩხარაჩხურმა წამოაგდო ფეხზე.

გამოძიების დრო აღარ იყო და სააკაძის კარვისკენ გაფრინდა ფრთაგამოსხმული.

— თავს უშველე, გიორგი, შენს მოსაკლავად მოდიანი — ზედ სარკმელთან დაიღრიალა ხერხეულიძემ.

ახალუხის ამარად იწვა გიორგი, ფეხშიშველი და თავშიშველი. ეგრევე წამოიჭრა, მხოლოდ ხმალი აიტაცა და შურდულივით გავარდა გარეთ.

უკვე კვალში უდგნენ მდევერები:

მიასწრო უბელო ცხენთან, შორიდან ისკუბა ჯიქის სისწრაფით, ზურგზე მოეწვლო და გაფრინდა, ვითარცა გაფრენილი კენტაუროსი.

— ხერხეულიძეს მიჰხედეთ — დაიღრიალა შადიმანმა.

ცხენებზე შეცვივდნენ და გაქცეულს გამოენთნენ შადიმან ბარათაშვილი, ფარსადან ციციშვილი, ბერუკა ჯავახიშვილი და „მონადირეთა“ მთელი ჯარი.

ლუარსაბის ამალას ბააკა ხერხეულიძე შეეპყრო და ძირს დაენარცხებინა.

„მეფის ღალატისათვის“ ცხვირი მოაჭრეს და ლოყა-ნიკაპი დაათალეს.

მოთხრილი სააკაძე

მიჰქრის გიორგი სააკაძე.

ნოსტეს უნდა მიასწროს, თორემ ცოლ-შვილს ამოუწყვეტენ.

„რატომ, რისთვის, რას მერჩიან?!“

„განა, სიკეთის მეტი რა დამითესავს ჩემი ქვეყნისთვის, ხალხისთვის, მეფისთვის?!“

„ჩქარა, ჩქარა, თორემ ოჯახს ამომიწყვეტენ — დედას,

ცოლს, შვილებს — ავთანდილს, პაატას, ივანეს, ზურაბს, იო-
რამს!“

პაატას თვალებმა გაიელვეს...:

„ღმერთო!..“

„ღმერთო, ცხენი არ დამივარდეს!“

„წყალვარდნილმა გზა არ მომიჭრას!“

„ზვავი, ან ლოდი არ დამიქანდეს!“

„ღმერთო, ღმერთო, ღმერთო, მიშველე!“

ცხენთა თქარუნი და მღვევართა ნერვიული ყვირილი ისმის
შორიდან.

„შორიდან? ვაითუ, მეჩვენება და... სადაცაა წამომეწიონ,
მაშინ?!“

მაშინ... აჰა, ხმალი სააკაძისა!

ყველაზე დიდი ქართული ხმალი!

ხმალი სალმასური, რომელსაც უანგარიშოდ დაუდგრია
სისხლი თურქთა და სპარსთა, სისხლი საქართველოს მოსი-
ხართა!

ხოლო ქართველ კაცს ჯერ არ მოხვედრია სააკაძის ხმალი
სალმასური.

ჯერ!

მაგრამ ვაითუ ახლა, ამ ღამეს, ან ზვალ, ან ოდესმე დააქ-
ციოს სააკაძის ულმოებელმა უქარქაშო ხმალმა სისხლი ქართ-
ველი კაცისა, სისხლი თანამოძმისა, თანამოგვარისა, თვისტო-
მისა?!

ღმერთო, ნუ ინებებ!

„ღმერთო, ნუ მომასწრებ!“

„ღმერთო დამიხსენ!“

~ ~ ~ ~ ~

უძონ მთა გადაიქროლა.

კოჯორი.

გელიყარის კლდე (აქ გადასჩეხა საჩინო ბარათაშვილმა
მოღალატე ყორღანაშვილი).

„მოღალატე! მოღალატე! მოღალატე!“

„გაი შენ, ქართველი ხალხის მოღალატე!“

~ ~ ~ ~ ~

აჰა, დიდგორის მთა!

აქ დიდმა დავითმა ჩახოცა და ჩახლიწა თურქნი!

ვאי მას, ვისაც დავით აღმაშენებლის სამამულიშვილო
გზაზე ფეხი დაუსხლტება!

„სწორედ ისეთი საქართველო მსურს, ვითარცა დავით აღ-
მაშენებლისა!“

დავით აღმაშენებელი

„ვאי დედასა, ერთი მის დროს ვყოფილიყავი — დავითის
შემწე, დავითის სპასალარი!.. და მაშინ გენახათ გიორგი საა-
კაძე!“

„ახლა დავითის სულს ვფიცულობ, მის აჩრდილს ვეაჯები
შველას და დახსნას!“

* * * * *

აჰ, გოსტიბე!

გამოჩნდა ნოსტე!

ღმერთო ძლიერო, მშვიდად წეგს ნოსტე!

მშვიდად, აუმღვრევლად, უდრტვინველად სძინავს სააკა-
ძის სახლეულს!

* * * * *

რიერაქი ჩამოდგა.

ვარსკვლავები შეადნენ ზეცას.

გიორგიმ ზედ ციხესიმაგრის კარზე მიაგდო ცხენი.

მიაგდო და დაიღრიალა რაღაც მხეცური გახელებით.

კარიბჭე განახენეს მეციხოვნეებმა.

სასახლეში შევარდა შეშლილი კაცი.

— ადექ, ცოლ-შვილო!

— გიორგი!

— მამა!

ქაიხოსრო მოიჭრა ელდანაძგერალი:

— რა მოხდა, ძმაო?!

— ნუ შეკითხვებით, აიყარენით! მივრბივართ ახლავ, ამ
წუთს... წამს!

— საით?!

— ტყისკენ, მთისკენ, ჯანდაბისკენ!

— ასე... უეცრად...

— უცებ... შიშველ-ტიტველნი!

— შიშველ-ტიტველნი!

— უუჰ, რა ღროს ეგ არის, — სიკვდილი კარზე მოგვ-
დგომია!

— სიკვდილი?!

× × × × × × × ×

უკვე ტყეში იყვნენ, როცა სულ გათენდა.

მზეც შემოაწვა აღმოსავლეთით ცისა და მიწის შესაყარსკ
ქართული მზე!

მაგრამ მზე იგი აღარ ანათებდა და აღარ ათბობდა სააკა-
ძის სახლეულისთვის.

თითქოს ხელისგულზე ხედავს გიორგი სააკაძე და მისი
ზარდაცემული ცოლ-შვილი:

ნოსტეს შემოესია მდევარი ლუარსაბ მეფისა.

შადიმან ბარათაშვილი მოუძღვის ჯარს ხმლის ქნევით და
სიტყვა-გაურჩეველი ყვირ-ყვილით.

ექვსმა კაცმა გამოასწრო სასახლიდან, რაღაც ფუთებით
და ყუთებით დატვირთულებმა. ესენი გიორგის ერთგულა
მსახურნი არიან.

ცხენებისკენ გაქანდნენ.

მიასწრეს.

აასწრეს.

გაასწრეს.

შადიმან ბარათაშვილი და ფარსადან ციციშვილი პირველ-
ნი შევარდნენ სასახლეში, სხვებიც მიჰყვნენ ღრიანცელით და
ყარყაშით.

გარეთ გამოყარეს სააკაძის ქონება და ავლადიდება, ყვე-
ლაფერი დაიტაცეს და დაილაფეს.

ჩირაღდანი აინთო ხელში შადიმანმა.

ჩირაღდნები აინთო ყველამ.

სასახლეს ესროლა ჩირაღდანი შადიმანმა, ესროლა ფარსა-
დან ციციშვილმა, ესროლა ბერუკა ჯავახიშვილმა, ესროლა
ქაიხოსრო ჯავახიშვილმა, ესროლა ზაალ აბაზაძემ.

ესროლა ყველამ.

ხანძარი მოედო სააკაძის სახლსა და კარს, ციხეს და დარ-
ბაზს, ყოველგვარ შრამელს, ყოველ ნაშენებს — დიდსა და
მცირეს.

სააკაძის ნაშრომ-ნადაგზე ავარდნაღმა ცეცხლმა სინათლე ჩაუქრო და ჩაუნავლა ახლად აღმოხდენილ მზეს.

• • • • •

— ვინ არიან, მამა, ასე რომ მოგვთხარეს და დაგვაქცი-
ეს, — სპარსელები თუ თურქები? — იკითხა პატამ.

— არც სპარსელები და არც თურქები.

— მაშ?!

— ქართველები არიან, შვილო.

— მერე, ქართველები ქართველებს მტრობენ?!

— ეჰ, შვილო ჩემო, არავენ ისე არ მტრობს ქართველებს,
როგორც... ქართველები!

— ?!

გაქცეული სააკაძე

იტირეს და გამოიტირეს სააკაძეებმა მშობლიური ნოსტი,
ბედდამწვარი აკვანი და მიწა-ნატერფალი.

გამოქცეულმა მსახურებმა მოატანეს, — ცხენებით, იარა-
ღით, გამოტაცებული ავლადიდებით.

სადღაცოდან პაპუნა ჩივაძე გამოძვრა. დარახტული ცხენა,
შუბი და აბჯარი მოჰგვარა გიორგის, თვითონ საომრად შე-
ჯავშნულმა და ამხედრებულმა.

-- აბა დავიძრათ! — ბრძანა გიორგიმ.

— საით?

— ახალციხისკენ.

გაეშურნენ.

ახალციხისკენ მიმავალი ყველა გზა ჩაკეტილი დახვდათ.

ახლა საით?!

საარავგოსკენ!

დიდი ნუგზარ ერისთავი შეიფარებს სიძე-ქალიშვილს და
შვილიშვილებს, მცირე დროით მაინც შეიფარებს, — სულს
მოთქმამდე და გონის მოკრებამდე, ხოლო შემდგომ... შემდ-
გომ ვნახოთ...

მემობრუნდნენ და ისევ დიდგორის მთას შეუდგნენ.
უსიერ ტყე-მალნარს მიჰყვებოდნენ, ფრთხილად, უჩქამურად, ნაქურდალი ნაბიჯებით.

კლდე-ნაპრალებსა და ქვა-ლოჯიან ბილიკებზე მიფორთხავდნენ ხელ-ფეხ დათეთქვილნი. გადაიშუადლა.

სოფელ კარსანს მიუახლოვდნენ.

ტყე მოისაფრეს და მცხეთას გადაადგნენ:

გამოჩნდა სვეტიცხოველი, სამთავრო, ჯვარი.

დაიმუხლისთავეს, ილოცეს, ცრემლი იპკურეს ჯვარნასახ მკერდზე.

პაატა დიდხანს ლოცულობდა, განმარტოებით ქვედაგრდომილი. მხოლოდ ცას და მიწას ესმოდა მისი იდუმალი ჩურჩული:

„ღმერთო ძლიერო, შენ ჩაუნერგე ქართველ კაცს სამარადეთმო სიყვარული ქართველი კაცის!“...

* * * * *

მტკვარი უნდა გადაევიდნენ ლტოლვილებს.

მდინარე წყალჭარბად ადიდებულიყო და მხოლოდ ხიდით შეიძლებოდა გადასვლა.

მაგრამ ხიდზე ყარაული იდგა, ლუარსაბ მეფისგან წარმოგზავნილი.

ერთი სიტყვით, ყველა გზა შეეკრათ სააკაძის მტრებს — საქართველოდან გასაქცევიც და საქართველოში „მიმოსაქცევიც“.

დაღამებას დაუცადეს:

გიორგიმ ხიდის დასაზვერაჲდ ჩაგზავნა ინაშვილი.

— სამოცი დარჩეული კაცი დგას ხიდზე, — ამოიტანა ამბავი ინაშვილმა, — არ სძინავთ, ფიზილობენ და იქაღნებიან კიდევ, უიქველად შევიპყრობთ სააკაძეს და მის ჯალაბსო.

გული აუღულდა გიორგის. ახლავე ჩავიჭრები, ყველას ამოვწყვიტავ, ხიდსაც ავიღებ და დახოცილთა იარაღსაც დავინადავლებო.

მაგრამ ხმალი არ დაანებეს თანალტოლვილებმა გიორგის, — სანამ ამოვწყვეტდეთ, მანამ გუშაგები ყვირილს ატყენენ, ქვეყანას შეყრიან და იქნებ ხიდის აყრაც დაგვასწრონო.

— ისედაც, დახოცვას რას ვემართლებით იმ უბედურებს,

რა ჰქნან, მეფის ბრძანება აქეთ და რა უნდა გააწყონ, — თქვა ზაპუნა ჩივაძემ.

ქაიხოსრომაც არ მოიწონა გუშაგთა დახოცვის განზრახვა.

მაშინ, ცურვით უნდა გადავლახოთ მტკვარიო, ბრძანა გიორგიმ.

„შულამისას, პირველ მამლისყვილზე დაეშვნენ მდინარე-საკენ. ხიდის ქვემოთ შესცურეს წყალში. ქალები და ბავშვები შუაზე მოექციათ და ისე მიაპობდნენ ყრუ ბუბუნით მოქდტოლვარე ტალღებს.

უვნებლად და უჩინრად გავიდნენ, „საქართველოს მფარველი ღვთისმშობლის შეწევნით“.

სვეტიცხოველს მიეპარნენ.

დაკეტილ კარიბჭესთან ილოცეს გულმხურვალედ.

— ღვთისმშობელო სახიერო, შენ გააღვივე და განამტკიცე სიყვარული ქართველთა შორის! — ჩურჩულებდა პატარა ბიჭი.

სვეტიცხოვლის კარიბჭესთან ოქროს თასი დატოვეს და არაგვის ხეობას აუყვნენ.

ბებრისციხე და ნატახტარი აიარეს.

მისაქციელთან ნუგზარ ერისთავი შემოეგებათ და დუშეთისკენ წაუძღვა ლტოლვილებს.

დასხდნენ სიძე და სიმამრი, ჯავრი დაინელეს და დიდხანს ითათბირეს.

ნუგზარმა თავი გამოიძღო, — იცოდე, შენი ჭირის თანახმად ვარ სიკვდილამდეო; ჩემთან დარჩები — მტერს ერთად დავხვედებით, წახვალ და — მეც შენთან წამოვალ საჭიროდ და სალხინოდ.

გიორგიმ უარი თქვა საარაგვოში დარჩენაზე, რომ დავრჩე, სანამ უნდა ვიდგე შენს კარზეო, ან აქედან როგორ დავითმინო ჩემი სახლკარის უნახაობა, უპატრონობა და უპატიურობაო!

მაშ, რას აპირებო, ჰკითხა ნუგზარმა.

ერანში უნდა წავიდეო, თქვა გიორგიმ და სიტყვას გულიც ამოაყოლა.

— ერანში?!

— ჰო, შაჰ აბასს უნდა ვეახლო!

— შაჰ აბასი?!
— სწორედ!

— მერე?

— მერე ის, რომ...

— იქიდან გავუსწორდები ჩემს მტრებს!

— შენს მტრებს აქედანაც გავუსწორდებით, გიორგი — აგერ, შიდა ქართლიდანაც შენიანები მოგვეშველებიან, მუხრან-ბატონი და ქსნის ერისთავიც ხომ ჩვენი მოყვრები არიან...

— არა, არა, — გააწყვეტინა სააკაძემ, — ძმათაშორისი ომის მიზეზი ვერ შევიქნები. უეჭველად უნდა წავიდე სპარსეთს!

ნუგზარი გაჩუმდა. მან იცოდა: სააკაძე რომ იტყოდა, მამა-ზეციერიც ველარ შეაცვლევინებდა განაზრახს.

მერე თვითონ ნუგზარს შეუჩნდა გიორგი, — ადექ და შენც ჩემთან ერთად წამოდიო სპარსეთს.

კარგა ხანს იფიქრა ნუგზარმა. ბოლოს ადგა და გადაწყვეტით თქვა...

— კარგი, წამოვალ. მეც მინდა შევხვდე ერანის ლომს, ეს არის და ეს. ღმერთმან იცოდეს, არავითარ საენებელს არ ვუმზადებ არც მეფეს და არც საქართველოს!

გადაწყდა: გიორგი სააკაძე და ნუგზარ ერისთავი მიდიან სპარსეთს, შაჰ აბასის კარზე!

გიორგი მაინც ვერ ენდო ღუშეთში ჯალაბის დატოვებას, — ვაი თუ ჩემს წასულობაში ლუარსაბმა საარაგვო დააწიოკოსო. ამიტომ დედა იმერეთს გაგზავნა, ხოლო ცოლ-შვილი აიყოლია და სიმამრის, ძმისა და ერთგულ მსახურთა თანხლებით სამხრეთისაკენ გაუტია.

ღამით გაიარეს საგურამო, ლილო, ლოქინი, გადალანგნ მტკვარი და იაღლუჯასთან გასულეებს დაათენდათ.

აქ მდევარი გადაუდგა წინ დევნილებს, იარაღმომარჯვებული.

— რა გნებავს?! — ჰკითხა სააკაძემ.

— შენი შეპყრობა!.. — უტიფრად მიამახა იმ კაცმა.

— რა გვარის კაცი ხარ?

— კოლოტაური.

— ვისი კაცი ხარ?

— მუხრან-ბატონისა.

— მერე, მუხრან-ბატონი რომ ჩემი მოყვარე და მოკეთე გახლავს, შენ რაღად მემტერები, კოლოტაურო?

— მე ეგ არ ვიცი, ვერ გაგიშვებ, უნდა მობრუნდე და წამომყვე მორჩა და გათავდა!

გიორგის გაუკვირდა ამ კაცის თავხედობაც და გაბედულეობაც. ცხენი შემოაბრუნა და შუბი გამართა.

კოლოტაურმაც გაწვართა შუბი და გააქენა ცხენი.

დინჯად დაიძრა გიორგი. მოვარდნილ კოლოტაურს შუბზე შუბი აუკრა, იარაღი დაადგებინა და უიარაღოს შეტრიალებული შუბი ტარით აძგერა მკერდში.

კოლოტაური მიწაზე ისე მძიმედ დაენარცხა, რომ ორივე მხარეს ნეკნები ჩაელეწა და ჩაეხლიწა.

— ღმერთს მადლობა შესწირე, სასიკვდილოდ რომ ვერ გაგიმეტე ქართველი კაცი. ამაღამ აქ ეგდე და დილაზე მოსულიერდები, ალბათ! — მიაძახა გიორგიმ და გზა განაგრძო. აღჯაყალას მივიდნენ.

დიდის ამბით შემოეგებათ აქ მდგარი სპარსული ციხიონის მეთაური.

ორი კვირა სანადიმო სუფრა არ აუღლიათ „ორი დიდი გურჯის“ მოსვლით გახარებულ ყიზილბაშებს.

გიორგი სააკაძემ ცოლ-შვილი აღჯაყალას დატოვა და თვითონ ნუგზარ ერისთავთან, ძმასთან და მსახურეულ ამაღასთან ერთად ისტაჰანის გზას გაუდგა.

— ხომ მალე დაბრუნდები, მამა? — ჰკითხა პაატამ გამგზავრების წინ.

— ჰო, შეილო... მალე...

ერანის ცხელ მიწაზე მიაბიჯებდა სააკაძე.

ერთ გვამ-სხეულში ორი გიორგი გლეჯდა ერთმანეთს:

„რას სჩადიხარ, ცუდმუდო კაციო, მართლა გარბიხარ საქართველოდან?!“

„გამაქციეს და გავრბივარ“.

„ეგ სულ ერთია, გაგაქციეს თუ შენით გარბიხარ. მაინც გაქციევა ჰქვია, ხოლო სამშობლოდან გაქციევა არის ღალატი სამშობლოსა“.

„მე მალე დავბრუნდები“.

„მაგრამ მანამდე ხომ მოლაღატე გქვია!“

„ქართველი გლეხი მაპატიებს, როცა ჩვენს საერთო დამაქცევარ თავადობას გავუსწორდები!“

„რა ძალა შეგწევს გაუსწორდე ჩვენს თავადობას?“

„შაპ აბასი მომცემს მხედრობას“.

„მერე, უცხო ქვეყნიდან მოყვანილი ჯარით თავადს ისე როგორ გაუსწორდები, გლეხს რომ სისხლი არ დაანთხევიან?!“

„ვნახავ... შევძლებ... მოვახერხებ...“

„დაბრუნდი-მეთქი, სანამ გვიან არ შექნილა, შე უბედურო!“

„მალე დავბრუნდები“.

მიდიოდა სააკაძე. უცხო მიწა უწვავდა ფეხებს — კაცსაც და ცხენსაც.

მიინც მიდიოდა, რამეთუ სატანა აჯდა საყნიან ბეჭზე.

* * * * *

„ნუ გათათრდები! ნუ გათათრდები! ნუ გათათრდები!“ — იძახდა ჩიტი გაკაპასებით.

სააკაძეს ხან ესმოდა მისი ძახილი, ხან არ ესმოდა.

გათათრებულნი საბაბაძე

დიდი ზეიმი ჰქონდა შაპ აბასს.

ბოლოს და ბოლოს, „მისი შექნილიყო“ გიორგი სააკაძე! ქართველებმა ყველაზე ღირსეული ხმალი თავისი ხელით გადაუგდეს საქართველოს ყველაზე დიდ მოხისხარს!

ახლა თვითონ დარწმუნდება თანამემამულეთაგან მოთხროლი, განდევნილი და დამცირებული გიორგი სააკაძე, რომ „დადი ქართველების“ ფასი სპარსეთში უფრო იციან, ვიდრე თვითონ საქართველოში.

აბა, შევუდგეთ, გიორგი სააკაძე!

დღეიდან შენ დგახარ ერანის შაჰის სამსახურში.

თანახმაა გიორგი სააკაძე, მხოლოდ თვითონაც აქვს შაპ-
თან სათხოვარი!

რა სათხოვარი?!

დახმარება სურს ქართლის თავგასული თავადების დასას-
ჯელად.

თანახმაა დიდი შაპ აბასი. მაგრამ ახლავე მაჰმადიანობა
მიიღოს და წინა დაიცვითოს გიორგიმ!

არა, არა...-ახლავე არა!..

მაგრამ იმ დღეს კიდევ ახალი ამბავი მოვიდა საქართვე-
ლოდან: გიორგი სააკაძის მამულები და ავლადიდება მის მო-
სისხლეებს გაუნაწილებიათ — შადიმან ბარათაშვილს, ფარ-
სადან ციციშვილს, ბერუჯა ჯავახიშვილს, ქაიხოსრო ჯავახიშ-
ვილს, ზაალ აბაზაძეს.

ლუარსაბ მეფე გაჰყრია ცოლსაც — გიორგი სააკაძის დას.
გაჰყრია და, ლევან დადიანის დის შერთვას აპირებსო...

„ჰა, რას იტყვი, გიორგი სააკაძე, როდის აპირებ წინდა-
ცვეთას და ისლამის სჯულზე მონათვლას?“

„დღესვე, ახლავე!“ — დაიღმუნლა გიორგიმ.

მაშ, ასე: არის 1612 წელი.

გიორგი სააკაძე არის 32 წლისა.

და არის გათათრებული.

ნუგზარ ერისთავი შაჰმა უხვად დააჯილდოვა და ისე გა-
მოისტუმრა საქართველოში.

ლუარსაბ მეფისათვის საგანგებო ძღვენი და წყალობის სი-
გელიც გამოატანა შაჰმა არაგვის ერისთავს.

გველის გორგალი აეშალა გულზე სააკაძეს.

რაო?! რას ნიშნავს ეს? შაპ აბასი სააკაძეს სულში იძვ-
რენს, მაგრამ იგი სააკაძის მტრებსაც „იძვრენს სულში“!..

დიღხანს ითათბირეს სიძემ და სიმამრმა.

— კიდევ რას დამაბარებ, გიორგი? — ჰკითხა ნუგზარმა
გამომშვიდობების წინ.

— როცა მიხვალ, ჩემს მაგივრად ემთხვეი ქართულ მი-
წას! — და ცრემლმა უყელა სააკაძეს...

ნუგზარი წავიდა.

მარტო დარჩა გიორგი.

მაგრამ მარტო რად არის?!

ქართველებით ავსებულა ერანის სატახტო.

შაჰინშაჰის ტახტის შემდგომ, სპარსეთში, „როგორც წესი“, ქართველებს უჭირავთ ყველანაირი უმადლესი „ტახტები“ — მთავარსარდლისა, სარდლებისა, ყულარადასებისა, ბეგლარბეგებისა, დივანბეგებისა, ყორჩიბაშებისა, საერთოდ ყოველი „ბეგებისა“, „ბაშებისა“ და „ხანებისა“.

ქართული ენა ისმის ყველგან — ქუჩაში, ბაზარში, დუქანში, მეჩეთში, სამხედრო ბანაკში და შაჰის სასახლეში.

თვითონ შაჰი „ქართველობს“, ქართულად ლაპარაკობს, ქართულად დარდიმანდობს, ქართულად „ქველობს“, ქართულად „მძვინვარებს“.

შაჰის ჰარამხანაც ქართულად ლაპარაკობს.

შაჰის ნაშიერი „მირზებიც“ ქართულად იდგამენ ენას.

მრავალ ცოლთაგან ოთხი ამორჩეული ცოლი ჰყავს შაჰ აბასს, ოთხი დედოფალი — ოთხივე ქართველი ქალი:

თ ა მ ა რ ი — ანდუყაფარ ამილახორის დაი,

დ ა რ ე ჯ ა ნ ი — სვიმონ-ხანის დაი (აქ ფახრიმჯან ბეგუმი დაურქმევიათ),

ე ლ ე ნ ე — თეიმურაზ მეფის დაი,

ლ ე ლ ა (თინათინი) — ლუარსაბ მეფის დაი (აქ ფათმა სულთან ბეგუმი დაურქმევიათ).

ამ ოთხი ქალის სიბრძნისა სჯერა საერთოდ ქალთა კეთუანების სრულფასოვნებაში დაეჭვებულ შაჰ აბასს.

შაჰს თამარ ამილახორისაგან ჰყავს უსაყვარლესი უფლისწული ს ე ფ ი-მ ი რ ზ ა, მამაცი და პირმშვენიერი მემკვიდრე ერანის ტახტისა.

ქართველობაა „მთავარი ძარღვი“ სრულიად ერანის მხედრობისა. ოცდაათი ათასი ქართველი შაჰისეგანი და ღულამი დგას შაჰ აბასის საომარი დროშების ქვეშ.

„უკვდავთა გვარდია“ — ღულამთა ჯარი — არის იგივე ქართული ჯარი.

ქართველები უდგანან „მარჯვენა ხელად“ ერანის ლომს.

აქ არიან ბაგრატი და ხოსრო ბაგრატიონები.

აქ არის როსტომ სააკაძე.

აი, ბებუთ-ხანი, საქართველოდან წაყვანილი და გაათათრებული ბებუთაშვილი, ქართველი თუ სომეხი? სულ ერთია, მაინც ჩვენებური...

აჰა, უნდილაძენი!

მაგრამ რად იმზირება ამრეზილად დიდი ალავერდი-ხან უნდილაძე?!

იქნებ იმიტომ, რომ დღეს სანადიმო სუფრასთან შაჰი სააკაძესთან იდუმალი ჩურჩულ-კურკურითა და სიცილ-კისკისით იყო გართული, ხოლო უნდილაძე... უნდილაძე ერთხელაც არ გახსენებია შაჰს.

აღბათ, გრძნობდა ახოვანი უნდილაძე: უფრო ტანსრული სააკაძის ჩრდილი ნთქავდა შაჰ აბასისკენ მიმავალ თვალსარბიელს...

გიორგიმ ცოლ-შვილი აღჯაყალიდან ისფაჰანში გადაიყვანა.

— მამა, ჩვენც გაგვათათრებენ?! — იკითხა პაატამ.

— ვერავინაც ვერ გაგვათათრებს. ქართველებად და ქრისტიანებად ჩაეაღოთ მიწაში!

— რომელ მიწაში, მამა?

— ქართულ მიწაში, შვილო...

„მაინც ჩემის თვალით უნდა შევაჯერო სააკაძის ძალღონე და ილაითიანობაო“, იფიქრა შაჰ აბასმა და სამჯერ „ჩაუტარა გამოცდა“ საქართველოს საარაკო გმირს.

ერთხელ, სუფრასთან მჯდარმა, შექეიფიანებულმა შაჰმა გიორგის უთხრა: მუდამ წარბშეყრილი რომ ხარ, არ მომწონხარ და ძალიან უნდა გაგახარო, იქნებ წარბი გაგახსნევიო. თქვა და ნიშანი მისცა.

რვა მსახურმა რვა ტომარა ვერცხლის ფული შემოიტანა და წელში გადრეკილებმა შაჰის ფეხებთან დაალაგეს.

უთხრა შაჰ აბასმა გიორგი სააკაძეს: თუ ამ ტომრებს ერეო აღებაზე აიღებ და კარებამდე მიიტან, ვერცხლიც შენი იყოს და ნამდვილი ვაჟკაციც შენ-გერქვასო.

გიორგი ერთხანს შეყოყმანდა: ცოტა ავიღო, უღონობან დამწამებენ, მთლიანად ავიტაცო და სიხარბეს დამაბრალებენო.

მერე უცებ გადაწყვიტა: ისევ შირჩევნია სიხარბე მიძრა-
ხონ, ვიდრე აქაურებს უძლური და ბეჩარა ვეგონო.

მივარდა ტომრებს. ერთი თავზე შეიგდო, სათითაოდ
მხრებზეც დაიდო, იღლიებშიც ამოიჩარა აქეთ-იქით ხელებ-
შიც დაიჭირა, ერთიც კბილებით დაითრია და ასე, ყველა ტო-
მარა სადარბაზოს კარებამდე მიარბენინა.

შაჰი აღტაცებაში მოვიდა და პირობისამებრ ტვირთი
მტვირთველს მიუბოძა.

ქართველები ამრეზილი იმზირებოდნენ: არ მოეწონათ,
მათი სახელოვანი თანამემამულე წელში ოდრიკალად მოკე-
ცილი რომ მიადუნძულებდა ფულით სავსე ტომრებს.

უნდლიაძე იღიმებოდა: სააკაძემ თავი შეირცხვინაო, —
ფიქრობდა ქართველი, ქართველის „წახდენით“ გახარე-
ბული...

მეორედ შაჰმა ჭიდაობა გამართა ისფაჰანის მთავარ მოე-
დანზე. ერთი ფალავანი გამოაყვანინა, სპარსელი გოლიათი,
აქამდე რომ მხრებით არასდროს არ შეჭებია საჭიდაო ხალი-
ჩას.

გამოვიდა ის სპარსელი მოჭიდავე და ქართველები ამოი-
ლო მიზანში.

დარჩეული ქართველი მოჭიდავენი გავიდნენ არხეინად და
გულსრულად. გავიდნენ და მარცხის მეტს ვერაფერს გამოჩ-
ნენ.

ცინ გვამს არყევდა აღტაცებული სპარსელების ბღავილი
და ქღავილი.

დააბიჯებდა გოლიათი საჭიდაო მინდორზე კანდიერი მი-
მონხვრით და უტიფარი, ლიზლი იერით.

შაჰმა და ფალავანმა ერთდროულად დაასვეს თვალი საა-
კაძეს.

გიორგიმ საჭიდაო ჩოხა გადაიცვა და მოედნისაკენ დაიძრა
დინჯად.

სუნთქვა ჩაიქრო მიღეთ-მიღეთად ჩაჭედნილმა ხალხმა სა-
ამური სახილველის მოლოდინში.

ერთმანეთს დაეტაკა ორი მთაკაცი — ქართველი და სპარ-
სელი.

უცებისად დაიხელთავა გიორგიმ მეტოქე, მიწას მოჰგლიჯა და ზეაიტაცა, ვითარცა ჰერაკლემ ანთეოსი.

მოიქნია და მიწას დაანარცხა.

ლამის ზეცა ჩამოექცა დედამიწას ხალხის ბლავილისგან. უგრძნობლად და უსულოდ ეგდო შაჰის ფალავანი საქი-დაო ფორზე.

აღტაცებული თქართქარებდნენ ქართველები.

უნდილაძეც იღიმებოდა („ქართულ სისხლს უხაროდა“).

ხოლო შაჰ აბასს სააკაძე ჩაებლუჯა და გაოცებული უსინ-ჯავდა მკერდსა და მხარ-მკლავს.

გამოხდა მცირე ეამი.

შაჰ აბასმა ჰკითხა სააკაძეს:

— რას იტყვი, გიორგი, ყველაზე უფრო რომელი იარაღი გამოადგება გაჭირვებაში ჩავარდნილ კაცს?

— სულ ერთია, — ყველაფერი იარაღი გახლავთ, რაც კი იმეამად ხელში მოგხვდებათ, — უმაღვე მიუგო გიორგიმ.

კიდევ განვლო მცირე დრომ. ეს საუბარი გიორგისაც და-ვიწყდა და შაჰმაც „დაივიწყა“.

საკაძე ბაღში სეირნობდა მარტოდმარტო, დაღვრემილი, რაღაც მძიმე საფიქრალით დამძიმებულთ.

წელზე პატარა ხანჯალი ეტყა, საქართველოდან წამოყო-ლილი. სხვა საქურველი არ ჰქონია სასეირნოდ გამოსულს.

ორი მშვიერი ღომი შემოიჭრა ბაღში ანახდაითად.

პირდაღებულნი მისცვივდნენ გიორგის გააღმასებით.

წამიც და... გიორგის მარჯვენა ხელში შიშველი ხანჯალი ეჭირა, მარცხენაში — ქული.

მარცხენა მხრიდან მოიერიშე ნადირს ქული ჩასჩარა პირ-ში და იმავე წამში მარჯვნიდან მოვარდნილს ხანჯალი სასიკვ-დილოდ აძგერა ყელში.

კიდევ წამიც და მეორე ღომსაც, სანამ იგი ქულს პირიდან გამოიგდებდა, შეუშუსრა ყელი ხანჯლის მეორე გაღვებით.

დინჯად მოითავა გიორგიმ „ეს საქმე“. არხეინად შეახოცა სისხლიანი ხანჯალი ღომის ფაფარს და ისევ განაგრძო ბოლ-თის ცემა მძიმე ფიქრებს თავმიცემულმა.

გიორგის არც უფიქრია, რომ ეს საშინელი „სახილველი“ შაჰის ბრძანებით დატრიალებული „გამოცდა“ იყო.

არც ის იცოდა სააკაძემ, რომ იქვე მახლობლად სახლში ჩასაფრებული შაჰი თავიდან ბოლომდე ხედავდა ყველაფერს. გოცებისგან ლამის ჭკუაზე შემლილიყო „ლომი“ — მხილველი ლომთა შემმუსვრელი სააკაძისა.

ელვასავით გაიჭრა ამბავი საქართველოდან გადმოხვეწილი კაცის საოცარი გმირობისა.

1612 წლის სექტემბრის დამლევს სტამბოლში ისევ მიუჭდნენ საზავო მაგიდას სპარსეთისა და თურქეთის დიპლომატები.

სამშვიდობო მოლაპარაკების მთავარი გმირი იყო ისევ ქართველი დიპლომატი ქალი გულჩარა, რომელმაც „მთელი კონსტანტინოპოლი განაცვიფრა თავისი ჭკუით, სილამაზით, ბრწყინვალეობით და მქვერმეტყველებით“.

გულჩარამ საოცრად ძლიერი სიტყვით ჩააჩუმა ოზბეგი ელჩები, რომლებიც ხონთქარს ერანთან ომის გასაგრძელებლად აქეზებდნენ.

ზავი დაიდო.

მეტოქეებმა მახვილები ქარქაშებში სანახევროდ ჩააგეს.

აღდგენილ იქნა 1555 წლის ამასიის ზავის პირობები: ქართლი, კახეთი, შირვანი და სომხეთი ერანის შაჰის „საკუთრებად“ გამოცხადდა. დასავლეთ საქართველო და მესხეთი, ახალციხის მითვლით, თურქეთის „ქონებად“ დარჩა.

ისევ გაიყვეს „ცოცხალი დათვი“ სპარსელებმა და ოსმალებმა.

პიეტრო დელა ვალე რომის პაპს — ურბანუს მერვეს:

„უნეტარესო მამაო!

რაც შეეხება საერო ცხოვრებას, საქართველო თითქმის ჩვენს დრომდე არის იმ მდგომარეობაში, რომელზედაც ზემოთ ვლაპარაკობდი. რომ საქართველოს ამ მდგომარეობაში თავი შეუუნახავს, ესეც დიდად საკვირველია, და ამის მთავარი მიზეზი არის ქართველთა გასაოცარი მამაცობა. რიცხვით ქართველობა ძალიან მცირეა და ამასთანავე დაყოფილიც რამდენიმე მოთავეს შორის, რომელნიც, იმის მაგიერ რომ ერთად ეომონ მტერს, ხშირად ერთმანეთს ებრძვიან. გარდა ამისა,

ქართველებს არა აქვსთ არავეითარი არტილერია, თოფებსაც ცოტად ჰხმარობენ, ან თითქმის სრულებით არ ჰხმარობენ. ამდენ ნაკლულევანებასთან, ვამბობ მე, ქართველებმა მაინც დაიცვეს თავისი სჯული, თუმც ყოველის მხრით გარს შემორტყმულნი არიან ურჯულოებით და მტრებით. ყველაზედ უფრო შესანიშნავი ის არის, რომ ისინი მარტოდმარტო არიან ორ უძლიერესთა — სპარსეთისა და თურქეთის იმპერიათა შუა, და არსაითგან არავეითარ შემწეობას არ ელიან. როგორც სპარსელებს, ისე თურქებს მუდამ მათი გაქრობისა და დამხობის განზრახვა აქვთ, უფრო მათი სჯულის სიძულვილის გამო, ვიდრე სხვა რამ მიზეზით. ამიტომაც მე მგონია, რომ ქართველები არამც თუ ღირსნი არიან ქებისა, არამედ მთელი საქრისტიანო დავალებულია მათგან იმ სათნოებით და იმ მხნეობით, რომელიც მათ მრავალჯერ გამოიჩინეს ომებში და რომლის შემწეობით მათ არაერთხელ დაამარცხეს და უკუაქციეს უთვალავი ჯარები — ხან სპარსელებისა და ხან თურქებისა. უფრო სამძიმო ის არის, რომ ასეთი სიმტკიცის შემწეობით იგინი მუდამ იცავდნენ და ფარავდნენ ქრისტეს სარწმუნოებას. სიტყვა რომ არ გამიგრძელდეს, ამის მაგალითებს აღარ მოვიყვან. ამ ჩვენს საუკუნეში კი, რომელისაჲ მათის ცოდვის გამო, თუ ღვთის სამართლიანი განგებით, ქართველები დიდად შევიწროებულნი შეიქნენ. უფრო შინაურ განხეთქილების გამო, ვიდრე სხვა რამე მიზეზით, იმათ ძალას ბევრი მოაკლდა, თუმცა არა მცირედი ძალა კიდევ შემორჩათ...“.

„დაიღწა ზონიზის სარკა“

შაჰ აბასს ქართლ-კახეთის წასახრჩობად ორივე ხელი თავისუფალი ჰქონდა.

1612 წლის მიწურულს, ზამთრის დამდეგს, იგი მაზანდარანს ჩამოვიდა და საქართველოში თავისი კარისკაცი — ამირყული ჯილვადარი გამოგზავნა.

ჯილვადარი ჯერ გრემს ეახლა, მერე ტფილისს და ორივე

მეფეს მოახსენა: თქვენ შაჰინშაჰისთვის აღრე გითხოვნიათ, როცა სანადიროდ წასვლას ინებებთ, ჩვენც გაგვაბედნიერეთ თქვენთან მიწვევითა და ნადირობითო; ახლა შაჰ აბასი მაზანდარანს ბრძანდება, ქართველებთან ნადირობა სწადია, თქვენი თხოვნაც განუშორებლად გულზე ახატია და ახლა მოუთმენლად ელოდება თქვენს ჩასვლასო.

შუბლში ხელი იტაკეს ლუარსაბმა და თეიმურაზმა, — რა გვრჯიდა, სანადირო წვევას რომ ვეხვეწებოდით ჩვენს „მოსისხლე მოყვარესო“. მაგრამ მაინც რა ბედენა იყო, — შაჰ აბასი მათი თხოვნის გარეშეც როგორმე სხვა საბაბსაც გამონახავდა ქართველი მეფეების საწვევად და „საალერსოდ“.

ასე იყო თუ ისე, ლუარსაბმა და თეიმურაზმა საშიშროება იგრძნეს და შაჰის მიწვევაზე არ წავიდნენ. ის კი არა და, თვითონ შაჰის მოციქული, ამირ-ყული ჭილვადარიც არ გაუშვეს დროზე საქართველოდან, — „დიდის სიყვარულითა“ და ბატივისცემით გაბრუებულ მოციქულს მთელი ზამთარი დაატარებდნენ ქართლსა და კახეთს შორის.

ახალი, 1613 წელი დადგა. ზამთარიც ჩათავდა, ნადირობის უამიჯ მიიწურა და შაჰ აბასსაც ქართველი „მოყვარების“ ამოლოდინში გული გადაეწურა.

საბოლოოდ გაირკვა ყოველივე:

ქართველი მეფეები ერანის მორჩილებაზე უარს ამბობენ ქართველებს, რუსეთისაკენ უჭირავთ თვალი!

თურმე თეიმურაზის უახლოესი კარისკაცი, თავადი შერ-მაზან ჩოლოყაშვილი მოთავეობს ერანის წინააღმდეგ საომარ სამზადისს.

ჩოლოყაშვილს წაუჭეზებია თეიმურაზი და ლუარსაბი: ნულარ აყოვნებთ, შეკავშირდით და შეერთდით, სანამ სპარსელები კარს მოგვდგომიანო.

მართლაც, თეიმურაზი სწვევია ლუარსაბს ტფილისში. დიდის ზარზემით შეხვედრიან ქართლები კახეთის მეფეს: დამჯდარან ახალგაზრდა გვირგვინოსნები და ფიცით შეჰკვრიან ერთმანეთს: ამიერიდან ვიყოთ ერთიანნი, ერთსულოვანნი და ერთაზროვანნი სამშობლო საქართველოსათვის ბრძოლაშიო!

ეს ამბები „მეტად დაუძმძმდა მის უწმინდესობა შაჰს“.

ისე გაცოფდა და გავეშდა, რომ „სულ დაილეწა მისი ნათელი გონების სარკე“.

მაშ, აგრე! შესხდნენ ხომ ქართველი მეფენი „უმეტრებისა და კადნიერების ცხენებზე“! მაშ, „ბედისწერას ლოყაში სილა არ გაურტყამს“ მაგ ლაწირაკებისთვის! მაშ, „ცხოვრების მასწავლებელს მათთვის ჯერ ყურები არ დაუგლეჯია!“...

მაზანდარანიდან ისტაჰანს დაბრუნდა ბალანაშლილი შაჰ აბასი.

საქართველოში „საღვთო ომი“ და საქართველოს „საბოლოო მოთხრა“ ჩაესახლებინა გულსა და გონებაში, სისხლსა და ძვალხორცში.

ალავერდი-ხან უნდილაძე იხმო. ჩაიკეტა და ეთათბირა.

სახელაღწილი გამოვიდა და წავიდა უნდილაძე.

ახლა გიორგი სააკაძე იხმო შაჰმა. ჩაიკეტა და ეთათბირა.

სახელაწყნარებული გამოვიდა სააკაძე.

ზაფხულში განზრახული „საღვთო ომი“ საზამთროდ გადასწია შაჰ აბასმა.

უნდილაძის „მოკიდებულნი“ ამბობდნენ: გიორგი სააკაძემ გაუხედნა ყური შაჰს, ზაფხულს წასვლა არ ვარგაო საქართველოში საომრად, რადგან მოსახლეობა მთაში ადვილად იხიზნება და იქიდან ახალ ომს ამზადებსო; ამიტომ ზამთარში სჯობიაო საქართველოში შექრა, რამეთუ ხალხი ვერც ფოთოლგაცვენილ ტყეში დაიმალება, ვერც თოვლსა და ყინვაში გაასწრებს მთას, ხოლო თუ მაინც შეძლებს, სულ ერთია — ყინვა და ნეფხვი ამოკლიტავსო.

„მაგნიარ ვერაგობას გიორგი სააკაძე საქართველოს დასამხობად არასგზით არ ჩააგონებდაო შაჰს“, — იძახდნენ სააკაძის „მოკიდებულნი“.

ასე იყო თუ ისე, საქართველოს მოსათბრელი და ამოსადგები „საღვთო ომი“ შაჰ აბასმა მაინცდამაინც ზამთარში დანიშნა.

და მაინცდამაინც მაშინ მოკვდა ალავერდი-ხან უნდილაძეც.

ამ ქვიციანიან წასულყოფო ალავერდი-ხან უნდილაძე, ტომით ქართველი, ბედუყუღმართობით უსამშობლოო-„თათარი“, ნიჭით და სიქველით ერანის კარზე „ვიცე-კოროლად“

აღზევებული; დიდი რეფორმატორი, უპირველესი სარდალ-ზორავარი, დაუცხრომელი „კულტურტრეგერი“, ოფლშეუმში რალი აღმშენებელი; კაცი, რომელსაც მისთვის დაკარგული სამშობლო-საქართველოს საზიანოდ — საქართველოს სამტრო-საბუდარში მჯდომს — არასოდეს თითიც არ გაუნძრევია; კაცი, რომელზეც თვითონ შაჰ აბასი ამბობდა ხშირად: მე, ერანის მბრძანებელი, ამ ქვეყანაზე მხოლოდ ალლაჰს და უნ-დილაძეს ვემორჩილებიო.

მომკვდარიყო დიდი ქართველი კაცი, დაულაღვი შემოქმედი და შემქმნელი „უცხო თესლის ისტორიისა...“.

ავმა ელდამ დაურბინა ისფაჰანის სასახლეს, სრულიად ერანს.

„საქართველოში ლაშქრობას აღუდგაო წინ უნდილაძე, და ამიტომ შაჰმა...“, — სათქმელს აღარ ათავებდნენ „დიდი გურჯის“ მოულოდნელი სიკვდილით დაზაფრულნი.

თვითონ შაჰი ამას ბრძანებდა „მწარე სინანულით“:

„დიდი კაცი იყო ალავერდი-ხან უნდილაძე, დიდი საქმენა განასრულა სულკურთხეულმა; ყოველივე შეეძლო მის დიდ გონებას და ძლიერ ხელებს, მაგრამ სიკვდილიც განა კაცთა ხელშია?!“

ბოლოს ეს დასძინა შაჰმა: ალავერდი-ხან უნდილაძე არც კი მომკვდარა, რადგან მისი შვილები და ნაგრამ-მონაგარი ნაგრამობს სიცოცხლესო.

სთქვა და იმ დღესვე ალავერდი-ხანის დაცლილი თანამდებობანი (რომელთაც ხარბი თვალით უცქერდა მრავალი კარისკაცი) მის შვილს იმამ-ყული-ხან უნდილაძეს გადაულოცა — ფარსის, შირაზისა და თავრიზის ბეგლარბეგობა.

(ესეც მოსწონდა შაჰ აბასს, რომ იმამ-ყული-ხან უნდილაძეს მაშინდელ ევროპაში „სამხრეთ ერანის ვიცე-კოროლს“ ეძახდნენ).

ალავერდი-ხან უნდილაძის დაკრძალვის დღეს სულისსუთვა აუტყდა შაჰ აბასს.

ისფაჰანში ძალიან ჩამოცხაო, მოიმიზეზა და მაშინვე ფერეიდანის იალაღებზე გაქუსლა „სულისმოსაბრუნებლად“.

რამდენიმე დღე გაატარა ფერეიდანში და დიდის გულს ყურით მოიხილა იქაურობა.

„აქაურ მიწას გამრჯე ქართველი მიწისმუშა მოუხდება და დაშვენდება“, თქვა და გამობრუნდა...

ზამთარი მოახლოვდა.

შაჰმა ლაშქრობა ბრძანა.

საომარი საქურველი აესხა გიორგი სააკაძეს და „მარჯვენა მხარეს“ დასდგომოდა საქართველოში სალაშქროდ ამხედრებულ შაჰ აბასს.

იმამ-ყული-ხან უნდილაძე გამოიძახა შაჰმა, ცივი თვალეზით ჩააცივდა, ცივად უთხრა: თუ მამაზე მგლოვიარობა ხელს არ გიშლის, შენც წამყევი საქართველოშიო.

უფრო სხვა რამ მიშლის ხელსო, ცივადვე მიუგო „ვიცეკოროლმა“.

— ალბათ, ქართველ თვისტომთა უზომო სიყვარული, არა?! — უცებ შეაფრქვია უნდილაძეს და გამომცდელად ჩააშტერდა თვალებში.

— თქვენს ბრწყინვალეობას არანაკლებ უყვარს ქართველები, — მშვიდი ურყევლობით უპასუხა უნდილაძემ.

შაჰი შეცბა: „ნეტავ დამცინის, თუ გულწრფელად სჯერა უნდილაძეს ჩემი სიყვარული ქართველებისადმი?!“.

— მაშ, ქართველთა სიყვარული გიშლის ხელს, არა? — ისევ ჰკითხა ფიქრიანად აბასმა.

— არა, ხელმწიფეო, უფრო თქვენგანვე ნაბრძანებ საქმიანთა გამო ვერ გეახლებით... ისედაც, ერთგული ადამიანები არ გაკლიათ საქართველოსკენ ამხედრებულს!..

თქვა უნდილაძემ და სააკაძეს გახედა ცერად.

თითქოს ლახვარი დაეტაკა გიორგის გულს.

შაჰს სიცილი წასკდა.

მაშინვე სიცილი აღიკვეთა და ის „საქმენი“ გაიხსენა, უნდილაძე რომ მიანიშნებდა: ქიშმისა და ჰორმუზის სამთავროების დაპყრობა მზადდებოდა ფრიად საიდუმლო ვითარებაში და სწორედ იმამ-ყული-ხან უნდილაძისთვის მიენდო შაჰს საომარი სამზადისის მეთაურობა. ამას გარდა, იმამ-ყული-ხან უნდილაძეს, ვითარცა „მამის მემკვიდრეობა“, ეკისრებოდა წარმართვა ერანის მთელი სამეურნეო-საგამგებლო საქმეებ-

სა — მიწათმოქმედებისა, ვაჭრობისა, აღებ-მიცემობისა და წყალსადენების, ხიდების, კაშხალების აღმშენებლობისა.

— კარგი, აქ დარჩი და აქაურობას მიჰხედე, ხოლო მე და გიორგი... საქართველოს მივხედავთ! — უთხრა შაჰმა უნდილაძეს.

იმამ-ყული რომ გაისტუმრა, მერე მისი უმცროსი ძმა გამოიძახა — დავით (დაუდ-ხან) უნდილაძე. გამოიძახა და იმასაც ეს უთხრა უწინარესად: თუ მამაზე მგლოვიარობა არ გიშლის, შენც ჩვენთან ერთად წამოდი საქართველოში სალაშქროდო.

ეტყობა, ელოდა დავით უნდილაძე შაჰის დაძახილს და მშინვე შეიგება პასუხად:

— თუ არ დაგვიწყნიათ, მე სხვა რამე მაქვს თქვენგან ნაბრძანები.

— რა სხვა, დაუდ-ხან?

— გომბრუნის დაპყრობა, ხელმწიფეო.

ეს არ დავიწყნია შაჰ აბასს: გომბრუნში იმეამად პორტუგალიელები იდგნენ და დავით უნდილაძეს დააკისრა შაჰმა სპარსეთის ზღვის განაკიდური ქალაქიდან ევროპელების განდევნა და სპარსული ციხიონის შეყვანა.

— მაგრამ აკი მომავალი წლისთვის ვაპირებდით გომბრუნს ლაშქრობას?! — თქვა შაჰმა.

— მე უკვე ყველაფერი მზად მაქვს სალაშქროდ — ფიცხლავ შეიგება უმცროსმა უნდილაძემ.

— საქართველოში ლაშქრობამ ხომ არ დააჩქარა გომბრუნის ლაშქრობა, დაუდ-ხან?! — თვალები ჩაიჭრუტა აბასმა.

— არა, ხელმწიფეო. გომბრუნის ბედი მანამ გადაწყდა, სანამ საქართველოში ლაშქრობის ამბავს შევიტყობდი, — მშვიდად მიუგო უნდილაძემ.

— ილბათ, უნდილაძეებს ბედად არ დაპყლიათ ქართულ მიწაზე ფეხის დაბიჯება!.. — თქვა შაჰმა და თვალი თვალში გაუყარა უნდილაძეს.

— რა გაეწყობა, ხელმწიფეო, სამაგიეროდ სხვას დაპყლია ეგ ბედნიერი ილბალი! — თქვა დავითმა და სააკაძეს გაჰხელა გეზად.

ისევ ლანგარი დაეძგერა სააკაძის გულს.

მაგრამ „სხვანაირი“ იყო ეს „ლაზვარი“:

„დავით უნდილაძე უნდა იყოს ის კაცი, რომელსაც მე უნდა ვენდო მომავალში“, — გაუელვა გიორგის.

შაპის სიტყვამ ჩაუჭრა ფიქრი სააკაძეს.

— კარგი, აგრე იყოს. მე და გიორგი სააკაძე მივხედავთ საქართველოს, ხოლო თქვენ — ძმანი უნდილაძენი — უპატრონებთ და მოუვლით ერანს! — თქვა აბასმა და საქართველოსკენ მოლაშქრე მხედრობას მოავლო თვალი.

ხოლო „ქართველებს და გამორჩევით ბედოვლათ თეიმურაზს გამჭრიახობის თვალზე უღარდულობის ფარდა ჰქონდა ჩამოფარებული“.

ლუარსაბთან კავშირი შეკრა, მაგრამ ეს „დაფიცებული ერთსულოვნება და ერთაზროვნება“ შინაურ მოყვრობა-ცოლისძმობიას არ გამოორბია.

თეიმურაზი ნადიმობას, ნადირობას, ყაბახსა და ბურთაობას იყო გადაყოლილი.

არც ერთ სუფრას არ გამოტოვებდა, სვამდა უზომოდ, ტანსრული ყანწით, ჯამით და თასით. გავაზური ღვინო უყვარდა. ხილზედაც დიდის გატაცებით ყლურჭავდა გავაზურს.

თორმეტი სანადირო მინდორი ჰქონდა: „ირმის, ჯერნისა, დათვისა, ღორის, ტურის და მგლების, აფთრისა, შვლისა, ფოცხვრისა, კურდღლის, მაჩვისა, მელების“. ალიონიდან მიმწუხრამდის „სროლითა და სიკვდილით“ იღლებოდა თეიმურაზი.

ნადიმობა-ნადირობისგან მხოლოდ მაშინ გამოერჩეოდა, როცა ლირიკული პოეზიის მუზა გამოიწვევდა ხოლმე „საალერსოდ“.

პოეტად პოეტი დიხხაც შირონცხებული ბრძანდებოდა მეფე ბატონი, თუმცა ვერც აქა თქვა „ახალი სიტყვა“. რუსთველს ეჭიშპებოდა და რუსთველის ნასუფრალით ჰკვებავდა მუზას და ვერასდროს რუსთველის მიმბაძველ „მონათა ჯოგს“* ვერასგზით ვერ გამოერჩია.

ასე იყო თუ ისე, „პოეტური პიი-პუუსთვის“ არ სცალოდა

* ასე უწოდებს ჰორაციუსი ლიტერატურულ ეპიგონობას.

მაშინ ვეშაპის პირთან დაგდებული ქვეყნის საქეთმპყრობელს.

ქეშმარიტებას ბრძანებდა სულკურთხეული აკაკი წერეთელი: „პოლიტიკაში პოეტობდა, პოეზიაში პოლიტიკობდა ის დალოცვილი თეიმურაზი და მით საზარელ მომავალს უშუადებდა სამეფოს... მეფე რომ „პიიბუჟ-პიიბუს“ დაუკრავს, მაშინ მისი სამეფო „ვაი-ვაის“ იმღერებს“.

ვერ იქნა და ვერ გაიგო თეიმურაზმა, რომ მისი მყისთანადი უბოროტესი ქაში მხოლოდ გალესილ ხმალს მოითხოვდა და არა მკვნესარე პოეტურ ქნარს, არც სანადიმო ყანწს, არც სანადირო მიმინოს და საბურთაო ჩოვანს.

სასაცილოდაც არ ჰყოფნიდა შერმაზან ჩოლოყაშვილის ჩიხინი: დროა გამოვფხიზლდეთ და ხმლები გავილესოთ, თორემ დღე-დღეზე შაპ აბასი მოგვეჭრება ცეცხლითა და მახვილითო.

ჰოდა, რაკი მეფეს ეცინებოდა, ხალხიც „სიცილით კვდებოდა“ შაპ აბასის ხსენებაზე.

კახეთს არც ქართლი ჩამორჩებოდა უზრუნველობასა და უგუნურ უდარდებლობაში. სავდროდ შეყრილი ღრუბლები აქაც საკარგდაროდ ეჩვენებოდათ ქვეყნის დონდლოგონებიან მესვეურებს. ამ ზარდამცემ, განგაშიან დროს ჯიუტად სდუმდნენ საგანგაშო ზარები ქართლის გუმბათებზე.

სდუმდნენ, რადგანაც ქართლს ადარ ჰყავდა ყველაზე დიდი „ზარის დამარისხებელი“ — ნოსტეველი გმირი.

ყორნებს გაეძევებინათ ქართლის მხსნელი არწივი, რომელიც ახლა სწორედ საქართველოს სამტრო საბუდარში ჩაფრენილიყო და იქვე ისწორებდა ფრთებს მისი მშობლიურ ბუდის მომშლელთა დასაბდღვნელად და დასაბალთავად.

.

და ასე იყო „ორივე საქართველო“ უპატრონოდ დაგდებული.

ორივეს ჰქონდა „ჩამოფარებული კრეტსაბმელი უდარდებლობისა“.

ორივეს „დამსხვრეოდა სარკე გონებისა“.

ნელა მოგორავდა უშველებელი ურდო.

მოგორავდა და სივდებოდა გზადაგზა ახალ-ახალ საომარ ძალთა შენაკადებით.

მოდირდა შაპ აბასი ნადირობით და ნადიმობით.

თან ხმებს აჭენებდა აღმა-დაღმა: ჭარები იმად შემიყრია, ოსმალეთი დავლაშქრო უმძვინვარესადო.

ხოლო ოსმალეთში საიდუმლოდ ცალკე კაცი გაეგზავნა — სულთან მოჰამედ-ბეგ თალიში — და ხონტქრისათვის შეეთვალა: მართლა ზავის დარღვევას როდი ვაპყრებ, ასეთ ხმებს ქართველთა თვალის ასახვევად ვავრცელე? სინამდვილეშიც სწორედ ქართლ-კახეთის დასალაშქრო მივეშურებო (აკი ახლად დადებული ზავითაც ქართლ-კახეთი სპარსეთის „საკუთრებად“ იყო გამოცხადებული).

ურდომ გამოიარა არდებილი, ყარაბალი, განჯას შეგუბდა და ბანაკად დადგა.

მოვიდა თუ არა, მაშინვე შაჰმა ერთჯერ კიდევ აამუშავა „ტყუბი წერილების“ ტაქტიკა. ერთდროულად ლუარსაბს და თეიმურაზს ერთნაირი წერილები გაუგზავნა.

ლუარსაბს სწერდა: „ჩემო საყვარელო ცოლისძმავ, ნუ ენდობი თეიმურაზს. ნუ უერთგულებ მას, ვინაიდან იგი შენი მოსისხლე მტერი არის და სურს მეგობრობის ნიღბით მოგატყუოს, მოგკლას და შენს ქვეყანას დაეპატრონოს. მან მე პარადად გამიმხილა ეს განაზრახი. ამიტომ სანამ ცოცხალი ხარ, თვითონ დაასწარი, მოჰკალი იგი და შენი იქნება ორივე ქვეყანა — ქართლიც და კახეთიც; მეც აქ მოვსულვარ და თუ საჭირო გავხდე, შემომითვალე და მაშინვე მოგეშველები ჭარით და ფულით“.

იგივე ეწერა თეიმურაზისადმი გაგზავნილ წერილში, ოღონდ „მოქმედ გმირთა“ გადანაცვლებით.

ერთადერთი, რაშიაც არ მოტყუდნენ ლუარსაბი და თეიმურაზი, ისევ ეს იყო: შაპ აბასის წაქეზება არ გაიკარეს, წერილები ისევ ერთმანეთში გაცვალეს, ჭეშმარიტება დაადგინეს და ისევ „არხეინ მოყვრობას“ მიეცნენ.

მთელი ზამთარი იდგა შაჰ აბასი განჯაში — საქართველოს კარისყურზე, და ქართლ-კახეთის გვირგვინოსნებს ხელიც არ გაუხმრევიათ უსაშველო საფრთხის უკუსაგდებად.

1614 წლის ადრიან გაზაფხულზე შაჰ აბასმა თეიმურაზს ელჩად ზ ა ქ ე რ - ა ლ ა ყ უ შ ჩ ი გამოუგზავნა და შემოუთვალა:

„დღე-დღეზე ოსმალეთს სალაშქროდ მივეშურები, ხოლო შენ აღარ გენდობი, — ასე მგონია, პაპაშენივით ოსმალების მხარეს დაიქვრ, ამიტომ, თუ მართლა მტრობას არ მიპარებ, შენი შვილი უნდა გამომიგზავნო მძველად დაუყოვნებლივ. ჩემთან იქნება შენი ძე, შევიტყობ, შევიყვარებ და გავზრდი შენზე უკეთესად და შენს უმჯობესად!“

თავზარდაცემულმა თეიმურაზმა სამეფო დარბაზი შეჰყარა და „მძლავრი ბოროტის“ მოთხოვნა შეატყობინა.

დარბაზმა მძველის გაცემა ურჩია მეფეს.

ავარდა და დავარდა თეიმურაზი, — ტყუილად მაკარგვინებთო შვილს, ვერაგი შაჰი მაინც თავისას იზამსო, მაგრამ ვერაფერს გახდა: თავადები ჯიუტად მოითხოვდნენ ერთ-ერთი უფლისწულის გაცემას, რამეთუ ეგონათ მეფის ძის გაცემით საკუთარ ოჯახებს გადაარჩენდნენ შაჰის მძვინვარებისაგან.

გატყდა თეიმურაზი: ახლა იმაზე უნდა ეფიქრა, რომელი გაემეტებინა სამძველოდ — ხუთი წლის ლევანი, თუ სამა წლის ალექსანდრე.

არჩევანი უმრწემესზე შეჩერდა — ალექსანდრეზე. ჩვილი ბავშვის ხილვაზე შაჰს გული აუჩუყდება და იქნებ უკანვე დააბრუნოსო ყრმა უფლისწული.

თანაც ქეთევან დედოფალი უნდა ხლებოდა შაჰ აბასს, რამეთუ თეიმურაზი „ჰგონებდა პატივისცემასა დედისასა შაჰ აბასისგან, რათა ევედროსცა შეწყალებად და უკუნქცევად“.

ერთი სიტყვით, განჯას გაგზავნეს უფლისწული ალექსანდრე, ქეთევან დედოფლისა და სახლთუხუცეს ნ ო დ ა რ ჯ ო რ ჯ ა ძ ი ს თანხლებით.

დიდის პატივით, თავაზით და თაყვანისცემით შეხვდა შაჰი ქეთევან დედოფალს, მაგრამ ყრმა ალექსანდრე რომ იხილა, რისხვა ველარ დაიოკა და გესლიანად ჩაიღმუჟლა:

— რას ჰგავს ეს?! მე თქვენ ძიძა გგონივართ თუ ბიძა, ერთიბეწო ბალდი რომ მომიგდეთ?!

ისე გაცოფდა და გაშეთდა, არასგზიერ აღარ მოუსმინა ქეთევანს, „ულამაზესსა და უბრძნეს დედოფალს“.

მაშინვე ზაქერ-ალა ყუშიჩი და ნოდარ ჯორჯაძე უკანვე კახეთს გაგზავნა და თეიმურაზს ბრძანება შეუთვალა: ახლაკე შენი უფროსი ძე გამომიგზავნე, თუ გინდა დედაშენი და უმცროსი ვაჟი დაგიბრუნო და მეც ჩემის ჯარებით უკან გავბრუნდე, — თუ არა და, მერე ყველაფერი შენს თავს დააბრალეო.

ქეთევანმა მაინც მოახერხა ჯორჯაძის პირით შეეთვალა თეიმურაზთან: არამც და არამც არ გამოუშვა ლევან ბატონი. ვიღი მძევლადო, რამეთუ, ეტყობა, მთელი ჩვენი ოჯახის ხელში ჩაგდებასა და ამოწყვეტას აპირებს შაჰ აბასიო.

ისევ დაისვა დარბაზი სათათბიროდ თეიმურაზმა.

ისევ აიჩემეს უფლისწულის გაწირვა თავადებმა.

ბევრი იბრძოლა და იომა თეიმურაზმა, — მეორე შვილსაც ნუ დამიკარგავთო, სულ ერთია, მაინც შემოგვიტევს შაჰ აბასიო. ტყუილუბრალოდ ნუ დამიქცევთ ოჯახსო, — მაგრამ არაფერმა გასჭრა.

„შენ თვითონ შაჰ აბასის გაზრდილი ხარ, — ეუბნებოდნენ თავადები მეფეს, — მერე ორგზის იყავი მასთან, ორჯერვე დიდის პატივით მიგიღო და უამრავი ნიჭით დატვირთული გამოგისტუმრა და რაღა მაინცა-დამაინც შენს შვილებს გამოიმეტებსო“.

თითქმის ძალით წაართვეს თავადებმა თეიმურაზს ლევანი და დავით ჯანდიერი-ასლანი შვილის თანხლებით შაჰ აბასს გაუგზავნეს განჯაში.

ზოგიერთ „თადარიგიან“ კახელ და ქართლელ თავადს უკვე მოესწრო შაჰ აბასთან გაქცევა და მისი „კეთილშობილი ნოხის კოცნით გაბედნიერება“. როცა თეიმურაზმა დედა და ორივე შვილი გაიმეტა, დაფრთხნენ სამშობლოს მოღალატე თავადები, — ვაითუ ერანის მბრძანებელმა ქართველი მეფეებს შერიგოსო და შეუჩინდნენ შაჰს: ნუ ინებებ და ხელს ნუ აიღებ ქართლ-კახეთის დალაშქვრაზეო; ჩვენ და ჩვენი შვილები მძევლებად გზღებივართ და „თუ შენს ლაშქარს რამე

დაუმარცხდეს, ყველას თავები დაგვაყრევინეთო; რადგან აქამდისინ მობრძანებულხართ, საქართველო ინადირეთო...“

შაპ აბასს წაქეზება რალად სჭირდებოდა და, როცა კახეთის მეფის დედა და ორივე უფლისწული თავისთან დაიგულა, მესამედ წარმოგზავნა ზაქერ-ალა ყუშიჩი, დავით ჯანდიერიც გამოატანა და თეიმურაზს ახალი ბრძანება შემოუთვალა:

„აწ ვსცან, რამეთუ ხარ დიდად ერთგული ჩემი, ვინაიდან არ დაერიდე ძეთა შენტა ჩემთან გამოგზავნას. ახლა შენც მოდი ჩემთან სასწრაფოდ, აღგავსებ ნიჭითა მრავლითა და განგიტევებ უკანვე მშვიდობით“.

ბრმისთვისაც ნათელი უნდა ყოფილიყო მზაკვარი და მანქანიერი შაპის განზრახვა: მას უნდოდა კახეთის სამეფო ოჯახისთვის თავი მოეყარა და ერთიანად შეემუსრა.

კახეთის გულაჯამ თავადებსაც ეჭვი აღარ უნდა შეჰპარვოდათ. რომ შაპ აბასი სამეფო სახლეულის განადგურებისთანავე მათ ფეოდეებსაც შემოესეოდა ცეცხლითა და მახვილით.

ზოგი მაინც იმ აზრზე იდგა, წავიდეს და ეახლოსო თეიმურაზი შაპ აბასს. მაგრამ მეფე ისე გაცეცხლდა, უმაღვე ხმა გაიკმინდეს და ავი ბედისგან მიგდებულ წილხვედრს დაელოდნენ თავადიშვილნი.

მ ა ლ ე თ ი

გვიან მიხვდნენ ადრე მისახვედრს,

გვიან გამოიღეს ხელი.

მუკუზანიდან „გალმა მთამდე“ ჯებირები აღმართეს და მის გასწვრივ საყარაულო რაზმები ჩაალაგეს.

თეიმურაზმა ლუარსაბს შეატყობინა, — შაპ აბასი მოდისო უთვალავი მხედრობით, საქართველოს მოოხრება სწადია სრულად; შენი მოსისხლე სააკაძეც თან ახლავს და „მოჰყავს ყენი მტრად შენდაცა“.

ისეც „მოსცა პირი მტკიცე“ ლუარსაბმა თეიმურაზს.

მაგრამ უხმლოდ და უთავოდ სიტყვიერი „პირი მტკიცე“ რად გამოდგებოდა!

შაჰმა ქართველების საომარი „სამზადისი“ შეიტყო და მაშინვე წამოიძარტა „დიდის რისხვიანობითა და ლაშქრის სიმრავლით“.

ძვირფასი ტყვეები — ქეთევან დედოფალი და მისი შვილიშვილები გაგზავნა ერანს, ქალაქ შირაზს, ძლიერი რაზმით დაცულნი.

განჯიდან ადგა და აგორდა ურდო.

ორ ნაწილად გაჰყო აბასმა ლაშქარი. ერთი ნაწილი თავრიზის ბეგლარბეგს, ფირბუდაყ-ხანს ჩააბარა; თანაშემწედ და მეგზურად ყარაბაღის ამირა დელუ-მუჰამედი დაუნიშნა (მკითხველს ახსოვს დელუ-მუჰამედი — ადრე ტფილისის ყიზილბაშური ციხიონის უფროსი, ტაშისკარის ბრძოლაში ქართველთა მოკავშირე). ესენი შაჰის ბრძანებით ჯერ ტფილისისაკენ უნდა წამოსულიყვნენ და მერე სამხრეთიდან შეჭრილიყვნენ კახეთში.

მეორე არმიას შაჰმა შირვანის ბეგლარბეგი იუსუფ-ხანი უჩინა სარდლად და კახეთში აღმოსავლეთიდან შეჭრა უბრძანა.

1614 წლის 14 მარტს, ზუთშაბათ დღეს, მუსლიმთა ხაერუზობის დღესასწაულს, სპარსელთა ორივე მხედრობა შაჰისაგან ნაბრძანებ ადგილზე იყო მისული: ფირბუდაყ-ხანისა და დელუ-მუჰამედის ჯარებს იორი გადაელახათ და თეიმურაზისთვის სამხრეთის გზა გადაეკეტათ, ხოლო იუსუფ-ხანს ალაზანი გადმოეგლო და ქიზიყში შეჭრილიყო.

კახელთაგან აგებულ ჯებირს აღარავითარი დანიშნულება აღარ დარჩენოდა.

კახელი თავადები ისევ დაფრთხნენ და დაიბნენ. ზოგი ისევ შაჰთან თეიმურაზის გამოცხადებას მოითხოვდა, ზოგი გაქცევას ურჩევდა, ხოლო ბრძოლის გამართვას თითო-ოროლა დიდებული ამჯობინებდა.

მაგრამ იძალა თეიმურაზმა და სანამ შემორჩენილი ერთგული ჯარიც შემოეთანტებოდა, სამხრეთისკენ წამოემართა სპარსთა ალყისგან თავდასაღწევად და ქართლისაკენ გასაქრელად.

ქალეთთან კახელთა ჯარს სპარსთა ორშია გადაეღობა. თვითონ შაჰ აბასი მოუძღოდა ერანელთა მრავალრიცხოვან მხედრობას.

თეიმურაზმა შუები გაიწვართა და ცხენი გულმყარად გააქანა.

ხუთასკაციანი ქართველთა ჯარი ეკვეთა სპარსულ ათასეულებს.

კახელებმა შუებები შეაღწეეს მოპირდაპირის სქლად მიჯრილ მწყრივებს და მაშინვე „აგელეს ხმალნი“.

თავგანწირვით იბრძოდა თეიმურაზი.

გავეშებით შემოუტია „გამზრდელმა გაზრდილს“.

ისევ თავისი გაიტანა რიცხვით სიმრავლემ.

თეიმურაზმა ნაბიჯ-ნაბიჯ დაიწყო უკანდახევა.

მხედ მდიოდნენ კახელნი, მძვინვარე ყვილით და სისხლთა თხევით; უკუსვლით იქნევდნენ ხმლებს. — რამეთუ მათი ზურგი არ ეხილა მტერს.

შაჰმა მოასწრო და მხედრობის ერთი წილით უკანა გზა ჩაუჭრა „გაზრდილს“.

თეიმურაზი მისი ჯარით სპარსელთა ალყაში აღმოჩნდა.

ტყვეობა და სიკვდილი ერთად ჩაექიდა თეიმურაზის გონებას.

სიკვდილი ამჯობინა და შეუტია თავგანწირვით.

გაალმასებით მიჰყვნენ კახელნი.

მძლავრი ძკერებით განკვეთეს და გადაქელეს ერანელთა შუაეკრძი. მრავლად ჩახოცეს ყიზილბაშნი, დანარჩენები გააქციეს ბრძოლის ველიდან.

სამშვიდობოს გავიდა მეფე მისი მხედრობით.

შაჰ აბასი ლამის გაგიჟდა, თეიმურაზი რომ გაექცა და ვერ მოიხელთა.

ქალეთის ბრძოლა ჩათავდა.

ეს იყო პირველი და უკანასკნელი მძაფრი შეტაკება ქართველთა და სპარსელთა შორის ამწლევეანდელ საომარ წრეში; გიორგი სააკაძე კი არსად გამოჩენილა!

• • • • •

თეიმურაზმა ერწო და არაგვი გადმოიარა.

მუხრანში ლუარსაბი ელოდა ნაომარ მოყვარესა და მოკავ-
შირეს.

ერთმანეთს შეხვდნენ.

ლუარსაბმა სიძეს გამარჯვება მიულოცა და სიცილით
უთხრა:

— ეგ არის შენი განთქმული სტუმარ-მასპინძლობა, ასე
პურშავად და პირშავად რომ შეხვდი უცხო სტუმარს?

— შენც გეწვევა, შენმან მზემან, „ის სტუმარი“ და მაშინ
ვნახავ, როგორ სუფრას გაუშლი და რა ლზინსაც გაუმარ-
თავ! — ლალი სიცილითვე შეაგება თეიმურაზმა.

თათბირად დასხდნენ.

გამოირკვა, რომ არც ქართლს შეეძლო გამკლავებოდა შაჰ
აბასის ურიცხვ მხედრობას.

შაჰ აბასს ჰხლებოდნენ უძლიერესი ფეოდალები: ნუგზარ
არაგვის ერისთავი (სააკაძის სიმამრი), იასე ქსნის ერისთავი
(სააკაძის სიძე), ანდრუყაფარ ავილახორი (შაჰ აბასის ცოლის-
ძმა), აღათგან ხერხეულიძე (სააკაძის „დასელი“) და ფეშანგი
ფალავანდიშვილი (ესეც სააკაძის „მოკიდებული“).

მაინც ომს აპირებდნენ მეფენი, მაგრამ ყველა დამსწრე გა-
დაჭრით უარზე იდგა და მოითხოვდა სასწრაფოდ გადასულიყ-
ვნენ ლუარსაბი და თეიმურაზი იმერეთში თავშესაფარებლად.
დათანხმდნენ გვირგვინოსნები და თავიანთი სახლეულით
გაემართნენ „ბაში-აჩუკის“ ქვეყნისაკენ.

საჩხერეში, მდინარე ყვირილის ველზე დიდი სიხარულით
შემოეგება იმერეთის მეფე გიორგი მესამე ძვირფას
სტუმრებს. აქაური თავადის, ქველი წერეთლის სახლ-
კარს დაივანეს და განისვენეს.

აქედან რამდენიმე დღის შემდგომ ქუთაისს გაემურნენ სა-
ქართველოს სამივე საქეთმპყრობელნი.

ციხე-გალანად ეგება,
ისე გამ/ აელდა მკედარია.

ვ ა ე ა ვ შ ა ე ე ლ *

მეფეების გაქცევით აფორიაქებული შაჰ აბასი ქიზიყიდან მივიდა კახეთის სატახტოში, გრემში — „სამოთხის ბადივით აყვავებულ ქალაქში“.

ხალხი ციხეებში, მთებსა და ტყეებში გახიზნულიყო.

მივიდა შაჰი და კახეთის „ახალი მეფეც“ მიიყვანა.

ეს იყო ის ა-ხ ან, ქართველობაში ი ე ს ე. თეიმურაზის ბიძაშვილი, კონსტანტინესგან მოკლული ძმის — გიორგის ვაჟი. მკითხველს გაახსენდება იესე უფლისწული, კონსტანტინემ რომ დაიხსნა ყიზილბაშთა მახვილისაგან ძაგემში მისგანვე დატრიალებულ სისხლიან დღეს. იესე გიორგის ძე მის შემდგომ შაჰ აბასის კარზე იზრდებოდა ისა-ხანის სახელით, გათათრებული და წინდაცვეთილი.

აი, სწორედ ეს ისა-ხან იესეყოფილი დასვა ახლა შაჰ აბასმა კახეთის გამგებლად.

ისა-ხანის „გვირგვინ-კურთხევაც“ შაჰმა „ქართული წესით“ ჩაატარა: ყველამ ერთად — სპარსელმა ამირებმა და ქართველმა თავადებმა — ახალ „მეფეს“ თავზე ოქრო-ვერცხლი აფრქვიეს და ისე დალოცეს.

ისა-ხანს მრჩეველებად და „მფარველებად“ („ვექილებად“) შაჰ აბასმა დაუნიშნა დავით ჯანდიერ-ასლანიშვილი და ნოდარ ჯორჯაძე.

თვითონ შაჰი კახეთში ორმოცდაათი დღე დარჩა.

და ეს იყო ჯოჯოხეთი ორმოცდაათი დღით.

ჯერ თითქოს დიდსულოვნური შემწყნარებლობით ექცეოდა შაჰი კახეთის ამაყ მოსახლეობას. ჯარილ უცებს გამოუცხადა: ქართველის კალოდან სპარსელმა ბზის ერთი ნამცეციც რომ აიღოს, სიკვდილს ვერ გადაამირჩებაო.

რამდენიმე ჯარისკაცი, რომელთაც გახიზნულ ქართველთა მიტოვებულ ბინაში შესვლა და ძარცვა გაუბედავთ, შაჰის მუცლებზე დააფატვრინა და ნაწლავები დააყრევინა.

ხოლო შემდგომ...

შემდგომ რაც მოხდა, — ყური მიიპყარ, კეთილო მკითხველო, შესანიშნავ სომეხ მემკატიანეს — არაქელ თავრიზელა, რომელიც მდულარე ცრემლით დასტირის კახეთის უბედურებას:

„კახეთში სპარსელთა ნამოქმედარს ვერც ენა იტყვის და ვერც კალამი აღწერს. გონებით მოისაზრე და გაიგებ, თუ რამდენი გაუტეხელი ქრისტიანი მახვილით დააშავეს, დაჭრეს ან დახოცეს. უდანაშაულონი ტყვედ წაასხეს და შეურაცხვეს. ქონება და სიმდიდრე მიიტაცეს, ნაშენები ყოველი ციციხლს მისცეს და დაანგრის. ეკლესიები დააქციეს, საკურთხევლები, ჯვარნი და ხატნი დაამხეს. დატყვევებულნი თავიანთ ბანაკში წაათრიეს და ნაირ-ნაირი სატანჯველით სტანჯავდნენ: სიცივითა და სიშიშვლით, შიმშილითა და წყურვილით და სხვა მრავალი ხერხით.

„...ბოროტ ზრახვებში დაბრძენებულმა შაჰ აბასმა ქვეყნის დამაქციეარი ახალი ღონე მოიგონა და ბრძანა, რომ კახეთის ყველა თემი და სოფელი მოეველოთ გზირებს და დღეების განმავლობაში ხმამაღლა ეყვირათ და გამოეცხადებინათ: „ძლიერმა, მშვიდობისმოყვარე და ქვეყნის აღმშენებელმა ხელმწიფემ — შაჰ აბასმა ბრძანა, რომ კახეთის ქვეყნის ყველა მცხოვრები, როგორც დიდებულნი, ისე მხედრები, ხელოსნები, გლეხები და სხვანი ყველანი, რომლებიც გახიზნულნი და გამაგრებულნი არიან მთებში, ტყეებში, ციხეებსა და სხვა მტკიცე სამალავებში, დაბრუნდნენ თავიანთ სახლებსა და ბინებში. იყვენენ მშვიდობით და ნუ ექნებათ სპარსელი მეომრების შიში და ძრწოლა, რადგან ხელმწიფემ უბრძანა მათ, რომ ამ ქვეყნის მკვიდრთაგან არავინ შეაფიწროვონ და შეაწუხონ. მათ, ვინც მორჩილებას გამოუტყდადებს შაჰს და შაჰისევანი („შაჰის მეგობარი“) გახდება, არაფერს დაუშავენ და ისინი მარად მშვიდობაში იქნებიან. ვინც ეურჩება და წინააღმდეგა ხელმწიფის ბრძანებას, მათ წინააღმდეგ შაჰი გაგზავნის მრავალრიცხოვან ჯარს, რომელიც აიღებს და ააოხ-

რებს მათ სიმაგრეებს, ყველას უწყალოდ ამოხოცავს, ოჯახებს ტყვედ წაიყვანს და სარჩო-საბადებელს მიიტაცებს. დატოვეთ სიმაგრეები, დამორჩილდით შაჰს, გახდით შაჰისევანები და მოიპოვეთ მშვიდობა. დიდებულებს და წარჩინებულებს, რომელნიც პირველნი და სხვაზე აღრე მოვლენ, ხელმწიფე უწყალობებს დიდებასა და პატივს, დიდძალ მისართმეველსა და სათავადო უფლებებს“.

„როცა ვაიგეს კახეთის ქვეყნის მცხოვრებლებმა გზირების მიერ გამოცხადებული სიტყვები, ზოგი მათგანი მოტყუვდა, დაიჯერა და გახდა შაჰისევანი. ზოგი სიკვდილისა და ტყვედ-წაყვანის შიშით მივიდა და გახდა შაჰისევანი. ზოგმა ვერ აიტანა სპარსელების ხანგრძლივი ყოფნა მათ ქვეყანაში და ისიც გახდა შაჰისევანი.“

„ზოგიერთმა კი, როცა შეიტყო, — ესა და ეს ციხე აიღესო, ამა და ამ სახელწოდების სიმაგრე დაიპყრესო, სიმაგრეებში შეხიზნულ ხალხს მუსრი გაავლეს ან ტყვედ წაასხესო — შეძრწუნდნენ და შეშინდნენ, რომ მათაც ისეთივე ბედი არ სწეოდათ, ამიტომ გამოვიდნენ, სიმაგრეებიდან და ისინიც შაჰისევანები გახდნენ.“

„ქვლავ ბრძანა შაჰმა იმათ შესახებ, ვინც შაჰისევანები გახდნენ, რომ ყოველი მათგანი დაესაზღვრებინათ ბინებსა და სადგომებში, ნუგეში ეცათ, გაემხნევებინათ და დიდის ღმობიერებით ესაუბრათ მათთან. მათი მამაკაცებისა და ქალების, ვაჟებისა და ასულების და მათი ყველა მახლობლის სახელები სპარსელებს ნუსხებში შეეტანათ და თავისთან შეენახათ.“

„მათ სადარაჯოდ ყველგან სპარსელთა ჯარი დააყენეს, რათა რომელიმე მათგანი არ გაქცეულიყო. თან ატყუებდნენ და ეუბნებოდნენ: „მცველები იმიტომ დაგიყენეთ, ვინმე სპარსელმა რომ არ შეგაწუხოთ და ქონება არ წაგართვათო“. ვინც შაჰისევანობა მიიღო, ყველას ისე მოექცნენ, როგორც გიამბეთ.“

„ხოლო ვინც არ მოვიდა და სიმაგრეში დარჩა, სპარსელები მათ ციხეებს გარს შემოერტყნენ, მრავალი დღის განმავლობაში ნაირნაირი ხერხით ებრძოდნენ ციხეში გამაგრებულებს, სანამ არ დასძლევდნენ მათ და მახვილით უმოწყალოდ

მუსრს არ გაავლებდნენ, როგორც წმინდა მსხვერპლს ღვთისადმი შეწირულს, ისე რაცხდნენ ქართველები თავისთავს მოწამისაებრ უფლისა.

„შემდეგ ნაძარცვი ნივთები და ქონება ნადავლად მიჰქონდათ, სიკვდილს გადარჩენილ ქალებსა და ბავშვებს ატყვევებდნენ და თავის ბანაკში მიათრევდნენ. როგორც ვთქვი, ორმოცდაათი დღე დაჰყვეს კახეთში და არ დარჩენილა სიმაგრე, რომ არ აეღოთ; ან ადგილი, რომ არ აეოხრებინათ; სრულიად იავარჰყვეს და წაბილწეს ყველაფრით სავსე, მდიდარი და ხალხმრავალი კახეთისა და გრემის ქვეყანა. კახეთისა და გრემის ეკლესიების ნივთები და სიწმინდენი, ჯვარი, ბარძიმი, სახარება, სასაკმევლე, ფილონი და სხვა ნივთები და სიწმინდენი, რომელიც იყო ძვირფასი და დიდფასოვანი და სხვადასხვანაირად შემკული პატროსანი ქვებითა და თვალმარგალიტით, შაჰმა ბრძანა, რომ არ დაემტვრიათ, წაეღოთ ქალაქ ისფაჰანში და ხელმწიფის ხაზინაში შეენახათ. დღემდე იქ, ხელმწიფის ხაზინაშია ის ნივთები, რასაც ჩვენი ხალხიდან ბევრი ადასტურებს, რომელთაც ის წმინდა ნივთები საკუთარი თვალთ უნახავთ. ქრისტეს უკერავი კვართიც სხვა სიწმინდეებთან ერთად წაიღეს და იგი იმავე ხაზინაში, ქალაქ ისფაჰანში ინახება, რომლის წინაშე ახლაც სანთელს ანთებენ. ამ ამბის მომთხრობელთ თვითონ თავისი თვალთ უნახავთ იგი. ისინი სარწმუნო კაცები იყვნენ...“.

მთელი ღამე ჰყიოდა მოლა-მუქდინი გაძარცვული გრემის ტაძრის გუმბათიდან: „არა არს ღვთაება თვინიერ ალლაჰისა და მუჰამედი არს მოციქული მისი. ალლაჰიც აკურთხებს მას, მის ოჯახს და მიესალმება უსაყვარლეს მოციქულს თვისას“.

გრემიდან ალავერდს მოვიდა შაჰ აბასი, „საქართველოს ქრისტიანთა უდიდეს და უბრწყინვალეს სამლოცველო ტაძარში“.

გაძარცვეს და გაატყავეს ლავრა ალავერდისა.

გალავანი ციხე-კოშკებით გამაგრეს და შიგ სპარსული ციხიონი ჩააყენეს ის მაილ-ბეგის მეთაურობით.

აქვე შაჰმა შეიტყო, რომ თორღას სიმაგრეში კახეთის სამეფო საგანძური ყოფილა შენახულიო.

მაშინვე შაჰმა მეთოფეთა ათასეული აფრინა თორღას.

65

სასტიკი ბრძოლის შემდეგ სპარსელებმა თორღა აიღეს, კახთა მეფის ძვირფასი საჭურჭლეები დაიტაცეს და შაჰს მიართვეს.

აურაცხელ ნაძარცვ-ნაალაფარ და ნაძღვნევ-ნაჩუქარ უძვირფასეს ნივთთა პატრონს რაღა უნდა გაჰკვირვებოდა, მაგრამ მაინც განაცვიფრა შაჰ აბასი კახთა მეფის განძმა. გამორჩევით ერთმა ნივთმა, ალავერდელი ეპისკოპოსის თვალმარვალიტით მოჭედილმა გვირგვინმა დაატყვევა შაჰის ანგარი გული.

მერე ერწო-თიანეთს შეესივნენ სპარსელები.

ამოდ შეაწყდნენ აქაური ქართველები უთვალავ მტერს. ერანელებმა ერწო-თიანეთიდან 30 000 ტყვე-აღამიანი და 40 000 მსხვილფეხა საქონელი გაირეკეს.

სულ 80 000 კახელი გადაასახლეს იმ წელიწადს სპარსეთში.

ქართველი ტყვეებით ივსებოდა სპარსთა ქვეყანა.

ბიეტრო დელა ვალე რომის პაპს — ურბანუს მერვეს:

„დღეს მთელს სპარსეთში არ მოიძებნება არც ერთი სახლი, რომელიც საგსე არ იყოს ტყვე ქართველებით, მამაკაცებით და დედაკაცებით. სპარსეთში არ არის არც ერთი დიდი კაცი, რომელსაც არ ჰსურდეს, რომ ყველა მისი ქალები ქართველები იყვნენ, იმიტომ რომ უმშვენიერესნი არიან ქართველი ქალები...“.

დაიქცა და დაიშვა „ყველაფრით საგსე, მდიდარი და ხალხმრავალი“ კახთა ქვეყანა.

„მოდიოდა და საბანა მოჰაღოდა“

კახეთის „მრავალგზისი ოხრების შემდეგ“ შაჰ აბასმა ვარსკვლავებით ურიცხვი ჯარი“ ქართლში გადაიყვანა და გორს მივიდა. გორისა და სურამის ციხეები გაამაგრა და შიგ სპარსული ციხიონები შეაყენა.

შაჰმა ჯარები სასტიკად გააფრთხილა, — ქართლის მოსახლეობასთან მოკრძალებით იყავით, ძარცვა-გლეჯა და აწიოკება გულშიაც არ გაივლით და ამპარტავანი ხალხი არ ამიჯანყოთ, თორემ ცოცხალის თავით ვერ გადაამირჩებიით.

ახლა ქართლის სოფლებსა და ქალაქებში დაგზავნა აბასმა გზირები და ყველგან გამოაცხადებინა:

„დიდი და ქვეყნის აღმაშენებელი შაჰ აბასი ბრძანებს, რომ ქართლის ქვეყანა თავისი მცხოვრებლებით, დიდებულებითა და მდაბიოებით იყოს მშვიდობითა და მოსვენებით. ყველას, ვინც სპარსთა ჯარის შიშით გახიზნულია ცხენებსა და გამაგრებულ ადგილებში, ამის შემდეგ ნულარ შეეშინდებათ და ნულარც ჭკვეს მიეცემიან, ყველანი დაბრუნდნენ ბინებში და ხელი მოჰკიდონ თავის საქმიანობას და აღმშენებლობას. იყოს მშვიდობა და მისვლა-მოსვლა სპარსელებსა და ქართველებს შორის, რადგან ქართლის ქვეყანას ჩემად ვრაცხ და ამიტომ არ დავარბევ ჩემი და ლუარსაბ მეფის გულისათვის, რომელსაც ჩემს ძედ, ძმად და მეგობრად მივიჩნევ. როდესაც ლუარსაბი დაბრუნდება, მაშინვე მის ქვეყანას მასვე ჩავაბარებ, მე კი ჩემს სამშობლოში დავბრუნდები. ასე მოვიქცევი, თუ მოვა ჩემთან ლუარსაბ მეფე, მაგრამ თუ არ მოვა, მაშინ აქა მყავს, მოურავი, აქაური ქართველი, — ქართლს სწორედ ამ მოურავს ვუბოძებ, მე კი ჩემს ქვეყანაში დავბრუნდები...“.

აჰა, გამოჩნდა გიორგი სააკაძე!..

შენც მომეხმარეო, — უთხრა შაჰმა გიორგის — ქართლის მოსახლეობა დააწყნარე და დააშოშმინე, — რომ მე მათ სამტროდ კი არა, სამოყვროდ ვარ მოსული. ესეც იცოდე, აქაური ქართველებიც მე და შენ (ჰმ, „მე და შენი“) ძალიან გამოგვადგებიანო შაჰისევეანებად. ხოლო, რაც შეეხება ქართლის გამგებლობას, — მოვა თუ არ მოვა ლუარსაბ მეფე, სულ ერთია, ქართლი მაინც შენ უნდა გიბოძო სამმართველოდ და საპატრონოდო.

გიორგი სააკაძე შაჰ აბასის დაპირებებს მოთმინებით ისმენდა, მაგრამ გული ბოღმით უსივდებოდა. იცოდა, ვერავი შაჰი ჩვეულებრივ ცრუობდა და ახალ-ახალ ბოროტებას ხვანჯავდა მისი სამშობლოს დასამზახად და ამოსავდებად.

საკაძე ჯერჯერობით მაინც შერიგებას ურჩევდა ხალხს.

მთავარი ახლა ის იყო, ქართლის მოსახლეობა კახეთის ტრედიას გადაარჩენოდა.

თვითონ გიორგი თავის მამულში მივიდა, ნოსტეში, მივიდა და დაანთო ცეცხლი კერაზე.

მეზობლად ქაიხოსრო ჯავახიშვილი ცხოვრობდა, სააკაძეების ოჯახის ერთ-ერთი დამაქცევარი. როგორც კი გიორგის მობრუნება შეიტყო, მაშინვე ცოლშვილიანად აიყარა ქაიხოსრო და იმერეთისკენ გაქუსლა, სააკაძის შურისძიებით ზარდაცემულმა.

გიორგიმ ერთგული მსახური ბიძინა გამოადევნა ქაიხოსროს. ბიძინა სურამთან წამოეწია ლტოლვილს და უკანვე შემოაბრუნა: გიორგი წახდენას არ გიპირებს, ძველი წყენა დაივიწყა და შენთან კარგი მეზობლობისა და მოკეთებობის გარდა აღარაფერი სურსო!

მობრუნდა ქაიხოსრო ჯავახიშვილი სააკაძის „დიდსულოვნებით“ გაოცებული და თავლაფდასმული.

ქაიხოსროსთანა მცირე ზომის ეგოისტებს ნაკლებად ესმოდათ სააკაძის ფართო მამულიშვილური განზრახვანი. მართალია, გიორგი სააკაძე ერანში სწორედ იმიტომ გაიქცა, რომ შაჰის მხარდაჭერით ქაიხოსროსთანა და შადიმანისთანა ფეოდალები დაეთრგუნა, მაგრამ გიორგი მალე მიმხვდარა თავის შეცდომას, — შაჰ აბასი, რომელიც თურმე საქართველოს ძირფესვიანად მოთხრას აპირებდა, გიორგის ქართველ ფეოდალებთან ბრძოლაში მოკავშირედ არ გამოადგებოდა. უფრო მეტიც: გიორგიმ შეამჩნია, რომ შაჰს ახლა სააკაძის მტრები უფრო მოსწონდა, ვიდრე თვითონ სააკაძე.

დიდი სიფრთხილე იყო საჭირო...

საკაძისთვის ახლა მთავარია ქართველი ხალხის გადარჩენა და არა მისი პირადი მტრების განადგურებაზე ფიქრი.

მთავარი იყო, ქართველები — თავადნი, აზნაურნი თუ უაზნონი — ერთმანეთს არ დარეოდნენ და ამით „ყოველი ხარისხის“ ქართველისათვის საერთო მტრის — შაჰ აბასის გული არ გაეხარებინათ.

მთავარი იყო, შაჰი როგორმე ქართველი კაცის სისხლდაუქცევლად გასულიყო ქართლიდან, ხოლო შემდგომ... შემ-

დგომ სხვა რამ დიდ-დიდნი საზრუნავნი „გამოუჩინდება“ დიდ მოურავს...

შაპ აბასმა გორში მისვლისთანავე იმერეთში სარუხოჯა მოკამედ რეზა გაგზავნა და მეფე გიორგი მესამეს შეუთვალა: თქვენ ჩემი ქვეშევრდომნი — ლუარსაბი და თეიმურაზი შეგიხიზნია: გთხოვთ, უკანვე გამომიგზავნოთ ორავენი; სამაგიეროდ დიდძალ ოქრო-ვერცხლსა და თვალ-მარგალიტს მოგართმევთ; მაგრამ უკეთუ ჩემს თხოვნას არ შეიწყნარებთ, „შარუხ დაპრაიანი“ ჯარი უნდა გამოგზავნო ბაში-აჩუკის ასაოხრებლად!

გიორგი იმერთა მეფემ გეგუთში, დიდი ჭადრის ქვეშ მიიღო შაპ აბასის ელჩი. მიღებას, ლუარსაბთან და თეიმურაზთან ერთად, ესწრებოდნენ ლევან II დადიანი და მამია II გურიელი.

წერილი წაიკითხეს და ძალიან გაიკვირვეს, რომ შაპი ქართველ ხელმწიფეს სტუმრების ღალატს სთხოვდა! როგორ მოხდება, რომ ქართველმა კაცმა სტუმარი, გინა ძმა და შეილი გაჰყიდოსო, — ჯავრობდა გიორგი მეფე — ანდა ქართლსა და კახეთს იმერეთი როგორ უღალატებსო?!

მერე, უცებ ეს იკითხა გიორგი მეფემ: „შარუხ დაპრაიანი“ რალა არისო?

„შარუხი ქალამანია და დაპრა წალდიო“, — უპასუხეს.

სიცილი აუვარდა გიორგის: პირდაპირ საოცარია, იმერლებს ქალამანითა და წალდით რავა გვაშინებენო?!

ბოლოს გული დაიდინჯა გიორგიმ, რადგან შაპ აბასი მაინც შაპ აბასი იყო, და პასუხიც დროიანად და შნოიანად უნდა გაეგზავნა „ერანის ლომისათვის“.

მეფემ შაპთან გასაგზავნ ელჩებად შეარჩია დასავლეთ საქართველოს კათალიკოსი, „ანგელოზის მსგავსი“ მალაქია და თავადი ლევან აბაშიძე. მათ ჩააბარა შაპისათვის წერილი და ძღვენი და სარუხოჯასთან ერთად გაგზავნა გორში.

ხუმრობის მოყვარულმა გიორგი მეფემ თავისი არ დაიშალა და ასეთი „მწუთხე შეგონება“ დაადევნა ელჩებს: თუ შაპმა მუქარაზე ხელი არ აიღო და მაინცდაშაინც იმერეთისკენ ლაშქრობა გადაწყვიტა, მოახსენეთ — ბაში-აჩუკები სია-

მოვნებით შეგხვდებიან და აქაურ იმერულ ღომს, რამდენსაც ინებებ, იმდენს გაჭმევენ-თქო!..

შაჰ აბასმა დიდის პატივითა და თავაზით მიიღო „ბაში-აჩუკის“ ელჩები.

წერილი წაიკითხა და ძალიან ემწუთხა, რადგან იმ წერილში გიორგი მეფე ასე პასუხობდა შაჰის მოთხოვნას: თქვენ დიდი ხელმწიფე ბრძანდებით, მაგრამ არც ჩვენ ვართ უგვარონი, — ლეთაებრივი დავითის შთამომავალნი გახლავართო; ჯარით დამუქრება რა საკადრისია, ანდა მუქარით და ძალისძალად რა საქმე უნდა გამოეწყოსო! მერე, — ლუარსაბი და თეიმურაზი ჯერ ერთი ჩემი სტუმრები არიან, მეორეც — ნათესაეები, მოკეთენი და მოკავშირენი; განა, ყოვლად უზნეობა და სიმდაბლე არ იქნება, რომ მე ისინი ასე უღვთოდ და უსამართლოდ გავიმეტო?! ან ისეთი რა დააშავეს ლუარსაბმა და თეიმურაზმა, — განა, დანაშაულია, რომ თქვენ გაგერიდნენ და ჩემთან მოვიდნენ? მე კი პირიქით მგონია, — ქვეშევრდომი რომ ბატონს ერიდება, დანაშაულად კი არა, ერთგულებად უნდა ჩაეთვალოს... ახლა ჩემი რჩევა ესე არს, ბრძენო შაჰ აბას: ნება მიეცით ლუარსაბსა და თეიმურაზს დაბრუნდნენ თავიანთ სამეფოებში; თქვენ აიყარეთ თქვენის ჯარებით, დაბრუნდით ერანს, ხოლო ლუარსაბი და თეიმურაზი განაგრძობენ მეფობას და თქვენს ერთგულ სამსახურს სწორედ ისე, როგორც შაჰი წინაპარი მეფენი ემსახურებოდნენ თქვენს წინაპრებს!

კათალიკოს მალაქიას და ლევან აბაშიძეს „ღომის ჭამა“ არ უხსენებიათ, მაგრამ სიტყვიერად ბევრს ეცადნენ შაჰის გულისწყრომის დასაცხრომად და მშვიდობის ჩამოსაგდებად.

კარგა ხანს ფიქრობდა შაჰი, უამური საფიქრალით დამძიმებული. მერე ეს უთხრა მალაქიას და ლევანს „მწუხარედ“: თეიმურაზის ბრალია ყველაფერიო; ლუარსაბზე კი სასაყვედურო არაფერი მეტქმისო, თეიმურაზი არის ჩემი მოსისხლე; თეიმურაზმა დამაკარგვინა ლუარსაბი, რომელიც მე ჩემს თავზე მეტად მიყვარდა და ახლაც მიყვარსო.

„ამიტომ გთხოვთ, — მიმართა შაჰმა ელჩებს, — გადასცეთ ლუარსაბს, ნუ აპყვება თეიმურაზს, ჩემი სისხლის მონატრულს; სთხოვეთ მეფე გიორგის, დაარწმუნოს ლუარსაბი, მო-

შორდეს თეიმურაზს, მოვიდეს ჩემთან და ვიძლევი საშინელ ფიცს — მივართმევ ქართლის მეფობასაც და იმდენ მისართმეველსაც, ქვეყანა რომ მას შენატროდეს“.

ეს დააბარა შაჰმა ელჩებს და ორივეს უხვი საბოძვარი მიუბოძა — სასულიეროსაც და საეროსაც.

იმერეთს გაბრუნებულ მალაქიას და ლევანს შაჰმა ისევ გააყოლა სარუ ხოჯა, რომელსაც ლუარსაბ მეფესთან ცალკე წერილი მიჰქონდა.

წერილში ეწერა:

„მამაცთა ხელმწიფე შაჰ აბასი დიდი სიყვარულით სალამს უძღვნის ქართველთა მეფეს ლუარსაბს. მრავალჯერ მოგწერეთ სიყვარულით და გავამეღავნეთ ჩვენი გულის კეთილგანწყობილება შენს მიმართ, მაგრამ არ უსმინე და არ დაუჯერე ჩვენს სიტყვებს. შეხედე ჩემს ნამოქმედარს და ირწმუნე, რადგან დაინახავ, რომ თეიმურაზის ქვეყანა ავაოხრე, ხოლო შენსას გაშენებულსა და ხელუხლებელს ვინახავ შენთვის და გელოდები შენს მოსვლას. ახლა ნუღარ დაიხარებ მოსვლას, უქკუო და უგუნურ მრჩევლებს ნუ დაუჯერებ და შენს სამეფოს ნუ დაკარგავ, რადგან გულში არც მტრობა და არც ბოროტება არა მაქვს შენდამი, ისევე როგორც შენ არავითარი ზიანი არ მოგიყენებია ჩემთვის. შენ მოსვლას იმისთვის გთხოვ, რომ როგორც ჩვენი წინაპრების დროს იყო ერთობა ორ ხალხს შორის, მსურს რომ ჩვენს დროშიც ისევე დარჩეს. ჩრდილოეთის ყველა მხარეს, რომელიც მდინარე არეზის აქეთა ნაპირზე მდებარეობს, შენ მოგანდობ, რათა იყო ზედამდგომელი და მბრძანებელი ყველა დიდებულისა, რათა შენ მზრუნო ამ მხარეზე, ხოლო ჩვენ მასზე სადარდებელი არ გვექნეს და მეორე მხარეზე ვიზრუნოთ. იყავ მშვიდობით!“

სარუ ხოჯა იმერეთიდან მარტო დაბრუნდა. მხოლოდ ლუარსაბ მეფის წერილი ჩამოუტანა მბრძანებელს.

წერილში ეწერა:

„დიდო შაჰ აბას, თუ ქეშმარიტია შენი სიტყვები და მართლა გსურს, რომ ჩვენს შორს მეგობრობა სუფევდეს, შენი სიყვარულისა და მშვიდობის ნიშანი ის იყოს, რომ შენ გაშენებულსა და ხელუხლებელს დატოვებ ჩვენს ქვეყანას და ჩვენს ხალხს ნებას დართავ დარჩეს თავის სამშობლოში. შენს ნაცვ-

ლად მანდ ერთ-ერთი შენი დიდებულთაგანი დატოვე, რათა სიყვარული, ერთგულება და კავშირი, — რომელიც შენ გწადიან, — მისი შუამდგომლობით განვამტკიცოთ შენთან. შენ კი აიყარე და წადი ჩვენი ქვეყნიდან. ჩვენც დავბრუნდებით, დავებატრონებით ჩვენს ქვეყანას და სიყვარულითა და ერთგულებით ვიქნებით შენთან. იყავ მშვიდობით!”

შავ დღეში ჩავარდა შაჰ აბასი.

არ დაშინდა და ქედი არ მოიხარა არც ერთმა ქართველმა მეფემ — არც „ცბიერმა ბაში-აჩუქმა“, არც „მოსისხლე თეიმურაზმა“ არც „თვინიერმა ბიჭმა ლუარსაბმა“.

არც იმერეთთან დამუქრებული ომი გამოდიოდა. ჯერ ერთი, დიდად სამძიმო და სახიფათო იყო ლაშქრობა იმერეთში; სადაც კბილები ამოდ დამტვრეოდა ყველა დიდ დამპყრობელს. მეორეც — იმერეთი ოსმალეთის „გავლენის სფეროდ“ ითვლებოდა და მასთან ომი სტამბოლის კართან დადებული ზავის დარღვევას მოასწავებდა.

არა და, ერანის ლომს არ შეეძლო შერიგებოდა ასეთ მარცხს, დამცირებასა და თავლაფდასხმას.

და ასეთ მწვავე ჟამს ისევ გამოუჩნდა „მხსნელი“ მოულოდნელად „ბედნიერ შაჰს“.

ეს იყო „ბოროტების მსახური, წყეულის შვილი, ეშმაკი-საგან აღძრული, სატანის კერძი“ შადიმან ბარათაშვილი, ლუარსაბ მეფის გამზრდელი მამა-მძუძე და სუფრაჯი, სამეფო სუფრის მოურავი, გიორგი სააკაძის დაუძინებელი მტერი.

მივიდა შადიმანი და დაემხო შაჰის წინაშე. ენით მოსლიქა „კეთილშობილების ნობი“ და შეჰლადადა: თუ მიბრძანებ, მე გადმოვიყვან ლუარსაბ მეფეს იმერეთიდანო; მე ერთადერთს — მის გამზრდელსა და მამა-მძუძეს დამიჯერებს ჩემი გაზრდილიო.

უსაზღვროდ გაიხარა აბასმა. აურაცხელი მისართმეველით აგავსებო და ღირსეულად აგამალებო, აღუთქვა შადიმანს: მოსდგა და ახლა ამ უქვემოესად სულმდაბალ თავადს უმტკიცა შაჰმა:

„მე მეფე ლუარსაბს როგორ წავახდენ, მეფის სვიმონის შვილიშვილსა და მეფის გიორგის შვილსა მე ავსა და ურთიგოს როგორ ვკადრებ, მაგრამ თეიმურაზმა მიცდინა და მოს“

მითყუა მოსიყვარულე გულის მქონე ლუარსაბი. ესე იცოდე, თუ მეფე ლუარსაბ მოვა და შემომირიდება, დიდს წყალობას გუზამ და გავამდიდრებო“, თქვა შაჰ აბასმა „და მისცა ფიცი საშინელი და საფიცარი და იტირა ბევრი“.

„თქვენი ხმალი და ჩემი კისერიო“, შეჰლაღადა შადიმანმა და ერთჯერ კიდევ გაულოკა ფეხისგულები გადამთიელს.

გამოიძახა სარუ ხოჯა შაჰმა და უბრძანა, ახლა შადიმან ბარათაშვილს ხლებოდა ბაში-აჩუკის ქვეყანაში.

სარუ ხოჯას ლუარსაბისათვის გადასაცემად „წიგნი საფიცარი“ და ოქროს ხმალი გაატანა შაჰმა.

ერთი წერილიც საიდუმლოდ გადასცა სარუ ხოჯას. ამ წერილით აბასი გიორგი მეფეს ატყობინებდა: თუ ლუარსაბი გაჯიქდება და არ წამოვა, მაშინ შენი შვილი ალექსანდრე გამომიგზავნე და იმას გადაეცემო ქართლს.

სარუ ხოჯას ევალეზოდა ეს წერილი ჯერ ლუარსაბისთვის წაეკითხვინებია და თუ წამოსვლაზე დათანხმდებოდა, იგი გიორგისთვის აღარ უნდა ეჩვენებია.

ბოლოს შაჰმა ცოლს დაუძახა — ლელა-თინათინს, და შეუჩნდა: ხომ იცი, როგორ მიყვარს შენი ძმა, მაგრამ თეიმურაზი და გიორგი მეფე მიბრძოლებენ და აღარ მეკარებაო; ამიტომ მისწერე წერილი, ნურავის ყურს ნუ უგდებს და მოვიდეს ჩვენთან — საყვარელ დასთან და სიძესთანო.

ლელა-თინათინს ქმრის ვერაგობაში ეჭვი არ შეუტანია, ისე დაუწერია წერილი ლუარსაბისადმი.

ეს წერილიც წარიტანეს შადიმანმა და სარუ ხოჯამ და სასწრაფოდ გაქუსლეს იმერეთისკენ...

აილო ლუარსაბ მეფემ შაჰისაგან გამოგზავნილი მურასა ხმალი.

წაიკითხა შაჰის „წიგნი საფიცარი“.

წაიკითხა გიორგი მეფისთვის განკუთვნილი წერილი.

წაიკითხა დის წერილი.

მოისმინა შადიმან ბარათაშვილის „მამაშვილური“ შეგონებანი, ფიცი და მტკიცი. და შადიმანმა, „იმ სატანისკერძმა, როგორც გველმა ევა, ისე დაიყოლია და დაითანხმა ლუარსაბის გონება შაჰთან წასვლაზე“.

გიორგი მეფისადმი შაჰის წერილმაც ეჭვები აღუძრა

ლუარსაბს, ვინ იცის, იქნებ შეთქმულებაც მომიწყონ ვრანისა და იმერეთის ხელმწიფეებმაო.

იმ დღეს მაინც სულ არ მოეწონა იმერეთის მეფის კადნიერება: რა არის და — ლუარსაბის წინაშე გიორგი ქუდმობდილი და ფეხი ფეხზე შემოდგმული დაბრძანდა!

„მტერმა, რაც ნებავს, ის მიყოს, მაგრამ ჩემზე უმცირესისაგან დამცირებას ვერ მოვითმენო!“

ეს ჩაიბუზღუნა და „მაშინლა დააჯერა გული მეფემან ლუარსაბ და აემზადა წასასვლელად“.

მიეხვივნენ: დედა თამარი, დაი ხორეშანი, სიძე თეიმურაზი, მასპინძელი გიორგი მეფე, ოდიშისა და გურიის მთავრები, იმერელი დიდებულები — ნუ იქნები ესოდენ გულუბრყვილო, ნუ გაბრიყვდები და ნუ ენდობი ვერაგ შაჰ აბასსო; „ცხარე ცრემლით სტიროდნენ“ და არწმუნებდნენ, ხელი აელო შაჰთან წასვლაზე.

— ნუ დაუჯერებ მაგ ორგულსა და ვერაგ მხეცს. მაგას ჩვენი სისხლის დაღევა სწყურია! — ყვიროდა თეიმურაზი, — ქრისტიანი მეფენი ქვეშევრდომიდაც აღარ სურს შაჰ აბასს, უნდა ჩვენს ადგილზე ხანები და ბეგები დასვას. ძმა შენ არა გყავს, შვილი და ძირი. თუ მიხვედი, შენც მოგკლავს და ქართლსაც სახანოდ გადააქცევს!

ოდიშის ახალგაზრდა მთავარი, ლევან დადიანი, ადრე დათქმული ქორწინებისკენ მიანიშნებდა ლუარსაბს: ბარემ ჩემი დაი ცოლად შეირთე და შაჰ აბასთან წასვლაზეც ხელი აიღეო.

მაგრამ ლუარსაბს უკვე მტკიცედ გადაეწყვიტა და ასევე მტკიცედ და შეუვალად გამოაცხადა:

— შაჰი მოვიდა და დადგა ჩვენი სამშობლოს შუაგულში და მოხოვს მშვიდობის ჩამოგდებას. უკეთუ არ მიუვალ, მთელს ქვეყანას იავარპყოფს, ააოხრებს და წაბილწავს, ეკლესიებმ დაანგრევს, ქართველობას ამოხოცავს და ტყვედ წაიყვანს. დამ ყოველივე ამის მიზეზი ვიქნები მე. სინდისდამძიმებულ ცხოვრებას ამ ხანმოკლე საწუთროში და ამდენი ხალხის ცოდვან ტვირთვას, უმჯობესია ვეახლო შაჰს და ვიხსნა მთელი ქვეყანა, რამეთუ ჩემის მიზეზით ჩემი სამშობლო არ აოხრდეს. ღვთიან იმედით პირდაპირ წავალ მასთან, ხოლო იქ რაც მომელის,

სიკვდილი თუ სიცოცხლე, იყოს ნება კურთხეული უფლისა!
ვის რაღა ეთქმოდა?!

დიდებული იყო სიტყვა იგი — უზემოესი მამულიშვილო-
ბით შთაგონებული, თქმული საოცრად მომზიბლავი ჭაბუკის
პირით.

თითქოს დემეტრე თავდადებული აღმდგარიყო მკვდრე-
თით.

და წამოვიდა იმერეთიდან ქართლისაკენ ლუარსაბ მეფე.
საწერეთლომდე მიაცილეს დედამ, დამ, სიძემ, მასპინძელ-
მა, მთავრებმა, დიდებულებმა.

ცრემლთა თხევით დაემშვიდობენ და გაბრუნდნენ.

მოდდიოდა სახეცისკროვანი ჭაბუკი.

წინ სატანა მოუძლოდა.

„უკან დაბრუნება აღარ მიწარიბა“

შაჰი ლიხის მთის კალთებზე ნადირობდა.

ნადირობა მიზეზად ჰქონდა, თორემ სინამდვილეში ლუარ-
საბ მეფის შესახვედრად მისულიყო იმერეთის საზღვართან.
მოუთმენლად კი ელოდა სიძე ცოლისძმას.

გამოჩნდა ლუარსაბ მეფე.

წინ სატანა მოუძლოდა — შადიმან ბარათაშვილი.

უკან სარუ ხოჯა მოსდევდა.

ილტაცებულმა შაჰმა ცხენი გააჭენა, ლუარსაბს ზედ მიეჭ-
რა, გადაეხვია და შეჰბლავლა ცრემლების დაბადუბით:

— როგორ შემიძლია მოგაგო ბოროტი რამე ეგზომ ახო-
ვანსა, მშვენიერსა და ერთგულსა ძესა ჩემსა?!

იღიმებოდა ლუარსაბ მეფე.

თან უკვირდა: ტირილიც შესძლებიაო „ყოვლისშემძლე“
შაჰ აბასს!..

უხაროდა შაჰს, — ამ „გველის ბუნების“ სპარსელს, „დი-
დად დახელოვნებულ ვეშაპს“, „იმიტომ ჰხარობდა თავის
გულში და სულში, რომ ეს დღე მისთვის უფრო ბედნიერი

იყო, ვიდრე მისი ცხოვრების ყველა სხვა დღე, რადგან აღსრულდა ბოროტი სურვილი, რომელზეც დიდი ხანია ოცნებობდა“.

მაშინვე დიდი მისართმეველი მიართვა აბასმა ლუარსაბს. დიდებული სანადიმო სუფრაც გაუშალა და რამდენიმე დღე ანადიმა და ინადიმა „სვებედნიერმა ვეშაპმა“.

მერე გორში ჩაიყვანა დიდის ზარზემით სიძემ ცოლისძმა.

აქაც „დიდის სიყვარულითა“ და „სიწრფოებით“ ინადიმეს და ინადირეს.

ხალხს უკვე, სარწმუნოდ ეჩვენებოდა, რომ შაჰის გულში ლუარსაბის სიყვარულის მეტს არაფერს გაუჭაქანებია.

მაინც ეშინოდა შაჰ აბასს, — ვაითუ ლუარსაბს ვინმე ქართველმა „გული გამოუცვალოს და შფოთი აღადგინოს“.

გორიდან აიყარა და ტფილისისაკენ გაიყოლია ლუარსაბი.

„წარვიდეთ ტფილისსაო და ვილხინოთ მუნცაო და შევექცეთო“. მერე მე წავალ ერანისაკენ, ხოლო შენ ტფილისში დარჩებო, ვითარცა მეფე ქართლისა ქართლის სატახტო ქალაქშიო!

ამაზე უფრო სასურველი რაღა უნდა ჰქონოდა ლუარსაბ მეფეს!

მცხეთიდან ტფილისამდე გამწკრივებულ სპარსელ ჯარებშ შორის გაიარეს ერანისა და ქართლის გვირგვინოსნებმა.

იყვნენ ერთ ხანად ტფილისში მოსვენებით, „განსვენებით“ და განცხრომით.

ლუარსაბს სული მისდიოდა, — როდის აიყრება, გამშორდება და გადაქარდებაო ერანელი სულთამხუთავი ტფილისიდან...

ეს „ნანატრი დღეც“ დადგა.

ჯერ, შაჰ აბასმა ტფილისის ციხეში სპარსული ციხიონი შეაყენა; ციხიონის უფროსად აგრეთვე სპარსელი დანიშნა — სოჰრაბაღა ლარიჯანი.

მერე, „ნებაყოფლობით შაჰისეგანებად“ ჩაწერილი ქართველები დედაბუდიანად აჰყარა, ათასეულებად დაალაგა და ერანის ცრემლიან გზებს გაუყენა.

ნახატურივით გაშტერებული და გამშრალი იდგა ქართველთა მეფე.

ბოლოს შაჰი ლუარსაბს მიადგა და „აღერსიანად“ უთხრა — წავიდეთო!

„წავიდეთო“?!

რატომ ითქვა ეს სიტყვა მრავლობითად?!

განა მარტო, ულუარსაბოდ არ უნდა წასულიყო შაჰი?!

უფრო „გარკვევით“ უთხრა შაჰმა:

— ყარაიას ველზე გავიდეთ ერთად, ვინადიროთ და შევიქცეთ ნადირობითა და ლხინითა. მერე შ.ს უკან დაგაბრუნებ — ტფილისს, ხოლო მე წავალ ერანს.

გული გაებზარა ლუარსაბს.

აღმათ, აღარ აპირებს დაეხსნას „ვერაგი ვეშაპი“ ქართლის ხელმწიფეს.

და გაჰყვა ყარაიას სანადიროდ.

საღდაც ახლოს გიორგი სააკაძის მძლავრი, სუსხიანი სუნთქვა ისმოდა.

• • • • •

დიდხანს ითმინა გიორგი სააკაძემ, მაგრამ რაკი შაჰმა არა სთქვა, ტფილისიდან გასვლის წინ მაინც იკითხა მოურავმა, ვინ რჩება ქართლის გამგებლადო?!

ფარსადან ციციშვილიო, შეამყრაღა სახეში აბასმა.

ფარსადანო?!

ნუთუ ასე ასრულებს შაჰ აბასი აღთქმულ პირობას: აკი შენ, გიორგი სააკაძეს დაგსვამო ქართლის გამგებლად?!

მერე, ვთქვათ „არ ენდო“, ან „არ გაიმეტა“ ქართლი სააკაძისთვის, მაგრამ ამ ფარსადან ციციშვილმა მაინც რით დამსახურა ლუარსაბ მეფის „მონაცვლეობა“?!

ფარსადან ციციშვილი — სააკაძის მოსისხლე მტერი ამჟობინა შაჰ აბასმა სააკაძეს?!

ვაი შენს თავს, გიორგი სააკაძევ!

• • • • •

ყარაიას ველზე ნადირობდნენ შაჰ აბასი და ლუარსაბ მეფე, იქვე, მალლობიდან ლელა-თინათინი ქალთა ამაღილ სჭვრეტდა ძმისა და ჭმრის სანადირო პაექრობას.

შაჰი ხელუცთომელი მონადირე იყო, მაგრამ მაინც დას-

ჯაბნა ქართველთა მეფემ: მან ცხრამეტი ნადირით დააქარბა
ერანელს.

შება-დიდება შეასხა აბასმა ლუარსაბს, მოუფერა და მოუ-
ალერსა, მაგრამ მალულად შურით გაიტენა და გული „გაუპ-
ტერდა“ ქართველი ჭაბუკისაჲში საგნებლად და საბორო-
ტოდ.

დამ მიიხმო ლუარსაბი და უჩურჩულა იდუმალ:

— ჩემო ძმავო, ძალიან გამორჩევით ნუ აჩვენებ შაჰს შენს
სიმარჯვეს, ვაჟკაცობას და ახოვანობას. მე ვიცი მისი ხასია-
თი, — შურიანი და ხვანჯიანი კაცი; პირადად ვერას გეტყვის,
მაგრამ გულში შენი სიკეთე ეწყინება და ვინ იცის რას წაგკი-
დებს...

ლუარსაბმა ხელი ჩაიქნია და ეს უთხრა დას და დედო-
ფალს ერანისას:

— აწ რა ვქნა და რა გაეწყობა, ჩემო დავო, — ან რაღა ბე-
დენაა, ავად ვეჩვენები თუ კეთილად; ეს ხომ ვიცი, აღარ გა-
მიშვებს შაჰ აბასი და, — რაკი უკან დაბრუნება აღარ მიწერია,
ისევ სჯობია, მტერსაც და მოყვარესაც კარგად ვსჩვენო, ვიდ-
რე ცუდად.

თქვა და უპირა მათრახი ცხენს მონადირე-მეფემ.

წამოიწია შაჰ აბასი ლუარსაბს და უთხრა:

— ვინაითგან ხარ ამისთანა მონადირე, რაინდი და უცოთუ-
რი მოისარი, წარვიდეთ და მოვინადიროთ ყარაბაღიცა, რა-
მეთუ არის ყარაბაღი დიად კარგი სანადირო, სალბინო და შე-
საქცევარი, ხოლო ყარაბაღიდან უკან დაგაბრუნებო, ტფა-
ლისს.

„წავიდეთო“, თქვა ლუარსაბმა მშრალად, ჯადონაძგერა-
ლივით.

ყარაბაღსაც ეწვივნენ და ახლა იქ გააჩურეს ნადირობა და
ნადიმობა სიძე-ცოლისძმამ.

მკითხველს ახსოვს წინასწრობილად ნათქვამი: კახეთში
შემოჭრის წინ შაჰ აბასმა განჯიდან თურქეთში ელჩი გაგზავ-
ნა — სულთან მოჰამედ-ბეგ თალიში. ახლა აქ ყარაბაღში მო-
ბრუნდა და შაჰს ეახლა მოჰამედ-ბეგი. ეახლა და მოახსენა:
თურმე თეიმურაზსა და ლუარსაბს იმერეთიდან სტამბოლში
ხონთქრისათვის „უმდაბლესი არხები“ გაუგზავნიათ, ოსპა-

ლეთის ქვეშევრდომობა შეუთავაზებიათ და ერანის წინააღმდეგ საომარი დახმარება უთხოვიათ.

გველის კაპრობა აუვარდა შაჰ აბასს.

ლუარსაბისა და თეიმურაზის სისხლი არასოდეს ისე არ სწყურებია, როგორც ახლა სწყუროდა.

მაგრამ თეიმურაზი შორს იყო და ისევ ლუარსაბს უნდა ეზლო ორივეს სისხლი.

დრომდე მაინც დაიწყებდა რისხვა აბასმა.

თურქეთში ახალი ელჩი აფრინა ხონთქარის დასამშვიდებლად და დასაშოშმინებლად.

დიდძალი საჩუქრებიც გაატანა იმ ელჩს — სულ საქართველოში ნაძარცვი ნივთები, — მათ შორის თორღას საგანძურადან მოტაცებული, თვალმარგალიტით მოჭედილი საეპისკოპოსო გვირგვინი.

ლუარსაბს მოუსვენრობა დაეტყო.

შაჰმა იფიქრა, არ გამეპაროსო ქართველი მეფე, და...

და ერთ დღეს შაჰ აბასმა ლუარსაბ მეფეს თავზე დაადგა ძვირფასი ქვებით მოჭედილი ოქროს ჯილა.

— ეს ჯილა ჩემი სიყვარულის ნიშნად გქონდეს და ყოველთვის თავზე გედგას ჩემთან შეხვედრის ეამს! — უთხრა აღერსიანად აბასმა.

რამდენიმე დღე ასე ხედებოდნენ ერთმანეთს: ჯილით თავშემკობილი ლუარსაბი ეგებებოდა „სიყვარულით და სიხარულით აღსავსე“ შაჰს.

მაგრამ ერთხელ ლუარსაბი თავშიშველი შეხვდა ერანის ხელმწიფეს.

— ჯილა სად არის, შვილო და ძმაო?! — შეშფოთებით იკითხა შაჰმა, როცა ისინი სპარსელ დიდებულებთან ერთად მიუსხდნენ სუფრას.

— დაკვარე, — სინანულით თქვა ლუარსაბმა.

— რანაირად, შვილო და ძმაო?

— წუხელის მქონდა, ამ დილით კი ვეღარ ვიპოვნე. ალბათ, მოშპარეს. სხვა რამ ნივთებიც წაულიათ ქურდებს.

„ქურდებმა მოშპარესო?!“ იყვირა შაჰმა და სისხლიანი თვალები დაუტრიალა სპარსელ დიდებულებს:

— განა სიკვდილის ღირსი არა ხართ, რომ თქვენის უყუ-

რადღებობით და ბედოვლათობით ასეთი სირცხვილი მაჭამეთ? ჩემი სტუმრის, მოკეთისა და მოყვრის სავეანებელში შედიან ქურდები და იპარავენ მის ნივთებს! ამაზე საშინელი რაღა უნდა მოხდეს!.. ახლა გიბრძანებთ: ყარაულად დაუნიშნეთ, ლუარსაბ მეფეს ყველაზე მამაცი და ფხიზელი ჩაუშვებო, რათა დღე და ღამე თვალმოუხუჭავად დაიცვან მისი სიცოცხლე და ქონება, დღე და ღამე არ მოშორდნენ არც მის კარავს, არც თვითონ მას კარვიდან ფეხგადგმულს, თორემ... თორემ, თუ კიდევ მსგავსი სირცხვილი მაჭამეთ, ყველას დედაბუნად ამოგვლიტავთ!

ადვილი მისახვედრი იყო, რომ ის ძვირფასი ჯილა სწორედ შაჰის გაწვრთნილმა ქურდებმა მოიპარეს მისი დავალებით.

მიზანი მიღწეული იყო მაღალი „ზნობრივი სტუმარ-მასპინძლობის“ დაცვით: ლუარსაბ მეფე ველარსად გაიქცეოდა. მას შაჰის ძლიერი საყარაულო დაცვა ადგა თავს.

მომდევნო დღეს შაჰი ისევ მიადგა ლუარსაბს და „ალერსიანად“ უთხრა:

— ახლა მაზანდარანს გავეშუროთ მე და შენ, რამეთუ შესანიშნავი სანადიროა სამოთხისებური მაზანდარანი. წარვიდეთ, დრო ვატაროთ და შევექცეთ!

ისევ ნახატურივით უხმო და განლიგებული შეხვდა ლუარსაბი შაჰის ახალ გაწვევას.

მაზანდარანსაც მივიდნენ.

იქაც უზომოდ ინადირეს და ინადიმეს.

მაზანდარანში სასიხარულო ამბავი მოუტანეს შაჰ აბასს სახრეთიდან მოკრილმა ფაიქებმა: დაუღ-ხან უნდილაძემ პორტუგალიელები დაამარცხა, ზღვაში გადაარეკა და ქალაქი გომბრუნნი მთელი ზღვის განაკიდურით სპარსულ დროშებს დაუმორჩილო!

ზეცას ეწია აღტაცება შაჰ აბასისა:

— ამიერიდან გომბრუნს დაერქმევა ბენდერ-აბასი და იქნება ერანის დიდი ნავთსადგური! — ბრძანა შაჰმა და მაშინვე დასძინა: დიდი კაცი იყო ალავერდი-ხან უნდილაძე, დიდი არს მისი უფროსი ძე იმამყული-ხან, — მაგრამ მამაზე ღმამაზე იღბლიანი მგონია მე უმცროსი უნდილაძე.

თქვა და უფრო „ხალისიანად“ მიუბრუნდა ქართლის მეფის „საქმეს“.

აქ, მაზანდარანში, ბოლოს და ბოლოს უნდა თქმულიყო, რას უპირებდა შაჰ აბასი „სიყვარულსა და ალერსში ჩაძირულ ტყვეს“.

და უთხრა კიდევაც აბასმა ლუარსაბს: ქრისტიანობა უნდა დააგდო და მაჰმადიანობა უნდა მიიღო!

„რაო?! ქრისტიანობა განვუტეო და ისლამი ვიტვიროთო? მაშასადამე, მე — ქართველთა მეფე ლუარსაბმა, ძემან გიორგისამან და შვილიშვილმან დიდი სვიმონისამან — ქართველობა დავაგდო და გავთათრდე?!“

— არასოდეს არ მოხდება ეს! — გადაჭრით თქვა ლუარსაბმა.

შეუჩნდა შაჰი. აღუთქვამდა უთვალავ სიმდიდრეს, პატივს, აღზევებას. მაგრამ ვერ იქნა და „ვერ მძლე ექმნა“.

ისევ რისხვას და მუქარას მიმართა შაჰმა, მაგრამ ლუარსაბმა „არად შერაცხა რისხვა მძლავრისა, არამედ ეგო, ვითარცა ანდამატი და შეუძვრელ, ვითარცა კლდე, და უშიშყო, ვითარცა ლომი საყოფელსა თვისსა“.

ბრძანა შაჰმა, შეიპყრეს ლუარსაბ მეფე და ჩააგდეს ასტრახადის ციხეში.

(ხმები დადიოდა — გიორგი სააკაძემ ჩააგონაო შაჰს ლუარსაბის შეპყრობა).

— მერე შირაზს გადაიყვანა და გულაბყალას ციხეში ჩააგდო შაჰმა ქართველთა მეფე.

(ხმები დადიოდა — გიორგი სააკაძემ ჩააგონაო შაჰს ლუარსაბის გადაყვანა გულაბყალას, რადგან ასტრახადს შეიძლება ზღვით რუსები მოადგნენ და გაიტაცონო ქართველი მეფე).

იმ დღეს გიორგი სააკაძეს წვეულება გაემართა.

სტუმრად გათათრებული ქართველებიც იყვნენ და „ქართველთა მოყვარული“ სპარსელი დიდებულებიც.

ის იყო სანადიმო სუფრას მიუსხდნენ, რომ დარბაზში კაბუკი შემოვიდა, ტანით მძლავრი და ახოვანი, სახით ჭკვიანი და დიდად მეტყველი.

ფეხზე წამოვარდა სააკაძე, მიეგება, თაყვანი სცა და ოდრიკალად მოკეცილი წარუძღვა სუფრისაკენ. თავის ადგილზე დააბრძანა, ხოლო თვითონ მოწიწებით დაუდგა გვერდით.

ქართველებიც წამოშლილიყვნენ და მდაბლად ესალმებოდნენ სტუმარს.

სპარსელები სახტად დარჩნენ. სააკაძე შაჰსაც არ ეთაყვანება ისე, როგორც ამ ჭაბუკს დაეგო ფეხქვეშო. მაინც ვინ არის ჩვენი ახალი სტუმარიო, იკითხეს აქეთ-იქიდან.

ხოსრო-მირზა გახლავთ, ძე ჩემი ხელმწიფისა და პატრონის დაუდ-ხანისა, — საზეიმო ხმით გამოაცხადა მასპინძელმა.

— მაშ, ბაგრატ-მირზას ძმა ყოფილა, — წამოიძახა რომელიღაც სპარსელმა.

— დიახ, უმცროსი ძმა, — დაუდასტურა გიორგიმ.

ხოლო ქართველებს აღარაფერი უკითხავთ, რადგან ისინი ისედაც კარგად იცნობდნენ ხოსრო-მირზას. იგი დაუდ-ხანს ერანში შეეძინა საქართველოდან წაყვანილი წავესიელი გლეხის ქალისგან, ასე რომ, ხოსრო-მირზა ბაგრატ-მირზას ნახევარძმა იყო. ბაგრატ-მირზა, დაუდ-ხანის „კანონიერი შვილი“, თავიდანვე დიდ პატივში იყო შაჰის კარზე, ხოლო ხოსრო-მირზა „მირზა-ბატონიშვილად“ არც ითვლებოდა. მას „ხარჭის ნაშობს“, გინა „ნაბუშარს“ ეძახდნენ და გიორგი სააკაძის ჩამოსვლამდე ისფაჰანში დედასთან ერთად დიდ ხელმოკლეობასა და უპატიურობაში ცხოვრობდა.

ახლა გიორგი სააკაძეს „რატომლაც“ თვალი დაუდგამს ამ ყმაწვილისთვის, ხელს უმართავს, მფარველობს, შაჰის კარისკენ ექაჩება და „რაღაცასთვის“ ამზადებს კიდევ.

ადრე სააკაძე დიდი სვიმონ მეფის ყმად აცხადებდა თავს, ახლა კი აუჩემებია — ჩემი „ხელმწიფე და პატრონი“ დაუდ-ხანი იყოო (ქართველი ხალხის გამყიდველი და მოღალატე დაუდ-ხანი?!).

არა, — „რაღაცას ახალს“ ამზადებს გიორგი სააკაძე!

„რაღაცა კი არა, აშკარაა — ლუარსაბ მეფის „მეტოქი“ გამოუძებნია სააკაძეს“, — დაასკვნეს ქართველებმა...

ვისაც რა უნდოდა, ის „დაესკვნა“ და, — მეორე დღეს შაჰ აბასის „სახეპურო ერის“ დარბაზობაზე გიორგი სააკაძის გვერდით იდგა ხოსრო-მირზა.

სპარსეთში დედა-დედოფალი ყოველ-
თვის ქართველ მეფეთა შთამომავალია.

ქონ ფ რ ა ი ე რ ი

საქართველოდან დაბრუნებულ შაჰ აბასს ქართველთა „მძულვარების სამთვარიო“ სჭირდა.

მთელი თვე ქართველები სჩულდა, განურჩევლად — გათო-
რებულნიც და გაუთათრებელიც.

მთელი თვე გიორგი სააკაძე სასახლეს არ გაჰკარებია, რადგან მან კარგად იცოდა, როდის სძულდა და როდის უყვარდა ქართველები ბნელიან მბრძანებელს.

დრო დაუდგათ ქართველთა და სომეხთა მოძულე ყიზილ-
ბაშებს.

მკითხველმა იცის, — შაჰ აბასს ქართველი ქალისაგან, თა-
მარ ამილახორის ასულისაგან, ესვა უსაყვარლესი უფლისწუ-
ლი ს ე ფ ი-მ ი რ ზ ა, მამაცი და გასაოცრად მშვენიერი ჭაბუ-
კი, რომელიც მამას უცილო ტახტის მემკვიდრედ ჰყავდა ხელ-
დასხმული.

ყველას უყვარდა კეთილი, მომხიბლავი ჭაბუკი.

ლექსებს თხზავდნენ და სიმღერებს მღეროდნენ სეფის სა-
ხელზე.

ცოლიც აღრევე შეერთო შაჰს სეფი-მირზასთვის. ისიც
ქართველი ქალი, შალიკაშვილების ოჯახიდან...

ერთ დღეს ყიზილბაშმა დიდებულებმა სეფი-მირზას წერი-
ლი გაუგზავნეს — მამაშენი ტახტიდან უნდა გადაეფადოთ და
მის ნაცვლად შენ გაგამეფოთო.

სეფი-მირზამ წერილი მამას მიუტანა. შაჰი აღტაცებული
გადაეხვია თავის შვილს.

მაგრამ ბოროტი ეჭვის ჭია მაინც ჩაუჭდა გულში შაჰ
აბასს: ერთიც არის და, მართლა მოუნდესო ჩემს შვილს ჩემი
მოკვლა და ტახტის წართმევაო!

მერე, სეფი-მირზას ძარღვებშიც წყეული ქართველის სი-

სხლი დაედინება და... ძალიან მოყვარულნი არიან ქართველნი ძალაუფლებისა, ძალიან! ისე ძალიან, სიცოცხლესაც რომ არ დაზოგავენ ძალაუფლების მოსახვეჭად!

ოჰ, ეს წყეული ქართველები..

მთელი დამეგები შეთქმულთა ხელით მოქნეული სატევარი ელანდებოდა შაჰ აბასს.

ყოველ ღამით სამჯერ-ოთხჯერ იცვლიდა საწოლს.

და სწორედ ახლა, როცა ეჭვის თესლი ჩაგდებული იყო და შაჰსაც ქართველების მძულვარების თვე უდგა, წერილი მისწერეს ხელდაუროთველად: შენი შვილი სეფი-მირზა გღალატობს, სიკვდილსა და შაჰინშაჰის ტახტის წართმევას გიპირებსო!

გველის კაჭრობა დაემართა შაჰ აბასს.

ხოლო, როცა გონება „დაეწმინდა“, ყარჩიხა-ხანი გამოიძახა და უბრძანა: ახლავე სეფი-მირზა უნდა მოჰკლა და მისი მოკვეთილი თავი მომიტანო!

რაო?! სეფი-მირზა უნდა მოკვლაო?! შაჰს შვილი მოგუქლაო?!

ჰკვიანი კაცი იყო ყარჩიხა-ხანი, დაკვირვებული და ანგარიშიანი, წარმომავლობით სომეხი, ბავშვობიდან ტყვედწაყვანილი და გამაჰმადიანებული.

მან შაჰის ხასიათი შაჰზე არანაკლებად იცოდა.

ხმალი შემოიხსნა, გვერდზე ისროლა და შაჰის წინაშე დაემხო.

— უბრძანე, მე თვითონ გამაგდებინონ თავი, ვიდრე შაჰის ვაჟზე აღვმართო ხელი! — შეჰბღავლა ყარჩიხამ.

— კარგი, წადიო, — თქვა შაჰმა.

ყარჩიხა-ხანი რომ გავიდა, შაჰმა ბებუთ-ხანი გამოიძახა — საქართველოდან წაყვანილი და გათათრებული ბებუთაშვილი. გამოიძახა და ახლა იმას უბრძანა, სეფი-მირზა უნდა მოკლა და სასწრაფოდ მისი წარკვეთილი თავი უნდა მომართვაო.

ბებუთ-ხანმა უყოყმანოდ იტვირთა შაჰის ბრძანების აღსრულება. მკვლევლობაც მაშინვე გაიაზრა და განჭვრიტა.

სეფი-მირზა სანადიროდ იკაზმებოდა.

ბებუთ-ხანიც უნდა ხლებოდა.

ცხენი მიართვეს უფლისწულს.

ის იყო, უზანგში ფეხშედგმულმა სეფიმ ტანი უნაგირისა-
კენ აიქნია და ბებუთ-ხანის ხელში ხმაღმა გაიბრკიალა.

უსულოდ დაეცა ერანის ტახტის მემკვიდრე, — ქართვე-
ლის ხელით ქართველი ქალის ნაშობი.

თავი წარკვეთა, ქოჩრით აიტაცა და სასახლისაკენ გააქანა.
შაჰ აბასი უგონო თვალებით დაშტერებოდა შვილის თავს.
შვილი მკვდარი იყო, მაგრამ აღარც მამა იყო ამ სოფელს.
ქალის შემზარავმა კივილმა გამოარკვია არყოფნისაგან.

თამარი შემოიჭრა, თმაგაშლილი და ჭკუაშეშლილი, შვი-
ლის თავი გამოკვლიჯა ქმარს ხელიდან, მკერდში ჩაიკრა, სახე
დაუკოცნა ცრემლების თხევით.

აბასს მივარდა შესულილი ქალი, სილა დაუშინა სახეში,
ფრჩხილებით დაწვები დაუხოკა და სისხლი დაადინა თვითონ
სახედალეწილმა და სისხლდადენილმა.

— საზარელო ბოროტო, სისხლისმსმელო ნადირო, რატომ
მოჰკალი ჩვენი შვილი, როგორ გაიმეტე საკუთარი სისხლ-
ხორცი, ვინღა ვინღა გაამეფო იმის სანაცვლოდ, რატომ გას-
წირე შენი ქვეყანა, რა დაგიშავა ჩემმა შვილმა, რომელსაც
შენ ასე უყვარდი?! — შეჰკოცა და სცემდა ქალი კერპად-
ქცეულ კაცს.

კერპიც გადნა, გალღვა, ცრემლად გასკდა და ენაც ამო-
იდგა:

— რა ვქნა... მისი ლალატი შემატყობინეს... ალლაჰმა სი-
კვდილი ინება და ახლა რაღა ეშველებას.. ასე მოხდა..

ათი დღე-ღამე ბნელში ჩაიკეტა მგლოვიარე შაჰი.

ათი დღე-ღამე ტიროდა და ჰგოდებდა ცრემლშეუშრობ-
ლად.

ათი დღე-ღამე არ სჭამდა, არ სვამდა, არავის იკარებდა.

მეთერთმეტე დღეს გამოვიდა, მოტეხილი და მოთელილი,
ბრძანა: სანამ ცოცხალი ვარ, უბედური სეფი-მირზას სა-
ხელი არავინ ახსენოს, არც ვინმემ მის სახელზე ლექსი დაწე-
როს, არც ვინმემ იმღეროს ჩემი საყვარელი შვილის სახელ-
ზეო.

მერე ყველა გაიხსენა, ვინც სეფი-მირზას მოკვლაზე კვე-
რი დაურტყა. და ყველას თავები დააყრევინა.

ბოლოს ბებუთ-ხანი გამოიძახა და უბრძანა: ჩემი შვილინ



თავი რომ ისე უცებ მომირბენინე, ახლა შენი შვილის თავიც მომიტანეო სასწრაფოდ!

ბებუთ-ხანმა ისევ „პირნათლად“ შეასრულა მეფის ბრძანება: მოჰკლა საკუთარი შვილი, მოჰკვეთა თავი და მიართვა შაჰს!

— ამიერიდან გეცოდინება, რა განიცადა ჩემმა გულმა, როცა შენ მე მომიკალ შვილი. შეგიძლია თავი იხუტეშო: ახლა მე და შენ ერთ ბედქვეშა ვართ! — უთხრა შაჰმა ბებუთ-ხანს.

.

შაჰ აბასს სეფი-მირზას გარდა კიდევ ჰყავდა ვაჟები, რომელთაც იმედი უნდა გახსნოდათ ტახტის მემკვიდრეობისა.

მაგრამ შაჰს მაინცდამაინც საყვარელი და გამორჩეული შვილის ნაშვირი უნდოდა მემკვიდრედ.

ამიტომ ერანის მომავალ მბრძანებლად შაჰ აბასმა სეფი-მირზას ძე მოინიშნა — ს ა მ- მ ი რ ზ ა, რომელიც მამამისის სიკვდილის ეპოს ორი წლისა იყო.

ასე აჯობებსო, ფიქრობდა შაჰი, ჯერ ერთი იმიტომ, რომ საამ-მირზა ჩემი-საყვარელი ძის ძე არისო, მეორეც — სანამ საამ-მირზას სამეფო კბილი ამოუვა, მანამ ჩემი დამხობის განზრახვა არ გაუჩნდება ყრმა უფლისწულსო...

.

იმ „უბედურ წელს“ კიდევ ორი უსიამო ამბავი შეიტყო შაჰ აბასმა: კახეთის აჯანყება და თურქთაგან ომის განახლება.

„თურქების სისხლს ვსვამ და კახელების სისხლი უნდა დავლიოო!“ კბილების ლაწალუწით დაიდმუვლა ერანის ლომმა.

სისხლიანი ალავერდობა

სანამ შაჰ აბასი ლუარსაბ მეფეს მოინელებდა, მანამ ქუთათისში თეიმურაზ კახთა მეფე, გიორგი იმერთა მეფე და ოდიშისა და გურიის მთავრები სპარსეთის წინააღმდეგ ერთიანი ბრძოლისათვის ემზადებოდნენ.

ქართველმა მეფე-მთავრებმა სტამბოლის სასულთნო კართან გააბეს ურთიერთობა. ისევ „მეტი გზა“ არა ჰქონდათ „საქართველოებს“: თუ მოახერხებდნენ, ისევ უნდა მოეშველიებინათ ერთი მტრის ძალა მეორე მტრის დასამარცხებლად.

მაგრამ, რაკი „აღია და ოსმანა ორივე თათარია“, — მთავარ ძალად მაინც საკუთარი სისხლი და ძვალ-ხორცი უნდა დაეძაბა დაშლილ და დაქცეულ ქვეყანას.

დასავლეთ საქართველოში მყოფ თეიმურაზ პირველს კახეთთან კავშირი არ გაუწყვეტია. მან ყოველდღე იცოდა, რა ხდებოდა გრემის სასახლეში.

თურმე ისა-ხანი, თეიმურაზის ბიძაშვილი (გიორგი ალექსანდრეს ძის გათათრებული ვაჟი), შაჰ აბასმა რომ კახეთის მმართველად დასტოვა — კახეთიდან სპარსეთს გაქცეულა. გაქცევის მიზეზი — მუღდივი შიში სიკვდილისა, ყოველი პატრიოტი კახელის თვალებიდან რომ უტკერდა რენეგატს!

1615 წლის მაისში ზავი ოსმალეთსა და ერანს შორის, „მსგავსად ბავშვების ხელით ქვიშაზე აგებული გოჯილა სახლებისა, დაინგრა და დაიშალა“, და ომი განახლდა.

ოსმალეთის სასახლის კარზე მაშინ ორი მეჰმედი და შა პირველობდა — ოქუზ მეჰმედი და გურჯი მეჰმედი.

გურჯი მეჰმედი ფაშა წარმომავლობით ქართველი იყო, ყრმობისას საქართველოდან მოტაცებული, სტამბოლის ბაზარზე გაყიდული და გათათრებული.

სულთანმა აჰმედ პირველმა (1603—1617 წწ.) ოქუზ მეჰმედი ერანის წინააღმდეგ გამზადებული ჯარების სერასქერად დანიშნა, ხოლო გურჯი მეჰმედი მთავარი ვეზირის თანამდებობაზე დასვა და თავისთან დაიტოვა „მარჯვენა ხელად“.

22 მაისს ოქუზ მეჰმედი ფაშა უზარმაზარი არმიებით სტამბოლიდან გამოვიდა და სპარსეთის საზღვრებისაკენ გაემართა. თეიმურაზმა მაშინვე აფრინა შიკრიკები კახეთიდან.

კახელები ისედაც საომრად იყვნენ აღესილნი.

აჯანყებას დავით ჯანდიერა (ასლანიშვილი) მეთაურობდა.

15 სექტემბერს, ალავერდობის დღესასწაულზე, ალავერდის ეკლესიას მიაყენა ხალხი დავით ჯანდიერმა.

ალავერდის ციხე-გალავანში სპარსელთა ციხიონი იდგა,

თვითონ შაჰ აბასისგან ჩაყენებული. ბუნებრივია, ხალხის შიგ შეშვება დაუშვებელი იქნებოდა.

მაგრამ დავით ჯანდიერს სპარსელები კარგად იცნობდნენ და კიდევაც ენდობოდნენ, ვითარცა „შაჰის ერთგულ დაუღბეგ გურჯს“. აქი შაჰ აბასს დავით ჯანდიერი, ნოდარ ჯორჯაძესთან ერთად, ისა-ხანის „ვეჭილად“ და თანაშემწედ ჰყავდა დატოვებული. თანაც ახლა, როცა ისა-ხანი გაქცეულიყო, დავით ჯანდიერი იდგა შაჰის „მთაყარ კაცად“ კახეთში...

დავით ჯანდიერმა ყიზილბაში მეთაურები გამოიხმო და უთხრა: დღეს ქრისტიანთა დღესასწაულია, ალავერდობა, და აქაურებს არ შეუძლიათ ალავერდის ტაძარში რომ არ ილოცონ, ამიტომ შეუშვით ხალხი, წირვა-ლოცვა აღავლინონ და ისევ უკან გამობრუნდებიანო; ხოლო თავდები მე ვიქნები იმისა, რომ ყველაფერი მშვიდობიანად გათავდებაო.

შეციხოვნენი ჯანდიერს ენდვნენ და გალავანის კარი გააღეს.

კახელები შევიდნენ, ტაძარში ილოცეს და იგალობეს, ტაძრიდან გამოვიდნენ და...

უეცრად დავით ჯანდიერმა, ნოდარ ჯორჯაძემ და თამაზ ვაჩნაძემ ხმლები იშიშვლეს, ყიზილბაშთა მეთაურებს დაადგერეს და ძუძუ-გული შეუწვრიეს.

სანამ დანარჩენი სპარსელები გონს მოეგებოდნენ, გალავანში შემოსულ ყოველ კახელს ხმალი ამოეშიშვლებინა და უწყალოდ სჩეხდა მისგანვე წინასწარ „ამორჩეულ“ სპარსელს.

ალავერდის ეზო ერთბაშად დაირეცა და დაიხერგა ერთნელთა გვამებით.

მაშინვე თეიმურაზთან აფრინეს კაცი დავით ჯანდიერმა და ნოდარ ჯორჯაძემ: ყიზილბაშთა ციხიონი განადგურებულია, კახეთის აჯანყება დაწყებულია, სასწრაფოდ მობრძანდით, გვიმეფეთ და გვიმეთაურეთო.

გამოეჭანა თეიმურაზი იმერეთიდან.

გიორგი მეფე, ლევან დადიანი და მამია გურიელი სახელდახელოდ შეყრილი ჯარებით მდინარე არაგვამდე მოჰყვნიენ სტუმარს.

არავგვზე დავით ჯანდიერი და ნოდარ ჯორჯაძე შეეგებნენ კახელთა ჯარით.

იმეერ და ამიერ ქართველთა შეზვედრისა და სჯა-ბაასის შემდგომ იმერეთის მეფე-მთავარნი უკან გაბრუნდნენ.

კახეთი აჯანყების ხანძარში გახვეული დახვდა თეიმურაზს. ყველა ციხესიმაგრესა და ციხე-ქალაქში გამძვინვარებულ მამულიშვილთა რაზმები უწყალოდ მუსრავდნენ ყიზილბაშურ ციხიონებს.

კახელთა აჯანყების ამბავი რომ შეიტყვეს, მეზობელი შირვანელებიც აღსდგნენ სპარსელებთან საომრად. აქაურებს სათავეში ჩაუდგა დელ-უმელიქი, ანუ მელიქფირაღელ-უმელიქმა, რაკი „თავზე აჯანყების ჩალმა მოიხვია“, თეიმურაზთან კაცი აფრინა, ერთგულების ფიცი შეუთვალა და ქართველი მეფის მეთაურობით შაჰ აბასის წინააღმდეგ კახელთა და შირვანელთა ერთობლივი ომი შესთავაზა.

თეიმურაზსაც რაღა ეთქმოდა სასიამოვნო დასტურის მეტი. შირვანიდან ყიზილბაშური საფრთხის ნაცვლად კახეთს მეგობარი თანამებრძოლნი ეგულებოდა.

უფრო გულმიცემით უტევდნენ კახელები მტერს.

სადაც კი თეიმურაზი, დავით ჯანდიერი, ნოდარ ჯორჯაძე და თამაზ ვაჩნაძე გაიეღვებდნენ თავისი რაზმებით, მაშინვე სპარსელები „საყელოს ხელში აძლევდნენ ქართველებს“.

.

კახეთის აჯანყების ქამს ქართლი „თავისთვის იყო“, გულგრილი და გამტკნარებული.

გიორგი სააკაძეც ჩამოსულიყო შაჰის ნებართვით ნოსტეში, „მამულის დასახედავად“.

მეზობელმა ქაიხოსრო ჯავახიშვილმა შეიტყო გიორგის ჩამოსვლა.

ეს ქაიხოსრო ჯავახიშვილი გახლდათ, გიორგის შიშით იმერეთს რომ გარბოდა ცოლშვილიანად, გიორგიმ რომ მტრობა აბატია, უკანვე მოაბრუნა და მისსავე მამულში დაამკვიდრა გულდანდობილად.

ახლა ქაიხოსრომ „სამაგიეროს მიგება“ გადაწყვიტა დიდსულოვანი მეზობლისადმი.

ფარსადან ციციშვილს ეწვია ქაიხოსრო — „ქართლის გამგებელსა“ და გიორგი სააკაძის მოსისხლე მტერს.

ეწვია და მოახსენა: გიორგი სააკაძე გამოჩნდა ნოსტეში, ჯარი მომეცი და შევიპყრობ, ან წუთისოფელს გამოვასალმებ ქართლის მოღალატესო.

სამასკაციანი ჯარი მისცა ციციშვილმა ჯავახიშვილს.

შულამისას დაეცნენ თავს სააკაძის საზღ-კარს.

ვილაც ერთგულ კაცს გაეფრთხილება გიორგი წინასწარ. სიკვდილს გაასწრო სააკაძემ.

შაჰ აბასმა მოისმინა „ერთგული მოურაგ-ხანის“ საჩივარი.

მაგრამ სხვა რამ უფრო დიდი სადარდებელი გასჩენოდა შაჰ აბასს:

კახეთი და შირვანი დაჰკარგვოდა საეცებით.

თურქული ურდოც მოგორავდა ერანისაკენ.

არაბები და წიყაშური

მაგრამ „აღლაპის ჩრდილი“, დიდი შაჰ აბასი, მაინც „დიდი იღბლის“ მფლობელი იყო.

თურქეთის სერასქერი ოქუზ მეჰმედ ფაშა უნიკო და მხდალი გამოდგა. მაისში წამოყვანილი ოსმალური არმია ზღაზენითა და ტაატით ალექომდე ძლივს მოათრია, გამოსაზამთრებლად დააბანაკა და ერანთან ომი მომავალი წლისთვის გადასდო.

შაჰი გახარებული იყო.

მას ახლა ორივე ხელი გახსნოდა და ორივეს „იოლად მოუვლიდა“ — კახეთსაც და შირვანსაც.

გამორჩევით კახეთისა და მისი მეფის ჯავრი ახრჩობდა შაჰ აბასს.

თეიმურაზმა გაუბედა შაჰ აბასს ეგზომი კადნიერება?! მან არ იცის, რომ „იორემს, რაც უნდა მძლავრი რქები ჰქონდეს, მძვინვარე ლომს ფეხის დაკვრას ვერ გაუბედავს?!“

სარდალთაგან ალი-ყული-ხან შამლუ ამოირჩია შაპაბასმა და 15 000 მეომარი ჩააბარა — უმრავლესნი სპარსელები, უმცირესნი — გათათრებული ქართველები.

ალი-ყული-ხანს შაპმა თანაშემწეებად უჩინა: ყარაბაღის ზეგლარბეგი მოჰამედ-ხან ზიად-ოდლი ყაჯარი და სამი ამირა — ისფენდიარ-ბეგი, ფეიქარ სულთან იგიომიდორთი და დელუ-მუჰამედი (შეითხველისათვის ცნობილი, ერთ დროს ტფილისის ციხიონის უფროსი და ქართველთა მოკაეშირე ტაშისკარის ბრძოლაში).

საქართველოსკენ გამოგზავნა ყველანი შაპაბასმა. მთავარ-სარდალს, ალი-ყული-ხანს დაავალა: კახეთის გზები შეჰკარი, თეიმურაზი იმერეთისკენ კიდევ არ გაგეჰცეს, თუ მოახერხო ცოცხლად მომგვარე, თუ არა და სიკვდილს მაინც არ დაარჩინო; კახეთი ხელახლა დაიბყარ, ააოხრე და ააწიოკეო.

თვითონ შაპი ისფაჰანიდან მანანდარანს წავიდა გამოსაზამთრებლად და იქ ელოდებოდა გაავებული გულის დამაცხრობელ ამბებს საქართველოდან.

ქართლში შემოიყვანა არმია ალი-ყული-ხანმა.

ფრთხილად მოდიოდნენ.

წინ ქართველი „შაპისევანები“ მოუძლოდნენ მზგერავებად. ისინი გარეგნულად ერთგულებას იჩენდნენ, ხოლო ფრთხილად, ძალიან ფრთხილად მატყუარ ცნობებს აწვდიდნენ ალი-ყული-ხანს; დიდსა და მცირე გზებსა და გასასვლელებს ერთურთში ურევდნენ, თეიმურაზ მეფის მოძრაობის დროსა და მიმართულებებს არასწორად ატყობინებდნენ.

ალი-ყული-ხანის ჯარში ბაინდურ ერისთავი იმყოფებოდა. იგი თეიმურაზს იდუმალ უთვლიდა სპარსთა ჯარების სამოძრაო გეზსა და სარდლობის განზრახვლებებს.

სპარსელებმა ტფილისი ამოიარეს, არაგვზე ამოვიდნენ და წიწამურთან დაიბანაკეს.

თეიმურაზიც წამოსულიყო ხუთი ათასი კახი მეომრით.

ბაინდურ ერისთავის წყალობით, მტრის ადგილსამყოფელი იცოდა თეიმურაზმა, შუალამისას არაგვი შეუმჩნეველად გადალახა და მოულოდნელად მიუახლოვდა სპარსელთა ბანაკს.

„გზა შემიკრეს? რა გაეწყობა, — ხმლით გავივლი ჩემს გზას!“ — ბრძანა თეიმურაზმა იმ ღამით.

მეორე დღეს 5 000 ქართველი 15 000 სპარსელს შეება.

მეწინავე ჯარს ალი-ყული ხანმა მოჰამედ-ხან ზიად-ოღლად უსარდლა, მომდევნო რიგები ფეიქარ სულთან იგირმი-დორთისა და დელუ-მუჰამედს ჩააბარა. მარჯვენა და მარცხენა ფლანგები საგანგებოდ გაამაგრა, — ქართველებს რომ არ აეჩეხათ განაქიდური განლაგებანი.

თვითონ ალი-ყული-ხანი არმიის შუაგულში ჩადგა, ბრძოლის საერთო სახელმძღვანელოდ.

ბრძოლა შუადღეზე დაიწყო.

მთავარი გმირი შეიქნა თეიმურაზი.

იგი პირველი ეკვეთა გაალმასებით და გახელებით მტრის შუაკერძს შუბგაწვართული.

მიჰყვნენ კახელები აფთრული სიფიცხით.

მარჯნივ და მარცხნივ დავით ჯანდიერო და წოდარ ჯოჯა ჯაძე იბრძოდნენ გალომებულნი.

უკუეჭენენ სპარსელები ორივე ფლანგზე.

ერანელთა შუაკერძი დაუხვდა მძლავრად მოიერიშე ქართველობას.

შუბი გადაემსხვრა თეიმურაზს.

ხმლით მიეტევა გააფთრებით.

ქართველებმა უმძაფრესი ხმალოაკვეთებით აჰკაფეს სპარსთა შუაკერძნი და მეწინავენი.

მეორე რიგში მდგარმა ფეიქარ სულთან იგირმი-დორთიმ სცადა მიშველება და წინისკენ გაჰრა, მაგრამ რომელიღაც კახელმა შემოჰკრა ხმალი სასიკვდილოდ, მეორემ მოუსწრო, შუბი აძგერა და ცხენიდან ასხლიტა უკვე სულგავარდნილი ფეიქარ სულთან იგირმი-დორთი.

სპარსელთა მესამე რიგიც გულჩუკენად შეეგება ქართველთა იერიშს. დელუ-მუჰამედმაც ზურგი აქცია საომარ თალბიონს.

თვითონ ალი-ყული-ხანი და „იშვიათად გულადი და მხნე“ ისფენდიარ-ბეგი ერთხანს კიდევ მაგრობდნენ, რადგან „თავის სახელს უფრთხილდებოდნენ“. მაგრამ როცა სპარსელთა არმიას ფლანგებიც და ზურგიც მოეშალა და ქართველები ყოველის მხრიდან ზარდამცემი ყიყინით წამოემართნენ, სპარსთა მთავარსარდალს და მის თანაშემწეს „სახელის გაფრთხი-



ლება“ დაავიწყდათ და ყელს მომდგარ სიკვდილს გაექცნენ თავპირის მტვრევით.

უგზოუკვლოდ ილტვოდნენ სპარსელნი.

მისდევდნენ ქართველები და სჩებდნენ უწყალოდ.

სპარსთაგან ბევრი, ქართველთა ხმლის შიშით გონდაკარგული; არაგვსა და მტკვარში ცვივოდა და იძირებოდა.

ტფილისისკენ მიჰქროდა ალი-ყული-ხანი, გალახული, დაფანტული და დაწყვეტილი ჯარის ნაშთებით.

დაღამდა.

წიწამურისა და არაგვის სანახები სპარსელ მოხარტა გვაშებით დატვირთულიყო.

მრავალი ერანელი მზარგაკრული მიჰყავდათ ქართველებს, დიდძალი ნადავლი, საომარი აღჭურვილობანი, კარგები, ცხენები, ჯორები, აქლემები — ჩაუფარდათ ხელში გამარჯვებულებს („საშოარი ასრე გაიფდა, რომ სანახევროდ წამლები არ იშოვებოდა, აქლემი ერთ აბაზად გაისყიდა“).

ორი ათას ხუთასი ყიზილბაშის წარკვეთილი თავები თეიმურაზმა ძღვნად გაუგზავნა თურქეთის ხონთქარს.

(წარკვეთილი თავები ძღვნად!... ქართველებიც მისდევდნენ ავი დრო-ჟამის „მოდას“).

.

დიდი იყო ქართველთა გამარჯვება არაგვზე და წიწამურზე.

მაგრამ შედეგი?!
 ჯერჯერობით დიდი სამამულიშვილო შემართება და შურისმგებლური წყურვილის დარწყულებათ

მაგრამ თუნდაც ერთჯერ კიდევ, მეორედ, შეეძლოთ ასეთი გამარჯვების აღება მარტოდმარტო მეომარ კახელებს?!
 მარტოდმარტო!

უქართლელოდ!

უმესხოდ!

უიმერლოდ!

ყველა ის ბოროტება, რაიც თავს დაატეხა შაჰ აბასმა ქართველთა ქვეყანას, არ ძალგვიძს მოგითხროთ, რადგან ეს სიტყვის ძალას აღემატება.

ა რ ა ქ ე ლ თ ა ვ რ ი ზ ე ლ ი

სიკვდილს გადარჩენილმა სპარსელებმა ტფილისის ციხე-გალავანს შეაფარეს თავი.

რამდენიმე ღამე შიშსა და ძრწოლაში გაატარეს, — ვაითუ თეიმურაზმა კახელთა ჯარით ტფილისზეც მოიტანოს იერი-შიო.

ალი-ყული-ხანს ბოლომდე მაინც არ დაუდგა გული საქართველოს სატახტოში. ტფილისში მეთოფეთა ციხიონი ჩააყენა მურშიდ-ყული-ბეგის მეთაურობით. თვითონ განჯაში გაქუსლა, იქაურ ციხეს ჩაკეტილმა, როგორც იქნა, გონი მოიკრიბა და, რაც საქართველოში უბედურება გადახდა, ყველაფერი შაჰ აბასს აცნობა.

შაჰ აბასი ისევ მაზანდარანს იყო, როცა ქართველთა ხელით მისი არმიის განადგურების ამბავი შეიტყო.

შეიშალა და შეირყა.

„დამწველი ცეცხლივით და ზღვასავით აღელდა და აქუხდა... მისი მძვინვარების ცეცხლის ყოველი ნაპერწკალი ქვეყნიერების დამწველი მეხი იყო“.

მაგრამ ცოფისა და ლოშქრის ფრქვევა საქმეს ვერ უშველიდა, „სხვის შესახებად“ უნდა დაწყნარებულიყო და „დაწყნარდა“.

დამარცხებულ და სასიკვდილო განჩინების მომლოდინე ალი-ყული-ხანსა და მის ამირებს ასეთი შემწყნარებლური წერილი მოსწერა:

„მხედრობისა და ომის წესი ყოველთვის ასეთია, — დამარცხება და გამარჯვება ერთმანეთს სდევნენ. ნუ დალონდებით იმ მარცხის გამო, რომელიც განგების ძალით ეწია ისლა-

მის ჯარს, და ელოდეთ ჩემს მოსვლას. ღვთის შეწყვენითა და ისლამის ძალით ამოიმართება შურისძიების ქარქაშიდან ქრი-ზოლითურად მოელვარე ბასრი ხმალი იმ ურჯულს ქართველ-თა დასამხობად და აღმოსაფხვრელად“.

1616 წელი იდგა.

შაჰ აბასს ერთჯერ კიდევ გადაეწყვიტა „სალეთო ომი ურ-წმუნო საქართველოსთან“, ქართველთა საცხოვრისის ძირ-ფესვიანად მოთხრა და მის ნაფუძარზე „ისლამის გამშვენიე-რება“.

გიორგი სააკაძე გამოიძახა და ეთათბირა...

იმამ-ყული-ხან უნდილადე მაშინ თავრიზში იყო და იქ მი-იღო საქართველოში ლაშქრობის წვევა.

უარი შემოთვალა უნდილადემ: რაღაც მძიმე ავადმყო-ფობამ დამრია ხელი და არ შემიძლია სალაშქრო ცხენზე ჯდომას!

— როგორ?! ისევ უნდა დაიძვრინოს თავი უნდილადემ სა-ქართველოში ლაშქრობისაგან?! — აზეავდა შაჰი.

შაგრამ ისევ დაითრგუნა რისხვა, რადგან მაშინ არავინ ისე ჭკვიან და საჭირო კაცად არ ეგულებოდა შაჰ აბასს, როგორც უნდილადე.

.

აღრიან გაზაფხულზე დაიძრა შაჰ აბასი საქართველოსკენ, დაიძრა, „ვიტარცა ვეშაპი განძენებული“.

კასპიის ზღვის გასწვრივ მოდიოდა, ფაჰარაბადიდან გილ-ნის გამოვლით. უკან „ზღვა ლაშქარი“ მოსდევდა, „როგორც ლურჯი ზღვა და ზღვასავით მლელვარე“. გზადაგზა აზერბა-იჯანელი და შირვანელი ბეგები და ხანები ერთვოდნენ თა-ვიანთი ძალებით ურდოს. გამდიდრების მოხარბე ბევრი მა-წანწალა „მოხალისედ“ მოსდევდა შაჰ აბასს, „მუდამ მდი-დარი საქართველოს“ გასაძარცვავად.

მთელს ჯარში ხმა ირხეოდა, შაჰ აბასს დაუფიცნია, ქარ-თველებს სულ ერთიანად მონებად დავეყიდი, თითოეულს თი-თო აბაზადო!..

განჯას მოვიდნენ. აქ ალი-ყული-ხანი და მისი მარცხის თანაზიარი ამირები გამოეგებნენ მუცელზე ცურვით. შაჰმა ყველას აპატია და ყველა „გააბედნიერა უზანგზე კოცნით“.

მაგრამ წიწამურის მარცხისათვის ალი-ყული-ხანი შაჰმა ერთი დღე მაინც არონინა ქალის ტანსაცმლით სამხედრო ბანაკში.

განჯიდან ტფილისს მოვიდა შაჰ აბასი მთელის მხედრობით.

ქართლს ლუარსაბ მეფის წაყვანის შემდგომ მეფე აღარ ჰყავდა. შაჰის ოცნებაც ეს იყო, რომ საქართველოში ქართული ხელმწიფობა მოესპო და ახლა აქ, ტფილისში, ქართლის გამგებლად „თავისი კაცი“ დასვა — ბ ა გ რ ა ტ - ხ ა ნ ი.

ერთჯერ კიდევ უნდა შევახსენო მკითხველს: სამშობლოს მოღალატე დაუდ-ხანს (ლუარსაბ პირველის ძე, სვიმონ პირველის ძმა) ორი შვილი დარჩა — ბაგრატი (ალექსანდრე კახთა მეფის ნათესავი ქალისაგან) და ხოსრო (წავეისელი გლეხის ქალისაგან). როცა დაუდ-ხანი ოსმალეთს გაიქცა, შვილებმა სპარსეთი ამჯობინეს „დასაწინაურებლად“. ორივე გათათრდა.

და ახლა ძმთაგან უფროსი — ბაგრატი — „ქართლის ვილაიეთის ხანად“ დასვა შაჰ აბასმა (მართლაც „იღბალმა გაუჭრა“ ბაგრატ-ხანს: სხვანაირად ხომ ქართლის ხელმწიფობას იგი ისე ვერ იხილავდა, როგორც საკუთარ კეფას).

რაკი ქართლის საქმე ასე „იოლად მოაგვარა“, შაჰ აბასმა მაშინვე კახეთის მოსათხრელად გაამზადა ჯარები.

— კახეთი ყოველის მხრიდან შუაში უნდა მოვიმწყვდიოთ ნადირივით, მათი ურჯულო მამაკაცები საღვთო ომის ელვარე ხმლებით მთლიანად ამოველიტოთ, ქალები და ბავშვები ტყვედ წამოვიყვანოთ, საქონელი, ძვირფასეულობანი და ყოველგვარი ქონება დავლად წამოვიღოთ. განკითხვის დღე დაეუყენოთ კახეთის გურჯებს, რისხვის ცეცხლით დაესწვათ და აღმოვფხვრათ ყოველივე ნედლი და ხმელი, წავშალოთ კვალი ყოველივე შენებულისა და ყოველივე უტყვი და მიტყველი სულდგმულისა! — ბრძანა შაჰმა.

სალაშქრო მიმართულებანი და უბნებიც სასწრაფოდ განსაზღვრა აბასმა: თვითონ „მთავარი ურდოთი“ პირდაპირ დაიძრებოდა ტფილისიდან კახეთისაკენ, აღმოსავლეთიდან შირვანის ბეგლარბეგი იუსუფ-ხანი შემოუტყვედა, ხოლო ჩრდილოეთიდან — ლეკები.

დადესტნის ფეოდალებს ეს შეუთვალა შაჰ აბასმა: ჩვენ რომ კახეთს შემოვესვით, თქვენსკენ სახიზრად წამოსული ქართველები თქვენებურად ტყვედ წაიყვანეთ, გინა ამოწყვიტეთ და ჩემგან სამაგიერო მისართმეველს ელოდეთო.

ისედაც, — ლეკებს რაღა შაჰ აბასისგან წაქეზება ეკირვებოდათ და — „მსმენელთა მათ სიხარულით აღუთქვეს“ შაჰს კახელთა აწიოკება ჩრდილოეთიდან.

თეიმურაზს იმედი ჰქონდა, რომ ამ წლის დამდეგს თურქთა არმიები ერკაში შეიჭრებოდნენ და შაჰ აბასი საქართველოში სალაშქროდ ველარ მოიცილიდა. მაგრამ ეს ასე არ მოხდა. თურქთა უნდილი და გულჩუკენი სერასქერი ოქუზ მეკმედ ფაშა ისევ ალეპოში იცოხნებოდა, ხოლო შაჰ აბასი უკვე „საგვებით ცხადად“ ტფილისში მოსულიყო და კახეთისაკენ მოიწევდა ყოველის მხრიდან.

კახელ თავადთა ერთმა ნაწილმა ისევ „ავ ბედისწერასთან“ შერიგება არჩია, დედაწულიანად შაჰ აბასს ეწვია და მის ფერხთა მტვრად იქცა.

თეიმურაზმა „სხვა გამოსავალი“ ველარ იპოვა, თვითონ ისევ იმერეთს გაიქცა, ხოლო ქვეყანა უპატრონოდ დააგდო „განძვინებული ვეშაპის“ ხახასთან.

კახელ თავადთა ერთი ნაწილიც, რომელმაც სამშობლოს ერთგულება გულით შეინახა, ცოლ-შვილით თეიმურაზს წაჰყვა იმერეთს...

„მეორედ მოსვლის“ დღე დაუდგა უთავოდ და უპატრონოდ დაგდებულ ქვეყანას.

ყოველის მხრიდან შემოიჭრნენ მუსლიმანთა ათასეულები ცეცხლითა და რკინით.

ხალხი — თითო-ორორად, ჯგუფ-ჯგუფად, გუნდ-გუნდად, რაზმეულებად, ან ვის როგორ მოუხდებოდა — გარბოდა „ყველგან, ყველა მხარეს და კიდეს, სადაც კი გაისვლებოდა“, სადაც თავის შეფარება, გამაგრება და სიცოცხლის გადასარჩენად ხელის გამოღება მოხერხდებოდა.

საომარ ბანაკთა გაწყობას შეუდგნენ კახელები: ირგვლივად ღრმა თხრილებს თხრიდნენ, შიგ წყალს აყენებდნენ, გარშემო მიწაყრილებს ავლებდნენ.

ასეთ სიმაგრეს თურქები „სიღნაყს“ ეძახდნენ.

ალაზნის მარცხენა მხარე „სიღნაყებით“ დაიფარა.

შაპ აბასის ურდო ალაზნის მარჯვენა მხარეს მოსდებოდა სიკვდილის თესვით. ამიტომაც მიიღტვოდნენ დედაწულიანად კახელები ალაზნის გაღმა.

ადიდებულ მდინარეს გადადიოდნენ და ხიდებს, ნაგებს, ბორნებს და ტივებს სწვავდნენ, სპარსელები რომ ველარ გადაპყლოდნენ გაღმა გაღწეულებს.

შაპ აბასი არ დაერიდა წყალდიდობით აბობოქრებულ ალაზნს. მან ყველაზე მამაცი მეომრები აარჩია და მდინარის გადალახვას შეუდგა. კიდევაც გადავიდა, თუმცა ბევრი აქლემი, ცხენი და ჯორი დაეზრჩო („წყლის გზით არარაობის საძოვრებზე წავიდა“).

უმძიმესი და უსასტიკესი კაცთაყვლა გაჩაღდა და გახურდა.

სიკვდილი აჯირითდა ალაზნის ველზე.

„სიღნაყური ომი“ შემზარავი დრამით შემოიჭრა ქართველი ხალხის „საომარ ყოფაში“.

ცივი საქურვლის კვეთებითა და თოფ-დამბაჩის ცეცხლით მიჰქონდათ იერიშები შაპ აბასის რჩეულ ჯარებს „სიღნაყებში“ ტანშიშვლად „ჩაკეტილ“ ქართულ ოჯახებზე.

მარტივად ითქმის: ბრძოლა იყო უთანასწორო!

რამდენი კაცის, ქალისა და ბავშვის სიცოცხლე ჩააქრო ამნაირმა „უთანასწორობამ“!

რამდენი გულის ფეთქვა ჩააქრო, — რამდენი?! — ესეც რა მარტივად ითქმება!

„რამდენის“ გვერდით იშვიათად გაგვახსენდება სიტყვა „როგორი“! — „როგორი სიცოცხლე!“, „როგორი სიცოცხლენი!“

ჭეშმარიტად, — არ კმარა საქონელივით დათვლა ადამიანებისა, — ქამიდან ქამზე მაინც საჭირო ზდება მათი „აწონვა“...

ხოლო სპარსელნი ყოველი „სიღნაყის“ ალების შემდგომ შაპ აბასს წარკვეთილი თავებით „მიუთვლიდნენ“ დახოცილ ქართველთა „რაოდენობას“.

„მოსრნა, მოსტყუენა, აპყარნა, მოაოზრნა“, — ჩემო მკითხველო, ვახუშტი ბაგრატიონის ამ ოთხ სიტყვაში რა „თვლით“

და „წონით“ უნდა მოთავსდეს შაპ აბასისგან კახეთში დატ-
რილებული აკაცობა?!

ერთმა სპარსელმა ყორჩიბაშმა (ყორჩების, ანუ ცხენო-
სანთა გვარდიის მეთაური) ერთ იუზბაშს (ასმეთაური), სა-
ხელად ჰოსეინ-ბეგს, უბრძანა: იმ ტყე-მალნარში ჯარი
შეიყვანე და კარგად მოიხრიკე, იქნებ ქართველები აღმოჩნ-
დნენ თავშეფარებულო.

შევიდა ჯარით ჰოსეინ-ბეგი, დიდხანს არღვია უსიერი
ტყის ტევრები და ბოლოს მართლა წააწყდა უზარმაზარ
სიღნაყს, რომელშიც თურმე ათი ათასამდე კაცი, ქალი და
ბავშვი ყოფილა შეხიზნული. სიმაგრეს ირგვლივ წყლით
საესე თხრილი ერტყა, მხოლოდ ერთ ვიწრო გასასვლელთან
გაედოთ ხიდად ხის ნამორი.

სიღნაყიდან აღამიანის ბაიბური არ ისმოდა.

გათამამებულმა და იოლი ნადავლის სურვილით შეპყრო-
ბილმა ჰოსეინ-ბეგმა უმამაცესი ყორჩიები და ღულამები აარ-
ჩია, ცხენებიდან დააქვეითა და ფეხდაფეხ შეგზავნა იმ ძე-
ლის ხიდზე.

საფარში მიმალულმა ქართველებმა მტრის რაზმს სიმაგ-
რეში შემოსვლა აცალეს, მერე ერთბაშად ზურგიდან ის ერ-
თადერთი „ხიდი“ ჩაუქციეს და ყოველის მხრიდან მიესივ-
ნენ გამძვინვარებით.

მხოლოდ რამდენიმე ფეხმარდმა სპარსელმა მოახერხა
თხრილში გადახტომა, წყლის გადაცურვა და სამშვიდობოს
გაღწევა. დანარჩენები ერთიანად შეაწყდნენ ქართველთა
შურისმგებლური ხელით ნაძგერალ ხმალს, ნაჯახს, ცელსა თუ
ფიწალს.

შაპი გაცოფდა, როცა მისი ჯარის ამოწყვეტის ამბავი შე-
იტყო. იუზბაშ ჰოსეინ-ბეგი გამოიძახა და გესლად ანთრა
პირში:

— სიღნაყს რომ მიაღექი, გველებოდა ჯერ იქ ჩასაფ-
რებული მტრის რაოდენობა შეგეტყო და შესასვლელ-გამო-
სასვლელი გზებიც დაგედგინა; ყოველივე ეს შენი მეთაური-
სათვის უნდა შეგეტყობინებინა და შემდეგ გემოქმედნა ისე,
როგორც იმ მეთაურისაგან გქონდა ნაბრძანები. შენ კი რად
გაუშვი თვითნებურად მთელი ჯარი უმეთაუროდ ქართველთა

სიმაგრეში ასე გაუგებლად და უანგარიშოდ? ხოლო თუ ჯარისკაცებმა შენის ნებართვის გარეშე ჩაიღინეს ეს დაუდევრობა, შენ მაინც უნდა გეზრუნა მათ დაცვაზე და გადარჩენაზე; ბოლოს და ბოლოს, შენც დანარჩენი ჯარებით სიღნაყში უნდა შექრილიყავი, წესი და რიგი მოითხოვდა, საბრძოლველად აგენტო მეომრები, რათა შენგან გამხნეებულებს ეომათ და, თუ ბრძოლის მოგება გაგიჭირდებოდა, უკანდახევა და უკანგამოსვლაც ჯართან ერთად უნდა მოგეხერხებინა.

საიქიოში გაატანა მარცხიან სარდალს ეს „საომარი შეგონებანი“ შაჰ აბასმა. ჯალათებს ანიშნა და ისინიც გახელებული მისცვივდნენ ჰოსეინ-ბეგს, ჯარის წინ გამოათრიეს, დედიშობილად გაატიტვლეს, ცხვირ-პირი და ყურები დაათალეს, საწულოები მოაგლიჯეს, ასე დასახიჩრებული ლაშქრის წინ ჩამოატარეს და ბოლოს, „როგორც იქნა“, თავი გააგდებინეს.

შაჰ აბასმა ამ „ჭკუისასწავლელი სანახაობის“ შემდგომ ყორჩილაი-ბეგი გამოიძახა, დიდი მხედრობა ჩააბარა და იმ სიღნაყის დასანგრევად და იქაური „სიღნაყელების“ ამოსაწყვეტად გაგზავნა.

ყორჩილაი-ბეგმა სიღნაყი წინასწარ იღუმალ დაზვერა, ირგვლივ ხანდაკზე რამდენიმე სახელდახელო ზიდი გასდო და იერიში ბრძანა.

ქართველებს ხანდაკებზე ჯებირები გაეწყოთ და იქიდან უშენდნენ ისრის ბარანს.

ყორჩილაი-ბეგმა უსაზმნო იერიში შეაჩერა, ზარბაზნებიდან ცეცხლი გახსნა, ის ჯებირები მიანგრ-მოანგრიო და ისევ იერიში ბრძანა.

სპარსელები სიღნაყში შეიჭრნენ გავეშებულნი.

ქართველებიც დაუხვდნენ თავგანწირულნი.

გვიან ღამემდე გაგრძელდა უწყალო ხოცვა-ჟლეტა.

რიცხვმრავალ მტერთან რკენით დაქანცულ ქართველთაგან ოთხასმა თუ ხუთასმა კაცმა ცოლ-შვილი ცხენებზე შემოიგდო, ალყა გაარღვია და დაღესტნის მთებისკენ მიმლტოლვარნი წყვედიადში გაუჩინარდნენ.

დანარჩენი ქართველები მეორე დღესაც შეეგებნენ ახალი ძალებით მოიერიშე მტერს.

მაგრამ ეს აღარ იყო ბრძოლა გამარჯვებისათვის, არამედ — მხოლოდ ლამაზი სიკვდილისათვის!

უკლებლივ ყველა ქართველი ვაჟაკი ისლამური „კრილა ხმლის ლუკმა შეიქნა“.

ქალები და ბავშვები ტყვეებად დაიტაცეს.

ნადავლიც დაინადავლეს.

მერე დანარჩენ „სიღნაყებს“ მისდგნენ.

და ყველგან, ყველა „სიღნაყი“ სპარსელებმა „ღვთის შეწევნით და ხელმწიფის მარადიული იღბლის წყალობით, ისლამის მძლავრი ხელით და მუსლიმური მკლავის ძალმოსილებით, დაღწეს და მიწასთან გაასწორეს“.

ოცი დღე-ღამე გაგრძელდა „სიღნაყური ომები“.

ოცი დღის შემდგომ შაჰ აბასი ისევ გადმოვიდა თავისი მხედრობით ალაზნის მარჯვენა ნაპირზე, მთავარ ბანაკში.

აღმოსავლეთის მხრიდან, შაჰის ბრძანებით, შირვანის ბეგლარბეგი იუსუფ-ხანი შემოიჭრა კახეთში. სასტიკი თავგანწირულებით ეკვეთნენ კახელნი ცეცხლითა და მახვილით მოკვნივე მტერს.

უმადურესი ბრძოლები გაჩაღდა ძაგემის მხარეში. აქაური ქართველები, „რომლებიც დიდად ღირსეულ ხალხად არიან სახელგანთქმულნი“, შაჰის ჯარებთან სამკვდრო-სასიცოცხლო „ბრძოლისათვის გამოქანებულიყვნენ“. სპარსელებმაც „მამაცობის ფეხი გულადობის ასპარეზზე შესდგეს“.

და ვახურდა უმძიმესი, სისხლდამდინარი ხმალთაკვეთება, არც ძაგემელ კახელებს შეეძლოთ ტანდაუშრეტელი მდინარებით მომავალი ისლამიტური არმიების შეკავება.

„ისლამის ხალხს ღვთის დახმარება მოევლინა, ქართველები დამარცხდნენ და ბევრი მათგანი დაიღუპა საღვთო ომის მახვილისაგან. მცირედი რიცხვი აქეთ-იქით გაიფანტა. სპარსელებმა მათი საცხოვრებლები დააქციეს და ქალაქ ძაგემში კვალიც აღარ დატოვეს მოსახლეობისა“.

ასე მოხდა მთელს კახეთში.

უომრად და უსიკვდილოდ არაფერს თმობდა გმირი კახელი.

ყოველი გოჯი მიწისა, ყოველი დიდი და მცირე შენებულება, ყოველი ხევი და გზა-ღვარჯნილი მრავალი სიცოცხლისა და სისხლის საფასურად უჯდებოდა ერანის მბრძანებელს.

„რაც კახეთის ქართველობას ხოცვა-ჟლეტა, რბევა, ძარცვა, ტყვევნა და ნგრევა თავს დაატყდა, არ გაგონილა ისლამის გაჩენის დროიდან დღემდე“.

ინგრეოდა, ირღვნებოდა, იმზვლეოდა და იჟლიტებოდა კახეთი — ერთ დროს ბედნიერი, დიდი ქართული ქვეყანა!

იავარყოფას ვერ გადაურჩა ვერც ერთი ქალაქი და სოფელი, ვერც ერთი ციხე და სასახლე, ვერც ერთი ტაძარი და ეკლესია, ვერც ერთი სახლი და შრამელი.

მრავალი სოფელი სამუდამოდ ამოწყდა და აღიგავა პირისაგან მიწისა...

(რა მარტივად ითქმის ეს სიტყვა!)

ანგრევდნენ ყოველ ნაშენებს.

ჩენდნენ და ძირფესვიანად თხრიდნენ ვენახებს, ბალებს, იტაცებდნენ ქართველი კაცის ნაოსტატარ-ნაჭედ ნივთებს, სამკაულებს, შაჰ აბასის სახაზინოდ და „ხარჭათა აღსამკობელად“.

მოერეკებოდნენ ტყვეებს, — „ზოლებიხას მსგავს, საოცრად ლამაზ ქალწულებს და უწვერულ, იოსებ მშვენიერის დაწვებიან, ხალებით დამშვევებულ ყმაწვილებს“.

ასი ათასი კახელი შეაწყდა მტერს იმ უბოროტეს წილიწადს.

ას ორმოცდაათი ათასი ტყვედ გაირეკეს ყიზილბაშებმა.

ქართველი ქალის მოთქმა-გოდება ჰზარავდა სიცხით გათანგულ ერანის ცისგვამს.

სამშობლოწართმეული ქართველი ბავშვის მდულარე ცრემლი აღუღებდა ისედაც ცხელ ერანულ მიწას.

მათთვის აღარ არსებობდა სამშობლო კახეთი, სამშობლო საქართველო.

მათი გულიდან და გონებიდან უნდა ამორეცხილიყო სალოცავი სიტყვები — „ქართველობა“ და „საქართველო“.

მათი „საქართველო“ ამიერიდან იქნებოდა ერანი, გინა სპარსეთი.

მათი „კახეთი“ ამიერიდან იქნებოდა ფერეიდანი, გინა მაზანდარანი, გინა ხორასანი, გინა ფეროჰაბადი.

შაჰ აბასი კარვის წინ იდგა, ბრწყინვალედ მორთულ-მო-

ყაზმული, ქრისტიან ქართველთა სისხლით დამთვრალი და
გათათრებულ ქართველთა ამალით გარსშემორტყმული.

გიორგი სააკაძეც აქ იყო...

აგერ, მერამდენე „ჯოგი“ ჩამოატარეს ქართველ ქალთა
და ბავშვთა ტყვეებისა!

უკან სპარსელი მეომრები მოსდევდნენ შოლტების სტვე-
ნით.

უცებ ერთი ყიზილბაში მხედარი გამოიჭრა წინ, ხელში
ორი აბაზიანი აათამაშა და დაიღრიალა:

— ეპეი, დიდო შაჰ აბას, მომყიდე ერთი წყვილი გურჯი
ხათუნი!

ჯერ რისხვა მოერია აბასს, მაგრამ უმაღვე მოლბა, რად-
გან თავისი ფიცი გაახსენდა — ყოველ ქართველს თითო აბა-
ზად გავყიდო.

— აქ მოიტა ეგ ორი აბაზი! — უბრძანა შაჰმა კადნიერ
მეომარს.

მეომარმა მოართვა ფული.

შაჰმა ჩამოართვა, ჯიბეში ჩაიჩხრიალა და უთხრა ღიმი-
ლით: ახლა მიდი და აირჩიეო ორი ქალი ქართველ ქალთა-
განი...

„უტყვისა და მტყველის მოსასაოგად“

შაიღებება სისხლითა
ქართველთა მთა და ბარია,
დილის მზის სხივით ეპოხენ
ქედებს კახეთის მთანია.

გ • ე • ა • ფ • შ • ა • ვ • ე • ლ • ა

შუაგულ კახეთში მდგარმა შაჰ აბასმა 1616 წლის აპრილის
ბოლოს ფრიად საშფოთარი ამბავი შეიტყუო: ოსმალთა არმია,
ოქუზ მეჰმედ ფაშას სარდლობით, ილეპოდან ერანის სამფ-
ლობელოთა დასალაშქრავად წამოსულა.

შაჰმა კახეთის ციხეებში სპარსული ციხიონები დატოვა, თვითონ კი სასწრაფოდ გაეშურა სამხრეთისაკენ. მარტყოფის გზით ტფილისს შეიარა, ციხე შეაკეთა, ქართველთაგან აბუჩად აგდებული ბაგრატ-ხანი ქართლის გამგებლის ადგილზე „დაამაგრა“ და საქართველოდან გავიდა.

გოგჩის ტბამდე იარა და იქ დაიბანაკა შაჰ აბასმა. ამასობაში მეჭმედ ფაშა ალექოიდან მივიდა არზრუმს, არზრუმიდან ყარსში შევიდა, ციხე გაამაგრა და შიგ თთხი ათას სამასი მეციხოვნე ჩააყენა, ყარსიდან პირდაპირ ერევანს მოადგა და ალყაში ჩაამწყვდია.

შაჰ აბასმა ამ ი რ გ უ ნ ე-ხ ა ნ ს უბრძანა ერევნის დაცვა.

სიკვდილს გადარჩენილმა კახელებმა გული მოიციეს საქართველოდან შაჰ აბასის წასვლით.

სამალაევებიდან და სახიზარებიდან გამოვიდნენ.

ნასახლარებზე ახალ-სახლები ააგეს.

ნაღველფარ კერიაზე ღველფი გააღვიძეს.

ნაფუძვარზე ახალი ფუძე-საძირკველი ჩაჰყარეს.

ნაციხვარზე „ახალ-ციხე“ აღმართეს.

ნავენახარზე ახალი ვაზი გაახარეს.

იმერეთიდან დაბრუნდნენ დავით ჯანდიერი და თამაზ ვაჩნაძე.

ღელუ-მელიქ შირვანელიც გადმოჰყვათ (კახელ ბელადებთან ერთად გადახვეწილიყო ღელუ-მელიქი, შირვანის აჯანყების მეთაური, თეიმურაზ მეფის შეფიცული ქვეშევრდომი და მოკაფშირე).

დაქცეული ცხოვრების აღდგინებას ჩაუდგნენ სათავეში ჯანდიერი და ვაჩნაძე.

ხალხს ასახლებდნენ, აფუძნებდნენ, ამხნევებდნენ, სულით და მკლავით განამტკიცებდნენ.

კახელებმა მეზობელი განჯის მცხოვრებლებიც აიყოლიეს და ააჯანყეს სპარსული-უღლის ჩამოსაგდებად.

სომხეთში მდგარ შაჰ აბასს მოახსენეს, რომ კახეთი „თავისას არ იშლიდა“, სიკვდილს არ აპირებდა და ახალი ქართული ცხოვრების აღორძინებას შესდგომია უტეხი სულით და უდრეკი მკლავით.

ის ა-ხ ან ყო რ ჩ ი ბ ა შ ი გამოიძახა ბალანაშლილმა შაჰ
ბხასმა.

იგი შაჰის სიძე იყო, — მამაცი მხედარი, ნიჭიერი სარდა-
ლი, ყორჩიების (ცხენოსნების) მთავარსარდალი.

(კარგად დაიმახსოვრე, მკითხველო, ისა-ხან ყორჩიბაში!).

და უბრძანა აბასმა ისა-ხან ყორჩიბაშს: ახლავე კახეთს
გაეშურე და მოსპე ყოველივე — „ნედლი და ხმელი“, „უტყ-
ვი და მეტყველი“!

1616 წლის შემოდგომის მიწურულს შემოიჭრა კახეთში
ყორჩიბაში „ყორჩიების, ლულამების და მეთოფეების ჯარე-
ბით“.

მტერი შემოიჭრა და ამინდიც გაუმტერდა ნაოხარ ქვეყა-
წას. ნაადრევად დაზამთრდა. ხვავრიელად ჩამოთოვა. ყინვამ
მოუჭირა.

ხალხმა ველარც გახიზვნა მოასწრო, ველარც აღგილზე
საომრად გამზადება.

წითელი, სისხლიანი ზამთარი დადგა კახეთში.

ქიზიყის ამოქლექით და ამოგდებით დაიწყო ყორჩიბაშმა.

აქაური მამაკაცები ისლამის „კრიალა ხმლის ლუკმად
იქცეოდნენ, ქალები და ბავშვები ძლევამოსილი ღაზიების
(სპარსელი მეომრების) ტყვეები ხდებოდნენ“.

დავით ჯანდიერის მთავარი ბანაკისაკენ გაეშურნენ სპარ-
სელნი.

ჯანდიერს რაზმი აეშალა და მოსახლეობის გახიზვნას შეს-
დგომოდა. კავკასიონის მთებისკენ მიჰყავდათ ხალხი პატრი-
ოტებს.

ძლივს, ჭაბანწყვეტით მიდიოდნენ თოვლსა და ყინვაში.

წამოეწივნენ სპარსელები.

ქართველებმა ცოლ-შვილი ცხენებზე შეალაგეს და გაი-
რეკეს. თვითონ დაქვეითებულნი, ოჯახებს კედლად და საფ-
რად აღემართნენ.

ისევ მძვინვარედ დატრიალდა ცელი სიკვდილისა.

ქართველები ცდილობდნენ მტერი ქალებთან და ბავშ-
ვებთან სათოფეზე არ მიეშვათ.

მიუხდნენ სპარსელნი.

ქართველებმა ჩაჰკაფეს მეწინავენი.

მოიერიშეებს წინ გადაუსწრო სარდალმა ჰასან-ალი-ბეგმა, ქართველის თოფით ზუსტად ნასროლმა ტყვიამ უსულოდ ჩამოაგდო ცხენიდან.

ახალგაზრდა იუზბაში ბექთარ-ბეგ ივოლლი დაწინაურდა თავისი ასეულით.

ისევ იგრიალა ქართულმა თოფმა და ბექთარ-ბეგიც სულ-გავარდნილი მოსწყდა უნაგირს.

უმხედროდ გაჭენებულ ბექთარ-ბეგის ცხენს მოაბტა მიწ ფათაჰ მინბაშ ისფაჰანელი და ისრის სროლით გაჭენდა ქართველებსკენ.

ისიც ქართველის ხელით განგმირული დაენარცხა ძირს.

მზე ჩავიდა. დღე მიიწურა და ღამემ ჩააქრო საომარე ყიყინა, იარაღის ზრიალი და მომაკვდავთა ბლავილი კაცთაგვლით დაღლილ დედამიწაზე.

მთელი ღამე თოვდა და ჰყინავდა.

მეორე დღეს სპარსელებმა დაინახეს, რომ ქართველთა ბანაკი თოვლში ჩაფლული იდგა უძრავად.

იერიში ბრძანა ისა-ხან ყორჩიბაშმა.

მკვდრეთით აღსდგა ქართველთა ბანაკი.

მთელი დღე აწყდებოდნენ ერთმანეთს მოპირდაპირენო კვლავ მეორე დღე, მესამე, მეოთხე...

ყველა ქართველი მამაკაცი შეაკვდა მტერს.

ქალები და ბავშვები ტყვედ აიყვანეს.

ამჯერად ათი ათასი ქართველი დაეკარგა კახეთს, — ნახევარი გაწყდა, ნახევარი ტყვედ ჩავარდა.

მერე ენისელისა და ძაგემის მხარეს გაუხტნენ სპარსელები, სამი ათასამდე ქართული ოჯახი (ოცი-ოცდახუთი ათასი სული) აპყარეს და შემდგომ, შაჰის ბრძანებით, ფეროჰაბადში გადაასახლეს.

დრო დაიცეს შაჰ აბასისგან წაქეზებულმა ლეეებმა. უპატრონოდ მიტოვებულ კახეთს შემოაჩვიეს ავაზაკი მძარცველის ხელი.

კახელთაგან გადარჩნენ მხოლოდ ისინი, ვინც ქართლსა და იმერეთში მოახერხა გაქცევა.

„მოკლედ, მოსახლეობის სუნიც კი არსად იყო დარჩენილი კახეთის ვილაიეთში და თეიმურაზის უაღონურებასა და

უმეცრების წყალობით, ისეთი ქვეყანა, რომელიც ყოველწლივ ურიცხვ სარგებელს და შემოსავალს იძლეოდა, დაიხვრა და მიწასთან გასწორდა“, — დაასკვნის სპარსი ისტორიკოსი ისქანდერ მუნში.

მერე განჯის მხარეს გადავიდნენ სპარსელები. აჯანყებულ კახელთა თანამდგომი მოსახლენი ააწიოკეს, ორმოცამდე ეპქმიტანილი დიდებული და მემამბოხე შაჰ აბასის ბრძანებით სიკვდილით დასაჯეს, ხოლო „ნაკლებად სანდონი“ ცოლშვილიანად აპყარეს და ისინიც ფეროჰაბადში გადაასახლეს.

იმავე 1616 წელს გიორგი სააკაძე ერთჯერ კიდევ ჩამოვიდა ქართლში.

ბაგრატ-ხანი დიდის პატივით შეხვდა მოუტრავს.

ნოსტეში მამულები დაუბრუნა, ხელახალი „წყალობის წიგნები“ მიართვა, ძველი პატივი და „ხარისხები“ აღუდგინა.

„გათათრებული ქართველები უფრო კარგად ეთვისებებიან ერთმანეთს, ვიდრე საერთოდ ქართველებიო“, ისმოდა ხალხში.

ისევ — „გჰვიოგა ბაჰილონიხა“

ასე ამბობდა სპარსეთში
 ტყვედ წაყვანილი ქართველი:
 რაც უნდა მტანჯონ, მაწამონ,
 მე არ გავბდები სპარსელი.
 ხეზე დამკიდონ, ქვეშ ცეცხლი
 შემინთონ, — ისე ვიწვოდე,
 მაშინაც ვეტყვი ჩემს მტარვალს:
 „მე ქართველი ვარ, იცოდე!“

ხ ა ლ ხ უ რ ი

ოსმალეთის ხარდალი ოქუზ მეჰმედ ფაშა ერევნიდან ხელცარიელი გაბრუნდა. მალე მან ზავი ითხოვა. შაჰ აბასმა 1612 წლის ზავის პირობების აღდგენა მოითხოვა, ასედაც მოხდა. სკილა და ქარიბდი შეთანხმდნენ.

შაპ აბასმა ისევ მოიცალა საქართველოსთვის.

1617 წლის ადრიან გაზაფხულზე იგი მესამედ წამოემართა კახეთის „ხელის მოსათავებლად“.

ისევ მოჰყავდა სააკაძე — „ყველაზე დიდი ქართველი“ — შაპ აბასს საქართველოში.

ისევ „დაეძვრინა თავი“ იმამ-ყული-ხან უნდილაძეს თვისტომთა სისხლში ხელების გასვრისავან.

.

ამჯერად კახელ აჯანყებულებს აჯანყების მთავარი კერეონი ხორნაბუჯში დაენტოთ.

ხორნაბუჯი — „ეს დიდებული ციხე-ქალაქი მდებარეობს ერთი მაღალი და მიუვალი მთის წვერზე და არც ერთი მხრიდან არ აკრავს მაღლობი, საიდანაც შეიძლებოდა მასზე თავს წამოდგომა. მისი სიმაღლე ისეთია, რომ კარის ზღურბლიდან იმ ადგილამდე, სადაც ციხის მცველები დგანან, ხუთას სამოცი კიბის საფეხური უნდა აიაროს კაცმა. ერთი სიტყვით, იმ ციხეს რომ წვიმის ასავსები ამბრის გარდა ერთი წყაროც ჰქონოდა, ვერც ერთი დიდებული ხელმწიფე მას ვერასოდეს ვერ დაიპყრობდა“ (ისქანდერ მუნში).

შაპ აბასმა ალყა შემოარტყა ხორნაბუჯს.

მზეც დაემტერა მშობლიური ქვეყნის დამცველებს, საშინელი სიციხე და ალბი ჩამოწვა. წყალსაცავეები დაშრა და დაიწრიტა.

შომშილმა და წყურვილმა დაიმონავა ხორნაბუჯი.

აჯანყების მეთაურებმა ბაგრატ-ხანს კაცი გაუგზავნეს და გამძვინვარებულ შაპთან სამშვიდობო შეამდგომლობა სთხოვეს.

ბაგრატ-ხანი დათანხმდა და შაპს ეახლა.

გარიგება შედგა: აჯანყებულებმა ქალაქი სპარსელებს დაუთმეს, სამაგიეროდ შაპმა ყველას სიცოცხლე არუქა, მაგრამ კახეთში ცხოვრება მაინც აუკრძალა, შეწყალებულთა ერთი ნაწილი ბაგრატ-ხანმა ქართლში წაიყვანა, დანარჩენები შაპ აბასმა ერანს გაგზავნა, ფეროჰაბადში დასახლებლად.

ხორნაბუჯიდან შაპ აბასმა ჯარები ქიზიყს შეუსია.

ისევ დადგა საშინელი სისხლისღვრა და სიკვდილის თესვა ქიზიყის მიწა-წყალზე.

ისევ ძველი, „შაჰ-აბასური სისასტიკით“ ნადგურდებოდა ქვეყანა: სიკვდილი ყველა ბრძოლისუნარიანი მამაკაცისა, ტყვეობა და ქართული მიწა-წყლიდან სამუდამოდ გადასახლება ყველა ქართული ოჯახისა!

იმდროინდელი „კახური პეიზაჟები“:

დანგრეული, მიწასთან გასწორებული, ფერფლად და ავლად შცეული ნაშენობანი;

გაჩეხილი ბაღები;

ამოძირკვეული ვენახები;

ქართველ ვაჟკაცთა წარკვეთილი თავებით ნაშენები ბორცვები;

მხარგაკრული, თმებაშლილი და სახედალეწილი ქართველი ქალები;

შიშისაგან და წუხილისაგან სახეშეშლილი ქართველი ბავშვები;

სამხრეთის აღმურავარდნილ გზებზე გაწვართული ქართულ ოჯახთა ქარავნები...

1617 წლის აღრიან გაზაფხულზე შაჰ აბასი მეოთხედ შემოესია კახეთს.

ისევ აღგვა პირისაგან მიწისა სოფლებისა და ქალაქებისა.

ისევ ნაცრად და ავლად ქცევა.

ისევ ქლეტა მამაკაცთა.

ისევ ტყვეობა და გადასახლება ქართულ ოჯახთა.

ისევ თურქმანულ ტომთა ჩამოსახლება ქართულ ოჯახთა ნასახლარებზე.

შაჰ აბასმა არამცთუ „მშობლიური მეფობა“ არ დაუტოვა კახთა ქვეყანას, „სპარსული სახანოს“ სახელიც აღარ აღირსა. აღგვა და სულაც „გააუქმა“ კახეთი — ეს ყოველად „ურჩი გურჯისტანი“.

ორად გაჰყო შაჰ აბასმა „ყოფილი“ კახეთის ქვეყანა, — იორის აღმოსავლეთი ნაწილი განჯის ბეგლარბეგს ფეიქარხანს მისცა „დამატებით სამმართველოდ“, დასავლეთი ნაწილი კი — ქართლის გამგებელს ბაგრატ-ხანს.

ასეთი იყო უმძიმესი და უბოროტესი ქამნი კახეთისა.

ოთხი ავბედითი წელიწადი: ჯიქი — 1614, კურდღელი — 1615, ნიანგი — 1616 და გველი — 1617.

ოთხი შემოსევა ერანის ლომის, შაჰ აბასისა.

ამ ოთხ წელიწადში კახეთმა დაჰკარგა ორი მესამედი თავისი მოსახლეობისა.

სულ ნახევარი მილიონი ქართველი შეეწირა ავზნიანი და ბნედიანი შაჰ აბასის კაცთმოძულეობრივ ვნებებს.

ერთი მესამედი გაწყდა.

ორი მესამედი სამუდამოდ აპყარეს და გადაასახლეს.

პიეტრო დელა ვალე რომის პაპს — ურბანუს მერვეს:

„რა მდგომარეობა მოჰყვა ამ საზარელს გადასახლებას, რამდენი სიკვდილი საშინელი გაჰცირებებისგან, რამდენი წყევტა-ყლეტა, რა გლეჯა, რა გახრწნილობა, რა ძალმომრეობა, რამდენი ჩვილი უმაწვილები დაალრჩვეს მამებმა თავისივე ხელით, ან წყალში ჩაჰყარეს, რათა არ უყურონ მათს საცოდაობას და სატანჯველს, რაკი ყოველ ღონეს იყვენენ მოკლებულნი მათს საპატრონოდ! რამდენსა ელიტავდა სპარსთა მხედრობა გზა-გზა დაცვივნულებს, ან მათ, რომელთაც აღარ შეეძლოთ სიარული! რამდენი ბავშვი მოჰგლიჯეს სპარსელებმა დედის ძუძუს და დაჰყარეს გზებზედ მხეცების შესაჰმელად, ან ცხენებისა, აქლემებისა და ჯორების ფეხქვეშ გასასრესად! რამდენი დააშორეს მამა შვილს, ცოლი ქმარს, დაი ძმას, და გაჰფანტეს ერთი ერთმანეთიდან შორიშორს ქვეყნებში, ისე რომ, ეს საწყლები საუკუნოდ იყვენენ იმედგადაწყვეტილნი — ვერასოდეს ველარ ვიხილავთო ერთიმეორეს! რამდენი ქალი და კაცი იყიდებოდა პირუტყვზედ უფრო იაფად, რამდენი სხვა ამისთანები ხდებოდა ღირსი სიბრაალულისა, მაგრამ ყველას ვინ მოსთვლის?!“

შაჰ აბასს მის ბნელ საქმეთა განსრულებაში ბევრი წინამორბედი ჰყავდა. მაგრამ ყველაზე უფრო მაინც ნაბუქოდონოსორ ბაბილონელის შორეულ ეპიგონად გვეჩვენება „ერანის ლომი“.

დაპყრობილი ხალხს აქვს, ჯადსახლება (ვინა — „ტყვედ წყევანა“) და გაფანტვა (ვინა — „დისპორა“) სწორედ ნაბუ-

ქოდონოსორის „დიდი აღმოჩენა“ იყო და „პირველობის პალმაც“ მას ეკუთვნის მსოფლიო კაცთმოდულეობის ესოდენ „ორიგინალურ გამოვლენაში“.

მკითხველს ვთხოვ აქ გაიხსენოს ცნობილი „ბაბილონის ტყვეობა“ ბიბლიიდან — როგორ წაიყვანა ტყვედ ნაბუქოდონოსორმა იერუსალიმის მოსახლეობა დედაბუდიანად ბაბილონში (ძვ. წ. 586).

სწორედ ბიბლიური „ბაბილონის ტყვეობიდან“ ორი ათას ორასი წლის შემდგომ მრისხანე ნაბუქოდონოსორის ეპიგონმა — გესლის გუდამ, შაჰ აბასმა ოთხჯერ მოახდინა „ერანის ტყვეობა“ ქართველი ხალხისა.

ტყვეობა, აყრა, გადასახლება!

გადასახლება და გაფანტვა ერანის პროვინციებში: ფერეიდანში, ხორასანში, მაზანდარანში, ფეროჰაბადში.

ასე ანგარიშობდა შაჰ აბასი: ურჩი, გაუტეხელი და შეურიგებელი კახეთი სამუდამოდ უნდა წაშლილიყო დედამიწის ზურგზე, ხოლო „ყოფილი“ კახეთის „ნაცხოვრისზე“, „უძლეველ ქართველთა“ ნასახლარებზე, ესახლებოდა შაჰის მორჩილი და ერთგული თურქმანული ტომები. მეორეს მხრივ, — მკვიდრი სამიწათმოქმედო მეურნეობის დიდოსტატნი — ქართველები — ერანის ველურ მიწებს კულტურულ სამეურნეო ცხოვრებით ააყვავებდნენ; ქართველი კაცის გამრჯე მარჯვენას სპარსეთი უნდა გაემდიდრებინა და გაემშვენიერებინა. მესამეც, — სპარსეთში დასახლებული ქართველობა — მისი ნათელი გონებით, უშიშარი გულით და უდრეკი მკლავით — ისევ და ისევ უნდა ყოფილიყო „მთავარი ძარღვი“ სრულიად ერანის საომარი ძალებისა.

ასეთი იყო „ერანის ტყვეობა“ ქართველებისა, ვითარცა შორეული ანალოგია ბიბლიური „ბაბილონის ტყვეობისა“.

ამიერიდან ტყვედწაყვანილი ქართველისათვის „მისი საქართველო“ უნდა ყოფილიყო ერანი, გინა — სპარსეთი.

ხოლო, „მისი კახეთი“ — ფერეიდანი, გინა — მაზანდარანი, ხორასანი, ფეროჰაბადი.

ამიერიდან მას — საქართველოსათვის დაკარგულ ქართველს — უნდა ეეკეთებინა სხვათა ისტორია“, გინა — სპარსეთის ისტორია!

.

თითქოს სავსებით მომკვდარიყო „ბედნიერი კახეთი“,
 აღარსად იღო „ქვავი ქვაზედა“.

აღარსად იდგა არცა ვაზი, არცა ვაშლი, არცა თუთა, არცა
 კაკლის ხე.

ძეძვი და ეკალბარდი მოილტვოდა ნავენახარისა და ნაყა-
 ნარის ჩასანთქავად.

აღარ ბლაოდა ჯიშინი ხარი და ძროხა.

აღარ ისმოდა გულისშემძვრელი ოროველა, არც ღვთა-
 ებრივი კახური მრავალქამიერი.

ზარნაშო ჰკიოდა მამლის ყივილის სანაცვლოდ.

მგელი ყმუოდა ძაღლის ნათევარზე.

.

ყურადღება მიაქციე, ჩემო მკითხველო:

თხიხე ლაშქრობის დროს შაჰ აბასს საქართველოში
 თან ახლდა გიორგი სააკაძე.

და არც ერთჯერ შაჰს სააკაძისთვის არც ერთი სომარი
 განაზრახის განსრულება არ მიუხდევია ქართველი ხალხის
 დასალაშქრავად, ასაწიოკებლად, ასაყრელად, გადასაყრელად!
 რა იყო ეს?!

უნდობლობა შაჰ აბასისა?!

ურჩობა გიორგი სააკაძისა?!

არავინ იცის.

მხოლოდ ერთი რამ არის ცხადზე უცხადესი:

საკაძის ავფხიანი ხმალი ჯერ ქართველ კაცს არ მოხვედ-
 რია...

დედოფლის სიზმარი

ოსმალეთის ხონთქარმა აჰმედ I-მა აღმოსავლეთის ჯარე-
 ბის მთავარსარდლობიდან გადააყენა ოქუზ მეჰმედ ფაშა და
 მის ნაცვლად დიდ ვეზირად და სერასქერად დანიშნა ჰა-
 ლილ ფაშა.

1617 წლის ივნისში ჰალილ ფაშა ერანისაკენ გაემართა დიდი მხედრობით.

თურქთა არმიას თხუთმეტი ათასი ყირიმელი ცხენოსანი მოსდევდა თვითონ ყირიმის ხანის, ჯ ა ნ ი ბ ე გ-გ ი რ ე ის სარდლობით.

შაჰ აბასმა მაშინვე ყარჩიხა-ხანი გაგზავნა არზრუმისა და ვანის ოლქების ასაოხრებლად. ყარჩიხამ სრულიად ადასრულა მეუფის ბრძანებულება.

ჰალილ ფაშა იძულებული გახდა სალაშქრო გეზი შეეცვალა — აოხრებულ არზრუმ-ვანის გზას მორიდებოდა და დიარბექირში მისულიყო მძიმე ლაშქრობით წელში გაწყვეტილი.

შაჰმა შეიტყო, რომ ჰალილ ფაშა თურმე თეიმურაზის აღდგენასაც აპირებდა კახეთის ტახტზე.

.

თეიმურაზის სტუმრობის ყამს იმერეთს დიდი შიმშილობა დაატყდა თავს. ძნელი შესამჩნევი არ იყო რომ ქუთათისის სასახლის კარს ორი სამეფო ჯალაბისა და სამიათასკაციანი ამალის შენახვა ძალიან უჭირდა.

„შემჭირვებულმან“ თეიმურაზმა კუმურდოს ტაძრის წინამძღვარი, ილუმენი ხ ა რ ი ტ ო ნ ი სტამბოლს გაგზავნა და ხონთქარს „სადგური და შეწევნა“ სთხოვა.

სანამ სტამბოლიდან პასუხი მოვიდოდა, თეიმურაზი ქუთათისიდან გურიაში ჩავიდა სტუმრად.

მამია გურიელმა დიდის პატივით მიიღო თავისი სიძე-ყოფილი (თეიმურაზის პირველი ცოლი, ანა, ხომ მამია II გურიელის ასული იყო).

აქვე სასიხარულო ამბავი ჩამოიტანა ილუმენმა ხარიტონმა: თურქეთის სულთანს კახეთის მეფისათვის „აღეთქვა შეგლა და მწე-ყოფა... და მიეზოდა გონია და ახალციხის გარემოს რომელნიმე დაბნები“.

ფეხი აიჩქარა თეიმურაზმა და დროც იყო, რადგან აგენა კაცისკაცებს უკვე ჩაეგონებიათ გურიელისათვის, რაკი ხონთქარმა თეიმურაზს გონია — ეს „ბუნებრივი ნაწილი“ გურიისა — აჩუქა, აღბათ მთელს გურიასაც წაგართმევს და კახთა მეფეს მიაართმევსო.

თეიმურაზი ჯერ ახალციხეს წაეიდა, რათა სულთანისაგან ნაჩუქარი „დაბნები“ მოეხილა და ჩაეხარებინა.

ახალციხეში მანუჩარ III ათაბაგი შეხვდა დიდს პატივით კახეთის მეფეს.

მანუჩარი ემახსოვრება მკითხველს, — სახელოვანი მანუჩარ II-სა („თურქობაში“ მანუჩარ-მუსტაფა ფაშა) და სვიმონ მეფის ასულის ელენეს ვაჟი, — 1607 წელს, ვითარცა შაჰ აბასის ქვეშევრდომმა, დერბენდი რომ დაავდებინა თურქებს.

მანუჩარი მხოლოდ გარეგნულად ატარებდა „მესამისა“ და „ათაბაგის“ თიკუნებს, თორემ იგი არც ათაბაგი იყო და არც რაიმე ანგარიშგასაწევი ძალა — არც თურქეთისთვის და არც სპარსეთისთვის. მაგრამ მამაცი და გულგაუტყებელი ვაჟკაცი მოთმინებითა და ურყევა რწმენით ელოდა „თავისი ბედისვარსკვლავის“ ამობრწყინებას...

მანუჩარმა თეიმურაზი ოლთისს ჩაიყვანა.

სწორედ ოლთისი და მისი ახლომახლო „დაბნები“ უბოძებია ხონთქარს კახეთის მეფისათვის.

მეფეს სამი ათასამდე კაცა ახლდა, ზოგი მასთან ერთად გაქცეული, ზოგიც კახეთიდან შემდგომ გადმოხვეწილი — ყველანი ოჯახითა და დედა-წულით.

თეიმურაზმა დედოფალი ხორეშანი და ამაღა ოლთისში დატოვა და პატრონად სახლთუხუცესი ნოდარ ჯორჯაძე დაუტოვა. თვითონ შვიდასი კაცი აარჩია, მდიდრულად მოკაზმა და მათი თანხლებით სტამბოლის გზას გაუყვა.

1617 წელი იწურებოდა. დიდი თოვლი მოვიდა.

ერევნის ბეგლარბეგმა ამირგუნე-ხანმა შაჰ აბასის ბრძანება მიიღო. ოლთისში თეიმურაზის ჯალაბი მდგარა; დაუყოვნებლივ გაეშურე, დედოფალი ხორეშანი შეიპყარი და ტყვედ მომგვარე თავისი ამალითა და მსლებლებითო.

გამოეშურა ამირგუნე-ხანი მხედრობით. ძლივს მოაკვლევდნენ თოვლით გატენილ გზებს.

იმ ღამით ხორეშან დედოფალმა სიზმარი ნახა: ვითომცვ ვარდის ყვავილობა იდგა სასახლის წალკოტში, თვითონ ვარდის საკრეფად ჩაბრძანებულიყო დედოფალი. ერთბაშად გველებით აივსო ბაღი. შემზარავი წივილით და შხორკალით მიეტევნენ ქვეწარმავალნი ფეხშიშველა, ტანშილივ ქალსა

მუხლები შეეკეცა და ყელი დაეკეტა გაქცევისა და ყვირილის მოსუნეს. და ის იყო გველთაგან დაგესლილი უნდა დაცემულიყო კახეთის დედოფალი, რომ ზეციდან მოიჭრნენ ორბები და წამსვე დაიტაცეს და გაიტაცეს გველები წალკოტიდან.

ეს საშინელი ძილისშორისი ხორეშანმა მტრის შემოსევად „იწინასწარმეტყველა“ და მაშინვე ციხის გამაგრება და საომარი თადარიგი ბრძანა.

როცა ამირგუენე-ხანი მოახლოვდა, ოლთისი უკვე საომრად იყო გამზადებული.

ქალაქის დაცვას ნოდარ ჯორჯაძე უდგა სათავეში. ყიზილბაშთა არმია ოლთისიდან მოშორებით დადგა ბანაკად.

ნოდარი მიხვდა, მტერი მძიმე ლაშქრობას დაექანცა და ქალაქზე იერიშის წინ დასვენებასა და ძალ-ღონის მოკრეფას აპირებდა.

მაშინვე გამოიყვანა ქართველთა გუნდი. ელვასავით მიუხტა და დააცხრა სპარსელთა ბანაკს. არც ამირგუენე-ხანი და არც მისი ლაშქარი არ მოელოდა ერთი მუჟა ქრისტიანების ეგზომ თავზეხელაღებულობას. მაინც სცადა ბრძოლის აწყობა ბეგლარბეგმა, მაგრამ ქართველები უკვე შუაგულამდის შემოჭრილიყვნენ მის უთავბოლოდ აჭრილ მხედრობაში.

ისევ გაქცევა ამჯობინეს სპარსელებმა. გამოედევნენ ქართველები. ერთხანს სდიეს, მრავალი ყიზილბაში დაჰხოცეს, დიდი ნადავლიც მოინადავლეს და გამარჯვებულნი მობრუნდნენ ოლთისს.

ისევ დაუდგა გველის კაჭრობა შაჰ აბასს, როცა ქართველთა მცირე გუნდისგან ერეენის ბეგლარბეგისა და მისი მხედრობის მარცხი შეიტყო.

თეიმურაზს ამ ამბების შესახებ არაფერი შეუტყვია, ისე მივიდა სტამბრლს.

1618 წლის იანვარი იდგა.

თავის მწყალობელს ველარ ჩაუსწრო თეიმურაზმა, — მომკვდარიყო ფადიშაჰ აჰმედ I.

ოსმალეთის ტახტზე გონებაჩლუნგი მუსტაფა I იჯდა.

მუსტაფამ ჯერ „კეთილად შეიწყნარა“ ქართველი მეფე — „სილამაზით განთქმული, საყვარელი, იშვიათი გულადობითა და კეთილშობილებით ცნობილი“ კაცი. მაგრამ მოლაპარაკების უამს კეთილი სტუმარ-მასპინძლობა და თეიმურაზის „განთქმული ღირსებანი“ დაგვიწყებულ იქნა.

თეიმურაზმა ჯიქურ დაიწყო: ერანის შაჰი ერთნაირად მტერია ჩვენი — თურქეთისა და საქართველოსი; ამიტომ გთხოვ, ჯარი მომცე და სპარსეთის წინააღმდეგ ვიომებ, ვითარცა თქვენი მოკავშირე და ქვეშევრდომიო.

მუსტაფამ ასეთი პასუხი შეაგება ქართველს: მე და შაჰი ორივე მუსლიმანები ვართ და ეგ როგორ იქნება, რომ შენ, ქრისტიანს, ჩემი თანარჯულის წინააღმდეგ საომარი ძალები მოგცეო. ამიტომ თუ მართლა ჩვენი კავშირი, სიახლოვე და დახმარება გსურს, ჯერ რჯული გამოიცვალე — ქრისტიანობა განაგდე და მაჰმადიანად მოიქეციო.

ქვა აავდო და თავი შეუშვირა თეიმურაზმა. ამდენს იმიტომ ვირჯებო, რომ ქრისტიანობა და ქართველობა არ დაეკარგო, თორემ სჯული თუ გამოვიცვალე, რაღა სპარსელი და რაღა თურქიო ჩემთვის.

(ლამის ეს წამოსცდენოდა — „ალია და ოსმანა ორივე თათარიო“).

ეს სიტყვა ძალიან გულწრფელად (მაშასადამე, — არა დიპლომატიურად) იყო ნათქვამი. ხონთქარსაც „ნამეტნავად ეწყინა“ და ამის შემდეგ, მისი ბრძანებით თეიმურაზს „პატივიც მოუკლეს და აღარც ინახვინეს“.

დაჰკრა ფეხი თეიმურაზმა და წამოვიდა სტამბოლიდან.

გზაზედ, ანატოლიაში, შეიდჯერ დაესხნენ თავს თეიმურაზს.

რაზსა და მის გუნდს თურქული მოდგმის „ჯალადნი“, რომლებიც, ლეკების მსგავსად, აბრაგული თავდასხმებით ძარცვავდნენ და აწიოკებდნენ მოსახლეობას.

შვიდჯერვე ისე დაიფრინეს და დაიწყვიტეს მტერია ქართველებმა, რომ „ერთიცა კაცი არა დამკლე ექმნა თეიმურაზს“. ოლთისს მოატანეს.

ამირგუნე-ხანის შემოსევისა და მისი დამარცხების ამბავი შემოაგებეს დედოფალმა ხორეშანმა და სახლთუხუცესმა ნოდარ ჯორჯაძემ.

ალბათ შაჰ აბასი ვერ დაითმენს მისი ჯარების ეგზომ სამარცხვინო მარცხს და ახლა თვითონ წამოიმართება სამცხისაკენო, იფიქრა თეიმურაზმა.

მაშინვე ოლთისი დატოვა და გონიოში გადავიდა ამალით და ალალფორანით.

რა მოხდება ხვალ, რას უმზადებს ავი ბედისწერა უბედობაში აჩემებულ გვირგვინმოხდილ გვირგვინოსანს?!

მხოლოდ ერთ საფიქრალს შეეპყრო ახლა თეიმურაზი:

„არც ერანი და აღარც თურქეთი... არამედ მხოლოდ რუსეთი!“

და მოულოდნელად ახალი ამბავი შეატყობინეს:

სტამბოლში იანიჩარებს ჩამოუგდიათ გონებასუსტი, მუსტაფა I და მის ნაცვლად ფადიშაჰის ტახტზე აუყვანიათ ოსმან II.

მაშინვე ილუმენი ხარიტონი აფრინა სტამბოლს თეიმურაზმა.

სანამ შორეულ რუსეთს მივწვდებოდე, მანამ ერთჯერ კიდევ მოვესინჯოთ კბილი თურქეთსო, ახლა ეს საფიქრალი აეკვიტა მეფეს.

ოსმან II-მ მისვლისთანავე დიდის სიხარულით მიიწვია კახეთის მეფის ელჩი.

ახალი სულთანი ჭკვიანი კაცი იყო. ქართველების ფასიც კარგად სცოდნია. საგანგებოდ დაჰკვირვებოდა ოსმანი: რაც აქამდე თურქეთის მოსისხლე მტერს, შაჰ აბასს, მიღწევა ჰქონია, სულ ქართველების წყალობით მიუღწევია. ის კი არა და, თვითონ ქართველებიც უფრო ხშირად ისევ ქართველების მეოხებით დაუმარცხებია ცბიერ შაჰ აბასს.

უფრო მეტიც: თურმე აქამდე, ერანსა და თურქეთს შორის გამართულ ჭიდილში ყოველთვის ის მხარე იმარჯვებდა, რომელიც ქართველობას უკეთ „მოიმხრობდა“ და „მოიმხარდა“.

საჭირო იყო თურქეთის სერალს თავის მხარეზე „გადმოეძალა“ ამდენ ხანს ერანისაკენ „გადაძლეული“ ქართული სასწორი...

ტკბილად მიიღო ოსმან ხონთქარმა თეიმურაზის ელჩი. დიდის გულისყურით და „გულისტკივილით“ მოისმინა ქართველი მეფის საჩივარი. მაშინვე პირობაც დასდო, — აუცილებლად აღადგენდა კახეთის ტახტზე თეიმურაზს და უსათუოდ ყიზილბაშებსაც მოაშორებდა მისი ქვეყნიდან, ოღონდ...

ოღონდ თვითონ ქართველი მეფე თავისი ქართველებით ახლავე უნდა გაეშუროს სპარსეთის წინააღმდეგ სალაშქროდ.

ახლავე?!

ღიახ, ახლავე უნდა წაგიდეს თეიმურაზი და შეუერთდეს დიარბექირში მდგარ ჰალილ ფაშას თავისი ქართველებით.

თავისი ქართველებით?!

ღიახ... მაგრამ რამდენი კაცი ახლავს ღტოლვილ ხელმწიფეს (თუ ნახელმწიფარს)?

სამი ათასი,

ჰოდა, სამი ათასი ქართველი მეომარი დიდი სიომარი ძალა გახლავთ!

სამი ათასი ქართველი — ოსმალთა არმიის „წინამბრძოლ“ ძალად!

გადაწყდა!

.

დიარბექირის ბანაკში დიდი ამბავი იდგა: ქართველი მეფე თეიმურაზ პირველი მოსულიყო სამი ათასი მხედრის თანხლებით, — „მოკავშირედ“ და „მოყვარედ“ მოსულიყო.

წადნიერი თვლებით ზომავდნენ ოსმალები მოსულეებს.

საწადნიერო რა უნდა ყოფილიყო, — აკი კარგად იცნობდნენ ერთმანეთს ქართველები და ოსმალები. მაგრამ ქართველ ტომთაგან მაინც კახელებს უფრო „შორიდან“ იცნობდნენ ოსმალნი.

უფრო ყირიმელი თათრები სკამდნენ ჭრუტა თვალებით პირღრუბლიანად ჩაგუბებულ ქართველთა ჯარს...

1618 წლის მაისში ჰალილ ფაშამ მრავალრიცხოვანი მხედრობა დიარბექირიდან გამოიყვანა და ბითლის-ვანის გზით თავრიზისაკენ გაემართა.

მიდიოდა არმია, რომლის ტომობრივი შემადგენლობა, „როგორც წესი“ — მაღალდაბლობით, რიცხვის მიხედვით ჩამოითვლებოდა — ოსმალები, ყირიმელები, ქართველები.

ხოლო წინ, — ვითარცა „წინამბრძოლნი“ — ქართველები მიუძღოდნენ „ოსმალთა ურდოს“...

თავრიზში ყარჩიხა-ხანი იდგა ყიზილბაშთა არმიით.

თურქთა წამოსვლა რომ შეიტყო, ყარჩიხამ თავრიზიდან მოსახლეობა დედაწულიანად გაიყვანა და დაცარიელებული ქალაქი უბრძოლველად შეატოვა მტერს.

თეიმურაზს ეგონა, ხონთქარისა და სერასქერის პირობისამებრ, თავრიზიდან თურქები ტფილისისკენ დაიძვოდნენ, ქართლ-კახეთს ყიზილბაშთაგან გასწმენდნენ და ორივე ქართულ ტახტს სწორედ მას — თეიმურაზს მიაართმევდნენ.

მაგრამ ეს ასე არ მოხდა.

თავრიზიდან ჰალილ ფაშამ არდებილს დაუსისწორა სალაშქრო გეზი.

არდებილის დასავლეთით დაუხვდა ყარჩიხა-ხანი თურქთა სერასქერს.

ბრძოლა ქართველებმა გახსნეს.

თეიმურაზი გაალმასებით ეკვეთა ერანელთა შუაქერძს.

მიჰყვნენ ოსმალნი გამაყრუებელი ბლავილით.

ფლანგებიდან ყირიმელთა კავალერია ეტევებოდა.

უკუიქცნენ სპარსელნი.

არდებილს მიადგნენ თურქნი.

„თურქნიო“ — ასე ითქმოდა, თორემ მეწინავენი ისევ ქართველები იყვნენ.

თეიმურაზს არდებილის დანგრევისა და აღგვის წყურვილი ახრჩობდა. შაჰ აბასის წინაპრების ეს შხამიანი საბუღარი უნდა დავლევო ჩემი კახეთის წმინდა ტაძართა შერყვნისა და აოხრების საზღაურადო, ამბობდა მეფე.

დღე-დღეზე არდებილი უნდა დანებებოდა მტერს.

ერანი პანიკას მოეცვა.

სასტიკად დამფრთხალიყო თვითონ შაჰ აბასი.

ალარავის უსმენდა გონებისაგან „გამოთიშული ლომი“.

ზავი აეჩემებინა და მეტი არაფრის გაგონება აღარ უნდოდა.

საიდუმლოდ ჰაღილ ფაშას ქრთამიც კი გაუგზავნა შაჰ აბასმა, — მოვილაპარაკოთ და მშვიდობა ჩამოვაგდოთ ურთიერთშორისო.

ჰაღილ ფაშამ საზავო პირობად მთელი ამიერკავკასიის დაცლა მოითხოვა ერანელთაგან.

ეგზომ მძიმე პირობაზე დათანხმება არ შეეძლო შაჰ აბასს, რომელმაც მთელი მისი ზეობის წლები თითქმის მთლიანად საქართველოსა და შირვანისათვის ბრძოლას შეაღია.

მაგრამ მოლაპარაკება მაინც გრძელდებოდა.

ამასობაში თეიმურაზმა ჰაღილ ფაშას შემწეობით კახეთის „ვათაფისუფლების“ იმედი სამუდამოდ დაჰკარგა და თავისი ჯარით თურქთა ბანაკი მიატოვა.

შაჰ აბასმა სული მოითქვა.

1618 წლის სექტემბერში, სერაფში (სამხრეთ აზერბაიჯანში) გადამწყვეტი ბრძოლა გაიმართა ერანელებსა და თურქებს შორის.

ერანელთა არმიას „ყველაზე იღბლიანი სარდალი“ — დაუდ-ხან უნდილაძე ედგა სათავეში.

ბრძოლა თურქების მარცხით განესრულა.

ახლა ჰაღილ ფაშამ დაიწყო ზავზე ვედრება.

კიდევაც დაიდო ზავი, იქვე — სერაფში.

შირვანი და აღმოსავლეთ საქართველო ისევ ერანის „საკუთრებად“ გამოცხადდა, ხოლო დასავლეთ საქართველო და სამცხის ქვეყანა ისევ თურქეთის „გავლენის სფეროდ“ რჩებოდა.

.

ხოლო თეიმურაზმა, დასავლეთ საქართველოს მეფე-მთავრებთან ერთად რუსეთის მეფეს — მიხეილ რომანოვს — ელოჩი გაუგზავნა, იღუმენი ხარიტონი.

რუსეთის ხელმწიფეს ისევ სთხოვდნენ დახმარებასა და მფარველობას საქართველოს ჭირისუფალნი.

იმავე 1618 წელს შაჰ აბასმა თანამდებობის ბოროტად გამოყენებისათვის გადააყენა ისფაჰანის ტარულა (ქალაქის თავი, მოურავი) მირ აბდალ-აზინი, რომელსაც ვერც იმან უშველა, რომ იგი შაჰ აბასის სიძე იყო.

შაჰმა გიორგი სააკაძე დაიბარა და ჰკითხა: როგორ მირჩევ, ვინ გამოგვადგება სატახტო ქალაქის გამგებლად.

— ხოსრო-მირზა გამოდგება, — უპასუხა გიორგიმ.

— ხოსრო-მირზა, დაუდ-ხანის უკანონო შვილი, წაგვისელი გლეხის ქალისაგან, ბაგრატ-ხანის ნახევარძმა.

— დიახ, აგრე გახლავთ.

— ძალიან თავგამოდებული კი ხარ მაგ ხოსრო-მირზასთვის, გიორგი სააკაძე!

— ეგეც აგრე გახლავთ, რამეთუ ხოსრო-მირზა ჭკვიანია, დაკვირვებული, გაჭირვებაში გამოჯაჭული, ნიჭიერი სარდალი, მამაცი მხედარი, ჭეშმარიტი მაჰმადიანი და შაჰის ტახტის უაღრესად ერთგული შაჰისევალი.

გიორგი სააკაძე გაუშვა და იმამ-ყული-ხან უნდილაძე გამოიძახა შაჰ-აბასმა.

ტკბილად შეხვდა ხელმწიფე ქვეშევრდომს.

— ჯერ ისე აათვალეირ-ჩაათვალეირა აბასმა მოხდენილი გაქცევი, კობტად და მდიდრულად მორთულ-მოკაზმული და ეს ჰკითხა მკაცრი ღმილით:

— მაინც ვინ არის შაჰი, — მე თუ შენ?

— თქვენ, ხელმწიფეო, ნებითა ალლაჰისა და მისი წინასწარმეტყველის მუჰამედისა, — დინჯად უპასუხა უნდილაძემ, რადგან საერთოდ შეჩვეული იყო შაჰისაგან შეხუმრებას.

— მერე, შენ რომ ჩემზე უკეთესად ვაცვია, გახურავს, უფრო ძვირფასი აღჭურვილობით იკაზმები, ფულსაც მეტს ხარჯავ, — ამაზე რაღას იტყვი?

— ეგეც თქვენი წყალობა გახლავთ.

— რა იქნება, რომ შენ ერთი გროშით ნაკლები დახარჯო, თუნდაც იმისათვის, რომ ხალხმა შაჰსა და ხანს შორის განსხვავება დაინახოს?

უნდილაძე ილიმებოდა და ხმას არ იღებდა. ასეთი „ხუმრობა“ ამას წინაც თქვა შაჰმა, სადილზე, პორტუგალიელი ანტონიო გოვეას თანდასწრებით...

ბოლოს უნდილაძესაც ეს ჰკითხა შაჰმა: ისფაჰანის ახალი ტარულა უნდა დაენიშნო და შენ რას მირჩევ, ვინ გამოდგება სატახტო ქალაქის გამგებლადო.

— ხოსრო-მირზა, — მაშინვე შეაგება უნდილაძემ.

— ხოსრო-მირზა?

— დიახ, ხელმწიფეო.

გაუკვირდა შაჰ აბასს, ასე ერთბაშად რომ ორ ქართველს ერთ საქმეზე ერთნაირი აზრი აღმოაჩნდა.

— შენ და სააკაძე მოლაპარაკებული ხომ არა ხართ, რომ იმანაც ეგ კაცი მირჩია?.. — სიცილით იკითხა შაჰმა.

— მე არ ვიცი, სააკაძემ ვინ გირჩიათ, მაგრამ ეს კი მჯერა — ხოსრო-მირზა ყველაზე უკეთესი იქნება, რაც კი აქამდე ტარულა ჰყოლია ისფაჰანს, — დაბეჭდა უნდილაძემ.

კარგი, წადიო, უთხრა შაჰმა უნდილაძეს.

იმ დღესვე გამოცხადდა ერანის ხელმწიფის ბრძანებულება და ისფაჰანის ტარულა შეიქნა ხოსრო-მირზა, ძე დედ-ხანისა, ძმა ბაგრატ-ხანისა, ძმისწული დიდი სვიმონ მეფისა, შვილიშვილი დიდი ლუარსაბ I-ისა.

ეს პირველი ქართველი ტარულა იყო ერანის სატახტოს სათავეში.

აქამდე, „როგორც წესი“, ერანში ქართველების ხელთ იყო ყოველი მაღალი „ტახტი“ (თვინიერ შაჰის ტახტისა): მთავარსარდალი, ყულარალასი, ბეგლარბეგი, დივანბეგი — ყოველგვარი „ბეგი“, „ხანი“, ყოველგვარი „ბაში“.

ხოლო ამიერიდან ისფაჰანის ტარულას დიდმნიშვნელოვანი „ტახტიც“ ქართველთა „მემკვიდრეობად“ გადაიქცა.

ესეც აქედანვე მიიწიშნე, ჩემო მკითხველო, ამიერიდან — 1618 წლიდან ვიდრე 1722 წლამდე — მაშასადამე, საუკუნის გადაქარბებით — მხოლოდ ქართველები იქნებიან ერანის სატახტოს უმაღლესი გამგებელნი.

აი, მათი ნუსხაც:

ხოსრო-მირზა — 1618—1658 წწ. (შინი მოადგილე-

ნაიბები — მირ ყასემ-ბეგი, ფარსადან გორგიჯანიძე, პატა-ბეგი),

პ ა ა ტ ა ბ ე გ ი — 1658—1666 წწ.,

ა ლ ე ქ ს ა ნ დ რ ე ვ ა ხ ტ ა ნ გ ის ძ ე — 1666—1703 წწ.,

კ ო ნ ს ტ ა ნ ტ ი ნ ე ე რ ე კ ლ ე ს ძ ე — 1703—1707 წწ.,

ქ ა ი ხ ო ს რ ო ლ ე ვ ა ნ ის ძ ე — 1707—1709 წწ.,

რ ო ს ტ ო მ ლ ე ვ ა ნ ის ძ ე — 1709—1718 წწ.,

დ ა ვ ი თ ე რ ე კ ლ ე ს ძ ე — 1718—1722 წწ.

ამათ ჩვენ ცალკეულად კიდევ შევხვდებით თავთავის აღ-გილზე.

მანამდე კი, მცირე ხნით, ისევ „პირველ ტარულას“ და-გუბრუნდეთ.

ტარულას თანამდებობაზე არ შეიძლებოდა ერთი და იგი-ვე კაცი ერთ ან, უკიდურეს შემთხვევაში, ორ წელზე მეტ ხანს მჯდარიყო. მაგრამ ხოსრო-მირზას „განსაკუთრებულმა ღირსებებმა“ ეს წესიც დაარღვია. იგი დანიშვნის დღიდან სიკვდილამდე (1618—1658 წწ.), — მთელი ორმოცი წელი, უცვლელი ტარულა იყო.

თოთხმეტი წელიწადი ხოსრო-მირზა პირადად განაგებდა ერანის სატახტო ქალაქის უმაღლეს პოლიტიკურ, სახელმწი-ფოებრივ და სამეურნეო ცხოვრებას, ხოლო იმ დღიდან, რა დღიდანაც იგი ქართლის მეფედ დაინიშნა (1632 წ., ამასაც საგანგებოდ თავის დროზე მოგახსენებთ), ტარულას თანამდე-ბობას ნაიბების (ნაცვალნი, გინა თანაშემწენი) საშუალებით წარმართავდა.

ბევრ გადამწყვეტ სიტყვას იტყვის ხოსრო-მირზა მის ორ-მოცულოვანი ზეობის თანადროულ „ხვანჯიან“ ისტორიაში.

„საპართველოს ძართველთა“ და „საპარსეთის ძართველთა“

1619 წელს მოკვდა ბაგრატ-ხანი, გამგებელი ქართლისა, შაჰ აბასის მოხელე და ყურმოჭრილი ყმა. იგი ძალიან ჰგავდა მამამისს — მშობელი ხალხისა და ქვეყნის გამყიდველს.

მამაბისივით უნდელი და გულჩუკენი იყო. თუმცა სიბრძნის, მეცნიერებისა და ხელოვნების მოყვარული ბრძანდებოდა, მაგრამ მის მწიგნობრობას დაქცეული ქვეყნის საკეთილდღეოდ ქართლის ოდენა არაფერი გაუკეთებია.

თვითონ „ქართლის მეფეს“ უწოდებდა თავის თავს, მაგრამ არავინ — არც ქართველი და არც სპარსელი მას მეფედ არ მიიჩნევდა.

სპარსელები უბრალოდ „ხანს“ ეძახდნენ, ხოლო ქართველები, — რომლებიც მას ძალიან „სძულობდნენ“ — „თათრობისათვის“ არცარად აგდებდნენ და დაცივნით „საბარათიანოს ბატონად“ მოიხსენიებდნენ.

მართლაც საბარათიანოში იჯდა დღენიადაგ; „სამეფო რეზიდენციად“ ბოლნისი ჰქონდა, რადგან ტფილისში ჩამოსვლას ქართველთა შიშით ვერა ბედავდა გულჩუკენი „თათარხანი“.

და მოკვდა ბოლნისში.

დარჩა ცოლი — ანა, ერთი ძე — სვიმონი და ერთიც ასული, რომელიც ცოლად ჰყავდა შაჰ აბასს.

შაჰ აბასმა ერთი ფიქრი იფიქრა, ქართლის გამგებლობაც კახეთის მმართველის — ფეიქარ-ხანისათვის მიენდო, მაგრამ უმაღვე გადაიფიქრა, „რამეთუ არა ჰქონდა იმედი ფეიქარხანისა“, და ისევ ბაგრატ-ხანის ძე და თავისი ცოლისძმა სვიმონი დასვა ახლად გარდაცვლილი მამის ადგილზე.

ქართლის ახალი „საქეთმპყრობელი“ თავის თავს „სვიმონ-ხანის“ გვერდით შეფარვით „მეფე სვიმონ მეორესაც“ ეძახდა. მაგრამ ეს მცირე მეფეუკა ამოდ ეზმანებოდა დიდი თანამოსახელის, სვიმონ პირველის დიდებულ აჩრდილს.

ქართველთაგანი არავინ — არც თავადი და აზნაური, არც „წვრილი ერი“ — არაფრად აგდებდა „პატარა სვიმონის“ უმწეო „გამგებლობას“.

ათვალწუნებულ და აბუჩად აგდებულ სვიმონ-ხანს თვალი დღენიადაგ ერანისკენ გასაქცევად ეჭირა...

ბაგრატ-ხანის სიკვდილს ნუგზარ ერისთავის სიკვდილი დაემთხვა.

არაგვის ერისთავობა უფროს ვაჟს, ბაადურს ეკუთვნოდა. გიორგი სააკაძეს კი თავიდანვე ნუგზარის მომდევნო

ძე — ზურაბი „ურჩევნოდა“, რადგან თვითონ გიორგის აღეზარდა უმცროსი ცოლისძმა.

რაკი სააკაძეს „ასე ურჩევნოდა“, იგი კიდევაც გამოიღებდა ხელს თავისი არჩევანის აღსასრულლებლად...

როგორც კი ბაადურის გარდაცვლილი მამის „ტახტზე“ დაჯდა, ზურაბმა მაშინვე მის წინაშე მორჩილებაზე უარი გამოაცხადა და ცოლთან ერთად ერანში გაიქცა გიორგი სააკაძესთან.

გიორგიმ შაჰს წარუდგინა თავისი ცოლისძმა.

ერანის ლომს ძალიან მოეწონა მძლავრსხეულოვანი და ძალსულოვანი მთიელი თავადი.

რალაც კიდევაც ითათბირეს ერთად სამივემ — შაჰმა, სააკაძემ და ახალგაზრდა ერისთავმა...

ზურაბის ცოლი შაჰ აბასის კარზე დარჩა, — იქ, სადაც სააკაძის სახლეული იდგა. თვითონ ზურაბი საქართველოში წამოვიდა, შაჰის საჩუქრებით დატვირთული, შაჰისაგან არაგვის ერისთავად ხელდასხმული და „შაჰისევანთა“ ჯარით „დამშვენებული“.

ძმას მიუხტა საარაგვოში.

ბაადურმა ცოლ-შვილით ძლივს გაასწრო და დასავლეთ საქართველოში — საჩინოში გადაიხვეწა.

ზურაბმა საარაგვო დაისაკუთრა.

მერე ქვემო ქართლის სპასპეტი „ბარათა ბარათა-შვილი“ „მოიმწო“, მთიულ-მოხევენი დაიმორჩილა და „გაძლიერდა ფრიად“.

ხოლო გადახვეწილ ბაადურს უბედურება არ ეშვებოდა. მის ცოლს საზვერელი ჩიჯავაძე გაუმიჯნურდა. ჩიჯავაძე ტრფიალს არ დასჯერდა, ბაადური მისივე ცოლის თანხმობით მოჰკლა და ქალი იგი თვითონვე შეირთო ცოლად.

ეს რომ ზურაბ ერისთავმა შეიტყო, მაშინვე ჯარი შემოიყარა, ფერსათი გადაიარა და საჩინოს დაეცა; ციხე ვერ აიღო, მაგრამ თვითონ საზვერელი ჩიჯავაძე კი შეიპყრო და თავი გააგდებინა.

ზურაბ ერისთავი ისე მოქმედებდა, თითქოს მასზე უმაღლესი ხელისუფალი აღარავინ ყოფილიყოს — აღარც აღმოსავლეთ და აღარც დასავლეთ საქართველოში.

სვიმონ-ხანი შაპ აბასთან გაიქცა საჩივლელად.

მაგრამ ზურაბ ერისთავს ერთის ფეხით მიესწრო მისთვის. გიორგი სააკაძეც იქ იყო.

როცა შაჰმა სვიმონ-ხანისა და ზურაბ ერისთავის საჩივრები მოისმინა, სააკაძეს თვალი თვალზე გადაუწონა და მრავალმნიშვნელოვნად თქვა:

— კარგი, რაც იყო, იყო, და ამიერიდან ქართლს მოვუვლით ჩვენ!

„ჩვენ?!“ — გახშიანდა სააკაძის გულში.

ის იყო შაპ აბასმა „საქართველოს ქართველთა“ ამბების მოსმენა და განსჯა მოითავა და მაშინვე „სპარსეთის ქართველთა“ შორის დატრიალებული ბავთიანი შემთხვევა მოახსენეს.

გათათრებულ ქართველ შაჰისევანთა ჯარში ერთმა ქართველმა აზნაურმა, სახელად ხოჯასთე-ბეგმა (დაკარგულია მისი ქართული, ქრისტიანული სახელი), რაღაც უცნობი მიზეზის გამო, თურმე ხანჯლის მოულოდნელი დარტყმით მოჰკლა მეორე ახალგაზრდა ქართველი ღულამი, სახელად რამაზ-ბეგი.

მკვლელობის გამოსაძიებლად და განაჩენის გამოსატანად დასხდნენ: ვეზირი მირზა აბუ თაღები, სოჰბათიასაული ქალბალი-ბეგი და ფეროჰაბადის ტარულა უმბეთ-ბეგ სიაჰ მანსური.

მოიყვანეს მკვლელი ხოჯასთე-ბეგი. მას კიდევ ორი ძმა მოჰყვა, ისინიც ღულამ-შაჰისევანნი.

ხოჯასთე-ბეგმა ყოველივე დაუფარავად და დაწვრილებით მოახსენა სასამართლოს, — ნამდვილად მოვკალითო რამაზ-ბეგი, მოსაკლავი იყო და მოვკალითო.

ძმებიც გაიძახოდნენ, რამაზ-ბეგის მოკვლაში ჩვენც გვიძეგს ბრალიო.

ქალბალი-ბეგმა თქვა, რაკი ყველაფერი გარკვეულია, ისლა დაგვრჩენია მკვლელი დასასჯელად წავიყვანოთო, და ხოჯასთე-ბეგს ქამარში ჩაავლო ხელი.

ხელით შემოგვბედაო?! უცებ ხმლები გაიძრეს ძმებმა-ქართველებმა და მოსამართლეებს დაერივნენ.

ქალბალი-ზეგი და აბუ თალები იქვე ასჩეხეს. ძლივს გაასწრო ტარულა უმბეთ-ბეგმა.

სასამართლოზე დამსწე ხალხი თავზარდაცემული მიაწყდა კარებს.

ვიდაცეებმა გამოიღეს ხელი, მაგრამ ისინიც უმაღვე აპკაფეს და ააფელიკეს ქართველებმა.

ამასობაში უმბეთ-ბეგმა ჩაუშების გუნდი შემოიყვანა და შორიდან ისრისა და ტყვიის ცეცხლით ჩახოცეს ძმები...

„ახლა აქაური ქართველებიც დაერივნენ ერთმანეთს?!“ — გაკვირვებით წამოიძახა შაჰმა.

მძიმე საფიქრალს მისცემოდა გიორგი სააკაძე.

.

იმავე 1619 წლის 7 ივლისს, კვირა დღეს, შაჰ აბასი ინფაჰანის მთავარ მოედანზე გამოსულიყო. თან სტუმრები ახლდნენ — ინდოელი და ოსმალთა ელჩები.

იმამ-ყული-ხან უნდილაძეს ძღვენი გამოეგზავნა შაჰის კარზე და სწორედ იმ „საოცარი გურჯის“ მისართმეველის სახილველად მოსულიყვნენ შაჰიც და მისი სტუმრებიც.

მზე დაისად ეშეებოდა, როცა მოედანზე „გურჯი ხანის“ გამოგზავნილი ფეშქაშ-ქარავანი შემოვიდა.

წინ ორმოცი არაბული მერანი მოჰყავდა ორმოც გათათრებულ ქართველს.

ცხენებს შვიდი აქლემი მოჰყვებოდა, შვიდივე თვალ-მარგალიტით სავსე ლარებით დაკაბანებული.

ბოლოს მოდიოდა ყველაზე საწადნელი-სახილველი: ცხენ-შებმული ოთხთვალა ფორნები, ყოველ მათგანზე — ორი უზარმაზარი შაქრის ლოდი.

აზრი დაიკრეს ინდოელებმა, — უნდილაძე ისე მიგვანიშნებს, მარტო ინდოეთს როდი გქონიათ შაქარიო, ჩვენც თავზე საყარად გვაქვს ერანშიო.

ბოლო ფორანზე ინდაურები დაესხათ ქართველებს.

ესეც დიდად „საწადნელი-სახილველი“ იყო, რადგან ინდაური პირველად შემოეყვანათ ერანში ქართველ ვაჭრებს ვენეციიდან.

მთავარი მაინც ფორნები იყო, — სავსებით ახალი სამგზავრო-სამიმოსვლო და საზიდარ-საბარგული გაწყობილობა.

და ეს „სიახლეც“ ქართველებს შემოჰქონდათ პირველად ერანში.

„ყველაზე უფრო ფატიმა მიყვარსო“, — იტყოდა ხშირად შაჰ აბასი.

ფატიმა მისი შვილიშვილი იყო, უფლისწულ ხუდაბენდეს ასული, სამი თუ ოთხი წლისა, საოცრად ლამაზი და მომხიბლავი გოგონა.

კიდევ შეასმინეს შაჰ აბასს — შვილები გიპირებენ ლალატსო.

„რომელი შვილები“?!

„ხუდაბენდე-მირზა და ისმაილ-მირზა“.

„ახლავე თვალეზი დათხარეთ ორივეს!“ — იყვირა შაჰმა. შაჰის ბრძანების შეყოვნებაც დანაშაული იყო და უმალვე დასწვეს თვალეზი ხუდაბენდესა და ისმაილს.

თვალდაშრეტილ ძმათაგან ერთი — ისმაილი — ბედს შეურიგდა, ხოლო მეორემ — ხუდაბენდემ შურისძიება გადაწყვიტა. იგი ფიქრობდა იმაზე, თუ რა საშუალებით მოეკლა გული გულქვა მამისთვის.

იფიქრა, იფიქრა ხუდაბენდემ და უეცრად „გაუნათლა გონი“: მამაჩემს, შაჰ აბასს, ყველაზე უფრო ჩემი შვილი ფატიმა უყვარსო და ამიტომ...

ხუდაბენდემ თავისი ღვიძლი შვილი საკუთარი ხელებით დაახრჩო!

დაახრჩო და მაშინვე საწამლაგაც დალია.

შეიშალა შაჰ აბასი.

ლაწვები სულ დაილეწა სილაქების ცემით.

ათი დღე-ღამე წყვდიაღში ჩაინთქა. არაგინ მიიკარა. არც საკმელ-სასმელი გაიკარა.

როცა საგლოველი ჯურღმულიდან ამოვიდა, კახეთის ამბები დაახვედრეს.

კახეთის მმართველი ფეიქარ-ხანი იწერებოდა ხორნაბუჯიდან დაცარიელებულ მიწებზე თურქმანებს ვასახლებ, მაგრამ თურქმანებმა მიწის დამუშავება არ იციან და კახეთი ისევ დაქცეულიაო ისევ ქართველები მძლავრობენ, სახიზარებიდან გამოდიან, ძველ კერაზე ბრუნდებიან, კიდევაც მრავლ-

დებიანო; ალლაპი რომ გაწყრეს და ისევ აჯანყება გაბედოწ, ათი ათასი ხმლიანი ქართველი გამოიჭრება ბრძოლის ველზეო, დიდხანს ფიქრობდა შაჰ აბასი.

მაშ, ისევ დგება ფეხზე კახეთი... კახეთი... ფენიქსი... ჰო, ყოფილა თურმე ამნაირი ფრინველი, არწივის ტოლა, ოქროსფერი და სისხლისფერი ფრთებით. ყოველ ხუთასი წლის თავზე სიბერემორეული ფენიქსი საკუთარ ბუდეში ჩაიწვება, ჩაიფერფლება და იგივე ფერფლიდან ახლად აღორძინებული ამოფრინდება თურმე... მერამდენედ იბადება ხელახლა კახეთი, სრულიად საქართველო?! მერამდენე ხუთასწლეული შესრულებია ხელახალი შობისა, აღორძინებისა და აღზევებისა?!

• • • • •

უცებ თეიმურაზი მოიკითხა.

თეიმურაზი ხონთქარის ნაჩუქარ გონიოში ცხოვრობსო, მოახსენეს შაჰს.

„არ მოიშალა, არა, თურქეთისაკენ ხელის პოტინი?“

„თურქეთი კი არა, ახლა რუსეთში გაუგზავნია ელჩი თეიმურაზს“.

„რუსეთშიო?“

„დიახ, მოსკოვში, მიხეილ რომანოვთან“.

სახე სულ გაუშავდა შაჰ აბასს.

„თეიმურაზის შვილები სად არიან?“ — იკითხა ყრუდ.

„შირაზში არიან, თეიმურაზის შვილებიც და თეიმურაზის დედაც“.

„როგორ, სამივენი ერთად არიან?“

„არა, როგორც თქვენ ბრძანეთ, — ქალი ცალკე გახლავთ, შვილიშვილებიც ცალკე. ერთმანეთისა არაფერი იციან“.

„თეიმურაზის შვილები მომიყვანეთ, ორივე, სასწრაფოდ!“ ფაიქი გაფრინდა შირაზისაკენ.

ჯალათიც მაშინვე გამოიძახა შაჰმა — სამართებლიანი ჯალათი.

• • • • •

ქართული სასაფლაოსკენ მიეშურებოდნენ ქართველები. მიეშურებოდნენ და კუბოს მიასვენებდნენ.

კუბოში ათი წლის ბიჭი ესვენა, სილამაზით — მზის აწათალი.

„ვის მიასვენებენ ქართველები?“
 „თეიმურაზ კახთა მეფის ვაჟია, უფლისწული ალექსანდ-
 რე“.

„რა სენმა მოჰკლა ეგ ბედდამწვარი?“

„შაჰ აბასმა დაასაჭურისებინა ჯალათს. ველარ იიტანა
 ბიჭმა, და მოკვდა“...

.

ქუჩაში თერთმეტ-თორმეტი წლის ბ.კი დარბოდა.
 ერთ დროს ძალიან ლამაზი უნდა ყოფილიყო, ჭეშმარი-
 ტად — მზის ანათალი.

ახლა სახე გაცრეცილი ჰქონდა, თვალები შეცვივნილი
 და ამღვრეული.

მირბოდა ბიჭი და იცინოდა ისტერიულად.

თითქოს რაღაცას მისდევდა — უხილავსა და ხილულსა,
 უსხეულოს და სხეულიანსა.

„ვინ არის ეს ყმაწვილი?“

„თეიმურაზ კახთა მეფის ვაჟია, უფლისწული ლევანი“.

„რა დამართნია მაგ ბედდამწვარს?“

„შაჰ აბასმა დაასაჭურისებინა ჯალათს. ველარ იიტანა და
 ჭკუაზე შეეცდა ბიჭი!“...

ბახტოან და არა ბახტოან

„ამიერიდან ქართლს ჩვენ მოვუვლითო“, აკი ასე თქვა
 შაჰმა გიორგი სააკაძის, სვიმონ-ხანისა და ზურაბ ერისთავის
 თანდასწრებით.

ხოლო „ჩვენ“ — გულისხმობდა შაჰსა და სააკაძეს.

მართლაც სჭირდებოდა „მოვლა“ უპატრონოდ და „უმ-
 თავრობოდ“ დარჩენილ ქართლს, სადაც თავადებს საკუთარი
 „დამოუკიდებელი ქართლები“ შემოერაგვათ, შიგ ჩაკეტილი-
 ყვნენ და საკუთარ ქონში ჩახრუკულნი ელოდებოდნენ ბე-
 დისწერისგან მიგდებულ წილხვედრს.

ქართლის მმართველად ისევ სვიმონ-ხანი დატოვა შაპაბასმა.

მაგრამ „ვექილად“ და „მრჩეველად“ სვიმონ-ხანს გიორგი სააკაძე დაუნიშნა.

დასაწყისშივე აშკარად იყო საცნაური: უნიჭო და უნიათო სვიმონ-ხანი „პოლიტიკური ფიტული“ იქნებოდა, ხოლო ქართლის ნამდვილი მმართველი და გამგებელი --- მალაღნიჭიერი და მალაღძალოვანი გიორგი სააკაძე...

1620 წელს სვიმონ-ხანი, გიორგი სააკაძე და ზურაბ ერისთავი საქართველოში შემოვიდნენ.

გიორგი სააკაძე ქართლის ტახტ(თან) იღვა.

(არავინ იცის, ოცნებობდა თუ არა სააკაძე ტახტ(ზე) ჯდომას, — რაშიც მას ბრალს სდებდნენ მომტერე თავადისშვილნი).

ამიერიდან გიორგის ხელთ იყო ქართლის ყოველი დიდი და მცირე საქმენი.

თვითონ სვიმონ-ხანი ასე ეპასუხებოდა სააჯოდ მოსულ „დიდსა“ და „მცირე“ ქართველობას: „მოურავი მობრძანდების და ის გადასწყვიტავს“, „მის მობრძანებამდის გვმართებს მოთმინება“, „მოურავს უკეთ მოეხსენების ყოველივე საცილობელი“, „იმან ჩვენზედაც უკეთ იცის, რარიგადაც სჯობს“, „სწორედ ისე ვიქმ, როგორადაც ბატონს მოურავს მოესურვების“.

დასდგომოდა გიორგი სააკაძეს დღე-ღამ ნაოცნებარი დრო-ჟამი — ჟამი ანგარიშსწორებისა, მისი მოსისხლე თავადების ამოწყვეტისა და ამოგდებისა. განა ამისთვის არ გადაიხვეწა სააკაძე ერანში?!

აბა, დაუდგნენ ახლა ბარათაშვილები, ჯავახიშვილები და ციციშვილები სააკაძის აფხიან ხმალს!

შადიმან ბარათაშვილი აღარსად ჩანს (აღბათ, მოესწრო „თავისით სიკვდილი“ ბოროტ ფეოდალს).

ცხენები შეეკაზმათ და ჯალაბი აეყარათ ფარსადან ციციშვილს, ქაიხოსრო და ბერუკა ჯავახიშვილებს.

მაგრამ დაასწრო სააკაძემ, ცხენდაცხენ მიუბტა და... სამივეს შეურიგდა!

— ჩვენ შუა ძმობისა და მოყვრობის მეტი აღარა დარჩა

რა, სამუდამოდ და საბოლოოდ ასრე შევრიგდით და შევეწყვენით, ჩვენ შუა საყარყაშო საქმე აღარაფერი დარჩენილა, — უთხრა გიორგიმ ქაიხოსროს.

იგივე უთხრა ყოველ მომტერე თავადს.

შიშით მუხლმომშლილი თავადები ერთბაშად „დაუმოყვრდნენ“ დიდსულოვან მეტოქეს.

ფარსადან ციციშვილმა „საფიცრის წიგნი“ მიაართვა გიორგის და მის შვილებს — ავთანდილს, პაატას, იორამს:

„რაც ღმრთისაგან და კაცთაგან თქვენს მორქმას და გადიდებას უჯობდეს და კარგად მოუხდებოდეს, იმისი მომჭირნე და ძალის მიმცემნი ვიყოთ თათარშიგაცა და საქართველოშიგაცა, არც სახერხოდ და სატრელოდ და სამტყუნოდ შემოგადგეთ და რაც ამას წინათ ჩვენსა და თქვენს შუა სამდღურაო და ნაწყენი საქმე იყო, ისიც ასრე ჩავარონინოთ, თქვენის მტრისა მტერი ვიყოთ და მოყვრისა მოყვარე“.

გიორგის „საფიცრის წიგნი“ აახლეს მროველმა ეპისკოპოსმა დომენტი ავალიშვილმა და მისმა ძმისწულეებმა:

„ვიყვენთ თქვენთვის დღეს და დღეის იქით კარგნი და კარგნის მდომნი. არა გავნოთ, არა გაზიანოთ, არა გიცრუოთ, არა გიტყუოთ, არა გიჩხუბოთ... თქვენის მტრისა მტერნი ვიყვენთ და მოყვრისა მოყვარე“...

ღიახ, გიორგი სააკაძეს ზავი სწყუროდა — ზავი, ერთობა, ერთხმივობა, თანადგომა და თანაღმობა ყოველ ქართველთაგან, თუნდაც მტერთან, მოსისხლესთან...

ახლა პირადული ანგარიშსწორებისათვის არა სცალოდა სააკაძეს.

სამუდამოდ დარწმუნებულიყო მოურავი: ახლა მისი ყველაზე დიდი „პირადი მტერი“ იყო შაჰ აბასი, რამეთუ სწორედ შაჰ აბასს გადაეწყვიტა სააკაძის უპირველესი სალოცავი ხატის დამსხვრევა.

საკაძეს ერთიანი, მძლავრი, „აღმაშენებლური“ საქართველოს აღდგენა ჰქონდა გულს ამოჭრილი.

შაჰ აბასს საქართველოს ერთიანად დამხობა და ამოგდება ჰქონდა ჩაჰედილი შლეგიან გონებაში.

საკაძეს ზავი სწყუროდა „ყოველნაირ ქართველთან“.

მე იყო საჭირო და სასურველი, რადგან მის გონებაში დიდი სამამულიშვილო განაზრახი მწიფდებოდა.

სწორედ ამისთვის იდგა (და არა „იჭდა“) ქართლის დაობებულ ტახტთან (და არა „ტახტზე“) გიორგი სააკაძე.

სწორედ ამისთვის შესდგომოდა გიორგი სააკაძე გაცხოველებულ აღმშენებლობას, ციხესიმაგრეთა აღდგენას, გზებისა და ხიდების განახლებას, ამოგდებული სოფლების ხელახალ დასახლებას, ხალხის გამხნეებასა და წახალისებას.

ქართლის გარეთ გავიდა სააკაძე მოკავშირეთა საძებნელად.

ახალციხის ბეგლარბეგი ფარად ფაშა სიძედ გაიხადა, — თავისი უმცროსი ასული გაატანა ცოლად.

ფარად ფაშა წარმომავლობით ქართველი იყო, თურქეთის მოხელე. გიორგი ვარაუდობდა — საჭიროების შემთხვევაში სიძეს შეეძლო სიმამრის დასახმარებლად ოსმალეთიც გამოეწვია საომარ ველზე!..

გიორგი იმერთა მეფესაც დაუკავშირდა სააკაძე.

როცა შეგატყობინებთ, იმერთა ჯარებით მოგვეშველეთ და თუ გავიმარჯვებთ, ქართლის ტახტზე შენს შვილს დავსვამთო, ბტყობინებდა გიორგი სააკაძე გიორგი მეფეს. ეს აღტყმა სარწმუნო იყო, რადგან იმერეთისა და ქართლის ტახტთა შეერთება სწორედ სააკაძის ოცნების — საქართველოს გაერთიანების მანიშნებელი იქნებოდა.

• • • • •

წყვედიანი იწვა საქართველოს ცისგვამში.

სააკაძის ფაიქები მიმოქროდნენ, ნაზდით დაქედნილ ცხენებზე ამხედრებულნი.

ყრუ ხევსუცებში და ქვაბულებში ქართული ხმლები იკედებოდა, — შიშვლად, უქარქაშოდ. //

შაჰ აბასი მდინარე აბიქურენის პირას იდგა ამალით.

ისთაჰანს წყალი აკლდა და სატახტო ქალაქისკენ აბიქურენის გაყვანას აპირებდა შაჰი. უკვე კიდევაც დაწყებულყო არხის გაჭრა წყლის გადასაგდებად. შაჰი სწორედ სამუშაოთა სახილველად ჩამოსულიყო აბიქურენზე.

რუსი ელჩები ეახლნენ აბასს.

ბევრი რამ განიხილეს და განსაჯეს სტუმრებმა და მასპინძელმა.

ბოლოს ერთი სათხოვარიც აღძრეს რუსებმა: ქართველი მეფე გაათავისუფლეთ, თავის ქვეყანაში დააბრუნეთ და ძველებურად თქვენი მორჩილების ქვეშ იყოლიეთო.

„უეჭველად აღვასრულებ თქვენ შუამდგომლობას და გავუშვებ ლუარსაბს საქართველოში“, — დიდის „სიამოვნებით“ აღუთქვა ელჩებს შაჰმა.

მაშ, ლუარსაბ მეფე უნდა მოკვდეს!

უნდა მოკვდეს, რადგან მისი სიცოცხლე ძალიან სჭირდებოდათ რუსებსა და ქართველებს.

ხოლო, „არ სჭირდებოდა“ — შაჰ აბასს და გიორგი სააკაძეს.

როცა რუსები წავიდნენ, შაჰმა გულაბყალას ციხის უფროსი გამოიძახა და უთხრა რისხვეულად:

— წარწყმედისა და სიკვდილის ღირსი ხარ შენ! რატომ აქამდე არ მოგიკლავს ლუარსაბ მეფე?! ახლა რუსები იყვნენ ჩემთან და მისი განთავისუფლება მთხოვეს. წადი ახლავე და, თუ ხვალ საღამომდე ლუარსაბ მეფის სიკვდილი არ შემატყობინე, იცოდე, დედაბუდიანად ამოგწყვიტავ!

1622 წლის ადრიანი გაზაფხული.

შირაზში უნდილაძის წალკოტებს შირაზული ვარდობიმ ცეცხლი წაჰკიდებოდა.

ხოლო გულაბყალაში პატიმარს ადრე გაჰღვიძებოდა.

ქართველები იხმო ქართველთა მეფემ და განაცხადა ნაოცრად წყნარი, უშფოთველი ხმით:

— გული მითქვამს, რამეთუ დღეს აღვესრულები მე ამა საწუთოსაგან. ახლა მსურს, სიკვდილის წინ დამიტვიროთ წესისაებრ საქართველოსა, რამეთუ მე თვით ვისმინო თქვენი ხმა ქართული, თქვენი გოდება ქართული, თქვენი სიტყვა ქართული, — ვითარცა ხმაი, გოდებაი და სიტყვაი სრულიად საქართველოსი!

ეს თქვა ლუარსაბმა და გულაღმა დაწვა სარეცელზე. გულზე ხელები დაიკრიფა და თვალები დახუჭა, ვითარცა მიცვალებულმა.

მიუდგნენ ქართველები და იტირეს მეფე თვისი ზარით და ზუნით, „წესისაებრ საქართველოსა“.

მერე ეპისკოპოსი მიიხმო და ეზიარა ლუარსაბ მეფე.

თვალი მაცხოვრის ხატისათვის მიეპყრო და მეტყველებდა მეფე ქართველთა:

„შენ უწყი, უფალო ჩემო იესო ქრისტე, ვითარ არცა ანგარებითა, არცა სიმდიდრის მოყვარებით დავუტევე მამული და საყოფელი ჩემი და ვერცავინ შემძლებელ იყო შეპყრობად ჩემდა და ვერცა გამოყვანებად სიმაგრეთა მათგან, რომელსა მე ვიმყოფებოდი. გარნა ვიყავ მწუხარე და მელმოდა გულსა იავარ-ყოფა საქართველოსი, დამხოზა წმიდათა ხატთა და ჯვართა და დარღვევა წმიდათა ეკლესიათა. ხოლო უკეთუ მე განვრინებულიყავ ხელთაგან ყიზილბაშთა, მაშინლა განირყვებოდა და მოოხრდებოდა მშობელი ქართლი, ვითარცა იერუსალემი ნაბუქოდონოსორის მიერ და მე აღვირჩიე საქმე ესე, რომელი ბრძანე წმიდასა შინა სახარებასა; „მწყემსმან კეთილმან დადვის სული თვისი ცხოვართა თვისთათვისო“. გავსწირე თავი და არა მივეც განსაყრენლად, იავარსაქმნელად და შესაქმელად სიწმინდენი და ალაგნი ქართლისანი. მინდობილმინ ბრძანებისა შენისამან დავსდევ თავი ჩემი ქვეყნისათვის და გადარჩა ქართლი მოოხრებისაგან. ესე ყოველივე შენ უწყი, რამეთუ მეცნიერ ხარ გულისსიტყვათა და გონებათა. არა მეწყალვის მეფობა და შარავანდელობა ჩემი, არცა შვენიერობა, ჰაეროვნება და ახოვნება

სიჭაბუკისა ჩემისა, არცა უებრიბა და ყვავილი სიორძილისა ჩემისა, არცა კისკასად მორბედობა ასპარეზობისა და ქველყოფილობა ჰასაკობისა ჩემისა, არცა ბრძოლასა შინა მხნეობა და სიმაგრე მკლავისა, და არცა თეატრონსა შინა მორბედობა ცხენთა და მსწრაფმავლობა და მარჯვედ სრვა მხეცთა, და უშრომელობა მკლავთა და ყოველთავე მოსავთა ჩემთა უზეშთავს ყოფა, არცა დიდება, პატივი და სანოვაგენი, მრავალფერი ტაბლანი და გამოჩვენებით ღზინი და მზიარულითა პირითა მეტყველებანი, ზმანი და მღერანი და მეფობრივი სარეცელი და ტახტ-გვირგვინ-სხებიანი. ესე ყოველი დამიტევებია შენი და საქართველოს სიყვარულისთვის...“.

ჯალათი შემოვიდა. იქ დამსწრეთ ანიშნა — გადიო, მართო დაგვტოვეთო.

მეფემაც წამუყო თავისიანებს — წადითო, და კაეშნიანი ღიმილით დაემშვიდობა ყველას, ცალკეულად თვალის შევლებით.

ქართველები გალაგდნენ — გამშრალნი, დამეხილნი.

კიდევ შემოვიდა ჯალათი, მეორეს მესამე მოჰყვა, მეორე — მეოთხე, მეხუთე, მეექვსე.

შემზარავი სახეები აელანდა მეფის თვალებს.

ერთს უზარმაზარი მშვილდი ეპყრა ხელთ — მსხვილი, ვასანთლული ლარით გაჭიმული.

ლუარსაბმა რატომღაც იმ მშვილდის ლარ-საბელს დაადგა თვალი და თქვა მშვიდი ხმით:

„აღასრულეთ ბრძანებული თქვენი!“

საბელი შეხსნეს მშვილდს ჯალათებმა.

ლუარსაბ მეფის ახოვან ყელ-კისერს ყულფად შემოაქდეს და ორივე მხრისკენ დაიჭნიეს საბელის თავნი...

ასე აღესრულა მეფე ქართლისა, ლუარსაბ მეორე, „კაცი შვენიერი და კეკლუცი და სანახავად სატრფიალო, — რომ არსად გამოსულა ამისთანა შვენიერი და შემკობილი კაცი, ყოველისა სამლთო-საკაცობრიოთ ზნეობით გათავგებული და უკლები“.

გამეფდა 14 წლისა, იმეფა ათი წელი, წამებულნი სიკვდილით აღესრულა შობითგან 24 წლისა.

* სიორძილე — „ილორძინებობ ქნა“ (ზაბა).

გადაეგო უშვ / ლძიროდ.

მისი ერთადერთი „ხელმწიფური უნარი“ სამშობლოსათვის პირადი სიცოცხლის გაწირვა იყო და კიდევაც პირნათლად აღასრულა თავისი ვალი მშობლიური ხალხისა და ქვეყნის გადასარჩენად.

ქართულ მიწაში განსვენება არ ჰღირსებია ქართული მიწისთვის თავგანწირულ ჰაბუკ ხელმწიფეს.

შაჰ აბასი ისევ აბიჭურენის პირას იდგა, როცა ლუარსაბ მეფის თავი მიართვეს.

დიდხანს გაქვავებული თვალით უცქირა შაჰმა სისხლით შეღებილ წამებულ სახეს.

მერე ცახცახი აუვარდა, ისტერიულად ახარხარდა, მშობიარე ქალივით აკივლდა, ლაშებიდან ლეზვი და ლოშქრი დასდინდა...

ხელები წაუშინა სახეში მოკვეთილ თავს.

სცემა, ლანძღა და აგინა, აქეთ-იქით აგორა, მიახეთქ-მოახეთქა.

ბოლოს, როცა გული მოიჯერა და მოიძლო, ყურით აიღო და იქვე თავქვეზე მოისროლა.

ჯერ ნელა დაგორდა ლუარსაბ მეფის თავი, მერე სრბოლას უმატა და ძალმიცემით დაექანა უფსკრულისაკენ.

მეფელნი „სხვათა ისტორიისა“

ბეთონ სამარც მევიწროვოს, თუ ტოლი მყვანდეს.

ნიკოლოზ ბარათაშვილი

იმ დღეს, რა დღესაც შაჰ აბასმა ლუარსაბ მეფის მოკვეთილი თავი გალახა და გადააგდო, ლუარსაბის და, ლელა-თინათინი (გინა — ფათმა სულთან ბეგუმ), ცოლობიდან განუტევა და კახეთის მმართველს — ფეიქარ-ხანს საჩუქრად გაუგზავნა ხორნაბუჯში.

მთელი ერთი თვე ვერ იქნა და ვერ განიშორა გონებიდან ქართველი მეფის წამებული სახე შაჰ აბასმა.

მთელი თვე ქართველები სძულდა, განურჩევლად — გათათრებულებს და გაუთათრებულებს.

უნდილაძის გვარიდან არავინ გაჰკარებია იმ თვეს შაჰ აბასს.

არ სცალოდათ მაშინ უნდილაძეებს: ლუარსაბ მეფეს გლოვობდნენ, სპარსელთაგან შეფარვით.

ცხარედ დასტიროდნენ მამულდაკარგული ქართველები მამულისათვის თავდადებულსა და წამებულ ხელმწიფეს.

გიორგი სააკაძეც მაშინ ერანში იყო, შაჰისაგან გაწვეული. მაგრამ იმ თვის მანძილზე არც სააკაძე გაჰკარებია სასახლეს.

არ გაჰკარებია, რადგან მან კარგად იცოდა, როდის სძულდა და როდის უყვარდა ქართველები ბნედიან მბრძანებელს.

ისედაც ჰქონდა სააკაძეს „დამოუკიდებელი სადარდებელი“: ხუთ ენაზე გაისმოდა ერანში — სპარსულად, ქართულად, სომხურად, იტალიურად, პორტუგალიურად: „ლუარსაბ მეფე შაჰ აბასმა გიორგი სააკაძის ჩაგონებით მოჰკლაო!“

საკაძისგან ლუარსაბის სანთიკვდილოდ ამოჩემების მიზეზად ნაირნაირს ასახელებდნენ მითქმა-მოთქმაზე დახარბებულ ადამიანები:

საკაძეს სიკვდილი დაუპირაო ლუარსაბ მეფემ;

საკაძეს სახლ-კარი აუწიოკაო ლუარსაბ მეფემ;

საკაძეს დაი გაუბახაო ლუარსაბ მეფემ;

საკაძეს ცოლშვილიანად საქართველოდან ფეხი ამოუკვეთაო ლუარსაბ მეფემ;

და აჰა, ბოლოს და ბოლოს, სააკაძემ ყველაფერი ერთად ამოანთხევინაო ლუარსაბ მეფეს!

მოდო და გადაარწმუნე დარწმუნებული ხალხი

.

ერანის ცისგვამი.

მხურვალეებით მუცელგაფატრული მზის ქვეშ ცხენს მიჰქენებს გახელებული მხედარი.

პაატას ხმა ჩაესმის, სულის შემაყრეოლებელი ხმა:

„მინც სანამ უნდა გაგრძელდეს ანე?“

„რა, შვილო?“

„სანამ უნდა გვერქვას თათრები?“

„ოღონდაც, შვილო, ოღონდაც...“

ათი წელიწადი გასულა სააკაძის „გათათრებიდან“!

ათი წელიწადი!

ორმოცდარი წლისა შექნილა სააკაძე!

და ისევ „თათარს“ ეძახიან ქართველები

მაგრამ, განა მარტო „თათარს“ ეძახიან?!

აი, იმ ჩიტის ხმა კიდევ არ ესმის გიორგის!

პაატას კი ესმის თურმე ცხადლივ: „ნუ გათათრდებიო!“

.

როცა შაჰ აბასმა ქართველთა მძულვარების სამთვარიო მოინელა, იმამ-ყული-ხან უნდილაძე გამოიძახა სასწრაფოდ.

„ერანის ვიცე-კოროლი“ გულფაიგანის საზაფხულო სავანეში ბრძანდებოდა იმეამად. სტუმრები ჰყავდა -- იტალიელი კათოლიკე ბერები. ბერძნულ ფილოსოფიაზე და ხელოვნებაზე მსჯელობდნენ. ევროპელები განცვიფრებული იყვნენ უნდილაძის განსწავლულობით, ღრმააზროვნებით, შთამაგონებელი მსჯელობით.

ბოლოს უნდილაძემ სტუმრებს სთხოვა, მისი წიგნთსაცავისათვის რომიდან გამოეწერათ პლატონისა და არისტოტელეს თხზულებანი ბერძნულ და ლათინურ ენებზე, არაბულ-ლათინური ლექსიკონები და ბიბლია არაბულ ენაზე.

მისიონერებმა მაშინვე დიდის მოწიწებით აღუთქვეს მან-პინძელს თხოვნის ასრულება.

ამ დროს შათირიც მოიჭრა და შაჰის ბრძანება მოიტანა.

უნდილაძე სასწრაფოდ გაეშურა.

შაჰ აბასმა მისალმებისთანავე საომარ სამზადისზე ჩამოუგდო სიტყვა.

ყოველივე აღესრულება, მაგრამ... საით აპირებს ერანის ლომი ალლაჰისაგან ნაკურთხი ხმალის წარმართვას?

ნუ შეშფოთდება უნდილაძე — საქართველოში არ გაგზავნის, შაჰ აბასი. ისედაც ხომ რაღაცას მოიგონებს უნდილაძე და მაინც დაიძვრენს თავს საქართველოში ლაშქრობისაგან... არხეინად ბრძანდებოდეს ერანის ვიცე-კოროლი საქართველოს „მოსავლელად“ სხვა კაცი ჰყავს შეგულებული ხელმწიფის.

ჰო, ეს „სხვა კაცი“ არის გიორგი სააკაძე!

ხოლო იმამ-ყული-ხან უნდილაძე სამხრეთისაკენ სალაშქროდ უნდა მოემზადოს.

ესეც კარგად იცის უნდილაძემ: აგერ ხუთი წელიწადია, შაჰის ბრძანებით იგი თვითონ უდგას სათავეში „სამხრეთული ომის“ სამზადისს...

და იმავე 1622 წელს იმამ-ყული-ხან უნდილაძემ სპარსი და გურჯი ჯარებით ჯერ დაიპყრო შამი, შემდეგ ჰორმუზი და ნარეკა პორტუგალიელები და ეს კუნძულიც ერანის ლომსახოვან დროშას დაუმორჩილა.

ამიერიდან გაეხსნა სპარსეთს სამხრეთულ ზღვათა კარიბჭენი.

ახალი, სამარადქამო სტრიქონები ჩასწერა ქართველმა კაცმა სპარსეთის ისტორიაში.

ისფაჰანი დიდი ზარზეიმით შეხვდა შამისა და ჰორმუზის გმირს.

ლექსები, პოემები და სიმღერები აზღვაგდა იმამ-ყული-ხან უნდილაძის საზოტბოდ და სადიდებლად.

(ჩვენს დრომდე მოატანა „უნდილაძის თემამ“ სპარსულ ლიტერატურაში. სპარსი პოეტი — კადრი შამისა და ჰორმუზის ამბებს და მის მთავარ გმირს იმამ-ყული-ხან უნდილაძეს უძღვნის ორ პოემას — „ჯანგ ნამა-ი ქიშმ“ და „ფარუნ-ნამე“).

შაჰ აბასმა სავანგებოდ გამართულ ნადიმზე ეს უთხრა უნდილაძეს: რა ვქნა, აღარ ვიცი რით დაგაჯილდოვო, — ერთი შაჰის ტახტი შემომრჩა და ამას შენ ველარ დაგიტოვო, ამ ერთი რაიმეთი ხომ უნდა გავიჩვენოდე მე და შენ ერთმანეთისაგანო; შეურიგდი და დარჩი ისევ ვითარცა „მეორე კაცი“ და „ვიცე-კოროლი“ ჩემს შემდგომო.

ჭიამ გადაუარა გულზე სააკაძეს.

იმ დღეს შაჰმა ორი უნდილაძე კიდევ დააწინაურა „ერთგულ გურჯთაგან“: ალავერდი-ხან უნდილაძის უმცროსი ვაჟი და უდ-ხანი განჯა-ყარაბაღის ბეგლარბეგად დანიშნა, ხოლო იმამ-ყული-ხანის ძე სეფი-ყული-ხანი — ლარის ბეგლარბეგად.

გულძმარიანად იჯდა გიორგი სააკაძე.

მაინც როგორი არიან ეს უნდილაძენი? მთელი თავისი წუთისოფელი ვითომც „თათრობენ“, მაგრამ არასოდეს ქართველობას არ ჰღალატობენ. საქართველოს მათის „თათრობით“ არასოდეს ფრჩხილიც კი არ წამოსტკენია. ოჯახებიც „წმინდა ქართული“ აქვთ. სპარსელთა შესახებდავად ჯამეში მუეძინის ყვილს „გულდასმით“ უსმენენ, მერე სახლში მდიან და ჯვარცმის წინაშე გულმხურვალედ ლოცულობენ პირჯვარის წერით. მოყვრობა და ნათესაობა ისევ ქართულ ოჯახებთან აქვთ. იმამ-ყული-ხან უნდილაძეს სამი ასული ჰყავს და სამივე ქართველზე გაუთხოვებია: ერთი ანდუყაფარ ამილახორს ჰყავს ცოლად — შაჰ აბასის ცოლისძმას, მეორე — ამირსპასალარ დაუდ-ბეგ გურჯს, მესამე — ალი-ყული-ბეგ სააკაძეს, როსტომ სააკაძის ძმას, იმამ-ყული-ხანის ძმას, დაუდ-ხან უნდილაძეს ცოლად ჰყავს თეიმურაზ მეფის დაი — ელენე.

ჰკვიანი ხალხია უნდილაძენი!

ისევ მალლა ფრინავს არწივი უნდილაანთ საგვარეულო გერბით მკერდდამშვენებული.

ვერ დაითმენს არწივი სააკაძის გვარგუჯაბისა!

მისი ჯერიც უნდა დადგეს!

• • • • •

არც ერთი კი არ ფიქრობდა:

ვისი გმირები იყვნენ ისინი?!

ანდა, საერთოდ იყვნენ გმირები?!

• • • • •

გიორგი სააკაძეს მაინც დაუდგა „თავისი ჯერი“.

მომღევნო 1623 წელს, გაზაფხულზე, შაჰ აბასმა იგი გამოიძახა და უბრძანა: ყანდაპარს მივდივარ სალაშქროდ, ოზბეგები — უნდა ამოვწყვიტო ძირბუდიანად; შენ მეწინავე ჯარებს უნდა უსარდლო და პირველმა უნდა მიიტანო იერიში ყანდაპარზეო.

გაიხარა სააკაძემ: პირველად მიდიოდა სალაშქროდ სხვაგან, უცხო მხარეში და არა საქართველოში.

ყანდაპარს მიადგა სპარსთა და ქართველთა მხედრობა.

გიორგი სააკაძე პირველი გაგარდა საიერიშოდ ამხედრებულს.

ზავთიანი ყვილით მიჰყვანენ ქართველები.

ჩამოეგებნენ ოზბეგები.

დადგა სასტიკი ხმალთაკვეთება.

მეწინავე ოზბეგთა მწკრივები ასჩეხეს და გადაქელეს ქართველებმა.

გამაყრუებელი ბლავილით მიჰყვნენ სპარსელნი.

უკუიქცნენ ოზბეგნი.

მეციხოვნეებმა ქალაქის კარი გაუღეს უკუქცეულებს.

სააკაძემ გაქცეულ მტერს გადაასწრო და ქალაქში შეიჭრა ქართველთა გუნდით.

მიჰყვნენ სპარსელები და ცეცხლითა და მახვილით გაე-
სივნენ ყანდაპარის ქუჩა-ბანდებსა და საცხოვრებლებს.

რამდენიმე საათში მდიდარი და ბრწყინვალე ქალაქი გა-
ძარცვული, აწიოკებული და აოხრებული გართხმულიყო გა-
მარჯვებულთა ფეხქვეშ.

დიდის ზეიმით შეეგება ერანის სატახტო ყანდაპარიდან
დაბრუნებულ ძღვევამოსილ მხედრობას და მის მთავარ
გმირს — გიორგი სააკაძეს.

იმავე 1623 წლის შემოდგომაზე შაჰ აბასმა ბაღდადისკენ
დასძრა ჯარები.

მთავარსარდლად ყარჩიხა-ხანი დანიშნა.

წინ ისევ გიორგი სააკაძე მიაგელვებდა ცხენს.

ისევ პირველნი ეკვეთნენ ქართველები მსოფლიოში განთ-
ქმულ ქალაქს.

კვლავ საარაყო გმირობით იბრძოდა გიორგი სააკაძე.

გვერდით ძმა მისდევდა გიორგის — ქაიხოსრო სააკაძე.

დიდის შემმართებლობით და სიჩაუქით იბრძოდა ნოსტე-
ველი გმირი.

ჯგროდ დაუშინეს ფინთხი ბაღდადელებმა.

მკვდარი დაეცა ქაიხოსრო სააკაძე.

გამხეცებით შეუტია ძმის სიკვდილით გულდალაზვრულმა
გიორგიმ.

ბაღდადს კარიბჭე შეუმუსრეს ქართველებმა.

ყელზე თოკშებმულნი გამოეგებნენ მეციხოვნენი ერანის
„ვულჯ სარდალს“.

მთელი ერაყი და ქურთისტანი დაუმორჩილეს ქართვე-
ლებმა შაჰ აბასის ტახტს.

ახალი ფურცლები „ჩააკერეს“ ქართველებმა ერანის ისტორიაში.

ისევ უზემოეს საირაოზე აფრენილიყო სააკაძის გულსისხლიანი არწივი.

მაგრამ მაინც ვის საირაოზე შემართულა გიორგი სააკაძე — უპირველესი გმირი აზიის კონტინენტისა?!

ანდა, საკუთარი სამშობლოდან გადახვეწილსა და უცხო ქვეყნის ისტორიის მკედელს, საერთოდ, შეიძლება ეწოდოს გმირი?!

არა, არა, გიორგი სააკაძე მხოლოდ ერთჯერ იყო გმირი — ტაშისკართან, სადაც მან მისი მამულის „შესაქმელად“ მოსული მტერი დააწვინა და დაამიწა.

და იმასაც — ტაშისკარის მამულიშვილურ გვირგვინსაც — როგორც ეტყობა, ფერი სავსებით ამოსჭამა ათი წლის „თათრულმა“ ფერისცვალებამ“!

არა, არა, ჭეშმარიტი გმირი ის არის, ვინც იბრძვის საკუთარი სამშობლოსათვის!

ხოლო გიორგი სააკაძე?!

გიორგი სააკაძე თურმე ეს ათი წელია, საკუთარ გმირობას გაქცევია!

საკუთარ თავსაც გაქცევია!

და სანამ უნდა გაგრძელდეს ანე — გაქცევა სამშობლოდან, გაქცევა გმირობიდან, გაქცევა საკუთარი თავისაგან?!

კარგად უნდა ჩაჰკვირვებოდა სააკაძე ყოველივეს, თუნდაც იმიტომ, რომ ბაღდადის ალების პატივი შაჰ აბასმა ერთ დღეს ყარჩიხა-ხანს მიაწერა.

გიორგიმ თავისი თვალთ იხილა ეს თავზარდამცემი სურათი.

შაჰ აბასი ეუბნება ყარჩიხა-ხანს:

„ჩემო ძვირფასო ყარჩიხა-ხან! შენ მე ისეთი გამარჯვება მარგუნე, ალლაჰსაც რომ ვერ გამოვსთხოვდი უფრო მეტ პატივს. ახლა მიდი, ჩემს ცხენზე შეჯექ და ფეხით გეაზღებ, როგორც მსახური!“

ყველა გაშრა.

მაგრამ არასდროს არ იბნეოდა ყარჩიხა-ხანი. მაშინვე ქედი დაიდრია და მტკიცედ შეჰლაღაღა:

„მბრძანებელო, ეს მე არ შემეფერება, რამეთუ მე ვარ მონა შენი, ხოლო შენ მეუფე ჩემი!“

არ მოეშვა შაჰ აბასი: მე ასე მსურს და გიბრძანებ ახლაც შეჯდე ჩემს ცხენზეო.

შეჯდა ყარჩიხა-ხანი შაჰის მერანზე და ნელა დასძრა.

შაჰი მშვიდი ნაბიჯით გაჰყვა ფეხდაფეხ.

სააკადეს მიწა რომ გახეთქოდა, ის ერჩივნა.

„მაშ, ყარჩიხა-ხანი ამჯობინე, არა?!“

ორივემ კარგად დაიმახსოვრეთ, შენც — შაჰ აბას, და შენც — ყარჩიხა-ხანი!

აპოთეოზი მესამე კალი-მნათობისა

ბაღდადის, ერაყისა და ქურთისტანის დაპყრობის შემდგომ შაჰ აბასმა გიორგი სააკაძე ქართლში გამოუშვა.

იმავე ეამს ამირგუნე-ხანი („ყვითელ ავაზას“ რომ ეძახდნენ) ახალციხის დასაპყრობად გაგზავნა. ამირგუნემ ახალციხიდან თურქები გარეკა და მათ ნაცვლად მესხეთის გულში ყიზილბაშთა ციხიონი ჩააყენა სელიმხან შამს ად-დინლუს მეთაურობით.

ერანის ზეობის წლები იდგა მსოფლიოში.

მაგრამ „გურჯისტანის საკითხი“ მაინც მოუშორებლად ადგა ყელზე შაჰ აბასს.

1624 წლის გაზაფხულზე ისევ მიიღო საიდუმლო დასმენა ფეიქარ-ხანისაგან: კანელები ისევ ძლიერდებიან და მრავლდებიან; რაღაც საიდუმლო მიმოსვლაც უნდა ჰქონდეთ ერთმანეთში ქართველ თავადებსა და გონიოში გადახვეწილ თეიმურაზ მეფეს; დღე-დღეზე აჯანყება არის მოსალოდნელიო. თეიმურაზის დედა გაიხსენა შაჰ აბასმა.

ქეთევან დედოფალი!

„ისევ ძალიან ლამაზი ყოფილაო ქეთევანი“, ჯერ ამან გაუელვა შაჰს, მაგრამ უმალვე ახალმა ფიქრის ტალღამ გადალეკა პირველნაფიქრი:

„ამ მშვენიერმა ქალმა წარმოშვა ყველაზე ბოროტრ, ჩემი ყველაზე დიდი, დაუძინებელი მტერი — თეიმურაზი!“

ქეთევან დედოფალი შირაზში იყო.
ათი წელი აღარ ენახა საქართველო.
აღბათ, ვედარც ვერასდროს იხილავდა.

მისი სათაყვანო სამშობლოს მიწაც, წყალიც და ცისგვამიც იმ ერთ მუჟა ქართულ მიწაში ჩაკუმშულიყო, მკერდზე რომ ეკიდა იესო მაცხოვრის ჯვარცმასთან ერთად.

დღენიდაგ იმ სურნელით სუნთქავდა, საქართველოდან წამოდებულ ნივთებს და წიგნებს რომ ასდიოდა ისე ცხოველად, მძაფრად, დამათრობლად, სულისა და გულის წამლებად.

შირაზი იმამ-ყული-ხან უნდილაძის სამფლობელო იყო და დიდის პატივით ეპყრობოდა ერანის „ვიცე-კოროლი“ თანამემამულე დედოფალს“ და მთელს მის სახლეულსა და მსახურეულს.

ქეთევან დედოფალი ტყვე კი არა, დიდად საპატიო სტუმარი არის ჩვენიო, ამბობდა უნდილაძე, თუ მაინცადამაინც „ტყვეობაზე“ დადგება საქმე, ჩვენ თვითონ ვართ ამ საოცარი ქალის ტყვეებიო...

ცალკე სასახლე და წალკოტი მიეჩინა უნდილაძეს დედოფლისათვის.

ყველაზე უფრო მაინც ამით გაახარა „მასპინძელმა სტუმარი“: ჰორმუზიდან წამოდებული ბიბლიოთეკა მთლიანად „სტუმარ დედოფალს“ გაუგზავნა „წიგნის გიემა“ უნდილაძემ.

ქეთევანს ოცამდე ქართველი ემსახურებოდა — ქალი და კაცი. მათ შორის იყო ერთი, რომელსაც „გიორგი ხუცესს“ ეძახდნენ. იგი იყო დედოფლის კარის მღვდელიც, სახლთუხუცესიც, სუფრაჯიც, მოურავიც და მებაღეც. იგი განაგებდა ქეთევან დედოფლის გარშემო შეკრულ „წმინდა ქართულ კოლონიას“ „თათარ სპარსელთა“ და „გათათრებულ ქართველთა“ ზღვაში.

გიორგი ხუცესს დაიბარებდა ხოლმე უნდილაძე, დედოფლისა და მისი „კოლონიის“ ამბავს გამოჰკითხავდა, ყოველ

საქირო საგანს, „საზრდელს“ და „მისართმეველს“ მიართმევდა და ისე გაისტუმრებდა.

ყველაზე დიდი საწუხარი ეს ჰქონდა დედოფალს: შვილიშვილებისა არაფერი იცოდა. რა რომ შირაზში გადმოასახლეს, ერთხელაც არ შეახვედრეს არც ლევანი და არც ალექსანდრე.

„უნდილაძისგან ვიცი, შაჰ აბასი ცალკე საგანგებოდ ზრდის თეიმურაზის შვილებსო“, მოკლედ მოსჭრიდა ხოლმე გიორგი ხუცესი.

ეს იყო და ეს.

უნდილაძის მკაცრი ბრძანებით, არ უმხელდნენ ქეთევან დედოფალს, როგორ დაახოჯავა შაჰ აბასმა მისი შვილიშვილები, როგორ მოკვდა ჯერ ალექსანდრე და შემდეგ ჰკუიდან შეშლილი ლევანი...

უნდილაძემ ერთხელ გიორგი ხუცესის ხელით ნაშენები ბალი მოიხილა და ისე მოიხიბლა, მაშინვე ისფაჰანს გაგზავნა და შაჰ აბასის ბალები გაამართვინა და გაამშვენიერებინა „უცნაურ ხუცესს“.

„რა არ გამოვა ქართველი კაცის ხელიდანო“, თქვა შაჰ აბასმა ახალი წალკოტის ხილვით და ხიბლით გაოცებულმა.

უნდილაძემ უმდიდრესი მისართმეველით დატვირთული ჩამოიყვანა გიორგი ხუცესი ისფაჰანიდან შირაზში.

ხოლო გიორგი სააკაძე ერთხელაც არ გამოჩენილა სამართვილოდ განწირული ქართველი დედოფლის თვალსაწიერზე.

პეტრო დელა ვალე — მარიო სკიპანოს, რომში:

„სიმათლე უნდა ითქვას, ქართველი ქალები ულამაზესნი და უმშვენიერესნი არიან მთელს აზიაში. შევეგრემანი სპარსელები ვერ შეედრებიან მათ. ქართველი ქალები არიან იმდენად ტანმალალი, რომ სიმათლე დეიდაჩემისა — ქალბატონ ფაუსტინა ალბერინისა, ძალზე ჩვეულებრივია მათ შორის. თითქმის ყვილას შავი თმა აქვს და თვალებიც შავი, დიდრონი და მომხიბლავი; პირისახე — თეთრი, ხოლო ლოყები ვარდისფერი, ალბათ ბახუსის წვენის მეოხებით, რომელსაც ისინი კარგად იცნობენ და მათი სამშობლო ამ მხრივ

გერმანიასაც არ ჩამოუვარდება... მე ქართველებს ვთვლი ყველაზე ულამაზეს ხალხად მთელს მსოფლიოში“.

აგერ მეხუთე წელიწადი ცხოვრობდა სპარსეთში პიეტრო დელა ვალე — იტალიელი მოგზაური, სწავლული, კათოლიკე მისიონერი.

კათოლიკურ სარწმუნოებას ქადაგებდა, ყოველ ქრისტიანს მფარველობდა და ეხმარებოდა, უცხო ქვეყანას იკვლევდა და სწავლობდა. პერსეპოლისის სასახლის კედლებიდან უძველეს და უცნაურ „ლურსმულ“ დამწერლობას იწერდა და გასაშიფრავად ჩხრეკდა, აწამებდა და თვითონაც ეწამებოდა.

ცოლიც თან ახლდა, სახელად მ ა ა ნ ი, ახალგაზრდა სირიელი ქრისტიანი ქალი.

არასოდეს დაავიწყდება პიეტროს ის მთვარიანი ღამე, ყაზვინის გზაზე რომ მიდიოდა მანთან ერთად, ქართველები ამგზავრნენ, ქალნი და კაცნი. „ქართველი, ქართველი!“ — სიხარულით და სიყვარულით გაიძახოდნენ, როცა მანისა და პიეტროს მკერდზე ჯვრები დაინახეს. ასე ყოფილა: ქართველისთვის „ქრისტიანობა“ და „ქართველობა“ ერთი და იგივე ყოფილა; ქართველები ყველა ქრისტიანს — ევროპელსაც და აზიელსაც — თავის „მომქე ქართველად“ სთვლიან. ისინი თურმე ასე ყოფენ ქვეყანას — აქეთ ქრისტიანი ქართველი ძმები, იქით — „ძალღი თათრები“...

ქართულ ოჯახში დაიდეს ბინა პიეტრომ და მანიმ.

დიასახლისი ორმოც წელს მიღწეული ღამაში, სათნო ქალი იყო, სახელად — მ ზ ი ს თ ა ნ ა დ ა რ ი.

კახეთიდან გადმოსახლების ქამს შვილები დაჰკარგვოდა, მაგრამ უბედური ქალი მდგმურების თანდასწრებით არასოდეს გამოიჩინდა უმძიმეს ნაღველს.

პიეტროსა და მანის მოსვლიდან ერთ კვირასაც არ გაუფლია და სამი წარჩინებული ქართველი მანდილოსანი ეწვია ოჯახს — ნესტან-დარეჯანი, თინათინი და მარიაში.

სამივენი ალავერდელი მიტროპოლიტის დები ყოფილან, ესენიც კახეთიდან ტყვეებად გადმოსახლებულნი.

ძალიან ხელმოკლე, უპატიური ცხოვრებით ცხოვრობდნენ

თურმე, რადგან ქრისტიანობის განტევებაზე და მაჰმადიანობის მიღებაზე გადაჭრით ეთქვათ უარი.

პიეტრო დელა ვალესთან მოსულიყვნენ სათხოვრად: ჩვენ შევიტყვეთ, ქრისტიანი ბრძანებულხართ, ქრისტიანთა მფარველი და პატრონი; ამიტომ გეაჭებით თქვენ და თქვენს მეუღლეს, შეიფართოთ და შეიკედლოთ ერთი ობოლი გოგონა, წარჩინებული ქართული ოჯახის შვილი, რომელსაც მამა ყიზილბაშებთან ომის დროს მოუკლეს, ხოლო დედა ერანისაკენ მომავალ მწარე გზაზე დაეღუპაო.

პიეტრო და მაანი მაშინვე დათანხმდნენ.

მოიყვანეს ობოლი გოგო, შვიდი წლისა, სილამაზით და სიმშვენიერით — მზის ანათალი.

სახელად თინათინი ერქვა, გვარად ზიბა*.

მაანიმ „შვილობილი“ გულში ჩაიკრა და მაშინვე ძალი სახელი დაარქვა — მარიუჩა.

ძიძაც მოჰყვა გოგონას, სახელად მარინე, ქართული ტანსაცმლით მორთული მშვენიერი ყმაწვილი ქალი.

ცხოვრობდნენ ერთად — პიეტრო, მაანი, მარიუჩა, მარინე და მზისთანადარი.

მიტროპოლიტის დებიც — ნესტან-დარეჯანი, თინათინი და მარიამი ხშირად ეწვეოდნენ ხოლმე „ქრისტესმიერ საერთო ოჯახს“.

ერთ მათგანს, ნესტან-დარეჯანს, სამი შვილი მოუნათლა პიეტრომ.

მცირე დრო გამოხდა და მზისთანადარმა დაკარგული შვილების ადგილსამყოფელი შეიტყო, უბედურების ქამს შეთვისებულ ადამიანებს დაემშვიდობა და შვილებთან წავიდა.

მარინეც მალე გათხოვდა, — კახეთიდან გადმოსახლებულ ქართველს გაჰყვა ცოლად.

მალე პიეტროს უბედურება ეწვია: ცოლი გარდაეცვალა, ოცდასამი წლის მაანი.

სიკვდილის წინ მაანიმ ქმარს უანდერძა — არასოდეს მოეუორებინა მარიუჩა, მუდამ ეზრუნა მასზე, მის სიკეთეზე, მის მომავალზე, მის სიყვარულზე...

მაშინ მარიუჩა თორმეტი წლისა იყო.

* გვარის ქართული ფორმა დღემდე დაუდგენელია.

ქეთევან დედოფალთან შეხვედრა სწყუროდა მარიუჩას, რადგან ქეთევან დედოფალი იყო სალოცავი ხატი სრულიად ერანის საქრისტიანოსი.

პიეტრო დელა ვალემ ძალიან კარგად იცოდა, რაც გადახდენოდა თავს ქეთევან დედოფალს, მის სამშობლოსა და მის ხალხს.

„ყველაფერში ეტყობა, ქართველები ბერძნებზე უკეთესი ქრისტიანები არიანო“, ამბობდა პიეტრო და თვითონაც სულითა და გულით მიისწრაფოდა აღმოსავლეთის საქრისტიანო სამყაროში „ყველაზე დიდი“ ქრისტიანი ქალის სახილველად.

ერთ დღეს შირაზის ქუჩებში სეირნობდა პიეტრო დელა ვალე. ვიღაც ახოვანი კაცის გარეგნობამ და კეთილშობილურმა მიმოხრამ მიიპყრო მისი ყურადღება.

უეჭველად ქართველი იქნებაო, იფიქრა პიეტრომ და იმ კაცს აედევნა მალულად.

„ის კაცი“ თერძთან შევიდა დუქანში, რაღაც ტანსაცმელი დაუკვეთა და გარეთ გამოვიდა. მაღალი ბუხრის ქუდი ეხურა, მოგრძო, შემოკვერცხილი წვერი ჰქონდა, შავი ჩოხა ეცვა, საეროსაც ჰგავდა და სასულიეროსაც.

პიეტრო თერძთან შევარდა და უცნობის ვინაობა გამოჰკითხა.

უცნობი ქართველი გიორგი ხუცესი ყოფილა, სწორედ ის, ვის ნახვასაც ისე ნატრობდა იტალიელი.

პიეტრო გიორგის დაეწია, გაეცნო და სახლში მიიწვია.

იმ დღეს არ მოხერხდა, რადგან ყიზილბაში აეშაგები დაძრწოდნენ გარშემო და შეხვედრა სხვა დროისათვის დანიშნეს. დათქმულ დღეს გიორგი ხუცესი ეწვია პიეტრო დელა ვალეს.

დიდხანს შერჩნენ საუბარს. ძალიან მოეწონათ ერთმანეთი, ძალიანაც დამეგობრდნენ. ბევრი საერთო ნაცნობიც აღმოაჩნდათ, ქართველიც და ევროპელი მისიონერიც. ბევრი რამ ერთნაირად სცოდნიათ საქართველოს, სპარსეთისა და იტალიის თავგადასავალი.

უფრორე ქეთევან დედოფალზე საუბრობდნენ, მის საოცარ გამირობაზე, სათნოებასა და გონიერებაზე.

მასპინძელი სთხოვდა სტუმარს, როცა დედოფალს შეხვდებით, ჩემი მოწიწებული მოკითხვა და თაყვანისცემა გადაეცითო; მე კარგად მესმის, რა სატანჯველი გამოიარა კეთილშობილმა დედოფალმა და მისმა გმირმა ხალხმა; სულითა და გულით თანაუფგრძნობ; მზად ვარ ვემსახურო და სიცოცხლეც უყოყმანოდ გავწირო, ყოველი მისი ბრძანებისამებრ, მისდა საკეთილდღეოდო.

— მე საქართველოს გზით ვაპირებ ევროპაში დაბრუნებას, — განაგრძობდა იტალიელი, — ძალიან მინდა თვალი შევავლო საოცნებო საქართველოს სიმშვენიერეს; ამბობენ, ლომბარდიაზე უფრო ლამაზი არისო საქართველო. უეჭველად უნდა ვიხილო თქვენი ქვეყანა. თეიმურაზსაც შეხვდები აუცილებლად და დიდ პატივსაც მივუგებ ქეთევან დედოფლის შვილსო.

ბოლოს ყველაზე დიდი სათხოვარი გამოუცხადა პიეტრომ გიორგის: ჩემთან არის ქართველი გოგონა თინათინ დიზობა, ქეთევან დედოფლის თვისტომი ქართველი გოგონა, რომლის კეთილშობილ მშობლებს კარგად იცნობს თვითონ მისი უდიდებულესობა დედოფალიო.

ეს თქვა პიეტრომ და მარიუჩაც შემოვიდა, სტუმარს გაეცნო, თავისი თავგადასავალი დაწვრილებით აუწყა და დედოფალთან შეხვედრა სთხოვა.

ერთი თვის შემდგომ გიორგი ხუცესმა ქეთევანს მიჰგვარა თინათინ-მარიუჩა.

დედოფალმა გულში ჩაიკრა ობოლი გოგო, ასული სახელოვანი მამისა და დედისა (სახელდებითი ვინაობა კი არა ჩანს). დიდხანს ისაუბრეს და იტირეს სვეგამწარებული სამშობლო და ფუძემოგდებული თვისტომი ხალხი.

მერე ქეთევანმა მარიუჩა ქართველ ტოლ გოგონებს ჩააბარა და ბაღში გაუშვა სასეირნოდ.

სადილობისას მარიუჩამ ერთ ქართველ მანდილოსანს დაადგა თვალი. იგი მეორედ ყოფილა გათხოვილი რომელიღაც გამაჰმადიანებულ ქართველზე. პირველი ქმრისგან ნაყოლი შვილებიც იქვე ჰყავდა იმ ქალს — ასული და ძე. ასული შაჰის ბრძანებით უკვე დანიშნული ყოფილა, ისიც ვიღაც გათათრებულ ქართველზე. სადილობისას დაძმან შორის ჩხუ-

ბი ჩამოვარდა, მაჰმადიანზე დანიშნული ქალი დედოფლის თვალწინ მოურიდებლად აქებდა ისლამის რჯულს. ძმამ დის დატუქსვა და ქრისტიანობის დაცვა დაიწყო.

მარიუჩა კამათში ჩაერია, ბიჭის მხარე დაიჭირა და გაწიწმატებული საპატარძლო მის მაჰმადიანობასთან ერთად მიწასთან გაასწორა.

ეტყობოდა, გოგონა იტალიელ სწავლულს შესანიშნავად გაეწრთენა საღვთო სჯულის ცოდნაში.

დედოფალს ძალიან მოეწონა მარიუჩას განსწავლულობა და ერთგულება ქრისტიანობისა და ქართველობისა.

ხშირად დაიარებოდა მარიუჩა ქეთევანთან.

შვილივით შეიტკბო დედოფალმა ობოლი, ლამაზი და სათნო გოგო.

მერე პიეტრო დელა ვალეც მიიღო ქეთევანმა.

ბევრი ისაუბრეს ევროპისა და აზიის ხალხთა თავგადასავალზე, იტალიისა და საქართველოს ბედზე, მსოფლიო ხალხთა რელიგიურ რწმენებზე, საგანგებოდ — ისლამზე, იუდაიზმზე, მართლმადიდებლურ და კათოლიკურ ქრისტიანობაზე.

პიეტრო დელა ვალესთან საუბარმა ერთჯერ კიდევ ჩააფიქრა მის მუღმივ საფიქრალზე ქეთევან დედოფალი:

„იქნებ მართლა უშველიდა ქართველ ხალხს კათოლიკური ქრისტიანობის აღიარება?! იქნებ მართლა გამოიდებდა თავს რომის პაპი და სრულიად ევროპა ისლამიტურ ვეშაპთავან „კათოლიკური საქართველოს“ დასახსნელად და გადასარჩენად?! ან რა დაშავდებოდა კათოლიციზმის აღიარებით? განა, სულ ერთი არ არის? განა, ჭეშმარიტი ქრისტიანისთვის რაიმე მნიშვნელობა აქვს რომისა და კონსტანტინოპოლის მწყემსმთავართა საუკუნოვან პიროვნულ ბრძოლას „ქრისტეს გარეთ“ გამოგონილი დოგმებითა და რიტუალებით?!“...

როცა პიეტრო და მარიუჩა ერთად გავიდნენ, ქეთევანმა სრულიად „ახალი რამ“ აღმოაჩინა მათს სიახლოვეში.

აღმოაჩინა ის, რაც სამუდამოდ დაჰკარგვოდა თვითონ — სწორუპოვარ ქალს (ეთარცა ქალს).

მის თვალწინ გაიღვეს: დავით მეფემ, კონსტანტინე-მირზამ, ქაიხოსრო ჩოლოყაშვილმა და... შაჰ აბასმა!

დიახ, — შაპ აბასმა ქეთევანს ცოლობა სთხოვა!

ხოლო, როცა პიეტრო დელა ვალეს გამგზავრების დღე დადგა, მარიუჩა ქეთევანს ეახლა და „შეახსენა“, რომ თვითონაც უნდა აერჩია „მომავლის გზა“ — დედოფალთან დარჩენილიყო სპარსეთში, თუ პიეტროს წაჰყოლოდა იტალიაში.

ქეთევანმა მაშინვე ეს უთხრა ყმაწვილ ქალს: „აქ, ურჯულო და უღვთო ქვეყანაში, სამშობლო დაკარგულ ადამიანს უეჭველი დაღუპვა გელის, იქ კი პიეტროსთან შენ სიყვარული და ბედნიერება გელოდება. წადი მასთან!“

პიეტრო დელა ვალე ბედნიერი იყო.

გამგზავრების წინ სახსოვარი საჩუქრები გაცვალეს იტალიელმა მისიონერმა და ქართველმა დედოფალმა.

პიეტრომ ოქროს მედალიონი მიართვა ქეთევანს, ერთ მხარეს — დედალვთისა მარიამის მიძინების ხატით, მეორე მხარეს — წმინდა ჯიროლამოს გამოსახულებით.

ქეთევანმა ორი ლათინური წიგნი უსახსოვრა პიეტროს — იოანეს სახარება და ლოცვანი, თვითონ დედოფლის ხელით ქართული მინაწერებით და შენიშვნებით.

„ესოდენ ღირსეული და დიდებული დედოფლიც მოსაგონრად ვინახავ ამ წიგნებს ჩემს ყველაზე ძვირფას ნივთთა შორის“, — წერდა შემდგომ პიეტრო დელა ვალე.

პიეტრო და მარიუჩა დაემშვიდობნენ ქეთევან დედოფალს. საქართველოზე გავლა ველარ მოახერხეს.

ჯერ ინდოეთს გაეშურნენ და იქიდან დაბრუნდნენ იტალიაში.

გზაზე შეიტყვეს, რაც შემთხვეოდა ქეთევან დედოფალს.

იტალიაში დაქორწინდნენ.

შეეძინათ თოთხმეტი შვილი.

შაპ აბასმა ქეთევან დედოფალს ცოლობა სთხოვა.

ქეთევანს იმ დღეს შვილიშვილების სიკვდილი გაეგო და მწარედ ტიროდა.

მტარვალი ხელმწიფისადმი უსაზღვრო ზიზღმა რადაკანად რად გაანელა დედოფლის წუხილი.

თითქოს თავისი ქალური სიმშვენიერეც შესძაგდა, შაპის ბიწიერი თხოვნით შეურაცხყოფილი და შელახული.

გულზიზდიანად ბრძანა დედოფალმა: აღარავინ გამიბედოს ისოდენ მკრებელური სიტყვაო...

უსაზღვროდ დამცირებულად და დაპატარავებულად იგრძნო თავი შაპ აბასმა.

და უმაღვე თავის „ბუნებრივ ბუნებას“ დაუბრუნდა, — გესლით და შხამით აეცსო გულ-გვამი.

საბაბის ძებნას შეუდგა შურის საძიებლად.

კახეთიდან ახლად გადმოსახლებულ და გათათრებულ ახალგაზრდა ქართველ დულამებს მოუყარა თავი და ასეთი კითხვა შეამყარა სახეში:

— ჩემო ერთგულო მეგობრებო, რატომ გინდათ წარწყმილოთ თქვენი დედები, — რატომ არ დაატოვებინებთ ქრისტიანობას და რად არ მიაღებინებთ მაჰმადის რჯულს, რომელიც სასუფეველის მშვენიერებას უმზადებს ადამიანს?

ქართველყოფილი ჭაბუკები კარგა ხანს სდუმდნენ.

მერე ერთმა თქვა, როგორც იქნა:

— ჩვენ დედებს ხშირად ვეუბნებით, მაგრამ უარს ამბობენ მაჰმადის რჯულის მიღებაზე.

— ვითომ რატომო?! — იყვირა შაპმა.

— ასე ამბობენ, ქეთევან დედოფალი თუ ქრისტიანია, ჩვენ როგორღა ვუღალატებთ ქრისტეს რჯულსო!

შაპ აბასისთვის ზედმისწრება იყო გათათრებული ქართველის ეგზომ ბრიყველი პასუხი.

მან ფიცხლავ ბრძანება გაუგზავნა იმამ-ყული-ხან უნდილაძეს:

„დაუყოვნებლივ ჩემი სახელით უბრძანე ქეთევან დედოფალს, ქრისტიანობა განაგდოს და მაჰმადიანობა მიიღოს, ხოლო უკეთუ ჩემი ბრძანება არ აღასრულოს, მაშინვე სასტიკი წამებით შეჰყარე სიკვდილს!“

ზარი დაეცა შირაზის ხანს.

„არ იქნება და არასგზით არ გათათრდება ქეთევანი... და ამისთვის მე, უნდილაძემ, ტომით ქართველმა, მოკვლა საქართველოს დედოფალი, დედა ქართველი ხელმწიფისა, სათაყვანო და სალოცავი ქართველი ხალხისა?!“

სასწრაფოდ პასუხი გამოუგზავნა შაჰს: ნუ იკადრებ და
ნუ აღმართავ ხელს უმწეო ქალის სიცოცხლეზეო; რას იქ-
ნევთ მის გათათრებასო, განა თქვენთვის სირცხვილი არ იქ-
ნება ესოდენ სათნო ქალის სიკვდილი?!

აზვავდა შაჰ აბასი. ხელახლა აფრინა ფაიქი უნდილა-
ძესთან სასტიკი ბრძანებით: შენ რასაც გიბრძანებ, ის შეას-
რულეო დაუყოვნებლივ!..

სხვა გზა აღარ იყო და ეახლა უნდილაძე ქეთევანს.

ეახლა და ეაჯა კრძალვით, თავაზით, მარწმუნებელი შე-
გონებით: ნუ შეეცდები წინაღუდგე მძვინვარე შაჰის ბრძა-
ნებასო, მიიღე მაჰმადიანობა, ამით არაფერი დაშავდებაო;
გარეგნულად აღიარე მხოლოდ სპარსელთა საჩვენებლად, ხო-
ლო გულით ისევ ქრისტიანი დარჩებიო.

ემუდარებოდა უნდილაძე ღვთაებრივ ქალს და „სტირო-
და მსგავსად ჰეროდეს ჯალათისა, რომელსაც ნაბრძანები
ჰქონდა თავის მოკვება იოანე ნათლისმცემლისა“.

ქეთევანმა მოკლედ, მშვიდად და შეუვალად სთქვა თავისი
პასუხი:

— ჩემო კეთილო ძმაო! სხეულის სიკვდილისათვის არ
გავწირავ ჩემს სულს! რასაც ჰქვია ქრისტიანობა და ქართ-
ველობა! სხეული მიწაა და დღეს თუ ხვალ ისედაც მიწად
უნდა იქცეს, ხოლო ქრისტეს სჯული და საქართველო, რო-
მელიც ჩემში დაბადებითვე ჩასახლებულა, უკვდავია, მარა-
დიული და მისი მოკვლა არც შენს ხელმწიფეს ძალუძს და
არც მის ცრუ ღვთაებას!

შენს ხელმწიფესო?! — გულზე დაესო უნდილაძეს დე-
ლოფლის სიტყვა. მე მისთვის ქართველი არ ვყოფილვარო,
გაიფიქრა გულადუღებულმა ვაჟკაცმა.

დიდხანს ევედრა და ემუდარა, მაგრამ ამაოდ „დაშვრა იგი
მრავლისა ვედრებითა და არა ისმინა დედოფალმან“.

დარწმუნდა იმამ-ყული-ხანი, ვერავითარი ძალა, ვერც
ღმერთი და ვერც სატანა, ველარ შეარყევდა დედოფლის გა-
დაწყვეტილებას.

და ბრძანა შაჰ აბასმა წამება ქართველი ქალისა.

ხოლო „წამების ხელოვნებას“ ოცდაერთი საუკუნის „გა-
მოცდილება“ ჰქონდა სპარსეთში.

შირაზი.

1624 წლის 13 სექტემბერი.

უბერავს ქარი, ცხელი, ხორშაკიანი.

ცეცხლი გიზგიზებს „მეიდანზე“.

რკინის მარწუხები, მაშები, შამფურები, ლურსმნით სავსე ქვაბები, ბარები და სპილენძის მიტრა-თავსარქმელი ვარვარებენ ცეცხლში ჩალაგებულნი.

ხალხით გაჭედილა „მეიდანი“ — სპარსელნი, ქართველნი, სომეხნი, ჩერქეზნი, იტალიელი და პორტუგალიელი კათოლიკე მისიონერნი (ამათ შორის — მამა ამბროზიო ლოს ანჯოსი, ვისთანაც განასრულებდა ქეთევანი საქრისტიანო წესსა და რიგს უკანასკნელ ხანს).

გამოდის ქეთევან დედოფალი.

ორმოც წელს გადაშორებული, ჯერ ისევ დაუმზრალი სილამაზით და სიმშვენიერით აღკაზმული ქართველი ქალი.

თეთრი, ქათქათა კაბით შემოსილ თეთრ დედოფალს მარჯვნივ და მარცხნივ წითელხალათიანი ჯალათები მოაცილებენ.

უკან მოსდევენ მსახურეულნი — ორმოცამდე ქართველი ქალი და კაცი.

მათ წინ — გიორგი ხუცესი.

ზედ ხანძრის პირზე შეაყენეს ჯალათებმა დედოფალი და მისი ამალა.

ისფაპანიდან საგანგებოდ წარგზავნილი დივანბეგი მიუახლოვდა ქეთევანს და ერთჯერ კიდევ აუწყა კრძალვით და თითქოს მუდარით: უკეთუ დედოფალი აღიარებს მაჰმადის რჯულს, შაჰი მას შეირთავს ცოლად და აღავსებს უთვალავი საჩუქრითა და პატივით; ხოლო უკეთუ უარსა ჰყოფს ხელმწიფის თხოვნას, იგი აღესრულება უსასტიკესი ტანჯვა-წამებით!

ისევ მშვიდი და შეურყეველი სიტყვით პასუხობს ქალი: არ არსებობს არავითარი არჩევანი!

ქეთევან დედოფალი მზად არის აღესრულოს ქრისტესთვის და საქართველოსთვის!..

მისი ერთგული მხლებლებისკენ პირით შეაბრუნეს ქეთევანი.

გიორგი ხუცესს დაეძგერნენ ჯალათები, დედოფლის თვალებზე
წინ „გასათათრებლად“.

გაიბრძოლა გიორგიმ. დაშნები დააძგერეს ჯალათებმა,
დაფლითეს და დაასახიჩრეს. სირცხვილს სიკვდილი არჩია
ქართველმა და გული შეაძგერა ჯალათის ხელით მოქნეულ
იატაგანს.

დანარჩენებს მიესივნენ ჯალათები და ყველანი სათითა-
ოდ „დაახოჯავეს“ და „დაათათრეს“ ქეთევანის მსახურეულნი.

ბოლოს თვითონ დედოფალს მიადგნენ და უთხრეს უბ-
რალოდ, სიკვდილისათვის მოემზადეო.

სისუსტე ხომ არ დაეუფლა ქალს?!

სისუსტე... რამეთუ თხოვნა აღმოხდა მოულოდნელად:
„ნება მომეცით, უკანასკნელად ვილოცო, აი, იქ!“ — და
კათოლიკური ეკლესიისკენ გაიშვირა ხელი.

უარი ვერ შეუბედეს ყიზილბაშებმა.

პატრი ამბროზიო დონ ანუოსი და პატრი გრიგორ ორსი-
ნი წარუძღვნენ ეკლესიისკენ.

შევიდა და ილოცა ქეთევან დედოფალმა, საქართველო და-
ლოცა, ლეთისმშობელს შეავედრა, ვითარცა მისი „წილზვლო-
მილი ქვეყანა“; მერე ორივეს — მარიამს და იესოს — წამე-
ბის ქამს ტკივილთა დათრგუნვის ძალა შესთხოვა და „გან-
წმენდილი“ და „განმტკიცებული“ წამომემართა სამლოცვე-
ლოდან.

გედივით მოცურავდა ამაყად ყელაზიდული, ზეანდანი,
ტიანაკეთოვანი.

გლოვისფერი თმები ჩამოშლოდა გვირგვინმოხდილი თა-
გიდან.

ახალი, ყველაზე ბრწყინვალე გვირგვინისკენ მიისწრაფო-
და... წამებულის გვირგვინისაკენ!

მივიდა, დადგა და ანიშნა ჯალათებს.

ჯალათებმა მაშებით გავარვარებული მიტრა ცეცხლიდან
აღმოაბდინეს და თავზე ჩამოაცვეს ქალს.

ცეცხლოვან ჯილად აინთო დედოფლის თავი.

(განა სიმძიმით, გინა „ბრწყინვალეობით“, გოლგოთაზე აკ-
ვანილი იესო ქრისტეს ეკლის გვირგვინი შეედრებოდა ქართ-
ველი დედოფლის თავზე აკაშკაშებულ „გვირგვინს“?!).

დაცემა ვერ მოასწრო ქეთევანმა, უმაღვე წითლად აბღღ-
ვიალებული ლურსმნის „სარეცილი“ დაუგეს და ზედ გუ-
ლადმა „დარეცეს“ ჯალათებმა.

თეთრი სუდარა შემოაფხრიწეს.

ქართველი ქალის თეთრმა, აკალიფადურმა სხეულმა შუ-
ქი დაუკნინა სპარსეთის გახელებულ მზეს.

ჯვარცმა ააგლიჯეს.

საკინძე აუშალეს.

ქართული მიწა ჩაუშალეს.

ცეცხლის საგებელზე იწვა დედა საქართველოსი, შიშველ
და ყვავილ-ჩაუქრობელ მკერდზე ქართული მიწის ნაშთით
მიმოფანტული.

წითლად მოლაპლაპე ბარი დაუსვენა ჯალათმა ძუძუთა
შუა.

მწვარი ხორცის სუნი გაიჟრა ჰაერში.

ქალი არ ტიროდა, არც კვნესოდა, მხოლოდ ლოცულობ-
და მკრთალი ჩურჩულით.

„ქრისტე“, „მარიამ“, „საქართველო“.

ჯალათმა სისხლისფრად აელვარებული მარწუხი აიტა-
ცა, მარცხენა ძუძუს ჩასკიდა და მოგლიჯა... ძუძუ მოგლიჯა
სავსებით!.. ძუძუ!..

მერე მარჯვენა ძუძუს მისწვდა და ისიც განაშორა მკერდს...
ძუძუ!..

მხურვალე შამფურები აძგერეს ორივე ნაძუძურზე.

(განა ქრისტეს უფრო სასტიკად მოექცნენ, როცა ცნო-
ბაწართმეულს ფერდში შუბი ჩასცეს?!).

მთელს ტანზე ცხელი ლუსმნის „საბანი“ დაახურეს.

(ქრისტე სამი თუ ოთხი გრილი სამსჭვალით გააკრეს
ჯვარზე, ხოლო ქეთევანს ათასი მხურვალე სამსჭვალის სა-
რეცლად ეგო და ათასი საბნად ეხურა).

ნელი თრთოლვით, მაგრამ მაინც ებრძოდა ქალის ცხო-
ველმოსილი სხეული სიკვდილს.

დედა საკუთარი სხეულითა გრძნობს შვილის ტკივილს,
შემშილს თუ წყურვილს.

„საქართველო!“... — აღმოხდა წამებულის ბაგეს.

ჯალათმა დედოფლის შუბლს დაუმიზნა ნაცეცხლარი და
ნასისხლარი ბარი...

კიდევ ერთი სიტყვა მოასწრო უკვე სიკვდილის საუფლო-
ში ჩაძირულმა:

„შვილო!“

და არაეინ იცის, ვინ გაახსენდა სიკვდილ-სიცოცხლის
განსადრეკელზე საქართველოს დედას — სვეგამწარებული მე-
ფე თეიმურაზი, მისი შვილები, თუ თვითონ საქართველო...
საქართველოსკენ მიფრინავდა „სურნელოვანი სული“ ქე-
თევან დედოფლისა.

ქეთევან დედოფლის დამწვარი, დასახიჩრებული და დარ-
ღვეული სხეული ჯალათებმა დაუსაფლაველად დააგდეს
ცისა და მიწის შუა.

ლამით ამბროზიო დონ ანეოსმა და გრიგორი ორსინიშ
მოიპარეს წამებული ქალის ცხედარი.

საკმევლითა და მურით გაქვნილ ქსოვილში გაახვიეს,
ისფაჰანს წაიღეს და კათოლიკურ მონასტერში დაასვენეს,
ვითარცა ქრისტიანი და ქრისტესათვის წამებული დედოფლის
უწმინდესი ნაშთი.

ცხვრის ფარას მიჰყვებოდნენ კახელი მწყემსები.

ყმაწვილმა მწყემსმა სამხრეთის ცაზე თეთრი ღრუბელი
დაინახა და მოხუც მწყემსს უთხრა: დახე, ის ღრუბელი თეთრ,
გაფრენილ ქალს არა ჰგავსო?!

მოხუცმა კარგა ხანს უტკირა იმ ღრუბელს და ბოლოს
ესა თქვა სახეგაბრწყინებულმა:

— ამ ათი წლის წინ მე ჩემის თვალით მინახავს ეგ
ხორცხმული ანგელოსი! ქალი-დედოფალი! დედა საქართვე-
ლოსი! სიმშვენიერით, გონიერებით და სათნოებით ტყუპის-
ცალი ნინო განმანათლებლისა და თამარ შვიდმნათობიერისა!
„სამი ქალი, სამი სასწაული!“

„ჰო, ჩვენი ხალხის წმინდა სამება:

ნინო,

თამარი,

ქეთევანი!“

ფიქრმა თვითონ სთქვა.

ვ ა ე - ფ შ ა ვ ე ლ ა

ქეთევან დედოფლის წამების ეამს გიორგი სააკაძე სპარსეთში იყო. შაჰ აბასს გაეწვია იგი რაღაც საგანგებო წვევით.

ზურაბ ერისთავიც გიორგისთან ერთად მიეხმო აბასს...

.

თათბირად ისხდნენ: შაჰ აბასი, გიორგი სააკაძე, სვიმონ-ხანი და ყარჩიხა-ხანი.

„საბოლოოდ“ წყდებოდა „გურჯისტანის საკითხი“.

ბოლოს, და ბოლოს, საქართველოს ყოფნა-არყოფნის „საქმე“ სრული არყოფნით უნდა გათავებულყოფიყო. და გადაწყდა:

„გაუქმებულ კახეთში“ რაღაც სასწაულად ხელახლა აღმოცენებული კახელობა ხელიერთბირად გაიქვლიტოს, ხოლო ქართლა, კახეთის მსგავსად, დედაბუდიანად აიყაროს და სპარსეთში გადასახლდეს!

ეს განაზრახი ამნაირად უნდა განესრულოს:

შაჰი ქართლის მმართველს სვიმონ-ხანს ცოლად აძლევს თავის შვილიშვილის — ისა-ხან ყორჩიხაშის ასულს ჯაჰან-ბანუ ბეგუმს; ახლადშეუღლებულნი გაემგზავრებიან ტფილისს და, ვითარცა მაყრიონა, თან გაიყოლებენ სპარსულ მხედრობას ყარჩიხა-ხანის მთავარსარდლობით.

ყარჩიხა-ხანის მთავარ მრჩეველად ინიშნებოდა გიორგი სააკაძე, ქართლის მოურავ-ტარულა და ნამდვილი გამგებელი.

„სააკაძესთან თათბირისა და შეთანხმების გარეშე ყარჩიხა-ხანს ნება არა აქვს გადაწყვიტოს რაიმე დიდი თუ მცირე საქმე!“ — ხმამალლა, მკაცრად და საგანგებოდ ყველას განაგონად ბრძანა აბასმა.

სააკაძეს და ყარჩიხა-ხანს თანაშემწეებად გაჰყვებიან — ზურაბ არაგვის ერისთავი, შირვანის ბეგლარბეგი იუსუფ-ხანი,

ყარაბალის ბეგლარბეგი მოჰამედ ყული-ხან ზიად-ოღლი, კიდევ სხვა „ათორმეტი ხანი“, მრავალი ამირა და სულთანი... თათბირი სრულდებოდა.

შაჰ აბასმა სავსებით მოულოდნელად ზურაბ ერისთავს უთხრა, სანამ ქართლს მოივლიდეთ, მანამდე შენი ცოლი ჩემთან უნდა დარჩეს სტუმრადო.

არ ესიაშოვნა ზურაბს, — სტუმრად კი არა, მძევლად იტოვებსო, გაიფიქრა, მაგრამ უმაღლეს გული დაიარხებინა, — საშიში არაფერია, შაჰის ერთგულად მივდივარ, ერთგულად დავბრუნდები და მეუღლეც აქვე დამხვდება უვნებლადო...

ისევ გაისმა შაჰ აბასის ცივი, სამარეული ხმა:
 „და ჩემთან დარჩება გიორგი სააკაძის ვაჟი — პაატა, რამეთუ... რამეთუ ძალიან მიყვარს მე პაატა სააკაძე!“
 სისხლი გაუშრა ძარღვებში გიორგი სააკაძეს.

.

- მამა.
- ჰო, პაატა.
- როცა საქართველოში ჩახვალ, ცხრაჯერ ეამბოროე ჩვენს მშობელ მიწას.
- ჰო, შვილო.
- ცხრა ვაზი ჩაავდე და გაახარე ნოსტენ ვენახში.
- აღესრულება, შვილო.
- ცხრა სანთელი აანთე ჩვენს სალოცავ ერთაწმინდის ეკლესიაში.
- ჰო, პაატა...
- ცხრა ქართულ სოფელში, ცხრა გლეხის ოჯახში ცხრა ბიჭი აიყვანე, მონათლე და ცხრავეს პაატა დაარქვი!
- ასე იქნება, შვილო პაატა!
- ცხრა რიცხვი მიყვარს, მამაჩემო, რამეთუ ჩვენ ქართველებს დღემდე გვყოლია: ცხრა დიდხელმწიფე, ცხრა დიდი ერისმთავარი, ცხრა დიდსარდალი, ცხრა ბრძენთაბრძენი, ცხრა ძლევა საკვირველი და ცხრა თავდადებული რწმენისა და სამშობლოსათვის.
- ცხრა დიდხელმწიფედ ვის გულისხმობ, შვილო პაატა?
- ფარნავაზი, ვახტანგ გორგასალი, დავით მესამე კურა-

პალატი, ბაგრატ მესამე, დავით აღმაშენებელი, გიორგი მესამე, თამარ მეფე, გიორგი ლაშა და გიორგი ბრწყინვალე“

— ცხრა დიდი ერისმთავარი?

— ქუჯი ეგრისელი, სტეფანოზ პირველი, გვარამ მამფალი, იოანე მარტუშისძე, კახაბერ კახაბერისძე, ცოტნე დადიანი, შალვა თორელი-ახალციხელი, გრიგოლ სურამელი და ეგარსლან ბაკურციხელი.

— ცხრა ბრძენთაბრძენი?

— პეტრე იბერი, გიორგი მერჩულე, ექვთიმე მთაწმინდელი, გიორგი მთაწმინდელი, ეფრემ მცირე, იოანე პეტრიწი, არსენ იყალთოელი, ისევ დავით აღმაშენებელი და შოთა რუსთველი.

— ცხრა დიდსარდალი?

— ფარსმან ქველი, თორნიკე ერისთავი, გრიგოლ ბაკურიანისძე, ისევ დავით აღმაშენებელი, დემეტრე პირველი, დავით სოსლანი, ლუარსაბ პირველი, სვიმონ პირველი და... გიორგი სააკაძე.

— გიორგი სააკაძე.

— ჰო, მამაჩემო.

— გმადლობ, შვილო... ახლა მითხარი ცხრა ძლევა საკვირველი.

— პალისი თორნიკე ერისთავისა, ფარცხისი გიორგი მეორისა, ერწუხი და დიდგორი დავით აღმაშენებლისა, შამქორი და ბასიანი დავით სოსლანისა, გარისი ლუარსაბ პირველისა და სვიმონ პირველისა და... ტაშისკარი გიორგი სააკაძისა.

— მაშ, ტაშისკარი გიორგი სააკაძისა?!

— ჰო, მამა, ტაშისკარი.

— მაგრამ შენ მხოლოდ რვა გამარჯვება მოიხსენიე, ერთი გამოგრაჩა, ჩემო პაატა.

— არა, მამა, მეცხრე ძლევა საკვირველი ჯერ არ მომხდარა, მაგრამ, ვიცი, მალე მოხდება.

— ვინ იქნება შემოქმედი მეცხრე ძლევისა?

— ისევ შენ, მამა.

— მე?!

— ჰო, შენ — გიორგი სააკაძე!

— მაგრამ ვინ იცის — ბრძოლა რომ მოხდეს, რით გათავდება?

— მხოლოდ ქართველთა გამარჯვებით და შენი ძლევამოსილებით, მამაჩემო.

— ღმერთმა ინებოს!

— ღმერთმა უკვე ინება!

— ბარემ სამშობლოსათვის ცხრა თავდადებული მამულიშვილიც დაასახელე, შვილო პაატა!

— გუბაზ მეფე, ძმანი დავით და კონსტანტინე, კონსტანტი კახი, გობრონი, მეფე დემეტრე თავდადებული, მღვდელი თევდორე, ქეთევან დედოფალი — დედა საქართველოსი.

— შენ მხოლოდ რვა სთქვი. ვინლა არის მეცხრე ქართველი წამებული და შეწირული საქართველოსთვის?

— მეცხრე მე ვარ, პაატა სააკაძე, შენი შვილი!

— შვილო!..

— დიდი ფასი აქვს ჩემთვის მაგ მძიმე ცრემლებს, მაგრამ იგივე ფასი უნდა ექნეს ყოველი ქართველისთვის.

— ვეცდები, შვილო.

— შენ დიდი იყავ საქართველოში, მამაჩემო, მერე შეიქენ მჭედელი შენი ქვეყნის მტერთა ბედ-იღბლის, ახლა ისევ უბრუნდები შენს მშობელ წიაღს... და მჯერა ისევ დიდი იქნები, სათაყვანო გმირი ქართველთა.

— შვილო პაატა, რაც უნდა მოხდეს, თუნდ აღმაშენებლის გმირობანი გავასამკეცო, მე, ნათათრალი, შენი გმირობის ფერხთა მტვრადაც არ ველირები.

— ისევ ენდე ჩვენი ხალხის დიდსულოვნებას, ოღონდ არგუნე გამარჯვება, შენებური — სააკაძური.

— უკეთუ ღმერთმა ინება, შვილო!

— ჩვენთან არს ღმერთი!

— ამინ!

— ესეც გახსოვდეს, მამაჩემო, — ჩემი ანდერძი მხოლოდ მას შემდგომ აღესრულება, როცა მეცხრე ძლევა საკვირველი განესრულება.

— ?!

— ჯერ გაიმარჯვე, საქართველოს სისხლის დამაქცევარს სისხლითვე აზღვევინე და მერე დარგე ცხრა ვაზი ნოსტენ

მიწაში, მერე აანთე ცხრა სანთელი ერთაწმინდაში, მერე განათლე ცხრა ქართველი ყრმა ცხრა ქართულ სოფელში.

— მესმის, შვილო, შენი სიტყვა, ღვთაებისგან ჩავგონებულნი: სანამ ქართველ ხალხს მე, გიორგი სააკაძე გამარჯვებას არ დავუბრუნებ, მანამ ქართულ მიწაზე არც ჩემი ხელით დარგული ვაზი გაიხარებს, არც ჩემი ხელით დანთებული სანთელი აინთება, არც ჩემი ხელით განათლული ქართველი ყრმა გაინათლება.

— მაპატიე, მამა!

— შენ მაპატიე, ჩემო შვილო... შვილო...

ცრემლით აღვსილი ღუმელის შემდგომ:

— გახსოვს, მამა, რა წამოსცდა ერთხელ შაპ აბასს დარბაზობაზე?

— რა, შვილო?

— ქართველები მხოლოდ ცალ-ცალკე, ერთეულებად არიან დიდი გმირები და ვაჟკაცები, თორემ ერთიმეორის თანადგომა ისე უჭირთ, როგორც დიდ ხეებს ტყე-მადნარშიო.

— მართალი კი თქვა... მაგრამ ეგ „სიმართლე“ გაუცუდდება შაპ აბასსაც და ყველას, ყველას — საქართველოს ყოველ მოსახლეს, ახლაც და მომავალშიც!

— გმადლობ, ჩემო მამა!

მცირე გარინდების შემდგომ:

— არავის ისე არ ემარჯვება ქართველი კაცის დამარცხება, როგორც ქართველ კაცსო, ამასაც ამბობს შაპ აბასი, ამას იმოწმებენ ჩვენი მტრებიც და ჩვენი მოყვრებიც. ეს ბოროტი ნაძახურიც უნდა გააქარწყლო, მამაჩემო.

— აღესრულება, შვილო ჩემო!

— გმადლობ, მამა!

პაატამ ხმალი შემოხსნა მამას, ორივე ხელით მზისკენ აღმართა და შესძახა:

— მაღალო ღმერთო, შენ აკურთხე ხმალი ესე ქართული, ხმალი ქართველი სარდლისა და მხედარისა, აკურთხე და უწინამძღვრე, რამეთუ მას შენი მოთაყვანე ქართველი კაცის სისხლი არასოდეს არ დაუქცევია!

ცხრაჯერ აკოცა ხმალს მხურვალედ ჭაბუკმა და ისევ შეარტყა წელზე გაქვავებულ და გაშეთებულ პატრონს...

საღლაც ჩიტი წიოდა გახელებით. წყალი სწყუროდა ინე
სასტიკად, როგორც პაატა სააკაძეს სწყუროდა ქართულ მი-
წაზე დაწაფება...

ქართული მიწით სავსე პარკუჭანა ჩამოხსნა კისრიდან მამამ
პაატამ, თვითონ ჩამოიკიდა მკერდზე, „თავისი მიწის“ გვერ-
დით, და ღიმილით უთხრა.

— სიხარბე მაპატიე, მამა... შენ მაინც აღარ დაგჭირდე-
ბა... ხოლო ჩემთვის ეს ერთი მუჭა ქართული მიწა...

აღარ (თუ ვეღარ) დაასრულა, მამას მოეხვია და ცხრა-
გზის აკოცა. იგრძნო გიორგიმ: ნაღვერდალივით ცხელი ჰქონ-
და ტუჩები შეილს.

იგრძნო პაატამ: ყინვასავით ცივი ჰქონდა ლოყები მამას.

კვლავ გაქართვებული საბავაძე

რამეთუ ღმერთს მაშინაც ესმის,
როდესაც ჩვენ ვღვთმყარო.

მეტრე იბერი

როცა საქართველოში სალაშქროდ ყველაფერი მზად იყო,
შაპ აბასმა ყარჩიხა-ხანი ცალკე დაიბარა და იდუმალ უთხრა:

— მე შენ თათბირზე სხვების შესახებდად გითხარ, რომ
სააკაძის დაუკითხავად არაფერი მოიმოქმედო. ახლა კი ცალ-
კე, პირადად გიბრძანებ: სააკაძეს საგანგებოდ ადევნე თვა-
ლი; ჩემგანაც საიდუმლო წერილმა და ბრძანებამ ელოდე და
ისე მოიქეცი, როგორც იმ წერილში ეწეროს!

.

ამის შესახებ სააკაძემ არაფერი იცოდა.

მაგრამ არც შაპ აბასმა იცოდა, რომ გიორგი სააკაძესაც
ჰქონდა ერთი საიდუმლო შეხვედრა საქართველოში გამომგ-
ზავრების წინ — შეხვედრა დაუდ-ხან უნდილაძესთან.

— ყველაფერი გააკეთე, ჩემო გიორგი, ყიზილბაშთა ამო-

საწყევტად, რასაც კი შეძლებ, — უთხრა უნდილაძემ სააკაძეს.

საქართველოსკენ მოიჩქაროდა ნეფე-დედოფალი — გათათრებული ქართველი სვიმონ-ხან და სპარსელი ქალი ჯაჰან-ხანუ ბეგუმ.

უკან მოსდევდა „მაყრიონი“ — უზარმაზარი სპარსული მხედრობა.

საქართველოს დასაქცევად აღძრულ სპარსელთა ურდოს მოუძღოდა ორი გათათრებული ქართველი (გიორგი სააკაძე, ზურაბ ერისთავი) და ორი გათათრებული სომეხი (ყარჩიხა-ხანი, იუსუფ-ხანი).

მაგრამ, ნუთუ სააკაძეს ისევ „გათათრებული ქართველი“ ჰქვია?!

მან ხომ სულის ფსკერიდან ამოინთხია თათრობის შხამიანი ნალექი და ახლა სულით განსპეტაკებული, ვინა „კვლავ-გაქართველებული“, მიიჩქარის სამშობლო საქართველოსკენ.

ბაბტამ, მისმა ღვთაებრივმა შვილმა, დაუბრუნა მას სამშობლო და სარწმუნოება.

მხოლოდ შვილის გაწირვას შეუძლია დაარწმუნოს ქართველი ხალხი, რომ სააკაძეს გულწრფელად უყვარს საქართველო და სუფთა მამულიშვილური სინდისით იომებს იგი მშობელი ქვეყნის დასახსნელად და გადასარჩენად.

მღუმარედ მიაჭენებდა ცხენს სააკაძე.

მაგრამ ღმერთს მაინც ესმოდა მისი ფიქრები...

აგერ, მეცამეტე წელიწადი დაწყებულა, რაც გიორგი სააკაძეს ტანზე უცხო მზის სხივი აუცრია, საქართველოს სამტრო-საბუღარში ჩაბუღრებულა — სპარსეთის სამსახურში ჩამდგარა და სპარსეთის მატიანის მჭედელი გამხდარა.

მაგრამ რა! — განა, უწინამორბედოა გიორგი სააკაძის საქციელი საქართველოს მატიანეში? ვინ მოთვლის, რამდენი ქართველი ნებით თუ უნებლიედ გადახვეწილა საქართველოდან, დედა დავიწყნია, დედინაცვალს მიჰკედლებია, უცხო მზის სხივი აუცრია და უცხო ისტორიის შემოქმედი გამხდარა. სამაგალითოდ შეიძლება ეს სახელები გაიხსენოს ადამიანმა:

მედეა, ასული კოლხეთის მეფე აიეტისა — საბერძნეთში.

ბაკურ იბერიელი — რომში,
 ვეტრიანონ ლაზი — რომში,
 ბუზმირ. იბერიელი — რომში,
 ფარსმან იბერიელი — რომში,
 სუბარმახიოს კოლხი — რომში,
 პეტრე იბერიელი — რომსა და ბიზანტიაში,
 იოანე ლაზი — რომსა და ბიზანტიაში,
 ფარსმან კოლხი — ბიზანტიაში,
 ფირან იბერიელი — ბიზანტიაში,
 რუფინე კოლხი — ბიზანტიაში,
 ლეონტი კოლხი — ბიზანტიაში,
 ზაენა კოლხი — ბიზანტიაში,
 ბაკურ ფირანის ძე იბერიელი — ბიზანტიაში,
 ფაზა იბერიელი — ბიზანტიაში,
 თორნიკე პროტოსპათერი — ბიზანტიაში,
 ფარსმან იბერი იერაპოლისელი — ბიზანტიაში,
 გრიგოლ ბაკურიანისძე — ბიზანტიაში,
 აბაზ ბაკურიანისძე — ბიზანტიაში,
 გიორგი ბევი — თურქეთში,
 მეჰმედ ფაშა — თურქეთში,
 გულჩარა, მეფე გიორგი მეათის ასული — თურქეთში,
 კონსტანტინე-მირზა — სპარსეთში,
 ალავერდი-ხან უნდილაძე — სპარსეთში,
 იმამ-ყული-ხან უნდილაძე — სპარსეთში,
 დაუდ-ხან უნდილაძე — სპარსეთში.

„წესადცა არს წინამბრძოლობა ქართველთა“, — ეკვიპეტებიან ქართველ მამულიშვილებს და თავგამოდებით იბრძოდნენ „სხვათა ისტორიის გასაჰედად“.

თორნიკე ერისთავი — ბიზანტიელთათვის; ულუ დავითი, სარგის ჭაყელი, დემეტრე თავდადებული, ბექა ჭაყელი, რატი სურამელი, ვახტანგ მეორე და ვახტანგ მესამე — მონღოლთათვის; — კონსტანტინე მეორე და მ' ჰაბუკ ჭაყელი — ყიზილბაშთათვის.

მაინც ვინ უფრო „მოერგება“ გიორგი სააკაძეს, ვითარცა წინამორბედი-ორეული?!

აღბათ, მანუჩარ II ათაბაგის

მანუჩარმა ქართველობა თურქულ თათრობაში გაცვალა, თურქული მზე აიცრა ტანზე, თურქული სახელი მუსტაფა დაირქვა, თურქი ფაშობა გაიკრა და ერისწყეულ მოღალატედ იქცა. მაგრამ ბოლომდე ვერ გაუძლო „თათრობას“ ქართველად დაბადებულმა კაცმა: თურქ ფაშებს; დაერია, ერთი თავიდან ჭიპამდე გააპო ხმლის დარტყმით, მეორეს ყური და ლოყა-ნიკაპი დაათალა, მესამე ცოცხალ-მკვდარი დააწვინა...

დაუბრუნდა მანუჩარი ქართველობას — სამშობლოს და სარწმუნოებას. დიდსულოვანმა მშობელმა ხალხმა დაივიწყა მისი „თათრობა“ და ერისწყეული მოკვეთილობიდან ისევ ეროვნულ გმირად გაიხადა...

მით უფრო უნდა შეიწყნაროს ქართველმა ხალხმა გიორგი სააკაძე, რომელმაც დვიძლი შვილი გასწირა მშობლიურა საქართველოსთვის!

შვილი!..

ღვთაებრივი პაატა!..

პაატას გამწირველ მამას აღარ შეიძლება ეწოდოს „ერისწყეული“!

სპარსულ ურდოს მოუძღვინ სააკაძე, თვითონ ზპარსეთში მზე-ნაწოვარი, მაგრამ შაინც ქართველი, გინა „კვლავგაქართველებული“!

ორმოცდახუთი წლის არის ახლა გიორგი სააკაძე და საქართველოს უბრუნდება „უძლები შვილი“, გინა — „ძე შეცთომილი“.

უკვე ქართულ მიწაზე მოაბიჯებს გიორგი სააკაძე.

ქართული მზით ავსებულა მისი თვალები — მზის დამკორტნავი მძვინვარე და ხარბი თვალები,

წალმა დაჭედო ცხენზე ზის ახლა და შატანაც გაფრენილა მისი საყნიანი ბეჭიდან.

პაატას კოცნით ნაკურთხი ხმალი არტყია წელზე.

სულ მალე ეს ხმალი ქართულ მიწად აქცევს მტრის ურდოს, საქართველოს დასამიწებლად რომ ასდევნებია დიდ ქართველ გენერალს.

ქამი ჩემია და ქამისა მე ვარ იმედი.

ნიკოლოზ ბარბაქაძე

1625 წელი.

ატმის ყვავილობა საქართველოში.

ტფილისში მოვიდა სპარსეთიდან წამოსული ნეფიონი და მისი უზარმაზარი ურდო-„მაყრიონი“.

აიშალნენ ქართველები, — ვის მოსწრებიაო ამოდენა მყარი? სხვა რამ ავი განაზრახი ხომ არ იშალება ამ უცნაური ქორწილის უკან?!

საშფოთარი არაფერი აქვთ ქართველებს. შაჰის შვილი-შვილს და სიძეს სწორედ ასეთი დიდროვანი საქორწილო მოგზაურობა ეკადრება, მორჩა და გათავდა!

გიორგი სააკაძე არწმუნებდა ყველას „ფიცითა მტკიცითა“:

„ამა ჭარისა წიმრავლე საქართველოსათვის არ არის საზიანო, ნურცა რა ფიქრი გაქუსთ, თქვენი საქმე მე დამადევითო“.

რამდენიმე დღეს „იყვის მღერა, ნადიმი და მეჯლიში, ბურთაობა და ყაბახის სროლა“ ტფილისში.

ქორწილი რომ ჩათავდა, ყარჩიხა-ხანმა შპარსული მხედრობა ტფილისიდან აპყარა, მუხრანს ჩაიყვანა და აღაიანის ველზე დააბანაკა.

მაშინვე ყარჩიხა-ხანმა, რანაკვირველია, სააკაძესთან შეთანხმებით, კახეთში ბრძანება გაგზავნა: იმერეთს ლაშქრობას ვაპირებ და სასწრაფოდ ყველა მეომარი კახელი, ვითარცა ქუდზე კაცი, მუხრანს გამოცხადდესო სპარსელებთან და ქართველებთან შესაერთებლად!

როცა კახელები მუხრანს მოვიდოდნენ, სპარსელები დაერეოდნენ და ერთიანად ამოსწყვეტდნენ!

ასე იყო მოფიქრებული მარტივად და „მადიანად“.

ეს განზრახვაც ისევ სააკაძესთან ჰქონდა „შეთანხმებული“ ყარჩიხას.

მაგრამ იმ ღამით გიორგი სააკაძე მცხეთაში კათალიკოს ზაქარიას და წილკნელ ეპისკოპოსს, პართენს, შეხვდა.

საკაძის დიდი სამამულიშვილო განზრახვი პირველად ქართლის სულიერმა მამებმა შეიტყვეს.

ეს ამბავი კი გიორგი სააკაძეს ყარჩიხა-ხანისათვის აღარ ჰქონია „შეთანხმებული“!..

მეორე დღეს ზურაბ ერისთავი გაინაპირა გიორგი სააკაძემ. სულხორციანად ენდობოდა ზურაბს, — მისი გაზრდილი იყო უმცროსი ცოლისძმა, ხმალიც მისგან ჰქონდა ნასწავლი, მამულიშვილობაც და „ანტიმამულიშვილობაც“.

მე და შენ საქართველო უნდა დავიხსნათ დალუპვისგანო, ზირდაპირ უთხრა გიორგიმ ზურაბს, არც ერთი სპარსელი აქედან ცოცხალი არ უნდა გავიდეს, სულ ერთიანად უნდა ამოეყლიტოთ.

გაოცდა და დაფეთდა ზურაბ ერისთავი. თუ აჯანყებას აპირებდი, რატომ სპარსეთში არ მითხარიო; ახლა რა ვქნა, ცოლი რომ სპარსეთში დავტოვეო; ხომ იცი, როგორც კი შაჰი ლალატს შეიტყობს, მაშინვე თავს გააგდებინებს ქალსო; იქ რომ ყველაფერი გეთქვა, ცოლს თანვე წამოვიყვანდიო.

სპარსეთში რომ ჩემი განზრახვა გამენდო, შენ თავს ვერ შეიკავებდიო, უთხრა გიორგიმ, ისედაც, შაჰი ცოლს არ გამოგატანდაო.

და, რაც მთავარია, ეს ნუ დაავიწყდება ზურაბ ერისთავს — გიორგი სააკაძემ ღვიძლი შვილი გასწირა ქვეყნისა და ხალხისათვის!

მაინც ყოყმანობდა არაგვის ერისთავი.

მაშინ გიორგიმ ცოლისძმას პატივმოყვარულ გულს დაუმიზნა: თუ შაჰ აბასმა ცოლი მოგიკლა, სამაგიეროდ ლუარსაბ მეფის დას ლელა-თინათინს შეგრთავ ცოლადო.

ლელა-თინათინი, როგორც მკითხველს წინასწრობილად ახსოვს, შაჰ აბასმა ლუარსაბ მეფის მოკვლის შემდგომ საკუთარი ცოლობიდან განუტევა და კახეთის მმართველს — ფეიქარ-ხანს მიუძღვნა.

ფეიქარ-ხანს ლელას წავართმევთ და შენ შეგერთავთ ცოლადო, არწმუნებდა გიორგი ზურაბს.

ზვიადი ფეოდალი მოიხიბლა ასეთი შეთავაზებით, ხუმრობა ხომ არ იყო — ზურაბ ერისთავი ქართლის გვირგვინოსან-ბაგრატიონთა ოჯახს უმოყვრდებოდა!

ზურაბი დათანხმდა.

აჯანყების თავიდათავი რგოლი შეიკრა.

კახელთა ჯარი მოვიდა სპარსთა ბანაკში.

გაიხარა ყარჩიხა-ხანმა. შაჰის პირველი ბრძანება ასრულების პირას იდგა — კახელებს ამოსწყვეტდნენ და მერე ქართლის აყრას და გადასახლებას შეუდგებოდნენ!

„ზვარაკად მოსულ“ კახელებს სპარსელებმა გამოუცხადეს, რაკი თქვენც იმერელთა ქრისტიანი თანამოძმენი ხართ, იმერეთში სალაშქროდ ვერ გენდობით, ამიტომ იარაღი ჩავვაბარეთ, საჩუქრად ძვირფასი ხალათები ინებეთ და უკანვე თქვენს კახეთში გაბრუნდითო!

„საჩუქრების დასარიგებელი“ კარავი მოშორებით, ბანაკის განაკიდურზე იდგა, მაღალი, კაცის სამალავი თეჯირით გარშემოვლებული. იმ კარავში სათითაოდ შეხვალთ და თქვენს კუთვნილ საჩუქარსაც იქ მოგართმევენო, უთხრეს კახელ „სტუმრებს“ სპარსელმა „მასპინძლებმა“.

უკვე დაიწყო „მისართმეველის მირთმევა“. რიგით პირველი კახელი შეიწვიეს კარავში. შემდეგ მეორე, მესამე... მეათე... მეთხუთმეტე...

უკან არც ერთი არ ბრუნდებოდა.

ალბათ, თავს უყრიან და ერთად გამოუშვებენო შაჰის ხალათებით დამშვენებულებს, ფიქრობდნენ საჩუქრის მოლოდინში ჩამდგარი კახელები.

არც ერთს აზრიც არ დაუკრავს, რომ „თავს უყრიდნენ“. კი არა, თავებს აყრევიანდნენ თეჯირს გადაღმა გაუჩინარებულ ქართველებს...

და უეცრად ვიღაცამ კახელთა შორის იღუმალი სიტყვა ისროლა: იმ კარავში სათითაოდ შესულ ქართველებს „საჩუქრად“ თავის დაგდებინება გელოდებათო?!

თავის დაგდებინებო?!

ეგ ჩვენ გვეითხონო, იგრიალეს კახელებმა, იმიშველენ ხმლები და ეკვეთენ სალტედ შემოკრულ ყიზილბაშთა ლაშქარს.

სალტე გადასჩეხეს, ბანაკის გასასვლელთან მდგარი სპარსელებიც გადაქელეს და სამშვიდობო გზებზე გააღწიეს.

თითები დაიჭამა ყარჩიხა-ხანმა.

არავითარი ეჭვი არ იყო: კახელთა ამოყლელის განაზრახი მხოლოდ მან გასცა, ვინც ამ განზრახულობაში ყარჩიხასთან ერთად მონაწილეობდა.

ასეთი კაცი გიორგი სააკაძე იყო...

გიორგის არ გამოჰპარვია, რომ იმ დღესვე ყარჩიხა-ხანმა ფაიქი აფრინა ერანისაკენ.

დღე-დღეზე შაჰ აბასის ახალ ბრძანებას ელოდა ყარჩიხანიც და... გიორგი სააკაძეც.

სპარსელთა ურდომ ადგილი მოინაცვლა.

მარტყოფის ველზე გავიდა, დაიბანაჯა და დაინაძოვრა.

.

ლოჭინის ხეობა აიჩემა გიორგიმ, რადგან აქ გამოივლიდა ერანიდან მომავალი გზა...

სპარსელებიც შეეჩვივნენ იმას, რომ ნადირობაზე შეყვარებული მოურავი ყოველდღე გადიოდა „ქორის მოსატყეველად“.

იმ დღესაც ხმა დააგდო ბანაკში, სანადიროდ მივდივარო და ქორით ხელმოჭანგული გაეშურა ლოჭინისაკენ.

გუმანმა არ უმტყუნა. სპარსეთიდან მომქროლავმა შათირმა შემოაგელვა ცხენი ხეობაში.

დაუხვდა გიორგი. გაძლიანდა შათირი, მაგრამ სად გაექცეოდა სააკაძის ფოლადის ხელებს.

შეიპყრო გიორგიმ, გაჩხრიკა და ამოართვა წერილი უბიდან.

შაჰი სწერდა ყარჩიხა-ხანს:

„გიბრძანებ, კახელნი ამოსწყვიტო, ქართლელნი დედაწულიანად აპყარო და სპარსეთს წამოასხა, ხოლო მოურავი დაუყოვნებლივ მოჰკალ, თავი მოჰკვეთე და გამომიგზავნი!“

გიორგიმ შაჰის წერილი უბეში შეინახა, შაჰის შათსარი იქვე მოგუდა და მიწაში ჩამარხა.

ბანაკში მობრუნდა. ვითომც არაფერი მომხდარიყო, „შეგობრულად“ ესაუბრა ყორჩიხა-ხანს. თან ეს უთხრა ბეჯითად, მკაცრად: ქართლის თავადები უნდა შევეყარო სასწრაფოდ და ვუბრძანო, ხალხი გაამზადონ დედაბუდიან ასაყრელად და სპარსეთში გადასაყრელად.

ყორჩიხამ აზრი ვერ დაიკრა და სააკაძის განზრახვა მოიწონა.

გიორგიმ ქართლის თავადები შეჰყარა და შაჰის წერილი წაუკითხა.

ყველა მიხვდა შაჰ აბასის ვერაგ განზრახვას — სააკაძის მოყვარეც და მომტერეც.

საქორწილოდ მოსულ ყიზილბაშობას ქართლი უნდა დაექცია კიდევ ერთხელ — „ერთხელ და სამუდამოდ“!

და ყველა თავადმა — სააკაძის მტერმაც და მოყვარემაც — ერთხმად შეჰფიცა, რომ დათქმულ დროზე მთელის ძალებით ამხედრდებოდა საქართველოს დამაქცევარ გადამთიელთა გასანადგურებლად.

(ასე უნდა მომხდარიყო, რადგან ყველას — სააკაძის მტერსაც და მოყვარესაც — უპირველეს სახატედ მაინც ჰქონოდა სამშობლო საქართველო! ამიტომ შინაურ ქიშპსა და მტრობას დროებით თავი უნდა მოემძინარებია)...

ერთადერთი ქართველი თავადი, რომელსაც შეთქმული მამულიშვილები არ ენდნენ, იყო გამაჰმადიანებული ანდუყაფარ ამილახორი, შაჰ-აბასის ცოლისძმა, სიმონ-ხანის ქვიხი და ისა ხან ყორჩიხაშის სიძე (ქალის თესლით — შაჰ აბასის შვილიშვილის ქმარი).

საფურცლის ჭალაზე შეიპყრეს შეთქმულებმა ანდუყაფარი ცოლშვილიანად, ჩრდილოეთისკენ გააქანეს და თერვან ხეობაში, არშის ციხეში გამოჰკეტეს.

სამამულო ომის მაწვევარი ჩურჩული გაიჭრა ქართლოსიანთა სამკვიდრებელში.

ეს მერამდენედ აიმართნენ და აგელდნენ უქარქაშო ქართული ხმლები ტანჯულ მიწაზე!

.

ზურაბ ერისთავი უსარდლებდა ქართულ ჯარს.
ხოლო გიორგი სააკაძე...

* * * * *

დღე დათქმული აჯანყებისა — 25 მარტი (7 აპრილი)
1625 წლისა, დღესასწაული — ხარება.

ხარება! (ალბათ, დიდი იმედი ჩასდეს ამ საოცარ სიტყვა-
სასწაულში პატრიოტებმა!).

ჯერ ისევ ღამე წევს მარტყოფის ველზე.

გულდანდობილად სძინავს ბანაკად ჩაგუბებულ 30 000
სპარსელს.

მთავარსარდლის კარავში განისვენებს ყარჩიხა-ხანი და
მისი ვაჟი იმამვერდი-ბეგი.

მშვიდად სძინავთ, რამეთუ იციან, — სააკაძე არსად გა-
სულა ბანაკიდან, ვერც ვერსად წავა, მსტოვრები თვალს არ
აცილებენ.

მახლობელ კარავში ეგულება ყარჩიხა-ხანს „მოუტრავ-ხა-
ნი“, ოთხი „გურჯის“ თანხლებით. ხოლო, სულ ხუთი „გურ-
ჯი“ რას გააწყობს ოცდაათიათას ყიზილბაშთან!

ამიტომ სძინავთ არხეინად.

მხოლოდ გიორგი სააკაძეს და მისგან არჩეულ ოთხ ქარ-
თველს არ სძინავთ.

იარაღასხმული მიწოლილა „რჩეული ხუთეული“.

გიორგი სააკაძე,

მისი უფროსი ვაჟი ავთანდილ სააკაძე,

თავადი პაატა ხერხეულიძე,

თავადი ელია დიასამიძე,

ქართლელი გლეხი პაპუნა ვაშაყაშვილი.

რეჟრეჟმა იწყო მოახლოება.

ღამემ ნელ-ნელა აიკრიფა შავი კრეტსაბმელი და ხარება-
დღეს შეატოვა მარტყოფის ველი.

გამაყრუებელმა ყიჟინამ და იარაღის ზრიალმა შეარყია
ცისგვამი.

ეს — ქართული ჯარი მოფრინავდა ზურაბ ერისთავის სა-
რდლობით.

აიშალა სპარსთა ბანაკი.

კარვიდან გამოიჭრა ყარჩიხა-ხანი და ზნიკიანი ყვილით
იხმო ყველა სარდალი.

ერთბაშად მოცვივდნენ ამხედრებული გიორგი სააკაძე,
იუსუფ-ხანი, მოჰამედ ყული-ხან ზიად-ოღლი და სხვანი
„ხანნი ათორმეტნი“.

ცხენიდან ჩამობრძანდი და შევიტყოთ რა ხდებოდა — შე-
ჰკივლა ყარჩიხამ სააკაძეს.

— ჩამოხდომისა კი არა, უმჯობესია შენც შევადე ცხენზე
და ჯარს მიჰხედო, თორემ მგონი თეიმურაზ მეფე მოდის თა-
ვის მხედრობით! — შეუტრიალა სააკაძემ.

ცხენს მოახტა ყარჩიხა-ხანი.

მაგრამ უნაგირზე ჩაჯდომაც ველარ მოასწრო.

— ახლა სინჯე ქართველების სისხლის დაქცევას — დაიღ-
რიალა სააკაძემ და თვალწამიერად შიშვლად დაჭერილ მარ-
ცხენა ილღიაში აძგერა შუბი ყარჩიხა-ხანს.

გარდიგარდმო შუბგანწონილი და სულგავარდნილი დაე-
ნარცხა ძირს სპარსთა მთავარსარდალი.

წამსვე პაატას ნაკოცნი და ნაკურთხი ხმალი იშიშვლა
საკაძემ.

სპარსთა დანარჩენ სარდლობას უკვე ხმლებით სჩეხდნენ
ავთანდილ სააკაძე, პაატა ხერხეულიძე, ელია დიასამიძე, პა-
პუნა ვაშაყაშვილი.

ავთანდილმა მხარილლივ გასჩეხა იმამვერდი-ბეგი, ძე ყარ-
ჩიხა-ხანისა.

გიორგიმ თავი დააგდებინა იუსუფ-ხანს.

პაატა ხერხეულიძეს, ელია დიასამიძეს და პაპუნა ვაშა-
ყაშვილსაც დაედვარათ „თავისი წილი“ მტრის სისხლი.

რამდენიმე წუთიც და სპარსულ ურდოს აღარცერთი სარ-
დალი აღარ ჰყავდა თავშერჩენილი.

ხუთ ქართველს ერთბაშად წარეკვეთა თავი ერანული ურ-
ჩხულისათვის.

ზურაბ ერისთავიც უკვე შემოჭრილიყო სპარსთა ბანაკში.

ქართველები უწყალოდ და ხელდარეულად ელეტდნენ
უმეთაუროდ და უპატრონოდ დარჩენილ სპარსულ მხედრო-
ბას.

სპარსელებს ისღა დარჩენოდათ, ვისაც საით და როგორ მოუხერხდებოდა, იქეთ გაქცეულიყვნენ.

ქართველები მისდევდნენ და ხოცავდნენ მთელი დღე. უთენია დაწყებული ბრძოლა გვიან მიმწუხრამდე გაგრძელდა.

30 000 სპარსელისგან მხოლოდ 3 000-მა გაასწრო სიკვდილს.

ქართული ხმლებით აჩეხილი ოცდაშვიდი ათასი ერანელის გვამი ეყარა მარტყოფის ველზე.

მათ შორის — შვიდი რჩეული ერანელი, სარდალი.

დიდძალი ნადავლი და აღჭურვილობა ჩაუვარდათ ხელში გამარჯვებულებს. ისინი „აღივსნეს საშოვრითა — ოქროთი, ვერცხლითა, თვალითა, მარგალიტითა, მრავლის უცხოს ნაქსოვითა, ცხენ-აქლემითა და ჯორითა“.

„ხარება“ სუფევდა საქართველოში.

სწორედ დღეს იდგა უზემოესი მამულიშვილობის მწვერვალზე მამა პაატა სააკაძისა.

ახლა მას შეეძლო ცხრა ვაზი მართლა გაეხარებია ქართულ მიწაში, ცხრა სანთელი აენთო ქართულ სალოცავში, ცხრა ვაჟი მოენათლა ცხრა ქართულ ოჯახში.

მარტყოფის შემდეგ

სვიმონ-ხანი და ყარაბაღის ბეგლარბეგი მოჰამედ ყული-ხან ზიადოღლი ტფილისისაკენ მიჰქროდნენ თავპირისმტვრევით.

გიორგი სააკაძემ მიასწრო. ტფილისი აიღო და ნარიყალაში ჩაკეტულ ყიზილბაშურ ციხიონს ალყა შემოარტყა.

სვიმონ-ხანმა და მოჰამედ ყულიმ საქართველოს სატანტოს გვერდი აუქციეს, აღჯაყალამდე უკანმოუხედავად ირბინეს, აღჯაყალის ციხეში შეცვივდნენ და შიგ ჩაირახნენ. მცირე ხნის შემდეგ იქიდანაც გადაიხვეწნენ და მაზანდარანს ჩავიდნენ.

ტფილისის ციხე გადალიანდა, დრო კი აღარ ითმენდა, მტერს სულის მოთქმის სახსარი არ უნდა მისცემოდა. ამიტომ გიორგიმ ნარიყალა ალყაში ჩატოვა და თვითონ ზურაბ ერისთავის თანხლებით კახეთისაკენ გაფრინდა.

ზურაბ ერისთავს გიორგისგან აღთქმული ლელა ბატონიშვილი ეგულებოდა ფეიქარ-ხანის კარზე და ყველაზე წინ მიჰქროდა ფრთაგამოსხმული.

ფეიქარ-ხანს, მარტყოფის კატასტროფა რომ შეეტყო, ხორნაბუჯი დაეგდო და ფხოქა-გლეჯით გაქცეულიყო.

მტკვარზე წამოეწივნენ ქართველები ყიზილბაშებს.

გახელებული დაეძგერა ზურაბ ერისთავი.

ფეიქარ-ხანმა მოასწრო მტკვარზე გადასვლა. ცოლიც თან გაიტაცა — ლელა-თინათინი, და ბარდავისაკენ გაფრინდა.

მიჰყვა ზურაბ ერისთავი გაათრებით, მაგრამ ყიზილბაშ მებრძოლებს ვერც დაეწია და ვერც „თავისი საცოლე“ დააგდებინა.

სანამ ზურაბი ხელცარიელი და გულდაწყვეტილი დაბრუნდებოდა, გიორგიმ მტკვარზე ფეიქარ-ხანისაგან დატოვებული ყიზილბაშობა დაატყვევა „მრავალი ქონებით, იარაღ-მოწყობილობით, ურიცხვი მსხვილფეხა და წვრილფეხა საქონლით“.

შემობრუნდნენ და ისევ ხორნაბუჯს მოაშურეს ქართველებმა.

ქალაქი ზეიშით შეხვდა თანამოძმეთა მოსვლას.

ციხეში მდგარი ყიზილბაშური ციხიონი იარაღაყრილი გამოვიდა, ორმოცდაათი საპალნე აბრეშუმი გამოიტანა და სხვა მრავალ ქონებამოსართმეველთან ერთად მიართვა გამარჯვებულებს.

მთელი კახეთი სააკაძის ხელში მოექცა.

არ სცხრებოდა მოურავი. კახეთიდან განჯისა და ყარაბაღისაკენ გაქუსლა, იქაური ყიზილბაშები დააწიოკა და დააფორიაქა. უმრავლესობა ამოკლათა, სულიტკბილობის მოყვარულნი ტყვედ აიყვანა, გაქცეულებს არეზამდე სდია, უთვალიავი დავლა მოინადავლა და ქართლისაკენ შემოტრიალდა.

ქართლ-კახეთი სავსებით გაწმენდილიყო ყიზილბაშური სნებისაგან.

აღმოსავლეთ საქართველოს ორივე ტახტი სააკაძის ხელში

ლით საღსალამათად დახსნილი და გადარჩენილი ელოდებო-
და ღირსეულ პატრონს.

მაშ, მეფე (გინა — მეფეები) სჭირდებოდა „ორ საქარ-
თველოს“ — ქართლსა და კახეთს.

მერე, კაცმა რომ თქვას, სხვა ვინ უნდა ყოფილიყო მეფე
(გინა — „პატრონი“) ქვეყნისა, თუ არა იგი, ვინც თავისი
მჭრელი გონებით და მძლე მარჯვენით იხსნა იგივე ქვეყა-
ნა?!

ხალხი, გამორჩევით „წვრილი ერი“, კიდევაც მოითხოვდა
მეფედ სააკაძის გამოცხადებას.

გიორგიც არ სჩანდა ისეთი „მტრედი“, რომ გულწრფე-
ლად „არ სდომებოდა“ სამეფო ტახტი, მაგრამ „მტრედობას
მოკლებულ“ კაცს სწორედ გველის ჭკუა ჰქონდა: მისი მე-
ფედ გამოცხადება საქართველოს „საზეპურო ერის“ (თავა-
დობის, არისტოკრატიის) უეჭველ აჯანყებას გამოიწვევდა,
რაიც თავის მხრივ იმჟამინდელი საზოგადოებრივი აღნაგო-
ბის მქონე საქართველოს დაქცევას მოასწავებდა...

ამიტომ სააკაძემ „საერთო კეთილდღეობისათვის“ პირდა-
პირ უარი სთქვა მეფობაზე.

მეფე საქმეზარი არ არისო, ბრძანა გიორგიმ და მაშინვე
გონიოში ელჩები აფრინა და თეიმურაზს შეუთვალა: კახე-
თისა და ქართლის ტახტი, ორივე შენ გელოდება, მობრძან-
დი, დაბრძანდი, იმეფე, ქვეყანას უპატრონე და მოუარეო.

თეიმურაზი ის იყო რუსეთში წასასვლელად ემზადებო-
და, სააკაძის ელჩებმა რომ ასეთი „ცითმოვლენილი“ ამბავი
და შეთავაზება მიართვეს.

მის სიხარულს ენა ვერ იტყოდა და კალამი ვერ ასწერდა!
მაშინვე ქართლ-კახეთისკენ სამგზავრო სამზადისი ბრძა-
ნა.

მაგრამ თეიმურაზმა გონიოდან ფეხის დაძვრაც ვერ მო-
ასწრო, რომ მალულმა შათირებმა მეორე, უკვე საშიშარი და
საშფოთარი აბავი მოუბრუნინეს: ღმერთი არ გაგიწყრეს და
გონიოს ციხიდან არ გამოხვიდე, თორემ იცოდე, სააკაძეს
ცოცხალი ვერ გადაურჩებიო; შენი მოკვლა მას ტახტისაკენ
გზას უხსნის და სავსებით დასაჯერებელია, რომ სასიკვდი-
ლოდ არ დაგინდობს ეგ „თათარიო“.

ერთხანს თავზარდაცემული და შეძრწუნებული იდგა ამის მსმენელი თეიმურაზი. მერე მაინც ესა სთქვა მწარე სინანულით და გულმხურვალეობით:

„თუ მართლაცდა, უფალს ჩემი სიკვდილი ნებაეს, დაე აღსრულდეს მისი სურვილი! მე მაინც ბედნიერი ვიქნები, რაკი უკანასკნელად გავუღიმიებ მშობლიურ ცას, რომლის ქვეშ მე თვალი ამეხილა და გონი გამეხსნა!“

თქვა და წამოემართა ქართლ-კახეთისკენ თეიმურაზი.

სანამ იგი მოაღწევდა, მანამ გიორგი სააკაძემ ისევ შეუტია ტფილისის ციხეს გამგელებულმა.

ქართველებმა თაბორის მთიდან თოფების ბათქით აიღეს „დაბალი ციხე“. ნარიყალა კი ისევ მაგრობდა.

გიორგი სააკაძის ბრძანებით წყალი დაუწყვიტეს ნარიყალას.

დღე-დღეზე ციხე უნდა დაცემულიყო.

მაგრამ ისევ გამოჩნდნენ მოღალატენი „საასპარეზოდ“.

გორელი ვაჭარი გიორგი გორგიჯანაშვილი თურმე ყიზილბაშთა ციხიონის უფროსს „ძმაცაცობდა“. ყიზილბაშს გორგიჯანაშვილისთვის შემოუთვლია: „უწყლობამ ნამეტნავად შეგვაღონაო, წყლით რამე გვიღონეო“. ამდგარა ღამით გიორგი გორგიჯანაშვილი, ერთიც თავისი სანდო კაცი წაუყვანია, ნარიყალას წყალსადინარ კლდეზე გასულა, ღარები გაუწყვია და წყალი ციხის დასარწყულებლად გაუშვია.

მეორე დღეს სააკაძის მეომრებმა აღდგენილი წყალსადინარი შენიშნეს და ღარები ხელახლა აპყარეს. მაგრამ ალყაში მოქცეულებს წყურვილის საშიშროება კარგა ხნით მაინც მოეხსნათ: ყიზილბაშებს მთელი ღამის წყალდინებით ყველა ჭა, ჭურჭელი და წყალსაცავი გაეღესოთ და სარწყულები უხვად გაემარაგებინათ.

ციხიდან ყიზილბაშებს ორი კაცი გამოეპარათ და იმით აუწყეს სააკაძეს მოღალატეთა სახელები — გიორგი გორგიჯანაშვილი და გარსოა ჭანოაშვილი.

გორგიჯანაშვილის ღალატი რომ შეიტყო, მერე ეს იკითხა სააკაძემ: გარსოა ჭანოაშვილი ვინდა არისო?

ჭანოაშვილი ტფილისელი მოქალაქე გახლავთ, ისიც ყი-

ზილბაშთა ციხიონის უფროსთან ყოფილა იღუმალ გაზრახე-
ბული: როცა ციხის გარეთ რაიმე სასიკეთო და საიმედო ამ-
ბავი მოხდება, მე წითელი სამოსელით შევიმოსები და ისე
დაგენახვებითო, თუ არა და, უბრალოდ ჩაცმულს დამინახვ-
თო.

და ამნაირად, ყიზილბაშები „წითელი გარსოს“ დანახვაზე
გამხნევდებოდნენ და ძალას მოიციმდნენ, ხოლო „შავი გარ-
სოს“ გამოჩენისას ზედმიწევნით ფრთხილობდნენ და საფრ-
თხის უკუსაგდებად საგანგებოდ ემზადებოდნენ.

სააკაძის ბრძანებით შეიპყრეს მოლალატენი.

გარსოა ჭანოაშვილს თავი გააგდებინეს.

გიორგი გორგიჯანაშვილი ძელზე თავდამხედ ჩამოჰკიდეს
და ქალაქის ქუჩები ჩამოატარეს.

იმ დროს ტფილისში იმერეთის მეფის წარმოგზავნილი მო-
ციქულები იყვნენ, მათ შორის ქუთათელი ეპისკოპოსი, რო-
მელიც პირადად სცნობია გორგიჯანაშვილს (ალბათ, ქუთათი-
სის „მაღალ წრეშიც“ ჰქონდა „კავშირნი“ გორელ ვაჭარს).

ქუთათელმა სააკაძესთან იშუამდგომლა და გამოიხსნა გო-
რგიჯანაშვილი სირცხვილისგანაც და სიკვდილისგანაც.

ხოლო ნარიყალა ისევ ყიზილბაშებს რჩებოდა.

ამასობაში გონიოდან წამოსულმა თეიმურაზმაც მოატანა.
მცხეთაში შეეგებნენ ერთმანეთს თეიმურაზ მეფე და გი-
ორგი სააკაძე — ორი გმირი, ორნივე სამშობლო საქართვე-
ლოს საკეთილდღეოდ უმძიმეს ბრძოლებში გაწამებულნი და
გათეთრებულნი.

ორივეს საკუთარ სიცოცხლეზე ძვირფასი მსხვერპლი გა-
ეღო. სათაყვანო სამშობლოსათვის, ერთს — დედა, დაი და
ორი შვილი; მეორეს — შვილი, ღვთაებრივი ჭაბუკი...

მცხეთაში, სვეტიცხოვლის დიდ ლავრაში, ქართველ საე-
რო და სასულიერო „სახეპურო ერის“ წინაშე თეიმურაზი
აკურთხეს ქართლისა და კახეთის მეფედ.

თეიმურაზი „ორივ ტახტის მკერი“ შეიქნა.

აღმოსავლეთ საქართველო გაერთიანდა.

ზეიმობდა ქართველი ხალხი დიდ გამარჯვებას.

ზეიმობდა გიორგი სააკაძე, მთავარი გმირი ქართველთა

ძღვეამოსილებისა და ყველაზე დიდი მეოცნებე „ყოველი საქართველოს“ გაერთიანებისა.

მაგრამ ბედისწერა უზემოესი აღზევებისა და ზარზე-მის ტოლძალოვან საწუხარსა და საგლოველს უმზადებს ადამიანებს.

ასე იყო ახლაც, რამეთუ ჯერ ისევ ცოცხლობდა შაჰ აბასი.

ააოთეოზი პაატა სააკაძისა

მამას სიკვდილისა არ ვშინია.

მამას მხოლოდ შვილის სიკვდილისა ვშინია.

შაჰ აბასს თავზარი დასცა ჯერ მარტყოფის კატასტროფამ, უზარმაზარი ყიზილბაშური მხედრობის განადგურებამ, უპირველესი სარდლების ამოწყვეტამ და, მერე — ქართლ-კახეთის გაერთიანებამ.

თანაც, ყოველივე ეს საშინელებანი მოხდა მაშინ, როცა ერანის სახელმწიფო და მისი „ლომის“ ძალმოსილება ზეობის მწვერვალზე იდგა.

შაჰს ეგონა, ეს-ეს არის საქართველო სრულიად წავშალეო პირისაგან მიწისა და უეცრად კი წამოიშართა იგი ახალნერგად, შურისმგებლური მახვილით ხელში, წამოიშართა და მიწას განართხო სწორედ იგი, ვისაც ქართული ფუძის მოთხრა ჰქონდა გულს ამოჭრილი.

თურმე შეუძლებელია „მოკვლა საქართველოსი“, თურმე მართლა მარადიული უკვდავების სული ანთია ამ უცნაური ხალხის სხეულში — ხან მინავლებული, ხან უზემოესად გაძღავერებული.

გველი უსრიალებდა გულში შაჰ აბასს.

სასიკვდილოდ დაგულებულ საქართველოს თურმე ახალი ცხოვრება დაუწყია, ქართლი და კახეთი გაერთიანებულა და

ერთიან, „გამთლიანებულ“ ტახტზე „ყველაზე საძულველი თეიმურაზი“ დაბრძანებულა!

ყველაზე საძულველი თეიმურაზიო?!

მაგრამ გიორგი სააკაძე?!

ვინ შეედრება შაჰის გულში ახლა გიორგი სააკაძის მძულვარებას?!

შაჰ აბასის გული ყოველთვის ყოველგვარი მძულვარების მომცველი და „დამტევი“ გული იყო, მაგრამ ახლა შაჰ აბასს ათასი გულიც არ ეყოფა ცბიერი და ვერაგი გურჯის მძულვარების დასატევად!

მარტყოფი და სააკაძე! — აი, ორი უსაშინელესი და უსაზიზღრესი სიტყვა ერანის ხელმწიფის გონსარბიელში.

მარტყოფი! — თითქმის ორმოცი წელიწადი შესრულდა შაჰ აბასის გამეფებიდან და ამ ორმოცი წლის მანძილზე შაჰს ასეთი ზარალი და უბედურება არ მოსწრებიაო, გაიძახიან სპარსეთში, გაიძახიან თურქეთში, გაიძახიან ევროპაში.

საკაძე! — ასეთი მტერი საერთოდ არ მოსწრებიაო ერანის ქვეყანას, გაიძახიან აზიაში, გაიძახიან ევროპაში.

„ვფიცავარ ალლაჰს, მთელი ჩემი სამეფოს ნახევარს მივცემ, ვინც სააკაძეს ცოცხლად მომიტრევს!“ — ბლაოდა შაჰ აბასი.

.

მაგრამ სანამ გიორგი სააკაძეს „ცოცხლად მიუტრევდნენ“, მანამ შაჰს შეუძლია სიკვდილზე უარესი სასჯელი და სატიკვარი შეჰყაროს დიდების მწვერვალზე აფოფინებულ მოურავხანს.

დიახ, სიკვდილზე უარესი!

ხოლო, ადამიანისთვის მის სიკვდილზე უარესი არის მისი შვილის სიკვდილი!

.

— მოლაღატე მოურავხანის შვილი მომგვარეთ — პაატა სააკაძე! — დაიზმუვლა შაჰ აბასმა.

მოიყვანეს.

პაატა სააკაძე!

დიდი სიმშვენიერის თვალის გასწორება უჭირთ ადამიანებს.

მაგრამ შაპ აბასის თვალებს, მსგავსად გველისა, მძულვარების აფსკი ჰქონდა გადასალტული.

მის წინაშე ქართული სიმშვენიერე იდგა მთელი სისავსით და სიცხოველით.

ჭაბუკი ესე — იყო თვითონ საქართველო.

ხოლო საქართველო აუცილებლად უნდა მოეკლა შაპ-აბასს, უნდა მოეკლა და უნდა მოესრა უსაშინელესი წამებით.

.

პირჯვრის გადასახვა და მცირე ლოცვა მოასწრო ჭაბუკმა: „ღმერთო, დაიხსენ საქართველო!“

.

მარტვილობა დასრულებულიყო.

პაატა სააკაძის თავი და ტანი ცალ-ცალკე — ერთმანეთისათვის უცხო სხეულებივით ეყარა.

ტანი ჯერ ისევ თრთოდა.

თავი მშვიდად იყო, სრულიად წყნარი, მწყაზარი სახით.

ხოლო შაპ აბასს სავსებით დაშლოდა და დამეწყროდა სახე.

მას ხომ მოკვეთილი თავების გადახვა უყვარდა, მაგრამ ჭაბუკის საოცარ ხატს ვერ გაუბედა ხელის შეხება.

ბოლოს ეს ბრძანა, საფლავიდან დაძახილივით:

„ტანი ხევში ისროლეთ ყვავ-ყორანთა და ძაღლთა საჯიჯგნად, ხოლო თავი აიღეთ და მამამისს გაუგზავნეთ საქართველოში!“

.

პაატა სააკაძის გვამი ღამით ევროპელმა კათოლიკე მისიონერებმა ამოასვენეს ხევიდან და სადღაც იდუმალ ადგილას დაკრძალეს.

ხოლო თავი საქართველოში ჩამოიტანეს შაპ აბასის შათირებმა...

მამობის მთელს სიგრძეზე შვილის სიკვდილის შიში ჰზარავდა გიორგი სააკაძეს.

და, აჰა, აღსრულებულიყო!

მამას წინ ესვენა წარკვეთილი თავი შვილისა, რომელმაც

მას დაუბრუნა „ჭეშარიტი ქართველობა“ და ახლად არგუნა „ერის მხსნელისა“ და „ეროვნული გმირის“ სახელი.

„სხვად ვინმედ“ თუ „სხვად რამედ“ ქცეულიყო გიორგი სააკაძე — სისხლგამშრალი და ცრემლგაბერწებული.

დიდხანს არავის შეეძლო საამქვეყნიოდ მოებრუნებინა გვირი — საქართველოს „მომბრუნებელი“.

უმძიმესი გლოვის ზარი დასცემოდა სააკაძეთა სახლეულს.

საგლოველი იყო საყოველთაო, რამეთუ ჭაბუკის უწმინდესი სიცოცხლის გაწირვამ დაუბრუნა საქართველოს ყველაზე დიდი „უძღები შვილი“, რომელიც ყველაზე საშფოთარ ქამს ჭეშარიტ მხსნელად მოვევლინა უფსკრულში ჩაკიდებულ თავის სამშობლოს.

ერთაწმინდის ეკლესიაში დაკრძალეს წმინდანი ჭაბუკის თავი.

მალე ტფილისელმა ვაჭრებმა, ევროპელ მისიონერთა თანადგომით, იპოვნეს და წამოასვენეს პაატას გვამი სპარსეთიდან საქართველოში.

როგორც იქნა, ეღირსა განკვეთილი მარტვილის თავსა და ტანს ერთად დავანება მშობლიურ მიწაში.

და დაინთო ერთაწმინდის ეკლესიაში იმქამინდელი საქართველოს ყველაზე დიდი კერეონი.

ბედნიერი იყო ჭაბუკი:

მშობლიურ მიწაში იწვა,

ჯალათის ხელით ნაწამები სხეული აღარ სტკიოდა,

„ყოველი საქართველო“ იყო მისი ჭირისუფალი,

მისი სახელი ეროვნული გმირობისა და მამულიშვილობის ნიშანსვეტად იქცა,

მისი ღვთაებრივი სახე სალოცავ ხატად დაისვენა მშობელმა ხალხმა.

გლოვად და ლოცვად იდგა საქართველო.

მაგრამ გლოვა-ლოცვისთვის დიდ დროს ვერ დაირჩინდა ქართველი ხალხი.

დღე-დღეზე შაპ აბასის ახალი, შურისმგებლური ცეცხლით გატენილი შემოსევა იყო მოსალოდნელი.

დღე და ღამე იჭედებოდა საჭურველი.

დღე და ღამე თვალმოუხუჭავად და მუხლჩაუქრეფლად იღვწოდა სააკაძე.

უწინარეს ყოვლისა მთავარი ეს იყო, — რაიმე „შინა-გას-ქდომა“ არ ჩამოვარდნილიყო ქართველთა შორის.

გიორგიმ შენიშნა: პირჩაღრუბლული იმზირებოდა და იღრინებოდა ზურაბ ერისთავი — „მეორე გმირი“ უკვე მომხდარი დიდი სამამულო ეპოპეისა.

ძნელი არ იყო ზურაბ ერისთავის გულჯავრიანობის მიზეზის გარკვევა. მისი ცოლი შაპ აბასმა გაამაჰმადიანა და თავისი ცოლების მსახურად განაწესა. გიორგი სააკაძის აღთქმა ზურაბისა და ლელა ბატონიშვილს „სანატრელი ქორწინებისა“ არ შესრულდა, რადგან ვერ იქნა და ვერ დააგდებინეს ფეიქარ-ხანს ლელა-თინათინი.

ძალიან სახიფათო კი იყო პატივმოყვარე და მერყევი ბუნების არაგველი მბრძანებლის იმედგაცრუება.

დატრიალდა გიორგი. ზურაბი ადვილად დაარწმუნა იმაში, რომ აწ გარდასულ ლუარსაბ ბაგრატიონთან დამოყვრებას ისევ ქართლ-კახეთის „ორივე ტახტის მკერთან“ დამოყვრება სჯობდა.

თეიმურაზ მეფეს ჰყავდა ასული — სახელად დარეჯანი. ჩადგა სააკაძე მეფესა და ერისთავს შორის შუამავლად.

დედოფალი ზორეშანი უარს ამბობდა ზურაბისათვის ქალის მიცემაზე. „მაგან ამოაგდო ჩემი სამშობლო ქართლი“, გაიძახოდა ლუარსაბ მეფის დაი. მაგრამ მაინც გასჭრა დიდი მოურავის „პოლიტიკურმა მაჭანკლობამ“ — ზურაბ ერისთავმა ცოლად შეირთო თეიმურაზ მეფის ასული დარეჯანი.

საქმე თითქოს კარგად მიდიოდა.

თეიმურაზი მეფობდა.

სააკაძე განაგებდა.

თავადები მოურავის პირველობას თითქოს შერიგებოდნენ. „თვით ზურაბ ერისთავი და ვინცავენი დიდი კაცნი იყვნენ ქართლისანი დიდს მოურავს ქეშიკში უწვებოდნენ და ყმურად მონებდნენ მას“.

გიორგი სააკაძემ ერანთან გარდუვალ ომში ოსმალეთის მომხრობაც სცადა.

ამ დროს ოსმალეთის დიდი ვეზირი დ აღმოსავლეთის ჯარების სერასქერი ჰაფიზ-ფაშა დიარბექირში იდგა და ბაღდადს სალაშქროდ ემზადებოდა. გიორგიმ ელჩობა შეადგინა, სათავეში თავისი შვილი იორამი ჩაუყენა და ჰაფიზ-ფაშასთან გაგზავნა.

მოურავის ელჩებს თურქთა მისართმეველად მიჰქონდათ საქართველოში ამოწყვეტილ ყიზილბაშ სარდალთა წარკვეთილი თავები (მათ შორის ყარჩიხა-ხანისა და იუსუფ-ხანისა), მხარგაკრული ტყვეები, ნადავლად წამოღებული სამასი სპარსული დროშა, საომარი საყვირებუ და ზურნაიკები.

ქართველი ელჩები 1625 წლის 3 ივლისს ეწვივნენ ჰაფიზ-ფაშას.

ოსმალებმა სიამოვნებით მოიხილეს ყიზილბაშ სარდალთა თავები — ოთხი თვის წინათ წარკვეთილნი, მარილში გამოყვანილნი, მაგრამ მაინც ხრწნამორეულნი. მაღლიერებით ჩაიბარეს ტყვეები და ლომის გერბიანი დროშები.

იორამ სააკაძემ მამის წერილი გადასცა დიდ ვეზირს. გიორგი ატყობინებდა ჰაფიზ-ფაშას: ოსმალთა სამეფო გვარეულობას ჯერ ასეთი მოხერხებული შემთხვევა არ მოსწრებია ერანთან არგანიშის გასწორებისაო; ამიტომ ყოველგვარი დაცოცნების გარეშე ისწრაფეთ და თქვენის ჯარებით გამოემართეთ განჯა-ყარაბაღისა და შირვანისაკენ; მისვლისთანავე ყველა ეს ქვეყნები უბრძოლველად დაგემორჩილებიან; ამის მერე სულ იოლადა შეძლებთ არდებილისა და მეშჰედის აღებას და ყიზილბაშთა ქვეყნის სავსებით გადაწვას; თანაც იმდენ სიმდიდრეს მოინადავლებთ, ქვეყნის დასასრულამდე სალაპარაკო და საღეჭსე გახდებოთ.

ჰაფიზ-ფაშას არც დიდი ნიჭი ჰქონდა და არც დიდი გაბე-

დულება. ვერ იქნა და სააკაძის შემონათვალს გადაჭრილი პასუხი „ვერ მოუხერხა“.

ისტორიკოსი იბრაჰიმ ფეჩევი მაშინ მრჩევლად ახლდა ჰაფიზ-ფაშას.

ასეთი მოხერხებული შემთხვევა მართლაც აღარასოდეს ჩაგვივარდება ხელშიო, უთხრა იბრაჰიმმა ჰაფიზს, ამიტომ სააკაძეს დაუჭერე და შირვან-აზერბაიჯანისკენ გაუტიე ჯარებითო.

— ბედნიერებით მოსილმა ფადიშაჰმა ჩვენ ბაღდადის დაპყრობა გვიბრძანა და არა საქართველოსა და შირვანისკენ გალაშქრება, — თქვა ჰაფიზ-ფაშამ.

იბრაჰიმ ფეჩევი მაინც არ შეეპუა და მაშინვე ეს უთხრა დიდ ვეზირს:

— ბედნიერებით მოსილმა ჩვენმა ფადიშაჰმა რომ ეს იცოდეს — დიდი მოურავი ჩვენს მხარეზე გადმოსულაო — მაშინვე სწორედ შირვანისკენ გაგაგზავნიდათ, ანდა შეიძლება თვითონ ჩაუდგეს სათავეში ამიერკავკასიაში ლაშქრობას. დარწმუნებული ვარ, თუ ამ შემთხვევას ხელიდან გავუშვებთ, ქვეყნის დასასრულამდე გვექნება სანანებლად.

— თქვენ ჯერ კიდევ არ გცოდნიათ ჩემი ხასიათი. მე ვიდრე რომელიმე წამოწყების წარმატებით შესრულებაში წინასწარ არ დაერწმუნდები, მისკენ ერთ ნაბიჯსაც არ გადავდგამ, — მოქნარებით თქვა ფაშამ.

— განა, დიდებულმა სულთნებმა, გინა პატიოსანმა ვეზირებმა, რომელთაც ამოდენა საღვთო ომები და დაპყრობანი ეგზომ ძლევამოსილებით ჩაუტარებიათ, წინასწარ იცოდნენ, რომ უეჭველად გაიმარჯვებდნენ? ომში გამგზავრებისას სარდალი სიმამაცეს და ალლაჰს უნდა მიენდოს. ან ახლა, ბაღდადს რომ ჩახვალთ, ნამდვილად იცით, რომ დაიპყრობთ და გაიმარჯვებთ? — არ ეშვებოდა იბრაჰიმ ფეჩევი.

— მტკიცედ მწამს და ეჭვიც არ მეპარება, — ისე თქვა სერასქერმა, რომ მოსაუბრე მიმხვდარიყო, ამ საკითხზე ნულარ ვილაპარაკებთო.

მთავარსარდალთან ამოი საუბრის შემდგომ იბრაჰიმ ფეჩევი იანიჩართა მეთაურთან — ხუსრევი-აღასთან მივიდა.

(მკითხველმა კარგად დაიმახსოვროს ხუსრევ-ალას სახელი, რამეთუ იგი ამ ამბებიდან ოთხი წლის შემდეგ დიდი ქართული ტრაგედიის ავტორი შეიქნება).

ახლა ხუსრევ-ალას შეუჩნდა იბრაჰიმ ფეჩევი, — იქნებ უნ გამოეხმაურო გიორგი სააკაძის მოწოდებას და გაილაშქრო შირვანისკენო.

ხუსრევ-ალამ ყბა ცბიერად მოიქცია და თქვა: ჩვენ მთავარსარდლის ხელქვეითები ვართ და, რასაც ის გვიბრძანებს, ჩვენც იმის აღმსრულებლები ვახლავართო.

ფეჩევიმ იფიქრა, ხუსრევს ჰაფიზის გამარჯვება და აღხევება არ ეპრიანებაო, და სულ მიაწება თავი სარდლების წაქეზებას ამიერკავკასიაში სალაშქროდ.

.....
 ისევ დგას 1625 წელი.

წელი — ქართველთა ძალმოსილებისა, წელი — რუმენისა, სიხარულისა, სამომავლო იმედისა და უკვდავებისა.

მაგრამ ვაითუ წლის ბოლომდეც ვერ გაატანოს საუკუნოვანი წყვილიადით გატენილ ცისგვამში შემოჭრილმა სინათლის სხივმა!

კიდევ მოჰქრის საქართველოსკენ ვეებერთელა ურდო — საუკეთესო, ანარჩევი მხედრობა სპარსეთისა!

მოჰქრის ურდო და მოაქვს შაჰ აბასის „მსოფლიო რინხვა“!

ან ახლა უნდა მოისპოს საქართველო, ან ვერასოდეს ვაი შენ, გურჯისტანი!

ურდოს მოუძღვის ის ზ-ხ ან ყო რ ჩ ი ბ ა შ ი, სიძე შაჰ-აბასისა.

თანაშემწე სარდლებად დანიშნული არიან: შირვანის ბეგლარბეგი ყ ა ზ ა ხ-ხ ა ნ ჩ ე რ ქ ე შ ი, ერევნის ბეგლარბეგი ა მ ი რ გ უ ნ ე-ხ ა ნ ი („ყვირთელი ავაზა“), აზერბაიჯანის ბეგლარბეგი შ ა ჰ ბ ე ნ დ ე-ხ ა ნ ი და... ხ ო ს რ ო-მ ი რ ზ ა დავითის ძე, ქართველი ბატონიშვილი, ისფაჰანის ტარულა, შაჰის კარზე გიორგი სააკაძის წყალობით დაწინაურებული და აღხევებული.

(ამ გათათრებულმა ქართველმა უნდა გაუმართლოს შაჰ აბასს, — გიორგი სააკაძემ არ გაუმართლა, ხოსრო-მირზამ უნდა გაუმართლოს!)...

ისევ მიეღო შაჰ აბასის ბრძანება დაუდხან უწდილაძეს —
საქართველოში სალაშქროდ აღიკაზმე შეწის მხედრობითო.

ისევ უარი შეეთვალა უწდილაძეს.

ურდო კი მოჰქროდა საქართველოსკენ.

მოჰქროდა და მოჰქროდა „მსოფლიო მრისხანება“ შაჰ აბასისა: ან ახლა უნდა აღიხოცოს პირისაგან მიწისა საქართველო,
ან ვერასოდეს!

ვაი შენ, გურჯისტანი!

მარაბაღა — აკოთეოზი უილალი გმირობისა

ვითარ დაეცნეს ძლიერნი და დაიღწნეს
საქურველნი ბრძოლისანი.

მე ფეთა მეორე წიგნი, I, 27.

ხმალო და მხარო გასჭერი,
გულო, ნუ შეგვიშინდები,
სისხლისა ნატალახევსა,
ფეხო, ნუ მოგვიცურდები.
ხ ა ლ ხ უ რ ი

ივნისის დამლევს მოვიდნენ „დიდითა მძლავრობითა“ და
დაიბანაკეს ალგეთზე, სოფელ მარაბდიხ ახლოს.

ისევ ალგეთი!

საევანე მრავალი დიდი სამამულო ხმალთავეთებისა!

საევანე ცრემლთა სიხარულისა და ცრემლთა სინანულისა!
ალგეთის მკერდზე სწერია „დიდი ფარცხისი“ — 1074
წელი, ქართველები მეფე გიორგი მეორის სარდლობით ამარ-
ცხებენ თურქ-სელჩუკთა ურდოს.

ალგეთის მკერდს ამშვენებს საარაკო გმირობანი დავით
აღმაშენებლისა და გიორგი ჭყონდიდელისა.

ალგეთის მკერდს ამახიჩვებს მხარგრძელთა სამარცხვინო
რენეგატობა მონღოლთა მბრძანელობის დროისა.

ალგეთის მკერდზე აღბეჭდილა დიდი მამულიშვილობა გიორგი ბრწყინვალისა, მონღოლთა უღლის დამამხობელისა.

ალგეთის მკერდს ესალბუნება გმირობა და მოწამებრივი აღსასრული ლუარსაბ დიდისა.

ალგეთის მკერდს შხამავს „მამულიშვილური დალატი“ ყორღანაშვილისა.

ალგეთის მკერდზე კიანთობენ საოცარი გმირობანი სვიმონ დიდისა.

ალგეთის მკერდზე დაიბადა ლექსი-სიმღერა ქართველი კაცის მარადიული რწმენისა, იმედისა და უკვდავებისა — „კიდევაც დაიზრდებიან...“.

მაშ, ისევ ალგეთზე მოსულა მტერი, მარაბდის ველზე დაუბანაკებია და დაუსაძოვრებია.

1625 წელი, იენისის უკანასკნელი დღე.

პაპანაქება სიცხე.

ორმოცდაათი ათასამდე მკრ.მარს მოითვლის ყიზილბაშია ურდო.

ჯერ კიდევ არ სჩანს თავის ზხედრობით აზერბაიჯანის ბეგლარბეგი შაჰბენდე-ხანი...

.

ქართველებიც მოსულან, შულ — ოცი ათასი კაცი.
კოჯრის მთაზე დგანან.

ახლა საომარ ბკობად დამსხდარან წინამძღოლნი.
საერონი:

თეიმურაზ მეფე,
გიორგი სააკაძე,
ზურაბ არაგვის ერისთავი,
მისი ძმა დავით ერისთავი,

ბარათა ბარათაშვილი — მეწინავე სადროშოს, ქვემო ქართლის, სარდალი,

იასე ქსნის ერისთავი (სიძე გიორგი სააკაძისა),
თეიმურაზ მუხრან-ბატონი (ესეც სიძე გიორგი სააკაძისა),
ძმა მისი ქაიხოსრო მუხრან-ბატონი,
აღათგან ხერხეულიძე,
ბაადურ ციციშვილი,

დავით ჯანდიერ-ასლანიშვილი — სახელოვანი გმირი კახეთისა,

მანუჩარ ათაბაგი (იგი თურქებთან შეტაკებისას უკუქცეულა, ახალციხიდან ახალდაბას გადმოსულა და, როგორც კი ყიზილბაშთა შემოსევის ამბავი შეუტყვია, მაშინვე სამასი მესხით წამოსულა მოძმეთა მოსაშველებლად).

სასულიერონი:

მროველი,

ალავერდელი,

რუსთველი,

ხარჭაშნელი.

თათბირად დამსხდარან სარდალნი — საერონი და სასულიერონი.

თუმცა ბევრი სათათბირო და საცილობელი რა უნდა ყოფილიყო! უმარტივესი ჭეშმარიტება გახლავთ: მცირე ჯარს რიცხვმრავალ მტერთან გაშლილ ველზე შერკინება უმრავლეს წილად მარცხს არგუნებს, ხოლო მთაგორიან ადგილებში შეტაკებისას დიდი ლაშქარი მთელის ძალებით ვერ გაიშლება და მისი მოპირდაპირე მცირერიცხოვანი ჯარი ბრძოლის მოგების მეტ შანსებს ინარჩუნებს. ამასთან, რაკი სიცხიანი ამინდები იდგა, ბუნებრივად უნდა ეფიქრათ, რომ პაპანაჭებით გათანგულ მარაბდის ველზე მზის გულს შეზრდილი ერანელები უფრო ძალმოსილად იომებდნენ, ვიდრე „უფრო ჩრდილოელი“ ქართველები.

მაშ, ქართველები კოჯორ-ტაბახმელას მთებში უნდა დარჩენილიყვნენ და აქვე დალოდებოდნენ მტრის შემოტევას.

ეს სავსებით უბრალო, „შეუიარაღებელი თვალით“ დანახული, საღი და ნათელი მოსაზრება წარმოადგინა გიორგი სააკაძემ.

განსაკუთრებით, ქვეითად მოსული ჩვენი გლეხკაცობა ვერ გაუძლებს სიცხიან მინდორზე ერანულ მხედრობასთან რკენას და სულ ერთიანად დაგვეღუბებაო ამბობდა გიორგი.

ბაადურ ციციშვილმა მაშინვე აუბა მხარი მოურავის განასახს.

„სიცხით ცეცხლმოკიდებულ მიწაზე ქვეითად მბრძოლი

გლებობა მართლაც ამოგვიწყდება, ხოლო, თუ ამოსწყდენ გლები კაცი, საქართველოც დაძაბუნდა“ — დაასკვნა ციციშვილმა.

მაგრამ გიორგი სააკაძე და ბაადურ ციციშვილი მარტო აღმოჩნდნენ თავიანთი „სალი აზრებით“.

ყველა დანარჩენმა სარდალმა შეტევებზე გადასვლა მოითხოვა — მომავალ დღეს, დილით ადრე, მარაბდის ველზე.

ზურაბ ერისთავმა თქვა: გიორგის რჩევა კარგია, მაგრამ ჩვენ რა ვიცით, რომ მტერი მაინცდამაინც აქეთ, ჩვენი საფარისკენ წამოვა და სხვა გზას არ აირჩევსო. ამიტომ სჯობია დავასწროთ და პირდაპირ დავეცეთ იქ, სადაც ახლა დგასო.

ბარათა ბარათაშვილმა თქვა: მტრის დაცდა და ლოდინი ჯარებს დაგვიშლის, ლაშქარი დაგვეფანტება; ისედაც ყიზილბაშთა მხედრობა ქვემო ქართლის მიწაზე დგას, საბარათიანოში, აქაურობას ავერანებს და ამას ჩვენ დიდხანს ველარ მოვითმენთ. ამიტომ ხვალ დილითვე უნდა დავეცეთ მტერსო (ბარათას „საკუთარი სატკივარიც“ სტკიოდა: მას ყაფლან ბარათაშვილის მამა-ბიძები ამოეწყვიტა და მათი მამულები მიეტაცნა. ყაფლანს ერანში გაესწრო და ახლა იგი ყიზილბაშთა ლაშქარს მოჰყოლოდა მეგზურად და თავისიანთა სისხლის საღვრელად).

ძმებმა თეიმურაზ და ქაიხოსრო მუხრან-ბატონებმა თქვეს: დიდხანს დგომა არც ჩვენ შეგვიძლიაო. ამიტომ, თუ დაგიწყიათ ბრძოლა, ხომ კარგი, თუ არა და ჩვენის ლაშქრით ავიყრებით და სულ გაგეცლებითო!

იგივეს ამბობდა იასე ქსნის ერისთავი.

კახელმა სარდლებმაც თქვეს: თათრები ბარე ორჯერ გაგვილახავს და კიდევაც გავლახავთო; ამიტომ ხვალ სისხამზე დავიწყოთ, დილაგრილოზე ვიომოთ და სანამ ასიცხდებოდეს მანამ მოვრჩეთო.

ბოლოს მანუჩარ ათაბაგს სთხოვეს თათბირი მოწიწებით და მანუჩარმაც თქვა დინჯად: ბრძოლის საბრუნავს ბედისწერა და ღმერთი აბრუნებს, უმეტეს წილად მაინც ის მხარე გაიმარჯვებს, რომელიც ფიცხლავ, მოულოდნელად დაასწრებს დარტყმას! ამიტომ მეც ვფიქრობ, ხვალ უთენია დავესხათ მტერსო.

ჯარიც საომარი ცეცხლით ანთებულებო. გამორჩევით, ახალგაზრდობა ველარ იჭერდა თავს. იარაღს აწვალეზდნენ, „კბილებს იმსხვერვედნენ“ და გაიძახოდნენ: ჩვენ მტრის მოსვლას რად ველოდებით, ან სიმაგრეში ჩასაფრება ვის ეკადრება, თქვენ მიგვიძეხით და მაგვიშვით და, მეფის მზეს ვფიცავთ, დაგანახებთ ყიზილბაშთა სისხლისა და ცრემლის დენასო!

გადაწყდა: მთიდან დაშვება და გაშლილ ველზე ბრძოლის გამართვა.

ეს იყო პირველი შეცდომა.

გაუსწორებელი შეცდომა, რამეთუ გადაწყვიტეს სწორედ ის, რაიც სწყუროდა და ენატრებოდა თვითონ მტერს.

ახლა მთავარსარდლობის საკითხიც დადგა.

თეიმურაზ მეფეს არც სარდლის ნიჭი აკლდა და არც ჯარისკაცული შემმართველობა, მაგრამ გიორგი სააკაძე — იმჟამინდელი „უპირველესი გენერალი“ — იქ იყო და...

ერთი სიტყვით, ასე გადაწყვიტეს: მთავარსარდლობა მიანდვეს მეფე-თეიმურაზს და არა გიორგი სააკაძეს.

ესეც მეორე შეცდომა.

გაუსწორებელი შეცდომა, რამეთუ ყიზილბაშებს თეიმურაზ მეფისა დიახაც ეფიქრებოდათ, მაგრამ გიორგი სააკაძისა პირდაპირ ცხოველური შიში და ძრწოლა ჰქონდათ.

ერთი სიტყვით, ქართველმა თავკაცებმა ყველაფერი ისე „გააწყვეს“, როგორადაც კარის ზღურბლზე ფეხმოდგმულ მტერს მოესურვებოდა და მოენატრებოდა.

თეიმურაზ მეფემ წინასწარ მზვერავი რაზმი გაგზავნა დავით ჯანდიერისა და ალათგან ხერხეულიძის სარდლობით. ორივეს ყიზილბაშებთან ბრძოლაში თითო თვალი დაჰკარგვოდა — დავითსაც და ალათგანსაც. ჯარში ზოგს ეცინებოდა, ზოგსაც ეფიქრებოდა მეფის ამნაირი გადაწყვეტილება — ბრძოლის წინარე ეამს რაღა მაინცდამაინც უთვალო სარდლები დანიშნა მტრის „სათვალთვალოდო“!..

ლამე მომძლავრდა.

უკანმოუბრუნებლად მიგორავდა 30 ივნისი 1625 წლისა. ქართველთა ლაშქარი ზიარებად იდგა.

ეპისკოპოსნი — მროველი, ალავერდელი, რუსთველი, ხარჭაშნელი — და მრავალი მღვდელი და ბერი-ფიქოსანი იარაღ-ასხმული დამდგარიყო ერისკაც მამულიშვილთა გვერდით.

მეფე მიუახლოვდა რუისის ეპისკოპოსს — მროველს, დომენტი ავალიშვილს, და სთხოვა ზიარება და დალოცვა ჭარისა.

გიორგი სააკაძეს გაეხარდა, მისი თანამოაზრე და თანამოსაგრე ეპისკოპოსი რომ დალოცავდა და აზიარებდა ლაშქარს ბრძოლის წინ.

მროველმა მეფეს მდაბლად დაუქრა თავი, ჭვარისმტვირთველს ჭვარის გამოსვენება უბრძანა და თვითონაც წინ წამოვიდა იარაღასხმული.

ყველას ეუცნაურა საომრად შეჭურვილი სამღვდელოსაგან ზიარება.

თეიმურაზმა იგერშა საერთო „უხერხულობა“ და მაშინვე ეს უთხრა მროველს:

„უკეთუ აპირებ აღიღო ხმალი საბრძოლველად, მაშინ უბრძანე, რამეთუ გვაზიაროს სხვამან სამღვდელომან ხოლო უკეთუ ხმალს შემოიხსნი, გვირჩევნია შენ გვაზიარო“.

ან ერთი, ან მეორეო, ეუბნებოდა თეიმურაზი დომენტის, ან ბრძოლაში მონაწილეობაზე აიღე ხელი ან ზიარებაზეო.

მაგრამ მროველმა არც ერთის დათმობა მოისურვა, არც მეორისა. მან ჭერ თვალი მოავლო ყოველ სამღვდელოს, დიდსა და მცირეს მაღალდაბლობით — ეპისკოპოსიდან ვიდრე უბრალო მორჩილ-მოწესემდე.

ყველანი იარაღში ჩამსხდარიყვნენ მდუმარენი, ყოველ მათგანს მაზიარებელი მღვდელობა კი არა, ბრძოლის ველზე თავდადებული მამულიშვილობა აერჩია საკუთარი სიცოცხლის წილად.

სახეზე ნათელი დაეფინა მროველს. ხმლის ვადაზე ხელი დაიღო და ძლიერი, ზახიანი ხმით მიმართა ერსა და ბერს:

— ქართველნო, შვილნო და ძმანო! იცოდეთ ყველამ, — მე მახვილს ვიღებ არა ჩემი პირადული წადნიერების საკეთილდღეოდ, არამედ ჩვენი სამშობლო საქართველოს დასაცავად და მტერთა მისთა სისხლის საღვრელად. ამიტომ ჭერ არს სწორედ მე ვაზიარო ქართველი გმირნი და მამულიშვილნი,

რამეთუ მათთან ერთად მეც მზადა ვარ დავათხოო საკუთარი სისხლი ქართველობისა და ქრისტიანობის გადასარჩენად! ალტაცებამ მოიცივა ლაშქარი.

„მრთველმა გვაზიაროსო!“ — იგრილა ყველამ ერთბაშად. აზიარა და დალოცა სალაშქროდ შემართული ქართული მხედრობა რუისელმა სულიერმა მამამ.

ჯვარ გადასახა — ჯვარით და ხმლით.

ყოველ ქართველს ზიარებად მისცა ქართული პური და ქართული ღვინო, ვითარცა ხორცი და სისხლი სამშობლო საქართველოსი.

დალოცა დროშა საქართველოსი, — ნაშთი-ნაფლეთი ერთ დროს ცისგვამში მძლავრად მქროლავი „გორგასლიან-დავითიან-თამარიანისა“.

მედროშე აღმოჩნდა მტრის საზვერადად წასული ალათვამ ხერხეულიძის ძმა.

ალამდარ ხერხეულიძეს კიდევ შვიდი ვაჟკაცი უდგა მხარ-მიჯრით.

ისინიც მისი ძმები აღმოჩნდნენ.

დედისგან ყოფილან დალოცვილნი და შეგონებულნი: საქართველოს დროშა არ დასცეკო ქართულ მიწაზეო; თუ მეწონავე მედროშე ხერხეულიძე მკვდარი დაეცეს, მომდევნო ძმამ აიტაცოს დროშა, თუ ამასაც ბედმა უმუხთლოს, მერე მესამემ... და ასე მანამ, სანამ უკანასკნელი ხერხეულიძე დაეცემოდესო. ამასობაში მტერიც ამოწყდება და ქართული დროშაც დაუხრელად იფრიალებს ქართული ცის ქვეშ!..

მაშ, ცხრა ძმა ხერხეულიძე გამოდის მამულისათვის სისხლის საღვრელად; სულ ერთია, ვისი სისხლიც დაიღვრება — ხერხეულიძეთა, თუ ხერხეულიძის მომტერე ყიზილბაშთა — ოღონდ კი საქართველო გადარჩეს!

ცხრა ძმა ხერხეულიძე!

იქ კიდევ ცხრა მაჩაბელი ჩამდგარა ერთიან, ჩაკირულ კედლად.

იქ კიდევ — შვიდი ჩოლოყაშვილი.

ღმერთო, ამრავლე — ცხრა-ცხრა, შვიდ-შვიდი, არანაკლები!..

• • • • •

ლამე განზოგადდა.

კოჭრის მთებიდან ეშვება ქართველთა მხედრობა.

მიდიან „მხიარულად და თამამად“.

კახელთა რაზმებში ხუმრობენ ბიჭები: მივალთ, მივდივართ იქ, სადაც მაკე ფურები გველოდებიანო.

გზაზე ჯანდიერისა და ხერხეულიძის მწვერავებმა დახოცილი ყიზილბაშები შემოაგებეს. ისა-ხან ყორჩიბაშის მსტოვრები ყოფილან — ქართველთა დასაზვერად წამოსულნი. ქართველ მწვერავებს გადაპყრიდნენ და ზედ შეჰკვდომოდნენ.

ჯანდიერი „იმუქრებოდა“: სადაცაა გათენდება და ისწრაფეთ, თორემ ჩვენ აღარც დაგელოდებით, ისე შევებმებით მტერსო.

ფეხი აიჩქარეს.

ფერდობი ჩაითავეს, მინდორში ფეხი ჩადგეს და ვარსკვლავებიც შეადნენ ზეცას.

გათენებულიყო 1 ივლისი 1625 წლისა.

დღე — სახელოვანი მ ა რ ა ბ დ ი ს ბ რ ძ ო ლ ი ს ა.

სახელოვანი, თუ საბედისწერო?!

თუ ორივე ერთად — სახელოვანიც, საბედისწეროც?!

ლამის გამსკდარიყო მოსარკული ცა.

უკვე ჩანავლებული ცისკრისვარსკვლავი უსაშველო სიციხით და ლუღით ემუქრებოდა საომარ თალბიონს.

ამიტომ ღროზე, მზის განზოგებამდე და გამძვინვარებამდე უნდა მოხდეს, რაც მოსახდენია!..

თეიმურაზმა ლაშქარი მოუმკალ ყანაში შეიყვანა და მცირე ხნით მუხლი ჩააკრეფინა.

მტრის ბანაკი გამოიკვეთა მოძალეებული სინათლის ჩქერზე.

ხშირი, კუნაპეტი ტყე-მადნარივით ჩაგუბებულიყო ყიზილბაშური ურდო.

— უჰ, რამდენი არიან?! — ამოიგმინა ვილაცამ.

— ჰო, სიმრავლე გვარტომობით მოსდგამთ მაგ წყეულებს! — შეაგება მეორემ.

— ბევრი არიან? მერე რა მოხდა! მათ შორის არც ერთი არ არის თქვენისთანა ვაჟაკი! — ეს სააკაძის ხმა უნდა ყოფილიყო.

ეტყობოდა, ერანელთა სარდლობა დარწმუნებული ყოფილა, ბრძოლა ამ დღეს რომ მოხდებოდა, ქართველები რომ „ერანელთა სასურველს“ მოისურვებდნენ და საომრად სწორედ მარაბდის ველზე ჩამოვიდოდნენ.

ამიტომ საომრადაც დიდის გულმოდგინებით მომზადებულან.

სანგრები გაუთხრიათ.

სანგრებს უკან, მიწაყრილებზე — ზარბაზნები ჩაულაგებიათ.

ზარბაზნების შემდგომ — თორმეტი ათასი მეთოფე ჩარჩეგებულყო ოთხ „ტერასად“: პირველი ტერასა — ცალ მუხლზე ჩაჩოქილნი, მეორე — ფეხზე მდგარნი, მესამე — ცხენებზე ამხედრებულნი, მეოთხე — კიდევ მალა, აქლემებზე აღმჯდარნი.

თოფიანი ათასეულების სარდლად იდგა ამირგუენე-ხანი, სიმამაცისთვის „სარუ ასლანად“ (ყვითელ ჯიქად) წოდებულნი.

ყიზილბაშური ურდოს შუაგულში რჩეული მხედრობით ჩამდგარიყო თვითონ მთავარსარდალი — ისა-ხან ყორჩიბაში. დანარჩენი ჯარები ფლანგებზე იდგა ჩატბორილი და ჩაგუბებული.

მარჯვენა ფლანგის სარდლად — ხოსრო-მირზა, გათათრებული ქართველი, ხოლო მემარცხენე სარდლად — ყაზახ-ხან ჩერქეზი.

არსად ჩანს აზერბაიჯანის ბეგლარბეგი შაჰბენდე-ხანი და მისი მხედრობა...

თეიმურაზ მეფემ ლაშქარი საომრად გაამზადა.

წინ ცხენოსნები დააყენა, უკან — ქვეითი ჯარი.

(არ ჩანს — რომელ სარდალს რომელი ადგილი ეჭირა).

ომის ღმერთმა ხელში აიღო ბრძოლის სასწორი: ქართველთა პინაკზე — 20 000, სპარსელთა პინაკზე ჯერჯერობით — 50 000...

შეტევა ქართველებმა დაიწყეს.

სათოფე მანძილამდე ნელი, წყობილი ნაბიჯით იარეს, სა-

თოფეზე ფარ-შუბი გაიმართეს და ჰენეზით გაფრინდნენ გამგელებულნი.

თორმეტი ათასმა სპარსულმა თოფმა და ხარბაზანმა გულ-გამგმირავი გრიალითა და მეხთა ტეხით ლამის ერთმანეთს შეაღწეა მიწა და ზეცა.

ნათოფარ-ნამეხარმა კვამლმა დააბნელა მტერთაშორისი თვალსარბიელი.

წუთით შედედდა ქართველთა იერიში.

პირველი სისხლიც ქართული დაქცეულიყო მარაბდის ყანებში.

წუთში კვამლიც გათხელდა და ისევ მოსხლიტეს ცხენება ქართველებმა.

მძლავრი ყიყინით ეკვეთნენ და შუბის ძგერებით შეანგრიეს სპარსელთა მეწინავენი.

„და შეიქნა შუბთა ძგერება, ხმალთა და ლახტთა მუზარადზედ ხეთქინება“.

ქართველთა ძღვევამოსილებით დაქანდა ბრძოლის სასწორი მეომარი ღვთაების ხელში.

ეტევებოდნენ ქართველები „ერთბირობით, გულსრულად, ჭავრიანად“, „ჰხოცდნენ, ჰლეწავდნენ, ჩამოჰყრიდნენ“.

აბლავლდა, აღმუვლდა, აღრჭიალდა მარაბდის ველი.

„ქრისტე!.. და საქართველო!“

„ალლაჰ, ილალლაჰ!“

მზე შუბის ტარზე წამოვიდა, სისხლიანი შუბების სროლით.

ქართველებმა გააღმასებული ხმალთაკვეთებით სრულიად აჭაფეს „ყვითელი ჯიქის“ მეწინავე-მეთოფე ათასეულნი და „გახურებული ხოცვით შეიჭრნენ ცხენოსანთა და აქლემოსანთა „ტერასებში“.

„ჰკა მაგას!.. დაჰკა!.. მიდი, მივეშენეთ!.. ჩვენ გავიმარჯვებთ, რამეთუ ჩვენთან არს ღმერთი! ქრისტე და საქართველო!“

„ალლაჰ, ილალლაჰ!“

ამირგუნე-ხანის თორმეტი ათასი მეთოფე-მეომარი უკვე აღარ იყო თორმეტი ათასი.

დარეცილიყო, დანგრეულიყო, დაფანტულიყო და გაქცეულიყო ყიზილბაშთა წინა ლაშქარი.

ამირგუნე-ხანს მიუხდა მანუჩარ ათაბაგი.

„ყაენის სიცოცხლეს გაფიცებ, იქნება მიცნო მანუჩარ ათაბაგი!“ — შეუძახა მესხთა მთავარმა.

ღიახაც იცნობდა „ყვეთელი ჭიჭი“ თავის გაზრდილს.

ცხენდაცხენ ეკვეთნენ ერთურთს.

გამზრდელის ხმალი აისხლიტა გაზრდილმა.

თვითონ გადაჰკრა, „თავსა თაჯიანსა“ მანუჩარმა.

შვილს მამის მკლავი გამოჰყოლოდა (გაიხსენეთ წინასწრობილად მონათხრობი — როგორ გააპო თავიდან ჭიპამდე ხმლის დარტყმით თურქი მანუჩარის მამამ — მანუჩარ-მუსტაფამ)

და თავგაპობილი გადმოეშვა ცხენიდან „ყვეთელი ჭიჭი“. მაინც აღმართა მეორედ ხმალი ათაბაგმა.

ქვევიდან დაასწრო ამოძახილი ძირს დაცემულმა:

„ნამაქაფარმი*, რისთვის მკლავ, აკი ჩემი გაზრდილი ხარ?!“

ხმალი დაუშვა მანუჩარმა.

ხელიც აღარ გაუნძრევია, როცა ყაჯარები წინ ჩამოუხტნენ და გაიტაცეს მძიმედ დაჭრილი თავისი სარდალი.

(მაინც მანუჩარ ათაბაგის დანაჭდევე ჭრილობას გადაჰყვა შემდგომ ამირგუნე-ხანი).

სდულდა მარაბდის ველი — გმინავდა, ღმუოდა, ზმუოდა.

სუსტდებოდა „აღლაჰ, ილაღლაჰ!“

მძლავრდებოდა „მიდი, დაჰკა, ჩვენთან არს ღმერთი და საქართველო!“

მისდევდნენ ქართველები გავეშებული ჩეხვით და კაფვით.

ყველა ლომ-გმირი შექმნილიყო — მეფეც, თავადიც, აზნაურიც, გლეხიც, ეპისკოპოსიც, მღვდელიც და ბერიც.

„ჩვენ გავიმარჯვეთ! მიდით, დაჰკარით! ჩვენთან არს ქრისტე და საქართველო!“

ზედიზედ ენარცხებოდნენ სისხლიან მიწას ლომის გერბიანი დროშები.

* ნამაქაფარმი — მარილ-ნაარმევი, უპურმარილო.

ამაყად ფრიალებდა ხერხეულიძის ხელით აღმართული ქართული დროშა — მაინც გორგასლიან-დავითიან-თამარიანი.

ყველა ქართველი ლომად ქცეულა, მაგრამ მაინც ისევ „სხევანაირია“ შემმართველობა დიდი მოურავისა.

მუზარადი მოეხადა გიორგის. ასე „უჯობდა“, რამეთუ „მოურავბეგის“ მძევნვარე სახის ხილვით თავზარი დასცემოდათ „მის ნაცნობ“ ყიზილბაშებს.

იბრძოდა გიორგი სააკაძე.

წმინდანი შვილის ნაკოცნ-ნაკურთხი ხმლით იბრძოდა. თითქოს ომის ღმერთი ჩამოსვეტილიყო ციდან მიწაზე.

იგი იყო ყველგან, სადაც მისი საარაკო ვაჟეაცობა საგანგებოდ ეჭირვებოდა მისიანებს.

ყიზილბაშთა სქელ რაზმებს არჩევდა სააკაძე. შეუტევდა და „მუხლჩაქეცილი ეშვებოდა“ სპარსული რაზმი.

თოფი ესროლა სპარსმა მხედარმა,

ყალყზე შეაგდო ცხენი გიორგიმ.

სულგავარდნილი დაეცა ცხენი.

წამსვე საკუთარი მოართვა გვერდით მბრძოლმა ლომი ჩრდილელმა.

ელვასავით მოევლო სააკაძე, ცხენის მკვლელს წამოეწია, ხმლით შუა გასჩეხა და მოკლულის ცხენი ლომი ჩრდილელს მიუმაგივრა.

დიდი სიმამაცით და სიკისკასით იბრძოდა „მეორე გმირი“ — ზურაბ არაგვის ერისთავი.

დაჭრილიყო ზურაბი, „შუბლზედ თოფსა გარდაეკრა“, მაგრამ მაინც არავის შეუსმინა და არ გავიდა ბრძოლის ველიდან.

ბლაოდა ღმუოდა, ზმუოდა, ზრიალებდა, ღრჭიალებდა მარაბდის ველი.

ქართველები ყიზილბაშთა შუაგულში შეიჭრნენ და ფლანგებისკენ გაიშალნენ ორმხრივ საიერიშოდ.

„მიდი, დაჰკარ! ჩვენ გავიმარჯვეთ, რამეთუ ჩვენთან არს ქრისტე და საქართველო!“

ყიზილბაშთა ვერც ერთმა ფლანგმა ვერც თავისიანთა შუაკერძზე მიშველება მოახერხა, ვერც ქართველთა გახელებული იერიშების შეკავება.

მარცხენა ფლანგზე ყაზახ-ხან ჩერქეზი გულჩუქენად შეეგება ავთანდილ სააკაძისა და დავით ერისთავ-არაგველის თავდასხმას.

პირუტყვული შიშით ატანილი გაექცა ყაზახ ჩერქეზი ახალგაზრდა სააკაძის საომარ გაწვევას.

მისი შირვანული მხედრობაც თან მიჰყვა გაქცეულ სარდალს ცხვირ-პირის მტვრევით.

გამოედევნენ ავთანდილ სააკაძე და დავით ერისთავი თავისი ჯარით.

ბრძოლის ველიდან გადაიკარგნენ გაქცეულებიც და მდევრებიც.

ეს როგორ? ნადრევად ხომ არ შესტოპეს ახალგაზრდა ქართველმა სარდლებმა?

ან პირდაპირ — საბედისწერო შეცდომა ხომ არ იყო ესოდენ ნასწრაფევად და ნაცუნცუხეგად ცხენოსანთა დიდი ნაწილის ჩამოკვეთა ქართული მხედრობის მთავარი სხეულისაგან?!

ვაითუ...

მაგრამ... ყიზილბაშთა მარჯვენა ფლანგიც მოეხსნა ბრძოლას, ხოსრო-მირზას ფლანგი.

ვერ ისახელა თავი ისტაჰანის ტარულამ, შაჰ აბასის „რჩეულმა გურჯმა“.

მაგრამ „ვერ ისახელა“ თუ „არ ისახელა“?

იქნება, არ გაიმეტა ქართველთა სისხლის დასაქცევად არც მკლავი და არც გული წავკისელი გლეხის ქალის ნაშობმა ვაჟკაცმა?!

მზე საშუადღეოსკენ მიილტვოდა ცეცხლოვანი ისრების სროლით.

სიცხით გაფატრული მზე მდულარეს აფრქვევს დაბრიყვებულ დედამიწას.

მაგრამ მზე რაღად ენაღვლებათ „უკვე გამარჯვებულ“ ქართველებს!

აჰა, ყიზილბაშთა უკანასკნელი ძალაც — შუაყერძი — უკუაქციეს გავეშებული ხმალთაკვეთებით.

მთავარსარდალმა ისა-ხან ყორჩიბაშმა, „უაღრესად გულად და შემმართებელ მამაცთა მცირე რაზმით“, ღრმა ზურ-

გში გადაინაცვლა და მოიერიჳ, მტერს წინ დაუგდო ორდუბაზარი.

ორდუბაზარი ყიზილბაშთა ქონების, საქონლისა და სიმდიდრის სათავსო სადგომი იყო.

და ერთბაშად დაეკერნენ ქართველები მტრისგან დაგდებულ ყველაზე „ქონიან ნაჭერს“.

საკუთარი ხმლები შორს მოისროლეს — უქარქაშოდ ქართული ხმლები, რომლებმაც აქამდე ძლევით მოიყვანეს თავიანთი პატრონნი.

ხმლები ხელიდან გაუშვესო?!

ეს უკვე ბედისწერა იყო!..

მტრისგან დაუნჯებულ სიმდიდრეს დაერივნენ და თვითონაც აირივნენ.

იტაცებდნენ ყველაფერს „უცხოს“ და „საუცხოოს“ — ოქრო-ვერცხლით მოსევადებულ მურასა ხმლებს, ხანჯლებს, აკინაეებს, რახტსა და უნაგირს, თაქსა და ჯიდას, ოქრონქისულ ხალათებსა და კაბა-ჯუბაჩის.

უპატრონოდ მიმოფანტული ეყარა უქარქაშო ქართული ხმლები.

ისინი აღარ სჭირდებოდათ „გამარჯვებულ“ და ალაფალაში თავდავიწყებით ჩაფლულ პატრონებს.

ეს აღარ იყო აღარც ქართული ჯარი და აღარც ჯარი საერთოდ.

თეიმურაზ მეფემ და გიორგი სააკაძემ ჯერ არ იცოდნენ, რა ამბავიც დაეტრიალებინა „ორდუბაზართან“ ქართველთა მანამდე გაუგონარ სიხარბესა და სიწუწუკს.

ისინიც — „სრულს გამარჯვებაში“ დარწმუნებულნი — უკან ჩამორჩენოდნენ ლაშქარს: ზურაბ ერისთავს წამდაუწუმ გული მისდიოდა ჭრილობიდან სისხლდამდიწარეს, და იმას დასტრიალებდნენ მეფე და მოუტრავი.

მდულარე სისხლით გატენილი მზე დაეყუდა საშუადღეობზე.

და ერთბაშად, ანაზღაითად, სისხლით ნარწყულე მარაბდის ველზე „მესამე ძალა“ შემოიჭრა გამძვინვარებით.

აზერბაიჯანის ბეგლარბეგი შაჰბენდე-ხანი მოჰქროდა ახალი, ხელუხლებელი, საომარი ყიყინით ანთებული დიდი მხედრობით.

მთქარუნობდნენ ისლამიტური დროშების ფრიალით, სა-
ომარი ნალარების, ბუკებისა და ზურნაიკების ზმულით,
დოლ-ბარბითების დაგადუგითა და გაბმული ყივილით:

„შაჰ გელდი! შაჰ გელდი! შაჰ გელდი!!!“

შაჰი მოდისო?!

წამოიშალნენ ქართველები.

მაგრამ გვიანდა იყო თავის აღებაც და ხელის გამოღებაც.
ძნელი ყოფილა ხელიდან გაშვებული, ნამსახური უქარქა-
შო ხმლის დაბრუნება!

ელვის სისწრაფით ბზრიალებდა ჩარხი ბედისწერისა.

ერთბაშად დაქანებულიყო ბრძოლის სასწორი ქართველთა
ბედით.

სამი მხრიდან წამოემართნენ ყიზილბაშნი დელიბაშური
გამძვინვარებით:

შუაყერძით — ისა-ხან ყორჩიბაშ,

მარჯვნივ — შაჰბენდე-ხან,

მარცხნივ — ხოსრო-მირზა.

სპარსელები მაშინ იწყებდნენ ბრძოლას, როცა იგი ქარ-
თველებს დამთავრებული ეგონათ.

„აღლაჰ, ილაღლაჰ!!!“ — აზანზარდა მიწა და ზეცა.

„ქრისტე და საქართველო!“ — სისხლნაკლულად გაისმა
სოდომგომორულ მეხთატეხაში.

ნაფლეთ-ნაფლეთი რაზმებით იბრძოდნენ ქართველები.

იბრძოდნენ მაინც საარაკო შემმართებლობით, გააფთრე-
ბით, თავდავიწყებით.

იბრძოდნენ თუნდაც ღირსეული სიკვდილისათვის.

ფეხი ცურავდა სისხლით ატალახებულ მიწაზე.

მკლავი იქანცებოდა.

მუხლი იკვეთებოდა.

მაჯა დუნდებოდა.

გული ძრწუნდებოდა.

„ჩვენ გავიმარჯვებთ! აღლაჰ, ილაღლაჰ!“

ორი ცალთვალა დევგმირი დაეცა შორიდან ნაძგერალი
გმურებით გულგანგმირულნი — დავით ჭანდიერი და ალათგან
ხერხეულიძე.

მხურვალეებით მუცელგაფატრული მზე თითქოს მდულარე

სისხლს ასხამდა კაცთა სისხლით ნარწყულე მარაბდის მიწას.

მკერდშელეწილი დაეცა თეიმურაზ მუხრან-ბატონი.

„თეიმურაზი მოჰკლეს! თეიმურაზი მოჰკლეს!“ — მეხვიით დაურბინა ქართველობას საბედისწერო ძახილმა.

სწორედ „საბედისწერომ“, — რადგან ჯარს მოკლული ეგონა თეიმურაზ მეფე და არა თეიმურაზ მუხრან-ბატონი! ზოლო ბევრისათვის მეფის სიკვდილი ომის დასასრულს ნიშნავდა.

სულ წარეკვეთა სასოება ისედაც ძალადაშრეტელ ჯარს.

ქართული ცხენოსანი ლაშქარი შემობრუნდა და გაიქცა.

ამოდ ცდილობდნენ თეიმურაზ მეფე, გიორგი სააკაძე, მანუჩარ ათაბაგი და ბაადურ ცაციშვილი გამოქცეულთა შეკვებას.

ისევ არ ჩანდნენ ავთანდილ სააკაძე და დავით ერისთავი აღრე გაქცეულ სპარსელებზე მადევარი ჯარებით.

არადა, როგორ ეჭირვებოდა მათი მოსვლა ქართველობას!..

ქართული ღროშა შექანდა ანაზღაითად.

ეს — მედროშე ხერხეულიძე დაცემულიყო მკვდარი.

მისმა ძმამ აიტაცა ღროშა.

ისიც დაეცა განგმირული.

მესამე ძმამ მოუსწრო და ისევ აღმართა ღროშა საქართველოსი...

იბრძოდა თავშიშველი და სისხლში მოსვრილი გიორგი სააკაძე. „იმდღინდელი მოურავის ნაქმარი ომი და საქმეები პირველთა გმირთაგანცა არა თქმულ არს, რაც იმ დღეს მოურავმან სახელი და ომი ქმნა“.

იბრძოდა მეფე თეიმურაზი, იბრძოდა, ვითარცა შვენოდა გმირ ხელმწიფეს, სარდალს და მხედარს. „მას დღესა ბატონმან თეიმურაზ დაამტვრია ყოველი საბრძოლო იარაღი და აღარა შემორჩომოდა რა და ბეჭდებიცა დაემტვრია“ მუშტის ძგერებით.

ისევ „დიდად მხნედ და ძლიერად ომობდნენ“ მანუჩარ ათაბაგი და „ყმანი მისნი“.

ტყვიით განგმირულნი დაეცნენ ეპისკოპოსნი — რუსთველი და ხარჭაშნელი.

დაეცა ბაადურ ციციშვილი, რომელმან თქვა სიტყვა უკვდავი და მარად სახსოვარი: „თუ ამოსწყდეს გლეხი კაცი, საქართველო დაძაბუნდა!“

და წყდებოდა „გლეხი კაცი“, — უკვე წყდებოდა მარაბდის ველზე მისი თანამემამულე „საზებურო ერისაგან“ — თავადობისგან — ქვეითად დაგდებული და მიტოვებული.

კიდევ ზედიზედ დაცემულიყო სამი ხერხეულიძე, შორიდან ტყვიით დაცხრილულნი.

კიდევ სამი ძმა დარჩენილიყო ხერხეულიძის ნაშიერი.

იმიტომ ისევ ფრიალებდა ქართული დროშა.

უკანასკნელმა ცხენოსანმა ქართველმა თავდაზნაურობამ მიატოვა ბრძოლის ველი და კოჯრის მთას მიაშურა თავშესაფარად.

სულ მარტო დარჩა „წვრილი ერი“.

მაინც იბრძოდა გავეშვებული გლეხკაცობა — მარადიული სიმტკიცე და სინდისი საქართველოსი.

იბრძოდა შეურცხვენელი, ღირსეული სიკვდილისათვის.

„ალაგ-ალაგ ერთგან შეგროვდნენ და სიღამდისინ დაიხოცებოდეს, თავი აღარ დაიზოგეს. ვისაც ხელი მიაწვდინეს, მოუკლავი არ გაუშვეს...“.

მზე ჩაესვენა დაქანცული, ჯანდაკარგული.

მაინც ფრიალებდა ქართული დროშა უკანასკნელი ხერხეულიძის ხელით ზეალმართული და სისხლდადენილ გლეხთა მცირე გუნდით შემოსალტული.

მეთოფეთა ათასეული შემოუსია ყოველის მხრიდან ყიზილბაშთა მთავარსარდალმა.

დაიგრიალა ათასმა თოფმა.

უკანასკნელმა ნამეხარ-ნახმევმა შეაზანზარა მარაბდის ზეცა.

უკანასკნელი მამულიშვილნი დაენარცხნენ მარაბდის მიწას.

უკანასკნელი ხერხეულიძის დაღწილ მკერდზე დაცემულიყო ნაშთი-ნაფლეთი ერთ დროს ცისგვამში მძლავრაჲ მჭროლავი „გორგასლიან-დავითიან-თამარიანისა“.

ასე აღესრულა კიდევ ერთი სისხლიანი ზორვა ქართული

მიწა-წყლის საკუროთხვეველზე. აღესრულა უგანაჩენო მარცხ-სა და უბადლო გმირობის აპოთეოზით.

ლამის წყვედიადში ჩაიძირა ადამიანის გვამებით დარეცილი საომარი თალპიონი.

მთელი ღამე გმინავდა მარაბდის ველი.

დილით ახალმა მზემ პირველმა ადითვალა ადამიანთა ურთიერთნამსხვერპლარი.

24 000 მკვდარი ესვენა მარაბდის ველზე: 14 000 ერანელი და 10 000 ქართველი.

მზის თვალმა საგულდაგულოდ მოითვალისა:

ცხრა ძმა ხერხეულიძე,

ცხრა მაჩაბელი,

შვიდი ჩოლოყაშვილი.

.

გლოვისფერი კაბით მოსილი ქალი შიადგა უკანასკნელ მამულიშვილთა გვამების გროვას.

დაიჩოქა.

დაემხო.

დაღეწილი მკერდი დაუკოცნა ხერხეულიძეს.

და ისევ აღმართა ცხრა ქართველი მამულიშვილის დედამ შვილის მკერდზე დაფენილი ქართული დროშა.

„მინსოვას“ — არაბში, „მონსოვას“ — ძხანო

ქვა არსად არის ქართლშია,
რომ ჩემი სისხლი არ სცხია.

გიორგი სააკაძე

მარაბდის ველზე განცდილმა მარცხმა დამარცხება არ არგუნა ქართველებს.

მარაბდის ველზე აღებულმა გამარჯვებამ გამარჯვება არ არგუნა სპარსელებს.

ომი გრძელდებოდა.

საბედისწერო ბრძოლის მეორე დღესვე მოპირდაპირენი კოჭორტაბახმელას ტყეებსა და ხევხუეებში შეებნენ ერთუროს.

სპარსელები შიდა ქართლისკენ აპირებდნენ გაქრას.

გიორგი სააკაძეს ჯარი მცირე რაზმებად დაეყო და „პარტიზანულ ომს“ შესდგომოდა.

ათი დღე-ღამე აკავებდნენ ქართველი მეომრები კოჭრის წყვარამებში შემოწოლილ ყიზილბაშობას.

ამასობაში ქართლის მოსახლეობა სიმაგრეებსა და სახიზარებში აფარებდა თავს.

გათამამდა ტფილისის ციხეში ჩაკეტილი ციხიონი. შვიდასი ყიზილბაში გამოვიდა და სათარეშოდ შეესია ახლომახლო სოფლებს. ღისი აიკლეს საგანგებოდ — სააკაძის საუფლო სოფელი.

სამოცი მეომრით მოიჭრა გიორგი სააკაძე. მოიჭრა და შვიდასივე ყიზილბაშის თავი ისე დააგორა, არც ართ საკუთარს განაკაწრიც არ მიუღია.

ისა-ხან ყორჩიბაშს საქართველოში გამოლაშქრების წინ შაჰ აბასისგან ნაბრძანები ჰქონდა, არშის ციხიდან როგორმე გამოეხსნა მისი ცოლისძმა და სიძე ანდუყაფარ ამილახორი ცოლშვილიანად.

ანდუყაფარის მეუღლე ყორჩიბაშის ასული იყო და სპარსთა მთავარსარდალი საგანგებოდ მოიწადინებდა არშის ციხის ტყვეთა გამოხსნას.

ყორჩიბაშმა თერგის ხეობისკენ სალაშქროდ თორმეტი ათასი ყიზილბაშ-ყაჯარი აარჩია და მეთაურებად სამი სარდალი უჩინა; შაჰბენდუხანი, ყაზან-ხანი ჩერქეზი და ხოსრო-მირზა.

წინასწარ ანკესი ისროლა ყორჩიბაშმა, — ვინ იცის, იქნებ მოედოსო და ზურაბ ერისთავს შეუთვალა: შენც კარგად იცი, როგორ უყვარს შაჰ აბასს თავისი შვილიშვილი, რომელიც ცოლად ჰყავს მისსავე საყვარელ ცოლისძმას ანდუყაფარ ამილახორს; ახლა, ანდუყაფარი და მისი ცოლ-შვილი რომ არშის ციხეში ჩაგიკეტავთ, მე შაჰის ბრძანება მაქვს ტყვეები გამოვიხსნა, რადაც უნდა დამიჯდეს. არშისკენ მიმავალი გზა

შენს საერისთაოზე გადის, არაგვის ხეობაზე. რაც იყო, იყო, დავივიწყოთ, ერთმანეთში სისხლს ნულარ დავდვრით, გზა მომეცი და ერთმანეთსაც შეეფიცოთ — არც ჩემი ჭარი ავნებს რაიმეს შენს სამფლობელოს, ნურც შენი ხალხი შეეცდება ჩემიანების სისხლის დაქცევასო.

ზურაბ ერისთავის გულში ორი ქმნილება ბუდობდა — ლომი და მატლი. პირველს გმირი ერქვა, მეორეს — პატივმოყვარეობა.

ხშირად, ძალიან ხშირად სჩაგრავდა მატლი ლომს.

ახლაც დაავიწყდა ფასი საკუთარი გმირობისა და მამულიშვილობისა მარტყოფისა და მარაბდის გმირს. დაავიწყდა და მისცა გზა საარაგვოზე საქართველოს მოსისხლეებს. მხოლოდ ერთი პირობით გამოიჩინა ზურაბ ერისთავმა თავისი „უპირატესობა“ ყორჩიბაშთან შეთანხმებისას: სპარსთა ლაშქარი არაგვის ხეობას აივლიდა, მაგრამ „მოის“ (უკან დაბრუნებისას), ქსნის ხეობაზე ჩამოივლიდა.

გასაგები იყო: არაგვის ხეობა „ყოველ შემთხვევაში“ მოსალოდნელი ყიზილბაშური დარბევისაგან გადარჩებოდა, ხოლო ქსნის ხეობა... რა ზურაბის სანადვლო იყო! ქსნის ხეობაზე ქსნის ერისთავმა იზრუნოს!.. ის კი არა და, ზურაბისათვის უმჯობესიც გახლავთ, ქსნის ხეობის ამოგდებით ყიზილბაშები ქსნის ერისთავს თუ დაასუსტებენ!

აი, ასეთი გახლავთ „სიბრძნე“ ჭეშმარიტი ფეოდალისა...

მაშ, ასე შეთანხმდნენ ისა-ხან ყორჩიბაში და ზურაბ ერისთავი: „მოის“ („მოისობას“ — წასვლისას) — არაგვი და „მოის“ („მოისობას“ — წამოსვლისას) — ქსანი.

მაგრამ არ ეძინა გიორგი სააკაძეს. წიწამურისა და ლართისკარის ხევეები ჩახერგა, თავისი „პარტიზანები“ ჩააყენა და არაგვისაკენ წამოსულ სპარსულ მხედრობას წინ გადაუდგა.

სასტიკი ბრძოლა გაიმართა.

ქართველებმა ათჯერ უმრავლესი მტერი ველარ შეიმარტეს. გიორგიმ წეროვანისკენ დაიხია და ყიზილბაშურმა მხედრობამ საარაგვოს გააღწია.

არშამდე უვნებლად და არხეინად იარეს.

არშის ციხეს და მასში ჩაკეტილ ამილახვრიანთ სახლობას მცირე ციხიონი იცავდა. მაშინვე შეთანხმდნენ მიმხდურ-

ნი და დამხვედურნი: მეციხოვნეებმა ტყვეები გასცეს და სამაგიეროდ ციხესიმაგრე ხელუხლებლად დაინარჩუნეს:

წამოიყვანეს ანდუყაფარ ამილახორი და მისი ჯალაბი. პირობისამებრ, სპარსელებმა საარაგვოზე ხელი აიღეს, ლომისის მთა გადმოლახეს და ქსნის ხეობაზე ჩამოეშვნენ.

დიდი სისხლისთხევა ელოდა ქსანს.

გიორგი სააკაძე სწორედ ქსანზე დამდგარიყო სამხრეთისაკენ მომავალი მტრის დასახვედრად.

იასე ქსნის ერისთავი და ქაიხოსრო მუხრან-ბატონიც შეერთებოდნენ სააკაძეს თავ-თავის ჯარით.

მტრის ზურგზე საიერიშოდ უმცროსი ცოლისძმები — დავითი და გიორგი გაემზადებინა მოურავს (ზურაბ ერისთავს „ხელები დაებანა“ — ჩემმა ძმებმა როგორც უნდათ ისე ჰქმნანო! გულს სინანულიც შეჰპარვია ლომისა და მატლის ბატრონს, — ნეტავ ცუდად ხომ არ მოვიქცე, სპარსელები რომ შემოვეშვი საარაგვოშიო?).

შუაში მოიქციეს ქართველებმა სპარსთა მხედრობა.

მოიქცეს „და ამოწყვიტეს“ ისე, რომე იმისთანა გამარჯვება არა თქმულ არს. მოსრეს ესრეთ, რომე ქსანი შეიღება სისხლითა და სისხლის ფერად დიოდა“.

სააკაძემ ხუთი კონა ისარი შემოიხარჯა და მერე ხმლით დაერია ყიზილბაშებს.

შაჰბენდე-ხანი ტყვედ აიყვანეს ქართველებმა, — აზერბაიჯანის ბეგლარბეგი, რომელმაც ქართველთა მარცხით გადასწონა მარაბდის საბედისწერო ბრძოლის სასწორო.

გახელებულმა ქართულმა ხმალმა ასჩეხა ქართველთა სისხლის დამაქცევარი.

ყიზილბაშთა მეორე სარდალმა — შირვანის ბეგლარბეგმა ყაზახ-ხან ჩერქეზმა უკან, ისევ ჩრდილოეთისკენ დააპირა გაქცევა, მაგრამ აქ დავით და გიორგი ერისთავების მეომრებმა შეიპყრეს იგი.

(ყაზახ-ხან ჩერქეზი ცოცხლად მიჰგვარეს ჯერ ზურაბ ერისთავს, მერე თეიმურაზ მეფეს. არც ერთმა არ გაიმეტა სასიკვდილოდ, რადგან ორივეს პურ-მარილი ჰქონია მიღებული შირვანის ბეგლარბეგისგან, და მანამდე ჰყავდათ ყაზახ-

ხანი ცოცხლად დატყვევებული, სანამ ტყვემ მცველები არ მოიხსიდა და თავს გაქცევით არ უშველა).

გიორგი სააკაძის პირდაპირ სპარსთა მესამე სარდალი აღი-
მართა — ხოსრო-მირზა, თვითონ გიორგისგან შაჰ-აბასის კარ-
ზე აღზევებული ტარულა ისფაჰანისა.

მარაბდის ველზე ვერ გამოჩნდა (თუ „არა გამოჩნდა“) ხო-
სრო-მირზა, ხოლო ახლა...

ახლა სასტიკი ხმალთაკვეთებით შემოუტია „თათარმა ქარ-
თველმა“ ქრისტიან თანამოძმეებს.

ეს მესამე დღე გრძელდებოდა ბრძოლა.

ქსანი სავსებით „იქმნა, ვითარცა სისხლი“.

თორმეტი ათასი სპარსელისგან ერთი ათასეულიც აღარ
იდგა ფეხზე.

მაგრამ მაინც იბრძოდა „მხეცქმნილი“ ხოსრო-მირზა, თა-
თრულად განათლული გურჯი მხედარი, ქართულ-მეფურ და
ქართულ-გლეხურ სისხლთა ნაჯვარი.

მიმწუხრის ჟამს გამოარღვია ხოსრო-მირზამ სააკაძის სა-
ლტი.

ამილახვრიანთ ოჯახი გამოიტაცა და გაქუსლა.

თითქოს კიდევაც გაუხარდა გიორგი სააკაძეს, რომ „მის-
მა გაზრდილმა“ ხოსრო-მირზამ იმ დღეს მასზე „არანაკლები“
გმირობა ჩაიდინა.

მთელი ღამის ლაგამახსნილი ჭენების შემდგომ ხოსრო-მი-
რზა ტფილისს მივარდა და ყორჩიბაშს საღსალამათად ჩააბა-
რა ანდუყაფარ ამილახორი და მისი ცოლ-შვილი.

დიდი სიხარული ჰქონდა ყორჩიბაშს: შაჰ აბასის ბრძანე-
ბაც აღასრულა და თავისი ასულიც ქმარშვილიანად დაიხსნა
სამარცხვინო ტყვეობისაგან.

მთელი ღამის ლაგამახსნილი ჭენების შემდგომ ხოსრო-მი-
რზა: თორმეტი ათასიანი ყიზილბაშური მხედრობა ქართველ-
თა ხელით ქსნის ხეობაში ჩაწყდა და ჩაიხლიწა. უამრავი სა-
ომარი საჭურველი, ტყვეები, ცხენები და საქონელი სააკაძის
მეომრებმა დაინადავლეს.

მარაბდის სისხლი და ბოღმა ქართველებმა გადაჭარბებით
აიღეს და ამოიგეს.

ორი კვირა არ დაიწმინდა ქსანის წყალმა წითელი ფერი,

უცნაური ის იყო, რომ არაგვსა და ქსანზე ყიზილბაშთა „ზოის-მოისობის“ დროს თეიმურაზი არსად გამოჩენილა, — არც მეფედ, არც სარდლად და არც ჯარისკაცად.

არც გიორგი სააკაძეს „შეუწუხებია“ იგი — მაინცდამაინც გამოდი, გვიმეფე, გვისარდლე და გვიპატრონეო.

ისა-ხან ყორჩიბაშს ბრძოლის ველზე გამოსვლა და ქართველებთან იარაღით შერკინება უკვე აღარ შეეძლო, ისევე „ციხის შიგნიდან გატეხვით“ შეეცადა სპარსთა მთავარსარდალი ქართლ-კახეთის მთლიანობისა და სიმტკიცის დაშლას. ისევე გაუმართლა საქართველოს მტერს ამ „ნაცადმა გზამ“. ისევე დაეხარბნენ ქართლის თავადები სპარსულ ხალათებსა და „სახელოებს“. ყველას დაასწრო ღალატი ბოქაულთუხუცესმა ქაიხოსრო ბარათაშვილმა, რომელიც მარტყოფისა და მარაბდის ბრძოლებში სააკაძის საომარი დროშის ქვეშ იქნევდა ხმალს. ქაიხოსრომ ყიზილბაშებს მიართვა ქვემო ქართლის უმტკიცესი ციხესიმაგრე ბირთვისი, სამაგიეროდ ყორჩიბაშმა ქვემო ქართლის სპასალარობა (რომელიც მანამდე ბარათაშვილს ეკუთვნოდა) უკვე გაათათრებულ ქაიხოსრო ბარათაშვილს უბოძა. მომდევნო 1626 წელს სპარსელებმა ტფილისის მოურავობაც ქაიხოსროს ჩააბარეს.

ზოგმა სამღვდელომაც უღალატა ქრისტეს რჯულსა და ქართველობას.

ისევე სამხრეთ საქართველოდან სჭარბობდნენ მოღალატენი.

გიორგი სააკაძემ გადაწყვიტა სწორედ სამხრეთიდან დაერტყა სპარსელებისთვის და სამცხისკენ გაქუსლა ცოლ-შვილითა და ერთგული მამულიშვილების თანხლებით.

სამცხეს წასვლის წინ სააკაძემ ძლიერად გაამაგრა ქართლის ციხენი — კეხვი, კიკანათბერი, ალი და სურამი.

გიორგი სააკაძე რომ ქართლიდან გასულად დაიგულა, ქართველთა ტყვეობიდან თავდახსნილმა ანდრეყაფარ ამილახორმაც მოინდომა „გმირობის ჩადენა“. იგი შეუთანხმდა იასე ქსნის ერისთავს და მისი თანადგომით თავს დაესხა თავად ლაზნელს, რომელსაც იგი მისი დატყვევების მთავარ დამნაშა-

ვედ სთვლიდა. ლაზნელი ააწიოკეს და მისი ქონებაც გაიყვეს ანდუყაფარმა და იასემ. მერე მცხეთის დეკანოზს მიუხდა ანდუყაფარ ამილახორი, ტაძარი გაუძარცვა და მუქარა დაუბარა, — შენს ადგილზე ტფილისიდან მოლა-მუეძინს გამოვაგზავნიო.

მართლაც არჩევდა ანდუყაფარი მოლას მცხეთის დეკანოზის სამაგივროდ, მაგრამ ამ რჩევაში რომ იყო, ნარიყალას ციხიდან ფეხი დაუცდა, გადმოვარდა და მიწამდე სულიც აღარ დაჰყოლია.

იმავე 1625 წელს ისა-ხან ყორჩიბაშმა ტფილისში სვიმონ-ხანი „დააგდო“ და თვითონ ანდუყაფარ ამილახორის დაქვრივებული ოჯახითა და ამოწყვეტილ-გაჩანაგებული ჯარის ნაფლეთებით საქართველოდან წავიდა.

შაჰის ბრძანებით ყორჩიბაში ყარაბაღში დაბანაკდა. აქედან მას ისევ უნდა ებრძოლა გიორგი სააკაძის წინააღმდეგ და როგორმე შეენარჩუნებია სამცხის ციხესიმაგრენი, რომლებიც წინა 1624 წელს ერანელებს დაუქვრიათ.

ტფილისში „დაგდებული“ სვიმონ-ხანი ისევ „ტყუილ-მეფე“ იყო და სხვა არაფერი. ქართველთა შიშით იგი „ვერ გამოვიდოდა ციხიდანე და ვერცა პატრონობდა ქართლსა“.

დიდი, სანიშნავეტო წელიწადი შეიქნა 1625 წელი.

სრულიად სპარსეთის ლაშქარი იმჟამად 120 000 მეომარს მოითვლიდა და აქედან ნახევარი — 60 000 მეომარი საქართველოში დაჰკარგა შაჰ აბასმა. მერე, ეს „სპარსული ტრაგედია ქართულ სცენაზე“ ნახევარი წელიწადიც არ გაგრძელებულა.

სპარსეთი დამარცხდა.

საქართველო ისევ ქართველებს ეკუთვნოდა.

ჭეშმარიტად ლომი ყოფილა შაჰ აბასი, რამეთუ გასაოცარი მოთმინებითა და მოჭირვებით მიიღო დარტყმა სამივე მენისა — მარტყოფი, მარაბდა, ქსანი.

როცა ქსანზე გამართული ხოცვა-ყლეტის ამბავი დაწვრილებით შეატყობინეს, მხოლოდ ეს თქვა შაჰმა: ნამდვილი გმირი და ვაჟკაცი მარტო ხოსრო-მირზა ყოფილაო.

ხოლო როცა ხოსრო-მირზაც მოვიდა და ანდუყაფარ ამ-

ლახორის ოჯახიც მოჰგვარა, შაჰმა მაშინვე ბრძანა: დღეიდან ჩემი ყულარალასი ხოსრო-მირზა იქნებაო.

„კი, მაგრამ ხოსრო-მირზა ხომ ისფაჰანის ტარულა გახლავთ?“

„ორივე იქნება — ისფაჰანის ტარულაც და ლულამთა ჯარის ყულარალასიც!“ — დაბეჭდა შაჰმა.

ამ „უცნაური გადაწყვეტილების“ შემდეგ შაჰ აბასი გილანს წავიდა „წმინდან წინაართა“ საფლავებზე სალოცავად, საცრემლავად, „ქართული ბოდმის“ მოსაოხებლად და გასაქარვებლად.

იმ დღეებში კიდევ ერთი საწყენი ამბავი შეატყობინეს შაჰ აბასს: დარუბანდის ვილაიეთის ბეგლარბეგი მომკვდარიყო — იოთამ-სულთან ქართველი, შაჰის აღზრდილი ლულამი, ჯერ კიდევ „გაუფურჩქნელი ჰაბუკი“.

მაინც შეწუხდა ქართველებზე გამწარებული შაჰი.

მაინც ქართველი დანიშნა დარუბანდის ბეგლარბეგად — მამაცი და ნიჭიერი ლულამი — ფეროხ-სულთანი.

ხოლო გიორგი სააკაძე სამცხეს მიდიოდა. თან მიჰყვებოდნენ — გერმანოზ ბარათაშვილი, გიორგი ქავთარიშვილი, ბარათაშვილი, როსიტა გედევანიძე, დემეტრე საგინაშვილი, მათარსი შიხაიდრისძე და პაპუნა ვაშაყაშვილი,

სამცხეში ხალხი უნდა აეჯანყებინა და ყიზილბაშები განედევნა გიორგი სააკაძეს.

ფიქრები მისხურ გუჯარაღინზე

მარაბდის ბრძოლიდან დაბრუნებულ მანუჩარ ათაბაგს სამცხეში ფრიად საშფოთარი ამბავი დაახვედრეს. თურმე მანუჩარის ბიძა, ბექა სტამბოლს ბრძანებულა და ხონქართან „რალაც მოლაპარაკება“ ჰქონია.

ბექა თავის ძმისწულს ათაბაგობის „ტახტს“ ეცილებოდა და ამისთვის სტამბოლის კარს ელაციცებოდა.

მანუჩარი ქრისტიანობისა და ქართველობის თავგამოდე-

ბული დამცველი იყო გათათრების უფსკრულს გადაჩხილ სამცხეში, ხოლო ბექა უკვე ლალატისა და რენეგატობის გზაზე იყო შემდგარი. ამიტომ ბიძას „დიდი შანსები“ ჰქონდა ძმისწულისათვის ათაბაგობის წართმევისა...

მანუჩარმა გადაწყვიტა ხონთქარს პირადად სწვეოდა და ბიძამისის „ნავერაგალი“ სტამბოლის კარზედვე გაებათილებინა.

ამიტომ, როცა გიორგი სააკაძე სამცხეს ჩაფიდა (1626 წლის ზაფხულის დამლევის), იქ მანუჩარ ათაბაგი არ დახვედრია.

სამაგიეროდ მესხი მამულიშვილები შემოეგებნენ დიდის ამბით სახელოვან გმირს.

საკაძეს ჯარებით ეახლნენ; თან უნა დიასამიძე, დავით გოგორიშვილი, როსტომ შალიკაშვილი, ელიზბარ და ბექან თაქთირიძენი.

გაჩაღდა სამამულო ომი მესხეთში.

საკაძემ სამცხელთა თანადგომით ზედიზედ აიღო ხერთვისი, აწყური, ფარავანი და იქიდან გარეკა ყიზილბაშთა ციხიონები.

ახალციხისკენ გაემართა სააკაძე.

ახალციხეში ერანელი სარდალი სელიმ-ხანი იდგა ძლიერი ციხიონით. სააკაძის მოახლოება რომ გაიგო, სელიმ-ხანი ჯარიანად აიყარა და ყორჩიბაშთან გაიქცა ყარაბაღში.

საკაძე ახალციხეში შევიდა.

ყორჩიბაშმა სასწრაფოდ ჯარი გამოგზავნა სამცხის დასარბევად და სააკაძის გასანადგურებლად.

მოურავი სანადიროდ გასულიყო და თავის თვალთ ეხილა, როგორ გაივსო საფარისა და ასპინძის მიდამოები ყიზილბაშური მხედრობით.

ჩაუხტა სააკაძე „მცირედითა კაცითა“ რიცხვმრავალ მტერს. ჩაუხტა და ეკვეთა გალომებული. „ეკვეთა და აოტნა ყიზილბაშნი და მოსწყვიდნა იგინი“. სპარსთაგან მცირეოდენმა გაასწრო სიკვდილს.

ახლა საკითხი დაისვა ყიზილბაშთაგან გათავისუფლებული სამცხისათვის „ადგილის მიჩენაზე“. ბუნებრივად იგულისხმებოდა, რომ სამცხე „გაერთიანებულ ქართლ-კახეთს“

უნდა შეერთებოდა. აკი თვითონ გიორგი სააკაძის ყველაზე დიდი მამულიშვილური განაზრახიც ეს იყო — გაერთიანება „ყოველი საქართველოსი“. გიორგი სააკაძემ გააერთიანა ქართლ-კახეთი და „ორივე საქართველოს“ ერთი ტახტი და, უდგა და ზედაც ერთი მეფე დაუსვა — თეიმურაზი. ბუნებრივია, რომ ახლაც იგივე გიორგი სააკაძე მისგანვე დახსნილ სამცხესაც ქართლ-კახეთის ერთიან ტახტს შეუერთებს და მის ერთხელმწიფეს — თეიმურაზ მეფეს დაუმორჩილებს.

მაგრამ ეს ასე არ მოხდა.

სააკაძემ სამცხეში ქართველი მეფე კი არა, ოსმალეთის სულთანი მოიწვია!

რა მოხდა?!

ნუთუ ხელი აიღო სააკაძემ საქართველოს გაერთიანების დიად განზრახვაზე? ან იქნებ დიდ ქართველს მესხეთი არ სტკიოდა ისეთივე „ქართული ტკივილით“, როგორც ქართლი და კახეთი? ნუთუ სააკაძეს არ ესმოდა ის „სასმინარი“, რაიც ისე ნათლად ჰქონდა შეგნებული ყოველ მაშინდელ ქართველს: „ალია (სპარსი) და ოსმანა (თურქი) ორივე თათარია — ერთი ბაბრი და მეორე ფოცხვერი“ და სამცხესაც არაფერი ეშველებოდა, თუ ბაბრის კლანჭებიდან დაიხსნიდი და სამაგიეროდ ფოცხვერის კლანჭებში ჩააგდებდი?!

მალე დადასტურდება, რომ სააკაძეს საქართველოს გაერთიანებისათვის ბრძოლაზე ხელი არ აუღია. მაგრამ თეიმურაზი — ქართლ-კახეთის „ერთიანი მეფე“ — სამცხის პატრონად მაინც არ მოიწვია. იქნებ თეიმურაზმა „ვერ გაუმართლა“ სააკაძეს. იქნებ თეიმურაზი ისე „დაპატარავდა“ მღურავის თვალში, რომ მას ქართლ-კახეთის მეფე უკვე აღარ მიაჩნდა ერთიანი „ყოველი საქართველოს“ ღირსეულ გვირგვინოსნად?!

სააკაძე უეჭველად იმასაც კარგად დაინახავდა, რომ ბაგრატიონთა აწ რძეგამშრალ და გაბერწებულ სამეფო საგვარეულოს თეიმურაზზე „უქეთესიც“ აღარავინ მოეძეგებოდა.

მერე, ყოველივე ეს ღირდა იმად, რომ საქართველოში ერთი თათრის (ალია) ნაცვლად მეორე თათარი (ოსმანა) მოწვეულიყო?!

ან საერთოდ იყო საჭირო და აუცილებელი იმკამინდელ საქართველოში „ვინმეს მოწვევა“?!

აკი უფრო ძნელბედობის ჟამს აღმოაჩნდა საქართველოს საკუთარი ძალები, რათა უსაშინლესი მოსისხლისთვის და მთელი ქვეყნიერებისთვის დაემტკიცებინა თავისი „საოცარი ძალმოსილება“, ვითარცა უტყუარი დასაბუთება მისი მარადიული უძლეველობისა და უკვდავებისა.

განა, მარტყოფი, მარაბდა, ქსანი და კიდევ მრავალი „პარტიზანული წიადსვლა“ — თ ვ ი თ ო ნ სააკაძის მძლავრი ხელებით დაწნული გვირგვინები — სამაგალითოდ არ კმაროდა თ ვ ი თ ო ნ სააკაძისთვის?!

განა, საქართველო დღეს უფრო მძლავრი არ არის, ვიდრე გუშინ — მარტყოფის „სააკაძურ გმირობამდე“?!

მაშ, რა მოხდა და რატომ აიჩემა მარტყოფის, მარაბდის, ქსნისა და ასპინძის გმირობათა კავალერმა ისევ თათრის მოყვანა „საქართველოს გასაერთიანებლად“?!

ანდა, შეიძლება, საერთოდ, უცხო მომტერე და მოსისხლე ძალის საშუალებით საკუთარი ქვეყნის გაერთიანება და გამძლავრება?! მოხერხდება, საერთოდ, უცხო გადამთიელის ხელით მშობლიურ კერაზე ცეცხლის დანთება, როცა იმ ხელის პატრონი დღენიადაგ შენი კერის დაქცევაზე ოცნებობს?!

აკი ჰყავდა გიორგი სააკაძეს წინამორბედი, ასე უცხო, მისი ქვეყნის მოსისხლე მტრის საშუალებით რომ აპირებდა მისი ქვეყნის „დახსნასა“ და „გაერთიანებას“.

და გიორგი სააკაძის ეს წინამორბედი იყო თ ვ ი თ ო ნ გიორგი სააკაძე!

აკი სწორედ გიორგი სააკაძემ მთინდომა საქართველოს მოსისხლე სპარსული ძალებით საქართველოს „დახსნა“, „გაერთიანება“ და „გამძლავრება“!

მერე, რა გამოვიდა აქედან?

ნახევარი მილიონი ქართველის დაღუპვა და სხვა არაფერი!

და მერე ისევ სააკაძის მეთაურობით ძლივს მოხერხდა (იქნებ არც კი მოხერხდა?!) „სპარსული გათათრებისა“ და ეროვნული გადაგვარება-გადაშენებისაგან თავის დახსნა.



მაშინ, თორმეტი წლის „თათრობის“ შემდგომ მიხვდა გიორგი სააკაძე — ცუდად გამომივიდაო და, კიდევაც გაასწორა, რაც შეეშალა. ძლიერად, დიდის სახელოვნებით გამოისყიდა მძიმე შეცდომა, მაგრამ ახლა?!

ისევ იმეორებს იგივე შეცდომას?!

თანაც — შეცდომიდან შეცდომამდე ნახევარი წელიც არ არის გასული!

ნუთუ კიდეც ისე გულუბრყვილოა სააკაძე, ასეთი რამე ინგარიშოს: ჯერ ოსმალეთის საშუალებით საქართველოს გავერთიანებ და მერე თვითონ ოსმალეთსაც დავეცაკებო?!

განა ასევე არ ფიქრობდა ათი-თორმეტი წლის წინათ სპარსეთის მიმართი და რაც გამოვიდა ამ ფიქრიდან უკვე იწვნია საქართველომაც და თვითონ სააკაძემაც.

როგორ, დღევანდელი გიორგი სააკაძე გუშინდელ გიორგი სააკაძეს ვეღარ ხედავს?!

ვერ ხედავს!

ისევ შემომჭდარა სატანა სააკაძის საყნიან მხარზე.

სამცხის პატრონი მანუჩარ III ათაბაგი, დიდი ეროვნული გმირი და მამულიშვილი, ჯერ კიდეც არ დაბრუნებულიყო სტამბოლიდან, გიორგის იგი თითქოს არც გახსენებია, მაგრამ ამ „უხერხულობიდან“ მოულოდნელმა ამბავმა დაიხსნა სააკაძე: მანუჩარ ათაბაგი ზონთქარმა დიდი პატივითა და აღთქმებით გამოისტუმრა თურმე სტამბოლიდან; არც ქრისტიანობას გართმევ და არც სამცხის პატრონობასო, — ამ დაპირებით მოვიდა სამშობლოში მანუჩარი, მაგრამ... გზად მომავალი ათაბაგი ბიძამისმა ბექამ მიიწვია სტუმრად, და მოხდა ის, რაც ძალიან ხშირად ხდება სანადიმო სუფრასთან: მასპინძელმა სტუმარს ღვინოში საწამლავი შეაყოლა. ასე აღესრულა მანუჩარ III ათაბაგი, მარაბდის ბრძოლის გმირი, მესხეთის ქართველობისათვის თავგამოდებული მეომარი მამულიშვილი. ხოლო მისი მკვლელი, გათათრებული ბექა ჯაყელი, თურქული სახელით — საფარ-ფაშად მოველინება მესხთა ტანჯულ ქვეყანას.

ხოლო გიორგი სააკაძემ თურქეთის სულთანს მურად IV-ის ელჩი გაუგზავნა — გიორგი ქავთარიშვილ-ბარა-

თ ა შ ვ ი ლ ი. გაუგზავნა და შეუთვალა: სამცხის ციხე-ქალაქები, ყიზილბაშებს რომ დავაგდებინე, ახლა შენთვის მიბოძებია, ოღონდ ჯარები მომაშველე და შეერთებული ძალებით შევეუტიოთ ერანელებსო.

გახარებულმა ხონთქარმა პასუხად „მოსცნა ნიქი დიდნი მოურავსა და იენგიჩარნი და დაიპყრნეს ციხენი იგინი“ — სამცხისანი. მ უ რ თ ა ზ ფ ა შ ა (დაბადებით ქართველი) ჩამოვიდა თურქეთიდან და იმან განაწესა ოსმალური ციხიონები ახალციხესა და სხვა მესხურ ციხე-ქალაქებში.

ერთი სიტყვით, სულთანს მურად IV არ დაბნეულა ასეთი მოულოდნელი ძღვენის მიღებით.

ხოლო „დამხმარე ძალები“ რომელსაც სპარსეთის წინააღმდეგ სააკაძე ოსმალეთისგან ელოდებოდა?

გავიგონია?!

„დამხმარე ძალად“ გიორგი ქავთარიშვილ-ბარათაშვილმა გიორგი სააკაძეს ხონთქარისაგან ფარატინა „წყალობის სიგელი“ და კაფუჯი-ბაშის წოდება ჩამოუტანა. ეს იყო და ეს. თურმე სადა სცალია სულთანს სააკაძისთვის, ბაღდადის დასაბყრობად ჯარებს ამზადებს და საქართველოს „გასათავისუფლებლად“ რამეს, თუნდაც ერთ ჯარისკაცს, გამოიღებს?! პირიქით, თვითონ სულთანი გამოელის სააკაძისგან თურქეთის საომარი ტვირთის შემსუბუქებას. სწორედ ასე სწერს ხონთქარი სააკაძეს თავის „წყალობის სიგელში“.

„აბა, შენ იცი, ქართლის მპყრობელო მოურავ-ხან (მართლაც მწყალობელი ყოფილა ოსმალეთის ხელმწიფე: სააკაძისთვის ქართველები „ქართლის მოურავის“ თიკუნს ძლივს იმეტებენ, სულთანი კი „ქართლის მპყრობელს“ უწოდებს — ხუმრობა ხომ არ არის!), შენებურად როგორ დაუტრიალდები და თავდაუზოგავად, საკუთარი საომარი ძალებით, მუსრს გაავლებ ყიზილბაშებსო. შენი ბუნებრივი, თანდაყოლილი დიდი ვაჟკაცობის, შემმართველობის, უსაზღვრო მამაცობისა და გმირობის შესატყვისად მოიკრიბე რაც ძალი და ღონე გაქვს და, შენი მმართველობის ქვეშ მყოფი ქართლის ჯარის გარდა, წაახალისე საქართველოს სხვა ბეგები და გულადი წარჩინებულნი, შემოიყარე ბლომად ქართული ჯარები და მთელი თქვენი ძალებით ეცადეთ უკანვე გამოგლიჯოთ საქართველოში

ურჯულოების გამავრცელებელ ყიზილბაშებს ქართული ციხე-სიმაგრენი და სხვანი და სხვანი... აბა, თქვენ იცით, როგორ სასახელო საქმეებს ჩაიდნთო!”

მკითხველი არ დაეჰედება, რომ სწორედ საცინრად აგდებს ჰავეს ამნაირი „წყალობის წიგნი“.

ერთადერთი, რაც ახალ თათრულ წიაღსვლას ნამდვილ შედეგად მოჰყვა, გახლდათ სამცხის დაკარგვა — დაკარგვა საქართველოსთვის და მოპოება თურქეთისთვის, გნებავთ — წართმევა სპარსელთაგან და შირთმევა თურქთათვის.

ისევ გამოერკვა გიორგი სააკაძე.

ისევ საჭირო იყო უკან მობრუნება, გინა—საკუთარ, „ქართულ წიაღში ჩაბრუნება“.

ამჯერად თავისი დიდი ზრახვებისათვის გზის ძებნა სააკაძემ „მესამე საქართველოში“ დაიგულა.

იგი იმერეთში წავიდა.

თეიურაზთან შერიგება მას არ უფიქრია.

სამაგიეროდ სხვა ფიქრობდა... ისევ შაჰ-აბასი!

შაჰი და ფიც-ვერცხლი

1626 წელი. შირაზი.

დარბაზობა აქვს ერანის „ვიცე-კოროლს“ იმამ-ყული-ხან უნდილაძეს.

იქ დამსწრე ინგლისელი ჰერბერტი გაოცებულია მასბინძლის სიმდიდრით — უთვალავი ოქრო-ვერცხლის ლანგრები, სასმურნი, ნოხები, ხალიჩები, ფარდაგნი, კრეტსაბმელნი, ურიცხვი თვალ-მარგალიტი.

ძმასთან სტუმრად არის დავით (დაუდ-ხან) უნდილაძეც.

შათირი მოიჭრა ისფაჰანიდან.

შაჰ აბასი სასწრაფოდ იწვევდა ორივე ძმას.

მოტეხილი და მოთელილი ეჩვენათ შაჰი უნდილაძეებს. საოცრად დაღლილი, გაღახული სახე ჰქონდა. თვალეზსაც დაჰკარგვოდა ძველებური ციციხლი და ელვამკრთომელოზა.

— ოსმალებს ბაღდადი ალყაში მოუქცევიათ. შენ, იმამ-ყული-ხან, სასწრაფოდ უნდა გაეშურო ბაღდადისკენ შენის მხედრობით! — უბრძანა შაჰმა უფროს უნდილაძეს.

მერე უმცროსს მიუბრუნდა და ჩამქრალი ხმით უთხრა:

— შენ კი საქართველოში უნდა წახვიდე, დაუდ-ხან!

— საქართველოში?!

— ნუ შეშფოთდები, საომრად არ გაგზავნი შენს საქართველოში... სამშვიდობოდ წახვალ.

— სამშვიდობოდ?!

— სწორედ.

— ვისთან?

— თეიმურაზთან.

თეიმურაზთანო? ვინ მოელოდა და ვინ წარმოიდგენდა ამას? შაჰ აბასი თეიმურაზს მშვიდობის ჩამოგდებას ეაჯება?! ნუთუ სცნო თავი დამარცხებულად ერანის ლომმა საქართველოს მეფესთან ოცწლიანი სამკედრო-სასიცოცხლო ომის შემდგომ?!

ჰო, თეიმურაზს უნდა ეახლოს დაუდ-ხან უნდილაძე და შაჰის სახელით სამძიმარი მოახსენოს დედისა და შვილების სიკვდილის გამო! ბოდიშიც მოუხადოს, შაჰს ასე რიგად რომ დააგვიანდა სამძიმრის გაგზავნა! (თურმე ზდება ასეთი რამეც: მკვლელი სამძიმარს უცხადებს მისი ხელით ამოწყვეტილი შვილებისა და დედის ჭირისუფალს!). ესეც იცოდეს თეიმურაზმა: რაც ამ ბოლო დროს საქართველოში დატრიალდა, შაჰს თეიმურაზის ბრალად არ მიაჩნია, ყველაფერი მხოლოდ გიორგი სააკაძის ბრალია, ბრალი ცბიერი მოურავ-ხანისა, ერთნაირად რომ ჰლაღატობს ყველას — ქართველსაც, სპარსელსაც და ოსმალოსაც. კარგად იცოდეს თეიმურაზმა, შაჰ აბასის გაზრდილმა და ნაამაგარმა, რომ სააკაძე ორივეს სისხლს „თანაბარი სიამოვნებით“ დალევს — შაჰის სისხლს და თეიმურაზის სისხლს... ბოლოს და ბოლოს, იყოს თეიმურაზი ქართლ-კახეთის მეფედ, ოღონდ თურქულ და რუსულ ხალათებს ნუ ჩაიცვამს და ნუ დააკიწყდება, რომ იგი მაინც შაჰ აბასის „ჩრდილის ქვეშ არის გაზრდილი...“ და ბოლოს, — იქნებ თვითონ პირადად ეწვიოს გაზრდილი გამზრდელს!..

— ტფილისში ჩახვალ, დაუდ-ხან, იქ მოიწვევ და შეხედები თეიმურაზს. იქვე მოელაპარაკები და იქიდანვე შიკრიკის ხელით გამომიგზავნი სამშვიდობო წერილს თეიმურაზ მეფის ხელრთვით, — დაასრულა შაჰმა.

— შიკრიკიც არ დამჭირდება, მე თვითონ პირადად გაცნობებთ ყოველივეს, — შეაგება დავით უნდილაძემ.

— არა, შიკრიკი გამომიგზავნე, ხოლო შენ ტფილისიდან განჯას გაეშურე და იქვე დარჩი.

— განჯაში რისთვის, ხელმწიფეო?

— ამიერიდან შენ, დაუდ-ხან უნდილაძე, დანიშნული ხარ განჯა-ყარაბაღის ბეგლარბეგად.

ასე განუწყობია შაჰ აბასს: ერანის იმპერია ლამის ძმები უნდილაძეებისთვის გაუყვია სამმართველოდ — სამხრეთში იმამ-ყული-ხანი, ჩრდილოეთში დაუდ-ხანი...

ტფილისისკენ მოჰქრის დავით უნდილაძე, განჯა-ყარაბაღის ბეგლარბეგი, „ტფილისის გამგებელი“, შაჰ აბასის „რჩეული გურჯი“, დიდი მისიით აღჭურვილი დიასპანი, — მან ზავი უნდა ჩამოაგდოს ქართველ-სპარსელთა „ოცწლიანი ომის“ თავზე.

სიხარულით აღვსილი მოჰქრის უნდილაძე საქართველოსკენ.

გათათრებულ ქართველსაც უხარია უძლეველობა მისი დიკარგული სამშობლოსა.

უხარია, რომ არც ერთ უნდილაძეს — არც მამას და არც შვილებს — არასოდეს ქართველი კაცის სისხლი არ დაუქცევია...

ტფილისში. 1626 წელი

საზავო მაგიდას უსხედან „მოპირდაპირენი“, ერთი — საქართველოს მხრივ, მეორე — სპარსეთის მხრივ, და ორივენი არიან ქართველნი.

შეთანხმდნენ თეიმურაზ მეფე და დავით უნდილაძე.

შაჰ აბასი ცნობს თეიმურაზის უმაღლეს ხელისუფლებას „მის გურჯისტანში“. თეიმურაზიც კმაყოფილებას გამოთქვამს იმის გამო, რომ „მისი სისხლის დასაქცევად აღმართული ყი-

ზილბაშური მოწამლული მახვილები შაპის ბრძანებით ჩაგებულია ქარქაშებში, და თავის მხრივ ქართველთა მეფე პირობას იძლევა, „თურქული ხალათი გაიძროს“ და სპარსული ჩაიცვას“. რაც შეეხება „გამზრდელთან გაზრდილის“ პირად გამოცხადებას, თეიმურაზს ამჯერად არ მიაჩნია თავისი თავი „ღირსად ესოდენ დიდი პატივისა“ და შეეცდება მომავალში ჩაიღინოს „ისეთი საქები და მოსაწონი საქმენი“, რომ პირნათლად წარსდგეს „აღლაპის ჩრდილის“ წინაშე.

მოლაპარაკება დასრულდა თუ არა, დავით უნდილაძემ ისფაჰანს ფაიქი აფრინა და შაჰ აბასს აცნობა: თეიმურაზ მეფე ჩვენი სიახლოვის, „მორჩილებისა და დამჯერობის შარაგზას ადგასო“.

შაჰი კმაყოფილი იყო. საქართველოს მხრიდან „საშიშროება-მოხსნილს“ შეეძლო უფრო თამამად და გულსრულად შეეტია ოსმალებისთვის.

იმავე წელს იმამ-ყული-ხან უნდილაძემ ბაღდადი იხსნა თურქთა ალყისაგან. უნდილაძის „ძლევა-გამარჯვებისა და ოსმალთა ლაშქრის მარცხის ამბები მთელს ქვეყანას კიდით-კიდე მოედო“.

ერთი სასიხარულო ამბავი სტამბოლიდანაც შეიტყო ერანის ხელმწიფემ: მომკვდარიყო მეჰმედ-ფაშა, თურქეთის დიდი ვეზირი, ტომით ქართველი...

მაგრამ ერთი ფრიად სამწუხარო ამბავიც შეატყობინეს შაჰს იმ დღეებში — იოთამ-სულთან გურჯის მოულოდნელი სიკვდილი. იოთამი შაჰის აღზრდილი ყოფილა, ძალიან ერთგული, ჭკვიანი და მამაცი ჭაბუკი. იგი დარუბანდის მმართველად წარუგზავნია ხელმწიფეს. დარუბანდშივე მონკვდარა რაღაც უცებისი სიკვდილით იოთამ გურჯი.

ასე გამოვიდა: ერთი „ნაქართველარის“ (მეჰმედ-ფაშა) სიკვდილმა ძალიან გაახარა შაჰ აბასი, მეორის (იოთამ გურჯი) სიკვდილმა კი ძალიან დაამწუხარა.

.

მთელი დღე ნადირობდნენ ალაზნის ველზე თეიმურაზ მეფე და დავით უნდილაძე.

მაინც არ ჰგავდა ნადირობას.

მთელი ღამე სანადიმო სუფრას უსხდნენ.

მაინც არ ჰგავდა ნადიმობას.

საქართველოს ჭირვარამზე მსჯელობდნენ, დავობდნენ, პა-
ექრობდნენ.

მათი იღუმალი, ზოგჯერ ზახშერეული, ზოგჯერ ნერვიული
ხმა ძილს უფრთხობდა ტყეში ჩაბუღრებულ ნადირს და ფრი-
ნველს.

ღამე შემოაცვდათ.

ვარსკვლავები შეადნენ ზეცას.

ფეხზე წამოდგნენ — ქართველი მეფე და ქართველი ბეგ-
ლარბეგი.

ხანჯლები გაიძრეს.

ერთმანეთს ვერცხლი აათაღეს ვერცხლის ქამართაგან.

ღვინით ავსებულ ყანწში ჩაჰყარეს ანათალი.

ნახევრამდე სულმოუთქმელად დალია თეიმურაზმა.

სულმოუთქმელად დასცალა მეფის ნასმური სასმური უნ-
დილაძემ. ერთმანეთს გადაეხვივნენ.

გაზაღვთის წინააღმდეგ ვითარდები

მტერნო, თქვენ იცით, ჩემის ხმლით
მრავალჯერ დაიწინებებით!

გიორგი სააკაძე

გიორგი სააკაძე იმერეთში იყო, მეფე გიორგი მესამის კა-
რზე.

ქუთათისის სასახლე დიდის ზარზედგომით შეხვედროდა სახე-
ლოვან ქართველ გმირსა და მის ამაღლას.

თათბირი ჰქონდა მოურავს დასავლეთ საქართველოს მე-
ფესთან, მის სახლეულთან, მთავრებთან, საერო და სასულიერო
წარჩინებულებთან. ბჭობას მალაქია კათალიკოსიც ესწრე-
ბოდა.

ახლა იმერეთის მესვეურებს მოუწოდებდა სააკაძე „ყოველი საქართველოს“ შესაკავშირებლად და საერთო მტრის (ამჯერად სპარსელების) წინააღმდეგ ერთიანი ძალებით საომრად.

იმერეთის თავკაცი — მეფეც, თავადიც, ერიც და ბერიც — დიდის გატაცებით და აღტაცებით შეხვდნენ მოურავის მოწოდებას.

ქუთათისიდან გიორგი სააკაძე ოდიშს გადავიდა და ლევან დადიანს ეწვია. ლევანიც დიდის პატივით შეხვდა საარაკო გმირს. სააკაძის განაზრახი — „ყოველი საქართველოს“ გაერთიანებისა უცხო მტერთა დასათრგუნავად — დადიანსაც ხიბლავდა, მაგრამ, როგორც ეტყობა, ერთი რამე მაინც არ მოსწონდა ოდიშის მთავარს; სააკაძე სპარსელებთან საომრად თურქებს ეპატიეებოდა საქართველოში, ლევან დადიანს კი თურქების სისხლი სპარსელებისაზე უფრო მეტად სწყუროდა. ამიტომ დასაჭერებელი უნდა იყოს ეს გადმოცემა: დადიანი ეუბნება სააკაძეს, თუ ოსმალების წინააღმდეგ იომებ, ჩემი სამეგრელოდან ოცდაათი ათასი ხმლით მოგეშველებიო. მაგრამ გიორგი მტკიცედ იდგა თავის გადაწყვეტილებაზე: ქართველთა და ოსმალთა კავშირი სპარსეთის წინააღმდეგ!

მაინც დადიანმა დიდი სტუმარი ყიზილბაშებთან ომში თანადგომის დაპირებით გამოისტუმრა.

ისევ ქუთათისში მობრუნდა გიორგი სააკაძე.

კიდევ ერთი საწადელი ამბავი მოხდა იმერეთს: გიორგი სააკაძის ვაჟმა — უკვე სახელმწიფეკილმა ახალგაზრდა გმირმა, ავთანდილმა, ცოლად შეირთო გიორგი მესამის ასული — ხვარამზე.

რა იყო ეს, სიყვარული თუ პოლიტიკა? ალბათ, ერთიც და მეორეც.

ქორწინება განამტკიცეს „ფიცის წიგნით“, რომელშიც ეწერა: „...ესე ფიცი და პირი გიბოძე ჩვენ, მეფეთ მეფემა პატრონმა გიორგიმ და ძემან ჩემმა პატრონმა ალექსანდრემ, მამუკამა და როსტომ — თქვენ, მოურავს პატრონს გიორგის, ასრე რომე ჩემი ქალი ბატონი ხვარამზე გულგაწმენდით თქვენის შვილის ავთანდილისათვის მომიცემია...“.

იმერეთიდან გიორგი სააკაძე ქართლში დაბრუნდა, მისგან

გათავისუფლებულ ციხეებს ჩამოუარა, ციხიონები გაამხნევა, განამტკიცა და ტფილისზე დაცემა ერთჯერ კიდევ გადაწყვიტა.

მოურავი თავისი გუნდით სოფელ სხალნარში დადგა და ერთგული მსახური ინაშვილი ტფილისში ჩაგზავნა იდუმალ, იქაურობის დასაზვერავად.

ყიზილბაშებმა სააკაძის მოსვლა შეიტყვეს, გაფრთხილდნენ და ციხე-გალაგანიც საგანგებოდ გაამაგრეს.

გიორგიმ ქალაქზე იერიში უიმედოდ ჩათვალა და ძველ სამცხისაკენ გაქუსლა.

მთელი ზამთარი სამცხეში იდგა.

მთელი ზამთარი საქართველოს „ხვალინდელი ბედის“ ხილვებით ცხოვრობდა, ფიქრობდა, ბორგავდა, იბრძოდა, იტანჯებოდა.

გაზაფხულმა გამოიჭიატა თუ არა, მაშინვე ქართლისაკენ წამოემართა თანამებრძოლ-თანატოლვილი ამალით.

აშკარა განხეთქილება ჯერ კიდევ არ ჩამოვარდნილიყო თეიმურაზსა და სააკაძეს შორის. ჯერჯერობით „შორიდან ნაგრძნობი“ იქვენეულობითა და უნდობლობით ზვერავდნენ ერთმანეთს მეფე და მოურავი.

ქართლის თავადთაგან ზოგი საქართველოს ღალატს დასდგომოდა, ზოგიც შინაური მტაცებლობისა და შინა-სისხლის დაქცევის უბოროტეს გზას.

გამორჩევით უნდა სწყყენოდა გიორგი სააკაძეს მისი უახლოესი ადამიანების — სიძისა და ცოლისძმის — ავკაცური ქცევანი. პირველმა — იასე ქსნის ერისთავმა, როგორც უკვე ითქვა, ქვეყნის მოღალატე ანდუყაფარ ამილახორთან ერთად წილი დაიდო დაზნელთა სახლეულის გაწყვეტაში და მათი ავლადიდების დატაცებაში; ხოლო მეორემ — ზურაბ ერისთავმა ყველა მანამდელი ქართველი ფეოდალი „დაჯაბნა“ შინაურთა, თანამომეტა და თანამემამულეთა ხოცვა-ჟლეტათ.

ერწო-თიანეთსა და თუშ-ფშავ-ხევსურეთს მიხდომია დასაპყრობად და დასაყმევებლად ზურაბ ერისთავი, მრავალი სისხლი დაუქცევია მთიელი ქართველობისთვის, მრავალიც მისთვის დაუდენია თავისუფლების მოტრფიალე მთას.

საღეჭსო, სასიმღერო და საცრემლო გამხდარა ზურაბ არაგვის ერისთავის საძრახისი ლაშქრობანი თუშ-ფშავ ხევსურეთში.

„ზურაბს ჭავრი ჰქლავს ორისა;
ხევსურეთისა, ფშავისა...“

ხევსურეთშია, ზურაბო,
ვერ იქამ ერისთობასა,
გაგიწვრილდების კისერი,
ვერ შესძლებ ქვეთობასა.

ზურაბისთანა ბატონი
ვინღა გამოვა ხმლიანი,
განჯა მირანა ამტვრივა,
დღესაც კი სახელია.

შენ, ერისთავო დიდოს მთისაო,
წყალი ჩაგიდის არცვისაო,
არკი გეტყვიდი, ჩემო ბატონო,
ყიდვა ნუ დცი შენის ყმისაო,
ბევრი გასყიდე ქალი და რძალი
გარდახატული თვალწარბ თმისაო.

დღეშეთ იყრების ლაშქარი,
არ ერგებიან გზანიო,
სასმელად არ ეყოფიან
ბაზალეთურნი ტბანიო,
სადგომლად არ ეყოფიან
თრიალეთურნი მთანიო.

გუდელას დაჭდა ზურაბი,
იტირდა ეგრ რთ ქალიო:
„დამაქლდა სათვალავშიგა
სამოცი ხმალოსანიო“.
„გაიქექ, ერისთვიშვილო,
მოგდევნე ხევსურთ ყმანიო,
თორ კიდევ ჩაწითლებიან
კეოს გორ ქცეულანიო.
აგერ ლულის თავს გახენე,
მძიმე გადმოდგა ჭარიო“,
რბოლით დაკრიფნა ზურაბმა

გრძელნი არაგვის გზანიო,
ჩარგლის კართ დახედნენ ფშავლები
აყოლეს სისხლის კვალიო.
ცოლი ეტყოდა ზურაბსა:
„რა დარ მოგიდეს მკვდარიო“?

„დადეგ, დაგვეხსენ, ზურაბო,
ნარჩომნ ორთ შენი ხმლისანი,
თორ ჩვენაც შამოგეცდებით,
მესხნი ჩვენაც გვეონ წყლისანი“.

არ კი ვითხარა, ზურაბო,
ფშავლების ხელი სენია,
იფხუშელთ გამოგაქციეს,
დღე დაგაყენეს ცხელია.
სირბილით გამოგავლიეს
ჩარგლის ქალი გრძელია,
კართანას გადმოსეესა
მსახურთ გიკიდეს ხელია,
თვალის ველში ჩამოხველ,
იქ მოგაგონდა ცხენია.

ზურაბ, რა უყვენ ლაშქარი
ნაკრეფნი შვიდის თვისანი
ჩაუშვებ მათურაშია,
თვალნი გაგიწყდეს ზთისანი,
დაგიხვდეს ფშავლიშვილები,
არწივნი მალღის მთისანი,
შამოგეწივენეს მთაზედა,
გაწითლებივენეს ქვიშანი.

ზურაბო, ერისთვის შვილო,
რა თავი გედიდებაო?
მაგ შენსა აზნაურებსა
ყორნები ეზიდებაო!

ზურაბმ აიფრო ქვეყანა,
ბევრს ვაქს უტირა დედაო,

ბევრს ქალს გაუხსნა საკინძი,
უკვიმა ძუძუზედაო.
.

ჩვესურებ ზინკლად ჩაყარა,
ფშავლებ შაუნთო შეშადა,
გაუტეხელი მოხვევ
გაიმეტ დასაჩეხადა.

.

გიორგი სააკაძემ თეიმურაზისა და ზურაბ ერისთავის ფარულ „განდგომის“ თვალი აავლო და ისევ მათი თანადგომითა და „თანაბრძოლით“ განაგრძო ბრძოლა ქართლის ციხეებში ჩასაგრებულ ყიზილბაშებთან.

ჯერ გორის ციხე გამოჰვლიჯა ხელიდან მტერს: იქ მდგარი ყიზილბაშობა ამოსწყვიტა და ქართული ციხიონი შეაყენა.

მერე ქართული სოფლების საძარცვავად და საწიოკებლად ათარეშებულ ოს ფეოდალებს მიუხტა გიორგი სააკაძე. მიუხტა და ზედიზედ აიღო ოსური ციხეები და საფარ-სამალავები. საწუხრად მხოლოდ ეს დარჩა სააკაძეს: ერთგული თანამებრძოლი თამაზ მაჩაბელი მოუკლეს საფრიდან ნასროლი ისრით.

მკითხველს ახსოვს წინასწრობილი: ქვემო ქართლის დიდმა თავადმა ქაიხოსრო ბარათაშვილმა მარაბდის მარცხის შემდეგ ქართველობა ყიზილბაშობაზე გაცვალა და ბირთვისის დიდი ციხესიმაგრე მტერს მიართვა.

მთელი ღამე მუხლჩაუკრეფავად იარა მოურავმა და მისმა „თანამოთარეშე“ გუნდმა. უთენია მივიდნენ ტბისში და ფიცხლავ თავს დაესხნენ ქაიხოსრო ბარათაშვილის სასახლეს, გამოვიდა ქაიხოსრო, სპარსულად ინით წვერშედებილი.

წამსვე დაეტაკნენ პაპუნა ვაშაყაშვილი და თამაზ ქარციძე და შეუკრეს ხელები ქაიხოსროს.

მაპატიეთო, იბღავლა მოღალატემ.

ბირთვისის ციხიდან ყიზილბაშთა ციხიონი გამოიყვანე და სიცოცხლეს გაჩუქებო, უთხრა გიორგიმ.

მეტი რა ჩარა ჰქონდა ბარათაშვილს, და „გამოიტყუა“ ბირთვისიდან ყიზილბაშები, სულ ხუთასი კაცი.

დაეძგერნენ ქართველები, თოფ-დამბაჩა, და ხმალ-ხანჯალი დააყრვეინეს, ხუთასივეს თავები დააგდებინეს და მძოვ-

რადქცეულნი ხევში გადაჰყარეს ყვავ-ყორანთა და მხეცთა სა-
ძიძგნად.

ბირთვისში ქართველები ჩადგნენ.

ქაიხოსრო ბარათაშვილს და მის ძმას ხოსიას სააკაძემ
ბორკილები გაუყარა და კიკანათბერის ციხეში ჩამწყვდია.

ბირთვიდან ლორესაკენ გაემართა სააკაძე. აქაური მე-
ლიქები — ათაბეგი და ზაქუმი — შაჰ აბასის ერთ-
გულ სამსახურში იდგნენ და სპარსელებს თავგამოდებით ეხ-
მარებოდნენ ქართული მიწაწყლის აოხრებაში.

იერიში მიიტანა სააკაძემ ლორეს ციხეზე.

ათაბეგსა და ზაქუმს არც ცოლ-შვილი გახსენებიათ, არც
ქონება და ავლა-დიდება, — ყველაფერი უპატრონოდ დააგ-
დეს, საიდუმლო ხვრელით გაძვრნენ და სპარსეთს გადაიხვეწ-
ნენ.

ქართველები ლორეს დაეუფლნენ.

უკვე „ყოველი ქართლი“ — „ქვემოც“, „ზემოც“ და „მი-
დაც“ — სააკაძის კურთხეული ხმლის წყალობით დახსნილი
იყო უბოროტესი ყიზილბაშური უღლისაგან.

მხოლოდ ტფილისი ერთადერთი ჩარჩენილიყო ქართლის
ბაგრატიონთა ნაბოლარა-ნაშთის, სვიმონ-ხანის, ხელში.

ქართლის გათავისუფლების შემდგომ გიორგი სააკაძემ და-
ლაშქრა შამხალი და დაღესტანი. შავი დღე გაუთენა, სააბრა-
გო საფარ-საბუღარნი მიუნგა, მოუნგრია და ქართულ მიწა-
წყალზე თარეშის ქინი დიდი ხნით აღუკვეთა იქაურ ავაზაკ
ფეოდალებს.

.

ქართლ-კახეთი მტრისგან დახსნილი იყო — გიორგი სააკა-
ძის წყალობით.

ქართლ-კახეთი გაერთიანებული იყო — გიორგი სააკაძის
წყალობით.

ქართლ-კახეთს ერთი მეფე ჰყავდა — გიორგი სააკაძის
წყალობით.

ქართლ-კახეთის ის „ერთი მეფე“, გინა „ორივე ტახტის
მკერი“, თეიმურაზი იყო — ესეც გიორგი სააკაძის წყალობით.

მაგრამ ერთ დღეს სააკაძის სიძულვილით აღუღებულმა

თავადებმა თეიმურაზს მოახსენეს: გიორგი სააკაძეს ქართლის გამგებელი დაუნიშნავსო!

ქართლის გამგებელიო?!

მეფის დაუკითხავად გაბედა ეს მეფის ყმა სააკაძემ?

ასე გამოდის, თეიმურაზ მეფეს მეფედ აღარ აგდებს სააკაძე; ან იქნებ ქართლის წართმევასაც უპირებს „კახეთის ბატონს“!

მაინც ვინ დაუნიშნავს კადნიერ მოურავს „ქართლის გამგებლად“?

ქაიხოსრო მუხრან-ბატონი!

აჰა, გასაგებია! ქაიხოსრო — სააკაძის სიძის (მარაბდის ბრძოლაში მოკლული თეიმურაზ მუხრან-ბატონის) ძმა თანაც, მუხრან-ბატონები ხომ ბაგრატიონთა „შტოები“ არიან ალბათ, მალე ქართლის მეფედაც გამოაცხადებს ქაიხოსრო მუხრან-ბატონს „ყოვლის შემძღობელი დიდი მოურავი“, რომელსაც თურმე თურქეთის სულთანი „ქართლის მპყრობელ მოურავ-ხანს“ უწოდებს!

გასაგებია, ყოველივე გასაგებია, რასაც უმზადებს „უჯიშო სააკაძე“ თეიმურაზ მეფეს!..

ყველაფერს რომ თავი დავანებოთ, მუხრან-ბატონის „ქართლის გამგებლობამდე“ აღზევება კი არა, თვითონ თეიმურაზი აპირებდა მუხრანი მუხრან-ბატონებისთვის წაერთმია და თავისი ვაჟისათვის — დათუნასათვის მიეცა საუფლისწულოდ (ეს ერთი ძე შემორჩინოდა თეიმურაზს ხორეშან დედოფლისაგან)...

გამოხდა რამდენიმე დღე და ახლა ეს მოახსენეს თეიმურაზს: ქუთათისში ყოფნის უკვე სააკაძეს უთქვამს იმერეთს მეფე გიორგი მესამისათვის, თუ ღმერთმა ხელი მოგვიმართა და საქართველოს გაერთიანება შევძელით, მეფედ შენი შვილი ალექსანდრე უნდა დავსვათო.

აჰა, უყურეთ, რა ზრახვები ჰქონია ორ გიორგის თეიმურაზის წინააღმდეგ! ალბათ, ამიტომაც დამოყვრებულან იმერეთის მეფე და სააკაძენი...

მძიმე ფიქრებში ჩაიძირა თეიმურაზ მეფე.

სულ გამოიცვალა, „სულ სხვა კაცად იქცა“ — ისედაც წუთისოფლისგან განაწამები, ოჯახით ამოწყვეტილი და ქვეყნი-

დან ქვეყნად ნალტოლვარი და ნათრევი, სისხლისმაქცევარი და სისხლდაქცეული.

საწუთრო საბოლოოდ აევსო შხამით, მოყვასისადმი ეკვით, შფრით და უნდობლობით...

ზურაბ ერისთავი გამოიძახა.

მარტონი ჩაიკეტნენ და ჩაირაზნენ.

• • • • •

ასრე სჭირს საქართველოსას
დიდებულთ, გინა მცირეთა,
ახვავდებიან, იტყვიან:
„უჩემოთ ვინ იმღერეთა?“

ა რ ჩ ი ლ ი

1626 წლის შემოდგომის პირი დამდგარიყო.

მეფე თეიმურაზი ცხინვალს იდგა ამალით.

აქ იყვნენ: გიორგი სააკაძე, ზურაბ ერისთავი, იოთამ ამილახორი, იასე ქსნის ერისთავი, ქაიხოსრო მუხრან-ბატონი და მროველი ეპისკოპოსი დომენტი ავალიშვილი.

მეფის სადგომიდან გამოვიდა სააკაძე.

სამი კაცი უცდიდა გარეთ. მიეგებნენ, გაინაპირეს და მოესხნენ იღუმალი ხმით: ძალიან მძიმე ამბავი უნდა შეგატყობინოთ, მაგრამ წინასწარ შემოგვფიცე, რომ ჩვენს სახელებს არ გაამჟღავნებო.

გაოცდა გიორგი. ასეთი რა ამბავია, ფიცის გარეშე ვერ გითქვამთ სათქმელიო. ისინი კი არ იშლიდნენ: ფიცი გვითხარ და მოგახსენებთო.

სხვა გზა აღარ იყო და შეპფიცა გიორგიმ.

ხვალ მეფე თეიმურაზს შენი სიკვდილი აქვს დანიშნულიო! — თქვეს იღუმალმა მაცნეებმა.

სიკვდილიო?!

სიკეთის მეტი რა გამიკეთებია მეფისთვის, გინა ქვეყნისთვის და სიკვდილს რაღად უნდა მემართლებოდნენო?! — და იგმინა განცვიფრებულმა და გოგნებულმა სააკაძემ.

ჩააგონესო მეფეს: სააკაძე იმდენად გათავხედდა, საყმოდ თავს აღარ ვიდებს, დიდ „სახელოებსაც“ შენს დაუკითხავად არიგებს, ხალხსა და ჯარს თავის ნებაზე ატრიალებს და, დღეს თუ ხვალ, სამეფო ტახტსაც წაგართმევსო, მიუთხრეს მეფის განაზრახვის მიზეზები მაცნეებმა მოურავს.

ყოველივე ენიშნა სააკაძეს: ისევ თავადები მიმღვრევენ წყალსო. იოთამ ამილახორი აშკარად ემტერება მოურავს, ზურაბ ერისთავიც გაურბის და რაღაც საეჭვოდ იღრინება; ვერ იქნა და ვერ მოინელეს ბარათაშვილებმა, ციციშვილებმა და ჯავახიშვილებმა მოურავის ზრუნვა „მისებრ უჭიშო“ მდაბიო ხალხზე; ვერ მოინელეს მისი ესოდენ აღზევება, სახელოვნება და სახელგანსმენილობა; იქნებ ამასაც უჩიჩინებენ თეიმურაზს თავადები, რომ სააკაძის „მომავალი გმირი“ (გინა — ერთხელმწიფე მომავალი ერთიანი საქართველოსი) თეიმურაზი კი არა, იმერელი უფლისწულია...

გიორგიმ მუხრან-ბატონსა და ქსნის ერისთავს შეატყობინა მაცნეებისგან მოტანილი ამბავი: თურმე თეიმურაზ მეფე მოკვლას მიპირებსო.

ქაიხოსრომ და იასემ არ დაიჯერეს თეიმურაზის ასეთი მუხანათობა და გიორგისაც ეს უთხრეს: ყურს ნუ დაუგდებ, ეგ ყოველივე იმისთვის არის მოჭორილი, მეფესთან მტრობა ჩამოგიგდონ და ქართლი შინაური აშლილობით ააფორიაქონო.

მაგრამ არ ეშვებოდნენ გიორგის „ერთგული ადამიანები“ — უეჭველად სიკვდილს გიპირებსო თეიმურაზი.

მაინც რაის საბაბით მიპირებენ მოკვლასო, იკითხა მოურავმა.

ლუარსაბ მეფის მოკვლისთვისო, იყო პასუხი.

როგორ, ლუარსაბ მეფის სიკვდილს გიორგი სააკაძეს აბრალევენ?!

ერთი უყურეთ, თურმე შადიმან ბარათაშვილისა და შაპაბასის ცოდვებსაც სააკაძეს აყრიან კისრად!..

ამდენი ფრთხილი განცლა-გამოსვლა, იღუმალი ჩურჩული და „გაყენ-გამოყენება“ შეუმჩნეველი არ დარჩენია თეიმურაზს.

ასეთი რა მოხდა, რომ მთელი დღე მიილალ-მოილალეობით

და ჩურჩულითაც ველარ დაილაღეთო, შემოუთვალა გაჯავრებულმა მეფემ მოურავს.

გიორგიმ პროველი ებისკოპოსი დომენტი ავალიშვილი გაიწვია და შეევედრა: იქნებ გაისარჯოთ, მეფესთან მიმოციქულოთ და შემიტყოთ, რას მემართლება, სიკვდილს რომ მიპირებს; აქამდე ჩემის ხმლითა და ჩემის გულით მისი მონა-მორჩილი გახლავართ და რაისთვის მიმეტებსო ასე სასტიკად!

შევიდა პროველი მეფესთან და მოახსენა მოურავის დანაბარები.

გაიკვირვა და გაიოცა თეიმურაზმა: ეს ვინ მოიგონა, რომ ჩემს ერთგულსა და თავდადებულ მოურავს თითქოს სიკვდილს ვუშზადებდეთ! ახლავე მაცნობოს გიორგიმ სახელი ეგზომ ცრუ ამბის მომჩმახავისაო! — ასეთი ბრძანებით გამოუშვა მეფემ დომენტი ავალიშვილი.

გიორგიმ მაცნეების გამეღავნებაზე ცივი უარი თქვა, — ფიცი მაქვს მიცემულიო — და თან ეს დააბარა მეფესთან ზელმეორედ შებრუნებულ პროველს: თურმე ლუარსაბ მეფის სისხლს მე მადებთ და რატომ, რაის საბუთით ინებებთ ესოდენ მძიმე ბრალდებასო?!

და ერთხელ კიდევ შემოთვალა თეიმურაზმა პასუხი:

„ქვეყანამ იცის, ლუარსაბ მეფის სისხლი შენი დაღვრილია, მაგრამ სუფევა დაიმკვიდრა განსვენებულმა და ანგელოზები იცავენ მის მოწამე სულს! ამიტომ მე ლუარსაბის სისხლს არ ვეძიებ და შენც, მოურავ სააკაძეს, შეგიძლია მშვიდად იჯდე შენთვის!“

ყოველივე ნათელი და ნათლად გასაგები იყო.

თეიმურაზ მეფეს, ლუარსაბ მეფის „სისხლის საბაბით“, სააკაძის „თავიდან მოშორება“ ჰქონია გადაწყვეტილი.

გიორგიმ ერთჯერ კიდევ სცადა ნაბრალის ამოვსება, მაგრამ ამაოდ, — ერთჯერ კიდევ გააგონეს მანამდეც ბევრჯერ გაგონილი: აღარ შეიძლება ამის მოთმენა, — რომ სააკაძე მბრძანებლობს ქართლზე, — რომ ტახტზე დაბრძანებული სააკაძის წინაშე თავადები მანამ ვერ დასხდებიან, სანამ თვითონ არ მისცემს დაჯდომის უფლებას, — რომ თავადები სააკაძეს ძალღებვივით ქეშიკში (ყარაულში) უწყებებიან... და სხვა მისთანანი...

უკანასკნელი იყო შეხვედრა მეფესა და მოურავს შორის.
და უკანასკნელად ეს უთხრა გიორგიმ თეიმურაზს:

„ღმერთმა იცის, კახეთის მეფეს, ქართლი მოგეცი, ჩემი
თავიც მოგიძღვენ და თავს შემოგავლე, მაგრამ რა ვქნა, რომ
არც განდომეს და არც ინდომე ჩემი სიცოცხლე. რა გაეწყობა,
— ეგზომი უმადურობისთვის გულში დანას მე არ დავი-
ცემი“

გათავდა.

მეფესა და მოურავს შორის უქარქაშო ხმალი ჩამოეშვა.

ცალ-ცალკე, თავიანთი „ამაღლებით“, სხვადასხვა მხარეს
მიაქროლებდნენ ცხენებს თეიმურაზ მეფე და გიორგი სააკაძე.

„ქართლ-კახეთის ერთიანობა მანამ შეუძლებელი იქნება,
სანამ სააკაძე არ განადგურდება!“ — ფიქრობდა მეფე.

„ყოველი საქართველოს გაერთიანება მანამ შეუძლებელი
იქნება, სანამ თეიმურაზ მეფე არ გაანადგურდება!“ — ფიქ-
რობდა მოურავი.

ქმთაშორისი ომის შემორიანი სუნი ჩამოწვა საქართველოს
ცისგვამში.

მამაზეციერსაც აღარ შეეძლო მისი თავიდან აშორება.

მარსების დამარცხება უმარსებოდ არავის ძა-
ლუძს.

ძველომაუდი ქრონიკა

მე ჩემი უბედურება
ღმერთმ დაჩაწერა ხმაღზედა:
მოგვადი ჩემივე სისხლბ,
ხმალი ვიხმარე ძმაზედა.

ხაღხური

ახლა მთავარი ეს იყო — ვის მხარეზე იქნებოდა ზურაბ ერისთავი.

და უკანასკნელად შეხვდნენ ერთმანეთს „პირველი და მეორე გმირი“ — გიორგი სააკაძე და ზურაბ ერისთავი.

ყველაფერი ერთად გაახსენა გიორგიმ ზურაბს: მამაშენი მუდამ ჩემი ერთგული და თავდადებული მოყვარე იყო, შენ ხომ ჩემი გაზრდილი და საყვარელი ცოლისძმა ხარ. თათრობის უმძიმესი წლებიც ერთად გავგიტარებია, ყიზილბაშებიც ერთად შეგვიმუსრავს მარტყოფისა და მარაბდის მინდვრებზე, ჩვენი წუთისოფლის წილხვედრიც და ქვეყნის ჭირ-ვარამიც ერთად გვიტარებია და ახლა ისეთი რა მოხდა, რომ მე გადამიდექ და თეიმურაზს მიუდექიო?!

— მეფეს ვერ ვუღალატებ, — ცივად უპასუხა ზურაბმა.

— მუხრანს გპირდება და იმიტომ, არა? — მიახალა გიორგიმ.

— შენ კი მუხრანის ბატონი წამომასკუბე თავზე, — შეაგება ზურაბმა.

გიორგი მიხვდა, რომ სამუდამოდ დაჰკარგვოდა ზურაბ ერისთავი.

ცოლისძმას უკვე ალესილი ჰქონია ხმალი სიძის შესამუსკრავად.

— კარგად დაიმახსოვრე, ზურაბ ერისთავო! მე რომ მომკლავენ, მაშინვე ჩემი მკვლელები შენ გწვდებიან ყელში და მუხრანსაც ოხრად დაგიჩვენენ და სიცოცხლესაც! — თქვა და გაშორდა გიორგი სააკაძე არაგვის ერისთავს.

ისევ აფრინა ელჩი იმერეთს და მეფე გიორგი მესამეს შე-
უთვალა: შენი შვილი ალექსანდრე „ქართლის საბატონოდ“
გამზადე და სასწრაფოდ ჯარიც მომაშველე თეიმურაზთან
საომრადო.

იმერეთის მეფემ საბოლოოდ ირწმუნა, რომ თეიმურაზის
დამხობის წყალობით ქართლიც და კახეთიც მისი შვილის სა-
მეფო საკუთრებად გადაიქცეოდა, რაიც თავისებურად „პირ-
ველი საფეხური“ იქნებოდა ქუთათისის ტახტის გარშემო
„ყოველი საქართველოს“ გაერთიანების გზაზე.

და მაშინვე გამოუგზავნა გიორგი მესამემ გიორგი სააკაძეს
იმერთა ლაშქარი, მამუკა ბოქაულთუხუცესის,
ამილბარაბაშიძისა და ხოსია მაჭავარიან-
ის სარდლობით.

სამცხიდან საფარ ფაშამ სააკაძეს მესხთა ჯარი გამოუგზავ-
ნა და ვით (დავითბეგ) გოგორიშვილის სარდლობით.

სანამ იმერლები და მესხები მოაღწევდნენ, მოურავმა მი-
სი მომხრე ქართლელი თავადები შემოიყარა — ქაიხოსრო მუ-
ხრან-ბატონი, ისევ ქსნის ერისთავი და სამეფო აზნაურობა.

საკაძეს და მის მომხრეებს თეიმურაზის მხარეზე გადასუ-
ლი საარაგვოდან კიდევ ჰქონდათ ერთი იმედი. ეს იყო ზურაბ
ერისთავის უმცროსი ძმა გიორგი, სააკაძის ერთგული თანამე-
ბრძოლი ყიზილბაშებთან ბრძოლაში. გიორგი ერისთავს ცო-
ლად ქაიხოსრო მუხრან-ბატონის ასული ჰყავდა. ეს „მოყვ-
რული სამეული“ — გიორგი სააკაძე, გიორგი ერისთავი და
ქაიხოსრო მუხრან-ბატონი — ყველაზე სახიფათო ძალად ეჩ-
ვენა თეიმურაზის ბანაკს.

და ჩააგონეს ზურაბ ერისთავს კახელმა მსტოვრებმა:
უტყუარი ცნობები გვაქვს, უმცროსი ძმა სიკვდილსა და საე-
რისთავოს წართმევას გიპირებსო.

ეჭვითა და უნდობლობით დასწეულლებულმა ზურაბ ერის-
თავმა არც აცივა და არც აცხელა, — შეიპყრო ძმა — გიორგი
და თვალეზი დასთხარა...

საკაძემ საბოლოოდ დაჰკარგა არაგვის საერისთავოს „და-
ბრუნების“ იმედი.

ზურაბ ერისთავი მტკიცედ დამდგარიყო თეიმურაზ მეფის
„მარჯვენა ხელად“.

ქართლიდან კიდევ ერთი ძლიერი თავადი გადასულიყო კახელთა ბანაკში. ეს იყო იოთამამილახორი.

მაშ, თანამოძმეთა და თანამესისხლეთა ორი მტრული ბანაკი!

თეიმურაზ მეფისა — დუშეთს, ზურაბ ერისთავის სასახლესთან.

მოურავ სააკაძისა — მუხრანს, ქაიხოსრო მუხრან-ბატონის სასახლესთან.

შავი ღრუბლებით დატვირთულა საქართველოს ცისგვამი.

წვიმს კოკისპირულად.

გზები ლაფით აივსო. მინდვრები დაიტბორა:

მცირედ გადაიკარა თუ არა, გიორგი სააკაძემ ბანაკი აჰყარა და დუშეთისაკენ გაემართა.

თეიმურაზმა „მტრის“ წამოსვლა შეიტყო, ლაშქარი დუშეთიდან გაიყვანა, ბაზალეთის ტბასთან დადგა და საომრად გაემზადა.

საკაძეშეაღწია „მტრის“ მოძრაობა და თვითონაც ბაზალეთს მიაშურა.

თითქოს ნაწვიმარი არ კმაროდა, — კახელებმა ბაზალეთზე მისასვლელი გზები წყლით „დამატებით“ დატბორეს, — იქნებ სააკაძე და მისი ლაშქარი შიგ დაეფლოს და უფრო იოლად გავუსწორდეთო!

მაგრამ მოურავი იმ ადგილებს კარგად იცნობდა, „მტრის“ განზრახვაც ადვილად შეიცნო, დაგებულ მახეს გვერდი აუქცია, ბაზალეთის ტბას სხვა გზით მიადგა და „თეიმურაზელთა“ პირისპირ საომრად დააწყო ლაშქარი.

1626 წლის გვიანი შემოდგომა, ბაზალეთის ომი — სამგლოვიარო სამანი ქართული მატიაჩისა!..

დგანან და გასცქერიან ერთმანეთს სამკედრო-სასიციციხლო შერკინების მოლოდინში, გარინდებულნი, შეგრძნებულნი, ჯადოქმნილნი, სატანიტ „მხარდამშვენებულნი“.

თეიმურაზის ამალაში დუქლი დაარღვია ედიშავაჩინაძემ, ახალგაზრდა კახმა თავადმა:

„ჩვენზე მეტი ჯარი ჰყოლია სააკაძეს. ტყის ტევრივით ჩამდგარან და შავ ზღვასავით ჩაგუბებულან“.

„ჰო, ბევრი არიან“, — უგემურად თქვა თეიმურაზმა.

„არაფერია, მეფევე ბატონო, — მადლობა ღმერთს, ჯერ არ მომხდარა, ყმას რომ პატრონზედ გაემარჯვოს“, — ჩაილაპარაკა ზურაბ ერისთავმა...

მძიმე, ლაფიანი გზები გამოეწვლო სააკაძეს და მის ჯარს, დაქანცული იყვნენ, სახსარმოშლილნი.

გიორგის უნდოდა, როგორმე იმ დღეს ბრძოლას მორიდებოდა და ჯარი დაესვენებინა, მაგრამ იმერლებმა და სამცხელებმა მოითხოვეს, — რაკი საომარ ველზე მოვსულვართ, ახლავე გავგიყვანე ბრძოლაშიო.

ეტყობოდა, არც მოპირდაპირე ბანაკი აპირებდა ბრძოლის გადადებას...

მდუმარედ იდგა სააკაძე, ხმლის ვადაზე ხელჩამოსვენებული (ეს ხმალი ჯერ ქართველ კაცს არ მოხვედროდა!).

„ყოველივე ეს ხდება იმიტომ, რომ მე და ის ვერ შევტრიალდით... მე და ის!“ — გაუელვა გიორგის.

უცებ თითქოს რაღაც ახალი აზრი იაზრა, ინაშვილი მიიხმომო, იდუმალ ელაპარაკა და „მტრის“ ბანაკში გაუშვა.

ინაშვილი თეიმურაზს ეახლა, მდაბლად თავი დაუტკრა და მოახსენა:

— მოურავმა გიორგი სააკაძემ გთხოვათ, ნება მომეცითო პირადად გაახლოთ ჩემი თავი ბრძოლაშიო, ძალიან მინდა ჩემი სიბერეიკაცე შენს სიყმაწვილესთან შერკინებაში გამოვცადოო.

წამოიქაჩნენ ზურაბ ერისთავი და კახელი თავადები, მაგრამ ისევ ყველას დაასწრო თეიმურაზმა:

— მოხარული ვარ, ხმალდახმალ შეგხვდეთ სახელოვან მოურავსა. ოღონდ მითხარით ბრძოლის ველზე შესაცნობი ნიშნეულობა!

— თვითონ დამაბარა მოურავმან: ლურჯა ცხენზე შევჯდებიო, შავ კურტაკს ჩავიცვამ და შავ მუზარადს დავიხურამო, — მიუგო ინაშვილმა.

— „კეთილი. მაშინ ჩემი ნიშნეულობაც ინებოს სააკაძემ: შავი ცხენი, თეთრი წამოსასხამი და თეთრი თავსარქმელი! — შესძახა მეფემ.

ინაშვილი სააკაძესთან დაბრუნდა.

ზურაბ ერისთავი მივიარდა თეიმურაზს: არ არის საკადროსი, რომ მეფე თავის ყმას შეეებასო; ისა სჯობია, თქვენს მაგივრად თქვენი ნიშნეულობით სხვა ცინმე შეებრძოლოს მოურავსო.

— მე გავალ სააკაძესთან საბრძოლველად! — იყვირა ედიშა გაჩინაძემ.

ყველამ შეუქო გაბედულება ჭაბუკ თავადს.

მეფის შავი ცხენი მოჰგვარეს გაჩინაძეს, თეთრი წამოსასხამი წამოსახეს საომარ კურტაკზე, თეთრი თავი დაჰხურეს მუზარადზე.

გიორგი სააკაძეც მზად იყო, ლურჯა ცხენზე ამხედრებულდი, შავი საომარი კურტაკით და მუზარადით გამოწყობილი.

დავით გოგორიშვილი მოიხმო სააკაძემ და იმასაც თავისი ერთი ხელი საომარი აღჭურვილობა აასხა, თავის მარჯაფ ცხენზე შესვა და უთხრა: ბრძოლაში ისე გახვალ, როგორც გიორგი სააკაძეო.

თურმე ეს ყოფილა მოურავის განზრახვა: ბრძოლაში „ორი სააკაძე“ მიიღებს მონაწილეობასო; მე რომ თეიმურაზს შეეებებები, „მეორე სააკაძე“ (გოგორიშვილი) დანარჩენებს დაერევასო; „მტერი“ ნამდვილ სააკაძეს ვერ ამოიცნობს, დაიბნევა, დაფრთხება და აირ-დაირევას*.

ომი დაიწყო.

გაალმასებით ეკვეთნენ ერთურთს ერთი ცის ქვეშ შობილნი, ერთი დედის რძენაწოვარნი, ერთ ემბაზში განათლულნი და ერთი დიდედას ხელით ჭიპმობანილნი.

„შესდექით, ძმანო უგუნურნო!“ — არ იქნა და არ გაისმა ეს შეძახილი, არც ზეციდან, არც მიწიდან.

* ოდესღაც (ძვ. წ. 280) ეპირის მეფე პიროსი მოიქცა ასე რომაელებთან შეტაკების დროს: ერთი თავისი თანამებრძოლი, მისებრ გოლიათი, თავისი საომარი აღჭურვილობით გაუშვა ბრძოლაში. ასე იბრძოდა „ორი პიროსი“. თუმცა კინალამ ძვირად დაუჯდა ასეთი „გამოგონება“ მეფეს: ის „გამოგონილი პიროსი“ რომაელებმა მოჰკლეს, ეპირელები „მეფის სიკვდილით“ დაფრთხნენ და უკუიქცნენ. პიროსმა მუზარადი მოიძრო და თავისი მეომრები ძლივს დაარწმუნა, რომ „ნამდვილი პიროსი“ ცოცხალი იყო.

მხოლოდ ომის ღმერთი თახთახებდა ცის კამარზე, სის-
ხლის წყურვილით გახელებული.

გამხეცებით სჩებდნენ ერთმანეთს ერთსისხლიერნი.

ძმას ძმის მოკვლა უკეთ ეხერხება, რამეთუ ძმამან ძმისა
უკეთ იცის, სად უნდა დაჰკრას, რომელ ადგილზე დანაკრავი
უფრო იოლად აღმოახდენს სულს.

„სააკაძე!“ — იყივლა ედიშა ვაჩნაძემ და ფიქრის სისწრა-
ფით მიაშურა ლურჯა ცხენზე ამხედრებულ, შავი კურტაკით
შემოსილ გოლიათ მხედარს.

„ბატონს თეიმურაზს ვახლავარ!“ — დაიქუხა სააკაძემ და
თვითონაც გაექანა შავ ბედაურზე აღმჯდარ, თეთრად მოკაზ-
მული მხედრისაკენ.

ერთმანეთს შეასკდნენ „შავი“ და „თეთრი“ რაინდები.

შუბები შეაღწეწეს ერთურთს ფარებზე.

წამსვე ხმლები ამოაგელეს.

მიხვდა სააკაძე, რომ მისი მოპირდაპირე არ იყო მეფე.

დაასწრო ვაჩნაძემ და თავზე უხეტქნა ხმალი სააკაძეს.

„მუზარდი გაუტეხა, მაგრამ გერში ვერ ააღებინა“.

ტკივილს აღარ დაუცადა გიორგიმ. ელვასავით მოიქნია
ხმალი. თავგაპობილი და უსულოქმნილი დაენარცხა მიწას
ედიშა ვაჩნაძე.

„ნეტავ იმ ყმასა, თავის პატრონს რომ ენაცვალოს“ —
სინანულით ჩასძახა სააკაძემ მომაკვდავ ჭაბუკს.

და უმაღვე რაღაც უცნაური, მანამდე განუცადებელი
სისუსტე იგრძნო გიორგიმ მთელ სხეულში.

სახსრები მოშლოდა და მოსხლეტოდა, რეტდასხმული
თავი უსამველოდ დამძიმებოდა.

ბრძოლის ველი აიჭრა და ატორტმანდა მის თვალსარბიელ-
ში. თითქოს დედამიწაც დასხლტა და გაფრინდა ზეცად...

ცხენმა გაიყვანა ბრძოლის ველიდან უგონო მხედარი.

მიწამ დაითრია და ცხენიდან გადმოაგდო.

ძლივს დაიხსნა თავი გაჩეხილი და გარრეცილი მუზარადი-
სგან.

სივრილემ დაჰკრა ცეცხლმოდებულ თავ-პირში.

გონი მოუბრუნდა.

ბრძოლის ველიც გასწორდა თვალსარბიელში. დედამიწა-
მაც შეწყვიტა სრბოლა.

ეს კი ველარ გაიხსენა, როგორ გამოაღწია საომარი წრე-
წირიდან.

მხოლოდ ტკივილი გაიაზრა, მანამდე განუცდელი ტკივი-
ლი, — ქართველი კაცის ხელით დანაკრავმა რომ დაურბინა
თავის თხემიდან ფერხთა ქუსლებამდე.

მეხი ჰქონია მკლავში იმ ქართველ ჭაბუკს!

იმ ქართველს!...

ქართველს!..

პირველად მოხვდა ქართველის ხელით მოქნეული ხმალი
(შხამიანად კი მოხვდა!).

ვინ მოთვლის, რამდენი შეხვედრა ჰქონია სააკაძეს საომარ
ველზე პირდაპირი ხმლის ჯვარედინით, მაგრამ არასდროს ასე
ძლიერად არავის არ შემოუკრავს, როგორც იმ ქართველმა
შემოჰკრა, — მაგრამ არც არასოდეს თვითონ დაურტყამს ისე
მძლავრად, როგორც იმ ქართველს დაარტყა...

ქეშმარიტად: არავის ისე არ ემარჯვება ქართველი კაცის
დამარცხება, როგორც ქართველ კაცს!..

ბრძოლის ველს გახედა.

დიდი საომარი ხელოვნებით ხოცავდნენ ქართველები ქარ-
თველებს.

წამოიწია მიწას მიკრულმა სააკაძემ.

მაგრამ ისევ არ აუშვა მიწამ.

.

ქართველები კი გააღმასებით ჟღერტავდნენ ერთურთს.

გალომებული იბრძოდა „მეორე სააკაძე“ — დავით გოგო-
რიშვილი. ვისაც შემოჰკრა, ყველას სიცოცხლე გაჰყარა და
სიკვდილი ჩაუყენა.

ეჭვი არავის შეჰპარვია, რომ „ნამდვილი სააკაძე“ იბრძო-
და მისთვის ჩვეული შემმართველობით და საომარი ხელოვნე-
ბით.

მიუხტა თეიმურაზ მეფე. შემოეგება გოგორიშვილი „სააკა-
ძურად“. ნავარდი დაჰკრეს და ცხენები დასხლიტეს. შუბგა-
წვართულნი დაეძგერნენ ერთმანეთს.

ორივემ აისხლიტა ფარზე ნადგერალი შუბი. მხოლოდ თემურაზი გადიხნიქა ზურგით უნაგირზე.

წამსვე მოიჭრა საამკობიასძე და გვერდიდან დაატაკა ლახვარი გოგორიშვილს. ეს დარტყმაც აიციდინა მესხმარაინდმა და საპასუხოდ გამართა შუბი. გაექცა კობიასძე. გამოედევნა გოგორიშვილი.

„დამიდექ, მოურავო!“ — უკანიდან მოესმა გოგორიშვილს, ეს ზურაბ ერისთავი იყო.

შემობრუნება ვეღარ მოასწრო მესხმა. შიშველ ბარძაყზე უხეტქნა ხმალი ზურაბმა.

ხმლიანი ხელი წამიერად დაკოდილი ბარძაყისაყენ გაექცა გოგორიშვილს.

იმ წამსვე ხელმეორედ მოიქნია ხმალი არაგვის ერისთავმა.

მისმა მეომრებმაც მოუსწრეს და ხელის გამოღება აღარ აცალგეს, ისე აჭკუწეს გოგორიშვილი.

„სააკაძე მოჰკლეს!“ — ბედისწერის ზარივით დაერისხა ბრძოლის ველს ეს დაძახილი.

მუხლი და მკლავი მოეშალათ „სააკაძელებს“.

მუხლი და მკლავი გაათეცეებით გაუმძლავრდათ „თეიმურაზელებს“.

ბრძოლის ველი სავსებით დაიხელთავეს თეიმურაზმა და ზურაბ ერისთავმა.

თავდავიწყებით ეტევებოდა მეფე „მტრებს“ და „თავდავიწყებულმა“ ვერ შენიშნა, როგორ მოუხდა მარცხენა მხრიდან ქვიშხეთელი აბაშიძე. მოუხდა და აძგერა შუბი.

მაინც გულიდან ფარით აისხლიტა იარაღი მეფემ.

მაგრამ დანაკრავი მაინც უსისხლოდ არ მოსცარვია აბაშიძეს. შუბი მარცხენა მკლავში შეურჭო და შეატოვა მეფეს და თვითონ წამსვე გაექცა სამაგიერო სისხლის დაქცევას.

ფიცხლავ შეუკრეს ჭრილობა მეფეს. ბრძოლიდან მაინც არ გავიდა ბრძოლით გახლეჩილი თეიმურაზი.

(ამ დღეს იყო იგი ყველაზე „დიდი გმირიც“ და ყველაზე „დიდი სარდალიც“).

ბრძოლა გათავდა — ბაზალეთის ბრძოლა — გლოვის სამა-
ნი ქართველი ხალხის ისტორიისა!

უძლური ხდება სიტყვა „სისასტიკე“.

განადგურებული იყო სააკაძის ბანაკი.

ქართველთა ხელით დახოცილი ქართველებით დარეცილი-
ყო ქართული მიწა.

ვინც დაიღუპა — დაიღუპა, მაგრამ ვინც ცოცხალი დარ-
ჩა — მეფე, თავადი, აზნაური, გლეხი, თუ „სხვა რამ მდა-
ბიო“ — დაუჭრელ-დაუკოდავი და სისხლდაუდენელი არავინ
დარჩენილა — არც დამარცხებულთაგან და არც გამარჯვებუ-
ლთაგან.

თეიმურაზ მეფემ გაიმარჯვა და მოურავი სააკაძე დამარ-
ცხდაო! — გაიძახოდნენ ბაზალეთის ცოდვისშვილები, — ზოგი
აღტაცებით, ზოგიც სინანულით, და არავინ ამბობდა, რომ ამ
დღეს დამარცხდა საქართველო!

საკაძის მეომრებთან ერთად ბაზალეთის მიწაში დამიწდა
დიადი მამულიშვილური განაზრახი „ყოველი საქართველოს“
გაერთიანებისა და აღორძინებისა.

არა, — გარნის ლალატიანი ბრძოლის შემდგომ საქართვე-
ლო ასე სასტიკად არასოდეს დამარცხებულა!

იმერელი ტყვეები მოჰგვარეს თეიმურაზს.

„ყველას თითო ყური აათაღეთ და ისე გაუშვითო!“ —
ბრძანა მეფემ და ერთჯერ კიდევ შეირცხვინა თავი ესოდენ
უღირსი ბრძანებით.

რატომლაც ხოსია მაჭავარიანს ორივე ყურის მოჭრა გადა-
უწყებდა თეიმურაზმა.

— სულ მთლიანად ნუ მომაჭრით, ნახევარ-ნახევარი მაინც
შემარჩინეთ, — შეკლალადა ხოსიამ.

— ორივე ძირში დაათაღეთ! — ეჩინიანად გაიმეორა მეფემ,
ორივე ყური პირწმინდად მოჰკვეთე.

— არ მეგონა, თუ ასეთი გულბილწი იყავი! — შებღავლა
უყურო მაჭავარიანმა თეიმურაზს.

გულბილწი!

იქნებ არ გაემტყუნებოდა ასეთი სიტყვის წამოძახილი და-
სახიჩრებულ კაციშვილს, მაგრამ არც ერთ სხვა ქართველს —



არც „უყუროს“ და არც „ყურიანს“ — მსგავსი მაცვედრებელი სახელწარმოები სიტყვა თეიმურაზისთვის არ უკადრებია უფრო დიდი ბოროტების გამო:

მან — საქართველოს მეფემ — იმ დღეს წომ საქართველო დაამარცხა!

კვლავ გათათრებული სააკაძე

ერთსა და იმავე ადამიანს გულში სხვადასხვა დემონი უზის.

სოფოკლე

ბაზალეთის ცოდვიანი მიწიდან გიორგი სააკაძე და სიკვდილს გადარჩენილი მისი თანამებრძოლები სამცხეში გაიქცნენ.

ახალციხეში მოიყარეს თავი ცოლ-შვილითა და სახლულებით — გიორგი სააკაძემ, იასე ქსნის ერისთავმა და ქაიხოსრო მუხრან-ბატონმა. ქაიხოსროს თავისი ძმის — მარაბდის ბრძოლაში დაღუპული თეიმურაზის ცოლ-შვილიც წამოეყვანა სამუხრანოდან.

თათბირად დასხდნენ და ძალიან მალე გადაწყვიტეს: თურქეთში უნდა გადახვეწილიყვნენ და ხონთქარის სამსახურში შესულიყვნენ, ხოლო შემდგომ... შემდგომ, გიორგი, სააკაძის აზრით, ხონთქარისგან თურქულ ჯარს გამოითხოვდნენ და საქართველოს „დასახსნელად“ გამოუძღვებოდნენ...

ის ზამთარი სამცხეში გაატარეს.

საკაძემ ოჯახი სამცხეს დატოვა. მხოლოდ ვეთანდლი აიყოლია — უფროსი ვაჟი და განუყრელი თანამებრძოლი.

იასე ქსნის ერისთავმა და ქაიხოსრო მუხრან-ბატონმა თავიანთი სახლობანი, თეიმურაზ მუხრან-ბატონის ოჯახთან ერთად, იმერეთს გაგზავნეს.

1627 წლის გაზაფხულზე ბაზალეთის ცოდვიშვილებმა თურქეთისაკენ გაქუსლეს.

ახლა თურქეთის მიწაზე მითქარუნობს გიორგი სააკაძე. ერთ გვამ-სხეულში ორი გიორგი გლევს ერთმანეთს: „რას სჩადიხარ, გზააბნეულო ადამიანო, ისევ გარბიხარ საქართველოდან?!“

„ისევ გამაქციეს და ისევ გავრბივარ“.

„ისევ სულ ერთია — გაგაქციეს თუ შენით გარბიხარ, მაინც ლალატი ჰქვია სამშობლოდან გაქცევას“.

„მე მალე დავბრუნდები“.

„მაშინაც აგრე ფიქრობდი, სპარსეთისკენ რომ მიჭენობდი, მაგრამ ეგ „მალე“ თორმეტი წელიწადი გაგიგრძელდა“.

„ის სპარსეთი იყო...“

ჰო, ის სპარსეთი იყო, ეს კი ოსმალეთია... მაგრამ რითი სჯობს შენთვის და შენი საქართველოსთვის ოსმალეთი სპარსეთს? განა ალია და ოსმანა ორივე თათარი არ არის, განა ბაბრი და აფთარი საქართველოსთვის ერთნაირი მოსისხლე არ არის?!“

„არა, ახლა სპარსეთი უფრო საშიშია საქართველოსთვის“.

„სპარსელები შენ თვითონ დაამარცხე და გადარევე საქართველოდან და ახლა ვის წინააღმდეგ აპირებ თურქული ჯარების მოყვანას საქართველოში?“

„ტფილისში ჯერ ისევ დგანან ყიზილბაშები... ქვემო ქართლიც უჭირავთ სპარსელებს...“

„ტყუილად ცდილობ, გიორგი სააკაძე, თვალები აუხვიო გიორგი სააკაძეს! შენ თეიმურაზ მეფის, ზურაბ ერისთავისა და იოთამ ამილახორის სისხლი გწყურია; და იმათ დასამბობად გინდა ისევ უცხოელთა ლაშქრის მიყვანა საქართველოში“

„თუნდ აგრეც იყოს! სწორედ თეიმურაზ მეფე და მისი „მოკიდებული“ თავადობა უნდა მოისპოს, საქართველო რომ გაერთიანდეს და გაძლიერდეს!“

„მერე, ისევ საქართველოს მოსისხლე „უცხო თესლთა“ მეოხებით აპირებ საქართველოს გაერთიანებას და გაძლიერებას“

რებას?! განა შენს თვალწინ არ მოხდა ყოველივე, — როგორ „გაერთიანდა“ და „გაძლიერდა“ საქართველო შენგანვე არჩეული „სპარსული გზით“?! ცას შეჰღალადებს ნახევარი მილიონი ქართველის სისხლი! აკი მაშინ თვითონ მიხვდი ცთომილებას „უცხოურ გზისა“! მიხვდი და იხსენ კიდევ შენი სამშობლო შენეული მძლავრი მკლავით და მძლავრი გონებით. მაგრამ ახლა რა ხდება! ნუთუ წინარე ცთომილებას იმეორებ და შენგანვე დახსნილ და გადარჩენილ ქვეყანას „ახალი, უცხოური გზით“ ახალ სატანჯველს უმხადებ?!“

„მე ჩემი ქვეყნის დახსნის გზას ვეძებ“.

„კარგით ნუ ეძებ, თვითონ ქვეყნის შიგნით ეძიე!“

„ქვეყნის შიგნით არ მომისმინეს, გამანადგურეს და გამომაძევეს“.

„შენი ხალხი ვალმერთებს, დიდო მოურავო, დაუბრუნდი და მაშინვე გვერდით დაგიდგება „ყოველი ერი“.

„მალე დავბრუნდები“.

„გიჯობს, ახლავე შემობრუნდე, გიორგი სააკაძე, დიდო ქართველო, ერთ დროს ალია-თათარო, მერე ისევ ქართველო, ახლა ოსმანთათრობაზე შემდგარო!“

მაინც მიდიოდა სააკაძე.

უცხო მიწა ფეხებს უწვავდა კაცსაც და ცხენსაც.

მაინც მითქარუნობდა, რამეთუ სატანა აჯდა საყნიან ბეჭზე.

ისევ მიისწრაფოდა „უცხო თესლთა“ ისტორიის „შესაქმნელად“ საქართველოს ეროვნული გმირი.

სტამბოლის კარი დიდის ზეიმით შეხვდა სააკაძეს. ხონთქარი მურად IV საგანგებოდ დარჩეული და მორთულ-მოკაზმული ამალით მიეგება ლეგენდარულ გურჯს.

ოდრიკალად მოიკეცა ვეება გმირი, სულთანს მუხლზე ეამბოროა და მოახსენა მოწიწებით: „მე თქვენს ხმალს მოვენდევ, თქვენს ფერხთა მტკრად ვიქეც და სხვისი ყმობა გულშიც არ გამიტარებიაო“.

სახე გაეზადრა მურადს. ძალიან მიხარია, რომ ჩემი ქვეშევრდომობა აგირჩევიო, ეუბნებოდა სააკაძეს, დიდად გომადლი, სამცხიდან და საქართველოდან ყიზილბაშები რომ

გადარეკეთ ამიერიდან შენი ყოველი სურვილის აღმსრულე-
ბელი ვიქნებო; წყალობით აგავსებ, სამ-ოთხ საფაშოს თავისი
ციხე-ქალაქებით სარჩოდ და საპატრონოდ გიბოძებო.

ცხენზე შებრძანდა ხონთქარი, გაიყოლია სააკაძე მისი ამა-
ლით ამხედრებული და მთელი სტამბოლი შემოატარა, რათა
„არ მოსწყენოდა“ საქართველოს სახელოვან გვირს.

მერე ენგიჩარ-აღას (იანიჩართა „გვარდიის“ უფროსს) უბ-
რძანა სულთანმა, ახლა შენ ეახელ დიდებულ სტუმარს და
ყოველივე დაწვრილებით აჩვენე და მოახილვინეო.

ენგიჩარ-აღას მეგზურობით ქართველებმა დიდის წადნიე-
რებით დაათვალიერეს ეს საოცარი ქალაქი, „მსოფლიოს ოქ-
როს ჭიპი“, მისი ყოველი ღირსშესანიშნაობანი — ბერძნულ-
ანტიკურიც და გვიან-რომაულიც, ბიზანტიურიც და ოსმალუ-
რიც, ქრისტიანულიც და მუსლიმანურიც.

ნახეს თოფხანები და არსენალები, ციხესიმაგრენი და
ზღვისსანაპირო ბასტიონები, საციხოვანო ზარბაზნები და ზა-
მბულაქები, ფალკონეტები და ჯაზირები, მარმარილოს სრა-
სასახლენი და „ლომ-ვეფხთა სადგურნი“.

ჯერ კიდევ „გაუთათრებელი“ ქართველი სტუმრები დიდის
მოწიწებით შევიდნენ აია სოფიას დიდებულ ტაძარში, მსოფ-
ლიო საქრისტიანო სამლოცველოში. პატრიარქს ესტუმრნენ.
მის წირვა-ლოცვას დაესწრნენ. თვითონაც გული მოიჭერეს
მხურვალე ლოცვით და ლიტანიით (აქ დაიღვარა მათი უკანა-
სკნელი „ქრისტიანული ცრემლი“).

„გათათრების“ დღეც დადგა.

და „გათაარდნენ“.

ზოგს წინდაცვეთაც აღარ დასჭირვებია, რადგან „ხელმო-
რე თათრობაში“ შედიოდა.

ასეთი იყო თვითონ გიორგი სააკაძე.

„თათრად გააახლეს“ და ახალ სახელად მეჰმედი დაარ-
ქვეს.

მაშ, — დგას 1627 წელი და ევროპისა და აზიის გზაკვე-
თილზე, ბოსფორისა და ოქროს რქის შესაყარში აღმართულა
47 წლის გოლიათი კაციშვილი, მშობელი ქვეყნისთვის მრავ-
ალჭირნახული, წრფელი მამულიშვილური განზრახვებით

ავსებული, მაგრამ იმავე ზრახვათა განსრულების გზათა მიე-
ბაში ერთჯერ კიდევ ცთომილი და ხელმოცარული.

თავისი მოსათხოვარი მოსთხოვა „კვლავგათათრებულმა“
სააკაძემ „თათრის ხელმწიფეს“: ჭარები უნდა მომცე საქარ-
თველოში სალაშქროდო.

— ჯერ ბაღდადი და არზრუმი უნდა გამოვგლიჯო ხელი-
დან სპარსელებს, — შეაგება ხონთქარმა, — გიორგი სააკაძის
გმირობაც სწორედ საბაღდადოდ და საარზრუმოდ მჭირდება,
ხოლო, რაც შეეხება საქართველოს... საქართველოში წასვლა-
საც მოესწრები...

სულდაკნინებული გამოვიდა გიორგი ხონთქრის სასახლი-
დან.

დიდხანს დაეხეტებოდა სტამბოლის ქუჩებში, გულჯაფ-
რიანი, სახედაღრევილი და შხამიანი ფიქრებით დარეგვილი.

ერთ დღეს სტამბოლის ფრანგულ საელჩოს მიადგა და მი-
ღება ითხოვა.

— ვინ ბრძანდებით? — ჰკითხეს ფრანგებმა.

— საქართველოს მეფის, თეიმურაზის ელჩი გახლა-
ვართ, — იყო პასუხი.

სიხარულით მიიღო საფრანგეთის დიასპანმა „ქართველი
მეფის ელჩი“. დიდი დარბაზობაც გაუმართა. რალაც ხანგრ-
ძლივი სჯა-ბაასიც ჰქონდათ.

თუმცა არავინ იცის, რაზე საუბრობდნენ ფრანგი და ქარ-
თველი, რა განაზრახი გაანდო სააკაძემ ევროპელ დიპლომატს,
რა სთხოვა, რა ურჩია, რა „შეაგონა“.

ამ შეხვედრის ყამს საფრანგეთის ელჩმა გიორგი სააკაძეს
იტალიელი მისიონერები გააცნო — პიეტრო ავიტაბილე, ქრი-
სტეფორე კასტელი და ჯაკომო სტეფანი.

თურმე ქართველთა დიდი მეგობრისა და მოყვარის —
პიეტრო დელა ვალეს მოხსენებას დაურწმუნებია რომის პა-
პი ურბანუს VIII, გაეძლიერებია კათოლიკური სამისიონე-
რო მოღვაწეობა საქართველოში. სწორედ ამ მიზნით მოდი-
ოდა ეს სამი კათოლიკე ბერი, რომელთაც თან მოჰქონდათ
პაპის „კათოლიკური აღერსით“ გამთბარი და დამტკბარი

ეპისტოლენი ცალ-ცალკე იმერეთ-კახეთის მეფეებისა და გურია-სამეგრელოს მთავრებისადმი.

ძალიან გაიხარეს „წმინდა მამებმა“ სააკაძესთან შეხვედრით. თურმე საქართველოში მიდიოდნენ ისინი, თეიმურაზ მეფესთან შესახვედრად. გზებზე დიდი შიშინაობა იდგა და საიმედო თანამგზავრს ეძებდნენ. სააკაძეზე უკეთესს ვის იპოვნოდნენ, თუკი ეს „გოლიათი ელჩი“ საქართველოსკენ დროზე გაბრუნდებოდა.

ერთმანეთს გადაება საპატიო სადილები და მეკლისები საფრანგეთის საელჩოში.

გიორგი სააკაძემ დაატყვევა ევროპელები — სიტყვა-პასუხით, აღზრდილობით, გონგამჭრიახობით, სიკეთით და სიქველით.

საქართველოზე ეკითხებოდნენ და — ბალღური აღტკინებით მოუთხრობდა ქართულ მიწასა და წყალზე, ქართულ მხესა და ცაზე.

ქართველებზე ეკითხებოდნენ და — ქებადიდებით მიწაზე ფეხს აღარ უდგამდა არც ერთ ქართველს, არც მტერსა და არც მოყვარეს.

ყველაზე მეტს მაინც თეიმურაზ მეფის შესახებ გამოკითხავდნენ ევროპელები „თეიმურაზის ელჩს“.

„თეიმურაზს ძალიან გაუხარდება თქვენი სტუმრობა და დიდის პატივისცემით მიგიღებთ“, — ეუბნებოდა გიორგი საქართველოსკენ აღძრულ ევროპელებს და უზომო ხოტბით ამკობდა მოსისხლე მტრად გადაკიდებულ თანამემამულე გვირგვინოსანს.

მოჯადოებულნი იყვნენ ევროპელები.

ქრისტეფორე კასტელი თურმე მხატვარიც ყოფილა, — ჩაუჯდა და დახატა გიორგი სააკაძე. ერთადერთი, ჩვენამდე მოღწეული ხატი სწორუბოვარი ქართველი მხედრისა და მხედართმთავრისა.

სიმკაცრიდა და კაეშნით აღსავსე სახე კაციშვილისა და მისი მშობელი შფოთიანი საუკუნისა.

.

სულთანმა შურად IV-მ გიორგი სააკაძეს სამმართველოდ

და „საზრდელად“ ოსმალეთის ყველაზე დიდი „ქუეყანა“ — იკონიის, ანუ ყარამანიის ვილაიეთი უბოძა.

სტამბოლის კარზე მრავალი თურქი და გათურქებული კარისკაცი აღივსო შურით და მტრობით „გურჯი მოურავ-ბეგის“ ეგზომი პატივისა და აღზევების გამოისობით.

გიორგიმ იკონიის სამმართველოდ და საპატრონოდ თავისი ქართული ამალიდან გაგზავნა „ვინმე ხუცესი“.

თეთონ სააკაძე სულთანის ბრძანებით საომარ ველზე გაეშურა ოსმალეთის დიდი ვეზირისა და მთავარსარდლის ხალილ-ფაშას „მარჯვენა ხელად“.

1627 წლის ზაფხულში თურქები მიაღდგენ არზრუმს, რომელიც ხონთქარის მოღალატე აბაზა-ფაშას სპარსელებისთვის ჩაებარებინა.

არზრუმთან გამართულ ბრძოლაში გიორგი სააკაძემ ისევ დაიგდო სწორუბოვარი სარდლისა და მხედრის სახელი. მაგრამ ხალილ-ფაშას უნიჭობისა და ლაჩრობის წყალობით არზრუმი იმ წელს ისევ სპარსელებს დარჩათ.

1628 წელს სულთანმა მურად IV-მ ხალილ-ფაშა გადააყენა და აღმოსავლეთის ჯარების სერასქერად დანიშნა თავისი სიძე (დის ქმარი), ახალი დიდვეზირი ხუსრევ-ფაშა (მკითხველი გაიხსენებს: 1625 წელს ხუსრევი „აღას“ სახელით იანიჩარებს მეთაურობდა).

ამჯერად გიორგი სააკაძე ხუსრევ-ფაშას „მარჯვენა ხელი“ უნდა ყოფილიყო...

შაჰ აბასი მაზანდარანს ნადირობდა და ნადიმობდა, როცა ხუსრევ-ფაშას შემოტევის ამბავი შეიტყო. გამორჩევით, ერანის ლომი იმას შეუშფოთებია, რომ არზრუმისკენ წამოსულ ოსმალეთის სერასქერს გიორგი სააკაძე — „ბედშავი და უმადური ქართველი მოურავი“ — უდგას გვერდით.

მაზანდარანიდან შაჰ აბასი ყაზვინს მოვიდა და იქ დაისადგურა ომის სამეთაუროდ და სამეთვალყუროდ.

მაგრამ არზრუმის დანარჩუნება მაინც ვერ შეძლეს სპარსელებმა ოთხი თვის ალყის შემდგომ იგი აიღეს თურქებმა.

არზრუმის ბრძოლებისა და ეგზომ სახელოვანი ციხე-ქალაქის დაუფლების მთავარი გმირები ისევ გიორგი სააკაძე და

მისი თანამებრძოლი ქართველები ყოფილან. კიდევაც მოუხსენებიათ მურად სულთანისათვის:

„გურჯი მოურავი რომ არ ყოფილიყო, ხუსრევ-ფაშა არ-ზრუმს ვერასგზით ვერ აიღებდაო“.

(ხოლო ხუსრევ-ფაშა ავბუნება კაცი იყო — შურიანი, ეჭვიანი და სისხლის მოყვარე, წარმომავლობით ბოსნიელი, სიყრმითგანვე გათურქებულ-გათათრებული).

იმავე 1628 წელს ხუსრევ-ფაშა და გიორგი სააკაძე არზრუმიდან სამცხეს შემოიჭრნენ და აქაური ციხე-ქალაქები-დანაც განდევნეს სპარსული ციხიონები.

არავის გაჰკვირვებია, რომ „მშობლიურ მიწაზე“ მეომარ-მა გიორგი სააკაძემ სავსებით დაჩრდილა ოსმალეთის დიდვე-ზირი და მხედართუფროსი.

გველის გორგალი ეხვეოდა გულზე ხუსრევ-ფაშას...

„მინც ვერ მოვერიე“

1629 წლის იანვარი. მაზანდარანი. აშრიფი. შაჰის სასახ-ლე.

შაჰ აბასი არის 58 წლისა.

და არის ავად, ლოგინად ჩავარდნილი.

მიჯინებული ინთილა დამართნოდა — მუცლის ყვანა. ჩირ-ქი და თხრამლი სდიოდა განუწყვეტლივ და განუცადებლად განრღვეული შიგნიერიდან.

გალურჯებულ ფრჩხილებს აშტერდებოდა ხვალინდელი ბედის ამოსაცნობად.

ყოველი ფრჩხილიდან სიკვდილი უცქერდა ლურჯი თვალე-ბით.

საბოლოოდ დარწმუნდა „ყოვლისმძღვეფელი ღომი“: ორი რაიმე ვერ დაეძღია ვერასდიდებით — სიკვდილი და საქარ-თველო!..

„მინც ვერ იქნა და ვერ მოვერიე საქართველოს!.. სიკვდი-

ლივით დაუძლეველი ყოფილა საქართველო, ხოლო სიკვდილი — საქართველოსავით დაუძლეველი!...”

ლამის და ძილის ეშინოდა, რადგან შემადრწუნებელი კომპარები და მოლანდებები აღჩობდნენ წყვილიადით მოსილა, ან სიზმრად ჩათრულს.

უსაყვარლესი შვილის, სეფი-მირზას ლანდი არ შორდებოდა და არ ასვენებდა.

სეფი-მირზა! ქართველი ქალის ნაშობი, უმშვენიერესი, უნიჭიერესი და უმამაცესი უფლისწული!

მამისგან მოკლული შვილი!

რა რომ სეფი-მირზა ისე უსამართლოდ და უგანაჩენოდ მოკლა, მის შემდგომ ფრანის ტახტის მემკვიდრედ (როგორც მკითხველს ახსოვს) შაჰ აბასმა სეფის ძე გამოაცხადა — ს ა ა მ მ ი რ ზ ა, რომელსაც ახლა ჩვიდმეტი წელი შესრულებოდა და „სამეფო კბილიც ამოსვლოდა“.

ალბათ, ესეც ბედისწერა იყო: ისეც ქართველი ქალის ნაშობი უნდა ასულიყო ფრანის ტახტზე, — საამ-მირზას დედაც და ბებიაც ხომ ქართველი ქალები იყვნენ.

ანდერძიც კარგა ხნის შედგენილი ჰქონდა შაჰ აბასს, — ანდერძი საამ-მირზას გამეფებისა.

მაგრამ დაანებებენ საამ-მირზას სპარსეთის სახელმწიფო ინსიგნიებს დანარჩენი ტახტის მოცილენი? შაჰ აბასმა შვილთაგან და შვილიშვილთაგან ზოგი დახოცა, ზოგი დააბრმავა და ზოგიც ალაშუთის ციხეში ჩაპყარა, მაგრამ იმ ბრმებსა და პატიმრებს თავიანთი „დასები“ ჰყავთ სპარსულ დიდკაცობაში...

საამ-მირზას ყველაზე დიდი მოცილე მაინც ისა-ხან ყორჩიბაშის ვაჟი იქნებოდა. ყორჩიბაში ხომ შაჰის სიძე იყო და მისი ვაჟიც შაჰის შვილიშვილი გახლდათ, თანაც ორივე მშობლის ნაკადით „წმინდა სისხლის სპარსელი“. უეჭველად სპარსელი დიდებულებიც ყორჩიბაშის გაყს აარჩევენ ქართული სისხლის მქონე საამ-მირზას წინააღმდეგ.

მაგრამ არსებობს უტყუარი ძალმოსილება შაჰ აბასისა, რომელიც მისი სიკვდილის შემდგომაც „უტყუარად“ დარჩება და იმოქმედებს ამ ქვეყანაზე.

ეს ძალა გახლავთ ხ ო ს რ ო - მ ი რ ზ ა, თათრად გაზრდილი ქართველი, მამით ბაგრატიონი და დედათ გლგხი, „უკვდავთ“

სამეფო გვარდისა“ ყულარალასი და ტარულა ერანის სატახტო
ისფაჰანისა, ჰეკვიანი გამგებელი და უმამაცესი მხედარი...

უკანასკნელად გამოიძახა შაჰ აბასმა ხოსრო-მირზა და უკანასკნელად დაუბარა ასჯერ დანაბარები:

— საამ-მირზა შენ უნდა აიყვანო ერანის ტახტზე!

— აღესრულება! — ერთჯერ კიდევ დაადასტურა თავისი აღთქმა ხოსრო-მირზამ რწმენანაჯერი სიღინჯით.

— შენს მეტს არავის ვენდობი და შენ გიტოვებ ამ ანდერძს!

და გაუწოდა ანდერძი შაჰმა ერთგულსა და „უტყუარ მარჯვენა ხელს“.

— აღესრულება! — ისევ წყნარად თქვა ხოსრო-მირზამ და ჩამოართვა ფირმანი.

— რაო, რას ამბობენ მუნეჯიბნი* — რამდენ ხანს იმეფებსო საამ-მირზა? — უცებ იკითხა შაჰმა.

— თვრამეტ თვეზე მეტს ვერ იმეფებსო, — ნირშეუცვლელად მიუგო ხოსრომ.

დიდხანს სდუმდა სახეჩამქრალი ხელმწიფე. უკანასკნელად კაჭრობდა მისი გული გველის კაჭრობით.

— თვრამეტი თვე კი არა, სამი დღეც რომ ვერ მოათიოს, მაინც საამ-მირზა უნდა იქნეს ერანის მბრძანებელი, მაინც სეფი-მირზას შვილმა უნდა დაიდგას თავზე მამამისის კუთვნილი გვირგვინი! — ეინიანად ამოიგმინა ბოლოს.

— აღესრულება!

— განსოვდეს, ხოსრო-მირზავ, როცა ჩემს ანდერძს გამოაცხადებ, წარბის შეხრაც თუ ვინმემ გაბედოს, სასიკვდილოდ არ დაინდო, იცოდე!

— აღესრულება!

— ტახტზე ასულ საამ-მირზას სახელი უნდა გამოუცვალო და მამის სახელი უნდა დაარქვა — ჩემი უსაყვარლესი ვაჟის სახელი — სეფი!

— აღესრულება!

— მაშ, ერანის ტახტზე აღის შაჰ სეფი!

*ასტროლოგი, ვარსკვლავებზე ადამიანის ბედის შეითხველი.

— დიახ, ხელმწიფეო!...

თვალეები მილულა მომაკვდავმა.

სახეზე თითქოს რაღაც სიხარული დაეფინა. ლურჯი ტუჩები აუთრთოლდა და აჩურჩულდა.

— ეს იყო ლექსი, ქართველი ქალის ტრფიალებამ რომ ათქმევინა ერთხელ შაპ აბასს:

წაიღო შენმა სიყვარულმა გული და სული,
გავეკეთე მკერდი, სასიკვდილოდ ვარ განწირული.
არც მყობადი ვარ, არც ვეკუთვნი არარაობას.
არც მორწმუნე ვარ, არც ურწმუნო, ვარ დატანჯული.
თუ ურწმუნო ვარ, ანაფორა სად არის ჩემი,
და თუ მორწმუნე — ნეტავ ჩემი რა იქნა რჯული?
არა, არც ერთი აღარა ვარ, განვედგე ყოველს,
მომედო ცეცხლი სიყვარულის, ვარ კერპთმსახური.
რამდენი დღეა, დავრდომილი დავდივარ ასე,
რამდენი დღეა, მოთმინება მაქვს დაკარგული.
აბას, წაიღო შენი სული ქარცეცხლმა ტრფობის,
წამებას შენსას აღარ უჩანს აწ დასასრული.

ჯოჯოხეთური მხურვალეებით ეწვოდა შიგნიერი სულთმობრძავს. სასახე მიკრულ ენას ველარ წარმოეთქვა, რა უფრო დაარწყულებდა მის უდაბნოურ წყურვილს — წყალი, ღვინო თუ... სისხლი!

და საღდაც მიშრეტილი გონების რომელიდაც კუნჭულში ისევ აშიშინდა ღვინისა და სისხლის მოყვარე მბრძანებლს საყვარელი სიტყვები:

ჩვენში ღვინო ვინა სვას, ჩვენში სისხლის სმა არის,
ჩვენში სიტყვა ვინა სთქვას, ჩვენში სიტყვა ჭვა ვრის.
ვიღას უნდა მუტრიბის ახლა ზაიათები,
უტკბილესი ჰანგები ახლა თოფის ზმა არის.

უკანასკნელად გაახილა თვალი.

უკვე რიბირაბოდ ჰხედავდა ხოსრო-მირზას სახეს.

ქართველი კაცი ესწრებოდა მისი ბობოქარი საწუთრომ უკანასკნელი წუთების მარცვლას.

ქართველები და საქართველო!

მთელი მისი წუთისოფელი ეს ორი სიტყვა დაჰქროდა მისი ცნობიერების სარბიელზე.

ქართველები უყვარდა და ქართველები სძულდა.

ქართველების ეშინოდა და ქართველებით იმედოვნებდა.

ახლაც ქართველი კაცის იმედად კვდებოდა.

და 1629 წლის 19 იანვარს ერანს მოუკვდა ყველაზე დიდი აღმაშენებელი, ხოლო საქართველოს — ყველაზე დიდი დამაქცევარი.

აღესრულა მომაელის საქართველოს ყოველი მომტერე-დამპყრობელის „ყველაზე დიდი მასწავლებელი“.

დაკრძალეს ძველ ქალაქ ყუმში, ისფაჰანსა და თეირანს შორის.

მიჯინებულმა ფაღარათმა მოინელა ნახევარი მილიონი ქართული სიცოცხლის მომწელებელი.

ხმალი და ანდერძი

ხოსრო-მირზას ხელი ნახევრად ამოწვდილ ხმალზე დაედო და ისე კითხულობდა ანდერძს.

სასახლეს გარს ადგა მისი „გვარდია“ — გათათრებულ ქართველთა ჯარი.

ერანის ტახტზე ადითდა ჩვიდმეტი წლის ხელმწიფე — შაჰ სეფი, ქართველი ქალის ნაშობი, დიდი შაჰ აბასისა და თამარ ამილახორის შვილიშვილი.

სპარსული დიდკაცობა „წარბშეუხრელად“ დაემხო ახალი გვირგვინოსნის ფერხთა წინაშე.

დაემხო, რამეთუ ანდერძს კითხულობდა სანახევროდ ხმალ-ამოწვდილი ქართველი ყულარადასი, ხოლო სასახლე ქართველთა ჯარს მოეცვა სრულიად.

ისა-ხან ყორჩიბაში და მისი ვაჟი მოიკითხა ხოსრო-მირზამ.

მოახსენეს: ციხეში გამაგრებულა ისა-ხანი და თავისი უფროსი ძე ერანის შაჰად გამოუცხადებია.

ბოლომდე ამოაგელა ხმალი ხოსრო-მირზამ.

ქართველები გარს შემოერთყნენ ყორჩიბაშის ციხესიმაგრეს.

აეად იაზრა „მარაბდის გმირმა“ ქართველების შემოსევა. მაშინვე შიშველი ხმალი შეიბა ყელზე, უღღეურად „ნახელმწიფარი“ შვილიც ალესილი ხმალით დაუღლა და მუცელზე ფორთხვით გამოეგება სეფი შაჰსა და ხოსრო-მირზას.

ეს პირველი პატიება იყო, რომელიც სეფი შაჰმა გაიმეტა: ბიძას და მამიდაშვილს მან სიცოცხლე აჩუქა (ყორჩიბაში მისი მამიდის ქმარი იყო).

მაგრამ ეს შინაურ-ნათესაეური „იდილია“ მალე საშინელი სისხლისღვრით გათავდა.

ერთ ღღეს ისა-ხან ყორჩიბაშმა დიდი ნადიმი გადაიხადა. როცა სუფრაზე ბახუსი გაბატონდა, ერთმა მთვრალმა სტუმარმა ასეთი რამე წამოტორტლა:

„ვაი ჩვენ უბედურთა, ვინ ავიყვანეთ ერანის ტახტზე — სრული არარაობა!“

მერე მასპინძლის ვაჟს მიაშტერდა და იყვირა:

„აჰა, ვის დაშვენდებოდა შაჰის გვირგვინი!“

ნადიმი დამთავრებული არ იყო, შაჰ სეფიმ რომ ყველაფერი იცოდა.

მეორე ღღესვე დაიბარა ის ენაავარდნილი კაცი შაჰმა. დაიბარა და „ტკბილი საუბარი“ გაუმართა. შენს გაზრდას, ყველაფერი მიაბზე, რაც გუშინ მოხდა და ითქვა ყორჩიბაშის ნადიმზეო. შაჰის „ყურადღებით“ მოხიბლული კაციც მოუთხრობდა ყოველივეს — რა ჭამეს, რა სვეს, ვინ ესწრებოდა და ვინ როგორ იქცეოდა. „კიდევ, რა ითქვა თქვენს სანაქებო ნადიმეო“, არ ეშვებოდა „დაინტერესებული“ გვირგვინოსანი.

ჰყირტი* სიტყვის მოყვარე კარისკაცმა ბოლოს და ბოლოს თქვა, მეტი არაფერი მახსოვსო.

„კარგი, თუ მეტი აღარაფერი გახსოვს, — უთხრა შაჰმა, — მე შევახსენებ, რაც შენ წუხელის წამოროშე და ახლა ვითომ ვეღარ გაიხსენე: თურმე ჩემი ხელმწიფობა გენანება და ყორჩიბაშის ძის შაჰინშაჰობა გენატრება!“

* ჰყირტი — მოუთმინარი, არამკითხე, იხ. „ამირანდარეჯანიანი“.

თქვა, ტაში შემოჰკრა, ჯალათები შემოცვივდნენ და ის ენა-
მოუვლელი კაცი იქვე საშინელის წამებით გაათავეს.

მერე შაჰ სეფიმ ყორჩიბაშის შვილებიც მიაყოლა — ტახ-
ტის მოცილე და მისი უმცროსი ძმა. ორივეს თავები დააყრე-
ვინა და მათ დედმამას გაუგზავნა.

დედამ (შაჰ აბასის ასულმა და შაჰ სეფის მამიდამ) შვილე-
ბის წამებულ სახეებს დაჰხედა და „მშვიდალ“ თქვა: ასე დაე-
მართება ყველას, ვინც ჩვენი ხელმწიფის ღალატს გაივლებს
გულშიო.

ხოლო ისა-ხან ყორჩიბაშმა ეს შემოუთვალა შაჰ სეფის:
თქვენ რომ ჩემთვის გებრძანებინათ, მე თვითონ დავაყრევი-
ნებდი თავებს ჩემს შვილებსო!

მაინც არ უშველა ქართველი ხალხის ჯალათს ასეთმა არა-
ადამიანურმა გულმხეცობამ: შაჰ სეფის ბრძანებით ისიც უბე-
ღური შვილების კვალს გაუყენეს.

ერანის ტახტი უნიჭო, უნებო, უხიავ ლაწირაკს ეჭირა.

სახელმწიფოს ნამდვილი გამგებელი ხოსრო-მირზა იყო.

შაჰ სეფი თავის ყულარაღასსა და ტარულას „ნამდვილ მა-
მას“ ეძახდა.

ყველა ამბობდა: ერანის ყოველი საქმე ხოსრო-მირზას
ეკითხებო. შაჰი მის დაუკითხავად წყალსაც არ გადადვრისო.

ყველა დაჩრდილა ხოსრომ.

უნდილაძეების ვარსკვლავებსაც ჩაუჭრო სხივი მისმა ვარ-
სკვლავმა.

მაინც ხოსრო-მირზას „რჩევით და ჩარევით“ ეწერა ქარ-
თველთა სახელები შაჰ სეფის ხელრთვით შედგენილ სიაში:

იმამ-ყული-ხან უნდილაძე — ბეგლარბეგი ფარსისა, ქუჭგი-
ლუ-იესა, ბაჰრეინისა და ხუზისტანისა;

სეფე-ყული-სულთან უნდილაძე, იმამ-ყულის ძე — ბეგ-
ლარბეგი ლარისა (სეფე-ყული სინამდვილეში შაჰ აბასის შვი-
ლიაო, ამბობდნენ ხალხში);

დაუდ-ხან უნდილაძე, იმამ-ყულის უმცროსი ძმა — ბეგ-
ლარბეგი განჯა-ყარაბაღისა;

ფეროხ-სულთან ქართველი — ბეგლარბეგი დარუბანდისა;

სეფი-ყული-ხან შირ-ალი ქართველი — ყორჩიბაში და ბეგ-
ლარ-ბეგი არაბული ერაყისა;

ჯემშიდ-სულთან ქართველი — ბეგლარბეგი ავშარისა და
ხორასანისა;

ალი-ყული-ბეგ სააკაძე, ძმა როსტომ-ხან სააკაძისა, სიძე
იმამ-ყული-ხან უნდილაძისა — სპასალარი და ბეგლარბეგი
თავრიზისა.

აღსრულავალი სააკაძე

**Nemo contra deum nisi
deus ipse**

(არავინ ღმერთის წინააღმდეგ
თვინიერ თვითონ ღმერთისა).

თუ კაცსა მიხედეს გრძლად ყოფნა
უცხოს თემსა და მიწებსა,
შარბათიც ჰქონდეს სასამელად,
ნაღველად ამოიწებსა.

ა რ ჩ ი ლ ი

Угас великий человек.

А. Пушкин

მაშ, გიორგი სააკაძე მოესწრო მისი პირადი და მისი სამ-
შობლოს მოსისხლის — შაჰ აბასის სიკვდილს.

მაგრამ ბედისწერა დიდ სიხარულს დიდი წუხილით დას-
წონის ხშირად.

გიორგი სააკაძის ცხოვრების ეტლიც თავაწყვეტილი სრბო-
ლით მიელტვოდა აღსასრულის კარიბჭისაკენ.

დიახ, სიკვდილს გაახსენდა, რომ დიდი გიორგი სააკაძეც
მისი შვილი იყო...

) * * * * *

გველის გორგალი ეხვეოდა გულზე ხუსრევ-ფაშას, რამეთუ სააკაძის ტანსრული ჩრდილი ჩამოწოლილიყო სერასქერსა და სულთანს შორის.

სერასქერსა და დიდვეზირ ხუსრევ-ფაშას ცოლად მურად სულთანის დაი ჰყავდა.

ცოლიც აქეზებდა ქმარს: ყველგან გურჯი სააკაძის ქება-დიდება გაისმის, ყველას მისი სახელი აკერია პირზე; შენი ხსენება კი სულ გაქრა და დაიკარგა. სულთანიც დღენიდაგ ამას გაიძახის: სააკაძეზე უკეთესი ქვეშევრდომი არც მყოლია და არც მეყოლებათ!..

ქვა ისედაც აგორებული იყო.

მარტო ხუსრევ-ფაშას სახლეული არ უდგა კრიჟაში გიორგი სააკაძეს. მისი საბეგლარბეგოს — კონია-ყარამანიის თურქი დიდკაცობაც შურიტა და მძულვარებით ზომავდა „ზვიადი გურჯის“ აღზევებას. აქაური ფეოდალები უკვე „წარმატებით“ ხლართავდნენ ხვანჭებს სააკაძის სახელის შესალახავად და ხონთქარის თვალში დასამცირებლად.

კონიელ დიდკაცთა შეთქმულებას სათავეში ედგა ვილაც იბრაჰიმ ფეჩევი (ისტორიკოსში არ აურიოთ), „ცნობილი თავისი ბრაზიანობითა და კადნიერებით“.

ფეჩევის „დასის“ რომელიდაც მოშაირე-მასხარამ ლექსი გამოუთქვა და გაუფრცელა სააკაძეს:

ღვინოს ვსვამ და გეახლები ფლავს,
 ვარეგნობით ვემსგავსები ხარს,
 არ ვარ მოთაყვანე ცეცხლისა,
 არც მუსლიმი,
 არც ურია,
 ვარ მირმირანი ყარამანიისა,
 ვარ მოურავი გურჯისტანისა.

კონიაში დატრიალებულ ყოველ ბნელსა და უწყესო საქციელს ქართველებს აბრალებდნენ.

ვილაც მძარცველებმა ღამით სახლები დაძარცვეს, — ქართველებს დააბრალებს.

ვილაც მაწანწალებმა ქალებს ნამუსი აძხადეს, — ქართველებს დააბრალებს.

ვილაც ლაზღანდარებმა ქალიშვილებს თმები გადაპარსეს, სახედარზე თავგადახოტრილები შესვეს და ხალხის თვალსასერიოდ ჩამოატარეს, — ესეც ქართველებს დააბრალეს.

კონიის სამმართველოდ გაგზავნილი „ვინმე ხუცესი“ — მოადგილე გიორგი სააკაძისა — იბრაჰიმ ფეჩევიმ სრულიად უმიზეზოდ შეიპყრო და ციხეში ჩააგდო.

იმკამად გიორგი არზრუმს იღგა სახლეულოთ და სანამ მის საბეგლარბეგოში დატრიალებულ ამბებს შეიტყობდა, მანამ იბრაჰიმ ფეჩევი კონიელ დიდკაცთა თანხლებით ხუსრევ-ფაშას ეწვია და წერილობით და სიტყვიერად საჩივარი გადასცა ქართველთა „უსამართლობის, სიმკაცრის, გაუპატიურებათა და ძალმომრეობათა“ შესახებ.

ხუსრევ-ფაშა ახალი დაბრუნებული იყო ბაღდადის ლაშქრობიდან. მარცხიანად დაბრუნებულიყო. ბაღდადი ვერ წაერთმია სპარსელებისთვის. ვერ წაერთმია, რზდგან სააკაძე არ წაიყვანა „მარჯვენა ხელად“. ჯერ არ იცოდა ხუსრევ-ფაშამ, რას გადაუწყვეტდა ხონთქარი „ბაღდადური მარცხისათვის“.

იმ დღეს კიდევ ერთი წერილი მოსვლოდა ხუსრევ-ფაშას ცოლისაგან: ჩემი ძმა ხონთქარი შენზედ „გულში მწარად“ არისო, მოურავის გამარჯვებები კი „მწვედ უხარიაო“; მე ვიცო, მოურავის ხმალდახმალ მოკვლა „დიად ძნელი“ საქმეა, მაგრამ მეტის მოთმენა აღარ შეიძლება — ან უნდა მოჰკლა, ან უნდა შეაკვდეს; ნუ დაგავიწყდება, რომ „ჯერ ისევ“ დიდი ვეზირი და ხელმწიფის დის ქმარი ბრძანდებიო...

„ჯერ ისევ!“ — ეს მუქარა იყო, — მუქარა მართო ცოლისა კი არა, არამედ — ხონთქარს დისა.

ერთი მიზეზიც „ემოვნა“ ხუსრევ-ფაშას გიორგი სააკაძის გასანადგურებლად: ვილაცა იტყობინებოდა, სააკაძე საქართველოში აპირებსო „გაბარვას“, ჯერ „დადიანის ქვეყანაში გაიქცევაო“ და იქიდან ქართლში გადააღწევსო...

ხუსრევ-ფაშა ამჯერად არ სტყუოდა: გიორგის მართლა ჰქონია გულს ამოჭრილი საქართველოში დაბრუნება.

ხუსრევ-ფაშამ ანატოლიის ბეგლარბეგს ზორ-ფაშას უზრძაძა, სასწრაფოდ ჯარით გაეშურე, გიორგი სააკაძე და მისი ქართველები შეიპყარი და მომგვარეო.

გიორგის უკვე ჩაესწრო კონიაში.

ავთანდილიც თან ახლდა.

მამა-შვილს ჩასვლისთანავე დაახვედრეს დიდი ვეზირის საშფოთარი ბრძანების ამბავი.

გიორგიმ ნასწრაფევი თვალით გადათვალა ქართველთა რაზმი.

ხუთი ათეულიც არ იკვრებოდა.

მაშინვე გამოიყვანა კონიიდან გიორგიმ ამხედრებული გუნდი.

თავი მისცეს მთასა და ბარს, ტყესა და მინდორს, კლდესა და ღრეს. მიჰქროდნენ გახელებით, უგზო-უკვლოდ, უმისამართოდ.

გავეშებული მისდევდა ზორ-ფაშა თურქული ათასეულებით ორმოც-ორმოცდაათ ქართველს.

ეს პირველი შემთხვევა იყო, როცა გიორგი სააკაძემ არ იცოდა საით მიდიოდა.

არ იცოდა, რადგან სამუდამოდ დაჰკარგვოდა მისი ცხოვრების საგზური ნიშანსვეტი — საქართველო!..

თმა-წვერი საესებით გასთეთრებოდა.

სისხლი დაჰქანცვოდა და დაუძლურებოდა...

მდეურები დევნილებს წამოეწივნენ.

სუსტი შებრძოლება, ამოვ გაბრძოლება და ყველანი შეიპყრეს.

ხუსრევ-ფაშა ჰალაბში (ალეპო) ელოდებოდა ბორკილდადებულ სააკაძეს და მის თანალტოლველებს.

1629 წლის 3 ოქტომბერი. ქალაქი ჰალაბი.

ზედ კარვის ზღურბლზე ზის ოსმალეთის დიდი ვეზირი და სერასქერი ხუსრევ-ფაშა.

იანიჩარებს მოჰყავთ გიორგი სააკაძე.

ხელ-ფეხი მძიმე ჯაჭვებით შეუკრავთ.

ტანზე ყვითელი ხალათი აცვია სასიკვდილოდ განაწირს.

თვალებიც თითქოს ჩანაცრებია, — თვალები, ერთ დროს მზის დამკორტნავი.

ხელმარჯნივ — უფროსი ძე, ავთანდილ სააკაძე მოჰყვება მამას.

ხელმარცხნივ — ქაიხოსრო მუხრან-ბატონი და იასე ქსნის ერისთავი.

ესენიც ყვითლად მოუერთავთ წითლოსან ჯალათებს.

მათ უკან ყვითელ ფერზე ჩაგუბებულა ორმოცი ქართველი.

ფეხქვეშ უცხო მიწა გარინდებულა, თავზე უცხო ზეცა გადმომხობილა.

„ბიჭო გოგია! ბიჭო გოგია! ბიჭო გოგია!“

ღმერთო დიდებულო! საიდან მოფრენილა ეს ჩიტი?!

გოგია... გოგი... გიორგი!

ყრმობითგან ესმოდა სააკაცეს „მისი ჩიტისგან“ ნაძახურა „მისი სახელი“.

მაგრამ საქართველოში ესმოდა, მხოლოდ საქართველოში!

„ბიჭო გოგია!“

გოგია!

გოგი!

გიორგი!

ხოლო, ახლა აქ, საქართველოდან გადმოვარდნილს.. საიდან, როგორ?!
ბიჭო გოგია!

— ბიჭო ავთანდილ!

— რა იყო, მამა?

— გესმის, შვილო?

— მესმის, მამა!

— აბა, შენ იცი, შვილო!

— ნუ გეშინია, მამა!

— მშვიდობით, შვილო!

— მშვიდობით, მამა!

— იქ, პატასთან, საქართველოში!

— ჰო, მამა... ჩვენ ყველანი იქ... საქართველოში!

...

— ყველას თავები დააყრევინეთ! — თქვა ხუსრევ-ფაშამ. |

ყველას დაასწრო გიორგი სააკაცემ: ჯალათს მივარდა, მის წინ ოღრიკალად მოიყეცა და „წარუპყრა ქედი“ (ალბათ, შე-

შინდა მარად გულშეუძვრელი მოურავი — შვილის სიკვდილი არ იხილოსო ჩემმა თვალებმა“).

არ დაამადლა ჯალათმა და...

და გიორგი სააკაძის თავი დაეცა!

ტანი შეუქრეოლდა დედამიწას.

გული შეუტბორდა საარაკო ვაჟეციის სისხლით.

ბაატა სააკაძის სამარტვილე შეიძრა ერთაწმინდაში.

წამსვე ავთანდილ სააკაძის მშვენიერი თავი და ახოვანი სხეული ცალ-ცალკე დაეცნენ განკვეთილი მამის გვერდით.

მერე იასე და ქაიხოსრო დაენარცხნენ თავტანგანშორებულნი.

ზედიზედ ცვიოდა ქართველთა თავები.

ყოველ დაკვრაზე წმამდლა ითვლიდა დაგორებულ თავს ჯალათი-იასაული.

სააკაძის რაზმში ყოფილა მამა-შვილი — გორგასალი და ბეჟანი. სიკვდილი მარტო შვილისათვის მიესაჯათ — ბეჟანი-სათვის. როცა ტაბუჯი წამოაწოქეს, მივარდა გორგასალი იასაულს და შეჰლადადა: ნუ მომიკლავ შვილს, მის მაგივრად ჩემი თავი მიათვალე წარკვეთილ თავებს და სამაგიეროდ, რაც ოქრო-ვერცხლი შემომრჩენია, შენთვის შიბოძებიაო.

შეიწყნარა ჯალათმა მოხუცი მეომრის თხოვნა (ან რა ენაღვდებოდა, თუკი თავების სათვალავი არ დაკოჭლდებოდა“), ქრთამი აიღო და შვილის ნაცვლად მამას დააგდებინა თავი.

სულთანი მურად IV რისხვამ აიტანა, როცა ხუსრევ-ფაშას ასეთი თვითნებობისა და გიორგი სააკაძის სიკვდილის ამბავი შეიტყო.

ქერ ბაღდადში ნაწვენევი მარცხი არ ეპატიებინა ხონთქარს დიდგვირისთვის და ახლა კიდევ ეგზომ „საჭირო და საყვარელი გურჯის“ დაუკითხავად სიკვდილით დასჯა!

მაშინვე დიარბექირის ბეგლარბეგს — მურთაზ-ფაშას ფირმანი გაუგზავნა: ხუსრევ-ფაშას დაეცი, თავი გააგდებინე და სტამბოლს გამომიგზავნეო!

მურთაზ-ფაშა გათათრებული ქართველი იყო, სამცხელი ათაბაგების გვარგუჯაბიდან.



და „დიდის სიამოვნებით“ დააგდებინა თავი დიდი სააკაძის
ჯალათს მურთაზამ...

! * * * * *

ვაგლახი მას სჯერა ეს ზღაპარი,
რომ მის სამშობლოს
გამოიხსნის გადამთიელი.

ბ ა ი რ ო ნ ი

აღარ იყო ამქვეყნად გიორგი სააკაძე.

აღსრულებულიყო — შობითგან 49 წლისა.

„სიკვდილი გიორგი სააკაძისა!“ — გამორჩეული ელვა-
ნთხევით გაჰყვეთა ცისგვამი ამ დაძახილმა.

აღსრულებულიყო გულით მუდამ წრფელი უდიდესი მა-
მულიშვილი.

მისი მამულიშვილური გულწრფელობა შეურყეველი იყო
თუნდაც იმ თხუთმეტწლიანი „ორთათრიანობის“ („ალია-ოს-
მანობის“) ეპისაბრუნავშიც.

გულწრფელობა-მეთქი!

რამეთუ სულ სხვა იყო მისი ცალკეული პოლიტიკური
ცთომილობანი.

უადრესად კეთილშობილური და გრანდიოზული იყო მისი
განაზრახი „ყოველი საქართველოს“ გაერთიანებისა და აღზე-
ვებისა, მაგრამ ამდენადვე უმართებულო და უნიადაგო იყო
ამ უზემოეს განზრახულობათა განხორციელების გზები და სა-
შუალებები.

მას ბავშვის სიწრფელით სჯეროდა, რომ მისი სალოცავი
საქართველოს გადარჩენა, გაერთიანება და გამძლავრება სწო-
რედ ქართველი ხალხის მომტერე „უცხო ძალების“ საშუალე-
ბით შეიძლებოდა.

სწორედ ამ „უბედურ წინააღმდეგობათა“ წყალობით იყო,
რომ სააკაძის ბევრ თანამედროვეს (ზოგჯერ ჩვენს თანამედ-
როვესაც) უცხოეთის გზებზე მისი „სამამულიშვილო ძიებანი“
სამშობლოს დალატად და რენეგატობად ეჩვენებოდათ.

ეჩვენებოდათ, რამეთუ დიდი მკედელი მშობლიური ისტორიისა ხშირად საკუთარი სამშობლოს მოსისხლე „უცხო თესლთა“ ისტორიასაც სჭედდა თავგამოდებით.

აღსრულებულიყო ქართველი გმირი, რომლის აკვანს ვახტანგ გორგასალისა და დავით აღმაშენებლის აჩრდილები არწევდნენ. მისმა მხედრულმა შემმართველობამ და სარდლურმა ნიჭიერებამ ააღორძინა, განადიდა და უხემოესი რწმენის სიმალლეზე აღამაღლა ქართული სული. თუმცა მას აკლდა უტყუარი გერშინობა საკუთარ ხალხში „შინაგან ძალთა“ გამონახვისა, რაის უნარიც ისე ჭარბად გააჩნდათ დავით აღმაშენებელსა და გიორგი ბრწყინვალეს.

აღსრულებულიყო დიდი ქართველი გენერალი, რომელიც დავით აღმაშენებლის ქამს ამირსპასალარობას დაიმშვენებდა, ხოლო ნაპოლეონი მისთვის ფელდმარშლობას არ დაინანებდა.

ვინ იცის, რამდენს შერჩა (და შერჩება) ქვეყნისა და ხალხის დალატი; ხოლო სააკაძეს, უნებლიედ თუ რამე შეცდა, იმ ცთომილობამ ყველაზე მეტად თვითონ მას და მის სისხლიერ მონაგარს ავნო. ორი ვაჟკაცი შვილი უყოყმანოდ გასწირა და თვითონაც მთელი წუთისოფელი ჯვარზე ეკიდა სალოცავი საქართველოსთვის.

რამდენ მოლაღატეს ერგო პატივად ნაღალატევე მშობლიურ მიწაში განსვენება, ხოლო სააკაძის ტანჯულსა და წამებულ სხეულს არ იქნა და არ ეღირსა მისგანვე გაღმერთებულ ქართულ მიწაში დამიწება.

არც ბრძოლის ველზე გმირის სიკვდილით სიკვდილი ჰღირსებია საომარი თაღპიონის სწორუბოვარ ხელოვანს.

აღსრულებულიყო დიდი ქართველი წმინდანის — პაატა სააკაძის მამა.

აღსრულებულიყო ღვიძლი შვილი უბოროტესი დრო-ყამისა, მშვენიერი, სპეტაკი სულით, მაგრამ ავი დროის სახიჩარი დანაშრეგებით და ზადიერებით.

მთელი ოცდაათი წლის მანძილზე გვერდი-გვერდ იდგა ეს ორი ჯვარცმა ქართულ გოლგოთაზე — გიორგი სააკაძე და თეიმურაზ მეფე, ზოგჯერ — ურთიერთჭირისუფლობით ცრემლდამდინარნი, ზოგჯერ ურთიერთმომტერენი და სისხლმათხეგარნი.

მადლიერმა და დიდსულოვანმა ქართველმა ხალხმა თან გააყოლა „დიდის“ თიკუნი — „დიდი მოურავი“, ვითარცა დიდი ვახტანგ, დიდი დავით, დიდი თამარ, დიდი გიორგი, დიდი ლუარსაბ, დიდი სვიმონ.

მისი ბოზოქარი სახე საქართველოსა და წინა აზიის სინხლიანი ისტორიის ჩარჩოში გამორჩევით გამოიკვეთა და გაქვავდა.

აზმა მისამო

დიდი ხევის საგოდეგელი

კათოლიკური ეპისტოლენი

აღარ ჰყავდა საქართველოს გიორგი სააკაძე.

მარტო დარჩა თეიმურაზ მეფე ქართული გოლგოთის ჯვარზე გალურსმული...

შაპ აბასისა და გიორგი სააკაძის სიკვდილამდე ორი წლით ადრე თეიმურაზმა სპარსეთიდან მიიღო მისი წამებული დედის ნაშთები — თავი და ხელ-ფეხთა მტევნები, კათოლიკე ბეოებმა ჩამოიტანეს — ამ ბ რ ო ზ ი ო დ ო ს ა ნ ქ ო ს მ ა და პ ე რ ო დ ო ს ს ა ნ კ ტ ო ს მ ა.

ქეთევანის ძვალთა სხვა ნაწილები, ვითარცა უწმინდესი რელიკვიები, ინდოეთში ქალაქ გოაში წაუსვენებიათ და იქ მოუთავსებიათ დაგრასას მონასტერში.

გორში მიიღო თეიმურაზმა ევროპელი სტუმრები, დიდნი პატივითა და სიხარულით. ერთხელ კიდევ მოიტერა მეფემ თავისი წამებული დედა და შვილები. ქეთევანის ნაშთები ძვირფას კუბოში ჩაასვენა და ალავერდის ტაძარში დაკრძალა.

იმ წელს სორეშან დედოფალი შექნილიყო მძიმე ავადმყოფი. ისიც ამბროზიომ და პედრომ მოარჩინეს და ეს „სასწაული“ თვითონ პატრებმა იესო ქრისტეს მიაწერეს.

1) „ახლა დიდ მადლობას ვსწირავ ღვთის სახიერებას, რომ მომივლინა ჩემს სამეფოში ორი კაცი, რომლებიც წმინდა კოზმასა და დამიანეს მსგავსად ჰკურნებენ ყოველთა სნეულებათა!“ — იძახდა თეიმურაზი ცრემლთა ღვარდვალით.

1628 წელს მრავალ ჭირთა დაძლევეთა და ჭაბანწყვეტით საქართველოში ჩამოაღწიეს იტალიელმა მისიონერებმა. ისინი ეწვივნენ და რომის პაპის წერილები გადასცეს გურიელს, დიანს, იმერეთის მეფეს და ბოლოს თეიმურაზს ეახლნენ გორის მახლობლად რომელიღაც სოფელში.

საჩუქრები მიართვეს თეიმურაზს ევროპელებმა. თეიმურაზმაც „დიდის პატივით“ მიიღო „წმინდა მამანი“.

მიუხალოვდა „მშვენიერ ტახტზე მკდომარე“ მეფეს პატრიჯაკომოსტეფანი და მოახსენა:

„დიდსულოვანო და დაუძლეველო მეფევ, რაოდნიდანაც დიდად შეგსწუხდით რომის პაპთან ერთად შევიტყვეთ რა ყოველი უბედურება, რომელიც დაატყდა თავს თქვენს დიდებულებას და თქვენს ქრისტიანე სამეფოს, ეგოდონათ ახლა უფრო მოხარული ვართ, რომ განვლო იმ საშინელმა დრომ, აღმობრწყინდა სიმშვიდე და ღვთის მოწყალებით კვალად დაეპატრონეთ თქვენს დაკარგულს სამეფოს. მართალია, დიდს განსაცდელში შთავარდით, გარნა გამოიჩინეთ დიდი სიმბნე და ხასიათის სიმტკიცე; ესეთი თქვენი თვისება ღირსია ქებისა და დიდებისა. გარნა ყოველი დიდება უნდა მიეგოს ღვთის ძრიელ მკლავსა, რომელმაც თქვენ მოგცათ ძალა და გაგამხნევათ. ნუნციოდ წარმოგზავნილი ვართ თქვენის დიდებულებისადმი რომის პაპისაგან, რომელმაც მოგვანდო მის შვილად გცნოთ და თქვენგან მოვიპოვეთ ეს წყალობა და უფლება, რომ უშიშრად დავრჩეთ თქვენს სამეფოში და ვიქადაგოთ კათოლიკე სარწმუნოება. აქ განძის საძებნელად და გასამდიდრებლად არ გხლებივართ; ჩვენი ფიქრი, ჩვენი საუნჯე და ჩვენი მიზანი არის მხოლოდ ზრუნვა ხალხის ცხოვნებისათვის. ღვთის შემწეობით იმედი გვაქვს ჩვენს საწაფელს ვეწიოთ, თუ თქვენც თქვენის ძრიელი მფარველობით და გულკეთილობით შეგვეწევით“.

ეს სიტყვა დაასრულა ჯაკობო სტეფანიმ და მაშინვე პეტრო ავიტაბილემ რომის პაპის ეპისტოლე მიართვა თეიმურაზს. წერილში ეწერა:

„პაპი ურბანუს მერვე, თეიმურაზს, კახეთის მეფეს.

კეთილშობილო მეფევ, მშვიდობა და ღვთის წყალობის ნათელი საქართველო, ეგრეთ უხვი და თვალუწვდენის ტყეებით და დამშვენებულის ჭირნახულით, მალე მოირწყვის დაუშრეტელი წყაროს წყლით, უკეთუ გამოიღო ნაყოფი, რომელსაც ევროპა და რომი მოელის. ჩვენ გერწამს მომავალი მისი ბედნიერება. გიგზავნით ღვთიურ მეცნიერებაში განსწავლულ მღვდლებს, რომლებიც სხვას არას ნატრობენ, თუ არ ეროს გაბედნიერებას. უკეთუ ესენი თქვენს ქვეყანაში დაადგინეთ, თქვენი მამობრივი მფარველობა არ მოაკელით და თუ თქვენმა ერმაც გულმოდგინებით მოუსმინა მათ სიყვარულით სავსე სიტყვები, მაშინ ჩვენთა მეფეთა საპატიო და ეგოდენთა გვართა სამკვიდრებელი რომის ქალაქი დიდად და უზომოდ დავალებული იქნება თქვენგან. იტალიისათვის დიდად სასიქადულოა, რომ კახეთის მეფემ მოუსმინოს რჩევა მღვდლებს, რომელთაც უნდა განამზადონ გზანი უფლისანი და წრფელპყონ ალაგნი მისნი. როგორა გგონიათ, კეთილშობილო მეფევ? განა ცოტა რამეა ის სიკეთე, რასაც ჩვენი მღვდლები თქვენის დიდებულებისაგან მოელიან, ეგრეთვე რომის ქება და უმაღლესის მწყემსის მომადლიერება? უკეთუ თქვენი უმაღლესი ნიჭი ნატრობს დიდებას, ცხადია, არაფერს დაზოგავთ, რათა თქვენი სახელი იქოს და იდიდოს ქრისტიანების დედა ქალაქსა და ყველა ტომთა საერთო სამშობლოში. რადგან თქვენის სამსახურით, რომელსაც მოგვაგებთ, ღირსი შეიქმნებით ყოვლის მპყრობელის განსაკუთრებულის მფარველობისა, იმ ყოვლის მპყრობელისა, რომელიც თავისად რაცხს ყოველ სამსახურს, რასაც კი მიაგებენ უცხოთა და გლახაკთა, ეგრეთვე ჩვენც და უცხორომელად ვილოცავთ უფლის მიმართ, რათა გაგიღოს ზეცის კარი, გიწინამძღვროს თავისი სჯულის გზით და შემდგომ მოგავოს უკვდაგების და გამარჯვების სუფევა. თქვენი ერიც დიდად კმაყოფილი დარჩება ამ მღვდლებისგან, რადგან ესენი ევროპიდგან აზიას კი არ მოდიან, სიმდიდრე ანუ შეძლება რამ შეიძინონ, არამედ მათი მიზანი და ნატვრა მართო ერის ბედს.

ნიერება და მეფეთათვის დიდების შექმნა. ოჰ! როდნათ ბედნიერი შეიქმნებით, უკეთუ ეცდებით, რომ თქვენმა ქვეშევრდომმა ერმა მოისმინოს მათი სასარგებლო მოძღვრება, რომელიც ამოღებული აქვსთ მკერდიდან, და რომელსაც შეუძლია კაცი ანგელოზად აქციოს და ქვეყანა სასუფეველად შესცვალოს. რომამდე მოაწია ყველა თქვენი უბედურების ამბავმა და მასთანვე მოგვითხრეს საოცარი და შეუდრეკელი სიმხნე, რომელიც თქვენ გამოიჩინეთ. ეგრეთვე ვუწყით, თუ როდენი სიმტკიცე სარწმუნოებისა გამოიჩინა დედა თქვენმა, რომელმაც ქრისტიანობაზე ხელის აღებას თავისი სამეფოს დაკარგვა და სიკვდილი არჩია. მაშ, ეგოდნად განთქმული დედის შვილო და ეგოდენთა განსაცდელთა მძლეველო, მოუსმინეთ ჩვენს მღვდლებს ყოველი რჩევა, რომელსაც მოგახსენებენ სარწმუნოების სახელით და რომელიც შეიქმნება მშვენიერი სამკაული თქვენის განუდრეკელი მხნეობისა. ხოლო ჩვენის სამოციქულო კრებულთ ჩვენც დიდად ავამაღლებთ თქვენს სახელს და ვევედრებით ღმერთს, რომ მოსცეს მხნეობა და ძლევამოსილება თქვენს მხედრობას, რათა გამარჯვებული ქვეყნიერს მტრებზე, გვირგვინოსანი წარსდგეთ საუკუნო ბედნიერების მამულში“.

| თეიმურაზმა სიხარულით მოისმინა პაპის ეპისტოლე. მერე აიღო და, „კრძალვისა და პატივის გამოსაცხადებლად“, წერილი იგი „თავზე დაიდო“.

| რამდენიმე დღე თავისთან იყოლია მეფემ ევროპელი ბერები, მათთან სადილობდა, საუბრობდა, ევროპის ამბებს გამოიკითხავდა... ბოლოს მისიონერებს მეფემ გორში გაუჩინა ბინა და „საზრდელი“, აჩუქა მათგანვე არჩეული ადგილები, სოფლები და ყმები. კათოლიკე პატრებმა კათოლიკური ეკლესიაც ააშენეს, ადგილობრივ ხალხსაც გაეცვენენ, შეეთვისნენ, ქართული ენაც შეისწავლეს და ფართო საქრისტიანო მოღვაწეობაც გაშალეს.

თვითონ „წმინდა მამები“ მოხიბლული იყვნენ ქართველი მეფის „შინა და გარე“ თვისებებით და აღფრთოვანებულნი ატყობინებდნენ ევროპას: ძალიან ლამაზი კაცი არის თეიმურაზიო — თეთრყიროში, დიდრონი თვალებით და ნახატი ცხვირით, საშუალოზე უმაღლესი ტანისა; მშვენივრად იცის ქარ-

თული, სპარსული, თურქული და არაბული ენები და ყველა ამ ენაზე შეუძლია დიდებული მჭევრმეტყველება; არის ფრიად თავაზიანი და დახვეწილი; არის საუკეთესო პოეტი; არის ყოველ საქმეში ძალზედ ნიჭიერი და მამაცი მხედარი: ბედს რომ არ ეღალატნა, მისგან დიდი მხედართმთავარი დადგებოდაო...

ისევ უცქერდა იმედის თვალთ დასავლეთის საქრისტიანოს თეიმურაზი.

ჯერ კიდევ 1626 წელს მეფემ ევროპაში გაგზავნა ნიკოლოზ-ნიკიფორე ჩოლოყაშვილი-ირუბაქიძე, დიდად განსწავლული საეკლესიო მოღვაწე, დიპლომატი და პოლიტიკოსი, „ბრძენი ფილოსოფოსი და რიტორი“. იგი იყო შეილი ომან ჩოლოყაშვილისა და უმცროსი ძმა სახელოვანი სარდლისა და პოეტის — ქაიხოსრო ჩოლოყაშვილ-ომანიშვილისა (მკითხველს ემახსოვრება ქაიხოსრო — „შინაური კაცი“ ქვეთევან დედოფლის წრეში, თეიმურაზმა რომ სიკვდილით დასაჯა, ვითომცდა შეთქმულების მომიზეზებით). მშობლებს ყმაწვილი იტალიაში გაუგზავნიათ სასწავლებლად. თორმეტი წელიწადი ბერძნულ სკოლაში უსწავლია. რომში ბერად აღკვეცილა, საერო სახელი ნიკოლოზი შეუცვლია და სასულიერო — ნიკიფორე დაურქმევია. იგი ჩოლოყაშვილების ძველ ბუდე-გვარს — ირუბაქიძეს ატარებდა და აქედანვე გამოიყვანეს ევროპელებმა „ბრძენი ქართველი ფილოსოფოსისა და რიტორის“ ახალი გვარ-სახელი — ნიკიფორე ირბაზი. 1608 წელს, დავაქაცებული და დიდი ცოდნით დატვირთული დაბრუნებულა საქართველოში. თან ჩამოუყვანია პატრი გვილელმო, იტალიელი კათოლიკე მისიონერი და მოგზაური.

პოლიგლოტი ლა ნიკოლოზ-ნიკიფორე. ათი ენა სცოდნია სრულად და პირწმინდად: ბერძნული, იტალიური, ფრანგული, ესპანური, რუსული, არაბული, თურქული, სპარსული, ქართული, მეგრული.

ცამეტი წელიწადი ცხოვრობდა და მოღვაწეობდა პალესტინაში...

მაშ, — 1626 წელს თეიმურაზმა ნიკიფორე ჩოლოყაშვილი რომინ პაპთან და ესპანეთის მეფესთან გაგზავნა, სპარსეთის წინააღმდეგ დახმარების სათხოვრად.

მესინაში (სიცილიაში) რომ ჩავიდა, იქ ნიკიფორეს იტალიელი მისიონერები შემოსვდნენ — პიეტრო ავიტაბილე და ჯაკომო სტეფანი, რომლებიც თურმე თვითონ მიეშურებოდნენ საქართველოში რომის პაპის წერილებით.

საქართველოში მომავალი ბერები დიდი სიხარულითა და პატივისცემით შეხვდნენ ევროპაში მიმავალ „ქართველ ძმას“. პიეტრო ავიტაბილემ ნეაპოლისაქენ მიმავალ ჩოლოყაშვილს ბევრი სასიკეთო რჩევა მისცა; თავის მხრივ ქართველმაც მრავალი სასარგებლო ცნობით „მომამარაგა“ მისი სამშობლოსკენ მომავალი ევროპელები. ერთმანეთს დაშორდნენ.

მკითხველს ახსოვს, როგორ იმგზავრეს იტალიელმა ბერებმა სიცილიიდან საქართველომდე, — როგორ შეხვდნენ სააკაძეს სტამბოლში და, ბოლოს და ბოლოს, როგორ მოაღწიეს თეიმურაზის კარამდე...

ხოლო ნიკიფორე ჯერ ნეაპოლს ჩავიდა, იქიდან ესპანეთში გაეშურა, მადრიდის სასახლეში მეფე ფილიპე IV-ს ეწვია და თეიმურაზის წერილი გადასცა.

ფილიპემ და მისმა სადარბაზომ ქართველი მეფის თხოვნა მოსმენით მოისმინა, მაგრამ შესმენით არაფერი შეისმინა. ქართველ ელჩს გზის ფულად ათასი სკუდი უბოძა და ისე გამოისტუმრა. ეს იყო და ეს.

ესპანეთიდან იტალიაში დაბრუნდა ნიკიფორე. რომში მივიდა და პაპ ურბანუს VIII-ს წარუდგა თეიმურაზ მეფის წერილით.

წერილში ეწერა:

„რომის დიდს მწყემსსა.

სახელითა მამისათა და ძისათა და წმიდისა სულისათა. აღვიარებთ და თაყვანს გცემთ იმავე ერთარსებას, ერთს ღვთაებას და ერთს სუფევასა. სიხარულით სავსე მოგმართავთ და ეისწრაფვით თქვენის სიწმინდისადმი, რადგან სარწმუნოება და სწავლა-მოდღვრება, რომელიც მოციქულებმა ასწავეს, განუხრწნელად დავიცევით და ეგრეთვე კვალად აღვედით ჩვენს ივერიის სამეფო ტახტზე. აღმოსავლეთიდან გწერთ რომს, საიდგანაც, როგორც მზე დიდად ბრწყინავთ და ანათებთ მთელს ქუჩყანას და, ვითარცა ქერაბიმი და სერაბიმი, სჭვრეტთ ყოვლად წმინდა სამებასა, ეგრეთვე ჰფენთ სოფლად ნათელს,

რომელსაც ღვთის მიერ ღებულობთ: თქვენ ხართ პატივი ქრისტესი და საფუძველი სარწმუნოებისა, რაც წინასწარმეტყველთა და მოციქულთა ჰქადაგეს, თქვენ ყოველივე უწყით. პეტრემ განასწავლა სოფელი და განაბრწყინა. ესევე ვალდებულება გადევსთ თქვენ. აღჭურვილი ერთისა და იმავე ძალითა თქვენ ხართ ყველაზე უდიდესი და უმეტესად ამალღებული მწყემსი. ამ წერილით მოკრძალებული წარვსდგებით თქვენს წინაშე და რიდითა და მისალმებით ვემთხვევით თქვენს მოციქულებრივ ფერხთა, ვინაიდან ყველას უკვდავების წყალს ასმევთ საუკუნო ცხოვრებისათვის. ვითხოვ თქვენგან კურთხევას და ცოდვების შენდობას, რადგან თქვენ ხართ სვეტი სარწმუნოებისა, მთავარი მთელი ქვეყნისა და უპირველესი საყდარი ყოველთა. დარწმუნებული ვართ, რაც უნდა გთხოვოთ, ყოველსავე სიამოვნებით მოგვანიჭებთ. ღვთის შეწევნით და თქვენის უწმიდესობის ლოცვა-კურთხევით მივიღეთ მეფობა. აწ გთხოვთ, თქვენის ბრძანებით დაგვამტკიცოთ. ჩვენც ჩვენის მხრივ გპირდებით მორჩილებას და პატივისცემას. ოსმალეთთან და სპარსელებთან მუდამ უთანხმოება გვაქვს და ხშირადაც ჩხუბი მოგვდის მათთან. მაგრამ ღვთის შეწევნით არც ერთ მათგანს დავემორჩილეთ. მხოლოდ თქვენი ქვეშეურდომნი ვართ. რაც გნებავს, გვიბრძანეთ და ყველაფერს აღვასრულებთ. როგორათაც ღმერთი მაძაა ყველა არსთა, მსგავსათვე თქვენც ხართ მამა ყოველთა მორწმუნეთა. თქვენის შუამდგომლობით მსურს დაკავშირება ისპანიის მეფესთან. ამის შესახებ მას მივწერეთ: ამიტომ გვედრებით და გთხოვთ, თქვენც ეცადოთ, რათა იგი დათანხმდეს. მღვდელი ნიკიფორე მოგართმევსთ ამ წერილს, რომელიც აღვწერეთ ძრიელ მარტივად. აწ ჩვენი უდიდესი ნატვრა ეს არის, რომ შევიქმნეთ სათნო საყოფელი თქვენის უწმიდესობისა. თქვენ ხართ ჭირველი საყდარი და გაქვსთ უსაზღვრო ხელმწიფება. გვიბრძანეთ და ყველაფერში დავემორჩილებით“.

1 ასეთი მავედრებელი და გუნდრუკის მკმეველი წერილის შემდგომ პატივმოყვარეობით გაბლენძილ ბაპს ისდა დარჩენოდა, რომ თეიმურაზ მეფისგან პირდაპირ კათოლიკობაზე გადაყვანა მოეთხოვა.

1 საქართველოში გაგზავნილმა ბატრმა პიეტრო ავიტაბილემ

უხელმძღვანელოს თეიმურაზ მეფის კათოლიკურად მონათ-
ვლასო, გამოაცხადა ურბანუს VIII-მ.

ეს უკვე მეტისმეტი იყო. ასე ერთბაშად ქართველი მეფის „სხვა“, თუნდაც „სხვა ქრისტიანულ“ სჯულზე გადასვლა მრავალი საისტორიო სამანის შეცვლასა და მონაცვლეობასთან იყო დაკავშირებული. ეს შეიძლება დიდი, „სამერმისო საქმე“ ყოფილიყო, ხოლო ახლა „უახლოესი მისაღწევარი“ უნდა მიეღწია ქართველ ელჩს.

მართლაც ნიკიფორე ჩოლოყაშვილმა დიდის ნებისყოფით, მოთმინებით, დამაჯერებელი მსჯელობითა და საზრიანობით დაარწმუნა პაპი, რომ შეუძლებელი იყო ასე ერთბაშად მართლმადიდებელი მეფის კათოლიკედ მოქცევა. ბოლოს და ბოლოს, პაპმა ურბანუს VIII-მ დაწერა „ტკბილი ეპისტოლე“ თეიმურაზ მეფისათვის. ნიკიფორე ჩოლოყაშვილსაც გაუშხადა პაპმა საშუამავლო წერილები — ნეაპოლის მეფის მოადგილესთან, ფლორენციის დუკა ფერდინანდ მედიჩისთან, უნგრეთის მეფე ფერდინანდთან, პოლონეთის მეფე სიგიზმუნდთან, შვეციის მეფე გუსტავ II ადოლფთან, საფრანგეთის მეფე ლუი XIII-სთან; ბოლოს ესპანეთის მეფე ფილიპე IV-საც მისწერა წერილი „ივერიის მეფის ელჩის“ ხელმეორედ მიღების თაობაზე.

ნიკიფორე ჩოლოყაშვილი იტალიაში 1628 წლის ადრიატიკის ზღვაზე დაიბადდა და ზამთრებამდე დარჩა. ამ დროის მანძილზე მან დიდი ღვაწლი დაიდო რომში ქართული სტამბის შექმნისა და პირველი ქართული წიგნების გამოცემათა საქმეებში. ეს იყო ქართულ-იტალიური ლექსიკონი, 3086 სიტყვის შედგენილობით, და ქართული ანბანი, ქართული ლოცვანის თანდართვით.

დაიწყო ნიკიფორე ჩოლოყაშვილის ახალი „დიპლომატიური როკიკობანი“ ევროპის „დიდთა“ და „მცირეთა“ ხელმწიფეთა წინაშე. ყველგან პატივით, „თბილად და ტკბილად“ ხვდებოდნენ, მისართმეველსაც მიაართმევდნენ (ფლორენციის დუკამ მდიდრულად მორთულ-მოკაზმული ცხენი აჩუქა), მაგრამ საქმით ქართველი მეფის ხელის გასამართავად არც ერთ ევროპელ საჭეთმპყრობელს თითიც არ გაუნძრევია. არც ერთ

მათგანს არ სურდა სპარსეთის ან თურქეთის მტრად გადავიდებოდა „შორეული ქართველი მეფისათვის“.

ნიკიფორე ჩოლოყაშვილმა თავის მეუფეს მხოლოდ პაპის „მხურვალე ეპისტოლე“ ჩამოუტანა სახელმწიფო ტალანტებით უაღრესად ღარიბი მაშინდელი ევროპიდან.

თეიმურაზი მაინც მხნედ დახვდა ნიკიფორეს. უკვე მომკვდარიყო მისი ჯალათი — შაპ აბასი. დიდი იმედებიც აღძვროდა სპარსეთის უღლისაგან სამუდამოდ თავდასახსნელად. პაპის წერილიც გულს მოეფონა მეფეს. წერილში ეწერა:

„პაპი ურბანუს მერვე, საყვარელს შეილს, საქართველოს მეფეს, თეიმურაზ ხანს.

უუძლიერესო მეფევ, მშვიდობა და ღვთის წყალობის ნათელი.

ქვეყნიერ მთავრობათა, რომელნიც საუკუნო მეფის მოხარკენი არიან, სუსტი საფუძველი აქვსთ, უკეთუ არ არიან დამყარებულნი იმ შეურყეველ კედელზე, რომელსაც ვერ სიღვევენ ბჭენი ჯოჯოხეთისანი, როგორადაც დაამტკიცა ყოვლად ძრიელმა უფალმან. ამიტომ ქრისტიანი ხელმწიფენი, რომელთაც კარგად იციან საუკუნო ცხოვრების მეცნიერება და ამ ზეციერის ცხოვრების მეცნიერებით ჰმართავენ თავიანთ სამეფოს, გამარჯვებით დაგვირგვინებულნი მოდიან რომის მღვდელთ მთავრის მოციქულებრივ ფერხთა სამთხვეველად და უცხადებენ თავიანთ შვილობრივს მორჩილებას. ძალნი ზეცისანი ამხედრებულან ახალის მთავრობის დასაცველად, ვინადგან თქვენს ხელმწიფებას აწ სურს ჩარიცხოს თავი კათოლიკე მეფეთა კრებაში. ჭეშმარიტად ღვთიური სახიერება ევლინება საქართველოს და ამისი ცხადი ნიშანიც ის არის, რომ ამ ბოლო დროს, ვითარცა მფარველნი ანგელოზნი, მოგვევლინათ მოძღვარნი და მოგიტანეს საუკუნო სიბრძნის რჩევანი. ღმერთი, რომელიც გაბნეულ ისრაელს შეჰკრებს და გაჰკურნებს ყველა ტომთა, აღარასოდეს მოგაკლებსთ თავისს მოწყალებას. ამიტომ ჩვენც მამობრივის სიყვარულით მივიღეთ საყვარელი შვილი წმინდა ბასილის მონაზონი ნიკიფორე ირბაზი, რომელიც თქვენის წერილით მოგვივლინეთ მოწმად და თქვენის პირობის თავდებად. ხოლო აწ სიმდაბლით ვევედრებით ღმერთსა, რომლის ხელთა არის გული მეფეთა, რათა სანატრელი და-

სასრული მოსცეს თქვენის უმაღლესობის კეთილს განზრახვას, რაოდენათაც შეიძლება მალე შეხვიდეთ რომის დედა ეკლესიის წიაღსა მოვლენილის ანგელოზების წინამძღვრობით. გვენებას თქვენი ახსნა ყოველის საეკლესიო დაბრკოლებისაგან და ეგრეთვე ზიარგყოთ ეკლესიის ყოველი შენდობისა... მიუცილებლად საჭიროა იგულმოდგინოთ და იზრუნოთ, რათა ეპისკოპოსთა და მღვდელთა, რომლებიც საქართველოში ერს უვლიან სულიერად, იარონ ერთად უფლის სახლში და თქვენთან ერთად სცნონ პეტრე მოციქულის უპირატესობა და პატივი სცენ ეკლესიის ხილულ თავს, რომელიც ზის რომის საყდარსა. ჩვენ ამის უკეთეს საშუალებას არას ვხედავთ საქართველოში მშვიდობის დასამყარებლად და არც ამის უსაჭიროებს, რომ მიიღოთ ზეციური მფარველობა. ჩვენის მღვდელთ მთაფრულის უფლების დიდებად ჩვენის სამწყსოს ცხონება მიგვაჩნია; ამიტომ დიდად მოხარული და გამარჯვებული ვიქნებით და ნიადაგ ვაქებ-ვადიდებთ ზეციერ მამას, თუ გველირსა შეტკობა და შეთვისება მოციქულებრივის სიყვარულით თქვენებრ დიდებით და სიმხნით განთქმულის მეფისა; მაშინ შეგამკობთ ყოველის სულიერი სიკეთით, რომელსაც კათოლიკე მეფენი სააქაო მფლობელობის სახელზე უფრო აფასებენ“.

ყველა ამ კათოლიკური ცრემლებით დამბალი წერილებიდან აღბათ ერთი პატარა, უკიანთო ცეცხლიც არ დაინთებოდა, ზედ რომ თეიმურაზს ცოტარდნავ მაინც მოეთბო მუსლიმანურ ომებში დამზრალი ხელები.

„ზურაბ ერისთვის დროსაო, —
სისხლის წვიმების დროსაო.“

ხ ა ლ ხ უ რ ი

ბაზალეთური ტრაგედიისა და გიორგი სააკაძის განადგურების შემდგომ აღმოსავლეთ საქართველოში სამი „მთავარი მესვეური“ დარჩა — თეიმურაზი, სვიმონ-ხანი (იგივე — მეფე სვიმონ II) და ზურაბ ერისთავი.

სამივეს ცალკეულად საკუთრად და განუყოფლად ეგულებოდა აღმოსავლეთ საქართველო.

თეიმურაზ მეფე, იმჟამად „ყველაზე კანონიერი და აღიარებული“ ბაგრატიონი ხელმწიფე, მარტო კახეთს არ სჯერდებოდა და ახლა (გამორჩევით — „ყველაზე სახიფათო მეტოქის“, გიორგი სააკაძის მოსპობის შემდგომ) ქართლსაც თავისად მიიჩნევდა.

სვიმონ მეფე წარმომავლობით ბაგრატიონიც იყო და, რაც მთავარია, „სპარსეთის კაციც“. ამიტომ მას ტფილისის ქუეყანასთან“ ერთად კახეთის შემოერთებაც „არ აწყენდა“.

ამ ორ ტახტს შორის ზურაბ ერისთავი იდგა, საქართველოს „მეორე გმირი“ (რასაკვირველია, სააკაძის შემდგომ), რომელმაც თავისი „წონით“ ორი დიდი ყველაზე სანიშნავი ბრძოლის სასწორი „გადასწონა“ — მარტყოფისა და ბაზალეთისა. ზურაბს ქართლ-კახეთზე „განუყოფელი“ მბრძანებლობის „საკუთარი განაზრახი“ ჰქონდა. მან კარგად იცოდა, — არც ერთ ტახტზე არაგვის ერისთავს, თუნდაც თეიმურაზ მეფის სიძეს, არავინ დააბრძანებდა: ამიტომ ზურაბს „სწადოდა, რათა იყოს თეიმურაზ კახ-ბატონად და სვიმონ ქართლისად და ორნივე იყვნენ „მავედრენი მისნი“. „ორივე იყოს და ორივენი მე შემორჩილებოდესო“, ფიქრობდა ერისთავი და გულდინჯად „აწონასწორებდა“ ქართლ-კახეთის „სასწორს“ ჯანიან ხელში.

მაგრამ, ბოლოს და ბოლოს, ზურაბ ერისთავიც უნდა მიმ-

ხვდარიყო, რომ „ვერ ხელ-ეწიფების ორთა უფალთა მონე-ბად“.

მანც ძლიერი თეიმურაზი უფრო აფიქრებდა ზურაბს, ვიდრე სუსტი სვიმონი.

ამას ისიც დაერთო, რომ სამუხრანბატონო მამულები, რომლებიც თეიმურაზმა ბაზალეთის ბრძოლის წინ ზურაბს აღუთქვა, ახლა თავის შვილს დათუნას მისცა.

გიორგი სააკაძის სიტყვები გაახსენდა ზურაბ ერისთავს: მერომ მომკლავენ, ჩემი მტრები მუხრანსაც ოხრად დაგარჩენენ და სიცოცხლესაცო.

გამოერკვა ზურაბ ერისთავი.

და ერთბაშად საცნაური შეიქნა, რომ არაგვის მბრძანებელი „ქართლ-კახეთის სასწორს“ სვიმონ-ხანისკენ ჰხრიდა.

ზურაბი ტფილისის ხშირი სტუმარი შეიქნა.

სვიმონ მეფე ზურაბ ერისთავს უკვე „მამას“ ეძახდა.

მალე ერანიდან სვიმონის შვილები და ძმისშვილები ჩამოვიდნენ, ქართლის ველები არ იკმარეს და კახეთის მიწა-წყალსაც „შეესივნენ“ ნადირობა-ნადიმობით.

მერე ზურაბ ერისთავი ზემო ქართლისკენ წამოუძღვა „შვილობილ სვიმონსა“ და მის ჯარს.

თეიმურაზმა ომი ვერ გაბედა და კახეთში ჩაიკეტა „ჯავრისგან დაღრღნილი“.

ზურაბ ერისთავის წყალობით ახლა მთელი ქართლი სვიმონ მეფეს ემორჩილებოდა.

სულ აიწყვიტა ზურაბ ერისთავმა. გორს შეესია, გაძარცვა და გაატიალა.

გაძარცვულ ქართველებს ხმა არ ამოუღიათ, მაგრამ დაზარალებულთა შორის თეიმურაზის წყალობით გორში დასახლებული კათოლიკე მისიონერებიც აღმოჩნდნენ. ამათ არ დაითმინეს და პატრი ჯაკომოს ტეფანი გაგზავნეს ზურაბთან, დუშეთს.

ჯაკომოს სტეფანი ეწვია არაგვის ერისთავს, ზურაბმაც თავაზიანად მიიღო ევროპელი და თვითონვე დაასწრო სათქმელი:

„ძალიან კარგად ვიცი, რაზედაც გარჯილხარ, — შენი მეგობარი პატრების საშუამდგომლოდ მობრძანებულხარ, ქონე-

ბა რომ წაართვეს ჩემმა მეომრებმა. მაგრამ ამჯერად უნდა მაპატიო, რომ თხოვნას ვერ შევისრულებ, — მეომრებმა ნადავლი უკვე გაინაწილეს და აღარ შემიძლია უკანვე წავართვა. შენი რომ იყოს, ასეთი ღარიბი ბერის გაძარცვას სწორედ არ დავანებებდი, წართმეული მდიდარი ხალხის ქონებაა და ამხაირ ხალხს არ გაუჭირდება ხელახალის შექნა. მათ ხომ მოკლე ხანში უეჭველად მოუვათ ფული ინდოეთიდან“.

მაგრამ მაინც უთხრა თავის სათქმელი იტალიელმა ბერმა ქართველ ერისთავს:

„მართალს ბრძანებ, ბატონო, რომ სწორედ ამ საქმემ მომიყვანა შენს წინაშე და მადლობასაც გიძღვნი ჩემდამი ასეთი კეთილგანწყობილებისათვის, რამეთუ ბრძანე — არავის მიეცემდი შენი გაძარცვის ნებასო და თუ წაგართმევდნენ, მაინც უკან დაგიბრუნებდიო. მაგრამ შენ დაგავიწყდა, რომ ეგ ქონება ეკუთვნის ჩემზე გაცილებით უკეთეს კმნილებას, ვისთან შედარებით მე მხოლოდ და მხოლოდ მატლი გახლავარ. განა ეკლესიაში ღვთისმსახურებისათვის განკუთვნილი ჭურჭელი ღმერთის საკუთრება არ არის? შენივე სიკეთისათვის გთხოვ, ჩემს ქონებაზე მეტად სცე პატივი ქონებას იმისას, რომელმაც შექმნა მთელი სამყარო და სიცოცხლე მოგვანიჭა შენცა და მეც. ის რაც არის ღვთისა, უნდა დაუბრუნო ღმერთს! თორემ, გაიხსენე ბალთასარ ბაბილონელი, — როგორ დასაჯა ღმერთმა, როცა იგი იერუსალიმის საღვთო ტაძრიდან გატაცებული ძვირფასი ჭურჭლით ქეიფობდა თავაწყვეტილად; გაიხსენე, როგორ დასწერა ზეციურმა ხელმა ბალთასარის თვალწინ ის საბედისწერო სამი სიტყვა — „მენე, თეკელ, ფარეს!..“

მცირე ხანს ჩაუფიქრდა ზურაბი იტალიელი ფიჩოსანის

* ლეგენდა ბიბლიიდან: იმის გამო, რომ ბაბილონის მრისხანე ხელმწიფემ ნაბუქოდონოსორმა გაძარცვა იერუსალიმის უმდიდრესი ტაძარი (ძვ. წ. 586), ღმერთმა ასეთი მკრეხელობისათვის სასტიკად დასაჯა ნაბუქოდონოსორის ნაშვირნი. „შურისგება“ მოხდა სპარსელთა თავდასხმით ბაბილონზე (ძვ. წ. 538). იმ ღამით ბაბილონის ახალგაზრდა მეფე — ბალთასარი იერუსალიმიდან წადებული ოქრო-ვერცხლის ჭურჭლეულით გაწყობილ სუფრასთან ლოთობდა, და უეცრად ვითომც კედელზე ხელი გამოჩნდა და ცეცხლოვანი ასობით დაწერა: „მენე, თეკელ, ფარეს“ — „ადრიცხულია, აწონილია, (უკვე) სპარსელებისაა“. მაშინვე სპარსელებიც შემოიჭრნენ და ბალთასარი მოკლეს.

ნათქვამს. მერე კათოლიკეთა ეკლესიიდან გატაცებული ჭურ-
კლეული მოატანინა, სტუმარს გადასცა და უთხრა:

— აჰა, გირწმუნე შენი სიტყვები და გიბრუნებ ყველა-
ფერს, რაც არის ღვთისა. ყოველივე ღმერთმა მოგახმაროთ სა-
სიკეთოდ და საბედნიეროდ!

იტალიელი ბერი წავიდა და მეორე დღეს ქართველი ბერა
მოვიდა, სამეგრელოდან, სახელად ზებედე. თურმე იერუ-
სალიმს მიდიოდა და ჯერ ქართლს შემოეველო ზურაბ ერისთა-
ვის გასაკიცხვად.

მიადგა ზებედე ზურაბს და შეუძახა:

— ზურაბ-ბეგ! კარგად განსაჯე, თუ რა ჩაიღინე და კიდევ
რასაც სჩადიხარ! ქართლში გამაჰმადიანებული მეფე გააბატო-
ნე და არ გესმის, რომ მაჰმადიან მეუფეს მისი ქვეშევრდომე-
ბიც მიჰბაძავენ და მთელს ქართლს უღვთო და უცხოთესლიე-
რი სჯული მოედება. დროზე გაასწორე ეგ საშინელი შეცდომა,
თორემ მალე შენს თავზედაც დაეშვება ღვთის მახვილი და
ისევე გაგაცამტვერებს, როგორც გააცამტვერა ბალთასარი!

თქვა და წავიდა, პასუხისთვისაც არ დაუცდია.

ისევე ბალთასარი!

ისევე საბედისწერო ცეცხლოვანი სიტყვები ზეციური შუ-
რისგებისა!

იჯდა ფიქრებით დარეგვილი ზურაბ ერისთავი და უცებ
თეიმურაზ მეფის შემონათვალიც აახლა კახეთიდან მოსულმა
ფაიქმა: მე ახლა ერანს მივდივარ და შაჰს ყოველივე დაწერი-
ლებით უნდა მოგახსენო, რაც შენის გამოისობით საქართვე-
ლოში დატრიალდაო.

საბოლოოდ დაფრთხა და დადებულა ხმალთაკვეთებაში
სწორუბოვარი გმირი. მაშინვე თავისი კაცი გამოაკიდა სპარ-
სეთისაკენ მიმქროლავ თეიმურაზს. ქალაქ უფადართან დაეწია
ზურაბის ფაიქი თეიმურაზს. უთვლიდა არაგვის ერისთავი: ნუ
აჩქარდები, მოვრიგდეთ და შევრიგდეთო.

წელში გაიმართა თეიმურაზი და მაშინვე შემოუთვალა ზუ-
რაბს:

„სიძედ მყავხარ და შვილად მიმაჩნიხარ; როგორ არ იცი,
რომ შეუგვანებელ-არს განწირვა სიძისაგან სიმამრისა?... თუ
არ დაიშლით, ბოლოს ვინილოთ შენი და შენი სვიმონისა!.. ისე



კი — მე შენთვის ივრის პირისა და თიანეთის მამულების მოცემა მინდოდაო!...

ისევ გახელდა ჭია-მჭამელი ზურაბ ერისთავის გულში.

სვიმონ-ხანი წავკისის იდგა დედოფალ ჰაჯან-ბანუ ბეგუმთან ერთად.

ზურაბ ერისთავის კაცი მოვიდა და მოახსენა საიდუმლო შემონათვალი: საამილახვროს მობრძანდიო — ცხვილოსის ციხეში; და იქ მოვითათბიროთ, თუ როგორ დავაჯილდოვოთ ჩვენი ერთგული თავადები და როგორ დავსაჯოთ მოღალატენიო.

ეს აზრი მოეწონა სვიმონ მეფეს. დედოფალი წავკისს დატოვა და თვითონ გულდანდობილად გაემართა ზემო ქართლისკენ.

უკვე ღამდებოდა, ცხვილოსის ციხეს რომ მივიდა მეფე.

ზურაბ ერისთავი გამოეგება დიდის ამბით. სვიმონიც მოეხვია „მამას“.

ვახშმად დაწხდნენ.

სუფრას დასტრიალებდნენ ზურაბის დაი და სიძე — გიორგი ჩერქეზი.

ადრე აიყარნენ.

დალლილი მეფე მისთვის მიჩენილ სანთიობოში შევიდა და დაწვა.

და ველარ ადგა, — რამეთუ გიორგი ჩერქეზი შევიდა და ხანჯალი შიგ გულში დასცა მძინარე მეფეს.

ზურაბ ერისთავი გარეთ იცდიდა, წყვდიადში განზავებულნი. ახლოს მისი ერთგული შათირი იდგა, ცხენზე აღმჯდარი.

სვიმონ მეფის მოკვეთილი თავი გამოუბრუნინა სიძემ ცოლისძმას.

ზურაბმა ჩამოართვა, ერთი დაჰხედა სიბნელეში მკრთალი სიყვილით ამოკვეთილ სახეს და მაშინვე ზედ მომდგარ შათირს მიაჩჩია.

შათირმა გაქუსლა.

ზურაბიც მაშინვე ამხედრდა, რამდენიმე მსახურიც აიყოლია და ისიც წყვდიადში გაუჩინარდა. იმ ღამით წავკისს დაეცა ზურაბ ერისთავი თოკიდან აწყვეტილი ავაზაკივით. მო-

ულოდნელად დაქვრივებულ დედოფალს — ჯაჰან-ბანუ ბეგუმს — შეუხტა სახლში, გაძარცვა, გაატიტვლა, თმებით დაითრია, ცხენზე შემოიგდო და დიღმისაკენ გაიტაცა წივილკივილით.

თეიმურაზ მეფე ისევ უფადარს იყო, როცა ზურაბ ერისთავის შათირმა სვიმონ მეფის გასისხლიანებული თავი მიართვა და თავისი ბატონის დანაბარებიც მოახსენა: ყაენთან წასვლას თავი დაანებე, მობრუნდი და ქართლსაც დაეპატრონე კახეთთან ერთად.

ასეთ სისასტიკეს არ მოელოდა თეიმურაზი. იგი ერთხახს განლიგებული დაშტერებოდა სვიმონის წამებულ სახეს. მერე საცრემლე აეშალა და ეს დაატირა მეტოქესა და საყვარელი მეუღლის ბიძაშვილს:

„საცოდო ხელმწიფეო, ცრემლები მალჩობს და უდიდესი მწუხარება მეუფლება, როცა ვხედავ შენს ესოდენ უბედურებას, — ვინც გიყვარდა, იმან გილალატა, და ახლა აღარც ის მიხარია, შენგან დაობლებული ქართლის მფლობელი რომ შევიქნები!“

შიკრიკი მოვარდა და მოახსენა მტირალ ხელმწიფეს: ზურაბ ერისთავი მოკლული მეფის მეუღლეს დასცემია, გაუძარცვავს და გაუტაცნიაო.

თეიმურაზმა ფიცხლავ ბრძანება აფრინა ზურაბთან, დედოფალზე ხელი აიღე, ღმერთი არ გაგიწყრეს და არაფერი შესცოდო! სხვა რომ არა იყოს რა, ჯაჰან-ბანუ ბეგუმი შაჰ აბასის შვილიშვილიაო.

ზურაბმაც „ხელი აიღო“.

გაუბედურებული ქალი ტფილისს შეეფარა. ეს ამბები 1630 წელს დატრიალდა.

შაჰ სეფის დიდი მხედრობა გაემზადებინა, — ბალდადი უნდა დაეხსნა თურქთა სერასქერის, ხუსრევ-ფაშას შემოტევებისაგან.

მთავარსარდლად ხოსრო-მირზა დაეყენებია — მისი „მამობილი“, ყულარადასი და ტარულა.

საქართველოდან შათირმა მოუსწრო...



- იცი, ქართველებს შენი ძმისწული მოუკლავთ, — უთხრა შაჰმა ხოსრო-მირზას.
- ჩემი ძმისწული?
- ჰო, სვიმონ-ხანი.
- ვის მოუკლავს?
- ზურაბ ერისთავს.

ხოსრო მცირე ხანს ფიქრს გაუყვია, მერე გამოერკვა და თქვა:

- რა გაეწყობა, მკვდრის გაცოცხლება ვიღას შეუძლია. ჯერ ხუსრევ-ფაშას და ბაღდადს მივხედო და როცა დავბრუნდები, სვიმონ მეფის სისხლსაც მოვიკითხავ!
- ეგრე იყოს და... მანამდე ესეც გაირკვევს, რან აპირებს თეიმურაზი, — დასძინა შაჰმა.

სიკვდილი ზურაბ ერისთავისა

„ენას აქვს გესლი ზოროტი უმწარე ასპიტისაგან, თვით დამიციდია აგრეთვე, ვითა მასმიო სხვისგან.“

ენა მლიქნელი გონებას, მყუდროსა, მშვიდად დებუდსა, გულსა განმსჭვალავს და ღვიძლსა გააპობს, სიბრძნით ქვბუდსა; ანაზდათ აღსძრავს რისხვასა, შეიქს ცეცხლმოკიდებუდსა, აღუღებს ნადველს ცეცხლთაებრ, ცნობაზედ ზედ მიწებულსა. ყურსა ლახვრულად ეცემა, უმაგრეს გრდემლ ნაკრავისა, თვალსა აამღვრევს წმინდასა, ხედვიდენ ავს არ ავისა, თმათ აშლის, ხელ-ფეხთ ფრჩხილებსა გასწევას ცეცხლ-განაკრავისა, შფოთს ააყოლებს ვინც ისმენს, უმშვიდეს იყოს კრავისა.“

ა რ ზ ლ ი

თეიმურაზ მეფე ქართლისა და კახეთის „საბოლოოდ გაერთიანების“ საოცნებო განაზრახს განასრულებდა.

ქართლის ყველა ერისთავისთვის თითო ინარჩ გაეგზავნა საკუთარი კაპარჭიდან. ეს იმას ნიშნავდა, რომ მეფე მტკიცე,

განურდგემელი ერთგულებისა და შენდობის საწინდარს აღ-
 ლევდა ყველას, მტერსაც და მოყვარესაც.

პაემანი მცხეთაში ჰქონდა დანიშნული — სვეტიცხოველში,
 საქართველოს მთავარ სამეუფეო პასტოფორიონში.

რიგ-რიგად მოდიოდნენ თავადები, მეფეს ეახლებოდნენ,
 მისგან მიძღვნილ ისარს უკანვე მიართმევდნენ და ხატზე ხელ-
 დადებით სამარადეთამო ერთგულებას ეფიცებოდნენ. თავის
 მხრივ, მეფე ყველას გულში იკრავდა, ჰკოცნიდა და ლოცავდა.
 ზურაბ ერისთავი შემოვიდა მგლის ნაბიჯით.

ფერი გაუკრთა და წარბი აეშალა თეიმურაზს.

მაშინვე დაითრგუნა უამური გრძნობა მეფემ, ტახტიდან
 წამოდგა და მიეგება „სიძეს, შვილს, მეგობარსა და ერთგულ
 ქვეშევრდომს“.

ერთმანეთს გადაეხვივნენ.

იღვა 1631 წელი.

ქართლ-კახეთი გაერთიანებული იყო.

თეიმურაზ პირველი გამხდარიყო „ორისავე ტახტის მჭერი“,
 გინა — „ორისავე სამეფოსა და ტახტის მპყრობელი მეფეთ
 მეფე“ (მხოლოდ ტფილისში იდგნენ ისევ სპარსელნი).

იმ წელსვე „ლეილ-მაჯნუნი“ და „ზილიხან-იოსები“ დას-
 წერა სულით აღზევებულმა მეფე-პოეტმა.

იმ წელსვე იმერეთიდან დაბრუნებული ოჯახები თეიმურაზ
 და ქაიხოსრო მუხრან-ბატონებისა მეფემ მამაპაპეული ბუდი-
 დან ამოჰყარა და მუხრანი ისევ თავის შვილს დათუნას მისცა.

მერე, — იმის მიზეზით, რომ დედოფალი ხორეშანი თავი-
 სი ძმის, ლუარსაბ მეფის სიკვდილს გიორგი სააკაძეს აბრალე-
 და, დიდი მოურავის ადგილ-მამული და ქონება თეიმურაზ მე-
 ფემ დაიჭირა „ცოლისძმის სისხლად“.

იმ წელსვე ლეკურ-წახეთის დალაშქრებაც გადაწყვიტა
 ხელმწიფემ.

წახეთის ბატონი — ა ლ ი ბ ე გ ს ა რ უ ბ ა შ ე ლ ი — ადრე
 შაჰ აბასს ეხმარებოდა კახეთის აოხრებაში. ამიტომ განიზრახა
 შურისმგებლური ლაშქრობა თეიმურაზმა ალიბეგის დასასჯე-
 ლად.

განიზრახა და გაეშურა კიდევ კახთა და ქართლელთა ჯა-
 რით წახეთისაკენ.

ალონს რომ მიადწიეს, მეფეს გაჭენებული ცხენი ანაზღაურებდა. თად წაექცა, მიწაზე დაენარცხა და ორივე ხელის მაჯები სახსრებიდან ამოიყარა. თვითონ ლაშქრის გაძლოლა აღარ შეეძლო და ზურაბ ერისთავი უჩინა სარდლად.

წარუძღვა ჯარს ზურაბ ერისთავი. მისვლისთანავე იაზრა, რომ ცხენი წახეთის კლდოვან წისადგომებზე არ გამოდგებოდა. დაქვეითდა, ჯარიც დააქვეითა და ფეხდაფეხ მიუხდა ლეკი ბატონის ციხესიმაგრე სარუბაშს.

ჯარი გამოაგება ალიბეგმა.

დაეძგერნენ ქართველები დამხედურებს, ხმლები დააყრცინეს, მკერდიდან ფარები ააგლიჯეს, „და მოსრეს პირითა მახვილისათა ყოველნი მუნ მყოფნი, მოაოხრეს და იაეარ-ყვეს ყოველივე სანახები და თემნი სულთანისანი“.

თვითონ ალიბეგი მოკლეს და თავი გააგდებინეს.

„ახლა წადი და ეგრე თავწარკვეთილი წარუდექ შენს მწყალობელ შაჰს აბასსა!“ — დასძახა ზურაბმა უთავოდ დაგდებულ ალიბეგის ტანს, ხოლო თავი მალლა ასწია და ცხენი გამოაბრუნა.

ჯარიც გამოჰყვა „მრავალი ნატყვენავით და იავარით“ დატვირთული.

„იამა ბატონს თეიმურაზს და დიდად მხიარულ იქმნა“, როცა „სავსებით გაერთგულებულმა“ ზურაბ ერისთავმა ალიბეგ სარუბაშელის თავი და ნადავლად მიტანილი მისართმეველი მიართვა.

მაგრამ თეიმურაზ მეფისა და ზურაბ ერისთავის „ერთგული პატრონყმობაც“, „მოყვრობაც“, „მამაშვილობაც“ და „მოკავშირეობაც“ დიდი ცოდვის სისხლით გაქლენთილ შლამზე იდგა.

და ეს „შლამი“ უნდა ჩაშლილიყო და ჩაშვავებულიყო აუცილებლად.

უკვე რისინობდნენ „ყოვლის შემძლე“ ავი ენანი — ენანი „ფოლადის დამადნობელნი“.

უკვე ყურს უხედნიდნენ ეჭვიან მეფეს „ასპიტის ენისანი“: „ზურაბ ერისთავი ძალიან განდიდდა“.

„ზურაბ ერისთავი მეფეს მეფედ არა სცნობს“.

„ზურაბ ერისთავი პირველობს ქართლსა ზედა“.

„ზურაბ ერისთავი აპირებს პირველობას კახეთსა ზედა“.

„ზურაბ ერისთავი ვისაც უნებს — მოჰკლავს, ვისაც უნებს — განაძებს“.

- „ზურაბ ერისთავმა თავისი კეთილისმყოფელი სვიმონ მეფე მოჰკლა და იგი არ დაინდობს არც უფრო დიდ მეფეს“.

„ზურაბ ერისთავი უსაცილოდ თქვენც მოგკლავთ და ქართლსა და კახეთს თვითონ დაიჭერს“.

ზოგი ამასაც ჩასჩინებდა თეიმურაზს: სპარსეთის შაჰი „მისი კაცის“ — სვიმონ-ხანის ჩახსლს არ შეგვარჩენსო: შაჰა რომ შეგვარჩინოს, სვიმონ-ხანის ბიძა ხოსრო-მირზა მაინც არ გვაპატიებსო. მთელი ერანის საქმეები ახლა ხოსრო-მირზას ეკითხება და იმან რომ მოინდომოს, ძმისწულის სიკვდილის მომიზეზებით, დიდ უბედურებას რასმე დაგვატეხსო. ამიტომ აღარ ეგვიანების: ზურაბ ერისთავი, ვითარცა სვიმონ-ხანის მკვლელი, უნდა მოიკლას და ძისი თავი ერანში შაჰ სეფსა და ხოსრო-მირზას გაეგზავნოსო..

დედოფალ ხორეშანს ეთათბირა თეიმურაზი.

ხორეშანიც „სძულობდა“ სიძეს — მისი მშობლიური ქართლის „დამაქცევარს“...

თეიმურაზმა ერთგული, „სარწმუნო“ ადამიანები შემოიყარა და გაანდო:

„ზურაბ ერისთავი ძალიან განდიდდა, აღარავინ მიაჩნია თვინიერ თავის თავისა უმაღლეს არცა ქართლსა და არცა კახეთსა ზედა; რომლისა უნებს — დააყენებს, რომელიცა არა — არ დააყენებს, რომელსამე მკვლელ ექმნების და რომელსამე განაძებს, და აწ მნებავს სიკვდილი მისი და თქვენც დაიდუმეთ საიდუმლო ესე და რომელსა ეამსა მე მოგიწოდოთ მის სასიკვდილოდ, მაშინვე მოდით!“

„ის ეამიც“ დადგა.

თეიმურაზ მეფემ ზურაბ ერისთავი საფურცლეს მიიწვია სანადიმოდ.

საფურცლე!

აჰ, საფურცლის ჭალას, ავგიორგიმ 1511 წელს საკუთარი

ხელით მოჰკლა მამა — კახთა მეფე ალექსანდრე I და თვალუბი დათხარა ძმას — დიმიტრის.

აქ, საფურცლის ჭალას, 1560 წელს ყიზილბაშებმა მუხანათური თავდაცემით ტყვედ ჩაიგდეს და სპარსეთს გაიტაცეს გამოჩენილი მამულიშვილი, სვიმონ დიდის თანამოსაგრე — არჩილ მუხრან-ბატონი.

აქ, საფურცლის ჭალას, 1625 წელს, მარტყოფის ბრძოლის წინ, ქართველმა მამულიშვილებმა შეიპყრეს მოღალატე ანდუყაფარ ამილახორი.

აქ, საფურცლის ჭალას... კიდევ რა უნდა მოხდეს საფურცლის ჭალას?!

მივიდა ზურაბიც გულდანდობილად.

სიმამრიც ტკბილად შეეგება სიძეს.

სანადიმო სუფრა ხალიჩებით მოგებულ კარავში იყო გაშლილი.

რატომღაც ანანურში გაწყობილი სუფრა მოაგონდა არაგვის ბატონს, — ერთხელ სამოცი ხევსური ვაჟკაცი რომ მიიწვია და ყველას სუფრაზედვე თავები საზორცელი ხარებივით დააყრვეინა...

უამური ფიქრი მოიშორა და ღიმილით პირდაფენილ მეფეს შეჰყვა კარავში.

პირისპირ მიუსხდნენ სუფრას სიძე და სიმამრი.

ზურაბ ერისთავს მარჯვნივ ბარამ საგინაშვილი ჩაუქდა, მარცხნივ — ელუმთოლუმიშვილი, ფშავის მოურავი.

პურობა ჩათავდა.

ღვინობაც განესრულა.

და ის იყო, ხილობას უნდა შესდგომოდნენ, რომ თეიმურაზმა, ერისთავისგან შეუმჩნევლად, თვალი თვალში ჩაუწონა ბარამ საგინაშვილს.

საგინაშვილმა მეფეს თავი დაუქრა, ბოდში მოუხადა და სუფრიდან გავიდა.

გადასვლა და... იწივლა ხმალმა.

„ესეც შენა მოღალატეც, მკვლელო, კახპის ნაშობო!“

თავგაჩეხილი დაემხო სუფრას ზურაბ ერისთავი.

სისხლმა იჭექა, სუფრა გადაიხუვლა და ზედ მკერდზე დაედგერა თეიმურაზს.

წამოიჭრა თეიმურაზი.

წამოიჭრა ზურაბ ერისთავიც.

და იმ წამსვე ელუმ თოღუმისშვილმა შიგ მარცხენა ძუძუსი შეუგდო სატივარი.

ისევ დაენარცხა სუფრას ერისთავი თანასისხლიერზე მგოდებელი ხარის ზმუილით.

კიდევ ათიოდე ხმალი და ხანჯალი შემოჰკრეს, მაგრამ ამ ორი პირვანდელის გარდა ყველა დანაკრავი შეუგრძნობელი უნდა დარჩენილიყო უკვე არყოფნის შორევეში ჩათრეულ სხეულისათვის.

სისხლისა და ღვინის ნაზავ ტბორეში ეგდო ჭურჭელი საცოცხლისა, რომელსაც წუთის წინათ „ყოველი კაცის ზარდამცემი“ ზურაბ ერისთავი ეწოდებოდა.

ღალატით აღსრულებულიყო მთელი მისი წუთისოფლის სიგრძეზე ღალატის წყურვილდაურწყულებელი კაციშვილი.

აღარ იყო ზურაბ ერისთავი — ხან დიდი მამულიშვილი, ხან მამულის მათხარი და სისხლმაქცევარი.

ხან გულმხურვალე ერისკაცი, ხან რენეგატი ერისწყეული.

ხან ზნემაღალი ზრდილი ვაჟკაცი, ხან უზნეო ლოთი და მრუში, „მეზობლის ქალთა“ საკინძის მოხარბე.

გმირი მარტყოფისა და მარაბდისა, ცოდვისშვილი ბაზალეთისა.

„თავი გააგდებინეთო“, ამოიხრიალა თეიმურაზმა და სისხლიან მკერდზე დაიკრიფა ათრთოლებული ხელები.

შემაჯავროდ

ზურაბ ერისთავის წარკვეტილი თავი თეიმურაზ მეფემ შაჰ სეფის გაუგზავნა ისფაჰანს.

„ამან ყმამან თავის ბატონს სვიმონ-ხანს უღალატა და მოჰ-

კლა. ჩვენ ეს არ ვაპატიეთ, რამეთუ სვიმონი ჩემი ნათესავიც იყო და თქვენი მოყვარეც. ამიტომ ზურაბ ერისთავს სისხლი სისხლითვე ვაზღვევინეთ, თავი მოვკვეთეთ და თქვენს უდიდებულესობას ვაახელით“, — სწერდა თეიმურაზი ერანის მბრძანებელს.

ქართველი მეფის ვარაუდი გამართლდა: შაჰ სეფი ნასიამოვნები დარჩა.

ხოსრო-მირზამაც მოუსწრო ბაღდადიდან. ის ხომ შაჰს გაეგზავნა ბაღდადზე მოიერიშე თურქთა მხედრობის წინააღმდეგ. ხოსროს თურქები სასტიკად დაემარცხებინა, ბაღდადის კედლებთან გაერეკნა და ისფაჰანს მობრუნებულყო ზარ-ზეიმით.

ხოსრო-მირზაც სიამოვნებით შეხვდა მისი ძმისწულის, სვიმონის მკვლელის სიკვდილს.

ერთად გადაწყვიტეს შაჰმა და მისმა „მამიკომ“ და „მოადგილემ“; ქართლი და კახეთი ორივე თეიმურაზს დარჩეს. ოღონდ ტფილისს არ ახლოს ხელი ქართველმა მეფემ! ასე დაადგინეს და თეიმურაზს საგანგებო რაყამი და ძვირფასი ხალათი გამოუგზავნეს.

ეს იმას ნიშნავდა, რომ აღმოსავლეთ საქართველო (უტფილისოდ) ერთიან სახელმწიფოდ და ერანის ქვეშევრდომად რჩებოდა.

ცალკე წერილით შაჰ სეფი თეიმურაზს სთხოვდა, შენი ასული თინათინი ცოლად მომეციო. ქალის დასაწინდაგად უძვირფასესი საჩუქრები გამოეგზავნა შაჰს ქართველი მეფისთვის.

თეიმურაზმა სახლთუხუცესს რევაზ ჩოლოყაშვილის ხელით შაჰს ძვირფასი ფეშქაში გაუგზავნა. ქართლ-კახეთის მეფედ „დამტკიცებისათვის“ მაღლობა შეუთვალა და თანაც დააბარა: თინათინი ჯერ უწლოვანია და რამდენიმე წლის შემდგომ მოგათხოვებთ უეჭველადო.

იმავე 1631 წელს გადაწყდა ზურაბ ერისთავის „ნაცოლართა საქმენი“.

ზურაბის პირველი ცოლი, შაჰ აბასმა რომ პაატა სააკაძესთან ერთად მძევლად დაიტოვა, მარტყოფის ბრძოლის შემდგომ შაჰს თავისი ცოლების შიმუნვარად განეწესებია. ახლა,

როცა შაჰ აბასიცი მკვდარი იყო და ზურაბ ერისთავიც, ბედგაშაგებული ქალი საქართველოში დაბრუნდა და მცხეთის დედათა მონასტერში აღიკვეთა მონაზვნად.

ზურაბ ერისთავის მეორე ცოლი, დარეჯანი, მამამისის თეირუმაზ მეფის გადაწყვეტილებით ცოლად უნდა შეერთო იმერეთის მეფის გიორგი მესამის ვაჟს — ალექსანდრეს.

სწორედ ეს ალექსანდრე გახლავთ, გიორგი სააკაძეს რომ სურდა ცალკე ქართლის, ან „ყოველი საქართველოს“ მეფედ.

ალექსანდრე გიორგი მესამის უფროსი ვაჟი იყო (მომდევნო ძმები იყვნენ — მამუკა და ბერი). მას ჯერ ცოლად ჰყავდა გურიელის ასული, მაგრამ ზურაბ ერისთავის მკვლელობამდე ცოტა ადრე იმ ქალს „დაეწამა ცილი რამე“ და განუტევა ცოლობიდან ალექსანდრემ.

თეიმურაზმა და ხორეშანმა მათი ქვრივი ასულისა და ცოლგანტევებული იმერელი ბატონიშვილის საქორწინო პაემანი დანიშნეს მუხრანს.

სანამ იმერთა მასყრიონი მოაღწევდა, თეიმურაზს მუხრანში ეწვივნენ საქართველოში ახლად ჩამოსული იტალიელი მისიონერები — არქანჯელო ლამბერტი და ჯუზეპე ჯუდიჩე. თურმე ორი წლის წინ წამოსულიყვნენ იტალიიდან, დიდის ვაი-ვაგლახით გამოუვლიათ თურქეთი. მოსულან არზრუმს, შეხვედრიან იქაურ ქართველ ეპისკოპოსს — „არზრუმელს“, მისგან დიდი შემწეობა მიუღიათ და ბოლოს საქართველოშიც შემოულწევიათ.

ჯერ საჩუქრები მიუგზავნეს მეფეს იტალიელმა სტუმრებმა: „ერთი შვენიერი სამზილიანი საათი, რომელიც ჩარეკბესაც რეკდა, რამდენიმე მწვანე და ოქროცურვილი შუშის ჭურჭელი, ოთხი შვენიერი ხატი, საუცხოვო სარკე, რავდენიმე კრიალოსანი და ორი წყვილი ხელთათმანი“.

დედოფალ ხორეშანს მიართვეს აგრეთვე „სარკე, მოქარგული ხელთათმანები და ბევრი სხვადასხვა კრიალოსნები“.

ქართველთა „სიძესა და მეგობარს“ — პიეტრო დელა ვალეს ცალკე საჩუქრები გამოეგზავნა ლამბერტისა და ჯუდიჩეს ხელით მეფისა და დედოფლისათვის — წმინდა გიორგის ოქროს ხატი და ძვირფასი კრიალოსანი.

მეფის ამაღაში ზ ა ქ ა რ ი ა კ ა თ ა ლ ი კ ო ს ი ც ი მყოფე-

ბოდა ეპისკოპოსთა გუნდით. იტალიელებმა ზაქაროას თვალ-
მარგალიტით მოჭედილი მიტრა და ოქრომკედით ნაქარგი ფი-
ლონი მიუძღვნეს.

მერე პაპის წერილიც გადასცეს მეფეს.

დიდ მადლობას უთვლიდა კათოლიკური სამყაროს საჭეთ-
მპყრობელი მისიონერების მფარველობისათვის „ივერიის მე-
ფეს“.

დიდი ინახი გაუმართა თეიმურაზმა სტუმრებს. ქორწილამ-
დე დარჩენაც სთხოვა, მაგრამ არქანჯელო ლამბერტიმ და ჯუ-
ზეპე ჯულიჩიმ წასვლა ითხოვეს და წავიდნენ კიდეც გორში.

იმერთა მაყრიონიც მოვიდა.

მუხრანის ახლოს, სოფელ ქინძარას მცირე ეკლესიაში იფ-
სკვნეს გვირგვინი სასიძომ და საპატარძლომ. ქორწილიც ქინ-
ძარაში გადაიხადეს.

ასე დაიმოყვრა და „დაიკავშირა“ თეიმურაზ მეფემ იმერე-
თის ტახტი, საიდანაც მას სააკაძის დროიდან, აგერ ხუთი წლის
მანძილზე, ქართლის ტახტისათვის მეტოქეობა ემუქრებოდა.

ისევ — 1631 წელს თეიმურაზმა ილაშქრა დაღესტანს,
ლეკთა დასარბევად და დასაშინებლად, „რამეთუ იგინი უხდე-
ბოდნენ კახეთს, ავაზაკობდნენ და სრვიდენ კაცთა და ტყვე-
პყოფდენ და პყიდდენ, და ამისთვის შური იძია ბატონმან თეი-
მურაზ, მიუხდა და გაემარჯვა და მოსრა პირითა მახვილისათა
ყოველივე მუნ მკვიდრნი, და წარმოვიდნენ მუნითგან მძლე-
ველნი მტერთანი, შემოიჭცეს კახეთს“.

ოთხი დღე არბევდა თეიმურაზი დაღესტანს.

კარგა ხნით დაეკარგათ მთიელ აბრაგებს მადა აბრაგობისა.

წლის მიწურულს თეიმურაზმა რომის პაპისგან კიდეც მი-
იღო ერთი წერილი. „თქვენი სახელგანთქმულება და თქვენის
შესანიშნავის გამარჯვების ხმა თქვენის ქვეყნის საზღვრებს
გამოსცდა, გამოიარა ევროპის ქვეყნები, ხმელთაშუა ზღვის
მდელვარე ტალღები და მოაწია რომის მღვდელმთავრამდე...
როდის გვეღირსება, გეამბოროთ თქვენ, ვითარცა განსწავ-
ლულს მეორე კონსტანტინე დიდს?“ — ეწერა „სხვათა შო-
რის“ იმ წერილში.

1. ჭეშმარიტად „დიდად“ გრძნობდა თავს თეიმურაზ პირვე-

ლი, „მეფეთ მეფე“, აღმოსავლეთ საქართველოს „ორისავ ტახტის მქერი“.

მეტსმეტად ძლიერად ეჩვენებოდა თავი, რამეთუ იყო მარტოღმარტო, უმეტოქეოდ, — აკი აღარ აფიქრებდა ამ ქვეყანაზე აღარც გიორგი სააკაძე, აღარც მეფე სვიმონ მეორე, აღარც ზურაბ ერისთავი...

ფიქრები გრივში, ფიქრები ისჯახანში

ყველაზე დიდი სიბეცე მაინც ის იყო, რომ ქართველი მეფე ყოველ ქართველთა — კახელთა და ქართლელთა — ბედს, ადგილს, ვალსა და უფლებას ერთნაირი თვალთ ვერა ჰხედავდა. აწკარად ეტყობოდა, რომ თეიმურაზს მისი „სისხლიერი კახელობა“ სძლევდა — ერთიანი ქართლ-კახეთის სახელმწიფოს საღავეებთან უფრო კახელ „თანამემამულეებს“ აწინაურებდა, ხოლო ქართლელებს, რაიმე წარჩინებას მისცემდა კი არა, ლამის „დამპყრობელის“ თვალთ ზომავდა.

მაშ, ქართლი შემოერთებული კი არა, „დაპყრობილი (ვით)“ ჰყავდა „კახთ-ბატონს“.

აშკარად ჰხედავდა მტერიც და მოყვარეც: „კახნი ქართლელთ ზედა ამაყობდეს და ხმლით დაჭირულს ეძახდეს, უბატოთაც ეპყრობოდეს“.

ამიტომაც: „ქართლელთ გული გაავებოდა და ბატონის თეიმურაზის ბატონობა არ უნდოდათ და გზასა და ღონეს რასმე ეძებდნენ“ მისი „უღლის“ გადასაგდებად.

სულ ერთია, „დღეს არის და ხვალე არაო“ თეიმურაზი! — გაიძახოდნენ კახელთა „კირთებით შეიწროებული“ ქართლელნი.

აი, სადამდე ყოფილა საქმე მისული!

აი, რას ვერ ჰხედავდა და რა არ გაეგებოდა მდგომარეობით, განსწავლულობითა და კულტურით „პირველ ადამიანს“ იმეამინდელ საქართველოში!

არ გაეგებოდა და, იმის ნაცვლად, რომ ერთსისხლ და ერთ-

ხორც სახელმწიფოს შიგნით ასეთი ბოროტი შინაღვარძლიანობის ფესვები მოეთხარა და მოებალასინებია, უმძიმესი შემოსევებითა და შინაგარე ომებით ჯანდაშრეტილი ქვეყნის მოშენების, აშენებისა და აღორძინებისათვის ეზრუნა — ადგა და ისეთი თამამი და თავზეხელაღებული „საგარეო პოლიტიკა“ წამოიწყო, რომელსაც შესაძლოა სულაც დაეღუბა ისედაც და დუბის უფსკრულზე გადამხობილი მისი ქვეყანა.

გაეიხსენოთ, კეთილო მკითხველო: განჯა-ყარაბაღს ბეგლარბეგად ჯერ კიდევ შაჰ აბასის დროიდან დანიშნულია სახელოვანი დავით (დაუდ-ხან) უნდილაძე, მეგობარი და ძმადნაფიცი თეიმურაზ მეფისა.

მაგრამ მთავარი ის იყო, რომ ერანის შაჰის კარზე უნდილაძეები უკვე აღარ იყვნენ „მოდაში“.

აღარ იყვნენ, რადგან „ორი ქართული ნაკადი“ არ შეიძლებოდა „ერთნაირ მოწონებაში“ ყოფილიყო უცხოეთის სახელმწიფო დარბაზის ჭერქვეშ.

ხოლო შაჰ სეფის კარზე ერთი ხოსრო-მირზა იყო „მოდაში“ და ამიტომ, ვითარცა „ორი მუხის წესი“, მეორე ქართველს ახლომახლო აღარ დაედგომებოდა, თუნდაც ის მეორე „მუხა-ქართველი“ სახელოვან უნდილაძეთა გვარგუჯაბისა ყოფილიყო.

თვითონ შაჰ სეფი, როგორც წინასწრობილად ითქვა, ყოვლად უნიჭო, უხიაგი, ბოროტი, ლოთი და გარყვნილი ლაწირაკი იყო. არაფერი ისეთ სიამოვნებას არ ანიჭებდა, როგორც ადამიანის ტანჯვა-წამება.

უმცროხ ძმას — ერთადერთს, რომელიც პაპამისის შაჰ აბასს თვალდაუთხრელი გადაურჩა — შაჰ სეფიმ თვალეზი დათხარა და აღამუთის ციხეში ჩააგდო. მერე ყველას, ძველსა და ახალ თვალდათხრილ უფლისწულებს, ერთად ხელი მოუსვა — მათი ცხოვრება მაინც არაფრის მაქნისიაო — და ყველანი კლდეზე გადაჰყარა.

ისა-ხან ყორჩიბაშს ხომ შვილები ამოუწყვიტა, მალე მამაც ზედ მიაყოლა შვილებს.

თავის ეთიმადოვლეს (პირველ ვეზირს) საკუთარი ხელით გაუტრია აკინაკი მუცელში; თავიც საკუთარი ხელით გააგდებინა

ნა. მერე ჯალათს უბრძანა, ბირწმინდად აეკეპა წარკვეთილი თავი. ერთმა იქ დამსწრე ახალგაზრდა მსახურმა ადამიანის თავის „კეპვას“ ვერ გაუძლო და გვერდზე შებრუნდა შეძრწუნებული. შაჰმა შენიშნა. „ამ ბიჭს თვალეზი სუსტი ჰქონიაო“, — და იქვე მისი ბრძანებით დაუშრიტეს ჯალათებმა „სუსტი თვალეზი“ გაუფრთხილებელ კაცს.

ვილაც ღალატში ეკვმიტანილი უღურლუ-ხანის წარკვეთილი თავი გაუგორეს ფეხებში შაჰ სეფის. იმან ჯოხით ააგორა თავი და წარმოსთქვა: „ძალიან მამაცი იყავი და ძალიანაც მეზრალეზი, ამ დღეში რომ გხედავ; ვაიმე, როგორ მენანება შენი მშვენიერი ულვაშები!“ — და ულვაშებზეც „გადაუაღერსა“ ჯოხი.

ორი უდანაშაულო დიდებული ხმლებით ასჩეხეს ისფაჰანის მთავარ მოედანზე. ერთმა პოეტმა ლექსით „უმღერა“ ეგზომ უსამართლოდ დახოცილ ადამიანებს. შაჰის ბრძანებით იმ „თავგასულ მოშაირეს“ იგივე მოედანზე ჯალათებმა თანმიყოლებით დაჰკვეთეს ცხვირი, ხელები და ფეხები.

შემდეგ შაჰმა დასჯილ დიდებულთა შვილები დაიბარა და ჰკითხა: მე თქვენი მამები დავხოცე და რა აზრისა ბრძანდებითო! ერთმა მაშინვე „შეუცდომლად“ იყვირა: „რომელ მამაზე ბრძანებთ, ხელმწიფეო?! ჩემი ერთადერთი მამა არის შაჰის მორჩა და გათავდა!“ მეორეს კი ენა დაემა. შაჰმა აღარ დააცალა და მაშინვე მშობლების მემკვიდრეობაზე ხელი ააღებინა.

ერთხელ საწამლავით სულის გაგდებინებაც დაუპირეს შაჰ სეფის. მაგრამ შხამი უხეირო შეზავებული გამოდგა და სეფიმ მხოლოდ ორი თვე იავადმყოფა. მერე, როცა სნება გამოიყარა და დამნაშავეს ძებნას შეუდგა, შაჰის საჩუქრებზე და „სიყვარულზე“ დახარბებულმა ერთმა მხევალმა შეასმინა, საწამლავი შენი ჰარამხანიდან მოდისო. შაჰმა არც აცივა და არც აცხელა, არც გამოიძია და არც გამოიკითხა — სასახლის ბაღში მიწა გაათხრევიანა და შიგ ორმოცი ქალი ცოცხლად ჩაამარხვინა.

ბაღში სეირნობდა შაჰ სეფი.

ცადავარდნილ ალვის ხეებს მიადგა; უყურა, უყურა და თქვა:

„ძალიან გაზრდილან და გამსხვილებულან ეს ხეები. აუცი-

ლებლად უნდა მოვკრათ და მათ ნაცვლად ახალი ნერგები ჩავ-
ყაროთ!”

გასაგებად იყო ნათქვამი.

„გასაგებადაც გაიგო“ ერთმა იქ მყოფმა კარისკაცმა, — შა-
პის წინ მუხლებზე დაეცა, კისერი წარუჰყრა და შესძახა: დი-
დებულად ბრძანებთ, ჩემო ხელმწიფევ! აჰა, მზად გახლავართ,
თავი გამაგდებინოთ!

„შენ არა ხარ ის ხე, რომელიც უნდა მოიჭრასო“, დაამშვი-
და შაჰმა კარისკაცი, რომელსაც, ალბათ, არ გააჩნდა „მოსაჭ-
რელი ხის“ სიმაღლე და სისრულე.

მაშ, ვინ მიაჩნდა შლეგიან ხელმწიფევს „ზრდა-ნაჭარბ ხე-
ებად“, რომელთაც უკვე დასდგომოდათ მოჭრისა თუ მოთხ-
რის დრო-ჟამი?!

თურმე ძმანი უნდილაძენი — იმამ-ყული-ხან და დაუდ-ხანს
თურმე შაჰის წალკოტში „ახალნერგი ხე“ გამძლავრებუ-
ლიყო, რომელიც ვეღარ ითმენდა თავისი ჭიშის „უამმორეულ
ხეებს“.

ეს „ახალნერგი“ სწორედ ხოსრო-მირზა იყო — ტომით
ქართველი, ხოლო სხვა ქართველებს, „როგორც წესი“, მის
ახლოს აღარ დაედგომებოდათ.

ერთი სიტყვით, ხოსრო-მირზას რომ „გაეხარა“, უნდილა-
ძეები უნდა „მოკვეთილიყვნენ“.

ბოლოს და ბოლოს, შაჰ სეფისთვის ცნობილი შეიქნა ერ-
თი უცნაური ამბავი. თურმე იმამ-ყული-ხან უნდილაძეს ში-
რაზში, თავისი საბეგლარბეგოს შუაგულში, ბრწყინვალე დარ-
ბაზობა გაუმართავს და სტუმრად მისი ძმის, დაუდ-ხანისა და
ინგლისელი სამხედრო ატამის — ჰერბერტის გარდა მიწვეული
ჰყოლია თეიმურაზ მეფე.

შირაზის ბეგლარბეგის „შაჰზე უბრწყინვალეს“ მეჯლისს
რომ თავი დავანებოთ (ამას ყველა შეგუებული იყო — უნდი-
ლაძეებს „შაჰებზე უკეთესი“ ცხოვრება უყვარდათ!), ხაოცა-
რი და დაუჯერებელი მაინც ის გახლდათ, რომ თეიმურაზი ში-
რაზში ისე ჩასულა და საქართველოშიც უკანვე ისე დაბრუნე-
ბულა, არც შაჰს და არც მის „მამიკო“ ხოსრო-მირზას ამის
შესახებ არაფერი შეუტყვიათ!

ეს როგორ მოხდა, რომ ქართველმა მეფემ, ერანის ქვეშევრდომმა, ერანში ერანის შაჰის გვერდის ავლით გაბედა „მის-გლა-მოსვლა“?!

ან ტას ჩურობულებდნენ თყიმურაზი და ძმანი უნდილაძენი შაჰისა და ხოსრო-მირზას ზურგს უკან, შირაზის სადარბაზოში?!

„შეთქმულდება რაიმე“ ხომ არ გაუწყვიათ „გველის ჰკუპს მქონე გურჯებს“ შაჰ სეფის ტახტის დასამზობად?!

ეს ხომ აშკარად ცნობილია, რომ ძმებს უნდილაძეებს დასაწყისშივე არ უნდოდათ სეფის გამეფება. გამორჩევით იმამ-ყული-ხან უნდილაძე აპირებდა თურმე შაჰის ტახტზე „უფრო კანონიერი მირზას“ აყვანას. ალბათ, კიდევაც გაიტანდა თავისას „ყოვლისშემძლე უნდილაძე“, რომ ამ ქვეყანაზე ალლაჰის ნებით მოვლენილი არ ყოფილიყო „დიდი ხოსრო-მირზა“!

მაინც ვინ არის ის „უფრო კანონიერი მირზა“, უნდილაძე რომ უპირებდა გამეფებას? თვითონ უნდილაძის უფროსი ვაჟი, რომელიც თითქოს უნდილაძის კი არა, შაჰ აბასის პირშვილი იყო!

მაინც საიდან ვრცელდება ეგზომ ბრიყვული ხმები?!

მაინც არ ნელდება უნდილაძეთა სადიდებელი მითქმა-მოთქმა „მთელს დუნიაზე“. ინდოეთიდან ესპანეთამდე ამას გაიძახიან დაბეჯითებით: იმამ-ყული ხან უნდილაძე ის ვაჟკაცია, რომელსაც, რა დღესაც მოესურვება, იმ დღესვე დაბრძანდება ერანის შაჰის ტახტზე.

უეჭველად უნდა მოისრას იმამ-ყული-ხან უნდილაძე. უნდა მოისპოს დაუნდობლად, უნდა მოითხაროს ძირბუდიანად, ცოლშვილიანად, დედაწულიანად!

დაუდ-ხან უნდილაძეც უნდა მიჰყვეს თავისი უფროსი ძმის კვალს, — ისიც უნდა განადგურდეს დედა-წულით და ნაშობ-ნაგრამით!

მაგრამ ანგარიში უნდა გაეწიოს იმასაც, რომ ძმები უნდილაძენი ძალიან უყვარს სპარსელ ხალხსო, „ორივე ძმა თავიანთი მშვენიერი ყოფაქცევით მთელი სპარსეთის საყვარელ ადამიანებად გამხდარანო!“ — რამდენჯერმე მოახსენეს შაჰს.

სპარსელ ხალხს უყვარსო?!

მთელს სპარსეთს უყვარსო?!



როგორ დაცემულა სპარსეთი და სპარსელი ხალხი, ცბიერი გურჯების ფერხთა მტვრად რომ ქცეულან!

თუმცა რა გაეწყობა, — „ხალხის სიყვარულსაც“ უნდა გაეწიოს ანგარიში.

ხალხმა, ბოლოს და ბოლოს, უნდა შეიტყოს „მისი გმირობის“ ნამდვილი სახე და შინაარსი, — უნდა მიხვდეს და შეინანოს, რანაირ კერპს ეთაყვანებოდა და ემონებოდა.

და ამოქმედდა შაჰ სეფი.
დაიწყო უმცროსი უნდილაძით.

ქაღალაფიცები იორჯე ნადიროზაძე

მკითხველმა უკვე იცის: 1630 წელს სპარსელებმა ხოსრო-მირზას მთავარსარდლობით ილაშქრეს ბაღდადს, დაამარცხეს თურქთა არმია, გააქციეს სერასქერი ხუსრევ-ფაშა, ბაღდადი ისევ მოიმტკიცეს და დიდძალი ნადავლით დატვირთულნი შენოიქცნენ გამარჯვებულნი.

ბაღდადს მოლაშქრე სარდალთა შორის დაუდ-ხან უნდილაძეც იყო განჯა-ყარაბაღის მხედრობით.

და იქიდანვე აუბეს ხრიკი და შარი თავმომწონე გურჯს: რამდენიმე ყაჯარი წარჩინებული მთავარსარდალს ეახლა და მოახსენა: დაუდ-ხან უნდილაძე ყველას უხეშად, ქედმაღლურად და უსამართლოდ გვექცევია!

ხოსრო-მირზამ უნდილაძე გამოიძახა, საჩივარი გააცნო და „ურჩია“: — ხელქვეითებს შემწყნარებლურად მოექცეო.

უნდილაძემ „უსამართლო“ საყვედური იუკადრისა.

ხოსრო-მირზამ „ქვეშევრდომი ქართველის“ უკადრისობა ფეხებზე დაიკიდა.

უნდილაძემ „მედროვე-თანამემამულეს“ ზურგი შეაქცია და მისი მბრძანებლური შეგონება უპასუხოდ დააგდო.

ხოსრო-მირზამ რისხვა გულს დაიკრძალა და ისფაჰანში დაბრუნებულმა შაჰს ყოველივე დაწვრილებით აუწყა.

შაჰ სეფიმ სავანგებო მეჯლისი მოიწვია და დაუდ-ხან უნ-

დილაძე ფრთხილი საყვედურებით „შეალამაზა“. ისევ არ სცნო თავი საყვედურის ღირსად უნდილაძემ.

მაშინ კი იჭექა შაჰმა. ჯალათებს ანიშნა. ჯალათები უნდილაძეს დაეძგერნენ, გარეთ გაათრიეს, არგანი შემოჰკრეს და ისევ უკანვე შემოიყვანეს.

„მამაშენის ნამსახურობისა და შენი უფროსი ძმის პატივისცემა რომ არ მქონდეს, ზეგლარბეგობასაც წაგართმევდი და იქნებ სიცოცხლესაც გამოგასალმებდიო“, უთხრა შაჰმა მოქაინური ღრეჯვით.

არც ერთი სიტყვა სინანულისა, საყვედურისა, სიმდაბლისა და სიმონავისა, რაიც მის ამაყ სულსა და მაღალ ღირსებას შებღალავდა, არ წასცდენია უნდილაძეს.

შაჰმაც მეტი ველარ შეჰბედა იმჯერად.

ის დღე როგორც იქნა განესრულა, ღამეც მიჰყვა და დილით შაჰმა და ხოსრო-მირზამ ისევ მოიკითხეს ურჩი ბეგლარბეგი.

დაუდ-ხან უნდილაძე წუხელის ცხენს მოახტა და ყარაბაღისკენ გაქუსლაო, იყო პასუხი.

როგორ თუ შაჰის დაუკითხავად გაბედა წასვლაო!

ეს ხომ გაქცევია ურჩი ქვეშევრდომისა, გაქცევაც და იქნებ... ლალატიცი?!

მერე, იქვე, მეზობლად არა თეიმურაზ ქართველთა მეფე.

ხოლო, თეიმურაზი და დაუდ-ხანი „დიდი დოქტები“, ანუ — როგორც ქართველები ეძახიან — „ძმადნაფიცები“ ყოფილან...

შაჰმა ისიც შეიტყო, რომ ისტაჰანიდან გაქცეული დაუდ-ხან უნდილაძე და თეიმურაზ მეფე კახეთში ერთმანეთს შეხვედრიან სანადიროდ. მაგრამ ეს კი აღარ იცოდა შაჰ სეფიმ: უნდილაძემ ქართველი მეფე დარწმუნა. რომ მას შაჰ სეფი და ხოსრო-მირზა მზაკვრულად თავს უქონავენ და დღეს თუ ხვალ ქართლ-კახეთის მეფობას ხელიდან გამოგლეჯენ...

დაღლილმა მონადირეებმა მუხლი ჩაიკრიფეს, ხის ძირას, ჩრდილში.

და დავით უნდილაძემ უამბო თეიმურაზ მეფეს:

„ერთხელ თურმე შაჰ აბასმა ჩემი ძმა იმამ-ყული-ხანი თა-

ვის პარამხანაში წაიყვანა და უთხრა: ჩემი შენდამი სიყვარულისა და პატივისცემის ნიშნად ჩემს ცოლთაგან ერთ-ერთი მინდა მოგიძღვნა და, აჰა, რომელიც ყველაზე უფრო მოგეწონოს, ამოირჩიე და წაიყვანეო. იმამ-ყულემ ქალი აარჩია და წაიყვანა. ხუთი თვის თავზე იმ ქალს ვაყი შეეძინა. თურმე ნაყოფი შაჰ აბასისგან გამოჰყოლოდა. იმამ-ყულემ ბიჭი თავის შვილად გაზარდა და შაჰისთვის არაფერი გაუმხელია. ის ბიჭი შაჰ სეფიზე უფროსია — 24 წლისა. მისი სახელია სეფე-ყული-სულთანი, ბეგლარბეგი ლარისა. აი, ვინ არის „კანონიერი მირზა-ბატონიშვილი, ვისაც უნდა ეპყრას ერანის ტახტგვირგვინი“...

არც ამ საუბრის შესახებ იცოდა რაიმე შაჰ სეფიმ.

უამისოდ ხლართავდა იგი ხვანჭებს უნდილაძეთა ამოსავლებად.

ერთ დღეს დაუდ-ხან უნდილაძემ შაჰისგან ახალი თანაპლებობა მიიღო: იგი, განჯა-ყარაბაღის ბეგლარბეგობის გვერდით, დანიშნულია აგრეთვე ტფილისის მმართველად!

მაშ, შურისგებისა და სასჯელის ნაცვლად ახალი აღზევება და პატივი!

უეჭველად რაღაც ხრიკი და მახე უნდა იყოს გაწყობილი შაჰის ბოროტი საბუდარიდან.

მართლაც: შაჰ სეფი ტფილისის ყიზილბაშური ციხიონის უფროსს უთვლიდა საგანგებო იდუმალუბით: როგორც კი დაუდ-ხან უნდილაძე ტფილისში გამოჩნდეს, მაშინვე შეიპყარ, მოახრჩე, თავი გააგდებინე და გამომიჯნავნეო.

უნდილაძე განჯაში დარჩა. ტფილისს „სამმართველოდ“ თავისი მოადგილე გაგზავნა.

ეს პირველი ხრიკი რომ ჩაიშალა, შაჰმა მეორე მუხანათობა ჩაიფიქრა: განჯაში თოფი უნდა გავარდნილიყო და იმ თოფს დაუდ-ხან უნდილაძე უნდა მოეკლა „შემთხვევით“.

მაგრამ ის მეთოფე თოფის გავარდნამდე გაქრა „რაღაცნაირად“.

ხოლო, თეიმურაზ მეფეს დაუდ-ხან უნდილაძის ფაიქები ეტუმრნენ და წერილი გადასცეს.

მეფემ პოეტური ქნარი გადასდო და ისევ უქარქაშო ხმაღს ჩასქიდა ხელი.

1632 წელს სექტემბერი. ჟამი წადირობისა.

დაუდ-ხან უნდილაძე განჯაში სანადიროდ იკანმებოდა.

მოულოდნელად სამი კათოლიკე მისიონერი ეწვია საქართველოდან— პეტრო ავიტაბილე, ჯაკომო სტეფანი და მატეო ფიორიანო. ტფილისში იქაურმა ყიზილბაშებმა გაგვდარცვესო და იქნებ დაგვეხმარო დანაკარგის ამოგებაშიო, შესჩივლეს ბერებმა „ტფილისის მმართველს“. გათათრებულ უნდილაძეს გული და სული ხომ ქრისტიან-ქართველისა ჰქონდა და ყოველთვის დიდის პატივითა და სიყვარულით ებყრობოდა ევროპულ „ქრისტესმიერ ძმებს“. ამჯერადაც უნდილაძემ „არაფერი დაიშურა“ მათთვის: ფულიც მისცა, ცხენებიც, აქლემებიც და ექვსი მოსამსახურეც დაუნიშნა; ტფილისის ციხისთავს ბრძანება გაუგზავნა: დაზარალებულებს დანაკარგი აღნაზღაურეთო; განჯაში ადგილიც გამოუყო პატრებს, კათოლიკური ეკლესიისა და საცხოვრებელი სახლის ასაშენებლად.

მერე მთელი ოჯახითა და ქონებით აიბარგა უნდილაძე, აიყოლია ყაჯარი დიდებულები, სარდლები, რჩეული ყაჯარული ლაშქარი და გამოუცხადა: — საქართველოში მივდივართ სანადიროდო; იქ, ივრის ხეობაში თეიმურაზ მეფე შემოგვხვდება თავის ამალით და, როგორც ყოველთვის, ახლაც დიდებულ ნადირობა-ნადიმობას შეგყვებით სტუმართმოყვარე ქართველებთანო.

ყაჯარ-ყიზილბაშთაგან არავის გაჰკვირვებია, არც არავინ შეფიქრიანებულა, რადგან უჩვეულო არაფერი ხდებოდა. აქი ასე დადიოდნენ ყოველთვის ნადირობის ჟამს ივრის ნაპირებზე სანადიროდ და სანადიმოდ ქართველებთან ერთად.

ქართულ მიწაზე შესდგეს ფეხი. ივრის ნაპირებს გაუყვნენ გულდანდობილად.

შემოეგებნენ ქართველები.

წინ თეიმურაზი მოუძლოდათ, სანადიროდ აღკაზმული.

მეფე და ბეგლარბეგი ერთმანეთს გადაეხვივნენ.

სანამ ნადირობას შეეუდგებოდეთ, მანამ მცირე ინახი უნდა მივილოთო, ბრძანა მეფემ და კარავისკენ გაუძღვა სტუმრებს.

კარავში მასპინძლებს ხალიჩები გაეგოთ და ზედ უხვად დატვირთული სუფრა გადაეშალათ.

ყაჯარმა დიდებულებმა და სარდლებმა ხალიჩებზე მუხლები ჩაიკეცეს და ის იყო, ხელი სუფრისკენ წაიწვდინეს, რომ ელვასავით შემოიჭრნენ ხმალშემართული ქართველები.

შემოიჭრნენ და დაერივნენ ყიზილბაშებს.

რამდენიმე წუთში ყველა ყიზილბაში დაჩეხილი ეყარა ძირს.

ქართველები ისე გაფიცებულნიყვნენ, თათრულად გამოწყობილ უნდილაძესაც კინალამ უჭირეს ხალი.

გარეთ გამოცვივდნენ თეიმურაზი და უნდილაძე და მყისვე ცხენებს მოახტნენ.

ქართველთა ჯარი უკვე დასძგერებოდა ყიზილბაშთა მხედრობას.

ვილაც მოლა გამოეჭყა საშინელ ხმალთაკვეთებას და დაუდ-ხანს მივარდა კივილით:

„ქართველებმა გვილაღატეს, ბეგლარბეგო, ხალხს გიხოცავენ და შენ მაინც უშველე თავს!“

გადაიხარხარა უნდილაძემ:

„ეჰეი, მოლავე, შე უბედურო, როგორ ტყუილად დაფეთებულხარ! არაფერი უბედურება არ მომხდარა. რასაც შენ ჰხედავ, ეგ გართობაა, თავშესაქცევი თამაშობა. ჯერ სადა ხარ — ამნაირ სეირს კიდევ ბევრს ნახავ!“

სულ მალე შვიდასი ყაჯარი უსულო ლეშად ელაგა იგრის ნაპირას.

პინჯარით ცხვირდასუსხული ლეიმი

თეიმურაზ მეფეს და დავით უნდილაძეს კარგად ჰქონდათ შეგნებული, რასაც ნიშნავდა იორზე დატრიალებული ტრაგედია. ეს აჯანყება და ომის დაწყება იყო ერანის მბრძანებლობის წინააღმდეგ.

მაგრამ ძმადნაფიცებს ის კი ვერ განუჭვრეტათ, ბოლოს

და ბოლოს, რას მოასწავებდა ესოდენ თავზეხელაღებული წამოწყება.

ვერ განჭვრიტეს და დიდი ომის გზაზე შედგნენ „ივრისპირული ნადირობით“ გალაღებულნი.

თეიმურაზმა დასავლეთ საქართველოში და სამცხეში აფჩინა შიკრიკები დამხმარე ჯარების თხოვნით.

მართლაც მოვიდნენ და ქართლ-კახეთის საომარ ძალებს შეუერთდნენ: თეიმურაზ მეფის სიძე ალექსანდრე იმერთა ბატონიშვილი, ლევან II დადიანი და „მესხთა თავადნი და აზნაურნი“.

კარგა ხანი აღარ ახსოვდა საქართველოს ერთიანი ქართული ლაშქარი! ახლა კი შეყრილიყვნენ ძმები — ქართლელნი, კახელნი, იმერელნი, მეგრელნი, მესხნი.

შეყრილიყვნენ ძმები, რომელთაგან ბევრს ექვსი წლის წინათ წილი დაედო ბაზალეთის მარად საგლოველ ეროვნულ კოღვაში.

* * * * *

იმავე 1632 წლის ნოემბერში თეიმურაზ მეფე და დავით უნდილაძე ქართველთა ჯარით განჯაში შეიჭრნენ, თვითონ უნდილაძის საბეგლარბეგოს შუაგულში; ქალაქი აიღეს, ყიზილბაშთა ციხიონი გაქლიტეს, იქაურობა დაარბიეს და ალაფალა გაახურეს. სპარსელთა „გოდება მენვიდე ცას ასწვდა“.

განჯიდან მთელს ყარაბაღს მოედგნენ ქართველები ცეცხლით და რკინით. არეზამდე ჩავიდნენ და, სადაც ყიზილბაშს წაეწივნენ, შავი დღე გაუთენეს. რის წამოღებაც და წამოყვანაც შეიძლებოდა, ყოველივე წამოიღეს და წამოიყვანეს.

ბარდას მივიდა თეიმურაზი, ეს ქალაქიც დაიპყრო და დაინადავლა. აქვე შედგა და თვალი მოავლო ამწლევიანდელი შემოდგომის „მოსავალს“.

არეზის აქეთა (მარცხენა) მხარე მთლიანად ჩამოეკვეთათ ქართველებს ერანის სამფლობელოთაგან. აღებული იყო სისხლი გრემის, ძაგემის, თორღასა და ხორნაბუჯის აოხრებისათვის.

მაგრამ ყოველივე ეს მაინც ზღვაში წვეთი იყო ნახევარი მილიონი ქართული სიცოცხლის მოსპობასთან შედარებით.

მაინც როგორ უნდა მოქცეულიყო ახლა მეფე ქართველ-

თა? განეგრძო და გაეფართოებინა შეტევა, თუ დაესვა წერტილი საომარი მოქმედებისთვის და ხმალი ისევ გაეცვალა პოეტურ ქნარში?

ერთი ვაი იყო და მეორე უი!

იმდროინდელი ქართული ძალებით ერანის დაპყრობა მას არ შეეძლო, არადა, მისგანვე საომრად გამოწვეული ლომის ნახტომის მოგერიებაც შეუძლებელი სჩანდა.

მართლაცდა, თეიმურაზის „გამოხდომა“ კინკრით ლომის გაღიზიანებასა და გაცოფებას ჰგავდა. ახლა იმ ლომს დახვედრა უნდოდა...

იმ დღესვე გამოიჩინა, რასაც აპირებდა მეფე ქართველთა ბარდაში თეიმურაზს ეწვია განძასარის სომეხთა კათალიკოსი ჯარით და ძვირფასი ფეშქაშით. ეწვია და მოახსენა:

„ხოთქარი და ყაენი აშლით არიან, დრო ამის უკეთესი აღარ იქნების. შვიდის საქართველოს ლაშქარნი თან გახლავს, ორმოცს ათას მეთოფეს მე მოგისხამ, ამავე ფეხსუდ თავრიზს მიბრძანდი და შვიდს დღეს თავრიზი დაარბევინეთ და შვიდის წლის ჯამაგირში ლაშქართ უანგარიშეთ და სიღამდისინ ყაენი ლაშქარს შეყრიდეს, აღირბეყანის ბატონები გამოსცვალებთ, ყველგან თქვენი ყმანი დასხით და მე ხონთქართან გამგზავნეთ, იმისგან ლაშქარს მოგაშველებ. თუ ყაენი წამოდგეს, შეგებათ და ისინი ქართველთ ომს ვერ გაუძლებენ, გამარჯვება თქვენ დაგრჩების და მთავარ ხელმწიფედ გაკურობებთ და საქრისტიანო შენით დაიხსნების და გაძლიერდებისო“.

ძლიერად იყო ნათქვამი: ქართველებისა და სომეხების ერთიან ლაშქარს უწინამძღვრე, შირვან-აზერბაიჯანში შენიანები დასვი, თურქებიც მოიშველიე, ერანი დალაშქრე და დააძაბუნე და ქართველ-სომეხთა ერთიან საქრისტიანო სამყაროს „მთავარ ხელმწიფედ“ შენ დაუდექიო!

განძასარის მწყემსმთავარს თეიმურაზის სწრაფი წინსვლა სომეხი ხალხისათვის ისეთსავე მხსნელ მოვლინებად მოსჩვენებია, როგორადაც სინამდვილეში ხდებოდა X—XII საუკუნეების ქართველ-სომეხთა ძმური ურთიერთობის ისტორიაში.

მაგრამ კეთილშობილ სომეხ მამულიშვილს ფრიად გაზვიადებულად წარმოუდგენია ქართველი მეფის შესაძლებლობანი. იგი ვერ მიმხვდარა, რომ თეიმურაზი მოძმე სომეხ ხალხს ვერ

მოველინებოდა ისეთივე „შესიად“, როგორც ამას ხმლითა და ჯვრით ხელში აკეთებდნენ დავით კურაპალატი, დავით აღმაშენებელი, დემეტრე პირველი, გიორგი მესამე და თამარ შვიდმნათობიერი. აკი აღარც მეთორმეტე საუკუნის საქართველო არსებობდა ამ ქვეყანაზე — „სამომ იმპერია“ ქართველთა, სომეხთა, სხვათა და სხვათა — „სრულიად კავკასიელთა“...

ამიტომ თეიმურაზმა განძასარელის რჩევისაგან თავი „შორს დაიჭირა“ და ეს უთხრა დაბეჯითებით:

ჯერ ყარაბაღი დამიჭირავს და შირვანს ჩემი ყმის შვილი ბატონობს. ამ ზამთარ ქართლს მივალ, ხონთქარს ფეშქაშს გავუგზავნი, ჯარს შევავებებ და გაზაფხულსა უფრო დიდის ლაშქრით წამოვალ“.

სტუმარს არ ეკაშნიკა მასპინძლის პასუხი. თეიმურაზმა კი მოშინვე გადააბა სიტყვა: „ახლა გორს უნდა დავბრუნდე, შენცა და დავით უნდილაძესაც თან წაგიყვანო. ჩემი მეომრებიც შინისკენ გაუტევენ, დაისვენებენ და ლაშქრობით მოხვეჭილ ქონებასაც დააბინავებენ“.

„ეჰ, შე დალოცვილო, ცხვარ-ძროხისთვის დადიანი და იმერელი არ წამოგესხა, ვანა ოთხფეხა საქონელს კახეთში ვერ იშოვნინდი? მერე, ერანის ხელმწიფე მაგდენს გაცლის, რომ ახალი დიდი ლაშქარი შემოიყარო? დღეს ხვალობით სპარსელები ლაშქარს მოგიხდუნებენ და ცხვრისა და ძროხის მაგიერად ადამიანებს ტყვედ წაასხამენ“, — ნაღვლიანად თქვა სომეხმა.

მაგრამ თეიმურაზმა თავისი დაიჯინა, „ბერს არ დაუჭერა“, ყარაბაღიდან აიყარა ჯარით, ნაძარცვ-ნაალაფარით და ალალფორანით. დავით უნდილაძეც თან წაიყვანა ცოლ-შვილით და ავლა-დიდებით. განძასარის პატრიარქიც იაზლა.

უნდილაძეს განჯის აწიოკების დროს ტყე-ღრედ გადაკარგული იტალიელი პატრებიც მოუძებნია და ისინიც თან წაიყვანეს. პიეტრო ავიტაბილეს არ იშორებდა უნდილაძე. ღამით, შესვენებისას თავის კარავში აწვენდა, მძინარეს თავის თბილ საბანს ახურავდა, გზაში საკუთარ, „მთლად ოქროთი მოკაზმულ ჯორცხენაზე“ სვამდა.

გორში მისვლისთანავე დიდი ღზინი გადაიხადა თეიმურაზმა.

სანადიმო დარბაზი ულამაზესი ხალიჩებით მოეფინათ, სუფრა ნაირ-ნაირი ღვინოებითა და ხორავით დაეტვირთათ. თეიმურაზი სუფრის თავში ჩამომჯდარიყო. მარჯვნივ სიძე — ალექსანდრე ბატონიშვილი უჯდა, მარცხნივ — დავით უნდილაძე, შემდეგ — ერთიმეორის პირდაპირ ჩარიგებულყვანენ თეიმურაზის ძე დავით (დათუნა) უფლისწული, ლევან დადიანი, იოთამ ამილახორი, განძასარის სომეხი პატრიარქი, იტალიელი მისიონერები, მესხი თავადები, აღმოსავლეთ-დასავლეთ „საქართველოთა“ წარჩინებულნი.

1. საოცარი „სიმპოზიონი“ იყო — „მრავალსარწმუნოებრივ-ინტერნაციონალური“. ერთად ლხინობდნენ და „გაიხარებდნენ“: მართლმადიდებელი დიოფიზიტი, გრიგორიანი მონოფიზიტი, კათოლიკე პაპისტი და მაჰმადიანი შიიტი.

1. შუა სუფრიდან პიეტრო ავიტაბილე აღგა, დავით უნდილაძეს მიეახლა და სთხოვა: ნება მომეცით დაგტოვოთ; აქაურ პატრებთან უნდა წავიდე და მოახლოებული შობის დღესასწაულისთვის ვიზრუნო.

1. „კარგი, წადი, მაგრამ მხოლოდ იმ პირობით გიშვებ, ლოცვის დროს ქრისტეს ჩემი სულიც შეავედროთო“, უთხრა უნდილაძემ.

პატრი გაოცდა: მაჰმადიანი ქართველი არ ხუმრობდა...

მეორე დღეს მეფემ მეგრელები, იმერლები და მესხები ვარიანის ქალებსა და „ნეფის წყაროს“ სანახებს გაუსია სანადიროდ. ბოლოს, ყველანი უხვად დაასაჩუქრა და თავიანთ საბუღარში გააბრუნა.

1. რა ელხინებოდა, ენადიმებოდა და ენადირებოდა სპარსელთა სისხლის დამაქცივარ მეფეს, როცა იმ სისხლს ასჯზიმ ამოგების საფრთხე ატუზულიყო საქართველოს კარებთან?

1. თურმე ისევ იმამ-ყული-ხან უნდილაძის იმედი ჰქონიათ თეიმურაზ მეფესა და დავით უნდილაძეს.

1. დღე-დღეზე უფროსი უნდილაძე ფარსიდან შემოუტევს ინფაჰანს ოცდაათი ათასი მეომრით. აქედან თეიმურაზი და დაუდ-ხანი დაიძრებიან, შაჰ სეფის ტახტიდან ჩამოაგდებენ და მის ნაცვლად გაამეფებენ იმამ-ყული-ხანის ოჯახში „შვილად აღზრდილ ნამდვილ შვილს შაჰ აბასისას“.

1. თეიმურაზსა და დაუდ-ხანს თავისი განაზრახი უკვე ერევ-

ნისა და შირვანის ბეგლარბეგებისთვისაც გაუგზავნიათ: იმამ-
ყული-ხან უნდილაძეს „კანონიერი მირზა“ აღუზრდია და
თქვენც ნულარ დააგვიანებთ, მონაწილეობა მიიღეთ სეფის ჩა-
მოგდებისა და შაჰ აბასის „პირმშო ძის“ გამეფებისათვის
ბრძოლაში...

1) დიდი, „უნდილაძური იმედის“ გარდა, თეიმურაზი ამასაც
გარაუდობდა: შაჰ სეფის დღესდღეობით საქართველოსკენ ჯა-
რის გამოგზავნა არ შეუძლია, რადგან ერანს ახლა ერთდროუ-
ლად ოზბეგებიც ებრძვიან და ოსმალებიცო.

და ასე, „დიდი“ და „მცირე“ იმედებით ცხოვრობდა, გა-
ნისვენებდა და განიხარებდა „ხმალზე მინდობილი“ ორი ძმად-
ნაფიცი — თეიმურაზ მეფე და დავით უნდილაძე.

შობის დღესასწაულზე დავით უნდილაძე „გორელ ევრო-
პელებს“ ეწვია.

ქრისტიან ბერებს უკვე აღარ უკვირდათ ამ „უცნაური
თათრის“ და მათი „დიდი კეთილისმყოფელის“ სტუმრობა.

საშობაო ტაბლა გაუწყვეს სტუმარს მასპინძლებმა.

უნდილაძემ ჯერ ღვთისმშობლის ხატსა და იესოს ჯვარცმას
უცქირა მძიმედ ჩაფიქრებულმა. მერე პიეტრო ავიტაბილეს
მიუბრუნდა და უთხრა: თურქეთის ელჩი მეწვია მოსალაპარაკ-
ებლად და თუ თქვენც კმაყოფილი იქნებით, აქ მოვიყვან და
აქვე მოვეთათბირებო.

ნება თქვენიო, კრძალვით უპასუხა ავიტაბილემ.

საყოყმანო მხოლოდ ის შეიქნა, პატრებმა არ იცოდნენ,
ფეხმორთხმული დაესვათ მაჰმადიანი სტუმრები სუფრასთან,
თუ ჩვეულებრივად მჯდომარენი, „ევროპული წესით“.

მაგრამ სტუმრებმა სწორედ „ევროპული წესი“ ამჯობინეს.

იმ დღეს ერთად გაინაწილეს ტაბლა კათოლიკე ქრისტიან-
ებმა, შიიტმა ქართველმა და სუნიტმა თურქმა.

სტუმრებს „მოეწონათ ყველაფერი იტალიური და ძალიან
ნასიამოვნები დარჩნენ“.

მერე ცალკე ჩასხდნენ სათათბიროდ დავით უნდილაძე და
თურქი დიასპანი — არზრუმის ფაშასაგან გამოგზავნილი.

დიდხანს ითათბირეს. თურქმა „დაპირუბები“ დატოვა და
არზრუმს გაბრუნდა.

დავით უნდილაძე უემურშეყრილივით დარჩა.

როგორც იქნა, წარბი გაიხსნა და ისევ შეუდგა საუბარს კათოლიკე ბერებთან.

პიეტრო ავიტაბილე გატაცებით უსმენდა ამ „სასიამოვნო კაცს“ და თან დაბეჭითებით ფიქრობდა: თუ ფორტუნა ინებებს და დაუდხანი ერთხანს მაინც ამ მხარეში დარჩება, სრულიად უქველად ჩვენს წმინდა სარწმუნოებას მიიღებსო.

დაუდ-ხანი კი პატრ დონ ჯაკომოს ეუბნებოდა: „მე ყოველთვის ჩემს თანაგრძნობას ვუცხადებდი ევროპელ ერებს, განსაკუთრებით მათ სამსახურად ბევრი რამე გამოიკეთებია ყოველთვის, როცა კი ამის შემთხვევა მქონია. ოღონდ ქრისტიანი შემხვდეს და მისთვის ყველაფერს გადაკეთებ, რადგანაც ძალიან მიყვარს ქრისტე და მას ჭეშმარიტ ღმერთად მივიჩნევ“.

ეს რომ მოისმინა, ჯაკომომ მაშინვე მიაგება უნდილაძეს: „რაკი თქვენ ქრისტეს სიყვარულისთვის ბევრი რამე გადაკეთებიათ, სწორედ ამიტომ ქრისტე თქვენგან ითხოვს სულს“.

„მზად გახლავარ, ჩავბარდე ქრისტეს, ვითარცა მეუფეს და მას მივცემ სულსაც, სიცოცხლესაც. ხოლო მანამდე მე თქვენ გიძღვნივთ საჩუქარს!“ — შესძახა უნდილაძემ ალტკინებით და ძვირფასი მისართმეველიც მიართვა პატრებს...

იქნებ მისი პორტრეტიც მაშინ ჩაიხატა ქრისტეფორე კანტელმა — ხატი დავით უნდილაძისა, წყობილნაკეთოვანი სახით და ძლიერი თვალებით...

მთავარი ის იყო, რომ თურქეთიდან მაინცადამაინც არაფერი იმედი უნდა დარჩენოდათ თეიმურაზ მეფესა და დავით უნდილაძეს.

ისინი ელოდნენ ნიშანს იმამ-ყული-ხან უნდილაძისკან და პასუხს წერილებზე, რომლებიც მათ მისწერეს ერევნისა და შირვანის ბეგლარბეგებს.

ვაითუ ამაოდ ელოდნენ?!

„ხმალზე და ფიც-ვერცხლზე შეფიცულებმა“ ჯერ არ იცოდნენ ყველაზე მთავარი და საბედისწერო ამბავი: იმამ-ყული-ხან უნდილაძეს საკუთარი ძალები საკმარისად არ მიუჩნევია და ინდოეთში მყოფ პორტუგალიელებთან ელჩები გაუგზავნია. ოღონდ შაჰ სეფისთან საომრად სამხედრო დახმარება გამიწიეთ და ჩემგანვე წართმეულ ჰორმუზს დაგიბრუნებთო.

შაგრამ ამ მოლაპარაკებას არავითარი შედეგი არ მოჰყოლია, ხოლო კინკრით ცხვირდასუსხული და ბალანაშლილი ლომა საბედისწერო კამარას ამზადებდა.

უნდილაქმთა საწუთროს დახასრული

„შირაზის ხანის ჭებასა ვერ იტყვის ბრძენთა ენანი“,
თ ე ი მ უ რ ა ზ პ ი რ ვ ე ლ ე

როცა შაჰ სეფიმ თეიმურაზისა და დაუდ-ხან უნდილაძის აჯანყებისა და არეზის ჩრდილოეთი მიწა-წყლის აოხრების ამბავი შეიტყო, მან ისტაჰანი დაადგო და მრავალრიცხოვანი ამალით ჩრდილოეთისკენ წამოემართა.

მძიმე, თოვლიან-ყინვიანი დეკემბერი იდგა. შაჰმა ქარბუქში ძლივს მოატანა ყაზვინს. აქვე დადგა გამოსაზამთრებლად და „საქართველოს საკითხის“ გადასაწყვეტად.

გამოირკვა, რომ მთელი წლის მანძილზე თურქთა შემოსევებსაც ვერ მიუყენებია ერანისთვის იმდენი ზარალი, რამდენიც ქართველების ლაშქრობას განჯა-ყარაბაღში.

შაჰმა ჯერ არ იცოდა თეიმურაზ მეფისა და დაუდ-ხან უნდილაძის მომავალი განზრახულობანი, როცა მან სამი წერილი მიიღო ზედიზედ. ორი ერევნისა და შირვანის ბეგლარბეგთაგან — სწორედ ის წერილნი, რომელთაც მათ თეიმურაზი და დაუდ-ხანი უგზავნიდნენ: სამხრეთიდან იმამ-ყული ხანი შემოუტევს და ჩრდილოეთიდან ჩვენ შევეუტიოთ შაჰ სეფისო. მესამე წერილი საქართველოდან იყო (ოღონდ არ ჩანს, ვინ სწერდა — ქართველი, ყიზილბაში თუ ვინმე „სხვა სჯული“) და შავ ეწერა:

„დიდებულო ხელმწიფევ, თუ გინდათ საქართველოს დაეპატრონოთ, თავიდან უნდა მოიწიროთ იმამ-ყული-ხან უნდილაძე, რადგან მთელი ქართველი ხალხის თვალები მისკენ არის მიპყრობილი“.

სხვა რაღა იყო საჭირო! სამივე წერილი შირაზის ხანის უეჭველ ღალატს ააშკარავებდა.

შაჰ სეფიმ წერილი აფრინა შირაზში და იმამ-ყული-ხან უნდილაძეს შეუთვალა: სასწრაფოდ ყაზვინს მოდი და გამომეცხადეო.

უნდილაძეს გულმა რეჩხი უყო და პასუხად ეს გამოუგზავნა შაჰს: ჩემი საბეგლარბეგო მტრის სამფლობელოებს ესაზღვრება და ამიტომ სახიფათოდ მიმაჩნია უპატრონოდ მივატოვო აქაურობა, ჩემი ესოდენ ნასწრაფევი წამოსვლა ზიანს მიაყენებს ერანისა და შაჰის გვირგვინსო.

გველი აუსრიალდა გულზე შაჰ სეფის. ისევ აფრინა ბრძანება „კადნიერ გურჯთან“: შაჰი მე გახლავართ, სპარსეთს მე ვმბრძანებლობ და შენის აქ მოსვლით თუ ქვეყანას რამე უბედურება დაატყდება, ეგეც ჩემს კისერზედ იქნებაო. ახლავე გამოცხადდი, თორემ მე თვითონ წამოვალ მთელის მხედრობით და უსასტიკესად გავუსწორდები ეგზომ ურჩობას და კადნიერებასო.

მუქარას მუქარა შემოაგება უნდილაძემ: ვინც ჩემზე ძალადობას გაბედავს, მეც ჩემს ძალ-ლონეს დავახვედრებო; ნურავის დაავიწყდება, — ერანის საუკეთესო ციხე-ქალაქები მე მიიჭირავსო.

ეს უკვე მეტისმეტი იყო.

შინაური ომის სისხლიანი ღრუბელი დააწვა ერანს.

უნდილაძესთან ხმალდახმალ დაგლურში გასვლა არ ურჩივს შაჰს (ალბათ, ხოსრო-მირზამ არ ურჩია) და ისევ „შინაური წიაღსვლით“ გადაწყვეტეს „ყველაზე დიდი ხის“ მოკვეთა.

უნდილაძის ახლობელი კარისკაცები მოისყიდეს შაჰის აესაგებმა. და შეუჩნდნენ „ის ახლობელნი“ თავის მეუფეს: ასეთი ურჩობა არ ივარგებს, შაჰი დაგვამარცხებს და გაგვანადგურებს; ამიტომ ისევ მორჩილება და შერიგება სჯობია; კიდევაც შეგირიგებს შაჰი. — შეგირიგებს ყველა იმ დამსახურებათა შესაწონისად, რაიც აქამდე გაგიწევია და მომავალშიც უნდა გასწიო ერანის საკეთილდღეოდ.

და გატყდა მარად გაუტეხელი იმამ-ყული-ხან უნდილაძე — დათანხმდა შაჰთან წასვლაზე.

გავიხსენოთ წინასწრობილად ნათქვამი: მუდამ ცთომილი

კაცისთვის შეცდომას რაიმე „დიდი მნიშვნელობა“ არ ენიჭება, მაგრამ მუდამ უცთომელმა კაცმა თუ ერთი შეცდომაც საღმე დაუშვა, იგი მისთვის უეჭველად საბედისწერო გამოდგება.

და იმამ-ყული-ხან უნდილაძემაც დაუშვა „ის ერთადერთი“ შეცდომა.

1633 წლის იანვარი.

ქალაქი ყაზვინი ეგებება ლეგენდარული იმამ-ყული-ხან უნდილაძეს.

ოქრო-ვერცხლით დარახტულ მერანზე ამხედრებულა ოქრონემსულ სამოსელში გამოწყობილი ახოვანი ბეგლარბეგი (ეგზომ მდიდრული აღკაზმულობით მხოლოდ ერანის ხელმწიფეები გამოდიან სადღესასწაულო აღლუმებზე).

მოჰყვება ოჯახი, მოჰყვება ჰარამხანა (ესეც შაჰების ადათ-წესია).

უკან ბრწყინვალე ამაღა და მხედრობა მოსდევს, ოქრო-ვერცხლით მოსევადებულ საჭურველში ჩასილაღებული (ასეთი ამაღა ერანის ხელმწიფეთა გარდა არავის მოსწრებია აქამდე).

ქუჩები და „მეიდნები“ ხალხით გაჰყვდილა. ქალი და კაცი, დიდი და პატარა აღტაცებული ყივილ-ხივილით ესალმება „სანატრელ გურჯს“ (ხალხის ეგზომი სიყვარული და პატივი აქამდე არც ერთ შაჰს არა ჰღირსებია).

სახედამეწყრილი შეეგება შაჰ სეფი უნდილაძეს:

— ამას რას ჰხედავს ჩემი თვალები?! შენა ხარ ერანის შაჰი თუ მე? რატომ გეგებება ეგზომ დიდი სიყვარულით სპარსელი ხალხი?!

— რა ბრძანებაა, ხელმწიფეო! მე ხალხი მესალმება თქვენის თაყვანისცემით, რამეთუ მან იცის თქვენი უამრავი წყალობანი ჩემდამი, — მშვიდად მიუგო უნდილაძემ.

ეს „პირველი შეხვედრა“ ასე განესრულა.

„მეორე შეხვედრა“ შაჰსა და ბეგლარბეგს შორის მეორე დღისთვის დაინიშნა.

მაგრამ იგი აღარ შემდგარა.

იმამ-ყული-ხან უნდილაძე ჰარამხანაში იყო.

ტიტველ კაცს დაადგნენ თავზე ხმალამოწვდილი ჯალათები.
ჯალათებიო?!

სამი იყო: ერთი ყაჯარი — ქელბალი-ბეგ ეშოკაღასი და
ორი ქართველი — დაუდ-ბეგ გურჯი და ალი-ყული-ბეგ სა-
აკაძე.

ორი ქართველი, ორივე სიძეები უნდილაძისა.

რა ბოროტი დაცივნაა?!

მწარე ღიმილმა მოუშალა სახე სიკვდილთან წილნაყარ
კაცს.

მაშ, სიძეებს დააკისრა სიმამრის სიკვდილი ვერაგმა ხაჰმა.
ნეტავ თვითონ მოისაზრა, თუ ისევ ქართველმა ჩააგონა ქარ-
თველთა ეგზომ სასტიკი აბუჩად აგდება, -- აი, იმ ქართველმა,
„მარჯვენა ხელად და მამად“ რომ უდგას ახლა გვერდით რევ-
ვენ ხელმწიფეს?!

რა გაეწყობა! ისევ ქართველები ხოცავენ ერთმანეთს სა-
ქართველოს მტერთა თვალსასერიოდ!..

სააკაძეს შაჰის ფირმანი ექცა ხელში.

აბა, წაუკითხე, სიძეე ბატონო, განჩინება საყვარელ სი-
მამრს!

და წაუკითხა ალი-ყული-ბეგ სააკაძემ:

„სიკვდილი!“

მშვიდად მოისმინა უნდილაძემ.

მიანც რა უმწეო და „უმნიშვნელო“ ყოფილა კაციშვილი!..
გამშრალი და გაქვავებული ელოდნენ ქალები: ნუთუ მარ-
თლა უნდა მოკვდეს „ვარდი აღტაცებისა“?!

„მე მზად გახლავართ, დავემორჩილო შაჰის ბრძანებას.
ოღონდ ერთსა გთხოვთ, — აქ ნუ მომკლავთ, ამ უბედური ქა-
ლების თვალწინ. ცოდონი არიან, — თავზარს დასცემთ სიკ-
ვდილის ხილვა“, — თქვა სიკვდილმისჯილმა.

ეს თხოვნა აუსრულენ და ჰარამხანიდან გაიყვანეს.

მტკიცე, აუშლელი ნაბიჯით მიდიოდა სიკვდილ-სიცოცხ-
ლის განსადრეკელზე.

უკან სამი ჯალათი მიჰყვებოდა — ერთი სპარსელი მეთ-
ვალყურე, ორი ქართველი აღმსრულებელი.

ორი ქართველი, ორი სიძე, რომელთაგან არც ერთს უარი

არ გაუბედავს დიდი თვისტომისა და მოყვრის სიკვდილზე და ამდენად — არც ერთს არ უცდია შერცხვენილი წუთისოფელი გაეცვალა სამუდამო გმირის სახელზე.

არავინ იცის, რომელმა სიძემ მოიქნია პირველმა ხმალი.

ან რა ბედენა იყო!

უნდილაძის მალაღონიერი თავიც „ჩვეულებრივი დაცემით“ დაეცა ცოდვილ მიწაზე.

ალარ იყო ამქვეყნად იმამ-ყული-ხან უნდილაძე, ტომით ქართველი, უფროსი ძე დიდი ალავერდი-ხან უნდილაძისა და მისებრ მშვედელი „სხვათა ისტორიისა“, „ვიცე-კოროლი“ ერანისა, ბეგლარბეგი ფარსისა, ბაჰრეინისა, ჰორმუზისა, ხუზისტანისა და არაბისტანისა, დიდი მხედართმთავარი და ზორავეარი, „მეთაური თორმეტი სულტანისა, ორმოცდაათი ათასი მხედრისა, ვარდი ალტაცებისა“...

უნდილაძეთა „უკანასკნელ ყლორტებს“ მიადგნენ ჯალათები.

დაუდ-ხანის ვაჟი გამოაცალკევებს და სადღაც წაიყვანეს.

იმამ-ყული-ხანის შვილთაგან პირველად თავი დააგდებინეს სეფე-ყული-სულთანს — სწორედ იმას, შაჰ აბასის ძესა და ერანის „კანონიერ ტახტის მემკვიდრეს“ რომ უწოდებდნენ.

მერე იმამ-ყული-ხანის დანარჩენი ორი ვაჟის — ფათალი-ბეგისა და ალი-ყული-ბეგის თავებიც დაალაგეს მამის განკვეთილ თავსა და ტანზე.

უკვე მოთხრილი იყო „დიდი ხე“ ძირიან-ფესვიანად.

სამი დღე-ღამე ეყარა ყაზვინის შუაგულში დახოცილ ქართველთა ნაშთები.

სამი დღე-ღამე დასტიროდა შავოსანი ქალი დახოცილებს, ეს ალავერდი-ხან უნდილაძის მეუღლე იყო.

დასტიროდა ქართველი ქალი უფროსი შვილისა და შვილიშვილების აჩეხილ ცხედრებს.

სამი დღე და ღამე არ ეძინა ქართული გოდებით ზარგანხდილ ქალაქს.

შაჰმა ველარ გაუძლო და მეოთხე დღეს დააკრძალვინა ამოწვეტილნი.

.

ახლა დავით უნდილაძის ჭერიც დადგა.

შაპ სეფიმ თეიმურაზ მეფეს შემოუთვალა: რაც იყო იყო, განჯაყარაბაღის სისხლიც მიპატიებია და ივრის პირზე ამოწყვეტილი შვიდასი სპარსელის სიცოცხლაც; ამას გარდა მრავალ წყალობასაც მოგიზღავ, ოღონდ სასწრაფოდ დაუდ-ხან უნდილაძე გამომიგზავნეო!

თეიმურაზმა ფიცხელი უარი შეუბრუნა ერანის მბრძანებელს: დავით უნდილაძე ხმალზე მყავს შემოფიცული და ხმალზე მინდობილი კაცის ღალატი ქართველ კაცს არც უკადრებია და არც იკადრებსო.

მაშინ შაპ სეფიმ დაუდ-ხანის ცოლი საროსკიპოში ჩააგდო ნამუსსათელად, ხოლო ვაჟი სოდომიტ მეჭინბეებს მიუგდო...

სანამ ცოლ-შვილის უბედურებას შეიტყობდა, დავით უნდილაძემ საქართველოდან თურქეთში წასვლა გადაწყვიტა. ამით იგი თეიმურაზსაც უხერხულობიდან დაიხსნიდა და თეიმურაზთან ერთიანობისა და კავშირის სახელით სტამბოლის კარზე იქნებ რაიმე „ახალ სახსარსაც“ იპოვნიდა სპარსეთთან საომრად.

გორში ჩავიდა დავით უნდილაძე. ისევ ეწვია კათოლიკე მისიონერებს. პატრ კაეტანოს, რომელიც საუკეთესო მკერავიც ყოფილა — ევროპული ლაბადა, ქუდი და ჩექმები შეაკერვინა. პეტრო ავიტაბილეს კათოლიკე „კოლონიისთვის“ რვა ოქროს თუმნიანი აჩუქა, ქრისტიანულ წირვა-ლოცვაზე მისი „ცოდვილი სახელის“ მოხსენიება სთხოვა და... გაუჩინარდა.

თურქეთში მივიდა უნდილაძე, სტამბოლის კარზე, ვითარცა „ქართველი მეფის, თეიმურაზის ელჩი“.

ამ „ელჩობას“ არავითარი შედეგი არ მოუტანია არც თეიმურაზისთვის, არც უნდილაძისთვის, არც მათი სვეგამწარებული სამშობლოსათვის.

სულ ჩაიკარგა მისი სახელი და საქმენი ოსმალეთის წყვდიადიან წილში.

იქ დაასრულა სიცოცხლე კიდევ ერთმა დიდმა უნდილაძემ, რომელსაც მისი „ძვალ-ხორცი“ ქართველები დავითს ეძახდნენ, სპარსელები — დაუდ-ხანს, თურქები — დაუდ-ფაშას.

შაჰ სეფისაც სცოდნია პაპამისის, შაჰ აბასის „შეგონება“ — ქართველი კაცის დამარცხება არავის ისე არ ემარჯვება, როგორც ქართველ კაცსო.

და არც შაჰ სეფის აკლდა ერანში ისეთი ქართველები, რომლებიც საქართველოში ლაშქრობას „არ დაამადლიდნენ“. სწორედ „ამნაირი ქართველები“ სჭირდებოდა ახლა შაჰს „იმნაირი ქართველების“ წინააღმდეგ, როგორიც თეიმურაზ მეფე იყო.

ბოლოს და ბოლოს, „ქართული სახელმწიფო სამართალიც“ ამას კარნახობდა ერანის შაჰს: ქართლის ტახტი თეიმურაზს „უკანონოდ უჭირავს“; ქართლისთვის იგი „მშობლიური მეფე“ კი არ არის, არამედ — აშკარად „დამპყრობელი“! კახელებიც ქართლელების „დამპყრობელნი“ არიან; ამას თვითონ კახელებიც არ ფიცავენ და ქართლელებს „ხმლით დაჭირულს“ ეძახიან.

და ყველაფერი ეს ხდება მაშინ, როცა ქართლს თავისი საკუთარი „მშობლიური“, „კანონიერი“ სამეფო კაცი ჰყოლია!

ეს კაცი გახლავთ ხოსრო-მირზა, ქართულად — ქაიხოსრო ბატონიშვილი, ქართლის ბაგრატიონთა „პირდაპირი შტოს“ შთამომავალი: შვილი დავით (დაუდ-ხან) ბატონიშვილისა, ანუ მეფე დავით XI-ისა, შვილიშვილი დიდი ლუარსაბ I-ისა, ძმის-შვილი დიდი სვიმონ I-ისა, ბიძაშვილი მეფე გიორგი X-ისა, ბიძა მეფე ლუარსაბ II-ისა.*

თვითონ ხოსრო-მირზას ადრიდანვე (უეჭველად მას შემდეგ, რაც იგი გიორგი სააკაძის წყალობით შაჰ აბასის კარზე წინაურდებოდა) ემჩნეოდა წყურვილი „კუთვნილი ქართლის“ ტახტ-გვირგვინის დაუფლებისა.

.


შაჰის ტახტის გარდა, ყოველი უმაღლესი „ტახტი“ დაეპყრო ხოსრო-მირზას. აგერ, მერამდენე წელიწადია, რაც იგი შე-

* ლუარსაბ პირველის გენეალოგიური შტონი.

უცვლელად არის ერანის სატახტოს ტარულა და ყულის ჯარის („გურჯების გვარდია“) უმაღლესი სარდალი — ყულარადასი. ერანში იგი არის „მეორე კაცი“, გინა „ვიცე-კოროლი“. შაჰი მას „მამას“ (გინა „მამილოს“) ეძახის და ყველამ იცის, რომ ერანის ყოველი საქმე ხოსრო-მირზას „ეკითხება“.

მაგრამ მაინც ქართლის ტახტი ელანდებოდა თურმე ცხად-ში და ძილში.

* ლუარსაბ პირველის გენეალოგიური შტონი.



იყო სისხლით „წმინდა ქართველი“ (მნიშვნელობა არ ჰქონდა „გარეგნულ მაჰმადიანობას“),

იყო გვარად „წმინდა ბაგრატიონი“ (მნიშვნელობა არ ჰქონდა დედამისის გლეხურ წარმომავლობას),
 იყო ნიჭიერი,
 იყო ჭკვიანი,
 იყო მამაცი,
 იყო „ხერხიან-ილათიანი“,
 იყო ერანის შაჰის „უსაყვარლესი ქართველთაგანი“.
 და, ბოლოს და ბოლოს, კიდევ რაღა იყო საჭირო მისი დღენიადაგი ოცნების აღსასრულებლად?

მისი სიცოცხლის „საუკეთესო წუთისოფელი“ კი გარდასულიყო: იდგა 1632 წელი და ხოსრო-მირზას უკვე 67 წელი შესრულებოდა.

67 წელი და, აჰა, როგორც იქნა აღესრულა მისი ოცნება:
 შაჰ სეფიმ ხოსრო-მირზას მისცა ქართლი;

სიმამაცისთვის და გმირობისთვის დაარქვა სპარსული სიტყვიერების ყველაზე დიდი გმირის სახელი — როსტომ, გინა — როსტომ-ხანი;

უწოდა „ვალი“ („მოადგილე“). ამიერიდან შაჰის ყოველ საქმიან და შინაურულ მიმოწერაში ასე გატარდება — „ჩემი ძმა ქართლის ვალი როსტომ-ხანი“.

ხოლო ქართველებმა მას დაარქვეს როსტომ მეფე. თვითონ იგი თავს უწოდებდა და ხელრთვად ურთავდა, ვითარცა — „მეფეთ მეფე და პატრონი“ ქართლისა.

დიდად საყურადღებო გახლავთ ისიც, რომ შაჰ სეფიმ როსტომ-ხანს ქართლის გამგებლობასთან ერთად ძველი თანამდებობებიც დაუტოვა. ამიერიდან როსტომი ქართლის მეფეც იყო, ერანის ყულარალასიც და ისფაჰანის ტარულაც.

მაშ, 1632 წლიდან ქართლის მეფობა წაერთვა „უკანონო“ თეიმურაზს და გადაეცა „კანონიერ“ როსტომ-ხანს, გინა როსტომ მეფეს, ის კი არა და, თეიმურაზი — აქამდე „ორისავ ტახტის მკერი“ — გადაყენებულია კახეთის მეფობიდანაც. და მის ნაცკლად კახეთის მმართველად დანიშნულია სალიმ-ხანი (კახეთს უკვე „შეაჩვიეს“ ერანელი მოხელე — „ხანი“. აკი 1616 წლიდან 1625 წლამდე სპარსელი ფეიქარ-ხანი განაგებდა

კახეთს. სალიმ-ხანი მეორე სპარსელი იყო კახეთის სამმართველოდ გამოგზავნილი).

შაჰ სეფიმ „ახალ სახელოიანსა“ და „ახალ სახელიან“ როსტომ-ხანს საქართველოში თანამოლაშქრედ კიდევ ერთი როსტომი დაუნიშნა.

ეს გახლავთ როსტომ-ხან სააკაძე, ერანის სამარძალთა მთავარსარდალი, გინა ამირსპასალარი.

გავიხსენოთ წინასწრობილად ნათქვამი: როსტომი ბეჟან სააკაძის უფროსი ძე იყო. ბეჟან სააკაძე ხომ დაუდ-ხანს გაჰყვა ერთგულ აზნაურად სპარსეთში. სპარსელები მას ყარა-ბეჟან-ბეგს უძახდნენ საარაკო სიმამაცისთვის. მერე ხომ საქართველოში დაბრუნდა ბეჟანი თავისი ოჯახით. მაგრამ სააკაძეების მოსისხლე ფარსადან ციციშვილმა მოაკვლევინა იგი, ცოლ-შვილიც აუწიოკა და უკანვე სპარსეთს გადაჰხვეწა. 11 წლის როსტომი შაჰ-აბასმა აიყვანა პირად ღულამად. 18 წლისა უკვე სოჭბათ-იასაული იყო. მერე დივანბეგობაც უბოძა შაჰ-აბასმა. დივანბეგობას თოფანგჩიადასის (მეთოფეების სარდალი) თანამდებობა მოჰყვა. ახლა, საქართველოში გამომგზავრების ქამს, როსტომ-ხან სააკაძე გახლავთ ერანის ჯარების ამირსპასალარი და თავრიზის ბეგლარბეგი.

ბევრი ომი გადაუხდია როსტომ-ხან სააკაძეს, მაგრამ მის მხედრულ გვირგვინთაგან გამოოჩნეულად ბრწყინავენ — ვანოა ციხეზე გალაშქრება, ქუთრების განადგურება, თურქთაგან ბაღდადის გამოხსნა, ომი ჰამადანს, ჰელეს ციხის აღება.

ახლა „ყველაზე დიდ სახელს“ საქართველოში ლაშქრობით გამოელის ჯერ კიდევ ახალგაზრდა (43 წლის) „გურჯი სპასალარი“.

და, აჰა, ქართველები მიუძღვიან საქართველოსკენ 130 000-იან სპარსულ მხედრობას — როსტომ-ხან ბაგრატიონი და როსტომ-ხან სააკაძე.

შაჰ სეფი შაჰ აბასის შვილიშვილია და ამიტომ მან კარგად იცის: ყველაზე „მარჯვედ“ სწორედ ქართველები „მოუვლიან“ ქართველებს!

მრავალი გათათრებული ქართველი „მოხალისედ“ მოსდევს

როსტომს და როსტომს. აქ ბრძანდებიან: ბეჟან ამილახორი, ზაალ ქსნის ერისთავი, დავით თვალდამწვრისშვილი მისი შვილებით, თამაზ მაჩაბელი, ბახუტა, დემეტრე და როინ-ჯაგლაგ ფანველისშვილები, პაპუნა ციციშვილი, თურმანბეგ თურმანიძე, იმერეთის ბოქაულთაუხუცესი თეიმურაზ ჩხეიძე, პასანბეგ ბარათაშვილი, ოტია ანდრონიკაშვილი, კახაბერ და ელიზბარ სვიმონისშვილები.

ამათგან ორი ფანველისშვილი დააწინაურეს — დემეტრე და როინ-ჯაგლაგი, წერილები ჩააბარეს და საქართველოსკენ აფრინეს.

ეს წერილები ეგზავნებოდა ქართლის ყველა თავადს: თქვენმა მწყალობელმა შაჰმა ქართლი თავის ყულარაღასსა და თქვენს კანონიერ მეფეს როსტომს უბოძაო, თანაც თავრიზის ბეგლარბეგი და ერანის ამირსპასალარი სააკაძე დიდის მხედრობით თან გამოატანაო: ამიტომ, სანამ გვიან არ არის, თეიმურაზი მიატოვეთ და ნამდვილ ხელმწიფეს — როსტომს შეეგებეთო.

თეიმურაზ მეფე საფურცლეს იდგა (ისევე საფურცლე!).

ორი როსტომის წამოსვლის ამბავი დროზე შეეტყო და საომარი წვევაც დროზე დაეგზავნა ქართლ-კახეთსა და იმერეთში.

მაგრამ წვევის პასუხი კი აღარ გამოჩნდა „დროზე“.

ჯერჯერობით მხოლოდ ბარათაშვილები მოსულიყვნენ საფურცლის ჭალაზე მოღნაშულად დაშვებული ქართული დროშის ქვეშ.

მეფეს მოულოდნელად მისა მსტორებმა ტყვეები მოჰგვარეს — დემეტრე და როინ-ჯაგლაგი. წერილებიც წაიკითხა თეიმურაზმა. მაგრამ ნაგვიანევი აღმოჩნდა ეს „მიღწევაც“: იმ წერილების შინაარსი უკვე ყველა ქართველ თავადს შეტყობილი ჰქონდა და თითქმის ყველა როსტომ მეფესთან შესახვედრად გაქცეულიყო!

მხოლოდ იოთამ ამილახორმა შეუნახა ერთგულება თეიმურაზს და იმ დღესვე ეახლა თავისი ლაშქრით საფურცლის ბანაკს.

იმ წერილების გამოჩენაზე თეიმურაზთან მყოფი ბარათა-

შვილებიც დამფრთხალან და დადებულბულან; ცოლ-შვილი დაუყრიათ, ღამით გაპარულან და ისინიც როსტომ მეფესთან შესახვედრად გაქცეულან.

გამწარებულმა თეიმურაზმა ბარათიანთა ცოლ-შვილს ცხვირ-პირის დაჭრა დაუპირა, მაგრამ ხორეშან დედოფალმა არ დაანება („არა აუფლა“).

ქართლიდან აღარავის ელოდა თეიმურაზი. იმერეთიდანაც შემწეობაზე უარი მოუვიდა, რადგან დადიანი ეომებოდა თავ-გამეტებით იმერეთის მეფეს.

ისევ თურქეთი გაახსენდა თეიმურაზს და მაშინვე ნიკიფორე ჩოლოყაშვილი აფრინა სტამბოლს. მაგრამ პასუხს ვეღარ დაელოდებოდა, რადგან იმ დღესვე აახლეს ბავთიანი ამბავი: როსტომ მეფე უკვე ყარაბაღში შემოვიდაო; შენგან წასული ქართველი თავადებიც შეხვედრიან ახალ მბრძანებელს, მის წინაშე დამხობილან და ფეხები დაუკოცნიათო.

იმედგადაწურულმა თეიმურაზმა საფურცლე დააგდო და გორში ჩავიდა.

სულ ოთხასამდე აღამიანი მისდევდა მეფეს და მათგან სამასი მარტო ქალი იყო.

გორში შიკრიკებმა წამოაწიეს: როსტომ მეფე აღჯაყალაზი გამოჩნდაო. თეიმურაზი გორიდან აიყარა და ქვიშხეთს გადავიდა. ვერც ქვიშხეთს მოასწრო მუხლის ჩაკრეფა და ცინცხლად „ახარეს“: როსტომ მეფე და როსტომ სააკაძე უზარმაზარი სპარსული მხედრობით და მათ ფერხთა მტვრად ქცეული ქართველი თავადობით უკვე ტფილისში შემოსულანო.

თეიმურაზმა ოჯახი წინ გაიმძღვარა და იმერეთისკენ გაქუსლა.

როსტომ მეფისთვის უკვე ჩაუკაკლავთ ბარათაშვილებს: თეიმურაზი მარტოდმარტოა დარჩენილი, იოთამ ამილახორის გარდა აღარავინ მისვლია და ახლა იმერეთისკენ მიილალება ტყვეობიდან თავის დასახსნელადო.

ორიათასი მეომარი ამოარჩია და დაადევნა როსტომმა თეიმურაზს. ლტოლვილებმა ფერად გადაასწრეს „პერანგას მთაზედ“. მდევართა უმრავლესობას ცხენი დაუვარდა თავაწყვეტილი ქვებით. დანარჩენებმა თეიმურაზის მხლებელთაგან

მხოლოდ ორიოდ ჩამორჩენილი კახი და მისი ღარიბული ავ-
ლაღიდება მიჰგვარეს როსტომს.

გორში ხმა გავარდა, — თეიმურაზი იმერეთს გაქცეულა,
ტფილისი და ქვემო ქართლი ყიზილბაშით ავსებულა, მაჰმადიანი
მბრძანებელი ტფილისიდან გორისაკენ წამოსულა და
სადაც არის გამოჩნდება ქრისტიანთა საქლეტად და საოხრებ-
ლადო.

აზრდაც არავის მოსვლია, რომ „თათარი ხელმწიფე“
ქრისტიან ქართველთა ასაკლებად არ მოდიოდა.

ისევ აიყარა ქართული ოჯახი და გაიხიზნა ტყესა და ღრეში.

კათოლიკე მისიონერები გულმყარად დაუხვდნენ სპარსე-
თიდან მოვლენილ ახალ ხელმწიფეს. მათ საშფოთარი არაფერი
ჰქონდათ, რადგან როსტომი ერანშიც უხვად სწყალობდა ევ-
როპელ ქრისტიან მოღვაწეებს.

საჩუქრებით მიეგებნენ „გორელი ევროპელები“ ქართლის
ახალ მეპატრონეს. როსტომმაც დიდს პატივით მიიღო ისინი.
ძალიან მიხარია, ქართლშიც რომ დამხვდნენ „ფრანგებიო“
(ქართველები აკი „ფრანგს“ ეძახდნენ საქართველოში მოსულ
ყოველ ევროპელ კათოლიკეს). უხვი საბოძვარიც მიუბოძა.
თეიმურაზისდროინდელი ყოველი პატივი და შეღავათი დაუ-
ტოვათ; ასეთი პირობაც დაურთო: ამიერიდან თქვენს სახლსა
და სავანეში დაუკითხავად შემოსვლას ვერავინ გაბედავს —
მზის, წყლისა და ქარის გარდაო.

როსტომი გორში მცირე ჯარით შევიდა. დანარჩენი მხედ-
რობა ქალაქგარეთ დააბინავა. ასე სჯობიაო, სთქვა მეფემ, ჯარი
ბაინც ჯარია და, ვაითუ მეომრებმა თავი ვერ შეიკაონ ხალხის
წაწუხებისა და აკლებისაგანო.

ასეთი ბრძანებაც გაუშვა როსტომ მეფემ სამხედრო ბანაკ-
ში: რომელი ჯარისკაციც ადგილობრივ მოსახლეს შეაწუხებს,
ის ჯარისკაცს უეჭველად მუცელზე გავფატრავო.

ვინც ქალაქიდან გაქცევა ვერ მოასწრო, როსტომმა ყველამ
დაუყვავა, დაამშვიდა და დააჯილდოვა. გაქცეულებს კი შეუთ-
ქვალა: სახიზარ-სამალაგებიდან გამოდით, თქვენს კერას დაუბ-
რუნდით და მშვიდობიანი ცხოვრება განაგრძეთო. ყველამ

იცოდეს, მე ქართლის საპატრონოდ და მოსავლელად მოვსულ-
ვარ და არა დასაპყრობად და დასამონებლად.

მალე დადასტურდა, რომ როსტომ მეფის სიტყვა და საქმე
ერთი იყო. ადამიანს შეეძლო მის აღთქმას მინდობოდა.

როსტომ მეფემ გორში სამი თვე გაატარა — 1633 წლის
ივნისი, ივლისი და აგვისტო. ოც-ოცდახუთ დღეში ჯარს ახალი
ქვეთკირის ციხე ააგებინა. შიგ ხუთასი ყიზილბაში მეთოფე და
თორმეტი ზარბაზანი ჩაარიგა. ციხიონის უფროსად დანიშნა
ნურის მინბაში (ათასისთავი), სახელად — მ უ ს ლ ი მ ბ ე გ,
ტომით ქართველი, მესხი.

როსტომ მეფის თხოვნით, ქრისტეფორე კასტელმა გორის
ციხე დახატა. ნახატი როსტომს ძალიან მოეწონა და მაშინვე
ერანში გაგზავნა შაჰის საამებელ-საჩუქრად.

ერთ დღეს მისიონერთა ეკლესიას ეწვია როსტომი თავისი
ამალით. წირვა-ლოცვას დაესწრო და ყოველივე დიდის წადნი-
ერებით მიმოიხილა. ერთი პატარა ნახატიც მოეწონა — ცხენ-
ზე ამხედრებული და გველეშაპის მსახვრალი წმინდა გიორგის
გამოსახულებით. ქრისტეფორე კასტელს დაეხატა იგი. მაშინ-
ვე მიართვეს მუსლიმან მეფეს ქრისტიანი „წმინდა რაინდის“
ხატი. სამაგიეროდ ოცდათექვსმეტი სკუდო აჩუქა როსტომმა
მისიონერებს.

გორიდან როსტომ მეფემ სურამის ციხის ასაშენებლად და
იქვე ციხიონის ჩასაყენებლად გაგზავნა ჯარი.

ბოლოს და ბოლოს, ქართლში დაიჯერეს, რომ როსტომ მე-
ფე ქართლის „გადასაშენებლად“ კი არა, „მოსაშენებლად“
იყო მოსული.

ყველა თავადი და აზნაური მოვიდა ქართლის „ნამდვილ
მეფესთან“ ფეხზე საკოცნელად.

ერთმა, სააკაძეების მოსისხლე ფარსადან ციციშვილმა ვერ
გაბედა როსტომ მეფესთან გამოცხადება. ვერ გაბედა იმიტომ,
რომ იქვე როსტომ-ხან სააკაძე იდგა. სწორედ ის როსტომ-ხან
საკაძე, რომელიც ფარსადან ციციშვილმა ყრმობის ასაკში
დააობლა — მამა მოუკლა, ოჯახი დაუქცია და სამშობლოდან
გააქცია.

თვითონ გაუძახა ლაშქარი საციციანოში როსტომ სააკაძემ,

ფარსადან ციციშვილის სამფლობელო ააწიოკა, ააოხრა, გაძარცვა და მოსტყვევნა.

როცა ეს ამბავი როსტომ მეფემ შეიტყო, რისხვით აღივსო და როსტომ სააკაძეს შეუთვალა: ვინ მოგცა ნება, ასეთი რამ უჩემოდ რომ გაგიბედავსო?! საქართველო ისედაც აოხრებული არის და რაც გადაჩენილა, იმასაც შენ მიოხრებ და მიტივალე, — მაშ, მე რილას ბატონი და პატრონი ვყოფილვარო?!

სწორედ მაგრად იყო ეს სილა მოქნეული! ასედაც შეიგძნო როსტომ სააკაძემ. თვითონაც გარისხდა და ცეცხლით გაიტენა.

ახლა გამეძღვინდა, რომ ორივე როსტომს ცალკეულად თავისი თავი მიაჩნდა „პირველ როსტომად“!

ორივემ „პირველი საჩივარი“ გაგზავნა ერანის შაჰთან.

შაჰ სეფიმ ისევ თავისი „ერთგული მამიკოს“ — როსტომ მეფის მხარე დაიჭირა და როსტომ-ხან სააკაძეს ფიცხელი ბრძანება გამოუგზავნა: ახლავე შენის ჯარით საქართველო დატოვე და ვანის ციხეზე წადი სალაშქროდო. მეორე ბრძანება შაჰმა შირვანის ბეგლარ-ბეგს, ფარუხანს, შეუთვალა: სააკაძის მაგივრად შენ დაუდექი ქეშიკში ყარაბაღის ლაშქრით როსტომ მეფესო.

როგორც კი სააკაძე საქართველოდან გავიდა, ფარსადან ციციშვილი როსტომ მეფეს ეახლა, ფეხები დაუკონა და სიკვდილამდე ერთგულება შეჰპყვიცა.

ყველა გამოვიდა სამალავებიდან და სახიზარებიდან — თავადიც, აზნაურიც, გლეხიც, ბერიც და ერიც. ყველა დაუბრუნდა მშობლიურ კერას, მშვიდობიან ცხოვრებას. ქართველებმა ისევ „დაიწყეს აშენება, ხვნა, თესვა“.

ტფილისში, ქართველთა წმინდა სატახტოში, ახალი მეფე იჯდა — „გარეგნული“ სჯულით მაჰმადიანი, მაგრამ „შინაგანი“ სულით ქრისტიანი. სისხლით და ჯიშით ქართველი, რაც მთავარია — „ქართულობისთვის“ თავგამოდებული მებრძოლი, ქართველთა მიწა-წყალზე მშვიდობიანი ცხოვრების, შრომის, აღმშენებლობისა და აღორძინების წინამძღვარი და თავკაცი.

იგი ახლა ქართლის მეფეც იყო, ერანის ყულარაღასიც და



ისფაჰანის ტარულაც. შაჰ სეფი ისევ არაფერს აკეთებდა მარიტი მამის“ დაუკითხავად.

ამიტომ ამბობდნენ საწადნიერო ამბების მოტრფიალენა: ქართლსაც და ერანსაც ერთი კაცი განაგებსო — როსტომ მეფე!

ხოლო, კახეთში ყიზილბაში ხანი იჯდა — სალიმ-ხან.

ერთი რამ კიდევ მიინიშნე საგანგებოდ, ჩემო მკითხველო: როსტომ მეფემ საქართველოში ჩამოსვლისთანავე არზრუმიდან ჩამოიყვანა თავისი კეთილისმყოფელის — გიორგი სააკაძის — ოჯახი და დაასახლა მათს მამაპაპეულ ნოსტეს მამულებში.

აზმა მეოთხე

სატკივარნი „ბაში-აჩუკინა“

ახლა დასავლეთ საქართველოს თავგადასავალს მივაპყროთ მზეოა საგულდაგულოდ.

მაშ, — „იმიერ-საქართველო“ მეჩვიდმეტე საუკუნის პირველ მესამედში.

სრული მიმძლავრება თურქთაგან.

სრული მიმძლავრება ყველაზე მძიმე ქართული ცრემლისა — „ტყვეთა სყიდვა“!

სრული დაცემულობა სულიერად.

სრული დაქუცმაცებულობა პოლიტიკურად:

იმერეთის სამეფო,

ოდიშ-სამეგრელოს სამთავრო,

გურიის სამთავრო,

აფხაზეთის სამთავრო.

აფხაზ-ქართველთა ცალკე „სახელმწიფოდ“ გამოყოფას სა-
თავეში ჩასდგომოდა აქაური ქართული ფეოდალური სახლი
შ ა რ ვ ა შ ი ძ ე ბ ი ს ა. მათი „სამთავრო ქალაქი“ შეიქმნა
ზუფუ, ანუ ლიხნი. ოდიშ-სამეგრელოსა და აფხაზეთის სამთავ-
როების საზღვრად დაიდო მდინარე კოდორი.

დადიანი, გურიელი და შარვაშიძე ცალკე „მიკრო-მონარქე-
ბად“ იქაჩებოდნენ. ქუთათისის „დიდ ტახტს“ ჯერ კიდევ არ
გამოსჩენოდა შესაფერისი საკეთმპყრობელი, რომელიც მის
ხელქვეით ჯუჯა-ხელმწიფებს ლაგამს ამოსდებდა და სრული-
ად დასავლეთ საქართველოს ერთიან, მძლავრ და განუყოფელ
სახელმწიფოდ შეპყრავდა.

ღიხაც, რომ ღარიბი იყო ტალანტებით ქუთათისის სამე-
ფო სახლი.

ქართველები, კაზაკები, თურქები

მეჩვიდმეტე საუკუნის ოციან წლებამდე დასავლეთ საქარ-
თველოს მეფე-მთავარნი ასე თუ ისე „ახერხებენ“, ერთიანი
ძალით ებრძოლონ თურქ-ოსმალთა მომძლავრებას. ასე თუ
ისე მხარში უდგანან აღმოსავლეთ და სამხრეთ „საქართველო-
ების“ სამამულო ბრძოლებსაც ერანელ ყიზილბაშთა მოსაგე-
რიებლად.

1609 წელს გურიის მთავარმა მამია II-მ (1600—
1625 წწ.) მანუჩარ დადიანის თანადგომით დიდი ლაშქრობა
მოაწყო აჭარაში. ოსმალები ამოწყვიტა ანაზღაიითი დაცემით,
ყველა აჭარული ციხე-სიმაგრე დაიპყრო და ისევ ქართულ სა-
მანებში მოაქცია ეს ოდინდელი, მარადიული ქართული მიწა-
წყალი.

გურიელმა იცოდა, რომ მარტო გურიის ძალებით აჭარის
შენარჩუნება და თურქეთთან ომის წამოკიდება ძალიან გაუ-
ჭირდებოდა. ამიტომ უფრო საიმედო მოკავშირეებიც გამოუ-
ძებნიათ გურიისა და სამეგრელოს მთავრებს.

ესენი იყვნენ უკრაინელი კაზაკები, რომელთაც უკვე ჰქო-

ნიათ გამოცდილება მუსლიმან მოსისხლეთა დალაშქრისა და დამარცხებისა. მამაც, თავზეხელაღებულ კაზაკთა რაზმები მცირე, მაგრამ მტკიცედ შეკრული საზღვაო ფლოტილიებით ელვასავით ეცემოდნენ შავ ზღვაზე მოარულ თურქულ სავაჭრო და სამხედრო ხომალდებს, აობრებდნენ ყირიმისა და ოსმალეთის სანაპიროებს.

თურქეთისაკენ ლაშქრობის ეამს კაზაკები კოლხეთის სანაპიროებზე „ალერსიან მასპინძლობასა“ და საიმედო თავშესაფარს პოულობდნენ. ქართველებსა და უკრაინელებს მათი „უმალღესი მესვეურების“ ჩაურევლად გამოუძებნიათ „საერთო ენა“.

1610 წელს მამია გურიელმა და მანუჩარ დადიანმა უკრაინაში ელჩები გაგზავნეს. ელჩებმა კაზაკთა ატამანებს საჩუქრად ოქროს ჯვრები მოართვეს და თურქთა წინააღმდეგ ერთობლივი ბრძოლის წინადადება შესთავაზეს.

წყართთა უაღრესი სიმცირისა და სიმწირის პირობებში არა ჩანს ამ მოლაპარაკების მსვლელობა და შინაარსი, ხოლო შედეგი ის გახლავთ, რომ მტკიცე, მოქმედი კავშირი ამჯერად არ შედგა.

თურქეთმა კი გურიასა და სამეგრელოს „ეკონომიური ბლოკადა“ გამოუცხადა. დასავლეთ საქართველო მარილს ყირიმიდან ღებულობდა და ახლა მარილის შემოტანა სავსებით აღიკვეთა. შეწყდა რკინის შემოტანაც თურქეთიდან.

მძიმედ მისჭირდათ გურიასა და სამეგრელოს. ბოლოს და ბოლოს, მამია გურიელი და სამეგრელოს ახალი მთავარი ლევან II დადიანი იძულებული შეიქნენ თვითონ გაეგზავნათ ელჩები სტამბოლს (1614 წ.).

თურქეთის სატახტოში მაშინ გზად იმყოფებოდნენ საქართველოსაკენ მომავალი კათოლიკე მისიონერები — პატრი ლუდოვიკო გრანჯერიო და მისი ამხანაგი. ამათ უნდოდათ, ქართველ ელჩებს გამოჰყოლოდნენ, მაგრამ თვითონ ლუდოვიკო გრანჯერიოს თქმით, თურმე, დიდად ძნელი ყოფილა მთავარ გურიელთან და დადიანთან ზავის ჩამოგდება. ბოლოს, ქართველი ელჩები სულაც აღარ გამოუშვეს და მძევლებივით დაინარჩუნეს სტამბოლის კარზე. სამაგიეროდ სულთანმა საქართველოში თავისი ელჩობა გამოგზავნა, ო მ ე რ ფ ა შ ა ს მეთა-

ურობით. ამათვე წამოჰყვა ლუდოვიკო გრანჯერიო თავის ამ-
ხანავით.

ომერ ფაშა ბათუმს მოვიდა და იქ მოითხოვა პასუხი თურ-
ქეთის ხელისუფლების სასურველ საზავო პირობებზე (თუმცა
წყარობით არ ჩანს, სახელდებით რა პირობებზე იყო ლაპა-
რაკი).

გურიელი და დადიანი პასუხს აგვიანებდნენ.

ომერ ფაშა იტალიელ მისიონერებს ჩააცვიდა და სამეგრე-
ლოსკენ არც ერთი არ გამოუშვა. მას იმედი ჰქონდა, რომ
„უცხოთა მოყვარე“ ქართველები ევროპელ სტუმრებს ანგა-
რიშს გაუწევდნენ და მათი პატივისცემით მაინც გამოსწირავ-
დნენ პასუხს თურქეთის სულთანის მოთხოვნაზე.

მართლაც, — ის იყო, იტალიელმა პატრებმა სამეგრელოში
ჩასვლაზე იმედი გადაიწურეს და უკვე სტამბოლში გასაბრუ-
ნებლად ემზადებოდნენ, „რომ უეცრად მოვიდა გურიელის
მოციქული, რომელმაც ზავის ჩამოგდება და ხარაჯის გადახდის
თანხმობა გამოაცხადა.“

1614 წლის 13 დეკემბერს ბათუმში თურქებმა და გურუ-
ლებმა ხელი მოაწერეს ზავს. გურუამ თურქეთის მოხარკეობა
იკისრა.

1615 წლის თებერვალში დადიანმაც მოაწერა ხელი ხონ-
თქარის წინაშე მოხარკეობას. ყოველწლიურად სამეგრელოდან
თურქეთს უნდა წასულიყო რვაასი არშინი ტილოს ქსოვილი
და ოცდაათი-ორმოცი ტყვე.

აფხაზეთი თავიდანვე თურქეთის ყმობას აღიარებდა და
არც იმეამად უცდია „შეჩვეული უღლისგან“ თავის გამოხსნა.

იმერეთის სამეფოც ოსმალეთის მოხარკე იყო. იგი სტამბო-
ლის სასახლეს ყოველწლიურად უხდიდა კომლზე ერთ რუბს
(გინა — ერთი მეოთხედი მარჩილი, გინა — ცამეტი ფარა),
რამდენიმე ასეულ არშინ ტილოს და ცალკე „ფეშქაშად“ —
რამდენიმე ათეულ ქართველ ტყვეს...

1617 წელს შავი ზღვის ქართულ განაკიდურზე ისევ გამოჩ-
ნდნენ კაზაკები — ორი ათასი მეომრით დატვირთული კატარ-
ლებით. ორმოცი კაცი დაარჩიეს და დასავლეთ საქართველოს
შუაგულისკენ გამოუშვეს.

გამოგზავნილნი ქართულ მიწა-წყალს გაეცვენენ, აქაურ მე-

ფე-მთავრებს შეხვდნენ, ერანში წასასვლელი გზებიც მოინიშნეს და თურქეთის წინააღმდეგ „კოალიციის“ შექმნის თაობაზე სიტყვა ჩამოაგდეს. ანტიოსმალურ „კოალიციაში“ ნაგულისხმევი იყვნენ: კახაკები, იმერლები, მეგრელები, გურულები და სპარსელები.

მაგრამ ეს „სასურველი განაზრახვი“ ჩაიშალა. მთავარი აქ ის იყო, რომ ქართველები და სპარსელები „ერთ ქართაში“ ვერ რასგზით ვერ მოთავსდებოდნენ...

კახაკები ისევ განაგრძობდნენ „დამოუკიდებელ“ მარბიელ თავდასხმებს „წყეულ ბუსურმანებზე“.

დასავლეთ საქართველოს მეფე-მთავარი ისევ უგზავნიდნენ ხარკს თურქეთის სულთანს, მაგრამ მაინც „დამოუკიდებლად“ გრძნობდნენ თავს, დამოუკიდებელ საგარეო პოლიტიკას აწარმოებდნენ და თურქულ ჯარებსაც ქართულ მიწაზე უსისხლოდ ფეხს არ ადგმევინებდნენ.

არც ერანის მრისხანე მბრძანებელს — შაჰ აბასს არ ებუებოდნენ დასავლეთ საქართველოს მესვეურნი. აკი იმერეთის სამეფო კარი ისე აშკარად და თამამად იფარავდა სპარსელთაგან ლტოლვილ ქართლისა და კახეთის მეფეებს. აკი იმერეთის მეფე და გურია-სამეგრელოს მთავარი ერთხმად არწმუნებდნენ ლუარსაბ მეფეს — უარი ეთქვა შაჰ აბასთან საბედისწერო გამოცხადებაზე, აკი თეიმურაზსაც თანამდგომ ძალებად მოჰყვნენ საარაგვომდე იმერთა, გურულები და ოდიშართა სამთავრო ძალები. ყოველივე ეს, წინასწრობილად ნათქვამი, კარგად ახსოვს ჩემს მკითხველს.

მაგრამ „ბაში-აჩუის საქართველო“ მაინც ფეოდალურ განრინებათა და უგუნურ შინა-სისხლთახევის „კლასიკური ქვეყანა“ იყო...

მეჩვიდმეტე საუკუნის ოცოანი წლებიდან დასავლეთ საქართველოს „მშვიდი შინაგანი ამინდი“ იმდღეა და იმშალა.

იმერეთის მეფეს, გიორგი მესამესა და გურიის მთავარს, მამია მეორეს, ასე ვთქვათ, „პოლიტიკური მძახლობა“ ჰქონდათ: გურიელის ასული თამარი ცოლად ჰყავდა გიორგის უფროს ძეს ალექსანდრეს (ეს ის ალექსანდრე გახლავთ, გიორგი სააკაძეს რომ უნდოდა „გაერთიანებული საქართველოს“ მეფედ).

1618 წელს ალექსანდრეს თამარისაგან შეეძინა უფლისწული ბაგრატი.

ორი წლის შემდგომ ალექსანდრეს შეასმინეს, ცოლი რქებს გადგამსო და კუროც დაუსახელეს — ვილაც „ქუთათლის ვაჟარი“.

ალექსანდრემ არც აცივა, არც აცხელა და ცოლი თავისი შვილითურთ განუტევა და გურიელს გაუგზავნა თავლაფდასხმული.

იმერეთსა და გურიას შორის მტრობა ჩამოწვა.

თურმე ამას უცდიდა ოდიშ-სამეგრელოს ახალგაზრდა მთავარი ლევან II დადიანი (1611—1657 წწ.), რომელმაც „განიხარა მტერობა გურიელისა და მეფისა“.

და მაშინვე ოდიშისა და გურიის მესვეურებმა ახალი „პოლიტიკური მძახლობა“ გაჩაჩხეს: მამია გურიელის ვაჟმა — სვიმონმა ცოლად შეირთო ლევან დადიანის დაი — მარიამი.

(შეითხველს ვთხოვ, საგანგებოდ დაიმახსოვროს ეს საოცრად მშვენიერი, სათნო და ჰკვიანი ქალი, რომელსაც დიდი „პოლიტიკური ქალობის“ როლი დააკისრა სამატიანო ბედისწერამ).

ამნაირაო, — დადიანი და გურიელი დამოყვრდნენ და ქუთათისის სასახლის გარე „საერთო მტრად“ დაიგულეს.

ცოტა ადრე გიორგი იმერთა მეფემ რაღაცისათვის „შერისხნა“ უახლოესი კარისკაცი მათა წულუკიძე, რომელიც იყო კუტი და უწოდებდნენ „წულყს“. შერისხული პაატა „წულყ“

კი“ გაიქცა ზუგდიდს, სადაც ბინ „შთაუდვა ლევანს მტროჯ გიორგი მეფისა და მარადის განუზრახვიდა“ იმერეთის დასალაშქრავად.

იმავე ხანს ლევან დადიანმა ცოლად შეირთო აფხაზეთის მთავრის, შარვაშიძის („შარაშიას“) ასული — თ ა მ უ ნ ი ა. ამ კორწინებასაც უეჭველად პოლიტიკური განაზრახი ედო სასათუმლად — კავშირი ოდიშისა და აფხაზეთის სამთავროებს შორის.

ერთი სიტყვით, მეჩვიდმეტე საუკუნის ოციან წლებში, ლევან დადიანის თავგამოდებული ცდის მეოხებით, დასავლეთ საქართველო ორ ბანაკად გაიყო — იმერეთის სამეფო და სამივე სამთავრო — ოდიში, გურია, აფხაზეთი.

იმერეთის მეფემ კადნიერ მთავართა დასჯა გადაწყვიტა და საომარ სამზადისს შეუდგა.

მაგრამ ლევან დადიანი უფრო სწრაფად მოქმედებდა. მან ოდიშართა, აფხაზთა და ჯიქთა ლაშქარი შემოიყარა და იმერეთს შემოესია.

გაეგება გიორგი მეფე იმერთა ჯარით.

ბრძოლა გაიმართა კ ო ჭ ო რ ა უ ლ ს, ქუთათისის ახლოს, 1623 წლის 9 დეკემბერს. „იქმნა ბრძოლა ძლიერი და მოსწყდნენ მრავალნი“.

გიორგი დამარცხდა და უკუიქცა.

დადიანს ხელში ჩაუვარდა მდიდარი „ალაფი და იავარი“, ტყვედ წაიყვანა „მრავალი წარჩინებულნი და მდაბიურნი“.

პაატა წუწვის რჩევით, ოდიშის მთავარმა დატყვევებულ იმერლებს ტყვეობიდან დასახსნელად დიდძალი ვერცხლი გამოართვა.

ეს პირველი შემთხვევა იყო, როცა ქართველისგან ომში დატყვევებული ქართველი თავისუფლების დასაბრუნებლად ფულს იხდიდა!

უბედურება ის იყო, რომ ეს პირველი „შემთხვევა“ შემდგომეამინდელ საქართველოში „წესად“ იქცა!..

ლევან მეორე დადიანი ცამეტი წლისა ავიდა ოდიშ-სამეგრელოს მთავრის ტახტზე. რაკი ყმაწვილ მთავარს „სამთავრობო კბილი“ ჯერ კიდევ არ ამოსვლოდა, ოდიშართა ქვეყანას სინამდვილეში განაგებდა ლუკანის ბიძა და „მზრუნველი“ (გინა — „რეგენტი“) გიორგი ლიპარტიანი.

გიორგი ლიპარტიანი იყო „კაცი ფრიად სამართლიანი და სახელმწიფო საქმეებში ფრიად გამოცდილი. ეს გიორგი განაგებდა ყველაფერს დიდად ერთგულად და ისე მიჰყავდა საქმეები, რომ მისი გამგებლობის დროს სამეგრელოში არავითარი არეულობა და აჯანყება არ მომხდარა, მან ყმაწვილი ლევან გაწვრთნა ყველა იმ ვარჯიშობაში, რაიც კი შეეფერებოდა და ესაჭიროებოდა ჭეშმარიტ მთავარს“.

ლევან დადიანი ოცდაორი წლისა იყო, როცა ცოლად შეირთო თამუნია შარვაშიძე — „ქალი ბუნებით ლამაზი და საგსე ყოფელი სათნოებითა, რაიც შეეფერებოდა მისი გვარის ქალს; ქარგვაში, წერა-კითხვაში, გულუხვობაში და ზრდილობაში მას ტოლი არ მოეძებნებოდა, თავისი სათნოებით ამ ქალმა მიიზიდა ყველა თავისი ქვეშევრდომის გული“.

თამუნია შარვაშიძისაგან ლევანს შეეძინა ორი ვაჟი, „ნამდვილი მემკვიდრენი დედის სათნოებისა და მამის ახოვნებისა“.

ბედნიერი უნდა ყოფილიყო მთავრის სახლელი, მაგრამ ფხიზლობდა ეშმაკი, „მთესველი ამბოხებისა და მომტერე ყოველი მშვიდობიანობისა“.

მთავრის ბიძას, გიორგი ლიპარტიანსაც ჰყავდა ცოლი, სახელად დარეჯანი, თავად ჭილაძის ასული. დარეჯანიც ძალიან ლამაზი ქალი იყო და თანაც ისე ახალგაზრდა, რომ ასაკით იგი „უფრო შეეფერებოდა ყმაწვილს მთავარს, ვიდრე მოხუცებულს ლიპარტიანს“.

ლევანი და დარეჯანი ერთმანეთს გაუმიჯნურდნენ.

გიორგი ლიპარტიანი დიდხანს ვერ გრძნობდა რქების სიმძიმეს, არაფერი ეეჭვებოდა, „ზადგან, ერთის მხრით, მთავარი ცოლიანი იყო და, მეორეს მხრით, მათ შორის ახლობელი ნათესაობა იყო“.

სამაგიეროდ შარვაშიძის ქალმა ვერ მოითმინა ქმრისა და მისი ბიცოლის საძრახისი ტრფიალება და მოღალატე მეუღლის რქებისთვის სამაგიერო რქები მიუზღა: იგი გაუმიჯნურდა ლევან დადიანის უახლოეს კარისკაცს, ვეზირს პ ა პ უ ნ ი ა ს.

სამი წყვილი რქის „ელვარების“ დამალვა შეუძლებელი შეიქნა, ყოველივე გამჟღავნდა და გახმაურდა.

გაცოფებულმა ლევან დადიანმა, „ბერძენთა სჯულისამებრ“, ცოლს ცხვირი მოსჭრა ძირში; ცხენზე უკულმა შესვა, ჯარი შემოიყარა და აფხაზეთისკენ გაქუსლა.

შარვაშიძე ანაზღაითად შემოჭრილ სიძეს გაექცა და თავისი „ერით და ბერით“ მთებს შეეფარა. დადიანმა ზუფუ აილო და გაძარცვა, სახიჩარი ცოლყოფილი იქვე დააგდო, მერე დანარჩენ აფხაზეთს მოედო, ყოველივე მოძარცვა, მოაოხრა და მდიდარი ნადავლით დატვირთული და ცოლგანტყვებული ზუგდიდს მობრუნდა.

ხოლო პაპუნა ვეზირს, რომელმაც თავის მეუფეს სარეცელი შეუგინა, უფრო ფრთხილად მოეპყრა დადიანი. პაპუნია ძლიერ პატივცემული იყო მთელს ოდიშში და ქვეშევრდომებს დიდად უყვარდათ. ამისთვის, შინაური ომი რომ არ მიმხდარიყო, ლევანმა იგი შეიპყრო და მამია გურიელს გაუგზავნა „დროებით შესანახავად“.

უცოლოდ დარჩენილ ლევან დადიანს „ბიცოლასადმი სიყვარული კიდევ უფრო გაუძლიერდა და ცეცხლმა ერთბაშად იფეთქა“. ბოლოს, აღარც აცივა, აღარც აცხელა — ადგა დიდებულთა ამალით, გიორგი ლიპარტიანს მიუხტა, მისი ცოლი დარეჯანი თავისი შიმუნვარებით სასახლეში წამოიყვანა და ვითარცა მეუღლე-დედოფალზე „დიდის ამბით“ ჯვარი დაიწერა.

გაზრდილი-ძმისწულისგან ეგზომ შეტრაცხყოფილმა გიორგი ლიპარტიანმა წართმეული ცოლი მკვდარივით გამოიტირა. ორმოცი დღე სამგლოვიარო თაღხები ჩაიცვა და ჩააცვა ყველა თავისიანს. ერთსა და იმავე დღეებს დადიანთან საქორწინო ტაშ-ფანდური არყევდა გარემოს, ხოლო ლიპარტიანთან — გლოვა-გოდება და წივილ-კივილი.

სამეგრელოც ორ „დასად“ გაყოფილიყო: „უფრო მჩატენი თანაუგრძნობდნენ მთავრის აღვირახსნილობას და მას ემხრო-

ბოდნეშ, უფრო გონიერნი და ხნიერნი კი თანაუგრძნობდნენ მოხუცებულს და იმისკენ იყვნენ“.

ბიძა-ძმისწულს შორის შეიარაღებულ შეტაკებასაც მოელოდნენ, მაგრამ უეცრად მოკვდა გიორგი ლიპარტიანი (არავინ იცის, — მწუხარებით, თუ საწამლავეთ) და დარეჯან ჭილაძის ქალი შერჩა ცოლად და დედოფლად ლევან დადიანს.

კიდევ გამოხდა მცირე დრო-ჯამი და შოთლოდნელად დაიხოცნენ ლევან დადიანის ვაყები ნაშობნი შარვაშიძის ქალისაგან. დაბეჯითებით ამბობდნენ, რომ დარეჯანმა დაახოცინა ისინი, რამეთუ დადიანის ტახტისაკენ გზა გაეწმინდა თავისი მომავალი შვილებისათვისო...

თვალღამფხვართა და თვალღამფხვართა

ოდიშ-აფხაზეთ-გურიის კავშირი ერთბაშად დაიწრა და დაიშალა.

ლევან დადიანს უკვე მტრად გადაეკიდებინა იმერეთის მეფე და აფხაზეთის მთავარი.

მალე გურიაც განუდგა ოდიშს. აქ დიდი ხვანჯები ჩახლართა ლევან დადიანის სარეცლის შემგინებელმა და სამეგრელოდან გურიაში გაქვევებულმა პაპუნია. შეუჩნდა პაპუნია მამია გურიელს: ლევან დადიანი — ეს უზნეო ბოროტმოქმედი, სისხლის მსმელი და სისხლის შემრევი — მანამ არ მოისვენებს, სანამ თავის სამთავროსაც არ დააქცევს და მეზობელ სამთავროებსაც არ დაიპყრობსო; ამიტომ სჯობია, დავასწროთ, ლევან დადიანი ჩამოვაგდოთ და ოდიშის მთავრად მისი ძმა იოსები დავსვათო; იოსები — „კაცი ბევრად უფრო სასიამოვნო, კაცთმოყვარე, თავაზიანი, დამჯდარის ხასიათისა და ამას გარდა ხალხისაგან დიდად პატივცემული და თაყვანისაყვამიო“.

მამია გურიელი ლევან დადიანის სიძლიერეს დიახაც შეეშფოთებინა და ამიტომ იოლად აპყვა პაპუნიას წაქეზებას.

მალე შეიკრა „სამთა კავშირი“ — იმერეთი, გურია და აფხაზეთი. შეითქვნენ: ლევანი უნდა მოეკლათ და დადიანის

ტახტზე მისი ძმა იოსები უნდა დაესვათ. მკვლელიც გამოძებნეს — ვიღაც აფხაზი, ასეთ სისხლიან საქმეებში გაწაფული და გამოცდილი.

აფხაზი ლევან დადიანის მერიქიფეს შეეთქვა და მისგან შეიტყო, რა ჩვეულებაც ჰქონია მთავარს, — თურმე იგი ყოველ ვახშობას ერთსა და იმავე ადგილზე ჯდებოდა და იქვე ღრიჭოდ დატოვებულ ტიხარს ზურგით მიაწვეებოდა ხოლმე. ამაზედაც დაიპირა აფხაზმა მერიქიფე: მაცნობე, როცა ლევან დადიანი ვას კობისას ყველაზე უფრო გონებადაფანტულად გეჩვენოსო.

მართლაც, ერთ ვახშამზე მერიქიფემ მკვლელს ანიშნა — ახლა გაქვს დრო, მიდი და დაჰკარო. აფხაზი გარედან მიეპარა კედელზე ზურგით მიწოლილ დადიანს. მისი ანგარიშით დანაკრავ მახვილს ზურგიდან შიგ გულში უნდა გაევიღო.

და შესცა კიდეც მახვილი კედლის ტიხარიდან ელვასავით.

მაგრამ ლევან დადიანმა ელვაზე უსწრაფესად მოასწრო კედლიდან წინ, ზედ სუფრაზე გადამხოხა.

მახვილმა გულამდე ველარ შეასწრო. დადიანი მხოლოდ ზურგში დაიჭრა.

მკვლელმა ცხენზე ამხედრება და სიბნელეში გაუჩინარება მოასწრო.

მთელი ღამე შიშსა და ძრწოლაში გაატარა ზუგდიდმა. მეორე დღეს ჭრილობა-შეკრული მთავარი ცხენზე შეჯდა და ისე ეჩვენა მტერს და მოყვარეს.

მაშინვე შეთქმულთა გამოძიებას შეუდგა. იმერეთის მეფე, გურიელი, შარვაშიძე, იოსებ დადიანი და მათგან მოსყიდულნი — ოდიშის მთავარი ვეზირი, დადიანის მერიქიფე, მისი ორაძმა და აფხაზი მკვლელი — აი, ვინ ყოფილან შეთქმულნი!

ლევანის ბრძანებით მის ძმას იოსებს თვალები დათხარეს და მარტო წყალსა და პურზე დააგდეს; ვეზირი ჯერ დაახრჩეს, მერე ზარბიზანში ჩასტენეს და გაისროლეს; მერიქიფეს და მის ძმებს თვალები დათხარეს და ცალ-ცალი ხელი და ფეხი დაჰკვეთეს; მახვილის მომქნეველი აფხაზი ბევრი ეძებეს, მაგრამ, ცამ ჩაყლაპა თუ მიწამ, ვერსად მოიძიეს.

ახლა გურიელის დასჯა გადაწყვიტა ლევან დადიანმა.

შაგრაშ მანამდე, დადიანის გარეშეც, დიდი ტრაგედია დატ-
რიალდა გურიის სასახლეში: მამია გურიელი მისმა შვილმა
სვიმონმა მძინარე დააკლა სარეცელზე. დააკლა და თვითონ
დაბრძანდა მამის მკვლელი მთავრის ტახტზე.

ლევან დადიანს კარგი საბაზი მიეცა გურიაში სალაშქროდ.
კიდევაც შემოიყარა ოდიშართა ლაშქარი, ლანჩხუთს ჩავიდა,
სვიმონ გურიელი გაიწვია და უთხრა:

„რაკი შენ მამაშენი მოჰკალი, მე შენი სიძობა აღარ მნე-
ბაეს. არ შემძლია ჩემი დაი და დისშვილი მამის მკვლელის
ხელში ჩავტოვო. ამიტომ მომეც დაი ჩემი და უსისხლოდ გავ-
ბრუნდები ჩემს სამთავროში!“.

მაგრამ სვიმონ გურიელი იყო კაცი ამპარტავანი, „მხნე,
ახოვანი, შემმართებელი“. სასწრაფოდ ჯარიც შემოიყარა და
ფიცხლად ეკვეთა მომხდურს.

ეს ბრძოლა ლანჩხუთთან მოხდა — სასტიკი, ისევ მოძმეთა
სისხლის დამაქცევარი.

შეგრელებმა გაიმარჯვეს.

სვიმონ გურიელი შეიპყრეს და ლევან დადიანს მიჰგვარეს.
გამარჯვებულის ბრძანებით დამარცხებულს თვალები და-
თხარეს.

თვალდამწვარის ცოლი და შვილი — მარიამი და ოტია —
ლევან დადიანმა, ვითარცა „საყვარელი დაი და დისწული“,
თან წაიყვანა ოდიშს.

გურიის მთავრად დადიანმა დასვა მამია გურიელის ძმა,
აფხაზეთის კათალიკოსი — მ ა ლ ა ქ ი ა (1625—1639 წწ.).

ეს იმას ნიშნავდა, რომ ლევან დადიანმა თავის უზენაესო-
ბას დაუმორჩილა გურიის სამთავროც და აფხაზეთის საკათა-
ლიკოსოც.

გურიის შემდგომ ისევ აფხაზეთს შეესია ოდიშის მთავარი.
შარვაშიძემ მორჩილება იკისრა და ხარკი იტვირთა. ხარკად
სანადირო მწვეწარ-მეძებარი, მიმინო და ქორ-შეგარდენი უნდა
ეგზავნა შარვაშიძეს დადიანისთვის.

გურია და აფხაზეთი რომ მოითავისა, მერე იმერეთსაც მის-
დგა ლევან დადიანი. ქუთათის ს ტახტის დაპყრობაც ძალიან
ესურვებოდა ოდიშის გაზულუქებულ მთავარს. ეს დიხაც
ძნელი შესასრულებელი საქმე იყო. მაგრამ ხშირი შესევებით



კი დიახაც ამოჰხადა სული იმერეთს ლევან დადიანმა. იგი, ბატა წუწკი წულუკიძის რჩევით, იმერეთს თავს ესხმოდა ყოველ დღესასწაულს — შობას, ახალ წელს, ნათლიღებას, აღდგომას და ამალღებას.

სულ დააკნინა და დააბეჩავა იმერეთი დადიანმა

არაანჯალო ლაივარტი ახასიათებს ლევან დადიანს

ერთხელ ლევან დადიანს ნიკიფორე ჩოლოყაშვილმა ქართლიდან სამეგრელოში იტალიელი მისიონერები ჩამოუყვანა — არქანჯელო ლამბერტი და ჯუზეპე ჯუდიჩი.

„ეს ევროპელი მონაზონები შენს ქვეყანაში ღვთის სიტყვის საქადაგებლად და სარწმუნოების გასავრცელებლად მოსულან, — მოახსენა ნიკიფორემ ლევანს, — ორივენი შემკულნი არიან ყოველნაირი სათნოებით, იციან ხელოვნებაც, მეტადრე გაწვრთნილნი არიან სულიერ საგნებში, არ ეძებენ არც ფულს და არც სხვა რამ დიდებას. სურთ აქ დაბინავდნენ, რათა ერი გაწვრთნან და განასწავლონ კეთილ ზნე-ჩვეულებებსა და ღვთის სამსახურში. უეჭველად დიდ სიკეთეს მოუტანენ ერსა და თვით მთავრისთვისაც მათი აქ ყოფნა მეტად სასიქადულო იქნება“.

იტალიელებმა საჩუქარი მიართვეს მთავარს: ერთი უბის საათი, ერთი ვერცხლის ღვთისმშობლის ხატი, სამი ღურბინი, ერთი ბროლის კრიალოსანი და ერთი ყუთი დანები და მაკრატლები. ხოლო დედოფალს მიუძღვნეს: „ერთი ვერცხლის შექვილილი ხატი, ქარვის კრიალოსანი და ბატარა კოლოფი“.

დადიანმა სიამოვნებით მიიღო და დაინარჩუნა კათოლიკე „წმინდა მამანი“. კიდევაც დააბინავა, სამსახურად ყმა და მამულიც გამოუყო, ერთი ეკლესიაც კათოლიკური ქრისტიანობის საქადაგებლად აჩუქათ.

„რა დაბინავდნენ მისიონერები ასე ზვენიერ და მზა მამულში, შეუდგნენ მეგრულის შესწავლას და მალეც შეისწავ-

ლეს. მაშინვე დაიწყეს ქადაგება და ხალხის მოვლა, რაოდენადაც კი შეეძლოთ“.

ლევანს და დარეჯანს ერთი შვილი, სამი წლის გოგონა, დამბლადაცემული და დავრდომილი ჰყავდათ. მისიონერებმა უმკურნალეს და მოარჩინეს ეს ბავშვი. მთავარმა და დედოფალმა გამორჩევით გაიშინაურეს „ღვთაებრივი მამანი“.

ხშირად ილორის წმინდა გიორგის ტაძარში ეახლებოდნენ კათოლიკე ბერები ლევან დადიანს. ძალიან მოსწონდათ „ხელოვნების საუფლო“ რომიდან ჩამოსულ სწავლულებს — ილორის ეკლესიის ვერცხლის კარები, ზედ იშვიათი ოსტატობით შესრულებული წმინდა გიორგის, მღვდელმთავრისა და ხარის გამოსახულებით.

1629 წლის საახალწლო დღესასწაულზე იტალიელმა ბერებმა ხელოვნური ვარდების თაიგულები მიართვეს მთავარსა და მის თანამეცხედრეს. ბუნებრივი ყვავილნარებით „თავმოებურებული“ ცოლ-ქმარი „ძლიერ განაკვირვა“ ხელით ნაკეთებმა ვარდებმა. ლევანმა ეს „უცნაური ვარდები“ ქუდზე დაირქო და ისე დასეირნობდა მთელი დღე ცხენზე ამხედრებული.

„ოქრო და თვალმარგალიტი რომ გეთავაზებინათ, ისე ვერ გამახარებდით, როგორც ამ ვარდებმა მასიამოვნა. ოქრო-ვერცხლი თავზე საყარად მაქვს, ხოლო ასეთი ყვავილი ჩემს სიცოცხლეში არ მინახავს“, ეუბნებოდა აფოფინებული მთავარი ევროპელ სტუმრებს.

იჯდა და სწერდა არქანჯელო ლამბერტი:

„...ეს მთავარი ჩვენს განათლებულ ქვეყნებში რომ აღზრდილიყო და სწავლა-განათლება ჩვენის საუკეთესო მასწავლებლებისაგან მიეღო, ვერც ერთი მთავარი მას ვერ აჯობებდა. უმოძღვროდ და უოსტატოდ, მხოლოდ ბუნების მადლით, შეუთვისებია მას მარად საქებური ზნე-ჩვეულებანი. ქამის დროს ისეთი ზომიერია, რომ ხშირად რაიმე საქმის გამო, ან სანადიროდ გასვლის ჟამს, ისე წამოხტება სუფრიდან, რომ ან სულ არას შესჭამს, ან სულ მცირე რასმეს მოსციცქნის. არასოდეს იგი ღვინით დამთვრალი არ უნახავთ, თუმცა მის ქვეყანაში სიმთვრალე საერთოდ საძრახისი საქციელი გახლავთ.

უსაქმოდ მას კაციშვილი ვერ ნახავს ვერასოდეს. პირიქით,

მუდამ დაუღალავად შრომობს და დღენიადაც ვარჯიშობს. ლაშქრობის ქამს იგი მარდია, ფიცხელი, ჩუმი და მხნე. ამიტომაც ყოველ ომში იგი იმარჯვებს. ისე უყვარს თავისი ქვეშევრდომები, რომ, როდესაც კი მათ რაიმე მწუხარება დაატყდებათ, ან მამობრივის სიყვარულით ანუგეშებს, ანდა შესაფერ შემწეობასაც აღმოუჩენს გაჭირებულს. თავის კარისკაცებსაც ისე ტკბილად და თავაზიანად ეპყრობა, ყოველი მათგანი დარწმუნებულია — მთავარს ყველაზე უფრო მე ვუყვარეაო. დადიანი ისე მოხერხებულად იქცევა, რომ ყველა ერთნაირად არის ამაში დარწმუნებული. ამის გამო ყველას ისე უყვარს მთავარი, რომ არც ერთი მისთვის სიცოცხლესაც არ დაზოგავს.

მეხსიერება ისე ძლიერი აქვს, რომ დავიწყება რა არის, არც კი იცის. ხომ მრავალი მოლაპარაკება აქვს მრავალი საქმის გამო, მაგრამ ყოველი მოლაპარაკებისა და ხელშეკრულების უმცირესი სიტყვაც კი გაახსენდება ექვსი-შვიდი წლის შემდგომაც.

ქვეშევრდომთა შემწეობას მუდამ ისე მოწადინებულია, რომ ამ მხრივ მისი მოქმედება მე მომაგონებს ისიას სიტყვებს შესახებ იმ მთავრისა, რომელსაც სურს მთავრობა თავიდან აიშოროს და ამბობს: „არა ვიყო მე თქუენდა წინამძღვარ, რამეთუ არა ვარ მე მკურნალი და არა არს სახლსა ჩემსა პური, არცა სამოსელი“ (ისაია, თ. 3 და 7). ამ ადგილიდან სჩანს, რომ ძველად მთავარის მოვალეობა იყო ეზრუნა თავისი ხალხის საზრდოსა, ტანსაცმლისა და აქიმობისათვის. ეს ჩვეულება ჩვენს ქვეყანაში სრულებით განდევნილია, მაგრამ დადიანი კი თავის ქვეყანაში მტკიცედ მისდევს ამ ჩვეულებას. მართლაც, იმისთვის რომ ექიმობა გაუწიოს თავის ხალხს, კითხულობს სხვადასხვა საექიმო წიგნებს, რომელიც გადმოთარგმნილია ლათინურიდან მათს ენაზე, შესწავლილი აქვს მრავალი სანელე-ბელი, სამკურნალო ბალახები, მცენარეთა ძირები, აკეთებს მრავალ საცხებ მაღამოსა და სასმელ წამალს. ასეთის წამლებით სავსე აქვს ყუთები, რომელთაც თან დაატარებს და საქროებისამებრ ყველას ურიგებს. ამ წამლებს ისე თხოულობენ, თ-თქოს თვით გალენუსი (დიდი რომაელი ექიმი) ურიგებდეს მათ.

რაც შეეხება პურს ან საზრდოს, დადიანი ამაზე ისე ზრუნავს თავის ქვეშევრდომთა სასიკეთოდ, რომ მის სასახლეში ყველას ეძლევა საზრდო სრულად უფასოდ. ვინც უნდა მივედეს — კარისკაცი თუ უცხო ვინმე — მაშინვე თავის ულუფას მიაბრუნებენ. დადიანი რომ სუფრაზე დაბრძანდება, გარშემო მსხდომ სტუმრებს სულ თავის ხელით უთავაზებს საჭმელებს, ისე რომ ხშირად მას თავისთვისაც აღარ დარჩება ხოლმე. დადიანი გამორჩევით ზრუნავს თავისი ხალხის შესამოსად. კონსტანტინოპოლიდან და სპარსეთიდან ქსოვილებს იზარებს თავისი კარისკაცების შესამოსად და სხვებისათვის დასარიგებლად. ვისაც ოქრომკედლისა და აბრეშუმის ქსოვილი არ ეკუთვნის, იმათთვის შალეებს ამზადებინებს და საკუთარი ხელით ურიგებს ზამთარში. ამიტომ საფუძვლიანად შეგვიძლია ვთქვათ, რომ სწორედ ლევან დადიანს ეკუთვნის სამთავრო, რამეთუ ჰკურნოს თავისი ქვეშევრდომნი და მოუპოვოს მათ პური და სამოსელი.

დადიანი ფრიად მოყვარულია მართლმსაჯულებისა. მან სასტიკის ზომებით ალაგმა მეგრელების ონავარი ბუნება. ამჟამად ვეღარ გაიგონებთ მის სამთავროში ისეთს ქურდობას და მტაცებლობას, როგორც ეს იყო წინათ. უწინ უძლიერესი მებატონენი კანონებს არ ემორჩილებოდნენ, უძღურებს ყველადფრს ართმევდნენ და უცხოელს, რომელიც კი კოლხეთში გამოჩნდებოდა, ძარცვავდნენ. ლევან დადიანის ეამს კი ისე შეშინებულნი არიან, რომ ვერც უცხოელებს აწყენინებენ და ვერც უძღურებს აწიოკებენ.

დადიანი საკვირველ პოლიტიკას ადგას თურქეთის მიმართ. იგი კარგად იცნობს თურქეთის მტარვალობას და აგრეთვე იცის, რამდენი სამეფოც ჩაუნთქავს მის მძვინვარებას, რამდენი მომიჯნავე ქვეყანა დაუპყრია და დაუმონავებია. თურქეთმა რომ მისი სამთავროც არ გასრისოს, დადიანი ცდილობს მეგობრობა დაიმსახუროს თურქეთისა, მაგრამ ისე კი, რომ ამით თვითონ მთავრის ღირსებას არა მოაკლდესრა. ასეთი მეგობრობის დასაცავად დადიანი ყოველ წელიწადს სულთანის ვეზირებს ფეშქაშებს უგზავნის და ყოველ ორ წელიწადში ერთხელ სულთანს ხარჯს აძლევს. ამნაირად დადიანი თავისი ნებით გახდა თურქეთის მოხარკე. ხოლო მთავრის ღირსებას ისე შე-

უბღალავად იცავს, რომ არასოდეს არავითარ ბრძანებას თურქეთიდან მოსულს არ ასრულებს.

რამდენიმე წელიწადია მას აქეთ, სულთან მურადმა — თურქეთის აწინდელმა ხელმწიფემ — როცა იგი ერანის შაჰ სეფის წინააღმდეგ ომობდა და ქალაქ ერევანს ასაღებად მიადგა — დადიანს შემოუთვალა: შენ ჩემი მოხარკე ხარ და რადგანაც ერევანი შენი სამთავროს ახლოს არის, წესით უნდა ღონვიდე და დამეხმარო. ამაზე დადიანმა უპასუხა: არასოდეს არც მე და არც ჩემს წინაპრებს ვალად არ გვედო თქვენი და თქვენის წინაპრების ომში სამსახურიო და ამიტომაც არც აქლა გეახლებითო. ამასთანავე გაიხსენეთ, რომ ხარკს იმიტომ კი არ გადავით, პირდაპირ თქვენი ბატონობა მეცნოსო, არამედ იმიტომ, რომ თქვენ ჩემს საზღვრებში ჯარით არ შემოხვიდეთო. და თუ ამას მაინც იზამთ, მე მყისვე მოგისპობთ ხარკსა და ადგილად შევიძლებ ჩემის ჯარით დავიცვა ჩემი სამთავროო.

სულთანმა არავითარი პასუხი არ გასცა დადიანს არც წერილით და არც საქმით, რადგან დარწმუნებული იყო, ერთის მხრით, რომ ეს პასუხი სამართლიანი იყო და, მეორეს მხრით, დადიანის სამთავროს ისეთი ბუნებრივი საზღვრები ჰქონდა, რომ მისი დაპყრობა შეუძლებელი იყო. ყოველ შემთხვევაში სულთანი ფიქრობდა, კიდევაც რომ გადაეწყვიტო სამეგრელოს დაპყრობა, ამისათვის იმდენი ჯარი უნდა ვინმარო და ხარჯი ვიზარყო, რომ ამ ხარჯად დაპყრობილი სამთავრო არც ეღირებოდა. სულთანმა ისიც კი იცოდა, რომ მეგრელება თურქთა ძალას არაფრად აგდებდნენ, რადგან, როცა კი თურქეთის ჯარი ზღვით ან ხმელეთით სამეგრელოს მოადგებოდა, მეგრელები ყოველთვის მზად იყვნენ თვითონ დაეწვათ თავიანთი სახლები, თავიანთი საქონლითა და ავეჯით აყრილიყვნენ და მთებში გახიზნულიყვნენ. მერე იქიდან ხშირად ჩამოვიდოდნენ და, ადგილობრივი ჩვეულებისამებრ, ჩასაფრებულნი სროლას აუტყენდნენ და ამ გზით სწრაფად დაამარცხებდნენ თურქებს. ამ საქმეში მეგრელებს ხელს უწყობდა ის გარემოება, რომ მათი ქვეყანა გაუვალი ტყითა და ქაობით არის მოცული.

მეორე პოლიტიკური ხერხი, რომელსაც დადიანი თურქე-

თის მიმართ ხმარობს, ეს არის: იგი ცდილობს მტკიცედ დააბრუნოს თურქები, რომ სამეგრელოზე უფრო ღარიბი და უბედური ქვეყანა დედამიწაზე მეორე არ მოიძებნება. ამისთვის, როცა თურქეთიდან ელჩები გამოჩნდებიან, დადიანი სამღვარზე თავის კაცებს დაასვედრებს, რომელთაც ერთხელ და სამუდამოდ ნაბრძანები აქვთ, გვერდი აუქციონ კარგს პირდაპირ გზებს, და გამოატარონ ციცაბო კლდეებზე ლაფიან გზებზე, უსიერ ტყეებზე და ჭაობებზე; მდინარეებზე გადასვლისას ერთხელ უფრო ღრმა ფონი, ღამით დაეძინავენინათ რომელიმე ულატაკესი გლეხის ფაცხაში, სადაც ლოგინად დაეგოთ მსოლოდ თივა და საჭმელად მიეცათ მსოლოდ ყველი და მწვანილი.

ელჩები ფიქრობდნენ, შთაგრის სასახლეში რომ მივალთ, იქ მაინც მოგვასვენებენ რიგიანადო. მაგრამ შთავარი აქაც ასირებულად დახვდებოდათ: სის ქვეშ, ძველს დაქვეილ ხალიჩაზე მჯდარი და ღარიბულად ჩაცმული ვეგებებოდა ელჩებს. გარშემო მრავალი მსლებელი ჰყავდა, მაგრამ ყველანი გლახაკად ჩაცმულნი. ელჩებს რომ მიიღებდა და სულთანის უსტარს მოისმენდა, მერე მათ მოსასვენებლად მიუჩენდა უფრო ხშირად ერთ ფიცრულ სახლს, თითქმის კარებმოგლეჯილს და სახურავგადახდილს, რომელშიც კაცი ერთ კუნჭულსაც ვერ მოიძებნიდა, წვიმის დროს რომ თავი შეეფარებინა. საჭმელად ყოველდღე მიაართმევდნენ თხის ხორცს, რაც შეიძლება უვარგისს. პური საზოგადოდ ცოტაა ამ ქვეყანაში და ელჩებსაც ისე გამოზოგვით მიაართმევდნენ ხოლმე, რომ ისინი შიმშილსაც ვერ იკლავდნენ. რაც შეეხება ღვინოს, — თუმცა ელჩებს დიდი სურვილი ჰქონდათ თავისი სჯული დაევიწყნათ და ყურძნის წვენი დაეღიათ, მაგრამ ისეთს საძაგელს ღვინოს მიაართმევდნენ ხოლმე, რომ ძალაუნებურად თავისი ადამი მტკიცედ უნდა დაეცვათ და წყურვილი მართო წყლით დაეკმაყოფილებინათ.

აგრე შევიწროებულნი და გაჭირვებულნი იყვნენ დადიანის კარზე ელჩები. ამიტომ ისინი სწყველიდნენ იმ წამს, როდესაც მოვედით ამ დაწყველილსა და ჯოჯოხეთზე უარეს ქვეყანაში. ყველა ამ ღონისძიებას დადიანი ხმარობდა იმისათვის, რომ კონსტანტინოპოლში ცუდი აზრი ჰქონოდათ ამ ქვეყნის შესა-

ხებ და სონთქარს აზრადაც არ მოსვლოდა არც ხარკის მომატება და არც ამ ქვეყნის სრულად დაპყრობა.

სამძიმო საქმეში დადიანმა აჩქარება არ იცის. აი, მაგალითი: ერთი დიდი კაცი სამი წლის განმავლობაში ცდილობდა ხალხის აჯანყებას და თვით დადიანის მოკვლას. თუმცა დადიანმა იმ კაცის ბოროტგანზრახულობა კარგად იცოდა, მაინც იმას ცდილობდა, მოფერებით და წყალობით მოეგო მისი გული და არასოდეს არ უფიქრია მისი დასჯა, სანამდის არ დარწმუნდა, ამ კაცზე არაფერი სიკეთე არ გადისო და სულ უფრო და უფრო მიელტვის სისრულეში მოიყვანოს თავისი ბოროტი განაზრახიო, — მხოლოდ ამის შემდეგ შეიპყრა დადიანმა ის კაცი, ორივე თვალი ამოთხარა და მასთან ერთად თავიდან მისი სულელური აზრიც ამოჰკლიჯა.

დადიანმა სრულებით განაახლა ქვეყანა იმით, რომ მრავალი უცხო ხალხი მოიწვია, განსაკუთრებით სომხები და ებრაელები, რომლებიც ძალიან ეტანებიან ვაჭრობას. მათ აძლეოდა ცხენებსა და ფულს და გზავნიდა ერანსა და თურქეთში, რათა იმ ქვეყნებიდან მოეტანათ ოდიშს მრავალი სავაჭრო საქონელი, რომელთა სახელი მანამდე მეგრელებმა არც კი იცოდნენ. ვაჭრობაში მეგრელებმა ფულის ხმარება სრულიად არ იცოდნენ და თავიანთ ნაწარმს მხოლოდ ერთმანეთზე ცვლიდნენ პირდაპირ. ახლა კი მთავარს გაწყობილი აქვს ზარაფხანა, სადაც ყოველ წელიწადს სჭრიან რამდენიმე ათას მანეთს, თავის სამთავროში ხალხის გამრავლებისათვის დადიანი დიდის წყალობით იზიდავს უცხოელებს, განსაკუთრებით ხელოსნებს. მოსული რომ უკან არ გაბრუნდეს, მთავარი აძლევს სახლს, მიწა-წყალსა და ყოველივეს, რაც კი შეეფერება მოსულის წოდებასა და მდგომარეობას“.

„ნადირობის გიჟია დადიანი. იგი ისე ბევრს ხარჯავს მწევარ-მეძებრებზე, ქორ-მიმინოებზე და ბაზიერებზე, რომ არა მგონია მოიძებნოს სხვა მთავარი, რომელმაც გადააქარბოს მას ამ ხარჯში. ყველა ამაების სარჩენლად მიჩენილია კარგი ძალი სოფლები, რომელთაც ევალებათ თავის დროზე მიაწოდონ ბაზიერებს რიგიანი საკმელი, ქორ-მიმინოებს — ქათმები და ძაღლებს — ღორები, თხები და ღომი“.

„ღვთის მსახურებისა და ეკლესიის საქმეებში გამოიჩინა თავი დადიანმა. ახლა ოდიშში არ მოიძებნება არც ერთი ეკლესია, სადაც მისი ღვთისმოყვარეობის ნიშანი არ მოიპოვებოდეს; რომელი ეკლესიაც დანგრეული იყო, ხელახლა ააშენა; რომელსაც სახურავი არ ჰქონდა, იმას სახურავი გადაჰხურა; რომელსაც ჩუქურთმები შემოსცლოდა, ხელახლა მოაჩუქურთმა და გაამშვენიერა. ამასთანავე ეკლესიას ფრიად შეჰმატა შემოსავალი. უთვალავი ოქრო-ვერცხლის ხატი გააკეთებინა და თვალ-მარგალიტით შეამკობინა. ათი წლის მანძილზე ოცზე მეტი ოქრომჭედელი ჰყავდა, რომლებიც განუწყვეტლივ აკეთებდნენ საეკლესიო ნივთებსა და ჭურჭლეულს.

მათ შორის უნდა მოვიხსენიოთ: ძვირფასი ქვებით შემკული ფილა, რომელიც, როგორც ამბობენ, თორმეტი ათასი სკუდო ჰლირსო; ღვთისმშობლის ხატი, ბაჯალლო ოქროსაგან გაკეთებული და ძვირფასის ქვებითვე შემკული — ხუთი ათას ოქროდ ღირებული, და მრავალი ამისთანა ნივთი, რომელიც დადიანმა თავის სამთავროს ყველა ეკლესიას დაურიგა.

ასეთია ეს დიდსულოვანი და კეთილშობილი მთავარი“...

ლევან დადიანი სასტიკად სდევნიდა ეკლესიის მძარცველებსა და შემგინებლებს.

ერთხელ მან, მალაქია კათოლიკოსის დასტურით, ჩამოახრჩო ხონის ეკლესიის ჭურდები, საქრისტიანო ნივთების მძარცველნი, წმინდა ალაგთა პირუტყვეულად შემბილწველნი, ძმები გაბუნები: კაცია, მამია, ჯაშუშა და მწყაზარია.

თეიმურაზი და როსტომი

მეფე — „ხიზინანი და ილათიანი“

მაშ, ქართლის ტახტზე ზის როსტომ მეფე (1682-1688 წწ.)
 ზის და განაგებს ქართლს „ქართულად“:
 ქართული ენით და სიტყვიერებით,
 ქართული წესით და ადათით,
 ქართული მიწათსაკუთრებით და მიწათმეურნეობით,
 ქართული ხელოსნობით და ხელოვნებით,
 ქართული სულთ და ქართული გულით.

საქართველოს „სრული გათათრების“ განაზრახი აღეკვეთა სპარსეთის მესვეურებს. მათ „საკმარისად“ უნდა მიეჩნიათ ყოველწლიური ხარკის აკრეფა, „მისართმეველის“ მირთმევა და ჭარის გაყვანა საქართველოდან.

მაგრამ საქმე ისედაც არ უნდა წარმოვიდგინოთ, რომ როსტომ-ხასმა სპარსელობას პირწმინდად უღალატა და „ბავშვობისდროინდელ“ ქართველობას სულხორციანად დაუბრუნდა.

არა! იგი ქართულისა და სპარსულის „ნებაყოფლობით შერიგებასა“ და „შერწყმას“ ცდილობდა.

რა ვუყოთ, რომ როსტომ მეფე ტფილისში სახელმწიფო საქმეებს ქართულ ენაზე აწარმოებდა (ის კი არა და, — აკი თვით შაჰ აბასიც ძალიან ხშირად სპარსეთის სატახტოშიც ქართულად ლაპარაკობდა).

როსტომი თავის თავს „მეფეთ მეფესა და პატრონს“ ეძახის, ერანის შაჰიც „ჩემს ძმასა“ და „ჩემს მამას“ უწოდებს, მაგრამ ქართველებმა იციან, რომ როსტომს ოფიციალურ სპარსულ ფირმანებში მაინც სპარსელი მოხელე — „ვალა“, გინა „ხანი“ ჰქვია.

მაინცდამაინც როსტომის მმართველობით „ახალი ერა“

დადგა საქართველოს მატრიანეში. მისი მოსვლიდან მთელი 112 წლის სიგრძეზე (1632-1744 წწ.) ქართლის გამგებელნი მხოლოდ სპარსელი მოხელენი — „ხანები“, „ვალები“ და „ჯანიშინები“ იყვნენ, — მართალია, ქართველები, მაგრამ მაინც სპარსეთის კარზე სპარსულად აღზრდილნი, გამაჰმადიანებულნი და „გარდასახულნი“.

საუკუნეზე უგრძესი დრო-ქაში წარიმართა, ვითარცა უდიდესი გამოცდა ქართული კულტურის გამძლეობისა, ცხოველმყოფელობისა და უკვდავებისა, როსტომ-ხანისა და მისი მომდევნო „გურჯიხანების“ მმართველობისდროინდელი ქართულ და სპარსულ კულტურათა „შერწყმის პოლიტიკა“ ისევ და ისევ „ქართულ სისტემათა“ გამარჯვებით გათავდა. ქართულმა კულტურამ, ბუნებრივია, მაღალი ერანული სულიერი და ნივთიერი მემკვიდრეობიდან ბევრი რამ შეითვისა და გაითავისა, მაგრამ თავის მხრივაც მრავლად „ჩაასესხა“ და „ჩაასისხლნორცა“ სპარსულს ქართულმა.

შეწყდა სპარსულ-თათრული შემოსევები საქართველოში. ქართველ კაცს საშუალება ეძლეოდა მშვიდობიან ცხოვრებას დაბრუნებოდა.

როსტომ მეფეზე მაინც დაბეჯითებით ამბობდნენ: იგი, — ვითარცა ქართლის მეფე, ერანის ყულარაღასი და ისფაჰანის ტარულა — „განუყოფლად“ განაგებს ქართლსაც და სპარსეთსაცო.

ქართლში ქართული თანამდებობანი უკლებლივ და უცვლელად დატოვა, მაგრამ მათ გვერდით სპარსულიც შემოიღო და ზედ სპარსეთიდან ჩამოყვანილი გათათრებული ქართველები ჩამოარია.

ოღონდ კი მისი ერთგულნი ყოფილიყვნენ და ყველას ერთნაირი სიუხვით სცემდა პატივს — დამხვედრ „სჯულიერ ქართველსაც“ და მომსვლელ „გადარჯულებულ გურჯსაც“.

თეიმურაზის მომხრეობით „სახელგატეხილი“ თავადები მაინც დაამდაბლა და უპოვარპყო როსტომმა. სამაგიეროდ ერთგულნი გაამდიდრა და აღაზევა უზომოდ. ჩამოსვლისთანავე, თეიმურაზთან ერთად იმერეთს გადახვეწილი იოთამ ამაღალბორი „კანონგარეშედ“ გამოაცხადა და სამაგიეროდ ზემო ქართლის სადროშოს მეთაურობა სპარსეთიდან ჩამოყოლილ

ბეჟან ამილახორს უბოძა. ასევე საბარათიანოში ჰასან-ბეგ ბარათაშვილს დაუბრუნა გიორგი სააკაძისგან წართმეული მამულები.

ქართული ცხოვრების გარეგნულსა და შინაგან სახეს ხელს არ ახლებდა, მაგრამ თვითონ სპარსეთიდან თანმოყოლილ „გურჯებთან“ ერთად სპარსეთში გაჩვეული წესითა და აღაითით ცხოვრობდა.

ქართველთაგან ბევრი ისევ ინარჩუნებდა ძველ ქართულ ღირსებებს: „იყვნენ მხნენი, რჯულ-მტკიცენი, წრფელნი, ვერცხლის უყვარულნი“.

მაგრამ როსტომის მხლებელ თათართაგან და გათათრებულ ქართველთაგან „შეერიათ ქართველთა განცხრომა, სმა-ჰამა ყიზილბაშური, სიძვა, მრუშება, ტყუილი, ხორცთა-განსვენება, აბანო, კეკლუცობა უგვანი, მეჩანგე მგოსანი“.

„და მას ეამსა იწყო ქართლის წესმან და რიგმან გარდაცვალება, და ყოველთავე შეიყვარეს ანგარება და სიმდიდრის-მოყვარეობა. ჯამაგირი და სოფლის მიცემა ყაენისაგან, და განმრავლდა ტანთ-ცმა ყიზილბაშურად, და საქართველოს დიდებულნი და თავადნი ყაენისაგან გამდიდრდებოდნენ და რაყმით იშოვნინდნენ მამულებსა“..

ბევრი ქართველი—საეროც და სასულიეროც—აჰყვა ცდუნებას: ქონებას ეხარბებოდნენ, ქრთამს ღებულობდნენ, მოფენილზე ფეხმორთხმულნი უზომოდ ჰამდნენ და სვამდნენ, ცრუობდნენ, მრუშობდნენ, მთელი დღეები აბანოს ორთქლში ჩანთქმულნი ბაიათებს ჰკიოდნენ, თეძობის მრუში მიმოტანით როკავდნენ.

„განმრავლდა სიძვა და არა-წმინდება, ცოდვა იგი სოდომ-გომორული და მეძავეობა და დედათა თანა აღრევა“.

ბევრ ქართველს რვალის მკლავი დაუცომდა, მუცელი დაუზორზოხდა და თეძო დაუდებლდა.

როსტომ მეფე დანგრეულ ქრისტიანულ ეკლესიებს აღადგენდა, ახლებს აშენებდა, შესაწირავებით ამდიდრებდა, წირვალოცვას ესწრებოდა და თვითონაც, სპარსელთაგან შეფარვით, ქრისტიანულად ლოცულობდა. ქრისტიან მოწესეებს ჯამაგირს უნიშნავდა, „თავმდაბლად და ტკბილად ექცეოდა“. მარტო ის

რად ჰღირს, რომ მან „აღაშენა წმინდა კათოლიკე ეკლესია, მცხეთის გუმბათი და სხვანაცა...“.

მაგრამ როსტომმა ისნის ქართული, მამაპაპური ციხე და სასახლე მიატოვა და საცხოვრებლად სიონ-ანჩისხატს შორის დასახლდა, მტკვრის პირას. აქ „აღაშენა სახლი ყიზილბაშური ეკლესიად და ტურფად ნაგები“. მდინარის გაღმა-გამოღმა ციხეებიც ააგო, ბაღებიც და მეჩეთებიც; მეტეხისა და ნარიყალას ციხეებს ახალი ზღუდეები შემოაგლო და შიგ ყიზილბაშური ციხიონები ჩაასაგრა.

როსტომ მეფემ ფულის ყადრი იცოდა და ვაჭარ-ხელოსნობას ძალიან აქეზებდა და მფარველობდა. გამორჩევით ტფილისელ და გორელ სომხებს ეხმარებოდა, ემზრუნველებოდა და ემეგობრებოდა. სომეხთა კათალიკოსი როსტომს სომეხთა მოამაგესა და მეგობარს უწოდებდა. საჭირო შემთხვევაში როსტომ მეფე მისებრ „ხერხიან და ილათიან სომხებს“ გაურჩებული ქართველი თავადების წინააღმდეგაც კარგად იყენებდა...

შენდებოდა და მრავლდებოდა ქართული სოფელი. როსტომ მეფის დროს ქვემო ქართლში ყ ა ფ ლ ა ნ ბ ა რ ა თ ა შ ვ ი ლ მ ა 61 დაცარიელებული სოფელი აღადგინა და დაასახლა. ასევე მცხეთის სახლთუხუცესმა პ ა პ უ ა მ ა დ ა ლ ა ძ ე მ ქართლსა და კახეთში 12 გაუკაცრიელებელი სოფელი ააღორძინა.

როსტომ მეფეს გაჰყავდა გზები, წყალსადენები, სარწყავი არხები, აგებდა ხიდებს, წისქვილებს, სავაჭრო ქარვასლებს, საფოსტო და სამიმოსვლო სადგურებსა და სასტუმროებს.

ყველაზე დიდი, გუმბათიანი ხიდი მდინარე ხრამზე ააგო, განჯისკენ მიმავალ გზაზე. ხიდთან საგანგებოდ სოფელი დაასახლა და საფოსტო სადგური — „ქარავან-სარაიც“ ააგო, „რათა მგზავრი არ გაისარჯოს, სადგომი და საკმელი მზად დახედესო“.

აქედან (1652 წლიდან) იწყებს „თავის ისტორიას“ სახელგანთქმული „გატეხილი ხიდი“.

სპარსეთიდან ჩამოსულ როსტომ მეფეს არც ცოლი ჰყავდა და არც შვილი.

67 წლის კი იყო.

და ეგზომ ასაკმორეულმა კაცმა ჩამოსვლისთანავე, 1633 წელს, ცოლად შეირთო ახალგაზრდა ქალი — ქეთევანი, გორჯასპი აბაშიშვილის ასული. ქრისტიანული სახელი გამოუცვალა — ქეთევანის ნაცვლად გულ-დუხტარი დაარქვა.

მაგრამ რაღა სახელის გადარქმევა და „გადანათვლა“, როცა ქალმა დედოფლად ერთი თვეც ვერ მოათია, ისე გარდაიცვალა მოულოდნელად.

გამწარდა როსტომი, ესოდენ გვიან გახსენებულზე რომ უმუხტლა ბედმა. უსათუოდ, ტახტის მემკვიდრე სჭირდებოდა და ძალიანაც ეჩქარებოდა, რათა დროზე წამოსწეოდა მომავალი სისხლიერი შემცვლელი ესოდენ სანატრელი ქართული მეფობისა.

საგანგებო თათბირიც შეჰყარა ხელმეორე ქორწინების გასარიგებლად.

ერთხმად დაუსახელეს მარიამი — ასული მანუჩარ დადიანისა და ათაბაგის ქალისა, დაი სახელოვანი ლევან დადიანისა, ცოლყოფილი ლევანისგან თვალდათხრილი სვიმონ გურიელისა.

როსტომ მეფეს მანამდეც შეეტყო მარიამის სილამაზისა და სიმშვენიერის ამბავი.

„შავის ზღვიდან ამოსული მზე არის დადიანის ქალი!“ — ეს მერამდენედ უთხრეს მეფეს.

ქალი რომ მზეს ჰგავს, ამას რაღა სჯობს, მაგრამ კიდევ „სხვა რამ ანდამატი“ ახლავს როსტომისა და მარიამის მომავალ ქორწინებას. ეს არის ქართლის მეფის კავშირი დასავლეთ საქართველოს ყველაზე ძლიერ საჭეთმპყრობელთან — ლევან დადიანთან. ოდიშის მთავარი და იმერეთის მეფე დანასისხლად გადამტერებიან ერთმანეთს. თანაც, როსტომ მეფის მეტოქე თეიმურაზ კახთა მეფე სწორედ ქუთათისის სასახლეს აფარებს თავს. დიახ, იმერეთის მეფე გიორგი მესამე და თეიმურაზ კახ-

თა მეფე როსტომის მტრები არიან ისე გამოდის, ლევან დადიანსა და როსტომ ქართლის გაქცებულს საერთო მტრები ჰყვანან — გიორგი და თეიმურაზი. პოდა, რაკი გიორგი და თეიმურაზი გაერთიანებულან, უბრალოდ მისახვედრი განასაჯია, მათი აქამდე „ცალკეული მტრებიც“ — ლევანი და როსტომაც უნდა გაერთიანდნენ.

და მით უკეთესი, თუ მომავალი მოკავშირეების დამოყვრების შესაძლებლობაც არსებობს!

ასეთი „შესაძლებლობა“ გახლავთ სწორედ მარიამი, „მშესავეით ქალი“.

სწორედ მარიამისა და როსტომის „პოლიტიკურ სარეცელზე“ უნდა გადაწყდეს საქართველოს მომავალი ბედ-იღბალი...

როსტომმა სამეგრელოში ტფილელი ეპისკოპოსი გაგზავნა შუამავლად.

ზუგდიდის კარზე დიდის სიხარულითა და პატივისცემით მიიღეს საქართველოს სატახტოს მღვდელთმთავარი, სასიძოს თხოვნაც „ნამეტნავად იამათ“, მაგრამ...

მაგრამ თვითონ მარიამმა თქვა უარი მაჰმადიან მეფესთან ქორწინებაზე.

დიდხანს არწმუნეს ქალი: როსტომ მეფე მხოლოდ „გარეგნულად“ არის მაჰმადიანი, მარიამი მაინც მტკიცედ იდგა უარზე.

გერც ავგულა ძმის — ლევან დადიანის — მუქარამ შეაკრთო ქალი, ბოლოს, როგორც იქნა, მაინც ქართლისა და სამეგრელოს მღვდელთმთავრებმა დაარწმუნეს მარიამი, როსტომ მეფე „შინაგანადაც“ რომ ქრისტიანი არ იყოს, ყოველივე ქრისტიანისათვის წმიდათაწმიდა მოვალეობა გიკარნახებს, შენ თვითონ მოაქციო ქრისტიანად შენი გვირგვინოსანი მეუღლეო.

მარიამი დათანხმდა და როსტომ მეფისაგან გამოგზავნილი „ნიშანიც მიირთმის“.

პაემანი დანიშნა დადიანმა — საჩხეიძეო, კაკას ხიდი, ბაღდადთან ახლოს. აქ უნდა შეხვედროდნენ ერთმანეთს სასიძო და სადედოფლო. დათქმული იყო ისიც, რომ ქართლის მეფე და დადიანი „ყოველი შემთხვევისათვის“ დიდი საომარი ძალებით მოსულიყვნენ კაკას ხიდზე.

როსტომმა წინასწარ მოციქული აფრინა სპარსეთში და შაჰს დადიანთან დამოყვრების ამბავი შეატყობინა. შაჰ სეფიმ ძალიან მოიწონა „ძმისა და მამის“ განაზრახი.

თვითონ ერანსაც არ აწყენდა დადიანთან კავშირი, მიმართული ისევ „საერთო მტრის“ — ოსმალეთის წინააღმდეგ. ამიტომ შაჰმა დიდძალი „საქორწინო საჩუქრები“ გამოუგზავნა როსტომსაც და ლევან დადიანსაც, შირვანის ბეგლარბეგის ფარუ-ხანის ხელით.

კაკას ხიდზე, ხანისწყლის ხეობაში, პირველი მივიდა სადედოფლო მარიამი და მისი ძმა ლევან დადიანი „მხედრული მაყრიონით“.

როსტომ მეფეც გზას ადგა დიდის ლაშქრით.

თურქეთში უკვე ხმა დარბხელიყო: „ხოსრო-მირზა, დადიანისა და გურიელის დახმარებით, 30 000 ყიზილბაშით აპირებს შავი ზღვის ნაპირზე გაჭრას. გონიისა და ტირებულუს მიმართულებით“.

როგორც ეტყობა, თურქეთში მაშინ ძალიან მცდარი ცნობები ჰქონიათ საქართველოში შინაურ ძალთა დაჯგუფების თაობაზე. როსტომი კი მართლა მიემართებოდა დიდი მხედრობით დასავლეთისაკენ, მაგრამ არა შავ ზღვაზე „გასაჭრელად“.

სურამს რომ მივიდნენ, როსტომ მეფეს გზიდან დათუნა (დავით) არაგვის ერისთავი გაეპარა თავისი ჯარით. თურმე დათუნას ვილაცამ ყური გაუხედნა: როსტომ მეფე შენს სისხლს დაღვრის იმის სამაგიეროდ, შენმა ძმამ ზურაბ ერისთავმა რომ როსტომის ძმისწული სვიმონ-ხანი მოჰკლაო. დათუნა ერისთავის „საქმე“ ქორწილის შემდგომისთვის გადასდო მეფემ.

სურამში როსტომს ესეც შეატყობინეს: იმერლებს იმერეთში გადასასვლელი გზები ჩაუკეტიათო.

მაშინ მეფემ ბორჯომის, სამცხისა და ზეკარ-ფერსათის გზებით გადაწყვიტა იმერეთში გადასვლა. სამცხის მიმართველი საფარ ფაშა (ბექა ათაბაგი) მომკვდარიყო და ნაცვლად მისი შვილი დაესვათ თურქებს უსუფ ფაშას სახელით. სწორედ უსუფ ფაშას სთხოვა გზა სამცხეზე როსტომმა. იმანაც „სიხარულით მოსცა“ გზა.

მაგრამ სანამ როსტომ მეფე ეგზომ გრძელ გზებს დასძლევდა, მანამ ბაღდადის ახლოს უკვე მომხდარიყო მოსახდენი.

იმერეთის მეფე გიორგი, მისი შვილები — ალექსანდრე და მამუკა — და თეიმურაზ კახთა ჩეფე ქუთათისიდან ლაშქარი წამოსულან და დადიანის განადგურება მანამ განუზრახავთ, სანამ ქართლიდან როსტომ მეფე გადმოსაწრებდა.

საერთო სამხედრო განაზრახი დიხაც სწორად მოუსაზრებიათ იმერეთის სასახლის კარზე, მაგრამ მისი საქმიანი განხორციელება უაღრესად უხეიროდ ჩაუტარებიათ.

იმერელთა ლაშქარი ბაღდადთან დაბანაკდა. თვითონ გიორგი მეფე ჯორზე შეჯდა და მცირე რაზმით ხანისწყალს აუყვა, მტრის დასაზვერავად. იმერელთა ბანაკში მოლალატეები აღმოჩნდნენ. მათ ლევან დადიანს შეატყობინეს მეფის სამოძრაო გზები.

ერთბაშად გამოიჭრნენ ოდიშარნი. გიორგი მეფეს დაეცნენ, ჯორიდან გადმოაგდეს და ხელ-ფეხი შეუბოჭეს. მისი მხლებლებიც ქუცებივით გამოიჭირეს. მერე იმერთა მთავარ ბანაკს დაესხა ლევან დადიანი. იმერლები დამარცხდნენ და გაიფანტნენ. გაქცევით უშველეს თავს თეიმურაზმა, ალექსანდრემ და მამუკამ. ბევრი იმერელი და თეიმურაზის მხლებელი კახი ხელთ ჩაუვარდათ გამარჯვებულ მეგრელებს. დიდი ალაფიც დაილაფეს. მათ შორის აღმოჩნდა „კახეთის დროშის თავი, ბროლის ჯვარი და იმ დროშის ბუდე ოქროქსოვილი“. ეს ძვირფასი სანადავლო ნაწილები შემდგომში ილორის წმინდა გიორგის ეკლესიას შესწირა ლევან დადიანმა.

როსტომ მეფემაც მოატანა ჯარით და ამალით.

დიდი ზარზეიმით შეხვდნენ ერთმანეთს მოყვარენი და მოკავშირენი.

ერთმანეთს ეჯიბრებოდნენ სიუხვეში, სიქველეში და ბრწყინვალეობაში.

აქვე შაჰ სეფის მოციქულმა, შირვანის ბეგლარბეგმა ფარუხანმა, ლევან დადიანს გადასცა ერანის ხელმწიფისაგან გამოგზავნილი 50000 მარჩილი. ეს მხოლოდ საქორწინო საჩუქარი იყო; მაგრამ მთავარი ის ვახლდათ, რომ სპარსეთის შაჰი სამეგრელოს მთავარს ყოველწლიურ ჯამაგირად უნიშნავდა 1000 თუმანს. გასაგები იყო ლევან დადიანისათვის, რასაც ნიშნავდა ურანელი დიდხელმწიფის ასეთი წყალობა. სამეგრელოს მთავრო მარტო ქართლის კი არა — ერანის „ხელდე-

ბულ მოკავშირედაც“ ცხადდებოდა. ასედაც „გაიგებს“ ლევან დადიანი, როცა იგი სამაგიერო ელჩს გაგზავნის ისფაჰაჰს...

ერთი დღე-ღამე საქორწინო ზარზე იმი აზანზარებდა ხანისწყლის ხეობას.

ხარის ბლავილით არავის უბღავლია იქვე მახლობლად მიძმეთა სისხლით დამბალ მიწაზე.

როსტომ მეფემ წამოიყვანა მარიამი — „მზისფერი ქალი“.

მარიამს თან მოსდევდა პატარა ოტია — ძე სვიმონ გურიელისაგან.

როსტომ მეფისა და მარიამ დედოფლის გვირგვინის ფსკვნა წმინდა ქართულ-ქრისტიანული წესითა და რიგით ჩაატარეს ქართველმა მღვდლებმა. როსტომს ეკლესიაში თავი დაბანეს და ამზარად „თათრობიდან განწმენდილი“ ქრისტიანად „მოაქციეს“. მხოლოდ ამის შემდგომ ინება მარიამმა „პოლიტიკურ საქმროსთან“ ჯვარის დაწერა.

ამის შემდგომ როსტომ მეფე მაჰმადიანობდა მაჰმადიანებთან, ქრისტიანობდა ქრისტიანებთან, ხოლო ნამდვილი, „ქეშმარიტი სიწმინდობით“ სწამდა თვითონ მარიამ დედოფალი, სათნოებით და სიმშვენიერით აღსაევსე „მზისფერი ქალი“ — ქალი ყოვლითურთ შემკულა კეთილითა, რომლისა მსგავსა თამარ მეფისა შემდგომად აღარავინ გამოჩენილა“.

ლევან დადიანი მტრის თვალების დათხრაზე დახარბებული კაცი იყო. მაგრამ გიორგი იმერთა მეფე მაინც გადაურჩა თვალთა სინათლის დაკარგვას. ორი წლის ტყვეობის შემდგომ ლევან დადიანმა ალექსანდრე ბატონიშვილს (რომელიც ქუთათისში უკვე მეფედ ეკურთხებინათ) დიდძალი გამოსასყიდი გამოართვა — „მურასა გვირგვინი, მრავალი ოქროსა და ვერცხლის ჭურჭელი, თვალმარგალიტი, მურასა იარაღი და ნაპირის ალაგნი ჭილაძენი და მიქელაძენი და რაც ჩხარში ვაჭარნი ესახლნენ სომხები და ჩიხორის ურიანი“ — და გამოუშვა ტყვეობიდან გიორგი მეფე.

გიორგი მეფის გამოსახსნელ „სახსრად“ მიღებული სომხები და ებრაელები ლევან დადიანმა დაასახლა რუხში, რომელიც მალე შეიქნა ვაჭრობის, აღებ-მიცემობისა და ფულის ტრიალის შუაგულად ოდიშის სამთავროში.

ხოლო იმერეთიდან წამოსული მეფე-დედოფალი, მათი ამა, ლა და დადიანისაგან გამოტანებული მაყრიონი შოვიდნენ გორს.

აქ დედოფალმა მარიამმა კათოლიკეთა ეკლესიაში მისვლა მოისურვა.

კათოლიკურ მისიონში ქართველთა დედოფლის საზეიმო მიღება როსტომ მეფემ დანიშნა საღამოს ხუთი საათისათვის, როცა ყიზილბაშური ჯარები ჩვეულებრივ, „შიშიანობის გამო“, ყაზარმებში უნდა ჩაკეტილიყვნენ.

დიდის ამბით შეხვდნენ კათოლიკენი ქართლის დედოფალს მარიამმაც დიდძალი საბოძვარით აავსო „ევროპული სახლი“ ქრისტესი, მსურვალედ ილოცა, მისიონერთა წირვა-ლოცვაც გულისყურით მოისმინა და ერთხელ კიდევ დარწმუნდა: ქართველებისა და კათოლიკე ევროპელების ქრისტიანობა ერთნაირია და განსხვავება მხოლოდ ის არის, რომ კათოლიკენი უფრო სცემენ პატივს ქრისტიანობას, ვიდრე ქართველები...

სტუმრებმა და მასპინძლებმა კიდევ ექვსი თვე იჭიფეს და ილბინეს. „ხან მეფესთან იყვნენ, ხან თავადნი დაპატიებდნენ“. ანგარიში აღარ ჰქონდა საქორწინო ფეშქაშსა და მისართმეველს. ნახევარწლიანი ღრეობის შემდეგ დედოფლის მაყრიონის უფროსმა — მალაქია გურიელმა როსტომ მეფეს დასავლეთ საქართველოში დაბრუნების თხოვნა „შეჰბედა“. როსტომმა ახალი საბოძვარი გასცა სტუმრებისათვის — „ყველას თავისი შესაფერისი ცხენა, იარაღი, მოფენილობა და შესამოსელი, კარგები, ოქროსა და ვერცხლის ჭურჭლეული, იარაღი, მურასა ხმალი და ხანჯლები, ჯიღები და ოქროს უნაგირი და ლაგმები, საღვინე თუნგები, ვერცხლისა და ოქროს თასები, ოქროთ მოჭედილი კულა, ძაბრი და ჰაზარფეშა, ნაქსოვები ფრანგული, ურუმული და ყიზილბაშური, დიბები და სარტყლები, ოქროქსოვილის დოლბანდები, ქამარი და დაშნა, გურიელს ოქროსი და სხვებს ვერცხლისა, თორმეტი ყათარი ჯორი, ოცდაშვიდი ბედაური ცხენი მიართვეს და მეფე თვითონ

აღამდისინ თან გაპყვა და კოლბაურის გზით გაისტუმრეს, მეფე გორს შებრუნდა“.

სტუმრები რომ გაისტუმრა, არაგვის ერისთავი მოიკითხა როსტომ მეფემ. აკი დათუნა არაგვის ერისთავი გზიდან გაექცა იმერეთისკენ საქორწინოდ მომავალ მეფეს. ასეთი „გაქცევა“ აჯანყებად და ღალატად იყო შეფასებული. არც დათუნა აპირებდა ამის უარყოფას. ის კი არა და, სანამ როსტომ მეფე ნახევარწლიანი საქორწილო ნადიმ-ღრეობებით ერთობოდა, მანამ არაგვის ერისთავს თეიმურაზ მეფესთან ქუთათისში მოციქული გაუგზავნია, აღმოსავლეთში გადმოუბატონია და როსტომთან ერთიანი ძალით ბრძოლა შეუთავაზებია. თეიმურაზს ზურაბ ერისთავის სისხლი ედო, მისი ძმის სიტყვას არ ენდო და იმერეთიდან არ წამოვიდა.

ეს ყველაფერი უკვე იცოდა როსტომ მეფემ.

მან ლაშქარი შემოიყარა, მუხრანს მივიდა და იქიდან დუშეთს მოციქული გაგზავნა: ოღონდ მოდი და პატივის მეტს არაფერს მოგაგებო; ან შაჰთან წადი ერანშიო; მაინც ჩემთან მოსვლა გერჩივნოსო; ღვთის პირს გაძლევ, შეგირიგო და წყალობით აგავსო, უთვლიდა მეფე არაგვის ერისთავს.

მცირე ყოყმანის შემდგომ დათუნამ გადაწყვიტა: როგორი თათარიც არ უნდა იყოს, მაინც ქართველთან შერიგება სჯობია, ვიდრე სპარსეთის ბოროტ გზაზე დადგომაო, — და წამოვიდა მუხრანს.

მეფე მართლაც პატივით შეხვდა ერისთავს.

მაგრამ ერისთავი ბოლომდე მაინც არ ენდო, არ იქნა და ხმალ-ხანჯალი არ შემოიხსნა — არც დღით, არც ღამით, არც დარბაზობაზე, არც ნადიმობაზე.

სწორედ იმ დღეებში მსტოვრებმა თეიმურაზისაგან გამოგზავნილი წერილები ჩაიგდეს ჩკლში და არაგვის ერისთავის „თეიმურაზელობა“ საბოლოოდ გამეღავნდა.

როსტომის კარისკაცები ჯიქურ მიაღდგნენ და იარაღის აყრა მოსთხოვეს. იმან უარი სთქვა. ძალად დაუპირეს.

მაშინ გაიძრო ხმალი დათუნა ერისთავმა და დაერია მომხდურებს. რამდენიმე კიდევაც დააწვინა — მკვდარი თუ დაპრილ-დაკოდილი.

„წაუშინეთო!“ — დაიღრიალა როსტომ მეფემ.

ზურგიდან დააძგერეს ხმლები გაბაშვილმა და თურქისტანიშივილმა.

მკედარი დაეცა დათუნა ერისთავი.

მეფემ მოკლულს თავი მოჰკვეთა და შაჰ სეფის გაუგზავნა სპარსეთში: ეს კაცი იყო მაშფოთებელი ქვეყნისა და ამიტომ სიკვდილს შეეყარეო.

„ქართველის ხელით ქართველი ეგ ერთი და სხვა ათასი“, — სთქვა შაჰ აბასის შვილიშვილმა.

უერისთავოდ დარჩენილ საარაგვოს შეუხტა როსტომ მეფე, შეუხტა და ქვა ქვაზე აღარ დატოვა, ყველაფერი მიანგრამოანგრაია. „დუშეთი, ბაზალეთი, საშაბურო, არაგვისპირი და გარეშემო ამათი ყოველივე დაწვეს, დაარბივეს. მეფე რვას დღეს დუშეთს იდგა. საღამოთ გათენებამდისინ ყოველგნით მოხდომა და ბრძოლა იყო. რა გათენდის, კაცს ველარსად იპოებდიან, ვითაც ეშმაკნი დაიკარგვიდეს“ და ღამით ისევ გამოუხტებოდნენ არაგველები როსტომის მოხარ ლაშქარს.

ნუგზარ ერისთავს კიდევ დარჩენოდა ერთი შვილი (ბაადურის, ზურაბის, გიორგისა და დათუნას გარდა), ყველაზე უმცროსი — ზ ა ა ლ ი. და სწორედ იგი გამოაცხადეს არაგველებმა არაგვის ერისთავად.

ზაალ ერისთავმა თეიმურაზ მეფეს იმერეთში მალემსობოლნი უფრინა, მძევლებიც გაუგზავნა და „შეთუვალა ფიცი საშინელი“: ოღონდ გადმოდი, მხარში დაგიდგები, თავს შემოგწირავ და ქართლზე გაგაბატონებო.

ახლა კი ირწმუნა თეიმურაზმა საარაგვოს ახალი ერისთავის ფიცი. ლიხისა და კოლბაურის გზები შეკრული იყო და რაჭა-დვალეთის გზით წამოვიდა და ანანურს ჩამოვიდა. მასთან გაქცეული იოთამ ამილახორი და იასე ქსნის ერისთავიც ჩამოჰყვნენ. ზაალ ერისთავიც ანანურს მივიდა და მეფეს ეახლა. ჯარიც შემოიყარეს და ბაზალეთისაკენ წამოემართნენ.

როსტომ მეფეს მოახსენეს მისიანებმა: ბაზალეთი თეიმურაზს ფეხბედნიერად აქვს დაცდილიო, — აკი ბაზალეთთან დაამარცხა მან გიორგი სააკაძეო. ამიტომ სჯობია აქედან ავიყაროთ და გორს წავიდეთ, ან ტფილისში გავმაგრდეთო.

ასე „ღრმად უკუქცევა“ მარცხის აღიარებას ნიშნავდა, მაგრამ არ დაირცხვინა როსტომ მეფემ და უკუიქცა საარაგვოდან.

გამოედევნენ არაგველები. გორამდე სდიეს, ხან აქ დაეცნენ, ხან იქ, მოულოდნელი გაელვებით. ბევრი ყიზილბაში გაუწყვიტეს როსტომ მეფეს, „მრავალი ნაგნები უქნეს“. რამდენიმე დღე გორის გარშემო მიდიოდა ბრძოლები როსტომისა და თეიმურაზის ჯარებს შორის.

თეიმურაზი გორს მოეშვა და იკორთას გადავიდა. აქ ხელახლა მოუყვანეს ჯარი ზაალ ერისთავმა, იოთამ ამილახორმა, იასე ერისთავმა და ვახტანგ მუხრან-ბატონმა.

როსტომმაც ქვემო ქართლის ლაშქარი შემოიყარა და საომრად „გაუძახა“.

ბრძოლა მოხდა არცევს.

წაუშინეს ერთმანერთსა და შეიქნა ძგერება და ორგნითვე ძალძიცივით იბრძოლეს. ორგნითვე თავგამომეტებით ომი გარდაიხადეს“.

თეიმურაზი დამარცხდა და უკუიქცა.

როსტომმა საამილახვრო და სამუხრანო ჩაიარა, ყოველივე ნაცარტუტად აქცია და ტფილისს მივიდა.

ისევ „ჩუალჴუაჴვლელი“ თეიმურაზი

კახეთის მმართველი სალიმ-ხანი მოსაბრუნში (ყარაღაჯთან, ახლანდელი ლაგოდეხის რაიონში) იყო. აქ სასახლე აეშენებოდა აქედანვე განაგებდა „მოუბგენარი გურჯებით“ დასახლებულ კახეთს.

მოულოდნელად შემოიჭრა თეიმურაზი. ქორივით დაეცა მოსაბრუნს.

სალიმ-ხანმა ძლიეს გაასწრო „ფეხშიშველმან“. ხოლო მისი ყიზილბაშური ჯარი ერთიანად ამოსწყვიტეს კახელებმა.

იდგა 1634 წელი და კახეთი ისევ ეკუთვნოდა მეფე თეიმურაზ პირველს.

ისევ „იწყო კახეთიან შენობად და მოსახლეობად“.

თეიმურაზმა იცოდა, რომ ერანის შაჰი და როსტომ მეფე

კახეთის წართმევას ასე იოლად ვერ მოინდობდნენ. ამიტომ ისევ დაიწყო დიდი მოკავშირის ძებნა თეიმურაზმა.

ეს „დიდი მოკავშირე“ ისევ რუსეთი უნდა ყოფილიყო.

მაშ, ისევ გადაწყვიტა რუსეთის მარად მზობედ თეიმურაზმა „რუსეთის გზის შოვნა და ზურგის მობმა რუსეთის ხელმწიფისაგან და მუნითგან რუსის ჯარის მოსვლა“.

რუსეთისაკენ გზის „გასაპრელად“ თეიმურაზმა დიდოეთის დაპყრობა და იქაურ წარმართთა მოქრისტიანება მოინდომა. შეიჭრა კიდევ დიდოეთს და ზედიზედ „ადილო რომელიმე კოშკები და ალგები“. მაგრამ დიდოელებმა ლეკები წამოიშველეს და შეერთებულად დაუხვდნენ მეფეს. დაუხვდნენ და „დაუშინეს საგორავეები, ქვა და ისარი, და ამოსწყვიტეს მრავალი, და გამოაქციეს ბატონი თეიმურაზ, და, რომელნიცა აყვანდა გამოჩენილი ეპისკოპოზნი, დარბაისელები, ყოველივე მუნ ამოსწყვიტეს. და ჩამოვიდა კახეთს და იტერა: „ვაი ეპისკოპოზ-დარბაისელ-ამოსწყვეტილს!“.

მწარედ დამარცხდა, მაგრამ რუსეთის სამეფო კარს მაინც მიაწვდინა ხმა თეიმურაზმა. მისმა ელჩმა, არქიმანდრიტმა სიკიფორემ, 1635 წლის 23 თებერვლს რუსთა ციხე-ქალაქ თერგს მიაღწია, ხოლო კომდევნო წელს მოსკოვშიც ჩავიდა, თეიმურაზის წერილით ხელში.

ქართველი მეფე რუსთა ხელმწიფეს, მიხეილ რომანოვს, ერთხელ კიდევ ატყობინებდა საქართველოს გასაპირს. ატყობინებდა, რომ სამის მხრიდან ისევ განუწყვეტლივ ესხმიან თავს საქართველოს სპარსელები, ოსმალები და ლეკები, იქნებ როგორმე, ბოლოს და ბოლოს, მოეშველოს დიდი რუსეთი ჯარით და ფულით მის „მომძე საქრისტიანოს“; რაც შეიძლება, პასუხიც მალე მაცნობეო, ჩემი ელჩიც მალე დამიბრუნეო, რამეთუ მისი მანდ ყოფნა თქვენთვის არაფერი მაქნისია, მე კი დღენიადავ თქვენი პასუხის მოლოდინში ვიტანჯებით, მღელვარედ სწერდა თეიმურაზი.

თეიმურაზის ელჩს ლევან დადიანის ელჩმა მიუსწრო მოსკოვში.

და დაერივნენ ერთმანეთს ქართველთა დესპანები ამ „უცხო და სასურველ ქვეყანაში“...

თეიმურაზის ელჩი სამი წლის შემდეგ (1638 წ.) დაბრუნდა

საქართველოში, რუსი ელჩების — თავად თ. ვოლკონსკისა და დიაკ ა. ხვატოვის თანხლებით. ჩამოვიდნენ და ჩამოიტანეს საეკლესიო ნივთები, ჩამოიყვანეს მხატვრები და კარ-ფანჯრის ოსტატი დურგლები.

ხელახალი ბჭობა გაიმართა, ხანგრძლივი და დამქანცველი ერთი წლის თავზე ახალი ხელშეკრულება გაფორმდა. კახეთის მეფე რუსეთის ყმობაზე აწერდა ხელს, ოღონდ კი პატრონისაგან, ბოლოს და ბოლოს, ნამდვილი დახმარება მიეღო ლეკთა და სპარსელთა ასალაგმავად.

მაინც არაფერი გამოვიდა. მხოლოდ მცირეოდენი ფული (20 000 მარჩილი) გამოუგზავნა მიხეილ რომანოვმა თეიმურაზს; თან სპარსეთის შაჰთან შუამდგომლობასაც შეჰპირდა...

სანამ თეიმურაზი ჩრდილოეთს მომლოდინე თვალებით მიშტერებოდა, მანამ სამხრეთიდან ახალი დიდი საფრთხე დგებოდა ფეხზე.

როსტომ მეფემ შაჰ სეფის წერილი მიიღო: წელს ხონთკარი ლაშქრობას ვერ გვიბედავსო; ამიტომ აზერბაიჯანს ბრძანება გავგზავნე, იქაური ლაშქარნი სულ თქვენ გაახლონო; დაუტრიალდი მანდაურებს და, ვინც ურჩი და „თავგამზიდავი“ გეგულება, სუყველა დაუნდობლად „ამოიღეთო“.

მართლც მიიღო დიდძალი ჯარი როსტომ მეფემ აზერბაიჯანიდან. საქართველოში მდგარი ჯარებიც შეუერთა და უზარმაზარი მხედრობით დაიძრა ყველაზე დიდი „თავგამზიდავის“ — თეიმურაზის წინააღმდეგ.

გატყდა და წახდა თეიმურაზი.

მაშინვე წერილი დასწერა და მოციქულები აფრინა კახეთის გზაზე შემომდგარ როსტომ მეფესთან. სწერდა ქრისტიანა ნათესავი გაათათრებულ ნათესავს:

„ჯერ მე და თქვენ ვართ ნათესავები, მერე ჩემი მეუღლე ხორეშან დედოფალი არის თქვენი ბიძაშვილი; შვილი არც თქვენ გყავთ და მეც გვარის გამგრძელებელი ვაჟი ერთის მეტი აღარ შემომრჩენია; დიდი ლუარსაბის სისხლისგან თქვენს მეტი აღარავინ დარჩენილა; ლევან კახთა მეფის გვარ-ჯილაგისგანაც ჩემს მეტი აღარავინ არის ამქვეყნად და, მოდიოთ ნულარ ამოვხოცავთ ერთმანეთს, შევირგდეთ და დავეტიოთ ამ

ცოდვილ მიწაზე. კარგად მოგეხსენებათ, რამდენი უბედურება და უსამართლობა მჭირს ყიზილბაშთაგან. ახლაც, თუ რამე დამიშავებია, ისევ შიშით და სიფრთხილით მომსვლია. ამიტომ ნუ ინებებთ კიდევ სისხლის დაქცევას და შევრიგდეთ. თავადღებსაც, — რომლებიც ჩემთან არიან, ფიცით შემოგარიგებთ. შაჰ სეფი რომ ჩემს ასულს თინათინს მთხოვდა, ახლა იგი სრულწლოვანია და კიდევაც ვაახლებ ისტაჰანს. თქვენ ჩადექით შაჰსა და ჩემს შორის, შეგგარიგეთ, დაგვა მოყვრეთ, დაგვაყენონ და დაგვაყენეთ ამ ჩემს აოხრებულ სამკვიდრო მამულშიო“.

არავინ იცის, აუცრემლიანდა თუ არა ბებერი თვალი როსტომ მეფეს, მაგრამ გულით კი გულწრფელად ეამა თეიმურაზთან შერიგება და „უძლეველ კახელებთან“ სასისხლო საქმის უსისხლოდ გათავება.

მაშინვე შაჰ სეფის შეატყობინა როსტომმა ყოველივე.

შაჰიც ძალიან კმაყოფილი დარჩა და წერილიც სასწრაფოდ მოსწერა როსტომს: „თქვენი შერიგება გვეამაო, კარგი გიქნიათო და ბატონიშვილი თინათინი დიდის პატივით გამოისტუმრეთო“.

როსტომმა და თეიმურაზმა ხელი ხელს მისცეს და ბატონიშვილი თინათინი, კახელ თავადთა და როსტომის ვეზირის — ა დ ა მ ო ი ნ ა ს თანხლებით, ერანს გაგზავნეს.

შაჰ სეფიმ დიდის ზარზეიმით შერთო ცოლად თეიმურაზის ასული, „დიდნი პატიენი მიაპყრო და მრავალი ძვირფასი თვალმარგალიტი უბოძა“. შაჰმა უხვად დაასაჩუქრა თინათინის მხლებელი კახი წარჩინებულნი და როსტომის ვეზირი ალა მოინა. ხოლო სიმამრს, მეფე თეიმურაზს, „ათასი თუმანი თეთრი და ათასი თუმნის ხალათი გამოუგზავნა. თან მოსწერა: რაც აქამდე ცოდვა ჩაგიდენია და წყენა მოგიყენებია, ყველა შეგვინდვია; ოღონდ ამიერიდან შენ და როსტომი შერიგებულ იყვენით, ჩვენ ასე გვეამების და ჩვენის მხრედაც არც ერთს წყალობას არ მოგაკლებთო“.

ასეთივე წერილი როსტომ მეფესაც გამოუგზავნა შაჰ სეფიმ.

ეს ისევ დიდი გამარჯვება იყო, ჯერ — ამოწყვეტილი კახელი ხალხისა, მერე — მისი ჯანდაცლილი, მაგრამ მაინც ისევ

გაუტეხელი ხელმწიფისა: ერანმა ისევ სცნო კახეთის დამოუკიდებლობაც და მარად შეურიგებელი და მარად „რჯულშეუცვლელი“ თეიმურაზის „დამოუკიდებელი მეფობაც“.

ქართული შემთავლება და „თათრული ხუმრობა“

ღიახ; როსტომმაც სცნო თეიმურაზი კახეთის მეფედ და ერანის შაჰმაც „სცნო“, მაგრამ...

მაგრამ მალე გამოიჩინა, რომ თვითონ თეიმურაზ მეფე არ სცნობდა „არც გათათრებული ქართველისა“ და არც „საკუთრივ თათარი ხელმწიფის“ მბრძანებლობას საქართველოში.

1635 წელს, როცა „შერიგებისა“ და „ურთიერთცნობის“ ხმელი ფოთლით ანთებული ცეცხლი ჯერ კიდევ ცოდვილობდა, თეიმურაზმა როსტომ მეფის დამხობის „ხელსაყრელი დრო“ იგერწა.

ეს იყო სულთან მურად IV-ის ლაშქრობა დიდი თურქული მხედრობით ერანის წინააღმდეგ. მურადმა აიღო ერევანი, აზერბაიჯანი და ქურთისტანი.

მაშინვე თეიმურაზმა განაახლა ბრძოლა როსტომ მეფის წინააღმდეგ.

მაგრამ თურქეთის შემოტევამ არავითარი სარგებლობა არ მოუტანა თეიმურაზს. მალე შაჰ სეფიმ უკუაქცია მურად სულთანი და უკანვე დაიბრუნა აზერბაიჯანიც, ერევანიც და ქურთისტანიც.

ერანელთა შეტევის გასწვრივ, „როსტომ მეფემ საქართველოს ლაშქარი - გაუძახა და სამცხე და ჭავჭავეთი დაარბევინა. მრავალი ნაშოვარიც ჰქნეს. ეს ყაენს იამა და ორი ათასი თუმანი და ხალათი გაუგზავნა“ როსტომს ისფაჰანისკენ ძლევაშისილად მიმავალმა შაჰ სეფიმ.

ხოლო, თეიმურაზის ახალი „გამოხდომის“ ამბავი რომ შეიტყო, შაჰ სეფიმ მისი ასული თინათინი მოაშთობინა.

1639 წელს ერანსა და ოსმალეთს შორის ხანგრძლივი ზავი დაიდო. ქართლ-კახეთი, აზერბაიჯან-შირვანთან და ერევანთან ერთად ერანს „ერგო“, ხოლო დასავლეთ საქართველო და სამცხე-საათაბაგო — თურქეთს.

ამით თეიმურაზს „თურქეთის გზით“ რაიმე სასარგებლო დახმარების იმედი სავსებით მოესპო.

1642 წელს შაჰ სეფი მოკვდა და ერანის ტახტზე დაჯდა მისი ძე შაჰ აბას II (1642—1666 წწ.).

ამით საქართველოსთვის არაფერი შეცვლილა: როსტომ მეფე ისევ „ძმა და მამა“ იყო ახალი შაჰისა, ისევ სამივე „სახელო“ მის ხელში რჩებოდა — ქართლის „ვალი“, ერანის ყულარაღასი და ისფაჰანის ტარულა. ხოლო თეიმურაზ მეფე ისევ სპარსეთის დაუძინებელ მტრად დარჩა და დარჩა...

იმავე 1642 წელს ქართლის თავადებმა როსტომ მეფეს მიანიშნეს: შვილი არა გყავს და იმერელი ბატონი შვილი მამუკა გიორგის ძე იშვილეო.

მამუკა ბატონი შვილი მოხდენილი, „მამაცი, უხვი და უშურველი“ ჭაბუკი იყო. იგი ლევან დადიანს უნდოდა სიძედ, მაგრამ მამუკამ ჩხეიძის ქალი შეირთო ცოლად. ამის გამო ლევან დადიანი — ისედაც იმერეთის სამეფო სახლეულზე დაუძინებელ მტრად გადაკიდებული — საგანგებოდ შეუჩნდა მამუკას და მის მოყვარე ჩხეიძეებს. ბოლოს და ბოლოს, მამუკა და მისი ორი ცოლისძმა იმერეთიდან სულ გადაიხვეწნენ და სამცხეში გადავიდნენ.

და აი, ქართლის თავადები უთვლიან როსტომ მეფეს: საქართველო აქამდე იმიტომ არ წყნარდებოდა, რომ თქვენ არც შვილი გყავთ, არც ძმა და არც სხვა ახლო ნათესავნი და თქვენს ბოლოსა და გაგრძელებას ხალხი ვერა ჰხედავსო; სწორედ იმიტომ საქართველოში თქვენ ყველას დროებითი ჰკონიხართ, ასე წამდაუწამ იშლებიან და სხვა ბატონს ეძებენო; მამუკა ბატონი შვილის სიკეთე თქვენც მოგეხსენებათო, ბაგრატიონიც არის, მეფის შვილიც და თქვენი ნათესავიც; ჩამოაყვანილეთ ახალციხიდან, იშვილეთ და თქვენც მოისვენეთ, საქართველოც მოასვენეთ და ქვეყანაც დაწყნარდებო; თუ თქვენ და დედოფალ მარიამს ღმერთი ყრმა-შვილს მოგცემთ, მაშინ ის დაისვით ტახტის მემკვიდრედ, თუ არა და მამუკა გყავდეთ

შვილად; სანამ თქვენ იქნებით, იმას სურამი უბოძეთ საუფლისწულოდ; სურამი იმერეთს ებმის და იმერეთიდანაც ხელს მოიმართავსო; თქვენს შვილად აკურთხეთ, თქვენ ღმერთმან დიდხანს გაცოცხლოსთ, ხოლო თქვენს შემდეგ მაგას ვაბატონებთო.

კაცმა რომ თქვას, ყველაფერი ჭკვიანურად და უნაკლოდ იყო ნათქვამი.

ასედაც შეუფასებია როსტომ მეფეს. ასედაც გადაუწყვეტია, და ჩამოიყვანეს ახალციხიდან მამუკა ბატონიშვილი, ვითარცა შვილი ქართლის მეფე-დედოფლმა და მემკვიდრე სამეფო ტახტ-გვირგვინისა.

თურმე ყველაფერი როსტომ მეფის დასამხობად ყოფილა გამიზნული — უბრალოდ: როსტომი უნდა მოეკლათ და მამუკა გაემეფებინათ!

უკვე გაანდვეს მამუკა ბატონიშვილს ქართლის თავადებმა თავისი განაზრახი.

მამუკა უყოყმანოდ დათანხმდა.

მეფე აბანოში უნდა მოეკლათ, შიშველი და უიარაღო.

ერთ ღამეს შეთქმულებმა სამეფო აბანოში მკვლელები ჩაასაფრეს. შიშველი კაცი რომ შემოვიდა, ჩასაფრებულები მაშინვე დაეტაკნენ ხანჯლებით. იმ კაცმა ყვირილი ატეხა. შეთქმულები დაჭრილის ღრიალზე მიხვდნენ, რომ ხანჯლების ქვეშ მეფის ნაცვლად სხვა კაცი აღმოჩნდა და ისე დაფრთხნენ, დაჭრილს ხელი აღარ მოუთავეს, გაიქცნენ, მტკვარში გადაცვივდნენ და გაუჩინარდნენ.

დაჭრილი აღმოჩნდა სასახლის მსახური — მერიქიფეთუხუცესის ყმა. მეფეს მიჰგვარეს და ყოველივე მოახსენეს, რაც აბანოში მის მისვლამდე მომხდარიყო... როსტომი „მრავალგვარად ნაცადი და აუჩქარებელი, ჭკვიანი, მონახული ბატონი ბრძანდებოდა, ქვეყნის აშლას და ჯარის არევას ერიდებოდა“, ამიტომ შეთქმულების გახშიანება არ მოინდომა და დაჭრილ მსახურს ხუმრობა დაუწყო — ნამდვილი „თათრული ხუმრობა“: ალბათ ვინმე ლამაზი ბიჭი შეგიმწყვედევია აბანოში, სააკაკოდ მოგიინდომებია, იმ ბიჭსაც დანა შემოუტყემია და ახლა მაგნაირი ტყუილები მოგიგონებია, ვითომც თავს ვილაც შეთქმულები დაგცემოდნენო. დაზარალებულმა სიტყვის შებრუ-

ნება დააპირა, მაგრამ მეფემ აღარ მოუსმინა, ვარეთ გააგდებინა და ყველას აუკრძალა ამ ამბავზე კრინტის დაძვრა — „აღარც თვითონ თქვა და არც სხვათ ათქმევინა“.

რასაკვირველია თვითონ ყველაფერს მიმხვდარიყო მეფე. აბანოს ინცინდენტიდან ოცმა დღემ რომ გაიარა, „მას უკან მეფემ აუჩქარებელმან“ მამუკა ბატონიშვილს ათი ათასი მარჩილი გაუგზავნა და თან წერილით შეუთვალა: ძალიან ვშიშობ, ვაითუ შაჰმა დაგიძახოს თავის კარზე და მეც იძულებით რაიმე გკადროთო; ამიტომ გირჩევთ, ისევ ახალციხეს წახვიდეთ და, რაც გაგვეწყობა აქედანაც მოგიმართავთ ხელსო.

მამუკა ბატონიშვილი მიხვდა როსტომ მეფის „კალამბურებს“ და ამჯობინა მართლაც გაესწრო ახალციხეში. მისი ცოლისძმები — ჩხეიძენი და კიდევ ბევრი წარჩინებული იმერელი ქართლში დარჩნენ ნოდარ ციციშვილთან.

აღსასრული როსტომ საბაჰისა

იმავე 1642 წელს ერთი დიდი, „ზრდამოჭარბებული ქართული ხე“ კიდევ წამოაქციეს ქართული ცოდვებით დამძიმებულ ერანულ მიწაზე.

ეს იყო როსტომ (გინა — „როსთემ-ხან“) სააკაძე.

კიდევ ერთის თვალის გადავლებით — მისი ცხოვრების ეჭლის სარბიელი:

დაიბადა 1587 წელს.

მამამისი — ბეჟან სააკაძე, „პირველი ქართველი რენეგატის“ — დაუდ-ხანის აზნაური, რომელსაც დიდი სიმამაცისა და ვაჟკაცობისათვის სპარსელები ყარა-ბეჟან-ბეგს ეძახდნენ. მერე — „სამშობლოზე წუხილით“ ხელდარეული ბეჟან სააკაძე ოჯახით ბრუნდება საქართველოში. მაგრამ სააკაძეების მოსისხლე ფარსადან ციციშვილმა არ დაანება სააკაძეს „კვლავ-გაქართველება“, თვითონ ბეჟანი მოაკვლევინა, ოჯახი გაუძარცვა და აუწიოკა. სიკვდილს ძლივს გაასწრო ბეჟანის ცოლმა სამი ვაჟით და ერთი ძროხით.

მაშინ ძმათაგან უფროსი — როსტომი 11 წლისა იყო.

ისევ ერანი. წელი 1598.

დიდმა შაჰ აბას პირველმა მამაცი, ნიჭიერი და ერთგული „გურჯი ყრმა“ მაშინვე პირად ღულამად აიყვანა.

წელი 1605. შაჰ აბასმა 18 წლის როსტომი დანიშნა სარდლად — სოკბათ-იასაულად.

წელი 1627. შაჰ აბასმა როსტომი დანიშნა დივანბეგად.

წელი 1633. შაჰ სეფიმ როსტომი დანიშნა თოფანგჩიადსად (მეთოფეთა სარდლად).

წელი 1634. როსტომ-ხან სააკაძე ბრძანდება ერანის ჯარების სპასალარი და აზერბაიჯანის ბეგლარბეგი.

როსტომ-ხან სააკაძეს სპარსეთის საკეთილდღეოდ, სპარსეთის ტახტის გასამძღაფრებლად და ასამიღლებლად „გადაუხდია მრავალი ომი და შეუსრულებია უთვალავი საქმე“.

მაგრამ ექვსჯერ მაინც „უდიდესი გამარჯვებით“ გაიმარჯვა „ჩუღლისა (ისლამი) და სახელმწიფოს (ერანი) მტრებზე“. ვანის ციხეზე გალაშქრება და ქურთების განადგურება, თურქთა დამარცხება და ბაღდადის გამოხსნა, ჰამადანის აღება და ხოსროვ-ფაშას განადგურება, პელეს ციხის დაუფლება, საქართველოს ვილაიეთის დაპყრობა (როსტომ მეფესთან ერთად მოსვლას გულისხმობდნენ), ისევ თურქთა განადგურება და ერევანის ხელახალი დაპყრობა.

ბოლოს და ბოლოს, ერანის უზენაეს მესვეურებს „სჯულასა და სახელმწიფოს“ წინაშე ესოდენი დამსახურების შესატყვისი სამაგიეროდ უნდა მიეზღათ „კიდევ ერთი დიდი გურჯისტვის“.

და მიუზღეს კიდევ 1642 წელს.

ერანის ახალმა ეთიმადოვლემ (დიდგეზირმა) — მ ი რ ა თ ა ყ ი მ შეაგონა ერანის ახალ მბრძანებელს — შაჰ-აბას 11-ს: „გურჯი თათარი“ როსტომ-ხან სააკაძე სახელმწიფო გადატრიალებას ამზადებსო.

მეტი არაფერი თქმულა. გამოძიება არავის უწარმოებია.

შუალამისას დაეცნენ ლოგინში მძინარეს.

იატავანებით დაკლეს და დააბალთავეს.

თეიმურაზი მაინც არ ცხრებოდა, არც ქართლის თავადები აძლევდნენ „დაცხრომის საშუალებას“.

1642 წელს როსტომ მეფის დასამხობად თეიმურაზის გარ-
შემო შეიყარნენ და შეითქვენენ: ზაალ არაგვის ერისთავი, იო-
თამ ამილახორი, ნოდარ ციციშვილი (გიორგი სააკაძის მოსი-
სხლის — ფარსადან ციციშვილის ძე), კათალიკოსი ევლემონ
დიასამიძე (რომლის ძმის ასული — ელენე ცოლად ჰყავდა
თეიმურაზის ვაჟს — დათუნას), გიორგი გოჩაშვილი (დიდი
სვიმონ მეფის ერთგული თანამებრძოლის — გოჩა ბატონიშვი-
ლის ძე), რევაზ ბარათაშვილი, ქაიხოსრო ბარათაშვილი, ივანე
და ზურაბ სააკაძეები (დიდი მოურავის ვაჟები), ლარგველი
ერისთვიშვილი და სომხითის მელიქი ყორხმაზ-ბეგი.

„თეიმურაზელთა ბანაკი“ ამჯერად დიხაც მრავალრიცხო-
ვანი იყო, მაგრამ მისი მოთავენი მაინც მოტყეუდნენ დაფან-
ტულად, ცალკეულად და კერძოულად.

ერთ დღეს გიორგი სააკაძის ვაჟმა — იორამმა (რომელიც
ძმების კვალს არ გაპყოლია და როსტომ მეფის ერთგულების-
თვის არ უღალატნია) როსტომს შეატყობინა: ნოდარ ციცი-
შვილი ხოვლეს მოსულა ჯარით და დანარჩენ შეთქმულებსაც
უცდის, რათა შეერთებულად წამოვიდნენ შენს წინააღმდეგო.

როსტომმა სასწრაფოდ ტფილისის ციხიონი შეჰყარა და
მცხოვრებლებსაც სალაშქროდ „გაუძახა“; ვისაც ცხენი ჰყავდა
და ლაშქრობას თავს აარიდებდა, ყველას თავის მოკვეთით
დაემუქრა. სწრაფი ჰენებით წაიყვანა ჯარი ხოვლეში.

სისხამი დილა იყო. ნოდარ ციციშვილის ბანაკს ეძინა.

როსტომმა ცხენი გამოიცვალა და დანარჩენებსაც ეს
უბრძანა: ცხენებს მოსართავება გაუსინჯეთ და იარაღი მოივარ-
გეთო.

ელიზბარ ბოქაულთუხუცესმა მეფეს ურჩია: მტერს მძინა-
რეს დაეცეთ და მძინარენი ამოვწყვიტოთო.

მაგნაირი მუხანათობა რა ქართველი კაცის საკადრისიაო,
სთქვა „თათრის იარღიყიანმა“ მეფემ, დაე, ღმერთმა გაჭრას
სამართალიო; მე ნოდარ ციციშვილი შაჰს გამოვგლიჯე ხელი-

დანო; მერე მამამისი ფარსადანი ქრთამს მაძღვედა, ოლონდაც მისი მამულები ბოროტი შვილისთვის კი არა, არამედ შვილი-შვილის — ვაპუნასთვის დამემტკიცებინა. ესეც არ ვიკადრე და ის მამულები უქრთამოდ მაინც ნოდარს დავუმტკიცე. ახლა ამნაირი კაცი მლაღატობს და, მოდით, ერთი ღწერათის სამართალიც გავსინჯოთო.

თქვა და საომარ ნალართა და საყვირთა დაცემა ბრძანა.

წამოიშალა ნოდარ ციციშვილის ბანაკი.

„შეიქნა შუბთა ძვერება და ხმალთა ელვარება, ლახტების ჯახაჯუხა, მუზარადთა ხეთქინება“.

ნოდარ ციციშვილი გაექცა ბრძოლას.

იმერელმა ჩხეიძეებმა არ იკადრეს გაქცევა. შემობრუნდნენ და შემოებნენ როსტომ მეფის მეწინავეებს. რამდენიმე ყიზილბაში კიდევაც ჩამოჰყარეს ცხენებიდან.

მაგრამ მიუხედავად იორამ სააკაძე და ორივე ძმანი ჩხეიძენი დაანარცხა მიწაზე, ორივეს მხარ-მკლავი გაუკრა და ისე მიართვა თავის მწყალობელ როსტომ მეფეს.

ნოდარ ციციშვილმა ატენის ციხეს შეაფარა თავი. როსტომმა ალყა შემოარტყა. ნოდარმა გაქცევა მოახერხა და ახლა წორკეთის ციხეში ჩაიკეტა. ატენის ციხე მოთხარა მეფემ.

ციხრეთს მივიდა და დადგა როსტომ მეფე. აქ დედოფალი მარიამ მიიწვია და ისიც მივიდა.

კათალიკოსი ევდემონ დიასამიძეც ეწვია (როსტომმა ჯერ არ იცოდა, რომ კათალიკოსი თეიმურაზის ბანაკში ირიცხებოდა).

ტყვეები მოიყვანეს მეფის წინაშე, მხარგაკრულნი.

უწინარესად ძმები ჩხეიძეები და მათი იმერელი მხლებელნი ამოარჩია მეფემ და ბრძანა: ესენი ტყვეები კი არა, ჩვენი სტუმრები არიან და გორში ჩაიყვანეთ, ტანსაცმელი დაუცვალოთ, დაასაჩუქრეთ და დაასვენეთო.

მერე — ნოდარ ციციშვილის ქვეშევრდომთა დევნასაც თავი დაანებეთო. ამას გარდა, ვინც კი ბრძოლაში თავი გამოიჩინა, „ყველაკას ხალათი და საჯილდოთ მამული ებოძოსო“.

თურმე თეიმურაზ მეფე მოჰქროდა დანარჩენ შეთქმულთა თანხლებით, მაგრამ ნოდარ ციციშვილის მარცხის ამბავი რომ შეუტყვია, უკანვე გაბრუნებულა.

კათალიკოსმა ევდემონმა იღუმალ შეუთვალა თეიმურაზს: „ნოდარ ციციშვილის გაქცევისათვის საქმეს რატომ წაახდენ, რატომ გაბრუნდი და არ მოხველიო? მოდი, ნუღარ აყოვნებ და როსტომ-ხანი შენს ხელთ იქნებისო!..“

მუხრანს შედგა თეიმურაზის ბანაკი.

აქაც მოვიდა კათალიკოსის საიდუმლო შათირი.

„ნუღარ ჰყოვნითო, მოდით, და რაც გინდა გაქნევიებო“, უთვლიდა ქრისტიანთა მწყემსი „ქრისტიანთა იმედს“.

აიყარა და წავიდა თეიმურაზი.

მაგრამ დაასწრო ვახტანგ-მუხრან-ბატონმა. წინა ღამით თვითონ აფრინა თავისი კაცი ცხირეთს და როსტომ მეფეს შეუთვალა: თეიმურაზ მეფე მუხრანს იდგა — ჩემს მამულშიო; ახლა ცხირეთისკენ მოეშურება შეთქმულთა ჯარითო.

სომხითის მელიქიც — ყორხმაზბეგი მოლაღატე გამოდგა; სწორედ მაშინ როსტომ მეფეს ეახლა და თეიმურაზის თანა-შეთქმულნი სუყველა დაუსახელა.

სწრაფად ამოქმედდა როსტომ მეფე. შეიპყრო კათალიკოსი ევდემონ დიასამიძე. წინასწარ დედოფალი მარიამი გორის ციხეში თავშესაფარებლად აფრინა და თვითონაც გორისაკენ გაუყვა საომარი წყობით.

თეიმურაზმა გორის გზიდან გადაუხვია და უფლისციხეში ჩაიკეტა. როცა გაიგო, როსტომ მეფე გორის ციხეში ჩამკვიდრებულაო. უფლისციხიდანაც აიყარა და კახეთისკენ გაუტა. გზაზედ ვახტანგ მუხრან-ბატონი დახვდა და „უყო დიდი ზიანი“.

დამარცხებულმა თეიმურაზმა კახეთს ჩააღწია.

როსტომ მეფემ გორიდან ზარბაზნები გაიყოლია და გაეშურა ზორვეთისკენ, სადაც თავს აფარებდა ნოდარ ციციშვილი.

ზარბაზნებმა ზორვეთ-ციხის ქვაღულაბიან კედლებს ვერაფერი დააკლო. ალყა გაჭიანურდა. ჯარში ხმა დაირბა — თურმე თეიმურაზ მეფე აპირებს მოეშველოს ალყაში მოქცეულებსო. ამაზე როსტომ მეფემ თქვა: თეიმურაზი კი არა, ხონთქარიც რომ მოეშველოს, ისიც ვერ დამწიწკნის ხელიდან ნოდარ ციციშვილსო. დაფიცებული ჰქონდა მეფეს — სამაგალითოდ დაესაჯა ციციშვილი.

ზორვეთის ციხე ისევ მაგრად იდგა. ერთ დღეს ნოდარ ციციშვილმა შეიტყო, რომ მისი ქვეშევრდომები ციხის ჩაბარებას აპირებდნენ. შეიტყო, მაგრამ ვერ კი მიაგნო შეთქმულთა ვინაობას.

შავ დღეში ჩავარდნილმა თავადმა გადაწყვიტა მოლაპარაკება გაემართა როსტომ მეფესთან. ესეც იცოდა, რომ გააფრებული მეფე არავის მიიღებდა სამოციქულოდ. მაგრამ რაკი მაინც სხვა გზა არ ჰქონდა, „ყოველ შემთხვევისთვის“ გაგზავნა შუამავალი როსტომთან.

თავისი დედა გაგზავნა, — ერთიც არის და, სცეს პატივი ქალსა და დედას როსტომ მეფემო, იფიქრა ნოდარმა.

გაგზავნა და დააბარა: სიცოცხლე მაჩუქოს და გზა მომცეს, ახალციხეს გადავიხვეწები და უკან არასდროს მოვბრუნდებო.

გასწრა ციციშვილის ვარაუდმა: როსტომმა დიდის პატივითა და თაყვანისცემით მიიღო ქალი. გულდასმით მოუსმინა სათხოვარი. ძალიან კარგად სცოდნია როსტომ მეფეს: „საქართველოში ძველით წესათ იყო, რომ ვისაც გასჭირვებით, შესახვეწრად ან დედასა და ან ჯალაბს გაუგზავნიდეს, მეფენი და თავადნი პატივს დასდებდიან“ (ალბათ თამარ მეფის დიპლომატი ქალებიც გაიხსენა — კრავაი ჯაყელი და ხვაშაქი ცოქალი).

შეიწყნარა როსტომ მეფემ დედის თხოვნა და „ფეშქაშიც მიაართვა“. მისი შვილის „უვნებლობის საფიცარიც შისცა“, ახალციხემდე ცხენებზე და ჯორებზე ათხოვა ქონების გადასატანად.

მეფესთან შეხვედრა ითხოვა მისი „დიდსულოვნებით გულაჩუყებულმა“ ნოდარ ციციშვილმა, მაგრამ მკაცრი უარი ბრძანა როსტომმა: წავიდეს, დაიკარგოს, თვალით არ დამენახოსო.

ნოდარ ციციშვილმა ახალციხისკენ გაქუსლა.

დანარჩენ შეთქმულებს მიადგა როსტომ მეფე.

კათალიკოსი ვეგდემონ დიასამიძე ჯერ ნარიყალას ციხეში ამყოფა, მერე ჯალათი შეუგზავნა. დაახრჩობინა და ციხიდან გადააგდებინა.

ქაიხოსრო ბარათაშვილი ღამით ციხის უმაღლესი გოდოლიდან გადააჩენვინა და ხმა გაავრცელებინა, — დამთვრალა და თვითონ გადავარდნილა „მაგ უბედურო“.

ზურაბ სააკაძესა და გიორგი გოჩაშვილს თვალები დასთხარა.

ივანე სააკაძემ, რევან ბარათაშვილმა და ლარგველმა ერისთვიშვილებმა მამულები მეფეს შეატოვეს და თვითონ სიკვდილს ფეხზე გაასწრეს და კახეთს გადაიკარგნენ.

იოთამ ამილახორი შეიპყრო და ისე სცემა, სულ სისხლი აფურთხებინა. სიკვდილით კი დაზოგა, რადგან იოთამი უკვე აღარ ბრძანდებოდა „პრინციპული თეიმურაზელი“. იგი „იყო ჟამთა მკვრელი, ჟამ იყვის ბატონ თეიმურაზთანა, ჟამ როსტომის წინაშე“. ამნაირ მიეთ-ხოეთ კაცს ყოველთვის „ორაჟე მხრიდან“ სცემენ ხოლმე და ამჯერად როსტომ მეფისგან მოხვდა კაცსა უმდგრადასა.

მოკლული ვეგდემონ დიასამიძის ადგილზე ქართლის კათალიკოსად როსტომ მეფემ ეპისკოპოსებს აარჩევინა „ყოველთავე საქართველოსა მღვდელთმთავართა და სამღვდელთა დასთა“ სასურველი ქ რ ი ს ტ ე ფ ო რ ე უ რ დ უ ბ ე გ ა შ ვ ი ლ ი — „კაცი მოყვარე სამართლისა, მშვიდი, მდაბალი, გულ-ტკბილი, ყოველთათვის მოწყალე, სიწმინდის მოყვარე, სახითა შუენიერ და ღირს ხარისხ-მპყრობელობისა თვისისა, კუალად აღზრდილი და გამოცდილი საეროსა სამამაცოსა ლაშქარ-ნადირობასა შინა, და არა ჰქონდა გამოცდილება წერილთა, მცირედ ოდენ წურთილ იყო. ხოლო განაგებდა კეთილად წმიდასა კათოლიკე ეკლესიასა“...

მერე, შემოიყარა „თათრულა ილღარი“ (ლაშქარი) და ქართული ჯარი როსტომ მეფემ და კახეთისაკენ გაქუსლა.

თეიმურაზი მაშინ მაღაროს იდგა. მიუხედავად როსტომი, მაგ-

რამ თეიმურაზმა ვიწრობებში უსაფრა კახელი მეომრები და გვა და ტყვია დააყარა ცალფა მწკრივებად მომავალ მტერს.

„ვერღარა დაუდგა როსტომ ზეფე, გაიქცა და წარვიდა ტფილისს“.

თეიმურაზმა გამოდევნებაზე ხელი აიღო და მტრის დანატოვარი ნადავლი აიკრიფა.

...როსტომმა თეიმურაზ მეფის განდგომის, ქართველ თავადთა აჯანყებისა და მათი დამარცხების ამბავი დაწვრილებით მისწერა ერანის მბრძანებელს.

თან ესეც შეუთვალა საგანგებოდ როსტომმა შაჰ აბას II-ს: ქართველები ამდენ ამბავს იმიტომ მიბედავენ, რომ მემკვიდრე არა მყავს და დროებითად, ფეხამოკვეთილ კაცად მთვლიანო. სანამ მემკვიდრე არ მეყოლება, ასე ბრძოლას, ურჩობასა და აკვაცობას არ მომიშლიანო. ამიტომ გეაჩები, მანდ თქვენს კარზე რომ ჩემი ბიძაშვილია — ლუარსაბ თეიმურაზის ძე — ის გამომიგზავნე ქართლის ტახტას მემკვიდრედო.

(მკითხველმა ერთხელ კიდევ უნდა გაიხსენოს წინარე წიგნიდან: ლუარსაბ I დიდს სამი ვაჟი ჰყავდა — სვიმონ I დიდა, დავითი (დაუდ-ხანი) და ვახტანგი. ვახტანგის ძე თეიმურაზი სპარსეთში ცხოვრობდა. სწორედ ამ თეიმურაზის ძე იყო ლუარსაბი, რომელსაც ახლა როსტომ მეფე მემკვიდრედ ირჩევდა).

1643 წელს დიდძალი ყიზილბაშური ლაშქარი შემოვიდა საქართველოში.

ერანულ მხედრობას სათავეში ისევ გათათრებული ქართველი ედგა — ადამ სულთან ანდრონიკაშვილი, როსტომ მეფის დისწული.

ადამ სულთანს როსტომის „მემკვიდრეც“ მოჰყვებოდა გვერდით — ლუარსაბ თეიმურაზის ძე.

სპარსელთა მხედრობა ტფილისთან დაბანაკდა.

ადამ სულთან ანდრონიკაშვილმა როსტომ მეფეს (ანუ ბიძას) შაჰისგან გამოგზავნილი ძვირფასი ძღვენი მიართვა — მშვენიერი ხალათი, თაჯი, მურასა ხმალი და ოქროთი დარაბ-ტული ბედაური.

ლუარსაბ ბატონიშვილი წარუდგა მეფეს. შვილი მთხოვე

და შეილად გამოგიგზავნეო, უთვლიდა შაჰი, ქართველები-თვისაც ასე გვიბრძანებია, რომ ლუარსაბ-მირზა თქვენს შეილად და უფლისწულად მიაჩნდეთ და „თქვენს უკან მეფობაც მაგისტვის მიგვიცემიაო“.

მერე, ქართველთა ურჩობისა და აჯანყების გამო სწერდა გამწყრალი შაჰი: ვინც ამიერიდან როსტომ-ხანის ურჩი და მაწყინარი იქნეს, ყველა ოთხში („შვიდან“) ამოიღონო. რაც შეეხება თეიმურაზ მეფეს, იგი სასწრაფოდ გააძევეთ და კახეთი საბატონოდ ადამ სულთან ანდრონიკაშვილს ჩააბარეთო.

დიდძალი მხედრობა — სპარსეთიდან ახლად მოსულიც და დამხვდურიც — იკაზმებოდა კახეთს სალაშქროდ.

„თეიმურაზელებმა“ დიდი, დამანგრეველი საფრთხე შეიცვინეს. მიხვდნენ, რომ ხმლით და სიმამაცით სიკვდილის მეტს ვერაფერს მოიხვეჭდნენ და სახიფათო კვანძის ჩასაკვეთად ხმალი ისევ ქალს მისცეს ხელში.

აკი უკვე ცნობილი გამხდარიყო როსტომ მეფის „სისუსტე“ — უადრესი პატივისცემა, კრძალვა, მოწიწება და თაყვანისცემა ქართველი ქალისადმი.

და „თეიმურაზელებმა“ როსტომ მეფესთან შუამავლად მიინიშნეს ბრწყინვალე ქართველი მანდილოსანი — ან ან ან უ. მ. ან ან ან უ. მ. იყო დაი ნოდარ ციციშვილისა და სიდედრი ზაალ არაგვის ერისთავისა.

მივიდა ან ან ან უ. მ. როსტომ მეფესთან.

და ისევ ჩააგო სისხლის საღვრელად აღმოხდენილი ხმალი როსტომ მეფემ.

შეუხდო ყველას — თეიმურაზსაც და „თეიმურაზელებსაც“.

ერანელთა ჯარი ერანს გაბრუნდა.

თეიმურაზი კახეთის მეფედ დარჩა.

ნოდარ ციციშვილი ახალციხიდან დაბრუნდა და საციციანო დაიბრუნა.

ზაალ ერისთავიც შენდობილ იქნა, ოღონდ, იოთამ ამილახორთან ერთად, ერანს უნდა წასულიყო და შაჰს სწვეოდა „ფეხზე საკოცნელად“.

საოცარი იყო სწორედ: ერანის შაჰმა ლაშქარი გამოგზავნა, ქრისტიანი თეიმურაზის განდევნა და მის ადგილზე მაჰმადიანი მოხელის — ადამ სულთან ანდრონიკაშვილის დანიშვნა ბრძა-

ნა და როსტომ მეფემ ყველაფერი ეს არაფრად ჩააგდო — ერანელთა ლაშქარიც ხმალამოუღებლად უკან გააბრუნა, ადამსულთანაც კუდამოძუებული გაეშურა, თეიმურაზიც თავის „მშობლიური კახეთის“ ტახტზე დატოვა და „თეიმურაზელი“ ქართველი თავადებიც დიდსულგნურად შეიწყალა!

მართლაც განუზომლად დიდი გავლენა ჰქონია როსტომ მეფეს სპარსეთის უზენაეს კარზე!..

„შეხიზა შეხილილი“ დედოფალი

როსტომ მეფისაგან ტახტის მემკვიდრედ აყვანილი ლუარსაბი მაინცდამაინც ჰქუადამჯდარი კაცი არ აღმოჩნდა. „იყო სულელ და ხელ და აღტაცებული გონებითა, რომელი არა შეგნის ძეთა მეფისა საქართველოსათა“. როსტომს მაინც ძალიან უყვარდა თავისი შვილობილი და საგანგებო მწრთვნელებსა და აღმზრდელების დახმარებით თავგამოდებით ზრდიდა და ამზადებდა „ქართლის მომავალ მეფეს“.

მაგრამ ქართლის სასახლის კარზე კიდევ იყო ერთი „ყმაწვილი კაცი“, რომელსაც როსტომი „თავისთვის შვილად ზრდიდა“.

ეს იყო გერი, მარიამ დედოფლის ძე, პირველი ქორწინებით სვიმონ გურიელთან.

მისი სახელი იყო **ოტია**, — ძალზე მომხიბლავი კაბუკი, სახიერი და ზროტანოვანი, ზრდილი, ჰქვიანი, მამაცი.

ახლად დაქორწინებული იყო **ოტია**. ცოლად შეერთო ზაალ არაგვის ერისთავის ასული.

და **ოტია** მოკვდა უეცრად, გორის სასახლეში დგომის ეამს. უმძიმესი გლოვით შეხვდა მეფის სახლეული **ოტიას** სიკვდილს. საზღვარი არ ჰქონდა დედის მწუხარებას. იჭდა დედოფალი მარიამი, ქალთაგან უმშვენიერესი, თვითონ „მკვდარს მიმსგავსებული, სახე დახეული, თმა დაგლეჯილი, შვენება შეშლილი, განისამოს სისხლით გასვრილი, მიწაზედ მჯდომი, ღონე იმედს კარგული“.

თორმეტი დღე-ღამე განუწყვეტელი ზარი და ზუნი იდგა სასახლეში. სრულიად ქართლი და სამეგრელო აღძრულიყო საგლოველად და მეფე-დედოფლის სამძიმარყოფად და მისატირებლად. დილიდან გვიან მწუხრამდე გრძელდებოდა მიტირება. მოდიოდნენ წარჩინებულნი ჯალაბობით, ყმითა და ღაშქრით. მოდიოდნენ და ჯერ „შვენება შეშლილს ბატონ დედოფალს მიუტირიან, მერმე გამდელსა და ჩარიგებით მათ მხლებლებსა, მერმე მეფესა და ქირისუფლებსა, თავადთა და აზნაურთა და მსახურთა და მოხელეთა. მერე ცხედარსა მიუტირებდნენ და გარდასაბურავს გარდაჰფენდიან. ამას უკან იარაღსა და მორთულობასა, ტანისამოსსა, მურასა გვირგვინსა და ჯიდასა და ხმალსა და ხანჯარსა, მუზარათსა და ჯაჭვსა და ხელნაევებსა და ცხენსა და მის შეკაზმულობასა, ყოველს ნიშანს ცალ-ცალკე მიუტირებდნენ და ერთს წელიწადსაც არ გათავდებოდა (თუ ასე გაგრძელდებოდა).

ამიტომ როსტომმა ბრძანა, ვინც აქ ვერ მოასწროს, გზაზე და იქ, მცხეთას მოგვიტირონო. და თორმეტი დღის ვაიუშველებელის შემდგომ გორიდან მცხეთას გაუდგა სამგლოვიარო პროცესია.

ორ კუბოს მიასვენებდნენ.

პირველში — ოქროცურვილში — ოტია ესვენა.

მეორეში — წნელით დაწნულში — მარიამ დედოფალი, „ვითაც მკვდარი“, შავ ზეწარ „გარდაბურული“.

მცხეთას, მეფეთა საძვალეში დაკრძალეს ოტია.

ორმოცი დღის მანძილზე სააღაპე სუფრა არ აღებულა მცხეთასა და ტფილისში. ყოველივე ქრისტიანული წესით და რიგით გაარიგა როსტომ მეფემ. ორმოცი დღე-ღამე წყალზე და უმარილო ქერის პურზე იდგა დედოფალი მარიამი. შვილის ქონება ზოგი იერუსალიმს გაგზავნა, ზოგი ქართლის ტაძრებსა და საყდრებს შესწირა. ქვემო ქართლის „დარბაზის სოფელი“ სვეტიცხოველს მიუძღვნა შვილის სულის მოსახსენებლად. როგორც იქნა, მარიამი „ტირილით საფლავს გამოეყარა და ქალაქს ჩაბრძანდა“.

ტირილი და მისატირი ისევ გრძელდებოდა. „მოქალაქენი შეიყარნენ, კარს მოდგნენ, შეწყენისა და შეძლების დონაო გარდასაბურავნი მიართვეს და სამძიმარი მოახსენეს. ამათნი

ჯალაბნი თვითოს დღეს თვითოს უბნისანი მივიდიან და მიუ-
ტირებდნენ“. ოტიას დატირება უამრავი ფული დაჯდა. როს-
ტომ მეფეს არავისგან, არც ცალკე კაცისგან და არც „თემის-
გან“ „ერთი შაურიც არ აუღია“ — სულ თავისი პირადი სა-
ლაროდან გაიღო.

ერთადერთ შვილზე გამწარებულ მარიამ დედოფალს ოცი
წელიწადი არც შავი გაუხდია, არც სახსნილო გაუკარებია.

მართულოვის ღალატის ფასი

ზაალ არაგვის ერისთავი, სიძის დაკრძალვის შემდგომ,
ერანს უნდა წასულიყო შაჰ აბას II-სთან სათაყვანოდ.

მასთან იოთამ ამილახორიც მიდიოდა შაჰის „ფერხთა სა-
კოცნელად“. აკი ასეთი იყო როსტომ მეფესთან „შერიგების“
გარდუვალი პირობა.

ერთად აღგნენ ახლა ერანის ღველფიან გზაზე ეს ზვიადი
ქართველი თავადნი, აქამდე ერთმანეთის მოქიშპენი და მომ-
ტერენი.

წინ როსტომ მეფის სუფრაჯი ჰამზა-ბეგი მიუძღოდათ.

გზებზე ყველგან დიდის ამბით ეგებებოდნენ, ვითარცა
„დიდი როსტომ-ხანის“ წარგზავნილებს. „ყველგან სამასპინ-
ძლო მზათ დაახვედრეს და საცა გზის პირს ხანი და სულთანა
იყვნენ, წინ მიეგებნენ და თავისას ჩამოახდუნეს; კარგად
ისტუმრეს, ლხინი აჩვენეს და საჩუქარი მოართვეს და გაის-
ტუმრეს და რასაც ქალაქში მივიდნენ, ქალაქის თავნი კაცნი
წინ მიეგებნეს და კარგად დახვდნენ“.

მერე გამოეგებათ თვითონ ყასემ-ბეგი, როსტომ მე-
ფის მოადგილე-ნაიბი, რომელიც სწორედ როსტომის სახელით
ასრულებდა ისფაჰანის ტარულას მოვალეობას.

როსტომ მეფის ყმები — ყასემ-ბეგი და ჰამზა-ბეგი — ბი-
ძაშვილებიც იყვნენ და დიდის ამბით შეეგებნენ ერთმანეთს.

ისფაჰანისკენ მიდიოდნენ და დღეში სამჯერ ბარხანა (მატ-
ნე) გამოეგებებოდა და გაჰკიოდა ხალხის სასმინარად: დიდი

როსტომ-ხანის ქვეშევრდომნი გურჯი თავადები მოდიან და ყველანი პატივით შეეგებეთო.

ისფაჰანს რომ ერთი დღის სავალზე მიუახლოვდნენ, შაჰმა მაშინვე თავისი ეთიმადოვლე (დიდვეზირი) შირზა თაყი წარმოგზავნა ქართველებთან შესახვედრად. თან დაებარებინა ხელმწიფეს: ყოველივე ისე გაუწყვეთ, მოემსახურეთ და უმასპინძლეთ, როგორც მაგათი ქართული წესი და რიგი მოითხოვდესო. შირზა თაყიმ ყულის ჯარი შეჰყარა, რჩეული სპარსელი სარდლები ჯარის წინ გაამწყრივა, მათ წინ კიდევ სპარსეთს მყოფი ქართველი თავადაზნაურობა ჩაასილალა, აღლუმის უფროსად ადამ სულთან ანდრონიკაშვილი უჩინა და ასე შეეგება ერანის სატახტოს კარიბჭესთან გურჯისტანიდან მომავალ გურჯებს.

ერისთავი და ამილახორი დარიგებული იყვნენ „აქაურ წესზე“ — სწრაფად დაქვეითდნენ და ეამბორნენ ისფაჰანის კარიბჭეს.

რვა დღეს „ხოჯა საფარას სასახლეში ჩამოახტუნეს“ ქართველი სტუმრები, „რვა დღეს ყაენის სახლით ოქროს ჭურჭლებითა დამზადებული სადილ-ვახშამი მოუვიდის“. ყოველდღიურად შვიდ თუმან ოქროსა და სამოც ლიტრა ღვინოს მიართმევდნენ ცალკეულად ზაალსა და იოთამს.

ამას გარდა, ორივენი საგანგებო „ლხინში იყვნეს, ხან აწვევდნენ და ხან ეწვევოდნენ მეყვისთა და მეცნიერთა“.

მერე ერთბაშად „ხემწიფემ სამასი თუმანი თეთრი და ფარჩა ერისთავს მოსცეს და ასრევე ამილახორს მისცეს“.

ბოლოს ქართველთა მისაღები მეჯლისიც დანიშნა შაჰ აბას II-მ. შევიდნენ ერისთავები, დაემხნენ და დაუკოცნეს ფეხები სპარსეთის შბრძანებელს.

(ამად ჰღირდა ყველა ის პატივისცემა, რაც აქამდე მიეღოთ ქართველ „მამულიშვილებს“ სპარსელთაგან!).

ტკბილად გამოჰკითხა შაჰმა როსტომ მეფის ცხოვრების ამბები „ძვირფას სტუმრებს“ და ამათაც „დიდი ქება მოახსენეს“ როსტომ მეფისა.

„ტკბილი საუბარი“ რომ დამთავრდა, შაჰმა ზაალს და იოთამს — „ორთავეს ქართული ჩოგანი ათამაშა და ორთავეს ოქროთი შეკაზმული ბედაური ცხენები უბოძა“.

ამას ზაალ ერისთავისა და იოთამ ამილახორის „გათათრებ-
ბა“ მოჰყვა.

ასეთი „მცირე რაიმეს“ სამაგიეროდ ერანის ხელმწიფემ
ახალი დიდი პატივი მიაგო უკვე გათათრებულ ქართველებს:
თითოეულ მათგანს ყოველ წლიურ ჯამაგირად ას-ასი თუმანის
დაუნიშნა!

იმ დღეს როსტომ მეფის ჩაფარიც მოიჭრა საქართველო-
დან. როსტომი უთვლიდა შაჰ აბას II-ს: ერისთავი და ამილა-
ხორი, რაც შეიძლება, მალე გამომიგზავნენ საქართველოში.

შაჰმა მაშინვე აღასრულა როსტომ მეფის „მოთხოვნა“.

ქეშმარიტად, ორივეს დიდი ფასი ჰქონდა ერანის სახელმ-
წიფო კარზე — როსტომ მეფის სიტყვასაც და... ქართულობის
ლაღატსაც!..

მაგრამ ზაალ ერისთავისა და იოთამ ამილახორის გამოს-
ტუმრება ერთი მოულოდნელი და ფრიად საშფოთარი ამბის
გამო ისე იოლად ველარ მოხერხდა.

ისფაჰანის სასახლის კარზე ლამის სახელმწიფო გადატრია-
ლება მოხდა.

ყორჩიბაშ (ცხენოსანთა ჯარის სარდალ) ჯ ა ნ ი - ხ ა ნ ს
თურმე უმაღლეს სამხედრო მეთაურთა შეთქმულება ჰქონდა
გაწყობილი. ქართველებთან შაჰის შეხვედრის მეორე დღეს,
დილით, ჯანი-ხანი ხანჯლით შეხტომია ნამაზად მდგარ დიდვე-
ხირ მიჩნა თაყის, ყელი ღორივით გამოუჭრია და მის ნაც-
ლად ეთიპადოვლედ „თავისი კაცი“ ხალიფასულთან გამთუ-
ცხადებია. ყველაფერი ეს შაჰის დაუკითხავად მომხდარა. ისე-
დაც, ჯანი-ხანს ყმაწვილი შაჰის უფრო ნაკლებად ეშინოდა,
ვიდრე შაჰის ბებუისა.

შაჰის ბებია ქართველი ქალი იყო — შკვიანი, მტკიცე ნებუ-
სა და ხასიათის ადამიანი. ჯანი-ხანი სწორედ ამ ქალის მოკვ-
ლით აპირებდა სასახლისა და სახელმწიფო ინსიგნიების ხელ-
ში ჩაგდებას.

მაგრამ დაასწრო შაჰის ბებიამ. ორი კაცი გამოიძახა სას-
წრაფოდ — ს ი ა თ შ - ხ ა ნ ი და მ უ რ თ უ ზ ა - ყ უ ლ ი - ხ ა ნ ი,
ორივე გათათრებული ქართველი. სიათშ-ხანი როსტომ მეფის
მოადგილე იყო და ყულის ჯარს მეთაურობდა. „შენ ჯერ ყუ-

ლარადასობა იკმარეო“, უთხრა მას შაჰის ბებია, მერე მურ-
თუზა-ყული-ხანს ქოპქილუს ბეგლარბეგობას შეჰპირდა და მა-
შინვე საამისო რაყამიც უბოძა. ბოლოს ეს უთხრა ქალმა ორი-
ვე სარდალს: რა იქნა თქვენი ვაჟკაცობა, სად დაიკარგა თქვე-
ნი ერთგულება, ისე რომ ეფიცებოდით ჩემს ოჯახსა და სახელ-
მწიფო ტახტს?! ვილაც ჯანი-ხანი თვისის ნებით ჰკლავს ჩვენს
ეთიმაღოვლეს, თქვენ კი თითქოს არაფერიც არ გაგიგონიათ
და ასეთი კადნიერება არად ჩაგიგდიათ. განა არ იცით, რომ
დღეს თუ ზვალ თქვენც დაგზოცავენ, მერე შეილსაც მომიკლა-
ვენ და თვითონ გახელმწიფდებიან? ახლა ეს იცოდეთ, — თუ
მართლა ჩვენი ერთგულები ხართ, ამაღამ ყულის ჯარი მოიყ-
ვანეთ, სასახლეში ჩაასაფრეთ და დილას რომ ჯანი-ხანი თავი-
სი ხალხით ქეშიკში მოვა, წაუშინეთ და ყველანი ამოწყვი-
ტეთ!

დიღით მართლაც ყველაფერი ისე დატრიალდა, როგორც
შაჰის ბებია ბრძანა. მურთუზა-ყული-ხანი ჯანი-ხანს დაეტყა.
„შე ხაინო (მოღალატე) და მუხანათო, ხელმწიფის ეთიმაღო-
ლე რატომ მოჰკალიო?! — შესძახა და წამსვე ხანჯალი გაურია
მუცელში.

სიაოშ-ხანმა და მისმა „ყულებმაც“ წაიკრეს ხმლებზე ხე-
ლი და წუთში ჩვიდმეტი შეთქმული ხანი და სულთანი სულ-
გავარდნილი დაუშვეს მიწაზე.

დახოცილები მეიდანზე თრევით მიიტანეს და ყაზახის ძირ-
ში დაჰყარეს. მათი ცოლ-შვილი მოთხარეს და ქონება შაჰის
ხაზინას ჩააბარეს.

იმ დღესვე ზაალ ერისთავი რა იოთამ ამილახორი — ამ „დი-
დებული სანახაობის“ შემდგომ — სპარსელებმა „მორჰმითა და
მრავლის ბოძებით გაისტუმრეს“. ზაალ ერისთავს კიდევ „უბო-
ძეს ხუთასი თუმნის თეთრი და ხალათი და ოქროთი შეკაზმუ-
ლი ცხენი, თხუთმეტი სოფელი ყაზმინის სიახლოვეს“. ასევე
დააჯილდოვეს იოთამ ამილახორი.

გამომშვიდობებისას, — როცა ზაალმა და იოთამმა შაჰის
ფეხების კოცნა მოითავეს — ხელმწიფემ ორთავეს ეს უბრძანა:
„რასაც როსტომ მეფეს აამებთ და ერთგულად ემსახურებია,
ჩვენც ჯეჟამების და იმისის მოწერილობით ჩვენგან წყალობა
დაგემართებისთ; ისრევე, იმისის მოწერილობით ჩვენგან რის-
ხვასაც ელოდეთო“.

ძალიან ნათლად და გასაგებად იყო ნათქვამი..

როსტომ მეფისთვის კიდევ ცალკე ძვირფასი ხალათი და ოქროს მოკაზმულობით დარახტული ბედაური გამოატანა ზაალსა და იოთამს...

ქეშმარიტად, — ორივეს დიდი ფასი უდო ერანის სასახლის კარზე — როსტომ მეფის სიტყვასაც და.. ქართველთაგან ქართულობის დაღატაცა...

როსტომ მეფე ამალით ტფილისს გარეთ შეხვდა ერანიდან შობრუნებულებს.

მეფე რომ ცხენით მომავალი იხილეს, ზაალი და იოთამი ცხენებიდან გადმოცვივდნენ, „დიდი გზა ფეხდაფეხ წაიარეს და მეფეს-ცხენს მჭდომს აყვანდას აკოცეს“.

გადმოხტა ცხენიდან როსტომი, შაჰის გამოგზავნილი ხალათი ჩაიცვა და „დიდის სიმხიარულითა და შადლუხის ქნით შებრძანდა ქალაქში“.

ათი-თორმეტი დღე თავის სასახლეში იყოლია ერისთავი და ამილახორი როსტომ მეფემ, „თავის ყაიდაზე“ — ყიზილბაშურად აღხინა, აქეიფა და ამრუშა ორივენი. ახლა გეყოფათო, უთხრა ბოლოს მეფემ უკვე „ყიზილბაშ გურჯებს“, გზისაგან გარჯილნი ხართო, შინაც გელოდებიანო; წადით და ამ ზამთარს თქვენთან შეექცითო.

ისევ აიშალნენ

ზაალ ერისთავის დაღატი რომ შეიტყო, თეიმურაზ მეფემ თქვა: ზაალ ერისთავი როცა როსტომ მეფეს გადაუდგა და მე მომემხრო, ქართლში დაკარგული მამულების სამაგიეროდ მე კახეთში მივეცი მამულები; ახლა ისევ თავის ძველ ბატონს დაბრუნებია ზაალ ერისთავი, ქართლის მამულებსაც ისევ ამოიგებს, ერანის შაჰისგანაც თურჟე ნამეტანი წყალობა დამართნიაო; ვაითუ საერთოდ დაემართოსო. ეს თქვა და წაართვა

თეიმურაზმა არაგვის ერისთავს კახეთში ბოძებული მიწები.

ზაალ ერისთავი ტფილისში ოჯახით ჩამოვიდა და როსტომ მეფესთან იჩივლა: თეიმურაზმა მამულები ჩამომართვაო.

როსტომმა ამნაირ „პატიოსან საჩივარს“ ეს უპასუხა: ბატონი თეიმურაზის სამკვიდრო მამულში მე რა ხელი მაქვსო, იმან თავისი საკუთარი წაგართვა, მაგრამ მე შენთვის სამაგიერო მომიცია და სჯობია გაჩუმდეთ.

რევაზ ბარათაშვილი და როინ ჯავახიშვილი სიძე-ცოლისძმა იყვნენ. ერთ დღეს როინ ჯავახიშვილი იმერეთისკენ მიმავალ სიძეს დაესხა, შეიპყრო და როსტომ მეფეს მიჰგვარა. რევაზი გაჩხრიკეს და თეიმურაზ მეფის საიდუმლო წერილები აღმოუჩინეს — იმერეთის მეფისადმი მიწერილნი.

— ამდენ ხანს მიპატიებია და ახლა კი ველარ გაპატიებ, — თქვა როსტომმა და იქვე, მისი ბრძანებით, ჯალათმა რევაზ ბარათაშვილს თვალები დააყრვეინა.

ძმის უბედურებით და ქმრის მუხანათობით გამწარებულმა როინ ჯავახიშვილის ცოლმა მონაზვნის ჩოხა ჩაიცვა და ცოდვიანი ოჯახიდან სამუდამოდ გაიქცა.

ხოლო როსტომ მეფემ თეიმურაზს მოციქული გაუგზავნა და შეუთვალა: რა არის, რომ არც თქვენ დაწყნარდებით და არც ჩვენ დაგვაწყნარებთო; ჩვენსა და თქვენს შორის ისედაც ბევრი საქმენი გახლავან გასაბრჭობნი და გასახილავნი; ამას წინათ, გაბრჭობამდისინ თავმდებად კახეთში სამი სოფელი დაგვიდევით; მაინც არ მოისვენეთო. სიღამდისინ ჩვენსა და თქვენს შუა საქმენი გადუწყვეტი არისო, ქართლი და კახეთი არ მოისვენებსო. ბოლოს და ბოლოს, ნულარ ვაყოვნებთ, ორიოდე მცოდინარი ბერი და ერი შენს-სიძეს მეფე ალექსანდრეს ვსთხოვოთ და ასევე ლევან დადიანსაც ვსთხოვოთო, გურიელსა და ახალციხის ფაშასაც ვსთხოვოთო, გავიბრჭნეთ (გავსამართლდეთ) და შევრიგდეთო, ჩვენც მოვისვენოთ და ჩვენი ქვეყანაც მოვასვენოთო.

მთავარი „გასაბრჭობი“ ის იყო, რომ თეიმურაზს როსტომი მისი ძმისწულის სვიმონ-ხანის მოკვლას აბრალებდა და სამაგიერო „სასისხლოს“ სასამართლოს ძალით მოითხოვდა. ჰქონიათ კიდევ შუამავალთა სასამართლო ამ საქმის თაობაზე მეფე-

ებს. თეიმურაზს კახეთში სამი სოფელი მიუცია როსტომ-სათვის.

თეიმურაზმა რომ ეს წერილი მიიღო, გაბრაზდა, ის სამი სოფელი ისევ უკან დაიბრუნა და როსტომ მეფის მოხელეები კახეთიდან გამოჰყარა; თან ესეც მოსწერა როსტომს: ბოლოს და ბოლოს, გასაბრძობი რალა გვაქვსო; თქვენი ძმისწულის სვიმონის მოკვლას მე რად მაბრალებთ, როცა იგი, ყველამ იცის, ზურაბ ერისთავმა მოჰკლაო; ამისთვის ზურაბ ერისთავი მე მოვკალი და თქვენგან ბრალი კი არა. მადლობა მეკუთვნისო; თუ მაინცადამაინც სვიმონის სისხლს ეძებთ, მესისხლეც მასდევ გყავთ — ზურაბ ერისთავის ძმა, ზაალ ერისთავი — ყაენთან რომ გაგიგზავნიათ და მორკმული და გამდიდრებული დავიბრუნებიათო; აქამდე რომ ჩემი ქვეშევრდომი იყო, ახლა თქვენი გახლავსთ, თქვენი ყმაც ეგ არის და მესისხლევც და როგორადაც მოგეპრიანოთ, ისრე ჩაითვალეთ და მე თავი დამასტებთო.

ისევ აიშალნენ მეფენი.

ისევ უნდა დადგრილიყო ქართული სისხლი ქართველთა და სპარსელთა ხელით.

ავღაღითხალ ნასროლი ტყვიები

მცხეთას ჩავიდნენ როსტომი და მარიამი.

სვეტიცხოველში ილოცეს მზურვალე ლოცვით ქრისტიანმა დედოფალმა და „თათარმა მეფემ“.

მცხეთიდან საფურცლეს გავიდა როსტომი და აქ შემოიყარა ქართველთა და სპარსელთა ჯარები. განჯა-შირვანიდანაც ეწვია ყიზილბაშთა დამხმარე ჯარები როსტომს.

კახეთისკენ დაიბრუნენ მგლური ნაბიჯით და მგლური გულით.

თეიმურაზიც გაემზადა მტრის შესახვედრად. მან ორად გაჰყო კახელთა ჯარი. ერთ ნაწილს სარდლად უჩინა თავისი ძე — დათუნა ბატონიშვილი, თანაშემწედ სუფრაჯი ბიძინა ჩო-

ლოყაშვილი დაუყენა და ქიზიყს გაგზავნა. მეორე ნაწილი თვითონ დაიტოვა, თანაშენწევდ სახლთუხუცესი რევაზ ჩოლოყაშვილი აიყვანა და თიანეთს, უღლისთან დადგა მტრის დასასვენდრად.

როსტომ მეფემაც ორად გაჰყო ლაშქარი. ყიზილბაშთა ჯარი ჯემალ-ხანს ჩააბარა — ისფაჰანიდან მოყოლილ გათათრებულ ქართველს — და ქიზიყს გაუშვა, დათუნა ბატონიშვილთან შესახვედრად. ქართლელთა ჯარი, ვახტანგ მუხრან-ბატონისა და ზაალ ერისთავის სარდლობით, თეიმურაზისკენ წარგზავნა — თიანეთს — და თვითონაც უკან მიჰყვა ფრთხილი ქენებით.

ეს საშინელი ამბები 1648 წელს დატრიალდა.

თიანეთს, უღლისთან, ერთმანეთს ეკვეთნენ თეიმურაზისა და როსტომის მეწინავენი — კახელები და ქართლელები.

კახელობას წინ მიუძღოდა რევაზ ჩოლოყაშვილი, „კაცი კეთილი და რჩეული სარდალი“. ორი ვაჟკაცი შვილი მარჯვნივ და მარცხნივ მოსდევდნენ სახლთუხუცესს მამაცური ხმალთა-კვეთებით.

უეცრად აგბედითად ნასროლმა ტყვიამ შეაქანა უნაგირზე რევაზი.

სიკვდილის სიახლოვე იგრძნო ნათოფარმა სარდალმა. შვილებს უბრძანა, შეტევა არ ჩაისხლიტოთ, არც ვინმემ ჩემი გათოფვის ამბავი შეიტყოსო და ბრძოლის ველს გაეცალა „მცირე ხნით“.

თეიმურაზ მეფეს მიეჭრა და მის მუხლებში ჩაემხო სისხლდადენილი.

„მიხარია, რომ შენის სამსახურისა და ერთგულებისთვის ვკედები, მეფეო! დაე. იყოს ჩემი თავი თქვენს ჭირის სანაცვლოდ!“ — შესძახა და ხელები დაუკოცნა მეფეს დაჭრილმა.

მწარედ ატირდა თეიმურაზი.

ჭრილობა შეიკრა რევაზმა.

ისევ „იტირეს ორთავემ მრავალი“.

ისევ მოახტა ცხენს და გაქუსლა ბრძოლის ველისკენ ჩოლოყაშვილმა.

შიათანა იმ ადგილს, სადაც ტყვიამ დაუღწია გულის ფიცარი.

მიატანა და იხილა ძმათაშორისი ომი შენიეთებული.
გამხეცებით სჩეხდნენ ერთურთს კახელნი და ქართლელნი.
ვერცერთ მხარეს ნაბიჯითაც ვერ უკუეგდო „მოპირდაპირე
ძმათა მხარე“.

აქ კი იმძლავრა სიკვდილმა და უსულოდ გადმოეშვა ცხე-
ნიდან რევაზ ჩოლოყაშვილი.

„სარდალი მოგვიკლესო!“ — ელვასავით დაურბინა კახელ-
თა ჯარს. მკლავი მოეშალათ, მუხლი ჩაეშალათ და „უკან
იქცნენ კახელნი“.

ფრთა გამოისხეს ქართლელებმა. ახალ იერიშზე დასძრეს
ჯარები ვახტანგ მუხრან-ბატონისა და ზაალ ერისთავმა.

„უკუნ იქცა ბატონი თეიმურაზიცა და წარვიდა“.

იმავე დღეს მოხდა ბრძოლა ქიზიყს, მაღაროსთან.

დათუნა ბატონიშვილი, „სიმამაციით და გამბედაობით გან-
თქმული“ ვაჟკაცი, გააფთრებით დაეტაკა სპარსელთა და შირ-
ვანელთა მხედრობას.

ჯემალ-ხანსაც ძარღვებში ქართული სისხლი რაღად უდუღ-
და, თუ ქართველებს ბრძოლის სასწორს დაანებებდა.

მაინც იმძლავრეს კახელებმა. დაიხელთავეს და დაიკალთა-
ვეს კიდევ ბრძოლის შუაგული და განაკიდურნი.

მაგრამ ისევ გაიზუზუნა ავბედითმა ტყვიამ და დათუნა ბა-
ტონიშვილი უსულოდ გადმოეშვა ცხენიდან.

ისევ მოიშალა მამაცი უფლისწულისა და სარდლის სიკვ-
დილით ზარდაცემულ კახელთა ჯარი.

ბიძინა ჩოლოყაშვილი ამოდ ცდილობდა ბრმა ბედისწე-
რის წყალობით უკუღმა დატრიალებული ბრძოლის ჩარხის
შემობრუნებას.

ქაიხოსრო მაყაშვილმა და ბიძინა დიასამიძემ, დათუნას
სიკვდილი რომ შეიტყვეს, მეფე-დედოფალს ველარ ვეჩვენები-
თო და, გული შეაცხრილეს მერეხად წამოსულ ყიზილბაშურ
ტყვიას და ფინთიხს.

ზედინუდ ეცემოდნენ კახური დროშები.

კახელ თავადთა ერთმა ნაწილმა, „სანამ გვიან არ იყო“,
ბრძოლა მიატოვა და როსტომ მეფის საყმო და საქვეშევრდო-
მო გზაზე შეაგდო ცხენი.

კახელ მამულიშვილთა ლაშქარი თითქმის მთლიანად შეაწყდა „ალლაპისაგან ბოძებული“ გამარჯვებით გალაღებულ ყიზილბაშობას.

დათუნა ბატონიშვილის წარკვეთილ თავს — სხვა წარჩინებულ კახელთა თავებთან და კახურ დროშებთან ერთად — მიაქროლებდა აღტაცებული ჯემალ-ხანი.

ბიძინა ჩოლოყაშვილმა მისებრ სისხლდადენილი და გალახული ჯარის ნაფლეთებით ძლივს მიიტანა სული თეიმურაზის კარზე.

უმძიმესი მარცხის ამბავი მოახსენა ჩოლოყაშვილმა მეფე-დედოფალს.

დათუნა ბატონიშვილზე კი კრიხტი არ დაუძრავს.

„დათუნა რა იქნაო?!“ — იკივლა ხორეშან დედოფალმა.

იგივე იკითხა შიშითა და ძრწოლით გატენილმა თეიმურაზის თვალებმა.

„დათუნა ბატონიშვილი... დათუნა ტყვედ წაიყვანეს ყიზილბაშებმა“, — ამოიხრიალა ჩოლოყაშვილმა.

სორაჟან დედოფლის უსამაგლობით


„მზევლის ნაშობმა მეფემან საქმე ქმნა ბედაურისა“.

ა რ ჩ ი ლ ი

იჯდა თეიმურაზ მეფე მეხდაცემული, ენაჩავარდნილი, უმძიმესი ფიქრებით დარეგვილი და დაქვესკნელებული, „თავად მტრისაგან გალახული, სახლთუხუცეს მოკლული, ჯარ წასრული, დროშა წართმეული, ქვეყანა და საბატონო სხვას დარჩობილი“.

მან ჯერ კიდევ არ იცოდა ყველაზე დიდი საგოდებელი — ერთადერთი, უკანასკნელი ძის სიკვდილი.

არ იცოდა და რაც იცოდა, ჯერ იმას ჯავრობდა უმძაფრესი

საჯავრებელით: „ყველგნით ღონე მოელო, აღარც სითმე  ლი და აღარც სახიზარი ალაგი, აღარც წასასვლელი გზა, არც ასაყრელათ ცხენი და ჯორი, აღარც მოხელე და მოსამსახურები“...

კახელმა თავადებმაც მიატოვეს თეიმურაზ მეფე — „მისმა დაზრდილმა“ კახელებმა. ახლა ისინი როსტომ მეფის კარზე ბრძანდებიან და თურმე ახალ ბატონს ძველი ბატონის შეპყრობას ეპატიეებიან!

ღიახ, კახელი რენეგატი თავადები მოსვენებას აღარ აძლევდნენ როსტომს, — სანამ თეიმურაზს არ დაიჭერ, მანამ არც მისი მოსვენება იქნება და არც კახეთის დამორჩილება არ მოგიხერხდება!

როსტომ მეფის ძარღვებში სანახევროდ ქართველი გლეხის პატიოსანი სისხლი დაედინებოდა და სასტიკად გააჯავრა იგი ქართულმა „თავადურმა უმადურობამ“.

„როგორ არა გრცხვენიათ, — თეიმურაზის დაზრდილები ხართ და ახლა თქვენ თვითონ მაქვებთ მის დასაღუპად! გამზრდელს რომ ასე ექცევით, ჩვენ თქვენი ერთგულებისა რაღა ვიწამოთ?“ — დაიღმუვლა მეფემ.

რენეგატებს ენა ჩაუვარდათ.

„რაც რომ ქვეყანა დაარსებულა, ასეთი მუხანათობა არავის მოსწრებია, ახლა რომ თქვენ თეიმურაზ მეფეს მუხანათობას უწევთ“ — ერთხელ კიდევ დაუღრიალა როსტომმა მის „საერთგულოდ მობრძანებულ“ მოღალატეებს.

ეს ამბები „ვინღაცამ“ თეიმურაზის კარზე ჩაიტანა კახეთში.

თეიმურაზს იმედი აღეძრა, — იქნებ როსტომ მეფე შეგვირიგდესო და შუამავლობა ხორეშანს სთხოვა — თანამეცხედრეს, თანავგირგვინოსანსა და უმძიმეს დღეთა თანამოჭირნახულეს.

„როსტომ მეფე თქვენი ბიძაშვილი არის, — ეუბნებოდა ქმარი ცოლს — მიდით, ნახეთ, შეჩხვეწეთ, იქნებ არ მოგვეკლას შვილი, ის ერთადერთი იმედი და ნუგეში! ეგების შაპატოს ჩემი შენაცოდები და ამას იქეთ ჩვენც ისე გვიმსახუროს, ვითაც ერთი ვინმე თავადი. ხოლო, თუ ესეები არაქნა, ამდენერთს ნათესავობის პატივს მაინც დაგდებს, რომ ჩემი

დათუნა ყაენთან ცოცხალი გაგზავნოს და ჩვენ იმდენი ცხენი და ჯორი გვათხოვოს, რომ იმერეთს მივაწიოთ“.

აღდა დედოფალი ხორეშანი, შვილისთვის მოუთმენელის ნაღვლიან მტირალი“, და დაადგა როსტომ მეფის სავედრებელ გზას.

(მკითხველმა კიდევ გაიხსენოს: როსტომის მამა — დაუდხანი და ხორეშანის პაპა — სვიმონ I დიდი, ძმები იყვნენ).

როსტომს მოახსენეს: ხორეშან დედოფალი მობრძანდება თქვენთან შესახვედრად.

მეფემ ფიცხლავ იხმო თავისი მემკვიდრე ლუარსაბი, კათალიკოსი ქრისტეფორე, ეპისკოპოსნი, ქართლის თავადნი და უბრძანა: სასწრაფოდ გაეშურეთ და დიდის მოწიწებით მიეგებეთ დედოფალსო.

თვითონ თავისი კარვის ახლოს სტუმრის სავანებელი კარავი გაამართინა, მერე ცხენზე შეჯდა და თვითონაც შესაგებებლად გაემართა.

დედოფალი გამოჩნდა. მეფე რომ დაინახა, ცხენიდან ჩამოხდომა ინება. თავადებმა ჩამოსვეს.

მისი მარჯვენა ხელი კათალიკოსმა ქრისტეფორემ დაისვენა ხელზე, მარცხენა — ლუარსაბ ბატონიშვილმა და აგრე წამოიყვანეს მეფესთან შესახვედრად.

დაქვეითდა მეფეც.

დაქვეითდა ორივე ჯარიც — ქართველთა და ყიზილბაშთა (გინა — ქრისტიანთა და თათართა).

ერთმანეთს მიეახლნენ.

ხორეშან დედოფალმა დაიჩოქა მეფის ფერხთა სამთხვევად.

არ დაანება როსტომ მეფემ, „არ დაუშვა, დაიღლივა, ერთმანეთს გარდაეხვივნეს და შეიქნა ტირილი და სრულ ლაშქარმან დაიწყეს ხმამაღლა ტირილი და თავს ცემა“.

რაღა საკვირველი იყო ქართველთა ტირილი, როცა „თათართა ჯარი უფრო ტიროდეს“.

მაგრამ კახეთის სამეფო სახლობის ყველაზე დიდი სატირალი ჯერ კიდევ არ იყო გამჟღავნებული. — როსტომ მეფეს მკაცრად გაეფრთხილებინა დიდი და პატარა — არასგზით არ გაემხილათ დედოფლისთვის შვილის სიკვდილი.

ერთი სიტყვით, მეფესა და დედოფალს შორის „იმ დღეს ტირილის მეტი არა თქმულა რა“.

სალამო ხანს, როცა ხორეშან დედოფალი მისთვის განკუთვნილ კარავში დაბინავდა, როსტომ მეფემ თათბირი შეჰყარა და დაიწყო: ბატონი დედოფალი ჩვენთან სახვეწრად მოსულა და ჩვენც პატივის დადება გვმართებსო; თვათ ჩემი ნათესავი არის და ესეც რომ არ იყოს, საქართველოში ძველთაგანვე წესად ყოფილა, — როცა აქაურ მეფეებსა და მეპატრონეებს რაიმე გაუჭირდებოდათ, მშველელად დედას ან დედოფალს შეიხვეწიებდნენ; ბატონი თეიმურაზიც ასე მოქცეულა და აწე ჩვენც გვმართებს ქართული წესი და რიგი დაეიცვათო.

თათბირს ქართველი თავადებიც ესწრებოდნენ და სპარსეული ხანებიც.

პირველი წამოდგა ლორე-აღჯაყალის მმართველი, ყიზილბაში ისა-ხანი და მოახსენა მეფეს: ასი ათასი სპარსელი მაინც გაწყვეტილა კახელებთან ბრძოლებშიო, ბევრი ხელმწიფეც ამოდ გარჯილა კახეთის დასაპყრობად, მაგრამ ამნაირი გამარჯვება, თქვენ რომ ღმერთმა კახეთზედ გარგუნათ, ჯერ არავის პღირსებიაო; თქვენ რომ მამა (თეიმურაზი) დაამარცხეთ, თქვენმა მეორე ჯარმა მისი შვილი (დათუნა) დაამარცხა და სიკვდილსაც შეჰყარა. ახლა გაუბედურებული დედოფალი მოსულა, ფეხზე გემთხვევათ და გეაჯებათ; დიახაც უნდა დასდოთ პატივი; საკმარისი იქნება, ყარაია გამოართვათ სანადიროდ, ხოლო დანარჩენი კახეთი ისევ დაუტოვეთ მეფესა და ხორეშან დედოფალსო.

ძალიან ესიამოვნა სპარსელის თათბირი სპარსეთში გაზრდილ როსტომ მეფეს. მაგრამ, სანამ რაიმეს იტყოდა, ისევე ქართველებს აცალა „მათი სათქმელი“.

ქართველმა თავადებმაც თქვეს: არ ივარგებს თეიმურაზ მეფის პატიებაო. სულ ერთია, მაინც არ მოისვენებს და არც თქვენ მოგასვენებთო; ამას წინათ, მისი შვილი რომ ცოცხალი იყო, მაშინ გებრძოდათ თავგამოდებით და ახლა შვილის და თანაც ასეთი შვილის სიკვდილს რომ შეიტყობს, მაშინ ხომ სულ აღარ მოგასვენებთო. მერე, იქნებ არც ყაენმა მოგიწონოთ თეიმურაზთან შერიგებაო...

მთელი ღამე თეთრად გაათენა როსტომ მეფემ.

უკვირდა კაციშვილს: სპარსელებსაც კი მოუღბო გული მათი მოსისხლე ქართველი მეფე-დედოფლის უბედურებამ, ხოლო ქართველები... რა სასტიკი არიან მათივე კეთილისმყოფელი მეუფის მიმართ... ისე კი მართალი უნდა იყვნენ ქართველები: არ იქნება და, ვიდრე პირში სული უდგას, არ გააგდებს ხმალს ხელიდან თეიმურაზ მეფე...

მეორე დღეს ისევ შეხვდნენ ერთმანეთს ხორეშანი და როსტომი.

ახლა ყველაფერი უნდა თქმულიყო, აშკარად და გადაჭრით. დაიწყო ხორეშან დედოფალმა: კურთხეულის ბიძათქვენი სვიმონ მეფისაგან და ლევან კახთა მეფისაგან ჩემი დათუნას მეტი ძენაშიერად აღარავინ დარჩენილაო; ჩემ შვილსაც დიალ თქვენს გვერდით ხლება უნდოდა, მაგრამ მე და თეიმურაზმა არ დავანებეთ, ვითომც იმიტომ, რომ მის მეტი შვილი აღარა გვყავდა, ვაი მის დედას უბედურს! ახლა იგი თათარს ტყვედ დაურჩენიათ და ყაენთან ერანს გაუგზავნიათ! ამას გეაჩებით, ხელმწიფეო, ყაენთან მოგვეხმაროთ, ჩემს დათუნას არაფერი უბედურება შეჰყარონო!

ძლივს დაასრულა და ისევ ცრემლმა უყველა ხორეშანს.

მაშინვე ნუგეში წააშველა როსტომმა: დვთის შეწევნით, რაც კი ჩემის ხელიდან გამოვა, არაფერს დავიშურებ თქვენს მოსახმარებლადო; ისედაც დარწმუნებული ვარ, ყაენის კარზე თქვენს შვილს სიკეთის მეტს არაფერს მიუტევენო; მხოლოდ ამისთვის მებრალებით, დედოფალო, შვილთან შეხვედრამდის რომ ტირილი და ნალველი შეგაწუხებთო.

როგორც კი ცრემლი მცირედად დაითრგუნა, ისევ განაგრძო ხორეშანმა: ბევრი შეგცოდეთ მე და თეიმურაზმა, მიტომაც სამაგიერო მოგვიზღა უფალმაო; ახლა თქვენს ხელთ ვართ და შეგვინდეთ; თუ ამდენს შემინჯეწიებთ და პატივს დამდებთ, მე და ჩემს საცოდავ მეუღლეს ამ სიბერის ქამს ჩვენს საფლავს არ მოგვაშორებთ, კახეთის ნაპირის ალაგნი თქვენ იქონიეთ, მე და თეიმურაზს კი მხოლოდ ჩვენი საქვალე ალავერდი და მისი გარეშემონი დაგვირჩინეო; თავად ღმერთიც დაგიმადლებთ და ქვეყანაც მოგიწონებთო.

მაშ, ისევ კახეთში დარჩენას ითხოვდა თეიმურაზი და მისი სახლობა.

ხოლო, სანამ თეიმურაზი კახეთში დგას და თვითონაც „სანამ პირში სული უდგას“, არ იქნება და არ დააყენებს სპარსელთა სისხლში მარადქამეულად გასვრულ უქარქაშო ხმალს თეიმურაზი.

ასე იყო და ასე იქნება.

სანამ პირში სული უდგას, პანიბალი არ დაიშლის საქულველ რომთან ხმალთაკვეთებას.

სანამ პირში სული უდგას, თეიმურაზი არ დაასვენებს სპარსელების სისხლზე დაგერშილ უქარქაშო ხმალს.

ამიტომ „რალაცნაირად“, მოიარებით და „მოალერსებით“ უარი უნდა უთხრას როსტომ მეფემ კახეთის მეფე-დედოფლის თხოვნას.

და გამონახა „ილათიანმა“ მეფემ „ალერსიანი უარის“ გზა: მალალი ღმერთი ძყავს მოწმედ, რასაც თქვენ მთხოვთ, მისი აღსრულება თქვენთვის არა მშურსო, ამბობდა მეფე, მაგრამ ვაითუ უფრო ცუდად დატრიალდეს საქმეო; თქვენი შვილის ტყვედ ჩავარდნა და თეიმურაზის დამარცხება ყაენს აქამდისინ უკვე მოეხსენებოდა და, ვაითუ ყაენმა თვითონ თქვენ და თეიმურაზი თავის კარზე პირადად გაგიწვიოთ; და ეს რომ მოხდეს, მაშინ ხომ სამიდღემჩიოდ მოითხრებით ძირფესვიანადო!

სწორედ ძლიერად იყო ნათქვამი.

„იღბლიანი“ გამოდგა ხორეშან დედოფლის პასუხიც და ახალი სათხოვარიც: რაკი კახეთს არ დაგვედგომება, ეს წყალობა მაინც გვიყავით, იმერეთს წასვლის ნება მოგვეცით და თანაც იმდენი ცხენი და ჯორი გვათხოვეთ, მე და ჩემი სვეგამწარებული მეუღლე ქუთათისამდე რომ ჩავგიყვანოსო.

ეს თხოვნა კი „დიდის სიამით“ მიიღო როსტომ მეფემ. მაშინვე უხვად და გულმოდგინებით შეუდგა „მარად მოუშორებელი“ კახელი გვირგვინოსნების კახეთიდან გასტუმრებას (გინა — „ფეხის ამოკვეთას“): „ხუთასის თუმნის ფეშქაში მიართვა და ხუთასი ცხენი და ჯორი ათხოვა და კათალიკოზი თავისის ჯარით თან გაატანა და კახთ უბრძანა: ვისაც გინდათ, ჯალაბობრივ თან გაჰყევითო და ვისაც გინდათ თავკაცათ თან გაჰყევითო, ჩვენ კიდევ გვიაჰებისო და დაგიმადლებთო“.

იყო 1648 წელი.

თეიმურაზ მეფე ისევ მიდიოდა კახეთიდან, ამოწყვეტილი ოჯახით, შეფერთხილ-შეთხელებული ამალით, გატეხილი გულთ, გამშრალი ცრემლსათხეველით.

წავიდა — „კახეთით აიყარა, ქართლი შეიარა, იმერეთს გარდავიდა“.

ხოლო როსტომ მეფემ დათუნა ბატონიშვილის წარკვეთილი თავი, კიდევ სხვა კახელ აზნაურთა თავები და კახეთის სამეფო დროშა, ბოქაულთუხუცესის ელიზბარის (ლუარსაბ ბატონიშვილის ბიძა — დედის ძმა) ხელით შაჰ აბას II-ს გაუგზავნა სპარსეთში.

შაჰი ყანდაპარს სალაშქროდ ემზადებოდა, როცა საქართველოდან ეგზომ „სასიხარულო ფეშქაში“ მიართვეს. ალტაცებაში მოვიდა შაჰი, რადგან ლაშქრობის წინ ასეთი ძღვენი „ულურისათვის კარგ ნიშნად“ მიიჩნია და მაშინვე შესაფერიისი საბრძანისიცი გამოაქვეყნა: კახეთი ქართლთან ერთად როსტომ მეფეს დაუმტკიცდესო!

ეს იყო მთავარი.

ხოლო „დანარჩენად“ შაჰმა ელიზბარ ბოქაულთუხუცესს „სამახარობლოდ“ განჯაში სამი სოფელი უბოძა. ხუთას ქართველს ძვირფასი ხალათი ჩააცვა. როსტომ მეფეს, ქართლ-კახეთის აწინდელ მბრძანებელს, შაჰმა კიდევ გამოუგზავნა „თაჯი, თომარი, მურასა ხმალი, ყაენი: ფუში, ხალათი და ოქროს იარაღით შეკაზმული ბედაური ცხენი“.

„იღბლიანი“ იყო ქართველთა წარკვეთილი თავებით ასხმული ფეშქაში და „ამიტომაც“ იღბლიანად დაასრულა შაჰ აბას II-მ ყანდაპარული „ილდარი“.

ისევ გაათათრებულმა ქართველებმა და მათმა სარდლებმა — მერაბ-ხანმა და ოთარ-ხანმა ისახელეს თავი ყანდაპარისთვის ბრძოლაში.

ყანდაპარის ციხიონის უფროსობაც ჯერ მერაბ-ხანს ჩააბარა შაჰმა, ხოლო მალე, მერაბ-ხანის მოულოდნელი სიკვდილის შემდგომ, ოთარ-ხანი შეიქნა ყანდაპარის მმართველი.

„აბა თუ ამ გამელაენების დღის ანბავი სრულ დაგვეწერა, ტირილისგან კაცი ველარ წაიკითხავდა. ამისთვის მოკლებით დაიწერა“.

ფარსადან გორგჯანიძე

ქუთათისის სასახლეში ალექსანდრე მეფესა და დარეჯან დედოფალს მოახსენეს, როსტომ მეფეს თქვენი მამა თეიმურაზი კანეთიდან გამოუხევებია და ქუთათისისკენ მოეშურება სვეგამწარებული მეფე ჯალაბით და ამალითო.

დარეჯან დედოფალმა შეიცხადა მშობელთა ახალი უბედურება; დათუნას სიკვდილი კი არც მისთვის გაუმხელიათ ჯერჯერობით და არც ალექსანდრესთვის.

ალექსანდრე მაშინვე შესახვედრ თადარიგს შეუდგა. წინასწარ გენათელი ეპისკოპოსი და ზემო იმერეთის თავადები გაგზავნა შესაგებებლად. „ყველგან ნუზლი და სამასპინძლო მზად დაახვედრეს“ საიმერეთოს მომავალ კახელებს.

თვითონ ალექსანდრე მეფეც გაეშურა „დიდის ჯარითა, მიეგება, ნახეს ერთმანეთი, შექმნეს ტირილი და თავს ცემა“.

გენათელ ეპისკოპოსს კახელ კარისკაცთაგან უკვე შეეტყო დათუნა ბატონიშვილის სიკვდილი. ახლა ალექსანდრე მეფე გაიხმო გენათელმა იღუმალ და აუწყა ცოლისძმის დაღუპვის ამბავი. თან ეს დასძინა მაშინვე „ორჯერ ცალ-ცალკე თემის შეყრის თავი იმერეთს არა აქვს, ამიტომ ახლა, როცა დედაშვილი ხორეშანი და დარეჯანი ერთმანეთს შეხვდებიან და მიუტირებენ, მაშინ თქვენ დათუნა ბატონიშვილის სიკვდილიც უნდა გამოაცხადოთ“.

მეტი საშველი არ იყო და იტვირთა ალექსანდრემ ეგზომ სამძიმო სატვირთებელი.

დედოფალი დარეჯანიც გამოჩნდა მოტირალ ქალთა ასაბიით. ჯერ დედას მივარდა, მერე მამას, მოთქმა-გოდებით.

საგანგებოდ გაწყობილმა მოზარეებმაც დააგზნეს ზარი და ზუნი,

უცებ ალექსანდრე მეფემ მხრებზე ხელები ჩაივლო, სამეფო სამოსელნი ჩამოიფხრიწა, თეიმურაზის წინაშე მუხლებზე დაეცა და შეჭბაღელა თავპირის მტვრევით: აღარ გყავს შენი ვაჟკაცი ძე, დათუნა ბატონიშვილი! გმირისა და წამებულის სიკვდილით აღესრულა ურჯულოებთან ბრძოლის ქამსო!

დათუნა მოკვდაო?!

„ბატონი თეიმურაზ და ორნივე დედოფლები, ვით უსულო მკვდარნი“, მიწას დაენარცხნენ.

მაგრამ რა?! მაინც გაჰყარეს სიკვდილისგან სიკვდილის მოწყურალნი.

უქანასკნელი ძე და ძირი მოშლოდა მთელი საწუთროს მანძილზე ჯვარცმულ ხელმწიფეს.

ისევ ცოცხალი იყო, რადგან ჯერ ისევ ვერ მიეთრია აქამდე უმძიმესი ტანჯვით ნათრევი „თავისი ჯვარი“ გოლგოთის თხემზე.

ორმოცი დღე-ღამე გლოვობდნენ იმერელნი კახელი გვირგვინოსნების უბედურებას. „ორმოცამდისინ ტირილი და ზარ იყო. იმერეთის თავადნი და აზნაურშვილნი დილას საღამომ მოუტირებდეს. ვისიც მამული ახლოს იყო, ისინი უმალ მოვიდნენ, ვისიც შორ იყო, ისინი გვიან მოვიდნენ, მრავალი გარდასაბურავი მოიღეს. ალექსანდრე მეფემ გასაკვირვებელი ხარჯი გარდინადა ცოცხალთა და მკვდართა ზედან... ვინც ამათნი ცოცხალნი დარჩნენ, ორმოცდაათს წლამდისინ ამის გლოვასა და ტირილში იყვნენ და მეფემ ალექსანდრემ ბატონს თეიმურაზს და მის თავადებსა და აზნაურთ ყველას ცალ-ცალკე სოფლები და სარჩო გაუჩინა“.

თეიმურაზი კი აღარ ტიროდა.

აღარ ტიროდა, რადგან ცრემლზე უმძლავრეს მწუხარებას მოეცვა იგი.

უსაზღვრო საგოდებელს დაეშრო და დაეშრიტა მისი ცრემლსათხეველი.

„რა არის ესე სახლი ამა უკაცურსა
ქვეყანასა?“

ამირანდარეჯანიანი

როსტომ მეფე კი დინჯად, გულსრულად და თვითდაჯერებით შესდგომოდა აღმოსავლეთ საქართველოს მართვა-გამგეობას.

თეიმურაზ მეფის დაუსვენარი და დაუსრულებელი სამამულო ომებით სისხლდაწრეტილ ქვეყანას როსტომ მეფემ მშვიდობიანობა არგუნა.

თეიმურაზ მეფე დიახაც საქართველოსა და ქართულობის გადასარჩენად იბრძოდა და საამისოდ იგი არც საკუთარ სიცოცხლეს ზოგავდა და არც თანამემამულე ხალხის უმძიმეს მსხვერპლს ერიდებოდა. დიახაც უკეთილშობილეს განზრახვებს ემსახურებოდა მისგან გაღებული სისხლი და მსხვერპლი, მაგრამ ყოველივე მაინც უსაზმნო და უშედეგო აღმოჩნდა.

და აი, როსტომ მეფემ, — თუმცა თვითონაც ხმლის დიდოსტატმა — მაინც მშვიდობიანობის რტოით ხელში დაუნარჩუნა ქართლსა და კახეთს ქართულობაც, ქრისტიანობაც, კერაც, სახლიც, კარიც, ქართული ყაიდის მიწათმეურნეობაც, ქართული წიგნიც და ქართული ზნეობაც.

იმავე .1648 წლის მიწურულს როსტომ მეფემ თავის შვილობილსა და მემკვიდრეს დიდი ქორწილი გადაუხადა. ცოლად შერთო ჩვენთვის უკვე ცნობილი — გათათრებული ადამსულთან ანდრონიკაშვილის ასული — თამარი. საქორწილო ღრეობანი მთელი ზამთარი გაგრძელდა, ხოლო მომდევნო წლის დამდეგს მეფე, მთელი თავისი სამეფო სახლეულით, კახეთის დასავლელად და დასათვალიერებლად გაემართა.

ნადირობით შემოიარა ლილო, სამგორი, სართიჭალა, მანავი, საგარეჯო, შირაქი, ქიზიყი და სრულიად ალაზნის ველი.

ყველგან დანგრეულსა და აოხრებულ სოფელ-ქალაქებს

აღირიცხაედა და ხელახალი აღდგენა-აღორძინების განკარგულებას იძლეოდა.

ათ დღეს ალავერდს შერჩსეი.

ალავერდის აოხრებული და იავარქმნილი ტაძარი სრულიად შეაკეთებინა როსტომმა.

სანამ ტაძარი ხელახლა შენდებოდა, მახამ მარიამ დედოფალი აქ განსვენებულ კახელ მეფეთა და მათ სახლეულთა სულის მოსახსენებლად ეამს აწირვინებდა, პარაკლისს უმართავდა, აღაპს უწყობდა, მეორმოციებს უყენებდა და თვითონაც ყველას ცალ-ცალკე დაიტირებდა.

(მართლაც საოცარი რამ იყო სამეგრელოს მთავრის კარზე აღზრდილი ქალის „ზოგად-ქართული ეროვნული თვითშეგნება“!).

ოცი დღე ალონს იდგნენ და ალაზნის ველზე აფეთქებული ნაირსახოვანი ყვავილების ცქერით ტკებოდნენ.

მერე გრემს მივიდნენ.

შეძრწუნდა მეფე-დედოფალი. დანგრეული და მიწას განრთხმული ესვენა ერთ დროს სიმდიდრით და ბრწყინვალეებით საქვეყნოდ სახელგანთქმული კახეთის სატახტო ქალაქი.

მარიამმა ახლა გრემის ნანგრევები მოიტირა მხურვალე ცრემლით.

ხოლო, „რა როსტომ მეფემ ამ რიგი სახელმწიფო სასახლე ასრე აოხრებული ნახა, საწუთროს გაუტანლობას შეუწყინდა“, მაშინვე თავის გაზრდილსა და მემატიანეს — ფარსადან გორგიჯანიძეს მიუბრუნდა და უთხრა: ერთი რაიმე მუნასიბი ლექსი გვითხარ გრემის სასახლეზედ, იქნებ ნადველი და შეჭირვება გარდამეყაროს გულიდანო.

და თქვა ფარსადან გორგიჯანიძემ „მუნასიბი ლექსი“;

„ღმერთმან ძალ მომცეს სათქმელად გრემის სასახლის ქებაო,
ვისაც გენახოს ეს ასრე, რად გული დაგედებაო,
ესე სოფელი ცუდია, არვის არ გასთავდებაო,
და ამის ამშენი რომ მოკედეს, თქვენ ცეცხლი მოგედებაო“.

არაგინ იცის, მოიწონა თუ არა როსტომ მეფემ ეს უხეირო „მუნასიბი“. ისე კი ბრძანა, შესდგომოდნენ დაქცეული გრემის სასახლისა და ტაძრის ხელახალ აღმშენებლობას.

იმავე ხანს ქართველი საზოგადოებრიობის ყურადღება მიიპყრო სამცხეში დატრიალებულმა ამბებმა.

მკითხველს ახსოვს: 1628 წელს გამოჩენილი ქართველი მამულიშვილი, მარაბდის ბრძოლის გმირი, მანუჩარ III ათაბაგი ბიძამისმა ბექამ მოწამლა, თურქთა ჩაგონებით. იმავე წელს სულთანმა სამცხე (იგივე ჩილდირის, ანუ ახალციხის საფაშო, — ანუ გურჯისტანის ვილაიეთი) სამმართველოდ გადასცა უკვე გაათათრებულ ბექას, რომელმაც ახალი, „თათრული სახელიც“ დაირქვა — ს ა ფ ა რ ფ ა შ ა.

საფარ ფაშა ვახელებით სდევნიდა ქრისტიანობას, ქართულ მამულიშვილობას და ქართულ კულტურას. ქრისტიან ქართველებს უმძიმეს გადასახადს უწესებდა ყოველწლიურ ქონებაზე და შემოსავალზე. „შეჰკვეთა ხარკი ქრისტიანეთა სულზედ დრაპკანი და ყოველსა მოსავალსა ზედა ხილითურთ შვიდისთავი, ცხვარზედ ორი შაური, ზროხაზედ აბაზი, ცხენსა და კამეჩზედ ექვსი შაური, ხოლო საფაშოთ ხარკი დრაპკანის მესამედი, რომელ არს ათი შაური“. მაღალ-კულტურულ ქართულ მიწათმეურნეობას ოსმალური მიწათმეურნეობა და საგადასახადო განწესება სცვლიდა.

ურჯუკი ისლამიტები მუსრავდნენ და იტაცებდნენ ქრისტიანულ, ქართულ წიგნებს და ნივთებს, ანგრევდნენ ტაძრებს, აგებდნენ მეჩეთებსა და მინარეთებს.

ქეშმარიტი მორწმუნენი და მამულიშვილნი იძულებული იყვნენ ძვირფასი სასულიერო, საერო და სახელოვნებო ნივთები მიუვალ-მიუგნებელ სამალაევებში გადაემაღათ, ან სამცხიდან გაეპარებინათ და საქართველოს სხვა კუთხეებში შეეფარებინათ და შეეხიზნათ.

საფარ ფაშას შემდგომ წესად იქცა: სამცხის, ანუ „გურჯისტანის ვილაიეთის“ ყოველი ახალი მმართველი აუცილებლად სტამბოლს უნდა სწვეოდა და „სათანადო მისართმეველის“ (ანუ „ქრთამის“) გაღების შემდგომ ხონთქარს უნდა დაემტკიცებინა.

საფარ ფაშა რომ მოკვდა (1635 წ.), მისი შვილი უ ს უ ფ

ფაშა ეწვია სტამბოლს ქრთამით წელგაზნეკილი... და დაბრუნდა იქიდან „წელგამართული“ და ფაშად წოდებული.

უსუფ ფაშაც „იყო ფრიად მაჰმადიანი“, ქრისტიანობა-ქართელობის მომტერე და დამაქცევარი. იგი „მოიძულვებდა ქრისტიანობასა და შესძინებდა ჰაჰმადიანობასა და აღმოიფხვრებოდნენცა წესნი და რიგნი ქრისტიანობისანი ყოველნივე და შეემატებოდნენ მაჰმადს, ვინადგან განაგებდა და გარდავლიდა დღეთა თვისთა ნებითა მათითა და სჯულითა“.

უსუფ ფაშას ერთი ასული ჰყავდა — ელენე, საოცრად ლამაზი, სათნო და გონებიერი გოგონა. ვაითუ ხონთქარმა წამართვას და გამითათროს შვილიო, იფიქრა მამამ და გურიის მთაგურს მალაქია კათალიკოსს გამოუგზავნა, რათა „შეენახა ვიდრე ქვეყნის გარემოება შეიცვლებოდა“.

მალაქიაც შვილივით უვლიდა „თათარი ქართველის“ ქრისტიან შვილს.

გურიაში მაშინ იტალიელი მისიონერები მოღვაწეობდნენ, ბატრი ქრისტიფორე კასტელის მეთაურობით. ელენე ხშირად დაიარებოდა კათოლიკე ბერების წირვა-ლოცვაზე. მალე კათოლიკედ მოინათლა გოგონა. ქრისტიფორე კასტელი იყო მისი სულიერი მამა და მოძღვარი. „მთელს გურიაში ლაპარაკობდნენ ელენეს სილამაზესა და სათნობას“.

უსუფ ფაშა „რაღაცის გამო“ ხონთქარმა სტამბოლს გაიწვია და იქ დააკავა.

ელენეს სიმშვენიერის ამბავმა ისტაჰანს ჩააღწია და ქართველ ქალებზე დახარბებული სპარსული კარი ერთჯერ კიდევ ააფორიაქა. მაჰმა გურიის მთაგურს შემოუთვალა, შენთან შემოფარებული ქალი გამომიგზავნე, ცოლად უნდა შევირთოო. მალაქიას ერანის კართან დაახლოება სწადდა და ელენეს სპარსეთის დედოფლობა „ურჩია“. ელენემ ცივი უარი თქვა „გათათრებაზე“ და „თათრის დედოფლობაზე“. ქრისტიფორე კასტელიც ამას შეაგონებდა — „მტკიცედ მდგარიყო და არ შეეწყნარებინა ურწმუნოს მეუღლეობა“.

ოსმალთა აეშაგებმა გურიიდან სტამბოლს აცნობეს ელენეს გარშემო ამტყდარი ამბები. მაშინვე ხონთქარის ბრძანებაც მოუვიდა მალაქია გურიელს: „ელენე ჩემი ქვეშევრდომია და

ესთვის მინდა, საჩქაროდ გამომიგზავნე, და თუ არ გამოგზავნი, ჩემს რისხვას ვერ გადაურჩებიო“.

მალაქია შავ დღეში ჩავარდა. გამოსავალი აღარ ჩანდა — ან მგელი გაგლეჯდა, ან მგლისფერი ძაღლი. ლევან დადიანს შეუთვალა, მირჩიე, როგორ მოვიქცეო. ლევანმა „არხეინი რჩევით“ უპასუხა: ელენე სამეგრელოში გამომიგზავნე და ხონთქართან ყველაფერი შე დამაბრალეო.

მართლაც ასე მოხდა. ელენე გურიის მთავარმა სამეგრელოს მთავარს გაუგზავნა. ახლა ლევან დადიანი შეუჩნდა გოგონას სპარსეთის დედოფალი უნდა შეიქნეო; სპარსეთის სატახტო ისედაც სულ ქართველებით არის სავსეო; ამიტომ ისტაპანი, კაცმა რომ თქვას, უფრო ქართული ქალაქია, ვიდრე სპარსულიო და იქაურ ქართველობასაც შაჰის ცოლობით, და დედოფლობით ისეთსავე სამსახურს გაუწევ, როგორც ებრაელმა ქალმა ესთერმა იხსნა თავისი ხალხი ძველ სპარსეთშიო.

ისევ უარი თქვა ელენემ. ვერ იქნა და ვერ დაითანხმა იგი ლევან დადიანმა — ვერც „ტკბილი ჩიჩინით“, ვერც მუდარით, ვერც მუქარით. ბოლოს, ვითომც დაჰყვა ქალის ნებას დადიანი. რაკი შენსას არ იშლი, ისევ მალაქია კათალიკოსთან დაბრუნდი გურიაშიო, — და გაუშვა წინასწარგანზრახული კარისკაცების თანხლებით. ამათ გურიის გზიდან გადაუხვიეს, ელენე ქართლზე გადაატარეს და სპარსეთის გზას გაუყენეს. ტირილითა და წუხილით დაქანცული ქალი შაჰს მიჰგვარეს.

ელენე „თათრის დედოფალი“ შეიქნა, მაგრამ ქრისტიანობა მაინც დაინარჩუნა.

უსუფ ფაშა 1648 წელს მოკვდა. დარჩა ერთი ძე, ხარქის ნაშობი, სახელად როსტომი, რომელსაც ხონთქარმა უბოძა მამის მემკვიდრეობა — „გურჯისტანის ვილაიეთის“ ფაშობა.

როსტომ ფაშა მამისა და პაპის ანტიქართულ პოლიტიკას განაგრძობდა დიდის გულმოდგინებით. მაგრამ მის დროს მაინც გაჩნდა „სიახლე“ სამცხის გათურქების უმძიმეს გზაზე.

მანამდე ახალციხის ფაშებს, წარმომავლობით ქართველებს, ხონთქარის კარი პირად გამაჰმადიანებას უბრძანებდა, ხოლო თახის წევრთა გათათრება სავალდებულო არ იყო. ასე რომ,

ცოლები ახალციხის ფაშებს ისევ ქართველები და ქრისტიანები ესვათ. მაგრამ ახლა ხონთქარმა როსტომ ფაშას შემოუთვალა, აუცილებლად შენი ცოლიც უნდა გაამაჰმადიანო.

ქვა ააგდო და თავი შეუშვირა როსტომის ცოლმა, — ცოცხლის თავით ქრისტეს სჯულს არ დავაგდებ და მაჰმადის გზას არ შევუდგებო. მაგრამ არ იქნა და არ მოეშვნენ. ქალმა კლდეზე დააპირა გადაეარდნა. ძლივს მიუსწრეს და გადაარჩინეს. კიდევ არ მოუსვენეს. ქალმა სახრჩობელაში გაჰყო თავი. ისევ მიუსწრეს და არ დაანებეს სიკვდილი. ჩაკეტეს, აშიმშილეს, ამწყურვალეს და ისე დააუძღურეს, რომ საცოდავმა ქალმა ბოლოს ესლა ამოსთქვა: „სანამ სამცხე-საათაბაგოში ერთი ქალიც კი ქრისტიანად დარჩება, მანამ მე ქრისტიანობაზე ხელს არ ავიღებ და ცოცხლის თავით არ გავთათრდებო“.

ქალს იქნება არც კი მიუცია ეგზომი მნიშვნელობა ამ სიტყვისათვის, ხოლო თურქეთის ხელისუფლებამ დაუძღურებული ქალის ეს ჰაიჰარად ნათქვამი ხელზე საბაბად დაიხვია და სამცხე-საათაბაგოში ქალთა გამაჰმადიანებასაც შეუდგა. თითქმის ყველა წარჩინებული ქართველი ქალი „გაათათრეს“. როსტომ ფაშას ცოლიც გასტეხეს და გაამაჰმადიანეს.

ქალთა გაათათრება სწორედ უდიდესი ეროვნული უბედურება იყო.

„მეერთგან იქმნა რისხვა ღმრთისა საათაბაგოს ზედა: განირყუნა წმინდანი ეკლესიანი, შეირია და იავარ-ყვეს ყოველივე უსჯულოთა თათართა, დაიპყრეს და ყვეს წმინდანი მონასტერნი სამროწყლედ და ცხოვართა სადგურად. და დაუტევეს მნეთა ეკლესიისათა და სამღდელოთა კრებულთა, ეპისკოპოზთა და მოწესეთა კაცთა, საყოფელო თვისი, წარიდეს თანა წმიდანი ხატნი და ჯვარნი და ნაწილნი და წარმოვიდეს რომელნიმე ქართლსა შინა და რომელნიმე გურიას და იმერეთს, და დაემკვიდრნენ იგინი სანახებთა ქართლისათა და იმერეთისათა. და რომელნიცა დაშთეს მუნ ნეშტნი ქრისტიანენი, იგინიცა მძლავრებით და იძულებით მიიზიდნეს თვისათ და მცირედ-მცირედ ვიდრე აქამომდე მიდრკეს ქრისტიანობისაგან, და აწ სრულიად არღარა იპოვებიან მუნ მორწმუნეთაგანი, თვინიერ კლარჯეთისა მსხემთა, რომელ არს ჯავახეთი“...

აი, რა „სიახლემ“ მიიპყრო ქართული საზოგადოებრიობის ყურადღება იმ უბოროტეს დრო-ქამში.

მხოლოდ „მიიპყრო“ და მეტი არაფერი, რადგანაც „ყოველ საქართველოს“ თავისი, „საკუთარი“ ტკივილები სტანჯავდა უსაშველო ტანჯვა-წამებით.

იხავ ფანჯარის ირემით

თეიმურაზ მეფეს ძეთაგან აღარცერთი აღარ შემორჩენილა. სამი ვაჟისგან სამივე უკვე მკვდარი ჰყავდა, მაგრამ ბრძოლაზე ხელის აღებას მაინც არ აპირებდა სვეგამწარებული, შვილებანაწყვეტი ბებერი მეფე.

ტანგამხმარმა ხემ ჯერ ისევ სიცოცხლის ნიშატიანი ფესვების ჩხრეკა დაიწყო.

თეიმურაზს შვილიშვილები დარჩენოდა, დათუნა უფლისწულის ძენი — გიორგი, ლუარსაბი და ნიკოლოზი (ერეკლე), და ერთიც ასული — ქეთევანი.

ჯერ გიორგის შესციცინებდა თეიმურაზი დიდის სასოებით. მაგრამ გიორგიც სიკვდილმა წარსტაცა და ლუარსაბი და ნიკოლოზი შემორჩნენ უკანასკნელ იმედად...

ისევ კახეთისკენ მოუწევდა გული კახეთის მეფეს. მხოლოდ ჯარი უნდოდა და ჯარი არ ჰყავდა. არც მის სიძეს ალექსანდრე იმერთა მეფეს შეეძლო დახმარება, ლევან დადიანის გადაძვივდა. ავი სამეგრელოს მთავარი განუწყვეტილვ ლაშქარავდა და აოხრებდა იმერეთს. მით უფრო, თუ ლევან დადიანი ალექსანდრე მეფეს იმერეთიდან გასულს დაიგულვებდა, მაშინვე თვითონ ჯარით „იმერეთს ჩამოუდგებოდა“. რა უნდა ექნა ქუთათისის ფეხებმორყეულ ტახტზე მჯდომარეს, როცა „ლევან დადიანი ძრიელი ბატონი იყო და მეფეს როსტომს მისი და მარიამ დედოფალი ცოლად ჰყვანდა. ყაენიც მწყალობელი და ლაშქრითა და სალაროთ მომხმარებელი ჰყვანდა“.

საგანგებოდ ჩავიდა თეიმურაზი ოდიშს, ლევან დადიანს ესტუმრა და ალექსანდრესთან შერიგებაზე სიტყვა ჩამოუგდო.

თეიმურაზი + ანა

ლევანი

ალექსანდრე

II.

თეიმურაზი + ხორეშანი

დარეჯანი

დათუნა
(დავითი)

თინათინი

გიორგი

ლუარსაბი

ნიკოლოზი
(ერეკლე)

ქეთევანი

თეიმურაზი და ლევან დადიანი ორივე ალექსანდრე კახთა მეფის შვილიშვილები იყვნენ, პირველი — მამით, მეორე — დედით, და ამდენად ბიძაშვილ-მამიდაშვილებად მოხვდებოდნენ ერთმანეთს. ამიტომაც ლევანი ძალიან პატივისცემით შეხვდა თეიმურაზს. კიდევაც აპირებდა დადიანი, დათანხმებოდა თეიმურაზის შუამდგომლობას — შერიგებოდა ალექსანდრეს და ტყვეობიდან გაეშვა მისი ძმა მამუკა ბატონიშვილიც. მაგრამ მაინც იმძლავრა ქუთათისიდან გაძევებულმა და ზუგდიდს თავშეფარებულმა პაატა „წუწკმა“. შეუჩნდა იგი ლევან დადიანს: მტრის შერიგება იმას ნიშნავს, კაცმა ყელი საკუთარი ხელით გამოიჭრასო. და თავისი გაიტანა კიდევ „წუწკმა“, — თეიმურაზი ხელცარიელი და იმედგაცრუებული დაბრუნდა ქუთათისს.

თურქეთიდანაც აღარავითარი იმედი უნდა ჰქონოდა თეიმურაზს, რადგან თურქეთი და ერანი ჯერჯერობით ძაინც „მტკიცედ“ იყვნენ დაზავებულნი.

მაშინ ისევ ჩრდილოეთის გზა ამოიღო მიზანში თეიმურაზი მეფემ.

ისევ რუსეთი!

ერომორწმუნე, „ქრისტესმიერი სამო“ ქვეყანა!

შეუჩნდა ალექსანდრეს თეიმურაზი და დაიყოლია, სასწრაფოდ ელჩები გაეგზავნათ მოსკოვში და დახმარება ეთხოვათ რუსთა ხელმწიფე ალექსი მიხეილის ძე რომანოვისათვის.

1649 წელს მოსკოვში ჩავიდნენ ქართველ მეფეთა ელჩები — თავადი ივანე გრიგოლაშვილი, არქიმანდრიტი პახომი, მღვდელი დავითი და ბერი ვასილი. 13 აგვისტოს ისინი მიიღო საელჩო პრიკაზის უფროსმა — დუმნი დიაკმა მიხეილ გოლოშენინოვმა.

იმერეთის მეფე რუსეთის ხელმწიფეს სთხოვდა „მფარველობაში აყვანას“ და ლევან დადიანის წინააღმდეგ კაზაკების გამოგზავნას. უკეთუ ეს ასე მოხდებოდა და ალექსანდრე სამეგრელოს მთავრის მახარბი შემოსევებისაგან თავს დაიხსნიდა, მაშინ იმერეთს შესაძლებლობა ექნებოდა თეიმურაზს კახეთის ტახტის დაბრუნებაში დახმარებოდა.

თვითონ თეიმურაზი ალექსი რომანოვს 20 000 რუს ჯარისკაცს სთხოვდა დამხმარე ძალებად. თან მოყვრობასაც სთავაზობდა — თქვენი დაი ჩემს შვილიშვილ ლუარსაბს შევრთოთ ცოლად. უკეთუ არც ერთი და არც მეორე არ მოხერხდებოდა, მაშინ თეიმურაზი რუსთა ხელმწიფეს სთხოვდა, ერასოს შაჰზე გავლენა მოეხდინა და კახეთის სამეფო ისევ მისი „კანონიერი მეფისათვის“ დაებრუნებინა.

რომანოვების სამეფო კარზე საქართველოს „დიდსახელმწიფოებრივი საქმეები“ ისევ დააკინინეს და დაანამცეცეს. რუსეთის მთავრობას ისევ არ ეცალა დაღუპვის უფსკრულზე გადახობილი საქართველოსთვის. საერთოდ „სამხრეთული“ ანუ „კავკასიური“ საქმეები ბოლო ადგილზე ჰქონდა გადაჩოჩებული მოსკოვის დიპლომატიურ უწყებას. მთავარი მაშინ ისევ „დასავლეთისა“ და „ჩრდილოეთის“ საქმეები იყო რუსეთისათვის. არც ერანთან და თურქეთთან ურთიერთობის წახდენა სურდათ რუსეთის მესვეურებს. ერანთან ვაჭრობას და ერანულ აბრეშუმს თეიმურაზის „პოლიტიკური წუწუნისათვის“ როდი გასწირავდა რუსთა ხელმწიფე. კაზაკების გაგზავნაც

დასავლეთ საქართველოში რუსეთის თურქეთის „საშინაო საქმეებში ჩარევად“ მიაჩნდა და ამნაირ „გაუფრთხილებელ ნაბიჯსაც“ ინერტიული და დონდლო ალექსი რომანოვი ასე იოლად ვერ გადადგამდა.

ერთადერთი, რაც რუსეთის სამეფო კარზე ძალიან მოიწონეს და უყოყმანოდაც მიიღეს, ეს იყო იმერეთის შესვლა რუსეთის „მფარველობაში“. რუსეთის ხელმწიფეებიც ჩვეულებრივი „მსოფლიო დემობორები“ იყვნენ და იმათაც ძალიან იტაცებდათ ახალ-ახალი ქვეშევრდომებისა და ვასალების აყვანა. მით უმეტეს თუ ასეთი „აყვანა“ ნებაყოფლობის სახით მოხდებოდა.

1650 წლის 10 ივნისს ქართველი ელჩები სამშობლოში დაბრუნდნენ, საჩუქრებით, ტკბილი სიტყვებითა და „სამომავლო“ დაპირებებით დატვირთულნი.

მათ რუსი ელჩებიც ჩამოჰყვნენ — ნიკიფორე ტოლოჩანოვი და ალექსი იევლიევი.

რუსთა ხელმწიფე იმერთა ხელმწიფეს „სიტყვაზე იღერდა“ და „მფარველობაში“ შესვლისათვის „ერთგულების ფიცს“ ითხოვდა.

ხოლო თეიმურაზ მეფეს ალექსი რომანოვი სთხოვდა მოსკოვის კარზე ერთ-ერთი უფლისწულის გაგზავნას. ამკამად ლაზარაკი შეიქნა უფლისწულ ნიკოლოზის გარშემო, თეიმურაზი თავის მხრივ ამას ამბობდა — ნიკოლოზს იმ შემთხვევაში გაგზავნი, თუ რუსთ ხელმწიფე ცოლად თავის დას შერთავსო. ტოლოჩანოვს კი ასეთი თანხმობის რწმუნება თავისი მეუფისაგან არა ჰქონია...

1651 წლის 9 ოქტომბერს იმერეთის მეფე ალექსანდრე III-მ და მისმა დარბაზმა ხელი მოაწერეს რუსეთის მეფის „ერთგულების ფიცს“.

თეიმურაზს ისევ უნდა ეთმინა.

მაგრამ მოთმინების „მარაგიც“ სავსებით დასწრეტოდა

* „დემობორი“ — „ხალხის მკამელი“ — ჰომეროსი უწოდებს ყოველ მეფეს.

ცხოვრების ეამგასულ ეტლში უძლურად ჩაკეცილ მეფე-პოეტს.

იმერეთის სამეფო კარსაც უკვე გასჭირვებოდა მეფის „მეფური“ შენახვა: „ბატონი თეიმურაზი იყო მუნვე იმერეთს, დიდად გლაზაკად, უღონოთ საქურჭლითა და საზრდელითა მოუძღურებული წლისა სამოცდაათისა... და დიდად მოკლებულ იქმნა საზრდელთა და საჭიროთა სახმართავან“.

რუსული სიასამუხრი

სპარსული ხალათის წინააღმდეგ

1652 წელს თეიმურაზმა, ბოლოს და ბოლოს, აღასრულა რუსეთის ხელმწიფის თხოვნა (გინა — მოთხოვნა) — მოსკოვს „ასაყვანად“ და „აღსაზრდელად“ გაგზავნა თავისი შვილიშვილი, ათი წლის ნიკოლოზ დავითის ძე.

უფლისწულს თან მიჰყვებოდნენ: დედამისი ელენე, მამამძებე ლაზარე დავითაშვილი, თავადი ივანე გრიგოლაშვილი და ასკაციანი ამალა.

ჩრდილოეთ კავკასიაში რომ გადავიდნენ, სპარსეთის შაჰის წაქეზებით ყუმიკები დაეცნენ თავს. ყველანი დაძარცვეს, ამალის დიდი ნაწილი ამოწყვიტეს, გრიგოლაშვილიც მოჰკლეს და მისი ცოლ-შვილი სპარსეთის შაჰს გაუგზავნეს. სიკვდილს გადარჩენილებმა თერგს მიატანეს და იქიდან რუსი მეგზურები გაუძღვნენ მოსკოვისკენ.

1653 წლის ნოემბერში, ნიჟნი-ნოვგოროდს რომ მიადწიეს, ქართველებს მეფე ალექსისგან გამოგზავნილი მაღალი კარისკაცები შემოეგებნენ — სტოლნიკი თავადი მიხეილ პროზოროვსკი, აზნაური ათანასე პრონჩიშჩევი და დიაკი გლებ პატრაქევი.

რუსთ ხელმწიფის ბრძანებით, ქართველ სტუმართა სამსახურად ყველას „თავისი ადგილი“ ჰქონია მიჩენილი: თავადი პროზოროვსკი უფლისწულ ნიკოლოზის ეტლს დაუდგა მსახურად.

ჩად, ხოლო ბრონიშჩევი და პატრაკეევი დედოფალი ელენეს ეტლს დაუდგნენ აქეთ-იქით საფეხურებზე. ამათ საგანგებოდ უნდა ედევნებიათ თვალყური ეტლს ბორბალი არსად ჩავარდნოდა ხრამებსა და ღრანტეებში.

27 დეკემბერს მოსკოვს მიადგნენ. ტვერის კარიბჭესთან ქართველებს მიეგებნენ თავადი ხილკოვი და დიაკი დობტუროვი. ქალაქის მოსახლეობაც დიდის ამბით შეხვდა სამხრეთიდან მოსულ „ქრისტესმიერ ნათესავებს“.

1654 წლის 1 იანვარს ნიკოლოზ ბატონიშვილი წაიყვანეს რუსეთის ხელმწიფესთან შესახვედრად. კრემლის სახელგანთქმულ „წახნაგოვან პალატასთან“ ქართველ ყმაწვილს და მის ამალას „სამსაფეხურიანი“ შეხვედრა მოუწყვეს: ჯერ, მისასვლელთან გამოეგებნენ და წარუძღვნენ თედორე კურაკინი, თედორე პლეშჩეევი და გრიგორი ოდინცევი; მერე — კარებთან შემოხვდნენ უფრო მაღალი კარისკაცი — თავადი გრიგორი კურაკინი, თავადი ანდრეი ხილკოვი და ალექსანდრე დუროვი; ბოლოს, ხელმწიფესთან შესახვედრად წარუძღვნენ უწარჩინებულესი ბოიარები — თავადი ალექსი ტრუბეცკოი, თავადი ივანე ხილკოვი და მდივანი სემიონ ზაბოროვსკი.

არასოდეს ყმაწვილ უფლისწულს მისი „ოჯახდაქცეული“ პაპის კარზე ასეთი ზარზეიმი არც უნახავს, არც მოლანდებია. მაგრამ ესოდენ უცხო და თავბრუდამხვევი ბრწყინვალეებით აღსავსე სახელმწიფო სასახლეში ნიკოლოზს თავი მაინც საგსებით თავისუფლად და თვითდაჯერებით ეჭირა. ქედამართული და მხარგამლილი მიაბიჯებდა დიდი სახელმწიფო ტახტისაკენ, სადაც მას დიდი ხალხის ხელმწიფე ელოდებოდა.

ტკბილად და ალერსიანად შეხვდა ქართველ უფლისწულს ალექსი რომანოვი. მაშინვე საზეიმო სადილზე მიიწვია ქართველები. სადილს მეფესთან ერთად ესწრებოდნენ რუსეთის სასულიერო და საერო მესვეურნი — პატრიარქი ნიკონი, თავადები — ტრუბეცკოი, კურაკინები, ხილკოვები.

მეფემ ხელმარჯნივ ნიკონი დასვა, ხელმარცხნივ — ნიკოლოზ ბატონიშვილი და მისი გამზრდელი ლაზარე დავითაშვილი.

ისევე ღირსეულად ეჭირა თავი ყმაწვილს. იგი თავის დიდებულ პაპას — თეიმურაზს ჰპაძავდა. სადღეგრძელოს მოზომი-



ლი სიტყვით ამბობდა და სასმურს დინჯად, აუჩქარებლად სკამდა.

მოხიბლულნი შესცქეროდნენ მასპინძლები სტუმრებს. ძალიან მოსწონდათ ნიკოლოზი, საოცრად ახოვანი, მხარბეჭიანი, სახით სახიერი, წყობილნიკეთოვანი, ძლიერი თვალებით, არ სჯეროდათ, რომ ნიკოლოზი მაშინ თორმეტი წლისა იყო. უფრო თექვსმეტი-ჩვიდმეტი წლისას ჰგავს ეს ქართველი ჭაბუკიო, ამბობდნენ მისი მხილველნი.

სადილი რომ დასრულდა, დიდის პატივით გააცილეს ქართველები. ისევ „საფეხურებიანი“ განრიგებით ენაცვლებოდნენ ერთმანეთს რუსი კარისკაცები ნიკოლოზ ბატონიშვილის სამსახურში. ბინაზე სამსახურისათვის ტრუბეცკოი გაჰყვა უფლისწულს.

ასე განმეორდა რამდენჯერმე — მიღება, ზეიმი, ნადიმი, გაცილება, „განსვენება“.

როცა კი ნიკოლოზი მეფის სუფრას არ ესწრებოდა, ალექსი რომანოვი თავად პეტრე ჩერკასკის ხელით ნიკოლოზს სახლში უგზავნიდა „მის წილ“ სადილს, იმდენს, „რამდენსაც სუფრა დაიტევდა“. თანაც, ჩერკასკის და მის მხლებლებს ევალებოდათ ქართველ უფლისწულთან ელაპარაკნათ ზედმიწევნით „მორიდებით და სიფრთხილით“, ჩაენიშნათ ყოველი მისი ნება-სურვილი და მოეხსენებიათ მეფისთვის.

სრულიად მოსკოვი — „დიდი“ და „მცირე“, კაცი და ქალი — აღტაცებით ლაპარაკობდა ახოვან, მშვენიერ და ჭკვიან ქართველ ბატონიშვილზე.

რუსეთის დედოფალი, მეფე ალექსის თანამეცხედრე — მარია ილიას ასული მილოსლავსკაია მაშინ ფეხმძიმედ იყო და უკვე თვეში იდგა, მაგრამ მან საგანგებო სადილზე მაინც მიიწვია ნიკოლოზ ბატონიშვილის დედა — ელენე დედოფალი. საგანგებოდ წარგზავნილმა თავადთა ცოლებმა მოიყვანეს შინაიდან სასახლეში ქართველი ქალი.

საზეიმო სადილი „ოქროს პალატაში“ გაიმართა. რუს სეფე-ქალთა საკრებულო ძალიან მოიხიბლა ელენეს აღზრდილობით, ნიჭიერებითა და სათნოებით. ბევრი ცრემლიც ჰღვარეს მისი წუთისოდლის ეგზომი სვედავისილობის გამო, მისი მეუღლის — მამაკი მამულიშვილისა და ჭეშმარიტი რაინდის, დავი-

თის (დათუნა) დაღუპვის გამო. ერთი სიტყვით, „ფრიად შეიყვარეს“ ქართველი ქალიც და მისი შვილიც.

12 იანვარს მეფემ პატრიარქ ნიკონს საუბარი ჩამოუგდო თავისი დის — ტატიანა მიხეილის ასულისა და ქართველი უფლისწულის ქორწინების შესახებ (აკი თეიმურაზიც ამას ითხოვდა — ჩემს შვილიშვილს რუსთ ხელმწიფის დაი შერთონ ცოლად). ისე ეტყობოდა, ნიკონი არ იყო მომხრე ასეთი ქორწინებისა.

ხუთი დღის შემდგომ, 17 იანვარს, მეფე ალექსიმ ნიკოლოზ ბატონიშვილი წაიყვანა ზვენიგოროდს, საბა სასწაულმოქმედის ცაძარში. ნიკოლოზის მარხილს სტოპჩი აბრამ სვიაზევი მისცევდა მცველად და მსახურად.

ამის შემდგომ ნიკოლოზ ბატონიშვილი რუსეთის მეფის ოჯახში ყველაზე „მიღებული“ და გაშინაურებული ადამიანი შეიქმნა. იგი ესწრება მეფის ყოველ საზეიმო და შინაურ სუფრას, მეფის გვერდით დგას ყოველ დიდსა და მცირე სახელმწიფოებრივ შეხვედრაზე, უცხოელთა მიღებაზე და პოლიტიკურ საუბრებზე.

უცხოელი ელჩები და სტუმრები პირდაპირ წერდნენ: მოსკოვში მეფის შემდგომ მეორე კაცი ქართველი ბატონიშვილი არისო; მეფე რომ კარეგით მიდის, მეორე კარეგით ქართველი უფლისწული მისდევს, სხვას კი არავის არა აქვს უფლება კარეგით გაჰყვეს მეფესო.

1654 წლის 12 თებერვალს მეფის ვაჟი — ალექსი ალექსის ძე რომ დაიბადა, საზეიმო სუფრაზე უპირველეს საპატიო სტუმრებად მხოლოდ პატრიარქი ნიკონი და ნიკოლოზ ბატონიშვილი ითვლებოდნენ.

იმავე წლის 15 მარტს მეფე ალექსიმ „დევიჩი პოლევზე“ ბოგდან ხმელნიცკის ელჩთა საპატივცემულოდ დიდი სამხედრო აღლუმი გამართა და აქაც მეფის გვერდით ისევ ქართველი უფლისწული ბრწყინავდა, ვითარცა „მეორე კაცი“.

18 მაისს ალექსი რომანოვმა ომი დაიწყო პოლონეთ-ლიტვის მეფესთან — იან კაზიმირთან.

რუს ხელმწიფეს თან მიჰყვებოდა ქართველი უფლისწული. ხოლო რუსულ ჯარებს წინ მიუძღოდა ღეთისმშობლის ქართული ხატი.

ნიკოლოზს წელზე პაპამისის თეიმურაზის ხმალი ერტყა.

დიდი ბრძოლისთვის ემზადებოდა. სული მისდოდა, — როდის გააოცებდა რუსებს თავისი სიმამაცით, შემმართველობითა და „ცხენოსან-ცეროსნობით“.

მაგრამ როგორ გაოცდა და გაოგნდა, როცა მეფემ და მისმა ამაღამ ბრძოლაში პირადად მონაწილეობის მიღება არც თვითონ ინებეს და არც „სტუმარ უფლისწულს“ დაანებეს. გაუკვირდა ქართველ ჭაბუკს, რადგან მის ქვეყანაში ხომ მტერზე პირველი მოიერიშენი, მხედრები და ჯარისკაცები სწორედ მეფეები და უფლისწულები არიან.

რუსთა მხედველობამ გაიმარჯვა, მაგრამ ნიკოლოზი მაინც შეცბუნებული ბრუნდებოდა უკან.

დედამისი ელენე რომ შეხვდა, პირველად ეს ჰკითხა შეილს: რამდენი პოლონელი ლიახი მოჰკალი პაპიშენის ხმლითო. ნიკოლოზს სიწითლე მოერია და ენა დაება...

ისევ „შინაურული ცხოვრება“ ქართველი უფლისწულისა რუსეთის ხელმწიფის კარზე. ისევ მონაწილეობა უცხოელებთან შეხვედრებში. ევროპელები აღტაცებული არიან ნიკოლოზისა და მისი ახლობელი ქართველების ხილვით, გაცნობით. სიახლოვით. ერთი მათგანი — რეიტენფელსი წერს:

„ჩვენ არა ერთხელ გვქონდა შემთხვევა, გვენახა იგი (ნიკოლოზ ბატონიშვილი) მოსკოვში, სადაც ის ცხოვრობდა როგორც კერძო პირი, დედით, უჭკვიანესი და უკეთილშობილესი ქალით. მისი ღირსეული შვილი მეფური ახოვანებისა და სულისა გახლავთ, რაიც ოდნავადაც არ დაუკნინებია მის ავ ბედობას. საზეიმო დღეებში იგი თან ახლავს მეფეს მეორე ადგილზე...“.

ახლა ქართველების გარეგნობა ნახეთ! „მათ აქვთ კუპრით შავი თმა. დიდი, თვინიერი თვალები, არწივისებური ცხვირი, თოვლივით თეთრი კანი: საერთოდ, ისინი ძალიან ლამაზი ხალხია, მათი ქალები ბუნებით ფრიად მიმზიდველნი არიან...“.

.

ფეხს იდგამდა და მუხლს იმაგრებდა „ქართული კოლონია“ რუსეთის გულში.

გეშმარიტის სიყვარულით, მეგობრობით, ძმობით, თანა-

გრძნობით და თანალმობით იშინაურებდნენ რუსები ქართველებს.

შეიყვარეს მოსკოვი და მოსკოველები ქართველებმა.

სალოცავად ქართული სახელწოდების რუსულ ტაძარში დადიოდნენ — ვალდაის „ათონის ივერიის“ ტაძარში.

პატრიარქ ნიკონს გამოჩენილი მხატვრები გაუგზავნია საბერძნეთს, ათონს, ქართველთა („ივერთა“) ტაძრიდან სახელოვანი ღვთისმშობლის გადმოსახატავად. 1648 წლის 13 ოქტომბერს დიდის ზარზედ ჩამოუსვენებიათ „ივერიის ხატის“ პირი საბერძნეთიდან მოსკოვში. 1656 წელს ნიკონმა მეორედ გაგზავნა მხატვრები „ქართული ხატის“ გადმოსაღებად და „ქართული ტაძრის“ სრული გეგმის გადმოსახატავად. სწორედ ამ გეგმის მიხედვით ნიკონმა ააგო ახალი „ივერიის მონასტერი ვალდაიზე“.

ერთად ისმენდნენ „ერთნაირ“ ქრისტიანულ წირვა-ლოცვას ქართველი და რუსი „ქართულ მონასტერში“.

იმავე ხანს მოსკოვში ჩავიდა ელჩობა თუშთა, ფშაეთა და ხევსურთა. მთიელი ქართველობა დახმარებასა და თეიმურაზ მეფის დაბრუნებას ითხოვდა.

დახმარება კი ისევ არ ჩანდა.

ბოლოს, ილაგჯაწყვეტილმა თეიმურაზმა თვითონ გადაწყვიტა რუსეთს წასვლა და წინასწარ მეფე ალექსი რომანოვს ეს წერილი გაუგზავნა:

„დიდ ხელმწიფესა და დიდ მთავარს ალექსი მიხეილის ძემ, დიდი და მცირე რუსეთის თვითმპყრობელს, ვლადიმირის, მოსკოვის, ნოვგოროდის, ყაზანის, აშტრახანის ხელმწიფეს, ციმბირის მეფეს, ფსკოვის ხელმწიფეს და ტვერის დიდ მთავარს, იუგრის, პერმის, ვიატკის, ბულღარის, ნოვგოროდის, რიზანის, როსტოვის, იაროსლავის, ბელოზორსკის, უდორსკის და მრავალთა სხვათა მეფეთა ხელმწიფეს და ივერიის დიდ მბრძანებელს! მე — მორჩილი შენი მსახური, ივერიის მეფე თეიმურაზი მრავალჯერ თაყვანს ვცემ მეფის შენის უდიდებულესობის ტახტსა და მუხლს ვიდრეც უფლისა ჩვენისა იესო ქრისტესა და დედისა მისის ყოვლად წმიდა ღვთისმშობლის წინაშე.“

იყავნ მტერნი შენნი შენთა ქვეშე!

მე შევიტყვე, დღეგრძელო და დიდო მეფეო, წასულხარ ლიახზე სალაშქროდ და როცა ჩემამდე ხმამ მოაღწია, — დღეგრძელი მეფე აღექის მიხეილის ძე მტერზე ლაშქრად მიდისო, მაშინ ჩვენცა გადავიხადეთ მღვდელთმთავრებითა და მღვდლებით პარაკლისი, რათა ღმერთს მოენიჭებია გამარჯვება და ყოველ ჟამსა ამარცხებდე მტერთა შენთა. გარდა ამისა, თავს ვუკრავ მეფისა შენს უდიდებულესობას და თაყვანს ვცემ მეფისა შენის უდიდებულესობის ტახტსა, — მოილოთ მოწყალება, მომაშველოთ ჯარი, რათა დავეუფლო ქვეყანასა ჩემსა, რომელი იგი იყოს ხელქვეითი მეფის შენის დიდებულებისა. ნუ დაგვტოვებთ აგარიანთა ხელში, ნუ მისცემ მტერსა ჩემსა დასარბევად და გასძარცვავდა წმიდა ეკლესიათა და მონასტერთა.

ებრძანებია მეფისა შენისა უდიდებულესობას: „თუ შენ — მეფე თეიმურაზი — გამომიგზავნი შვილიშვილსა, მაშინ მოგაშველებ ჯარსა, რათა დაიუფლო ქვეყანა შენი, იყავნ ხელქვეითი ჩემი და არა სხვათა“.

და მეც აღვასრულე მეფის შენის უდიდებულესობის ბრძანება, — გამოგიგზავნე შვილიშვილი ჩემი და მეც ვარ ხელქვეითი მეფის შენის დიდებულებისა. და ვითარ მე აღვასრულე მეფის შენის დიდებულების ბრძანება, ეგრეცა შენ მოიღე წყალობა — გამომიგზავნე ჯარი, დე იყოს ივერიის ქვეყანა შენს სახელმწიფოდ, ვითარცა სხვა სახელმწიფოებზედა მბრძანებლობ.

როცა შვილიშვილი ჩემი ნიკოლოზი, დავითის შვილი გამოგიგზავნე, განრისხდა შაჰი ჩემზედა, უნდოდა შევეპყარი და წავეხდინე.

მოიღე ჩემზე წყალობა, დამეხმარე ქრისტეს გულისთვის.

ასე მითვლის ყაენი „ან იყავი ჩემი ხელქვეითი, ან წადი, სადაც შვილიშვილი გაგზავნე, — მოსკოვის მეფესთან და იყავი მისი ხელქვეითი“.

აგერ უკვე რვა წელიწადია, რაც ჩემი სახელმწიფოდან განდევნილი ჩავვარდნილვარ დიდს უბედურებასა და შევიწროებაში. ამჟამად ვიმყოფები იმერეთში — სიძის ჩემის აღექსანდრეს სამფლობელოში. მაგრამ იქაცა შაჰი არ მაყენებს. თუ შე-

ნი უდიდებულესობა ინებებს ჯარის გამოგზავნას ამ ქვეყნების დასაუფლებლად, კარგი იქნება, თუ არა, — მაშინ გამოვიგზავნე თერგს ბოიარინი ჯარით, რათა ჯარი ბალყარში მოვიდეს; მეც ჩემის დიდებულებით და შვილიშვილით ლუარსაბითურა მოვალ თერგს და ვიქნები დედოფლით მეფის შენის დიდებულების მფარველობის ქვეშე.

ეგრემც ღმერთმან ინებოს, შემეწიო, — მიბოძო ჯარი ქვეყნისა ჩემის დასაუფლებლად!

გიგზავნი წერილსა ამას ელჩის ჩემის დიმიტრი იეზიკილოვიჩის ტორებინის ხელით და გიგზავნი შენ წმინდა ნაწილს — ფეხის დიდ თითსა დედი ჩემისას, რომელიცა აწამა შაჰ აბასმან სექტემბერსა ცამეტს. ორმოცი წელიწადია, რაც მან იგი აწამა, უწოდებდნენ მას ეკატერინეს.

იყოს წყალობა მეფის შენის დიდებულებისა, რათა მოვიდეს ჯარი ბალყარში თერგს ჩემს წასაყვანად, რათა არ წავხდე აგარიანთაგან, არ იქნას ცოდვა ღმერთისა წინაშე და შერცხვენა კაცთა წინაშე.

მეფე თეიმურაზი,

1656 წელი, 24 აპრილი.

წერილი რომ გაგზავნა, თეიმურაზმა ოჯახი ქუთათის დასტოვა და ამაღლის თანხლებით ბალყარეთისა და თერგისაკენ გაემართა.

ალექსი რომანოვს წერილის წაკითხვისთანავე ბრძანება გაეცა, ჯარი გაამზადეთ ქართველ მეფესთან შესახვედრად. წინასწარ ხელმწიფის საგანგებო რწმუნებული ჟიღოვიჩი გაეშურა თეიმურაზთან ფულითა და სიასამურის სამოსით. თერგზე კიდევ ცალკე ელოდა პრისტავი ანდრეი ველიამინოვი, რომელიც უნდა ჰხლებოდა და წასძლოდა მოსკოვისკენ მიმავალ ქართველ ხელმწიფეს.

ორი წელიწადი გაგრძელდა თეიმურაზისა და მისი ამაღლის მგზავრობა კავკასიონიდან მოსკოვამდე. 1657 წლის 7 მაისს სარატოვს მიაღწიეს და აქედან კიდევ მისწერა თეიმურაზმა ალექსის წერილი: „გთხოვ, ჩემს შესახვედრად წამოვიდეს ჩემი შვილიშვილი ნიკოლოზ დავითის ძე, რამეთუ უკვე ექვსი წელიწადია, იგი აღარ მინახავს. მე დიდი საქმე მაქვს მეფის შენის

უდიდებულესობასთან. თუ ღმერთმან იწება და მეფის შენის უდიდებულესობის ხილვა მომასწრო, მაშინ საკუთარი ჩემი ლექსით ვიამბობ, თუ რა ხიფათი გადამხდა ზღვაზე და ჩერქეზთა ქვეყანაში ჩემი მტრებისგან, რადგან შენის წყალობით გამოგზავნილმა ჯარმა არ დამიცადა და მე მარტო გამოვადწიე ჩემის დიდებულების თანხლებით“.

რუსეთის სახელმწიფო კარმა ქართველი მეფის ღირსეულად შესახვედრად ბრძანებანი გაუგზავნა ბევრი ქალაქისა და მაზრის ვოევოდებს: „გამოგვიგზავნეთ მოსკოვს ასისთაგები და ხალხი ქართველი მეფის თეიმურაზის შესახვედრად. ჩვენთან, დიდ ხელმწიფესთან, ჩამოდის ქართველი მეფე თეიმურაზი. მოსკოვში იგი იქნება მიმდინარე წლის მაისის უკანასკნელ რიცხვებში, და ჩვენ, დიდმა ხელმწიფემ, ვბრძანეთ, — მოუწყონ ქართველ მეფე თეიმურაზს შეხვედრა მოსკოვში ზემლიანოი გოროდის იქით, საელჩო წესის მიხედვით. ამ შეხვედრას, თანახმად ჩვენი დიდი ხელმწიფის ბრძანებულებისა, უნდა დაესწრონ მეფისა პოლკი, მისი ასისთაგები, სტოლნიკები და სტრიაპჩები, მოსკოვის აზნაურები და დასახლებული საასისთაგოების მკვიდრი მცხოვრებნი. დანიშნული ვადისათვის — მაისის ოცდახუთი რიცხვისათვის მოსკოვს გამოგზავნეთ ყველა გამოუკლებლივ, პირადი შემადგენლობა, საელჩოს მთელი მორთულ-მოკაზმულობა“.

1658 წლის 20 ივნისს ქართველები მოსკოვში შევიდნენ, რუსეთის ხელმწიფეს ებრძანებია, — მოსკოვი ქართველ ხელმწიფეს საგანგებო ზარზეიმით შეხვედესო, გაცილებით უფრო ღირსეულად, ვიდრე ყიზილბაშური ერანის წარმომადგენლებს ეხედებითო. „კიტაიაზე, ბელი გოროდში, ზემლიანოიზე, ქუჩებში, სადაც ქართველთა მეფემ უნდა გაიაროს, პოკარზედაც — სადუქნე კარვები, ყაფაზები, მერხები, ხეფენილის ძველი ნამორები — ყველაფერი მილაგ-მოლაგდეს; სავაქროები, რომლებიც არ იკეტება, დაიგავოს, რათა ყველგან სიფაქიზე იყოს“, — ეწერა ბრძანებაში.

ვასკრესენსკის ალაყაფთან სასადილო დუქანი იდგა, კვამლით მხოლოავი ქურით. ეს ქართველებს არ მოეწონებათ თვალშიო, — და ისიც აიღეს და მის ადგილზე საპატიო საგულშაგო გამოართეს.

აუარებელი ხალხი, სახელმწიფო კარისკაცი და მოხელე გამოფენილიყო ქუჩებისა და გზების გასწვრივ, სადაც უნდა გაე-
არა ქართველ მეფეს და მის ამაღლას.

ალტაცებული ხმაურით ესალმებოდნენ და ეგებებოდნენ ქართველ ვაჟკაცებს და მათ ხელმწიფეს, სამოცდაათი წლის მოხუცს, მაგრამ ჯერ ისევ ტანად ტანოვანსა და სახედ სახიერს, მხნედ და ვაჟკაცურად მომავალს.

ყველას ქართველების, ქართველი მეფისა და საქართველოს სახელი ეკერა პირზე. სრულიად მოსკოვი მოეცვა „ქართულ საფიქრალს“ — ქართველთა თავგადასავალს, მის გმირულ წარსულს, მის ქრისტიანულ სჯულიერებას, მის ზნეობას, მის „რუსულ სიყვარულს“ და „რუსთან ძმობის“ სურვილს, ოცნებას...

დიდი საქრისტიანო ქვეყანა ყოფილა საქართველო, გინა ივერია! აგეო, ათას ხუთასი წელიწადი გასულა მას შემდეგ, რაც ქართველები მართლმადიდებლური ქრისტიანობით მონათლულან. თურმე საქართველოს მთავარ ტაძარში, „სხეტაში“ (მცხეთაში) ინახება ქრისტეს კვართიც და ლურსმებიც, რომლითაც ქრისტე გალურსმეს ჯვარზე! თვითონ საქართველოც ჯვარზე ყოფილა გაკრული ურჯულო მაჰმადიანთაგან. ახლა ქართველები რუსების დახმარებას ითხოვენ თურმე, რათა რუს და ქართველ ქრისტიან ძმათა ლაშქარმა იხსნას საქართველო ურწმუნოთა კირთებისაგან!

1658 წლის 5 ივლისს თეიმურაზ მეფე „წახნაგოვან პალატაში“ მიიღო რუსეთის ხელმწიფემ ალექსი მიხეილის ძე რომანოვმა.

ქართველი მეფე რუს გვირგვინოსანს მიეახლა და ხელზე ეამბორა.

ალექსიმ თავზე აკოცა „ქრისტესმიერ ძმას“. გვერდით დაისვა. მოიკითხა და ტკბილის „სიტყვითა“ მწუხარების „ცრემლი მოჰხოცა“..

მეორე დღეს კიდევ შეხვდნენ ერთმანეთს.

ამჯერად ალექსი რომანოვი თეიმურაზ ბაგრატიონს შეეგება ფეხზე ამდგარი, ვითარცა სწორი სწორს, — შეეგება, გადაეხვია და მხიარულად უთხრა:

„ერთმანეთს ტუჩები დავუკოცნოთ, რამეთუ შენც ბრძანდები კეთილმსახური ქრისტეს სარწმუნოებისა. ხოლო, თუ ქვეშევრდომობაში ბრძანდები, ეს არის ნება ღვთისა!“

გადაპოცნა, გვერდით დაისვა და ესეც დასძინა წყნარად და მობოდიშებით: გუშინაც ასე უნდა შეგხვედროდი, მაგრამ „დიდრონი რუსების“ წყენას მოვერიდეთ.

რუსეთის სახელმწიფოს უწარჩინებულესი საზოგადოებით საესე პალატა ფეხზე იდგა და მოწიწებით შესცქეროდა. „ქრისტესმიერ ძმათა-ხელმწიფეთა“ გულითად შეყრას.

ბრწყინვალე იყო ქართველი მეფის საპატივცემულოდ გამართული ნადიმიც. სუფრა და მთელი დარბაზი საგანგებოდ გავესოთ უძვირფასესი ჭურჭლით, ნივთებითა და საგნებით.

სადილის შემდგომ რუსთხელმწიფემ ქართველთხელმწიფეს უბოძა ძვირფასი თასები, ხავერდის, ატლასის და ქამხის ოქრონემსული ქსოვილები და სიასამურნი. შინ სამსახურად თეიმურაზს გაჰყვანენ ბოიარები — ალექსი ტრუბეცკოი, ვასილ შერემენტიევი და ივანე ხილკოვი.

3 ივლისს თეიმურაზმა მეფე ალექსის საპატივცემულოდ საპასუხო წვეულება გამართა.

მერე „საქმიანი მხარის“ განხილვას შეუდგნენ სტუმარ-მასპინძელნი. ალექსი მეფის სახელით თეიმურაზთან მოლაპარაკებას წარმართავდნენ — ჯერ, თავადი ივანე ხილკოვი, შემდეგ — თავადი ალექსი ტრუბეცკოი.

— მე ყველაფერი შევასრულე, რაც ჩემგან რუსთა ხელმწიფეებმა — მიხეილ და ალექსი რომანოვებმა მოითხოვესო, — ამბობდა თეიმურაზი, — ახლა მე მოსკოვს პირადად ჩამოვედი, რათა, ბოლოს და ბოლოს, მივიღო აღთქმული რუსული ჯარი ჩემი ქვეყნის გასათავისუფლებლადო. სულ ოცდაათი ათასი რუსი ჯარისკაცი საკმარისი იქნება, რომ საქართველოც გაგათავისუფლოთ და თვითონ სპარსეთიც დავიპყროთო.

კარგა ხნის „მი-მო-სვლის“ შემდეგ ტრუბეცკოიმ პირდაპირ უთხრა თეიმურაზს:

— ახლა დიდ ხელმწიფეს ომი აქვს პოლონეთისა და შვეციის მეფეებთან, ლაშქარი ომშია ჩაბმული... ხოლო, როგორც კი მეფის უდიდებულესობა თავის მოწინააღმდეგეებს დასძლევს, იგი მოგაშველებს ჯარებსო... მანამდე დაბრუნდი შენს საქართველოში და განაგე იგი, როგორც აქამდე განაგებდი. ხელმწიფე სამგზავროდ გაძლევს ექვსი ათას მანეთს ფულად და ათასი მანეთის ღირებულ სიასამურებს.

რა გაეწყობოდა!

ისევ უნდა „შერიგებოდა ბედს“!

ისევ უნდა ეცადა და ეთმინა ჭაში ჩავარდნილი კაცის მოთმინებით.

შვილიშვილს შეხვდა უკანასკნელად თეიმურაზი — ნიკოლოზ ბატონიშვილს — აქაურ „ფიცხელ სასმელს“ ნუ მიეძალეზით, — დაარიგა, გამოეთხოვა და წამოვიდა.

მაინც უხაროდა, რომ ტანზე რუსულად სიასამური ეცვა და არა სპარსული ხალათი.

ასტრახანს რომ მოადწია, საშინელი ამბავი შეახვედრეს თეიმურაზს: იმერეთს მომკვდარიყო მისი შვილიშვილი — ლუარსაბი — ყრმა კეთილ-მოასაკე, შვენიერი და მჭვრეტელთათვის სატრფიალო“.

მძიმედ გულდადახებრულმა ჩამოაღწია იმერეთს.

და ხორეშან დედოფალიც მიცვალებული და დაკრძალული დახვდა.

რა გაეწყობოდა! ასე გადაეწყვიტა მისი ცხოვრების ბედისწერას: ყველა ახლობელის სიკვდილს უნდა მოსწრებოდა, ყველა მას უნდა გამოეთიჩრა და გამოეგლოვა.

და ერთხელ კიდევ „იგლოვა უმეტეს მწუხარედ“ თეიმურაზმა.

მომდევნო 1660 წელს სიძეც მოუკვდა — ალექსანდრე III იმერთა მეფე.

როსტომ მეფის საწუთროს დასასრული

მაგრამ მთავარი მეტოქე, ვისი ბრალითაც თეიმურაზ მეფე ამდენს ეწამა, ეთრია და ეთავცემა, — რუსეთიდან მობრუნებულს ცოცხალი აღარ დახვედრია...

1652 წელს „ბედისაგან განებვივრებულ“ როსტომ მეფესაც ეწვია უბედურება. მეფე ოჯახით და ამალით მდინარე ხრამზე მისულიყო, მისგანვე წამოწყებული ხიდის („გატეხილი ხიდი“) მშენებლობის „გასაშინჯავათ“.

დედოფალი მარიამიც იქ იყო, ტახტის მემკვიდრე ლუარსაბ ბატონიშვილიც.

ახალგაზრდა, თანამოასაკე თავადიშვილები შეუჩნდნენ ლუარსაბს. მეფე ხუთ-ექვს დღეს აქ დარჩება და, რა იქნება, რომ მანამდე გაღმა ჭალებში გავიდეთ და ირემზე და ღორზე ერთი რჯულზე ვინადიროთ!

აცმუკდა ლუარსაბ ბატონიშვილი, მივარდა და სთხოვა მეფე-მამობილს — გაგვიშვი სანადიროდო. როსტომს რაღაც ვული ეურჩებოდა, მაგრამ ლუარსაბი არ იქნა, არ მოეშვა და ბოლოს მეფეც დათანხმდა.

სანადიროდ გავიდნენ მონადირენი. ადგილები აირჩიეს, საფრები გაიწყვეს, თოფები და მშვილდ-ისარნი მოიმარჯვეს და მოივარგეს. მარეკებმა ღორისა და ირმის ხრონი გამორეკეს. შეიქნა ისრის სტვენა-წივილი და თოფის ბათქაბუთქი.

„ვაიმე მომკლესო!“ — იბღავლა ვილაცამ.

ეს ლუარსაბ ბატონიშვილი იყო.

ტყვიას — ალაღბედად თუ განზრახ ნასროლს — მკერდი შეენგრია ტახტის მემკვიდრისათვის.

სასწრაფოდ სანადირო კარავში შეასვენეს და მეფესთან ჩაფარი აფრინეს.

თავზარდაცემულმა როსტომ მეფემ მაშინვე ელიზბარ ბოქალთუხუცესი გაუშვა „ჰაქიმისა და ჯარას“ (ქირურგი) თანხლებით. თვითონაც უკან მიჰყვა გაოგნებული.

ცოცხალი დახვდა ბატონიშვილი. წამოდგომასაც შეეცადა მამის შესახვედრად, მაგრამ არ დაანებეს.

როსტომმა ქული მოიგლიჯა, მიწას დაანარცხა და თავ-პირში ხელები წაიშინა. მერე შვილს ჩაუჯდა და ჩაეძია, — როგორ მოხდაო, საიდან მოგზდაო, ვინ გესროლაო, საიდან გესროლესო. იქ მყოფთაც დაეტაკა — ახლავე ყოველივე შემიტყვეთო, გამაგებინეთო, გამარკვეითო...

თვითონ ლუარსაბმა ეს უთხრა მამას: თუ გადავრჩი, მე თვითონ ვიპოვნი ჩემს მკვლელს, თუ არა, თქვენ კარგად იყავით და როგორც ამჯობინოთ, ისე მოიქეცითო.

ეს იყო და ეს. შუადღემდე იცოცხლა და მოკვდა.

საშინელი იერემიიდა დადგა ქართლის მეფის სასახლეში.

გლოვობდა და ტიროდა ყველა.

ვილაციებს თურმე კიდევაც შეფარვით უხაროდა „თათარი ხელმწიფის“ მემკვიდრის სიკვდილი.

ხოლო, „ვისაც უხაროდა, ის უფრო სტიროდა და თავს იცემდა აზრის არ მიხვდომითაღვის“.

ტფილისს მიასვენეს ცხედარი.

მხარჩამოფხრეწილნი მიჰყვებოდნენ ქართველი და სპარსელი წარჩინებულნი..

უფლისწულის სისხლიანი სამოსელიც ქართველებსა და სპარსელებს გაენაწილებინათ სატარებლად.

წინ ქრისტიანი მღვდელებიც მოუძლოდნენ ფსალმუნის ღიღინით და სპარსელი მოღვებიც ყურანის ყივილით.

ქართული და სპარსული დროშები ერთად მოჰქონდათ სამგლოვიაროდ შებაფთულნი.

ლუარსაბის ცოლმა, თამარ ანდრონიკაშვილის ქალმა რომ ქმრის სიკვდილი შეიტყო, თავით კედელს დაეტაკა და „ვითაც უსულო მკვდარი შეიქნა“, მაგრამ მაინც გადარჩა სიკვდილს.

ტფილისში ყოველივე წესი ქართულ-ქრისტიანულად აუგეს მიცვალებულს.

მერე სპარსული საწესოების განსრულებით არდაველს წაასვენეს. მთელი არდაველის მოსახლეობა გამოეგება ქართველთა სამგლოვიარო პროცესიას — დიდი და პატარა, ქალი და კაცი, ბეგლარბეგი და მაწანწალა, მოლა და დერვიში.

შაჰ სეფის გვერდით დაკრძალეს ლუარსაბ ბატონიშვილი. არდაველი სეფიანთა „უწმინდესი საძვალე ქალაქი“ იყო, აქი აქ ესვენა ერანის სამეფო დინასტიის „წმიდა წინაპარი“ — სეფი-ედ-დინი.

მხოლოდ როსტომ მეფის „უდიდეს გამავლობას“ შეეძლო მისი შვილისთვის ესოდენი პატივის (არდაველს დაკრძალვის) მოპოება.

.

ლუარსაბი რომ დაიღუპა, როსტომ მეფე მაშინ 87 წლის კაცი იყო.

და ისევ უმემკვიდრეოდ და უშვილძიროდ დარჩენილიყო სამარეში ფეხჩაწვდენილი ბერიკაცი.

ეს მესამედ „არ გაუმართლა“ მემკვიდრემ (მამუკა, ოტია, ლუარსაბი) როსტომს.

და მაინც სცადა მეოთხედ.

თოფნაკრავ ლუარსაბს უმცროსი ძმა დარჩა — ვახტანგი, ესეც სპარსეთში გაზრდილი, იმჟამად ყაზმინის მოურავი. სწორედ ეს ვახტანგი მოისურვა ახლა შვილობილად და ტახტის მემკვიდრედ როსტომ მეფემ. ვახტანგს ვიშვილებ და ცოლად მისი ძმის ქვრივს — თამარს შევრთავო, „თათართა წესით ასე-ერგებისო“, გადაწყვიტა როსტომმა და მაშინვე საამისო თხოვნაც გაგზავნა შაჰ აბას II-სთან ერანს.

შაჰმა როსტომის სურვილი მოიწონა, მაგრამ ვახტანგის დედამ იკივლა: როსტომ მეფემ უფროსი შვილი წამგვარა და მომიკლა, ახლა უმცროსსა და ერთადერთ ძეს ველარ გავიმეტებო; თუ მაინცდამაინც ჩემი შვილის მემკვიდრედ აყვანა არ დაუშლია, საქართველოს მეფობა ისე დაუმტკიცოს და სანამ თვითონ როსტომი ცოცხალი დარჩება, ჩემი შვილიც ჩემთან დარჩესო.

ასეთი პასუხი როსტომ მეფემ ძალიან იწყინა და გაბრაზებით წამოისროლა: „სიღამდისინ ცოცხალი ვარო, თვითონ ვიბატონებო, ხოლო ჩემს უკან ვისაც უნდათ იმას მისცენო“ ტახტიც და გვირგვინიცო.

მაგრამ მაინც ველარ დაისვენა უმემკვიდრეოდ როსტომ მეფემ. ისევ შეიქნა ლაპარაკი ვახტანგზე, მაგრამ ისევ ჩაერია სიკვდილი: ვახტანგი რალაც ავადმყოფობამ შეიპყრო და გარდაიცვალა სავსებით ყმაწვილი კაცი.

მაშინ მეხუთედ „სცადა ბედი“ როსტომ მეფემ.

ამჯერად ბაგრატიონების მუხრანულ შტოს შიადგა „მემკვიდრის უკმურით“ შეპყრობილი ბებერი ხელმწიფე.

ეს იყო ვახტანგ მუხრან-ბატონი, მარაბდის ბრძოლაში დაღუპული თეიმურაზ მუხრან-ბატონის ძე, გიორგი სააკაძის შვილიშვილი დედის ხაზით (აკი თეიმურაზ მუხრან-ბატონის მეუღლე გიორგი სააკაძის ასული იყო).

ძალიან „უყუარდა როსტომ მეფეს“ ვახტანგ მუხრან-ბატონი, რომელიც ყოველთვის „იყო საქმის ხელ-გამომავალი, მხნე, ახოვანი და გამარჯვებული“.

თეიმურაზ მეფესთან ბრძოლაშიც ხომ პირველი უდგა მხარში ვახტანგი ქართლის მეფეს.

და აი, უკვე, მეხუთედ, შვილად, გინა მემკვიდრედ, გინა

„ჯანიშინად“ (მოადგილედ) როსტომ მეფემ აირჩია ვახტანგ მუხრან-ბატონი და დასამტკიცებლად გაგზავნა ერანს.

შაჰ აბას II-ის კარზე ვახტანგი მისვლისთანავე „დიდად მიიჩნევს“ და „დიდი ბატივიც“ მიაგებს. მთავარი მაინც ეს იყო: მაშინვე „შეუკვეთეს სჯული მაჰმადისა“. ბევრი იუარა ვახტანგმა, მაგრამ ბოლოს, რაკი სხვა „არღარა ღონე ჰქონდა“, ისიც „გათათრდა“. შაჰმა ქართლის მომავალი მეფე დაამტკიცა, ახალი სახელი — შაჰ-ნავაზ დაარქვა, კვლავ მრავალი „წყალობა უყო, მრავალი მოსცა“ და ასე გამოისტუმრა საქართველოში.

იმ წელს (1654) სვეტიცხოველის გუმბათი ჩამოგდებულიყო და როსტომ მეფე მისი აღდგენით იყო გართული. კიდევაც განასრულა დიდებული ქართული ლავრის აღდგენა და ამის შემდგომ ველარც შეძლო ქვეყნის მოვლა-პატრონობა წელთა სიმრავლით დამძიმებულმა.

ქართლის ნამდვილი გამგებელი შეიქნა ვახტანგ „შაჰ-ნავაზი“.

კახეთი ისევ სალიმ-ხანს მისცა სამმართველოდ ერანის შაჰმა.

როსტომ მეფე ისევ ერანის ყულარადასად და ისფაჰანის ტარულად ითვლებოდა. უკანასკნელ წლებში ერანის სატახტოს სამმართველოდ, თავის ნაიბად (მოადგილედ) როსტომმა გაგზავნა ფარსადან გორგიჯანიძე...

ხოლო, სანამ როსტომ მეფე მწოლიარობდა და „დაწოლილი ღხინობდა და განისვენებდა“, მანამ ვახტანგ შაჰ-ნავაზი ქართლის მეფობას თავისად განიმტკიცებდა, ქართლის ზვიად თავადობას „საკუთარ“ ხელმწიფობას „აჩვენდა“ და „აგუებდა. ზოგს იმოყვრებდა და „ნებიერად“ იერთვლებდა, ზოგსაც ხმაღზე ხელდადებით „იარშივებდა“. ყოველივე ამას როსტომ მეფისაგან „მიფარვით“ აკეთებდა ვახტანგი. მეფისგან იღუმალ, მეფის ბევრი „კარგი ყმანი შემოიფიცა“ მეფის „შვილმა“ და „ჯანიშინმა“. ნოდარ ციციშვილს ასული სთხოვა თავისი უფროსი ვაჟის — არჩილის საცოლოდ. ზაალ არაგვის ერისთავს თავისი ასული რძლად გაატანა — მისი ვაჟის, ზურაბის ცოლად. კარისკაცებმა „მეფის მალვით“ პატრონობაზე შეჰფიცეს. მარიამ დედოფალსაც კი „საფიცარი“ გამოსცინცლა „ახალმა გერმა“.

როსტომი ყველას უკვე ამ ქვეყნიდან „გარდასულად“ მიეჩნია.

ერანის შაჰსაც საქართველოდან ცნობები მოსდიოდა: თვითონ ვახტანგ შაჰ-ნავაზი ატყობინებდა: „მეფე მოუძღურდა სიბერითა და საღმობიერ იქმნაო“; ზოგიც პირდაპირ მეფის სიკვდილს აცნობებდა, ზოგიც „მოსიკვდილებას“.

ფარსადან გორგიჯანიძე გამოგზავნა შაჰმა საქართველოში: თუ გიყვარდე, წადი და შენ მაინც ჩამომიტანე ნამდვილი ამბავი — მოკვდა თუ დარჩა როსტომ-ხანო.

ჩამოვიდა საქართველოში ფარსადან გორგიჯანიძე და ჩამოუსწრო ცოცხალს როსტომ მეფეს. ფარსადანმა შაჰის გამოგზავნილი ხალათი რომ გადასცა, ბალღივით გახარებულმა მეფემ უძღური სხეული მაინც წამოიქნია, წამოჯდა და ლოგინშივე გადაიცვა შაჰის გულმომწყალებითა და სპარსული მზით საესე სამოსელი.

გორგიჯანიძემ „ნამდვილი ამბავი“ ჩაუტანა სპარსეთში შაჰ აბას II-ს: როსტომ მეფე ცოცხალი დაეტოვე, მაგრამ შეიძლება უკან ჩაფარი მოდევდეს მეფის სიკვდილის ცნობითო. მართლაც ასე მოხდა.

იღვა 1658 წელი.

მომკვდარიყო ბატონიშვილი ქაიხოსრო დავითის ძე, გინა ხოსრო-მიზრა, გინა როსტომ მეფე, გინა როსტომ-ხანი. სისხლით „წმინდა ქართველი“ — მამით ბაგრატიონი, დედით ქართველი გლეხი; რჯულით მაჰმადიანი, სულით — გახლეჩილი „ქართველ-თათარი“. მამაცი მხედარი, დიდი სარდალი და პოლიტიკური თავკაცი; ავი დრო-ყამის ჭკვიანი და მკლავღონიერი ეტლისმწაფელი; დიდი გიორგი სააკაძის აღზრდილი, მისი წყალობით ამალღებულნი და აღზევებულნი; მთელი ნახევარი საუკუნის სიგრძეზე სპარსეთის ტახტ-გვირგვინის „პატრონთა-პატრონი“.

დიდი მხედრული „სახელები“ ჭაბუკობიდანვე მოსდევდა, თუმცა დიდი სახელმწიფოებრივი „სახელოები“ ყოველთვის ასაკმორეულს ეწვეოდა ხოლმე: ისფაჰანის ტარულა შეიქნა 53 წლისა, ერანის ყულარაღასი — 60 წლისა, საქართველოს მეფე — 67 წლისა. მაგრამ მაინც მისი ჩაკირული სხეული და უძერეღ-უშფოთარი გული საკაციშვილო წუთისოფლის სა-



თავდადმართო „მეორე ნახევარს“ ჭაბუკური აღმავლობის წლებად აქცევდა. სიბერე მისთვის თითქოს ზრდა იყო, დავაყ-
 კაცება და არა მიხრწნილება.

ამიტომაც მისი ტარულობა გაგრძელდა 40 წელი, ყულარა-
 ღასობა — 33 წელი, ქართლის მეფობა — 26 წელი.

და აღესრულა შობითგან 93 წლისა.

ორდღიანი „ქართული ტირილის“ შემდგომ სპარსეთს წაას-
 ვენეს და ყუმში დაკრძალეს, დიდი შაჰ აბასის გვერდით.

ბ ა შ ა მ ი ე მ ა მ ა

ბ ა ხ ტ რ ი ო ნ უ ლ ი

„ქართველები მთელს აღმოსავლეთში და,
 შეიძლება ითქვას, მთელს მსოფლიოში,
 საუცხოო ჭიშის ხალხია. ამ ქვეყანაში მე
 არ შემხვედრია არც ერთი უშნო ადამი-
 ანი, კაცი იქნება ეს თუ ქალი; ვხვდებოდი
 მხოლოდ ანგელოზისებრ სახეებს. ქალების
 უმეტესობა ბუნებას ისეთი სინატიფით
 დაუჭილდოვებია, როგორსაც ვერსად ვერ
 შეხვდებით. ვფიქრობ, შეუძლებელია მათ
 თვალი მოჰკრათ და არ შეგაცვარდეთ.
 ქართველ ქალზე უფრო მშვენიერი სახისა
 და ტანის დახატვაც კი შეუძლებელია.“

ქ ა ნ შ ა რ დ ე ნ ი

ტ ა ხ ტ ზ ე ა დ ის ვ ა ხ ტ ა ნ გ მ ე ხ უ თ ე

როსტომ მეფის გარდაცვალების წინა დღით მარიამ დე-
 დოფალს მისი დავალებით გადაწერილი „ქართლის ცხოვრე-
 ბა“ მოართვეს („მარიამისეული ნუსხა“).

მეორე დღეს სპარსელმა ხანებმა მარიამს ქმრის დატოვება აცალეს, მერე ტფილისის ციხეში „შეიყვანეს“ და უთხრეს: „შაჰის ბრძანება გახლავთ, ამ დღეებში, თქვენი მიცვალებული ქმრის კვალზე, თქვენც ერანს უნდა წაგიყვანოთო.“

მარიამმა მაშინვე სარდალი პაპუნა ციციშვილი იხმო, თეთრი თმა აიკვეცა, ანაკვეცი წერილთან ერთად გადასცა და შაჰთან აფრინა სპარსეთს.

ციციშვილმა შაჰ აბას II-ს მარიამის წერილი გადასცა, მისი თეთრი თმის ანაკვეცი აჩვენა და სიტყვიერადაც ბევრი რამ სასიკეთო უამბო ამ საოცარი ქალის შესახებ. ამიტომ პატივი ეცით, დაინდევით და საქართველოდან ნუ გამოადგმევინებთ ფეხს მარიამ დედოფალსო, შეევედრა პაპუნა შაჰს.

კარგით, თქვა შაჰმა, მაშინვე რაყაში გაამზადა და ციციშვილს გამოატანა ვახტანგ შაჰ-ნავაზთან.

რაყაში ეწერა: ამიერიდან ქართლის გამგებლად, ვითარცა „ვალი“, გინა „ჯანიშინი“ — ინიშნება ვახტანგ შაჰ-ნავაზი, რომელიც ქართლის გამგებლობის გარდა, ცხადდება გარდაცვლილი როსტომ-ხანის ყოველი ქონების მემკვიდრედ და პატრონად, მათ შორის — აწ დაქვრივებული მარიამ დედოფლის პატრონად. შაჰი საგანგებოდ ბრძანებს: ვახტანგ შაჰ-ნავაზმა ცოლად უნდა შეირთოს მარიამ დედოფალი! (ასეთია „კეთილი სპარსული წესი და ადათი“. არავითარი მნიშვნელობა არა აქვს „ქართულ ახირებას“. — ვითომც საძრახისი იყოს შვილობილისა და დედობილის შეუღლება!).

„არავითარი მნიშვნელობა“ არა აქვს არც იმას, რომ ქართლის ახალი ხელმწიფე უკვე კარგა ხნის ცოლშვილიანი კაცია. ვახტანგს ცოლად ჰყავს როდამი, ყაფლან ბარათაშვილ-ორბელიშვილის ასული, „ქალი ფრიად პატიოსანი და შემკული ყოვლითავე საქმითა კეთილითა, სრული სწავლითა სამღთოთა და საეროთა, შვენიერი და პირის-წყალი დედათა“.

მერე და, ჰყავდეს როდამი ცოლად ვახტანგს, არავინ მის განტევებას არ მოითხოვს. ოღონდ მარიამ დედოფალი კი უეჭველად უნდა შეირთოს. სპარსული წესით „უკეთესიც იქნება“, თუ ვახტანგს ორი ცოლი ეყოლება!

რაღა გაეწყობოდა! „ვერლარა ურჩ ექმნა ყაენსა“ ვახტანგი და შეირთო ცოლად მარიამ დედოფალი. როსტომის გარ-

დაცვალებიდან ორმოცის თავზე „ქმნეს ქორწილი სახელოვანი“.

ეს მარიამ დედოფლის მესამე ქორწინება იყო.

სანამ ვახტანგ მუხრან-ბატონს როსტომ მეფე მემკვიდრედ აიყვანდა, მანამ ზაალ არაგვის ერისთავი და ელიზბარ ქსნის ერისთავი როსტომთან ერთად „ერთ ბანაკში“ იყვნენ, მაგრამ მუხრან-ბატონის მომავალი მეფობა ერისთავებმა იუკადრისეს და მაშინვე მას მტრად გადაეკიდნენ. დაიწყო იმით, რომ ზაალ ერისთავმა უარი თქვა, რძლად წაეყვანა მის ვაჟზე, ზურაბზე, დაწინდული ასული ვახტანგ მუხრან-ბატონისა. მერე ზაალ ერისთავმა ერანის შაჰს კახეთის მმართველობა „გამოსძალა“ და ლამის „დამოუკიდებელ ხელმწიფედ“ გამოაცხადა თავი. იმ ხანად იმერეთ-სამეგრელოს შორის ისეთი ორომტრიალი ატყდა, რომ აღმოსავლეთ საქართველოდან ვახტანგ მუხრან-ბატონის მეთაურობით ჯარები უნდა წასულიყო დასავლეთ საქართველოში. მაგრამ ზაალი და ელიზბარი უკვე სალაშქრო გზაზე შემდგარ საომარ ძალებს თავიანთი ჯარებით გამოეთიშნენ, ავლაბარს მივიდნენ და ლოგინად ჩავარდნილ როსტომ მეფეს ჭემალ-ხანი მიუგზავნეს და შეუთვალეს: სანამ ცოცხალი ბრძანდებით, თქვენს გარდა სხვას ვისმეს მბრძანებლად არ ეავიკარებთ, ხოლო თქვენს შემდგომ მხოლოდ შაჰს დავემორჩილებით და სხვას არავისო.

ძალიან გასაგებად იყო ნათქვამი. გულზავიანი და „თავგამზიდავი“ ფეოდალები „საკუთარი ჯიშისა და სისწორის“ წინ წასწრებას ცოცხალის თავით ვერ ურიგდებოდნენ. უფრო მეტიც: თვისტომის აღზევებას უცხოურ უღელში თავის გაყოფას ამჯობინებდნენ!

ასეთი იყო „ხასიათი“ მაშინდელი ქართველი არისტოკრატი „მამულიშვილისა“!

ვახტანგმა ერისთავებთან ზავის ჩამოგდება სცადა, მაგრამ არაფერი გამოვიდა.

როსტომი მოკვდა. ვახტანგი გამეფდა. მაგრამ ზაალ ერისთავმა ქედი მაინც არ მოიხარა. იგი „უკუნ იქცა დუშეთს და არღარა ინება მონება ვახტანგისა“.

ვახტანგმა „დრომდე“ გადასდო გაურჩებულ ფეოდალებთან ანგარიშსწორება.

ასე იწყებდა მეფობას ვახტანგ მეხუთე (1658 — 1675 წწ.) — პირველი მეფე ბაგრატიონი „მუხრანული შტო-ისა“.

„დიდი ბუდე“

მუხრანის ბაგრატიონთა წრე თავიდანვე მაღალნიჭიერი, მაღალზნეობრივი და მაღალმამულიშვილური სულისკვეთებით გამოსჩანდა, ზოგადქართული კულტურული და პოლიტიკური ცხოვრების გზაზე. ბაგრატიონთა ეს „უმცროსი შტო“ ყველა თაობაში გამოირჩეოდა დიდი მწიგნობრობით, განათლებით და განსწავლულობით, სამშობლო ქვეყნის დიდი წარსულის ღრმა ცოდნით და თავყვანისცემით, საერო და სასულიერო აღმშენებლობით, ფართო პოლიტიკური განზრახვებით და ქვეყნის საკეთილდღეოდ უანგარო თავგანწირვით.

1512 წლიდან 1658 წლამდე („მუხრან-ბატონთა შტოს“ გამოყოფიდან ვახტანგ V-ის გამეფებამდე) სულ 11 „მუხრან-ბატონური სახელი“ შემოგვინახა ისტორიამ და თერთმეტიდან ცხრა „ზოგადქართულ“ სახელებად გამოკვეთილან საქართველოს მატიანის ქსოვილზე:

ბ ა გ რ ა ტ კონსტანტინეს ძე — პირველი „მუხრან-ბატონი“, „მტუერის ციხის“ აღმაშენებელი, ქართლის შაოხრებელი ავგიორგის მძლეველი;

ა რ ჩ ი ლ ბაგრატის ძე — დიდი მამულიშვილი, ყიზილბაშებთან ომების გამოჩენილი მეთაური, დიდი სვიმონ მეფის უახლოესი თანამებრძოლი, მამულისათვის მოწამებრივი სიკვდილით აღსრულებული;

ა შ ო თ ა ნ ბაგრატის ძე — ერთგული, „სანდო და განზრახი“ თანამებრძოლი დიდი სვიმონ მეფისა;

ე რ ე კ ლ ე ბაგრატის ძე — თურქ-ოსმალებთან ომების სახელოვანი ახალგაზრდა გმირი სამცხესა და ქართ-იმერეთის საზღვრებზე;

დ ე დ ი ს ი მ ე დ ი, ასული აშოთანისა — სამცხის ათაბა-

გის ქაიხოსრო II-ის მეუღლე, დედა მომდევნო ძმათა ათაბაგებისა, თვათონ დიდი მესვეური სამხრეთული საქართველოსი;

ქეთევანი, ასული აშოთანისა — სახელოვანი დედოფალი კახეთისა, ჭეშმარიტი დედა სრულიად საქართველოსი, საარაქო გმირი და სამშობლოსათვის წამებული წმინდანი — წმინდა ნინოსა და თამარ შვიდმნათობიერის ბადალი ქალიმნათობი;

თეიმურაზ ვახტანგის ძე — სიძე გიორგი სააკაძისა, ტაშისკარის და მარაბდის ბრძოლათა გმირი, იქვე მამულისთვის სიკვდილმეყრილი;

ქაიხოსრო ვახტანგის ძე — „ქართლის გამგებელი“, გიორგი სააკაძის მამულიშვილური ბედის თანაზიარი, მასთან ერთად თურქეთის მიწაზე სიკვდილთან წილნაყარი.

და თვითონ ვახტანგ თეიმურაზის ძე, ვისაც მუხრან-ბატონთაგან წილად ერგო, პირველი ასულიყო ქართულ სამეფო ტახტზე. მეფე ვახტანგ მეხუთე მხოლოდ „გარეგნულად“ იყო „თათარი“, ხოლო „შინაგანად“ — სულით, გულით, სიტყვით და საქმით — ნამდვილი მამულიშვილი, ქრისტიანობისთვის (ანუ „ქართლულობისთვის“) თავგამოდებული მებრძოლი და აღმშენებელი, ჭვეყნის შინა-პოლიტიკური და ნივთიერი სიმტკიცისა და სულიერი აღორძინების დაუღალავი თავკაცი, მაღალნიჭიერი სამოქალაქო და სამოსამართლო ხელისუფალი. იყო იგი „კაცი საკვირველი, ძლიერი საქმითა და გამარჯვებული. და ამას სჭირდა ოთხნი ესე საქმენი: ბრძენ იყო უპოველი (სწორუპოვარი), ბედნიერ იყო საკვირველი, სარდალი და მამაცი უამხანაგო (უბადლო), პირად შეუბედავი და გულით მოწყალე უცხოდ“.

იყო ვახტანგ მეფე „ქვრივთა და ობოლთა მოწყალე, მართლ-მსაჯულ და ხელისამპყრობელ, და იყო ყოველთათვის მოსამართლე და მოწყალე, მსჯავრსა შინა პირ-უთნებელ, უქრთამო და სწორის სამართლის მოქმედ, უხვი, უშურველ-უტყუარ, ერთგულთათვის უხვად წყალობის მიმნიჭებელ, ურჩთა და ორგულთა ძლიერად შემრისხველ, დიდებისა და სახელის მაძიებელ, მტერთა მიმართ უძლეველ და ახოვნად წინა-განწყობ, წინააღმდეგომთა თვისთა უშიშრად შემმართველ, რაზმ-

თა და წყობათა შინა კეთილად განმზრახი სარდალი, რაინდობათა შინა უებროდ მორბედი და ყოველსავე სამამაცოსა ზნეობასა შინა უსწორო“.

შვილებიც ერთიმეორეზე უკეთესი ჰყავდა ვახტანგ მეფეს — ყველანი როდამისაგან — ექვსი ძე და ორი ასული: არჩილი, გიორგი, ალექსანდრე, ლევანი, ლუარსაბი, სულეიმანი (სოლომონი), ანუკა და თამარი.

არჩილი, ვახტანგ V-ის უფროსი ვაჟი, გამოჩენილი პოეტი, — „იყო კისკას, შვენიერ, მობურთალი, მოისარი. ყოველის კაცის ისარზედ ერთი ხელის დადება ისარი უგრძეს ჰქონდა. და არა იყო მსგავსი მისი“.

გიორგი, მომდევნო ძმა — „ძლიერი გოლიათებრ, სამხედროთა საქმეთა სრული და ხელგამომავალი. და ასეთი სიტყვა ჰქონდა, მტერნი მოყვრად შეცვალის“.

ალექსანდრე, ყაენის (შაჰის) კარზე იზრდებოდა და „ესეთი იყო, რომ ყოველნი ყმასი ყაენისანი. ვითარცა ყაენსა, ეგრეთ პატივს სცემდენ“.

ლევანი — „იყო ბრძენი და გეცნიერი, შორდამნახავი საქმისა და განსწავლული სამეცნიეროთა წიგნთა“.

ლუარსაბი — „იყო მხედრობის რიგის მცოდნე“.

სულეიმანი (სოლომონი) — „კაცი პატიოსანი“.

ანუკა — „ყაენმან ცოლად წაიყვანა და სულ ერანში მისა სიკეთე ასე განფენილიყო, რაც ქალა კარგს იქმოდა რასმე, იტყოდენ — ანუკა ბატონიშვილისაგან უსწავლიაო“.

თამარი გივი ამილახორის მეუღლე — „შვენიერი დიდად, მსგავსი დედისა, მოღვაწე, მართალი, ღმრთისა და კაცთა მოსაწონი, მაკეთებელი სამლოსა და ეკლესიათა“.

დიდებულადაც აღზარდა მეფემ თავისი შვილები — ყველანი „სახელოვანნი და პატიოსანნი ძენი და ასულნი თვისნი“, ყველანი განანათლა „სახელმწიფოსა სწავლითა და სიბრძნე-მეცნიერებითა“. შეასწავლა სასულიერო მწერლობა, თეოლოგია და თეოსოფია. „ხოლო უმეტესად“ საერო მწერლობა, სახელმწიფოებრივი მართვა-გამგეობა, სამხედრო ხელოვნება და სამხედრო ისტორიანი, „სავაჟაკო გამოცდილებანი“ და „სამამაჟაკო ზნეობანი“.

ერთი სიტყვით, ვახტანგ მეფის შვილები ისეთი სულით

აღიზარდნენ, „რომე არაოდეს არა აღზრდილ არს საქართვე-
ლოსა შინა მათებრივ არცა ძენი მეფეთანი და არცა დიდე-
ბულთანი“.

ასეთი იყო შტოი მუხრან-ბატონ-ბაგრატიონებისა.

ასეთი იყო მეფე ვახტანგ მეხუთე.

ასეთი იყო მისი ოჯახი — „დიდი ბუდე“, რომლის წიაღი-
დან ყველას „საკუთარი სიტყვა და საქმე“ ჰქონდა დაკისრე-
ბული საისტორიო ბედისწერისგან.

ისევ კახეთის საგოჯოვანი

როსტომ მეფისაგან აღორძინებული, კერაგამთბარი ქარ-
თლი ახალი მეფის — ვახტანგ მეხუთის მმართველობის და-
საწყისს კიდევ უფრო დიდი იმედისა და სამომავლო რწმენის
თვალთ ჰხედავდა.

მაგრამ ამდენადვე სახიფათო, სავაგლახო და სავაებო მდგო-
მარეობაში ჩავარდნილიყო კახეთი.

ზაალ ერისთავი თავს იტყუებდა, — თითქოს იგი კახეთის
მმართველი ყოფილიყოს. სინამდვილეში კახეთს სპარსეთის
მოხელე, განჯის გამგებელი — სელიმ-ხანი დასცბრომოდა
თავს.


სელიმ-ხანს ხელმწიფისგან დიდი ამოცანა ჰქონდა დაკის-
რებული.

კახეთის მოსახლეობის გაუტეხლობამ და მისი მეფის —
თეიმურაზის ახალმა, ცხოველმა „რუსულმა პოლიტიკამ“, ერა-
ნის სასახლის კარზე ისევ აღორძინა დიდი შაჰ აბასის უბო-
როტესი განაზრახი — კახეთიდან კახელთა აყრა და მათ ნაც-
ვლად მომთაბარე ელეებისა და თურქმანების ჩასახლება.

ამ განაზრახის აღსრულება ახლა სწორედ სელიმ-ხანს ჰქონ-
და დაკისრებული.

პირველ ჯერზე, ერთბაშად 15 000 მრავალსულიანი თურ-
ქმანული ოჯახი უნდა ჩაესახლებინათ შიდა და გარე კახეთის
მადლიან მიწებზე.

ქართლის მეფე კონსტანტინე II-ის ოჯახი და ბაგრატიონთა
 „მუხრანული შტო“
 კონსტანტინე II



უნდა ჩაესახლებინათ და როგორმე ეს ქოჩად მლოდავნი მიწაზე უნდა დაემაგრებინათ, ხენა-თესვა, შენება და მკვიდრი ცხოვრება შეეთვისებინათ.

ელნი-თურქმანნი ყიშლად-იალადურ ცხოვრებას მისდევდნენ და ქინქლასავით მრავლდებოდნენ. ეს იმას ნიშნავდა, რომ სულ მალე მთელი კახეთი ამნაირი „ქინქლებით“ გატენილიყო, მაღალკულტურული ქართული მიწათმეურნეობა დაქცეულიყო და ყიშლალური ქოჩადმავლობით კახეთის დოკლათიანი მიწები სავესებით გაბერწებულყო.

ასედაც დაიწყო. სელიმ-ხანმა ორ წელიწადში აზერბაიჯანიდან კახეთს თურქმანთა ურდოები კალიასავით შემოუსია და ტანში ტკიპასავით ჩაუჭედა.

ისევ იდროვეს ლეკებმა და კახეთის სოფლებზე აბრაგული შემოსევები განაახლეს. სელიმ-ხანი ლეკთა ყაჩაღობას თითქოს ვერა ჰხედავდა და კახეთის „თურქმანიზაციის“ გულდანდობილად განაგრძობდა.

სპარსეთის ხელმწიფემ შაჰ აბას II-მ ეს საკმარისად არ მიიჩნია და თურქმანული კოლონიზაციის უფრო ფართოდ წარმართვისათვის კახეთში საგანგებოდ გამოგზავნა ერანის მაშინდელი ყულარაღასი და სპასალარი ალ ავერდი-ხანი.

ალავერდი-ხანმა კახეთში სამი ციხე ააშენა: ბახტრიონს, ალავერდს და ყარაღაჯს. საამისოდ ერანიდან ხუროთმოძღვარი, კალატოზები, მშენებლები და ფულიც კი გამოგზავნეს. სამივე ციხეში ძლიერი ყიზილბაშური ციხიონები ჩააყენა ალავერდი-ხანმა. ამ სამ ციხეს უნდა დაეცვა ყიზილბაშობა და თურქმანობა კახელი შურისმგებელი გუნდების თავდასხმებისაგან.

ბახტრიონის დიდი ციხის (სიგრძით ას მეტრზე მეტი) მშენებლობა რომ დაამთავრეს, სელიმ-ხანს კახეთი ჩამოართვეს და ორად გაჰყვეს: მისი სამხრეთ-აღმოსავლეთი მხარე ყარაბაღის ბეგლარბეგს მურთუზ-ყული-ხანს ჩააბარეს, ხოლო დანარჩენი კახეთი — ნახჭევანის ბეგლარბეგს ალი-ყული-ხან ქენ-გერლუს.

ორივე ბეგლარბეგს შაჰისაგან საგანგებოდ ებრძანათ კახეთს მიწებზე თურქმანთა ჩასახლება-გავრცელების დაჩქარება და გაფართოება.

კახეთის ბარში ერთბაშად 80 000 ელი-თურქმანი ჩაასახლეს.

ბარი იქცეოდა და მისი პურისა და ღვინის შემყურე მთიელობაც დაქვევისა და დამეხვის უფსკრულს მისდგომოდა.

ველური ელი-თურქმანი ყრუ გულცივობით სჩეხავდა კახური მზითა და კახელი კაცის სულით აღსავსე ვაზს...

სწორედ ამ უბოროტეს ეამს დაიბადა ეს უბედური, მწარე სიმღერა:

ბახტრიონს სხედან თათრები,
სიტყვას ამბობენ ძნელსაო:
ახმეტას ჩავჭრით ვენახსა,
შიგ ჩავასახლებთ ელსაო!

„ფეხს დაჯვარე, გადავფრინდები
ბახტრიონს გალავანზედა“.

ხ ა ლ ხ უ რ ი

„ვისაც ჩვენ ორ ვებრალეებით,
ჩვენ შევიბრალოთ რისადა?“

ვ ა ე ა ფ შ ა ვ ე ლ ა

საომრად იარაღასხმული ხალხი „აესხა“ კახეთის მთასა და
ზარს.

დაჰქროდნენ შურისმგებლური სახალხო რაზმები, — ხან აქ
და ხან იქ, ყიზილბაშთა და თურქმანთა ზარსაცემად და სისხ-
ლის საქცევად.

ხალხის წიაღში შობილნი შექმნილიყვნენ მშობელი ხალ-
ხისვე ბელადები — ლეგენდარული თუში ზ ე ზ ვ ა გ ა ფ რ ი ნ-
და უ ლ ი და ხეცური ნ ა დ ი რ ა ხ ო შ ა რ ე უ ლ ი, ფ შ ა ვ ე ლ-
ნი — გ უ რ გ ე ნ ჭ ი ნ ჭ ა რ ა უ ლ ი, გ ო გ ო ლ ა უ რ ი და
ძმანი გ უ ლ უ ხ ი ძ ე ნ ი, ა ლ ვ ა ნ ე ლ ი ფ უ ხ რ ა ი შ ვ ი ლ ი,
თუშები — შ ვ ე ლ ა ი ძ ე და ს ა ლ ი რ ი შ ვ ი ლ ი.

• • • • •

გზად ერთი ხუცესი მოდიოდა, დაღლილ-დაქანცული.

თურქმანები შემოეფეთნენ ანაზღაითად. მაშინვე წამოე-
სივნენ, მიწაზე დასცეს და „შეკრეს ხუცესი იგი მძლავრებითა
და შეამთხვიეს საქმე სიბილწისა, რომელ არს ცოდვა სოდო-
მური და განუტევეს“.

უსახლვრო ბოდმითა და სირცხველით გულადუღებული
მღვდელი დუშეთს მივიარდა და ზაალ არაგვის ერისთავს შეჭბ-
ლავლა:

„შენ ზაალ ერისთავი ხარ და კახეთის გამგებელი, გააოზ-
რეს სრულიად კახეთი უსჯულოთა აგარიანთა და მე გზაზედ
შემიპყრეს და შეამთხვიეს საქმე უშვერი და ხელშეკრულ

განმხრწნეს და ყვეს ჩემ ზედა საქმე სათქმელად უშვერი. და აწ ამისა მაგიერი პასუხი ღმერთს შენ მიეც და შენ უნდა გაცე, ვინათგან შენდა რწმუნებულ არს კახეთი“.

მძიმედ ჩაფიქრდა და „დიდად მწუხარე იქმნა“ ზაალ ერისთავი. იგი „ყაენის მომღურავი“ იყო მაშინ. ესეც იცოდა ზაალმა, რომ მთისა და ბარის მოსახლეობას უკვე „თავისით“ დაეწყო ბრძოლა „თათრული უღლის“ ჩამოსაგდებლად და მოძალადედ ჩამოსახლებულ „ურჯულო თურქმანთა“ ამოსაგდებლად. ზეზვა გაფრინდაულის სახელიც ხშირად სმენოდა, გლეხს ხომ ვერ მიანდობდა აჯანყებული ერის მეთაურობას „ერის მესვეური ერისთავი“!

სხვა ცნობებიც ჰქონდა ზაალ ერისთავს: აჯანყების სამეთაუროდ თურმე ემზადებოდნენ მისი სიძე ბიძინა ჩოლოყაშვილი, ძმები შადვა და ელიზბარ ქსნის ერისთავები და ალავერდის ეპისკოპოსი.

სწორედ ესენი შემოიყარა ზაალ ერისთავმა სათათბიროდ დუშეთს. ზეზვა გაფრინდაულიც მოიწვიეს („შემოიფიცნეს მთის კაცნი თუშნი“) და მტკიცედ გადაწყვიტეს აჯანყება „ურჯულო თათართა“ ამოსაწყვეტად და კახეთის გასათავისუფლებლად.

საომარი განაზრახიც განსაზღვრეს და გაითვალეს. საპაემნო ადგილებიც დაიგულეს, საიდუმლო ნიშნებიც დაინიშნეს და გულს დაიდუმეს. ერთმანეთს შეჰჭიციეს, იარაღი „მოივარგეს“ და გაუჩინარდნენ!

ზაალ ერისთავი თვითონ არ წასულა ბრძოლაში. სამაგიეროდ თავისი უფროსი ძე — ზურაბი გაგზავნა არაგველთა ჯარით.

• • • • •

საომარი განაზრახი იყო მარტივი, გაბედული და გამანადგურებელი: ნაშუალამევს, ერთდროულად და ანაზღვეულად, უნდა დასცემოდნენ თათართა მთავარ ბუდეებს — ბახტრიონსა და ალავერდს.

ასე — ორ ნაკადად დაიძრა ქართველთა ლაშქარი: კახელები ბიძინა ჩოლოყაშვილის სარდლობით ალავერდისკენ მი-

ისწრაფიან; ქსნისა და არაგვის ჯარები შალვას, ელიზბარისა და ზურაბის მეთაურობით თიანეთს გადაივლიან, ახმეტას ჩაქულენ და ბახტრიონს მიაღებებიან.

ბახტრიონისკენ მიუძღვის ზეზვა გაფრინდაულიც უკუღმა დაქედნილ ცხენებზე ამხედრებულ მთიელთა ლაშქარს.

1659 წლის...

ნაშუალამევი.

ბახტრიონი.

მოიერიშე რაზმს მიუძღვის ზეზვა გაფრინდაული.

ნაბდით თავწაქრულ პალოებს ზეადმა ურჭობს და საოცარი სისწრაფით არბის ციხის კედელზე.

უკვე კიდევაც მოევლო და გადაევლო, „გადაფრინდა ბახტრიონ გალავანზედა“.

სხვებიც მიჰყვნენ, მთიელნი — თუმნი, ხევსურნი, ფშაველნი კლდეებზე „ჯიხვებრ მხლტომელნი“.

ციხის ალაყაფს დაეტაკნენ.

გუშაგები ჩახოცეს.

ხმლის ჩახაჩუხმა და მომაკვდავთა ბლავილმა ფეხზე წამოაგდო ყიზილბაშთა ბანაკი.

მაინც დაასწრო გაფრინდაულმა კარის გაღება.

ციხეში ნიაღვრად შეაგდეს ქსანელთა და არაგველთა ჯარები შალვამ, ელიზბარმა და ზურაბმა.

ახალად აღმოხდენილ ცინცხალ მზეს მეწამული სამოსელით შეეგება ბახტრიონი.

ყიზილბაშთა უმრავლესობა დაირეცა მათივე სისხლით ატალახებულ მიწაზე.

ერთმა ნაწილმა მაინც მოახერხა გარეთ გაღწევა და ალავერდისკენ გაქცევა.

გამოედევნენ ქართველები.

ალავერდის ციხეში თავშესაფარებლად გარბოდნენ ბახტრიონის ჯოჯოხეთიდან თავდახსნილი ყიზილბაშები და არ კიცოდნენ, რომ ალავერდშიც „ის ჯოჯოხეთი“ დატრიალებულიყო, რაც ბახტრიონში დატრიალდა.

ბიძინა ჩოლოყაშვილს და მის კახელობას ალავერდი უკვე

მელოთ, იქაური ერანული ციხიონი სანახევროდ ამოეღიტათ, დანარჩენ ყიზილბაშობას ალავერდის გალავნიდან გამოეღწია და ბახტრიონის ციხისკენ მირბოდა თავშესაფარად.

სწორედ საოცარი „სახილველი“ იყო: „ბახტრიონელი ყიზილბაშები“ ალავერდს გარბოდნენ, „ალავერდელი ყიზილბაშები“ — ბახტრიონს!

და ზედ შუა გზაზე, ალვანის ველზე, ერთმანეთს შეასკდნენ ორის მხრიდან თავპირის მტკრევით მომლტოლვარე „ოთიო ციხის“ ყიზილბაშობა.

სანამ გონს მოეგებოდნენ, „შესაბამისად“ ორივე მხრიდან წამოეწივნენ და წამოესივნენ შურისგების ცეცხლით ადუღებული ქართველები.

წამოესივნენ და ისე ამოწყვიტეს და დაადუღეს, ცოცხლად ერთი მოამბეც არ გაუშვიათ.

როგორც კარგი მთიბავის ხელით „ლესურად“ მოთიბული ბალახი ისევ ცერზე დადგება ხოლმე, — ასე „ცერზე შეყენებულ ძნებად“ ეყარა დახოცილ ყიზილბაშთა გროვანი.

და სთქვა ზეზვა გაფრინდაულმა:

„როცა დახოცილი მტერი ასე დათიბული ბალახივით ფეხზე დადგება, ხმალი უნდა შეაყენო და ბრძოლის ველს გაშორდე, რადგან მაინც ცოდო არს ადამიანი!“

„ადამიანი?!“

„პო, რამეთუ მტერი მტერია, მაგრამ მაინც არის ადამიანი!“

ცოცხლები მკვდრებს გაშორდნენ.

იმ დღიდან იმ ადგილს — მტრის სისხლით და ძვალ-ხორციით გაბოხილ მიწას — ხალხმა დაარქვა „გ ა წ ყ ვ ე ტ ი ლ ა“.

...„გაწყვეტილადან“ ქართველები თურქმანთა დასახლებებს მოეგნენ და დედაწულიანად გაეღიტეს ყველა, ვისაც ამ დღემდე წილი დაედო კახური ოჯახის დაქცევაში, კახური ვაზის გაჩეხვაში, კახური სალოცავი მიწისა და წყლის შებილწვაში.

„ბახტრიონულმა ომმა“ მტერიც და მოყვარეც ერთჯერ კიდევ დაარწმუნა ქართველი ხალხის გაუტეხლობაში, უძლეველობასა და უკვდავებაში.

ერანოს სასახლის კარმა ეგზომ დიდი მსხვერპლის სამაგიერო დამსჯელი „ილარის“ მოწყობაც კი ველარ შეუბედა სახალხო აჯანყებით აღუღებულ კახეთს.

კახეთის „თურქმანიზაციაც“ შეწყდა.

მხოლოდ აჯანყების მეთაურების დასჯისათვის ზრუნვას შეუდგა სპარსეთის ხელისუფლება (აკი ასე ხდება ყოველთვის: ხალხის რისხვით ზარდაცემული ხელისუფალნი აჯანყებულ ხალხს უცოდველ კრავად ჩასთვლიან და გულის ჯავრს ხალხის მეთაურებზე ამოიყრიან).

ჯერ სპარსელებმა ზაალ ერისთავს დაადგეს თვალი, ვითარცა აჯანყების მეთაურს. ზაალმა თავისი „უდანაშაულობა“ იმით „დაასაბუთა“, რომ აჯანყებაში პირადად მონაწილეობა არ მიუღია და ყველაფერი ალი-ყული-ხან ქენგერლუს „ცუდ ქცევას“ გადააბრალა.

ალი-ყული-ხან ქენგერლუ შაჰმა ბეგლარბეგობიდან გადააგდო და კახეთი მთლიანად მურთუზ-ყული-ხანს ჩააბარა, მაგრამ ზაალ ერისთავი დაუსჯელად მაინც არ დატოვა.

სპარსელებმა არაგვის ბატონის განადგურება ვახტანგ შაჰნავაზს დააკისრეს.

ვახტანგ მეფე ამდენ ხანს თითქოს „განზე იღგა“, თითქოს მას „ბახტრიონული ომისა“ არც არაფერი შეუტყვეია. სინამდვილეში ვახტანგის „ზომიერი პოლიტიკა“ კახელთა აჯანყებაში მის პირად მონაწილეობას გამორიცხავდა, მაგრამ კახელთა შურისმგებლური ხელით სპარსელთა ამოწყვეტას სულით და გულით თანაუგრძნობდა. ხოლო, რაც შეეხება თვითონ ზაალ ერისთავს, მისი პირადი განადგურება ვახტანგს კიდევაც ჰქონდა გულს ამოჰკრილი. საქმე იმაშია, რომ ზაალ ერისთავი ქართლის მეფის განუყოფელ ხელისუფლებას ებრძოდა, ცალკე „ხელმწიფობას“ ჩემულობდა და კახეთის მოტაცებისთვისაც თავს არ იზოგავდა, და ეს ყოველივე მაშინ, როცა ვახტანგ

მეფე, — ვითარცა ქართლის უმაღლესი ხელისუფალი — თვითონ აპირებდა კახეთის შემოერთებასაც და საარაგვოს სრულ დამორჩილებასაც.

მერმე, — როცა დასავლეთ საქართველოში შინაფეოდალური არეულობა ვახუშტა, ვახტანგ მეფე ჭარით წავიდა იმერეთისკენ (იქნებ. დასავლეთ საქართველოს „შემოერთებაზეც“ ოცნებობდა ვახტანგ მეფე?!), ხოლო ზაალ ერისთავმა მაინც-დამაინც მაშინ „აიტეხა“ აჯანყება კახეთში. იმერეთისკენ მიმავალი ვახტანგიც იძულებული გახდა უკან დაბრუნებულიყო.

ერთი სიტყვით, ვახტანგ მეფეს ზაალ ერისთავი უნდა მოესპო არა როგორც კახეთის აჯანყების მონაწილე, არამედ როგორც ქართული მიწა-წყლის გაერთიანების მტერი, თავკერძა და „თავგამზიდავი“ ფეოდალი...

აქ ჩემმა მკითხველმა უნდა გაიხსენოს ზურაბ და ზაალ ერისთავების ძმა — გიორგი, ვითრცე სააკაძის ერთგული ცოლისძმა და თანამებრძოლი. სწორედ სააკაძის ერთგულების გამო, როგორც მკითხველს ახსოვს, ბაზალეთის ცოდვიანი ბრძოლის წინ გიორგი ერისთავს მისმა ძმამ ზურაბმა და თეიმურაზ მეფემ თვალები დათხარეს.

გიორგი ერისთავს ცოლად ვახტანგ მუხრან-ბატონის (ამჟამად მეფე ვახტანგ მეხუთის) დაიპყავდა. გიორგი თვალთა სინათლეს მალე სიცოცხლითაც გადაჰყვა, ხოლო მისი შვილები — ოთარი, ედიშერი, იასონი, პაპუა და დათუნა — ბიძამ (მამის ძმამ) ზაალ ერისთავმა გამოიყარა დუშეთის სასახლიდან. მის შემდგომ გიორგის ძენი ბიძასთან (დედის ძმასთან) — ვახტანგთან ცხოვრობდნენ.

ახლა, როცა ვახტანგ მეფეს ზაალ ერისთავის მოსპობის „საჭიროება“ გაუჩნდა, დისწულებმა დაასწრეს და თვითონ მოახსენეს მეფეს: ბიძა ჩვენი ზაალ ერისთავი თქვენი ორგულე არის და ჩვენც ხომ მის ძმისწულებს მრავალი ავი შეგვეყარა, დავგჩაგრა, გამოგვეყარა, და „ჩვენის სამკვიდროს მამულის პურით არ გვაჭამა“, ამიტომ თქვენ ოღონდ დასტური გვიბრძანეთ და ზაალ ერისთავი ყოფილა და აღარ იქნებოა.

ვახტანგ მეფე — კაცი „პირდაპირი“ და „ურჩთა და ორგულთა ძლიერად შემრისხველი“ — მაშინვე დათანხმდა შუამდგომლობის სისხლმოწყურებულ დისწულთა განზრახვას...

1660 წლის 13 მაისი იყო. დუშეთის სასახლის ეზოში ფანჩატურში იჭდა ზაალ ერისთავი, „ფარალათად“ (შილფად), ახალუხის ამარად, და ნარდს თამაშობდა გულარხეინად.

ანაზღაითად წამოადგნენ თავზე ძმისწულები — ოთარი, ედიშერი, იასონი, პაპუა და დათუნა.

„ბიძაჩემს ვახლავარო“, შესძაბა ოთარმა და წამსვე ხმალი უჭირა შიგ სახეში. ძმებიც წამოესივნენ.

ზაალ ერისთავმა ვერც ხელის განძრევა მოასწრო, ვერც კრინტის დაძვრა, ისე დაესიკვდილა მიწას, ხმლით აკეპილი.

ზაალის შვილებმა — ზურაბმა და ნაბერალმა — დუშეთის სასახლიდან გაასწრეს და სამცხისკენ გაქუსლეს თავაწყვეტილი ჭენებით.

მათი გაქცევა არ გამოჰპარვია ვახტანგ მეფეს. მაშინვე მალემსრობლნი გამოადევნა. ტბის-ყურეზე დაეწივნენ მდევრები დევნილებს. ახალგაზრდა ერისთავებს მხლებლები და მსახურეულნი ამოუწყვიტეს, თვითონ ზურაბი და ნაბერალი ცოცხლად შეიპყრეს და მეფეს მოჰგვარეს. ვახტანგმა მაშინვე ერანს გაგზავნა ზაალის ძენი.

ზურაბი, ვითარცა ბახტრიონის აჯანყების მონაწილე და ერთ-ერთი მეთაური, სპარსელმა ჯალათებმა ციხეში ჩაკლეს, ხოლო ნაბერალი შაჰ აბას II-ე გაათათრა და პირად ღულამად აიყვანა.

არაგვის ერისთაობა ვახტანგ მეფემ მისცა უფროს დისწულს — ოთარ გიორგის ძეს. მეორე ძმას — ედიშერს მეფემ მიანდო „მსაჯულობა საქართველოსი“, ხოლო მესამეს — იასონს — „დედოფლის სახლთუხუცესობა“.

ზაალ ერისთავის განადგურებისთანავე დადგა საკითხი აჯანყების ნამდვილი ბელადების — ბიძინა ჩოლოყაშვილისა და ქსნის ერისთავების დასჯისა.

რაკი საქართველოს „ყოველი საქმე“ როსტომ მეფის შემდგომ ვახტანგ მეფეს „ეკითხებოდა“, ბუნებრივია, ბიძინა შალვა და ელიზბარი სწორედ ვახტანგთან უნდა მისულიყვნენ „კუთვნილი მსჯავრის“ მისაღებად.

მაგრამ ქართველები ქართველს არ ენდნენ. კახეთის აჯანყების მეთაურები ვახტანგ მეფის ნაცვლად ყიზილბაშ მურთუხ-ყული-ხანს ეახლნენ ყარაღაჯში.

სპარსელმა ბეგლარბეგმა სამივე ქართველი — ბიძინა ჩოლოყაშვილი, შალვა და ელიზბარ ქსნის ერისთავნი — მისცლისთანავე შეიპყრო და ერანს გაგზავნა, შაჰის სამსჯავროში.

შაჰ აბას II თავისი დიდი წინაპრისა და სეზნიის მიმდევარი და მიმბაძველი იყო. ეს „პატარა შაჰ აბასი“ დიდი შაჰ აბასივით ცდილობდა, ყოველი დიდი ქართველი თათრობის გზაზე შეეგდო და, თვითონ საქართველოს სამტროდ და საზიანოდ, სპარსეთის „ისტორიის მკედლად“ გადაექცია.

ასე დაუპირეს მაშინ ბახტრიონის აჯანყების ბელადებსაც. სამივეს იგივე უთხრეს, რაიც სპარსეთში მოუსმენია „მილიონ ერთს“: ან მაჰმადიანობა მიიღეთ და სპარსეთის სამსახურში შედით, ან სიკვდილისთვის მოემზადეთ!

სამივემ, უყოყმანოდ, ქართველობაზე ხელის აღებას სიკვდილი არჩია.

ბიძინამ მშვიდად უთხრა შალვას და ელიზბარს:

„ძმებო, ნუ მოვმედგრდებით* და ნუ შეგწმინდებით, რამეთუ სიკვდილი უნებელად** დაბადებიდანვე თან გვახლავს, ვერც ვერავინ წინააღმდეგების სიკვდილსა, და რაკი უნდა მოგკვდეთ, ბარემ მოგკვდეთ ქრისტესთვის და საქართველოსთვის და სამარადჟამოდ დავიმკვიდროთ სასუფეველი!“

არც შალვას და არც ელიზბარს წაქეზება არ სჭირდებოდათ, რადგან არც ერთი მათგანის გულსა და გონებას სხვა რამ აზრი არ გაჰკარებია — მხოლოდ სიკვდილი საქართველოსთვის და ქართველობისთვის!

სამივემ „განბასრეს (გაკიცხეს) და გინებულ ჰყვეს სჯული მაჰმადისა“. სამივემ „ერთხმობით“ სიპარეში ჩასატანად დაინარჩუნა ქრისტიანობა და ქართველობა.

გაცოფდა ერანის მბრძანებელი.

და, — „ვითარცა წესი და ჩვეულება არს თათართა, რამეთუ მკვლელს ხელში მისცემენ მოსისხარასა“, შაჰის ბრძანებით სამივე ქართველი მამულიშვილი მიუგდეს ამ ელ-თურქმანებს, რომელთა ნათესავნი ჩოლოყაშვილისა და ქსნის ერის-

* ნუ მოვმედგრდებით — ნუ მოვეშვებით, ნუ მოვსუსტდებით.

** უნებელად — ჩვენდა უნებურად, ჩვენს დაუქობავად, ჩვენი სურვილის მიუხედავად.

თავთა მეთაურობით ამოწყვიტეს ქართველებმა „ბახტრიონულ ომში“.

აღმათ რამდენჯერ უნატრიათ პირუტყვულად გონებაბრჯგუ ელებს ბიძინა ჩოლოყაშვილისა და შალვა და ელიზბარ ერისთავთა სისხლის დაღევას!

და აი, ახლა აუსრულდათ ეს დღე-ღამ დაუღევნელი სანატრებელი!

და წამებასაც ხომ მრავალი საუკუნის „პრაქტიკულ-ნოვატორული“ ისტორია ჰქონდა ერანულ-თურქმანულ ტომებში.

და აწამეს დიდი ქართველი მამულიშვილნი.

ასოეულებად ასჭრეს და აჰკაფეს.

(„ხოლო უწყალოთა მათ მტარვალთა იწყეს რა მოჰრად თვითეულთა ასოთა ყოველნივე თითნი ხელისა და ფეხისანი მოჰკვეთნეს თვითეულად სახსარ-სახსრად. და მერე, მაჯა-იდაყვნი, და მხარნი, და ფერხნი კოჭებიდგან მუხლებამდე, და ესრეთვე თეძონიცა...“).

ასოეულებად აჭრილნი და აკაფულნი ისრებით დაცხრილეს, მახვილებით დაჩეხეს, ტყვიებით დახვრიტეს.

ბიძინა ჩოლოყაშვილის ნაშთები ევროპელმა კათოლიკე ბერებმა მოიპარეს და იღუმალ დაკრძალეს, საღდაც უცნობ ადგილას.

შალვასა და ელიზბარის ცხედრები, როგორც იქნა, მათმა სვევაშავებულმა მეუღლეებმა გამოიხსნეს, საქართველოში ჩამოასვენეს და ქსნის ერისთავთა საგვარეულო იკორთის მონასტერში მიაბარეს მიწას.

ქართველმა ხალხმა გააღმერთა ბიძინა ჩოლოყაშვილისა და ძმათა ქსან-ერისთავთა სახელები და მათი სამამულიშვილო საქმენი.

ქართულმა ეკლესიამ წმინდანად შერაცხა სამივე გმირი, წამებულნი ერისა და სარწმუნოებისა.

ბიძინა, შალვა და ელიზბარი სამშობლო ქვეყნისათვის თავდადებულის შარავანდედით შემკობლნი შეუერთდნენ იმ სარწმუნოებრივ და საეროვნებო რაინდთა გუნდს, რომელთა შორის ბრწყინავდნენ: რაქდენ მოწამე, დავით და კონსტანტინე, გობრონი, კონსტანტი კახი, შალვა ახალციხელი, თევდორე მღვდელი, ცხრა ძმა ხერხეულიძე და პაატა სააკაძე.

ასე დაასრულა სიცოცხლე „ბახტრიონული ომის“ მეტა-ურთა „თავადურმა წრემ“.

რაც შეეხება აჯანყების წარმმართველ „ხალხურ წრეს“ — ამათთაგანი არც ქართველ მეფეს ენდნენ, არც ქართველ თავადებს, არც სპარსელ ბეგლარბეგებს და არც სპარსეთის შაჰს. იმათ საერთოდ არც უფიქრიათ „რაიმე შერიგება“, ან საერთოდ იარაღის დაყრა და მორჩილებით მუხლის მოკეცვა.

ისევ იბრძოდნენ თუში ზეზვა გაფრინდაული, ხევსური ნადირა ხოშარეული, ფშავი გოგოლაური.

ისევ იბრძოდნენ „სანამ პირში სული ედგათ“.

იბრძოდნენ, რამეთუ შეურყევლად სწამდათ მათი მშობელი ხალხის გაუტეხლობისა, უძლეველობისა, მარადიულობისა.

.

განუხომლად დიდი მოვლენა იყო ქართველი ხალხის მატთანში „ბახტრიონული ომი“.

შესატყვისად — დიდი მეხოტბეებიც გამოუჩნდნენ ამ საოცარ სამამულიშვილო გმირობას — სამი გენიალური, ღვთაებრივ-ნიჭიერი მეხოტბე:

ქართველი ხალხი — „ხალხური პოეზია“.

აკაკი წერეთელი — „ბაში-აჩუკი“,

ვაჟა-ფშაველა — „ბახტრიონი“.

მეფე-მთავართა საომარ სასწორზე

„იყო ამათში მტერობა, ყოვლთ მტერთჳ უბოროტესი,
მისდომ-მოხდომა, ხმლისა კერა პირისა, არა კოტესი“.

• რ ჩ ი ლ •

დაბეჯითებით წერს ბერი ეგნატაშვილი:

„კახნი ჩვეულებისამებრ იყვნენ ერთმანერთისა მეშურნენი და მტერნი და მრავლის ზაკვასა და ჩხუბის მოქმედნი, ლაღნი და ამპარტავანნი, ტანთხაცმისა და სილაშაზის გამომკიდენი და მოყვარენი, რამეთუ ესრეთცა იყო პირველთაგან ჩვეულება მათი“. ხოლო იმერლები თავიდან იყვნენ უბრალო ცხოვრების მიმდევარნი, მართალნი, „წრფელნი და ბატონისა თვასისა ერთგულნი“. მაგრამ, როცა კახეთს მძიმე დღეები დაუდგა და კახელებმა იმერეთში გადახიზვნასა და იქ დარჩენას დაუხშირეს, იმერლებმაც კახელებს „წაბაძეს, ისწავეს კახთა წესი და კიდევ გარდაამეტეს. მიერთგან დამკვიდრდა იმერეთს ჩხუბი და დაუნდობრობა“.

ერთი სიტყვით, იმერლებმა კახელებისგან ისწავლესო ელვანტური ჩაცმა-დაბურვა, ამპარტავანი მიმოხრა, და რაც მთავარია — ურთიერთშური, ქიშპი, მზაკვრობა, მტრობა, ურთიერთგაუტანლობა და ურთიერთსისხლის დაქცევაო. და ისე ისწავლესო, რომ მოწაფეებმა მასწავლებლებს გადააჭარბესო.

მკითხველთაგან ბევრმა იქნებ დაუჯეროს მემატეიანის ამ სტრიქონებს, ბევრმაც, იქნება, უნდობლობის ნიშნად მწარედ გაიცინოს, მაგრამ ერთი რამ მაინც ცხადზე უცხადესია: ბევრი ღირსება და სისუსტე უეჭველად „უსესხებიათ“ ერთმანეთისგან ქართველ თანამეტომეებს და თანამომეებს, ბევრიც „უსესხებლად“ ჰქონდათ საერთო, ვითარცა ერთი ფესვიდან მომდინარე ძმებსა და დედამამიშვილებს.

სწორედ ასევე, ახლაც, როცა დასავლეთ საქართველოში მიმდინარე შინაურ აშლილობას, ურთიერთმტრობასა და ურთიერთსისხლის დაქცევას უნდა გავცნოთ, თვალნათლივ დავინახავთ, რომ იმერეთს კახეთისგან „დამოუკიდებლად“, მისი „მიბაძვისა“ და მისგან „სწავლის“ გარეშე ჰქონდა თავისი შინაგვამიერი სატყვიარნი, საომარნი და სისხლსაქცევარნი.

„მკლავრეზა ღიღად ღადიანი“

„მეგრელები საუკეთესო ჭიშის ხალხია; კაცები კარგი აღნაგობისა არიან, ქალები კი ძალიან ლამაზები. აქაურ წარჩინებულ ქალებს რაღაც განსაკუთრებული ნაკეთები და სინაზე აქვთ, რაიც ძალიან გზიზღავთ და გატყვევებთ. მე შემხვედრია მათ შორის უმწვენიერესი აღნაგობის ქალები, დიდებული იერით, საუცხოო სახითა და ტანით. გარდა ამისა მათ აქვთ ისეთი მიწიდიდელი და ალერსიანი გამოხედვა, რომ შვილველისგან თითქოს ტრფიალებას ითხოვენ. მეგრელებს აქვთ ჰემარიტად გამჭირაზი და მახვილი გონება; არიან თავაზიანი, ზრდილნი, დარბაისელნი და გულთბილნი, მაგრამ ამავე დროს არიან ამაყნი, ჭედმაღალნი, ბოროტნი, დაუნდობელნი, უღმობელნი და უტიფარნი...“

ქ ა ნ შ ა რ დ ე ნ ი

დასავლეთ საქართველოს ამბების თხრობა 1633 წლით, გინა როსტომ მეფისა და ლევან დადიანის დამოყვრებით შეწყვიტეთ.

როგორც მკითხველს ახსოვს, კაკას ხიდთან ქართლელთა და მეგრელ-ოდიშართა საქორწინო შეხვედრას წინ იმერელთა მწარე მარცხი უძღოდა. ლევან დადიანმა მაშინ იმერთა მეფე გიორგი III კიდევაც დაამარცხა და სამარცხვინო ტყვეობაშიც წაიყვანა. ლევან დადიანი გამორჩევით მტრის თვალებს ემტერებოდა, მაგრამ ალექსანდრე უფლისწულმა დაასწრო, დადიანს დიდძალი გამოსასყიდი მიართვა და მამა თვალების დათხრასაც გადაარჩინა და ტყვეობიდანაც გამოიხსნა. დადიანმა

გამოსასყიდად იმერელთაგან აიღო ცხენისწყლის მარცხენა ნაპირი — ქილაძეებისა და მიქელაძეების საბატონო მამულები, წაიყვანა ჩხარიდან და ჩიხორიდან სომეხი და ებრაელი ვაჭრები და სოფელ რუხში დაასახლა ყველანი. ამას გარდა, ქუთათისიდან ლევან დადიანს მიართვეს „მურასა გვირგვინი, მრავალი ოქროსა და ვერცხლის ჭურჭელი, თვალმარგალიტით მურასა იარაღი“.

რაკი ცხენისწყლის „ბუნებრივი საზღვარი მოშალა“, რიონისა და ყვირილას შესართავამდე თავისუფლად დაშლიგინობდა იმერეთის დაუძინებელი მტერი და მაოხარი ლევან დადიანი.

ძალიან უჭირდა დამცრობილ იმერეთის სამეფოს გაზულუქებულ ლევან დადიანთან ბრძოლა, რადგან სამეგრელოს მთავარს პირადი ნიჭისა, ძალმოსილებისა და სიმამაცის გარდა, ყოვლად საიმედო ბურჯებად უდგნენ სიძე — მთელს წინა აზიისში „პირველი კაცი“ — როსტომ მეფე, და ერანის შაჰი — „ლაშქრითა და სალაროთ მომხმარებელი“.

1639 წელს მოკვდა ნატყვევარი გიორგი მესამე, — მოკვდა „ფრიადითა მწუხარებითა და ესე ვითარებათათვის და ვერა რაისა მწეობისა მპოვნელი“.

ტახტზე ავიდა მისი ვაჟი ალექსანდრე III (1639 — 1660). თეიმურაზ პირველის სიძე — მისი ქალიშვილის, დარეჯანის ქმარი ადრე გიორგი სააკაძეს ეს კაცი „გაერთიანებული საქართველოს“ მეფედ ჰყავდა მონიშნული).

სამომავლო იმედად არაფერი დახვედრია იმერეთის ახალ მეფეს.

ლევან დადიანის გამძლავრებას, მის აულაგამე მაოხარ ლაშქრობებთან ერთად, თურქული უღლის დამძიმებაც მოჰყვა დასავლეთ საქართველოს კისერზე.

ოსმალეთის ხონთქარი მურად IV დიდად შეეშფოთებინა ლევან დადიანის კავშირს ერანთან და დონის კაზაკებთან.

1634 წლის მაისში ოსმალები სამხედრო გემებით მოადგნენ კოდორს, მდინარის მიმდგომი მიწა-წყალი ააოხრეს, ააწიოკეს და დრანდის მონასტერიც გაძარცვეს და გააპარტახეს.

ესეც გავიხსენოთ: 1635 წელს ერანის წინააღმდეგ აღძრული მურად სულთანი ერევანს მიადგა და ლევან დადიანს შე-

მოუთვალა: „მენ ჩემი მოხარკე ხარ და რადგანაც ერეკანი შენი სამთავროს მახლობლად არის, წესით უნდა მოხვდე და დამეხმარო“.

დადიანმაც ფიცხელი პასუხი შეუტრიალა: „არასოდეს არც მე და არც ჩემს წინაპრებს ვალად არ გვედო თქვენი და თქვენის წინაპრების ომში სამსახურიო და ამიტომაც არც ახლა გეახლებითო. ამასთანავე გაიხსენეთ, რომ ხარკს იმიტომ კი არ გაძლევთ პირდაპირ თქვენი ბატონობა მეცნოსო, არამედ იმიტომ, რომ თქვენ ჩემს საზღვრებში ჯარით არ შემოხვიდეთო. და თუ ამას მაინც იზამთ, მე მყისვე მოგისპობთ ხარკსა და ადვილად შევიძლებ ჩემის ჯარით დავიცვა ჩემი სამთავრო“.

პირდაპირ „მეფური პასუხი“ იყო.

ოსმალეთის ზვიადმა ფადიშაჰმა მწარედ გადაყლაბა ცხელი „მეგრული ღომი“.

თურქეთის სულთანზე უფრო თეიმურაზ კახთა მეფე აფიქრებდა ლევან დადიანს. თეიმურაზმა რომ 1634 წელს კახეთის ტახტი დაიჭირა და სამეგრელოს მთავრის უახლოეს მოკავშირესა და მოყვარეს როსტომ მეფეს შეუტია, მაშინ ლევან დადიანი საქართველოში თითქმის სულ მარტოდმარტო დარჩა—გადამტერებულ იმერეთის, აფხაზეთის, სვანეთისა და ახალციხის ფაშას პირისპირ.

მაინც არ დაფრთხა და არ დაიბნა ლევან დადიანი. მაშინვე თვითონაც „ყველაზე დიდ ქვეყანასთან“ გადაწყვიტა დაკავშირება. ეს იყო ისევ რუსეთი.

1636 წელს დადიანმა რუსეთში ელჩად გაგზავნა გაბრიელ გეგენავა, რომელმაც ორი წლის შემდგომ, 1638 წლის ნოემბერში, როგორც იქნა, ჩააღწია მოსკოვში.

თეიმურაზ მეფის ელჩი, ნიკიფორე არქიმანდრიტი, მოსკოვში დახვდა გაბრიელ გეგენავას.

დაერივნენ ერთმანეთს „მომტერე ქართველთა“ წარგზავნილები. თავს არ იზოგავდნენ, ერთიმეორისთვის სახელი გაეტეხათ მასპინძელთა თვალში, ერთიმეორის საელჩო განზრანვანი მოეშალათ რუსეთის დიპლომატიურ უწყებებში.

არც უნდა გასჭირვებოდათ ერთიმეორის დამცირება და დამარცხება ქართველებს „უცხო და სასურველი“ ქვეყნის კარზე...

დადიანის ელჩი რუსეთის ხელმწიფეს სთხოვდა: თეიმურაზ მეფისთვის ჯარით და ფულით დახმარებაზე უარი ეთქვა, ხოლო სამეგრელო „მფარველობაში“ აეყვანა, თურქების წინააღმდეგ დახმარებოდა და კახაეების მარბიელი შემოსევებიც აღეკვეთა.

როგორც ეტყობა თეიმურაზის ელჩმა „უფრო დასძალა“ ლევან დადიანის ელჩი. გაბრიელ გეგენავა ცივად მიიღეს რუს-თხელმწიფის, მიხეილ რომანოვის კარზე.

თუმცა არც ერთ მხარეს „გული არ დაწყვიტეს“, — ორივე ერთნაირად „ტკბილი დაპირებებით“ გამოისტუმრეს და ორივეს ცალკე „საკუთარი“ რუსი ელჩებიც გამოატანეს.

გაბრიელ გეგენავა და მისი თანმხლები რუსი ელჩები — თეოდოტ ელჩინი და პავლე ზახარევი, 1639 წლის ნოემბერში ჩამოვიდნენ სამეგრელოში. მათ თან ჩამოიტანეს მიხეილ რომანოვის აღთქმანი „მომავალ დახმარებაზე“ და „ერთგულების ფიცის წიგნი“, რომელზეც ხელი უნდა მოეწერა ლევან დადიანს. ეს იყო და ეს. რუს ელჩებს საგანგებო მითითებაც კი ჰქონიათ, „ფიცის წიგნზე“ ხელმოწერის შემდგომაც არავითარი სახელდებითი დაპირება არ მიეცათ რაიმე დახმარების თაობაზე.

ლევან დადიანი მგლოვიარედ დახვდა სტუმრებს. ცოლი მოჰკვდომოდა — დარეჯანი (აი, ის ქალი, ბიძას — გიორგი ლიპარტიანს რომ წაართვა ლევან დადიანმა). დიდ წუხილს დაეთრგუნა ზვიადი მთავარი. რაც ქონება ჰქონდა, ეკლესიებისა და სამძიმარზე მოსული ხალხისთვის დაერიგებინა თანამეცხედრის სულის მოსახსენებლად. ათასი ძროხა, კამეჩი და ჭედილა დაეკლა სააღაპედ, ერთი წელი არც ტანზე გაუხდია, არც სასახლეში გაუთევეია, არც სახსნილო უჭამია. მწყემსებთან ცხოვრობდა თმაწვერაშლილი, ფხალის მეტს არაფერს პირს არ აკარებდა. მხოლოდ საფლავის სახილველად თუ გაეყრებოდა მთასა და ტყეს. მივიდოდა, მკვდრისზედა მიწას დაემხოზოდა და მწარე გოდებით ძრწოლასა ჰგვრიდა საჭირისუფლოდ შემოყრილ ხალხს...

ჯერ მარტო გეგენავა მიიხმო მგლოვიარე მთავარმა და გამოჰკითხა რუსეთში მგზავრობისა და რუსთხელმწიფის კარზე მიღების ამბები. სანუგეშო ვერაფერი უთხრა გეგენავამ; აქედან წასული, ორი წელიწადი თერგში მაყურყუტესო, ერ-

თი წელიწადი გზაზე გამაწვალესო, მოსკოვის კარზეც ცივად და უპატიურად მიმიღესო, თეიმურაზ მეფის ელჩს უფრო პატივისცემით ეპყრობოდნენო.

ძალიან გაჯავრდა ლევან დადიანი. მგლოვიარობა მოიმიზეზა და ნახევარი წელიწადი ახლოს არ გაიკარა რომანოვის ელჩები. მერე როცა მიიღო (1640 წლის 27 აპრილს და 18 მაისს), საყვედურებით მისდგა სტუმრებს, — ჩემი წარმოგზავნილი კაცი სამი წელიწადი ტყვეობასა და უპატიურობაში გყოლიათო. ხოლო, როცა ელჩებმა „ერთგულების წიგნი“ გადმოიღეს, ლევანმა ცივი უარი თქვა ხელის მოწერაზე.

მოლაპარაკება ჩაიშალა.

ელჩინი და ზახარიევი იმავე წელს რუსეთს გაბრუნდნენ.

.

1643 წელს იერუსალიმში, ჯვარის მონასტრისა და გოლგოთის წინამძღვარმა ნიკიფორე ჩოლოყაშვილ-ომანიშვილმა (ირბახმა) ლევან დადიანის დავალებითა და შემწეობით, განაახლა ქართველთა დიდებული ლავრა და ზედ ასეთი წარწერა გაამართვინა:

„აქ დაიბატა და განათლდა წმინდა ესე და ყოვლად პატიოსანი ტაძარი ჯვარისა ცხოველის-მყოფელისა ჯერჩინებითა დადიანისა ლეონისითა, ხელითა და ფრიად ქირგანცდილებითა ყოვლად — უღირსისა ჯვარისა და წმინდისა გოლგოთისა მამისა ნიკიფორესითა ჩოლოყაის შვილის ომანისა ძისათა, რომელმან ნგუმბადი და წმიდა საკურთხეველი გავაკეთე, ჩემისა საფასითა, ქორონიკონსა ტკია, ამინ“.

წამყარებული დღესასწაულები

ისევ ესხმოდა ლევან დადიანი იმერეთს ცეცხლითა და მანგილით.

ცეცხლს უკიდებდა და უჩუჩხურებდა პაატა-წუწკი წულუკიძე ისედაც მუდამ სალაშქროდ ცეცხლმოკიდებულ მთავარს: „შენი დღესასწაული შენი მტრების ძლევა და ამოწყვე-

ტა არისო; ამიტომ ყოველ დღესასწაულ დღეს დაეცი თავზე საღმრთო საღმრთო განცხრომაში თავმიცემულ იმერლებსო“.

დადიანიც მისდევდა „წუწკის“ შეგონებას და „მოუხდებოდა ყოველს საუფლოს დღეს, შობასა, ახალწელიწადსა, ნათლისღებასა და აღდგომასა და აოხრებდა ქვეყანასა იმერეთისასა“.

გიორგი მესამე ისე წავიდა ამ ქვეყნიდან ხელში უშიშრად საღმრთო კვერცხის დაქერა არ ჰლირსებია. ვერ გაუხსნილებია ვერც ერთი დღესასწაული წაუშწარებლად და ძმარწაუდენლად!

მოდოდა დადიანი, აოხრებდა იმერეთს, ძარცვავდა, აწიოკებდა, ანგრევდა, სწვავდა, მიჰყავდა ტყვეები, ჰყიდა — ან თურქ ვაჭრებზე, ან თვითონ ტყვეთა ნათესავებზე. „ტყვეთა სყიდვა“ და ტყვეთა „თავის გამოსხნა“ დიდ საშემოსავლო, გასამდიდრებელ წყაროებად გაიხადა დადიანმა, უფრო ხშირად იმერეთის ხარჯზე, ეამ-ეამად აფხაზეთის ხარჯზეც. „და იყო დადიანი მდიდარი ფრიად“, დაებეჩავებია იმერეთი „და მორჩილებდნენ სრულად აფხაზნი და შარვაშიძენი ყმობდნენ და ულაშქრებდნენ (ხარკად ჯარს აძლევდნენ) დადიანსა“.

მაინც იმერეთში „არსადა დაშთა დაბანი და შენობანი და სიმაგრენი, რომელ არა მიემძლავრა“ დადიანსა.

ბოლოს მიმართა „კონტროლისძიებას“ ალექსანდრე იმერთა მეფემ: ჭუთათისს ახალი ქვის ზღუდე-გალავნი შემოავლო და შიგ ჩაიკეტა ცოლ-შვილით, კარისკაცებით, მსახურეულით, ახლობელ წარჩინებულთა ჯალაბითა და სახლეულით. იმედი ჰქონდა მეფეს, — სამეგრელოს მთავარი ახალი კედლებით შემორაგვულ ციხეში ვერ შემოაღწევსო, ხოლო კედლებს გარეთ... კედლებს გარეთ ხალხს რაც დაემართებოდა, ამაზე ფიქრს, როგორც ეტყობა, ალექსანდრეს თავი ვერ უძლებდა. მთავარი იყო, თვითონ დაეხსნა თავი „ღვთისგან აშვებული“ დადიანისგან, თვითონ ჰქონოდა საშუალება, ამიერიდან მაინც აუკანკალელებელი ხელით შეხებოდა საშობაოდ შემწვარ გოჭს, საახალწლო ღვინით ავსებულ ყანწს, საღმრთო წითელ კვერცხსა და საგანატეხო პასქის ჯვარს.

აი, ამას ერქვა მეფის „კონტროლისძიება“ თავგასული ქვეყნის მფლობელის ასალაგმავად!

ხალხი და „წერილი ერი“ კი არა, თავადებიც იმიტომ შეუყვანია ოჯახებით გალავნის შიგნით, შიში ჰქონია მეფეს, არ მიმატოვონ და დადიანს არ მიუყვინდნენო!

ამნაირი კაცის იმედი ჰქონია დიდი კახეთის დამკარგველ თეიმურაზ მეფეს!

ამნაირი კაცი სურდა გიორგი სააკაძეს „გაერთიანებული საქართველოს“ მეფედ!..

ერთხელ დადიანმა ქუთათისის ციხიდან ალექსანდრეს გამოგდება და იმ ციხის მიწასთან გასწორება მოინდომა. ოცდაათი ზარბაზნითა და ჯარით იგი გარს შემოერტყა ქუთათისს. გაბმული ცეცხლი გაუხსნა ზარბაზნებით, ლაშქრით იერიშიც მიიტანა, მაგრამ ციხე მაინც ვერ აიღო.

ალექსანდრეს „კონტროლისძიებამ“ დიახაც „გაამართლა“: ქალაქის მოსახლეობა და შემოგარენი ძალიან დაზარალდა, მაგრამ, „რაც მთავარია“ — მეფე და ციხე გადარჩა!

1646 წლის თებერვალში ლევან დადიანმა ძალზე დიდი ლაშქარი მოაწყო იმერეთს. სადაც გაიარა, ბალახმა აღარ გაიხარა. სოფლები მიწასთან გაასწორა, გაძარცვა. გაატიალა. ვისაც მოახელა — ქალი თუ კაცი, დიდი თუ პატარა — ყველა დაბორკა და ტყვედ წაიყვანა. გამორჩევით ჩხარი და ჩიხორი დაზარალა სამეგრელოს მთავრის ურჯუკმა შემოსევამ.

ამ ლაშქრობის სამახსოვროდ ძვირფასი ხატი გააჭედვინა ლევან დადიანმა და ზედ ასეთი წარწერაც გაამართვინა:

„წამოვედით გამარჯვებული და ნაშოვრით სავსე, რომ ლაშქარი ვერ დაერივნენ. ბალახვანზე რიონს გამოვედით და ქუთათისის ციხიდაღმა მეფე და სრული იმერელი ლაშქარი შეყრილი თვალით გვიმზერდნენ. მეფე მისი თემისა ამოწყვეტას ჰხედავდა, ამდენი ნაშოვრის ტყვეების ჟღივილი ყურით ესმოდა, მაგრამ ციხიდაღმა თავი არ გამოყვეს და ვერცარა დაგვაკლეს. ასრე შევარცხვინეთ და წამოვედით ოდიშს გამარჯვებული“.

ამნაირად განსრულებულა ეს ლაშქრობა.

ამნაირი ხელმწიფე ამძიმებდა მაშინ ქუთათისის სამეფო ტახტს... იმ ქუთათისისა, სადაც ერთ დროს „ყოველი საქართველოს“ დიდხელმწიფური ტახტები ედგათ ბაგრატ მესამეს და დავით აღმაშენებელს!

მკითხველს ახსოვს მამუკა ბატონიშვილზე ზოგიერთი რამ წინასწარობილად ნათქვამი: მამუკა ალექსანდრე მეფის უმცროსი ძმა იყო — ჰაბუკი „მხნე, ახოვანი, შვენიერი, კისკასი და შემმართებელი ძლიერი“. „ზნე-სრული და გულოვანი გოლიათებრივი“. იგი ხომ როსტომ მეფემ იშვილა, მაგრამ ქართლის თავადებმა შეთქმულებაში ჩაითრიეს, შეთქმულება გამწვანდა და აბრუგატეხილი ბატონიშვილი ისევ იმერეთს დაბრუნდა.

მამუკა ბატონიშვილი იმერეთის სამეფო სახლულში ერთ-დერთი იყო, რომელიც უეჭველ იმედს იძლეოდა, ბოლოს და ბოლოს, დაეხსნა ქუთათისის სამეფო კარი სამეგრელოს მთავრის კირთებისაგან და ლაჩრული სირცხვილისაგან.

მამუკა ბატონიშვილმა სახელდახლოდ შეყრილი და გაწრთვნილი მეომრებით თარეშული ომი გაუმართა ლევან დადიანს, საგანგებო მზირების მეოხებით ტყობილობდა ოდიშართა ლაშქრის მოძრაობას ხერხიან ადგილებში უსაფრდებოდა, მოულოდნელად ესხმოდა, ფიცხელი ხმალთაკვეთებით ამოწყვეტდა, ანდა ფანტავდა და ისევ გაუჩინარდებოდა. ამნაირი საომარი ვააზრებით და ნაქცეურობით მამუკა ბატონიშვილმა დადიანის მეომართაგან „მრავალი მოსრის და მრავალი დარჩენით შეიპყრის და ტყვე-ყვის და შემოიქცა გამარჯვებული“. დიდი შიში ჩაუყენა ახალგაზრდა გმირმა ლევან დადიანის მოლაშქრეებს. საკმარისი იყო მამუკას გამოჩენა და, გარბოდნენ თავპირის მტვრევით.

თურმე მცირე საომარი განწესრიგებაც საკმარისი ყოფილა თავგასული ფეოდალის ასალაგმავად.

ლევან დადიანი ყოველნაირად „მცდელობდა“, როგორმე ხელში ჩაეგდო „იმერთა მხსნელი“.

მამუკა ბატონიშვილს მისგანვე საგანგებოდ გაწვრთვნილა ზერდაგი ცხენი ჰყავდა, კანჭმალალი, მძლავრი და ფიცხელი. ბრძოლაშიც ყოველთვის ამ ცხენზე ამხედრებული გადიოდა, რადგან უტყუარად ჰქონდა დაცდილი: მის ზერდაგს ჰენებით,

მიმოხრით და მკერდულ-ძგერებით ვერც ერთი მეგრული ლაფ-
შა ვერ უმაგრდებოდა.

ერთ დღეს, როცა მზირებმა დადიანის ჯარის ახალი შე-
მოსევის ამბავი მოიტანეს და მამუკაც ფიცხლავ საომრად აღი-
კაზმა, ალექსანდრე მეფე მივარდა და შეუჩნდა: დღეს ბრძო-
ლაში ნუ წახვალ, რადგან გული ცუდს რასმეს მიგრძნობსო.
მამუკა მეფე-ძმის ახირებას ყურს არ უგდებდა და საომრად
იწევდა. მაშინ მეფემ ძმის საომარი ზერდაგი მსახურებს გა-
დაამალვინა, — იქნებ მამუკა ბრძოლაში არ წავიდესო. მაგ-
რამ მამუკამ მაინც არ დაიშალა, იღუმალ გავიდა, სხვა ცხენ-
ზე შეჯდა და საომრად გაქუსლა.

მისი დანახვისთანავე მეგრელებმა პირი იბრუნეს.

ბატონიშვილი უკან გამოენთო თავდავიწყებით.

და მოულოდნელად ნასხვისარმა ცხენმა როგორღაც მუხლი
დაიკვეთა და მხედრიანად ძირს დაენარცხა.

შემოტრიალდნენ ოდიშარნი და ზედახორად ზღვ დაეყარ-
ნენ წაქცეულს.

ასე ბრმა შემთხვევის წყალობით დატყვევებული მამუკა
ბატონიშვილი მიჰგვარეს ლევან დადიანს.

სიხარულით ატანილმა მთავარმა მტკიცედ დაცულ და და-
რახულ ციხეში ჩააგდო გმირი მეტოქე.

ილორის წმინდა გიორგის სადიდებლად და ეგზომი გამარ-
ჯვების სამადლობლად დადიანმა ძვირფასი ხატი გააჭედვინა და
ზედ „ცოტა სხვანაირი თხრობით“ დააწერინა: „...მიეუხედით
მეფე ალექსანდრეს ქუთათისს, ქალაქი დავსწვით და ავაოხრეთ
და გამარჯვებული მოვდიოდით, მეფის ძმა მამუკა წინ დავგხ-
ვდა და შევიბენით, თვითონ მე დავირჩინე და შენს კარზედ
მოვიყვანე...“.

ეს ამბავი მოხდა 1647 წელს.

მთელი დასავლეთი საქართველო შეირყა.

მოყვრები ცრემლად იღვრებოდნენ, მტრები სიხარულით
თახთახებდნენ.

რა არ სცადა ალექსანდრე მეფემ ძმის გამოსახსნელად, რა
ფული და „სახსარი“ არ შეაძლია დადიანს, მაგრამ არაფერი
გამოვიდა.

1648 წელს ალექსანდრემ, როგორც წინასწრობილად ითქ-

ვა, თეიმურაზ მეფე გაგზავნა ოდიშში, დადიანთან შესარიგებლად და მამუკა ბატონიშვილის გამოსახსნელად. დადიანი მეფე-ბიძაშვილს დიდის პატივით შეხვდა, მაგრამ წუწკი წულუკიძის ენის „წაკვრით“, უარი თქვა იმერეთის მეფესთან შერიგებაზეც და მამუკას განტევებაზეც.

როცა ვერც თეიმურაზის შუამავლობამ გასჭრა, ალექსანდრემ თავისი ერთადერთი შვილი და მემკვიდრე — ბაგრატი გაუგზავნა მძევლად დადიანს. არც ამნაირ გაწირვას გაუწია აზგარიში მძვინვარე მთავარმა. ის კი არა და, არც მამუკა გაათავისუფლა და არც ბაგრატი დააბრუნა უკან, ქუთათისს.

თავზარდაცემულმა ალექსანდრემ აღარ იცოდა, რა ექნა.

ისევე თეიმურაზმა „იბოვნა“ გამოსავალი. როგორც ითქვა, მან ალექსანდრეს ჩააგონა: დადიანისა და როსტომ მეფის წინააღმდეგ დახმარება რუსეთის მეფეს ვთხოვოთო. აკი ეს ელჩობაც შედგა, მაგრამ რუსეთიდან მოსული სიტყვიერი დაპირება ვერც ლევან დადიანს დაადენდა სისხლსა და ძმარს და ვერც როსტომ მეფეს.

ლევან დადიანი მეფეების „რუსულმა პოლიტიკამ“ კიდევ უფრო გააბოროტა და გაამხეცა.

ააოხრა ქვემო იმერეთი.

დაეცა ქუთათისს, გაძარცვა, გაათილა და გადასწვა.

ერთი კვირა ზარბაზნები ურტყა გელათის ციხესიმაგრეებს, აიღო, გაძარცვა და ტყვედ წაიყვანა ორმოცი თავადი და აზნაური, მრვალი მეთოფე და წაიღო უზარმაზარი ნადავლი.

და... თვალეზი დათხარა მამუკა ბატონიშვილს.

სინათლეწართმეული გმირი იქვე მოკვდა, ოდიშის ციხეში, 1653 წლის დეკემბერს.

საქაროველო შეაძრწუნა მამუკა ბატონიშვილის უდვთო სიკვდილმა.

ლევან დადიანის უგანაჩენო სიმხეცეს ჰკიცხავდა ყველა — მტერიც და მოკეთეც.

როსტომ მეფე და მარია მდედოფალი ხომ ლევანის სიძე და დაი იყვნენ — როგორც კი ალექსანდრემ ქართლის მეფე-დედოფალს მამუკას წამებული სიკვდილის ამბავი შეატყობინა — როსტომმა ქართველთა ჯარი სამგლოვიარო აღლუმზე დააყენა ტანსაცმელი შემოიხია თავ-პირში სილაქები წაიში-

ნა, ხმამაღლა იტირა და ჭარიც ატირა და აგლოვა. ხოლო მამრიამ დედოფალმა ახალი შავები ჩაიცვა, იმერეთიდან გამოგზავნილი, მამუკას ნაქონი ნივთი-ნიშანი წინ დაიდო, გარშემო წარჩინებული მანდილოსნები ტირილად დაისვა, მათთან ერთად მამუკა საყვარელი შვილის, ოტიას მსგავსად გამოიტირა და გულქვა ძმას წყევლა-კრულვა უფრქვია.

„აგაოზაბ აგაოზაბათა“

ერთხელ ლევან დადიანს მოახსენეს: ილორის წმინდა გიორგის ჩაგონებით, რომელიღაც მეგრელ გლეხს ამნაირი წინასწარმეტყველება უთქვამსო: თუ ლევან მთავარი იმერეთზე კიდევ ილაშქრებსო, უეჭველად ბრძოლაში დაიღუპებაო.

ეს ადრე იყო ნათქვამი და მაშინ სასაცილოდაც არ ჰყოფნია ლევან დადიანს „წვირიანი ყაძახის ბეჭტური“. მაგრამ ახლა, მამუკა ბატონიშვილის დაღუპვის გამო ატეხილმა საყოველთაო განგაშმა კი ჩააფიქრა მთავარი.

ბაგრატ ბატონიშვილი მაშინვე გამოუშვა ქუთათისს.

იმერეთის დალაშქრაზეც ჯერჯერობით ხელი აიღო და, რაკი დასვენებით მაინც ვერ დაისვენებდა, ახლა აფხაზეთს მიუტრიალდა ცეცხლითა და მახვილით.

ადრეც ხომ ბევრჯერ დაელაშქრა აფხაზეთი ლევან დადიანს, ძარცვავდა, ანგრევდა, ატყვევებდა და ისევ ხატებს აწერდა ამნაირ „მემუარებს“: „...მივუხედით შარვაშიძესა ზუფუს (ლიხნი), მუწუს წყალს აქათ ავაოხრეთ და სადაცა სიმაგრე იყო ავიღეთ და გავაცუდეთ. და კაპოეტის წყლზე (ბზიფი) შემოგვებნეს ზუფუარი და სიხუარი მარშანიები და გაგვემარჯვა და დავბოცეთ. ზოგი ხელთ დაგვრჩა და გამარჯვებულნი მოვედით...“

შარვაშიძეც დროს ურჩევდა და, როცა ოდიშის მთავარს იმერეთისკენ სალაშქროდ გაიგულებდა, თვითონაც სამაგიერო ლაშქრობით ლაშქრობდა დადიანის სამფლობელო მიწებზე,

აოხრებდა მეგრულ სოფლებს, ძარცვავდა ეკლესიებს, მიერეკებოდა ტყვეებს.

ლევან დადიანს აფხაზთა შესაკავებლად და მათ მორჩილ-საქმნელად ოდიშ-აფხაზეთის საზღვარზე უკვე კარგა ხნის დაწყებული ჰქონდა უზარმაზარი თავდაცვითი და შეტევითი ქვის ზღუდე-კედელი; თხუთმეტი წლის მანძილზე აშენებდა და დაასრულა კიდევ იგი დადიანმა. მაღალი და ფართო კედელი, კოშკებით, ქონგურებით და სათოფურებით იწყებოდა ანაკოფიიდან და გრძელდებოდა ზღვიდან ჩრდილოეთით უმაღლეს მთამდე.

კედლის მთელ სიგრძეზე გუშაგი-ჯარი ეყენა ლევან დადიანს, თავადთა და ეპისკოპოსთა მოთავეობით, თითო თვის მორიგეობით.

არ ისვენებდა ლევან დადიანი. ბოროტი და ხარბი გული არ ასვენებდა მის ძიერ გონებასა და მტკიცე მარჯვენას.

განუწყვეტლივ აოხრებდა, ძარცვავდა და ტყვედ ჰყიდდა თანამომხეებს „მარჯვნივ და მარცხნივ“.

ცოდვის ცრემლში ნაბანი ოქრო-ვერცხლით იშენებდა ბრწყინვალე სრა-სასახლეებს, ეკლესიებს, ციხე-ქალაქებს.

ამდენმა „სხვისმა სიკვდილმა“ ერთხელაც არ გაახსენა, რომ თვითონაც კაციშვილი და... სიკვდილისშვილი იყო...

1657 წლის 17 მარტი გათენდა,

ლევან დადიანს ერთადერთი ვაჟი — ალექსანდრე მოჰყვდომოდა.

შევიდა მიცვალებულ შვილთან მამა. ხელში ლახტი ეჭირა. დიდხანს დასცქეროდა გაქვავებული და განაცრებული მარადიული ძილის საუფლოში მწოლარე ჭაბუკს.

ერთბაშად მოიქნია ლახტი მძლავრი ხელებით, თავში იხეთქნა და მკვდარი დაეცა შვილის ცხედარს.

ერთად ჩაასვენეს სამარეში მამა-შვილი.

„ამაოება ამაოებათა, ყოველივე ამო არს“, — სიცოცხლეში იშვიათად ახსენდებოდა ლევან დადიანს ეკლესიასტეს მძვინვარე სიტყვა.

ლევან დადიანი მომკვდარაო?!

გულმყარად გამოჯირითდა ქუთათისის ციხიდან მეფე ალექსანდრე მესამე.

თვითონ სამეგრელოშიც წამოიშალნენ ლევანის მტრები და მოყვრები, გამორჩევით — მთავრის ტახტის მძიებელნი.

რაკი ლევანი უშვილძიროდ გადაეგო, დადიანად მაშინვე თავი გამოაცხადა მისმა ძმისწულმა — ლიპარიტი ესესძემ.

მაგრამ ლიპარიტს მეტოქე გამოუხტა — ვამიყ ლიპარიტიანი, ლევან დადიანის გერი და ბიძაშვილი (დარეჯანის შვილი პირველი ქმრის, ლევან დადიანის ბიძის — გიორგი ლიპარტიანისაგან).

დრო მეც დამიდგაო, იფიქრა ალექსანდრე იმერთა მეფემ, სასწრაფოდ ლაშქარი შეჰყარა, ზუგდიდს ჩაიჭრა ლიპარიტი გააძევა და ოდიშის მთავრის ტახტზე ვამიყ ლიპარტიანი დააბრძანა.

იმერეთისა და სამეგრელოს საზღვრად, ცხენისწყლის აღმოსავლეთ ნაპირთა ნაცვლად, ალექსანდრემ გამოაცხადა უნაგიროს მთა.

ლევან დადიანის უმდიდრესი საგანძურებიც თვითონ განაგო იმერეთის მეფემ. მან მიზეზად დაიდო, — ლევან დადიანმა მამაჩემის, გიორგი მეფის გასათავისუფლებლად „დიდძალი სახსარი“ გამომძალაო, და ახლა ოდიშის საჭურჭლეებიდან, „რაც კარგი და უკეთესი იყო“, თავისად დაიჩემა, ხოლო დანარჩენი მისგანვე დაყენებულ დადიანს — ვამიყს დაუტოვა. ლიპარიტის ერთგულ მეგრელ თავადებს ალექსანდრემ მძევლად შვილები ჩამოართვა და ქუთათისს დაბრუნდა „ნიჭითა, ალაფითა, იავართა დიდითა და ტყვეთა და ნატყვენავითა გამდიდრებული და გამარჯვებული“.

როგორც იქნა, ეღიბრა იმერეთის ტახტი მის „კუთვნილ“ ოდიშის სამთავროზე გაბატონებას. ალექსანდრემ ვამიყი, ვითარცა თავისი დანიშნული დადიანი, რასაკვირველია, ნამდვილ ქვეშევრდომად ჩაითვალა. ერთი ფიქრი ესეც იფიქრა, ოდ-

იშს თეიმურაზს მივცემო სამმართველოდ და კიდევაც გააკი-
და მალემსრბოლი რუსეთისკენ წასულ სიმამრს. ზემო რაჭაში
წამოაწია მალემსრბოლმა თეიმურაზს ალექსანდრეს დანაბა-
რები. მოხუც ხელმწიფეს არაფერი უპასუხნია. მხოლოდ მწა-
რედ გაიცინა და გზა განაგრძო რუსეთისაკენ...

ალექსანდრესგან დამხობილი ლიბარიტ იესეს ძე არ შეუ-
რიგდა დადიანობის დაკარგვას. იგი მოკავშირეების ძებნას შე-
უდგა და იპოვნა კიდევ. ლიბარიტს ჯარები მისცეს როსტომ
ქართლის მეფემ, როსტომ ახალციხის ფაშამ და გურიის მთა-
ვარმა ქაიხოსრომ. ამათ შეუერთდნენ, აგრეთვე, ჭილაძენი და
მიქელაძენი.

სასწრაფოდ შემოიყარა ჯარი ალექსანდრე იმერთა მეფემ,
სამეგრელოში ჩავიდა და ვამიყ დადიანი შეიერთა მეგრელთა
ჯარით.

მოწინააღმდეგენი ბ ა ნ ძ ა ს თ ა ნ დადგნენ საომრად.

ბრძოლის წინა ღამით ლიბარიტის ბანაკიდან ო ტ ი ა მ ი-
ქ ე ლ ა ძ ე მ შემოუთვალა ალექსანდრე მეფეს: „თუ ჯაბანი
არა ხარ, მაცნობე, ხვალ ბრძოლაში რა ფერის კურტაკს ჩაიცი-
ვამ და რა ფერის ცხენზე შეჯდები, რამეთუ ჩემი შუბის წვერი
შენი მუზარადის თვალებს შემოვსტყუორცნო“.

ალექსანდრემ პასუხად შეუთვალა: „თეთრ ცხენზედ შევ-
ჯდები და თეთრ კურტაკს ჩავიცვამ, ვინძლო მართლა გაბედო
და შემომხვდეო“.

ღილით მეფემ ლ ე ვ ა ნ ა ბ ა შ ი ძ ე მოიხმო. იცოდა, —
ლევან აბაშიძეს ოტია მიქელაძის ასული ჰყავდა ცოლად. თეთ-
რი ცხენი და თეთრი კურტაკი უბოძა მეფემ აბაშიძეს და უთხ-
რა: შენს ვაჟაკობასა და ერთგულებას დიდ პატივსა ვცემ;
ამიტომ, თუ ჩემი სიყვარული გაქვს, ჩემგან ნაჩუქარი ცხენი-
თა და კურტაკით გადი ბრძოლის ველზეო.

სიხარულით აფოფინდა აბაშიძე. მეფეს დიდი მადლი უძღ-
ვნა და მაშინვე აღიკაზმა „თეთრ რაინდად“.

„კიდევაც შესწყვეტიან ერთმანეთს სიძე-სიმამრიო!“ — გა-
უფელვა მეფეს (რა შორს ყოფილა ალექსანდრეს ლაჩრული
სული თეიმურაზის რაინდული სიჭველისაგან: გაიხსენე, მკი-
თხველო, გიორგი სააკაძისგან თეიმურაზის გაწვევა საომარ
დაკლურში!).

* * * * *

მაშ, 1658 წლის ივნისი. ბრძოლა ბანძასთან.

ძაღლის ალიონზე დაეტაკნენ ერთმანეთს და ღლის ჩაძაღ-
ლებამდე იომეს.

საშინელი ძვერებითა და ჩეხვით ეკვეთნენ ერთურთს ქარ-
თველები და... ქართველები.

ოტია მიქელაძემ დაინახა წინ გამოჭრილი „თეთრი მხედრ-
რი“.

„მეფეო“, გაუელვა, ზედ მიუხტა და შიგ თვალსა და თვალს
შუა დაატაკა და დაურჭო შუბი.

ხელშეუბრუნებლად გადმოეშვა და დაენარცხა მიწას ლე-
ვან აბაშიძე.

„ოტია გახლავარ, ოტია, მეფევე ბატონო!“ — ნიშნისმოგე-
ბით დასძახა მიქელაძემ ძირს დაცემულს.

„ოტიაო?! მერე, უკეთუ მართლა ოტია ხარ, რაღა პასუხს
მოახსენებ შენს ქალიშვილს ქმრის მოკვლისათვის?!“ — ამო-
იგმინა ლევან აბაშიძემ და მაშინვე სულიც განუტევა.

მუზარადი ჩამოპგლიჯა მოკლულს მკვლელმა, დაიღრიალა
და ზედ დაემხო სიძეს სიამარი.

ბრძოლა კი გრძელდებოდა — საშინელი, სისხლდამდი-
ნარი.

გახელებით ელეტდნენ ქართველები ქართველებს.

ალექსანდრე მეფისა და ვამიყ დადიანის ჯარებმა გაიმარ-
ჯეს.

ქართლელთა, მესხთა და გურულთა უმრავლესობა ემსხ-
ვერბლა უგუნურ ხოცვა-ელეტას.

ბრძოლაში დაიღუპა თვითონ დადიანობის მაძიებელი ლი-
პარიტ იესეს ძე.

ალექსანდრეს — მის სიცოცხლეში და ხელმწიფობაში ერ-
თჯერ გამარჯვებულს — დიდი ნადავლი და მრავალი ტყვე ჩა-
უვარდა ხელში.

ოტია მიქელაძე „ნებითა თვისითა“ ჩაბარდა მეფეს.

ალექსანდრემ ბრძანა და იქვე გახურებული თოფის ზუმ-
ბით გამოსთხარეს თვალები „თავზედ მიქელაძეს“.

მერე, ყველა ტყვეს ფულით დაახსენევინა თავი ალექსანდ-

რემ (ლევან დადიანისგან ყველამ ისწავლა ამნაირად „ფულის კეთება“).

დადიანის ტახტზე ისევ ვამიყი დაამაგრა ალექსანდრემ.

„ბანძის გმირობის“ შემდგომ გურიას ჩაუხტა მეფე იმერეთისა.

ველარ დაუდგა ქაიხოსრო გურიელი, თუმცაღა იყო იგი „კაცი მზნე და ახოვანი და ბრძოლასა შინა გამოცდილი“. ველარ დაუდგა და გაიქცა სტამბოლს.

ალექსანდრემ გურიის მთავრად დასვა დემეტრე — ძე სვიმონ გურიელისა (მარიამ დედოფლის პირველი ქმრისა, ლევან დადიანმა რომ თვალები დათხარა).

ქაიხოსრომ სულთანს სთხოვა დახმარება. სულთანმა როსტომ ფაშას უბრძანა: ქაიხოსროს ჯარი მიეცი და გურიელის ტახტზე აღადგინეო.

მართლაც წამოვიდა ქაიხოსრო სამცხელთა ჯარით. დემეტრე იმერეთში გაიქცა. ქაიხოსრომ გურიის მთავრობა დაიბრუნა.

არც ალექსანდრემ და დემეტრემ დასთმეს. ქაიხოსროს მისი ყმა მაჭუტაძე შეუჩინეს და მოაკვლევინეს.

მოკლული ქაიხოსროს ვაჟებმა — გიორგიმ და შალაქიამ — ჭლივს გადაასწრეს სამცხეს და როსტომ ფაშას შეეფარნენ.

ისევ დემეტრე გურიელმა დაიჭირა გურია.

ალექსანდრე ერთბაშად ასულიყო „დიდების მწვერვალზე“ აკი მთელი დასავლეთ საქართველო ახდა მის ხელმწიფურ „სკიპტრას“ ემორჩილებოდა.

მაგრამ განგებას მაინცდამაინც მაშინ გაახსენდა, რომ ალექსანდრე მეფეც სიკვდილის შვილი იყო.

იგი გარდაიცვალა 1660 წლის მარტში.

დაკრძალეს გელათს.

ალექსანდრეს სიკვდილის შემდგომ თეიმურაზ მეფე სავსებით მარტო დარჩა უბედურებით აღსავსე წუთისოფელში.

ქუთათისიდან გავიდა სამგლოვიარო თაღბებით დამძიმებული მოზუცი, სკანდაში მივიდა და იქ დადგა, ვითარცა ამოცხვით აღსავსე ცხოვრებისგან განრიდებული ბერი-ასკეტი.

იდგა სკანდას ბერი „ფრიად უპოვარი“ და აღარც არავის ეცალა მისთვის.

ალექსანდრეს სიკვდილისთანავე შეიქნა მანამდე გაუგონარი უსაშინელესი შინააშლილობა, რაიც დასავლეთ საქართველოს სათავგადასავლო ბედის კარაბადინში ასი წელიწადი მაინც უნდა დასწოლოდა სულისშემხუთველ მაჯლაჯუნად აქაურ ქართველობას.

დაიწყო ქუთათისის სამეფო ტახტის „გაწამაწიით“.

ალექსანდრე III, როგორც გვანდისოვს, ორჯერ იყო ნაქორწინევი, პირველად ჭაბუკობის ქვამს, ცოლად ჰყავდა მამია გურიელის ასული, თამარი, რომლისგანაც მას შეეძინა ერთადერთი შვილი — ბაგრატი. მერე ალექსანდრეს შეასმინეს, შერიცოლი ვილაც „ქუთათელის ვაჭართან“ რქებს გადგამსო და უფლისწულმაც მაშინვე ცოლიც და შვილიც მამია გურიელს მიუყარა. მეორედ ალექსანდრე დაქორწინდა თეიმურაზ მეფის ასულზე — დარეჯანზე, ზურაბ ერისთავის ქვრივზე. დარეჯანისგან ალექსანდრეს შვილი არ ეყოლა და იძულებული გახდა უფლისწული ბაგრატი გურიიდან ჩამოეყვანა იმერეთის ტახტის მემკვიდრედ. მეფობის ქვამს ალექსანდრემ ბაგრატის მიმართ რამდენჯერმე შეიცვალა დამოკიდებულება. ერთხანს შვილს ტახტის მემკვიდრეობაზე უარიც კი უთხრა და მომავალ მეფედ თავისი ცოლის ძმისშვილი (ესე იგი, თეიმურაზის შვილიშვილი) — გიორგი დავითის ძე იშვილა. მაგრამ გიორგი დღემოკლე გამოდგა და ალექსანდრემ ისევ ბაგრატი დაიგულა თავის შემცვლელ გვირგვინოსნად.

ალექსანდრე რომ გარდაიცვალა, ტახტის „ნაძალადევი“ მემკვიდრე უკვე 43—44 წლის კაცი გახლდათ, მაგრამ მაინც

რალაცნაირად თითქოს მეფობისთვის უმწიფარი, უნებო და ყველაფრისადმი გულგრილი ადამიანი.

იმერეთის ტახტი რომ მას ეკუთვნოდა, ეს საეჭვოდ არავის მიუჩნევია და გამეფდა კიდეც ბ ა გ რ ა ტ IV-ის სახელით. მაგრამ ქვრივი დარეჯან დედოფალი, დიხაც მტკიცე და მკაცრი ბუნების ქალი, თურმე ასე იოლად არ აპირებდა იმერეთის ხელმწიფური ინსიგნიების დათმობას.

ჯერ გერთან, ვითარცა კანონიერ მეფესთან, „შეთანხმებითა“ და „შემოყვრებით“ დაიწყო დარეჯანმა. მან ბაგრატს ცოლად შერთო თავისი ძმის დათუნას ასული — ქ ე თ ე ვ ა ნ ი.

დასიძვეებული გერი მორჩილი გამოადგა დარეჯანს. იმერეთის ნამდვილი საჭეთმპყრობელი დარეჯანი უფრო სჩანდა, ვიდრე ბაგრატი. კიდეც ამბობდნენ: მეფეცა და დედოფალიც ერთი — დარეჯანი არისო.

მაგრამ ბაგრატის გამეფებიდან ნახევარი წელიწადიც არ გასულიყო, რომ გერი და დედინაცვალი ერთმანეთს დაეტაკნენ. ისევ ქალი აღმოჩნდა კაცზე ძლიერი: დარეჯანმა ბაგრატი ტახტიდან ჩამოაგდო, თვალები დათხარა და ცოლიც წაჰგვარა.

მაშინვე სკანდაში მამას ეახლა დარეჯანი და იმერეთის მეფობა შესთავაზა. თეიმურაზი საშინლად აღაშფოთა ქალიშვილის საქციელმა — სიძის, ბაგრატის დამხობამ და დასახიჩრებამ. მაშინვე გააძევა ბერმა თავისი სენაკიდან „გამხეცებული“ ქალი.

მაშინ დარეჯანმა კიდეც უფრო „ძლიერი ნაბიჯი“ გადადგა. ადგა და ქმარი შეერთო — ვინმე ვ ა ხ ტ ა ნ გ ჭ უ ჭ უ ნ ა შ ვ ი ლ ი (თუ ჭუჭუნისა შვილი), სისხლით ბაგრატიონების ნათესავი.

იმერეთის თავადობა არ შეურიგდა ვიგინდარას გახელმწიფებას. ზემო იმერეთის თავადებმა, პ ა ა ტ ა ა ბ ა შ ი ძ ი ს მეთაურობით, „უკანონო მეფე-დედოფლის“ ჩამოსაგდებად და ქუთათისში „სამართლიანობის“ აღსადგენად მოიწვიეს ქართლის მეფე ვახტანგ მეხუთე, ხოლო ქვემო იმერეთის თავადებმა მოიხმეს ვამიყ დადიანი.

ორივე „მიწვეული“ სასწრაფოდ გაეშურა იმერეთისკენ.

ვამიყ დადიანმა მიასწრო ლაშქრით ქუთათისს.

ცხუ გადალიანდა.

მაშინ ოტია ჩხეიძე შეეგზავნა დადიანს ციხეში, ვახტანგ ჭუჭუნაშვილს ფიცი მისცა, — დაგვენბდი, ციხე ჩაგვაბარე და არაფერს გავნებთო.

ჭუჭუნაშვილი მოტყუვდა. ციხე გააღო და გამოვიდა. მიცვივდნენ დადიანის კაცები, შეიპყრეს და თვალეზი გამოსთხარეს.

დარეჯანი, ქეთევანი და ბრმა ჭუჭუნაშვილი სამცხეს გადაიხვეწნენ.

შევიდა ვამიყ დადიანი ქუთათისის სასახლეში და „მოიზომა“ თავზე იმერეთის სამეფო გვირგვინი. მაგრამ მაშინვე ცივად გააგლო ხელიდან, რადგან ვახტანგ მეხუთე ჩამომდგარიყო იმერეთში ქართლის მხედრობით.

ვამიყმა უიმედო სისხლის ღვრას ქართლის მეფესთან შეთანხმება არჩია. ვახტანგიც, იმერეთში მისვლის ამ „პირველ ფეხზე“, კაცთაკვლას განერიდა და დადიანთან ერთად საზავო მაგიდას მიუჯდა.

შეთანხმდნენ (1660 წ.).

იმერეთი შუაზე გაიყვეს. მდინარე ბურჯისწყალის აღმოსავლეთით ქართლის მეფე გაბატონდა, დასავლეთით — სამეგრელოს მთავარი.

სამოყვროდაც გარიგდნენ: დადიანმა თავისი ასული ვახტანგ მეფის უფროს ვაჟზე — არჩილზე დაწინდა.

ერთმანეთს დაშორდნენ და წავიდ-წამოვიდნენ „მოკავშირენი“ და მომავალი მოყვარენი.

უსინათლო ბაგრატ მეფე, თითქოს არც არავის გახსენებოა, ისე ჩარჩა ქუთათისის ციხეში ჩაკეტილი.

ვამიყ დადიანმა იმერეთიდან ზუგდიდს დიდი ოქრო-ვერცხლი და ქონება ჩაიტანა. მალე მან ვახტანგ მეფესთან დადებული პირობებიც არაფრად ჩააგლო და თავისი ასული იმერელ თავადს, ბეჟან ლოღობერიძეს შერთო ცოლად.

ვახტანგ მეფე ალაშფოთა დადიანის დალატმა და უპირულობამ. მაშინვე კავშირი შეკრა დემეტრე გურიელთან და ზემო იმერეთის თავადებთან, გამორჩევით — პაატა აბაშიძესთან. ზემოიმერლებმა ვამიყ დადიანის სიძე და არჩილ ბატონიშვილის მეტოქე — ლოღობერიძე მოჰკლეს და ვახტანგ მეფე იმერეთში გადაიწვიეს.

ვახტანგიც სასწრაფოდ გადავიდა იმერეთს ქართლის მხედრობით.

ვამიყ დადიანიც მოსულიყო მეგრელთა ჯარით და საჩხერესთან ელოდა მტერს.

ვახტანგს ლიხზე გადასვლისთანავე მთელი ზემო იმერეთი შეუერთდა.

ლეჩხუმის ბატონი — ხოსია ლაშხიშვილიც მოსულიყო ქართლის მეფესთან შესაერთებლად.

ვამიყ დადიანმა ძლიერ მოპირდაპირესთან შეტაკება ველარ გაბედა და საჩხერიდან ოდიშისკენ გაქუსლა.

ვახტანგმა ზედმიყოლებით დაიჭირა სვერის, კაცხისა და სკანდის ციხეები.

სკანდაში თეიმურაზ მეფე დაუხვდა ვახტანგს.

დიდის კრძალვითა და პატივით შეხვდა ქართლის მეფე უხუცეს და უმამაცეს ქართველ საჭეთმპყრობელს.

სავსებით დაბერებულიყო და გატეხილიყო ნახევარსაუკუნოვანი სამამულო ხმალთაკვეთების მთავარი გმირი.

მარტო სხეული კი არა, — სულიც გასტეხოდა მანამდე სულით უძლეველ კაციშვილს.

სული გასტეხოდა, მაშ რა იყო ეს?! თეიმურაზ მეფე ვახტანგ მეფეს ერანში გაგზავნას და ერანის შაჰთან შერიგებას სთხოვს!

მართლაც საოცარი რამ ხდებოდა! აკი თეიმურაზის მამულიშვილურ უქარქაშო ხმალს ყოველთვის ერთი რამ ეწერა წარუხოცელად: მხოლოდ და მხოლოდ ომი სპარსეთთან! (ჰანიბალივით: მხოლოდა და მხოლოდ ომი რომთან!).

ხოლო ახლა... ახლა აღარსად სჩანდა ის საარაგო უქარქაშო სმალი!.. თეიმურაზი ვახტანგს სპარსეთთან შერიგებას სთხოვდა!..

უსაზღვროდ გაახარა ვახტანგ მეფე თეიმურაზის ეგზომ მოულოდნელმა თხოვნამ. მაშინვე ბეჯითად დაარწმუნა და დაანუგეშა — ერანის შაჰი დიდის პატივით, სიხარულით და სიყვარულით მიგიღებს, შეგირიგებს და „შეგიტკობოსო“.

სახლთუხუცესი გივი ამილახორი ამალით აახლა თეიმურაზს და ტფილისში გაგზავნა. იმერეთის საქმეებს რომ მოვარ-

ჩები, მეც ტფილისს გეახლები და იქიდან ერანს გაგისტუმრებო, დააბარა ვახტანგმა თეიმურაზს.

სკანდიდან ქუთათისს მიუხდა ვახტანგ მეფე. იმერეთის სატახტოც აიღო და მაშინვე ოდიშისკენ გაქუსლა ჯარით.

ვერ დაუმაგრდა ვამიყ დადიანი. ზუგდიდი, ცოლ-შვილთან და ქონებასთან ერთად, ვახტანგ მეფეს შეატოვა ხელში და თვითონ სვანეთს გადაიხვეწა.

ვახტანგმა დადიანის ტახტზე დასვა ლევან II-ის ძმისწული შამადავლა იოსების ძე. ლევან მეორე დადიანმა ხომ ძმას იოსებს თვალეზი დასთხარა, მაგრამ თვალთათხრილის შვილმა, აწ დადიანად აღზევებულმა შამადავლამ, მაინც სახელოვანი ბიძის სახელი დაირქვა და ასე გამოჩნდა ოდიშ-სამეგრელოს მთავართა ნუსხაში ლევან III დადიანი (1661—1680 წწ).

ვახტანგ მეფემ ლევან III დადიანს ცოლად შერთო თავისი ძმისწული (კონსტანტინეს ასული) — თამარი, არაჩვეულებრივად ლამაზი და მომხიბლავი ქალი.

(მკითხველს ვთხოვ, აქედანვე კარგად დაიმახსოვროს თამარ მუხრან-ბატონის სახელი, რამეთუ მის გარშემო „პოლიტიკურ მიჯნურობათა“ დიდი ორომტრიალი უნდა გაჩაღდეს საქართველოში. ჯერჯერობით კი ლევან III დადიანთან ქორწინება მისი „პირველი ქორწინება“ გახლავთ).

ვახტანგ მეფემ მკაცრად დასაჯა ვამიყის მომხრე ოდიშარი თავადები, ზოგი მათგანი ტყვედ აიყვანა, ზოგი სულ მოთხარა დედაბუდიანად. ჭაქვითის ციხიდან დადიანების ნაგროვები დიდძალი ოქრო-ვერცხლიც გამოიტანა და ისევ ზუგდიდს მიბრუნდა.

აქ აფხაზთა მთავარი ეახლა „ძღვნითა დიდითა“ და სრული შორჩილება გამოუცხადა ქართლის მეფეს.

ამასობაში ვამიყ დადიანის ამბავიც მოვიდა სვანეთიდან. თურმე ლეჩხუმის ბატონს ზოსია ლაშხიშვილს, ვახტანგ მეფის საამებლად, მკვლევები მიუჩენია და მოუქლავთ კიდევ ვამიყ დადიანი.

ისევ ქუთათისს მიბრუნდა ვახტანგ მეფე.

აქ დემეტრე გურიელი ეახლა, ესეც „ძღვნითა დიდითა“ და შორჩილ-ყმობის გამოცხადებით.

მთავარი მაინც ეს იყო: ვახტანგ მეფემ უსინათლო ბაგრატ IV ტყვედ აიყვანა და იმერეთის მეფედ თავისი უფროსი ძე, 14 წლის არჩილი გამოაცხადა.

იმერეთში არჩილის ეს „პირველი გამეფება“ მოხდა 1661 წელს.

„შანი მშანი არიან“

ვახტანგ მეფე იმერეთიდან ქართლში დაბრუნდა. იდგა 1661 წელი.

და კაცმა რომ თქვას, საქართველო თითქმის გაერთიანებული იყო. „თითქმის“ იმდენად, რამდენადაც მარტო სამცხე-საათაბაგო დარჩენილიყო „ერთიანი საქართველოს“ ფარგლებს გარეთ.

თუმცა დიდი ხნის წინათ და დიდი ხნით დაკარგულიყო ის დრო, როცა საქართველო ფრთებს შლიდა „ნიკოფსით დარუბანდამდის“ და „სინოპიდან არდაველამდის“, მაგრამ ახლა, 1661 წელს, მთელი აღმოსავლეთ და დასავლეთ საქართველო ერთ ხელმწიფეს ემორჩილებოდა — მეფე ვახტანგ მეხუთეს, სპარსელთაგან „შაჰ-ნავაზად“ წოდებულს, „და მეფობდა მეფე შაჰ-ნავაზ სამთავე სამეფოთა: ქართლსა, კახეთსა და იმერეთსა ზედა“.

გულდაჯერებით, გულუხვად და გულსრულად შესდგომოდა მეფე ვახტანგ მეხუთე „ერთიანი საქართველოს“ აღორძინებასა და გამძლავრებას.

მისი „სოციალური სახსარნი“: „და განამდიდრნა ყოველნივე მკვიდრნი სამეფოთა თვისთანი: უკეთუ ვინმე იყო გლახაკი და უპოვარი მონაგებთაგან, აღივსნეს უხვად წყალობითა და სახმართა ბოძებითა მისითა, და უკეთუ იყო ვინმე ნაკლულოვან აგარაკთაგან, ანუ მონათაგან, ანუ საჭურჭლეთაგან, ყოველნივე გაამდიდრეს, და გარდაემატათ სიმდიდრე და მორჭმულობა მკვიდრთა საქართველოსათა“.

მისი აღმშენებლობანი და სიქველენი „ერისა და ბერისა“:

„და სადაცა იყო იატაკი მითათა შინა, ანუ ბართა უქმად მყოფი, ყოველივე სახმარად კაცთა შერაცხილ იქმნა: უშენნი აღშენდეს და მრავალნი დაბანი და დიდ-დიდნი თემნი შესძინნა სამეფოსა საქართველოსასა. და სადაცა იყვნენ თანამდებნი, მოვახშეთაგან განთავისუფლნა. და წმიდანი ეკლესიანი ზეშთა აღმატებულ-ყო შესაწირავითა აგარაკთა და ყოველთა სამკაულთა მიერ განაშვენა, გლახაკთა და უღონოთათვის ფრიად მოწყალე და ქველის-მოქმედი იყო: ტყვენი გამოხსნილ იქმნეს“.

გაერთიანებულ ქვეყანას „ერთიან იდეოლოგიად“ ისევ განუმტკიცა ქრისტიანული სარწმუნოება. იმეკავად გარდაცვლილი ქრისტეფორე კათალიკოსის ნაცვლად საქართველოს ეკლესიის საქეთმშყრობლად დასვა თავისი ბიძაშვილი დომენტი მუხრან-ბატონი, „კაცი ღირსი საყდრისა“ და „სრული საქმითა, რამეთუ ამან მატა სჯულსა და წესსა ეკლესიისასა“.

როსტომ მეფის დროს „სპარსული დაწოლისაგან“ შერყეული ქართული სარწმუნოებრივი და ზნეობრივი სჯულიერებანი ვახტანგის ხელმწიფური ეგიდის ქვეშ ისევ იწყებდა აღორძინებას და აღზევებას. ამისთვის იღვწოდა ყველა თავგამოდებით — მეფეც, დედოფალიც, უფლისწულებიც, ვრიც და ბერიც.

ვახტანგ მეფის „უამთა შინა კჳალად იწყეს მოქცევად ბოროტისაგან და ქმნად კეთილისა: სწავლად და გულს-მოდგინედ წურთად ღმრთიესულიერთა საქმეთა მოქმედებად. და განშვენდეს წმინდანი ეკლესიანი და მონასტერნი და ყოველნი წესნი ეკლესიათანი გამრავლდეს საქართველოსა შინა მიზეზითა ძეთა მეფისა შაჰნავაზისათა, ვითარმედ ესე სიტყვანი ძველთაგან თქმულ არს: „უამნი მეფენი არიანო“. და დედოფალმან მარიამ შეამკო ეკლესიანი შესამოსლითა ხატითა, ჳვრითა და წირვის იარაღითა, ნაკვრითა მარგალიტითა და თვალითა“..

„თითქმის“ გაერთიანებული იყო საქართველო, მაგრამ დიდხანს კი გაუძლებდა ეგზომი შინა-გარე სისხლათხევეით მოცოდვილებული „ერთიანობა“ უფრო უარეს სამომავლო უამთა სიავეს?!

„რად, სოფელო, სხვა არ დასწვი ჩემებრ, მე მქენ დასადაგე?!
გლახ, ლახვარი სასიკვდინე ყველა მე მკარ, დასად აგე!..“

თ ე ი მ უ რ ა ზ პ ი რ ვ ე ლ ი

„საწუთროსა დაუწყნარდეს“.

რ უ ს თ ვ ე ლ ი

იმავე 1661 წელს, ტფილისში დაბრუნებისთანავე, ვახტანგ მეფემ ბრწყინვალე ამაღლა აარჩია, მეთაურად ისევ გივი ამილახორი უჩინა და მათი თანხლებით თეიმურაზი სპარსეთს გაგზავნა.

წინასწარ შეატყობინა შაჰ აბას II-ს ვახტანგ მეფემ: თეიმურაზი მოეშურება შენთან სტუმრად და შესარიგებლად.

თეიმურაზ მეფე სპარსეთს მოეშურებაო?! ისიც, თავისი ნებითა და ფეხით მოდისო?!

ცას ეწია შაჰი სიხარულით.

მართლაც რა საოცრება იყო! დიდი შაჰ აბასი საფლავში ისე ჩავიდა, თეიმურაზის ქედის მოდრეკას ვერ ეღირსა! ჰოდა, ახლა, დიდი შაჰ აბასის ოცნება ასე უბრალოდ და უმსხვერპლოდ უსრულდება „მცირე შაჰ აბასს!“

ერანს ნებდებოდა მისი ნახევარსაუკუნოვანი დაუძინებელი მტერი, „რუსთმოყვარე“ თეიმურაზ მეფე!

შაჰის ბრძანებით საქართველოდან ისფაჰანამდე, მთელი გზის გასწვრივ სპარსელები დიდი „ფიშვანებით“ (საზეიმო შეხვედრები) ეგებებოდნენ მხცოვან მტერს, გმირსა და ხელმწიფეს.

ისფაჰანს რომ შიალწიეს, სატახტოში ძეხორციელი აღარავინ დაკავებულა — მთელი მოსახლეობა, დიდიან-პატარიანად და ქალიან-კაციანად, ქართველებს შემოეგებნენ.

ქალაქის ალაყაფის კართან ეთიმაღოვლე (დიდგეზირი) დაუხვდა თეიმურაზს, თაყვანი სცა და თავისი სასახლისაკენ წაუძღვა.

უკვე მიმწუხრის ქამი დამდგარიყო და ეთიმაღოვლეს მდი-
დარი სავახშმო სუფრა გაეწყო ქართველი სტუმრებისთვის.
მოსუცი მეფე ნადიმს დიდხანს არ შერჩენია და დასასვენებ-
ლად შევიდა მდიდრულად მორთულ სანთიობოში.

წაძინება ძლივს მოასწრო, რომ ვიღაცამ გამოაღვიძა,
ფრთხილი ხელის შეხებით.

ეს თვითონ შაჰ აბასი ყოფილა. იგი თავისი ფეხით მოსუ-
ლა „ძვირფასი სტუმრის“ სანახავად!

ასეთ პატივს სწორედ არავინ მოელოდა.

თეიმურაზი ფეხზე წამოიჭრა და მუხლის მოყრა დააპირა,
მაგრამ შაჰმა არ დაანება — ფეხზე წამოაყენა და ისე გადაეხ-
ვია, როგორც „შვილი მამას“.

ძალისძალად სამგლოვიარო ტანსაცმელი გამოუცვალა შაჰ-
მა თეიმურაზს და მაშინვე ახალ სანადიმო სუფრაზე გაიტაცა.

მთელი ღამე და მეორე დღეს მზის დაყუდებამდე გაგრძელ-
და სმა, ზმა, სანადიმო ლიწინ-ლიწინი. დასასრულს, „ვითაც
შვილმან მამას“ შაჰმა თეიმურაზს „ათასი თუმანი თეთრი და
ათასის თუმნის ფარჩა“ მიართვა. უხვად დააჯილდოვა ქართ-
ველთა ამაღაც, გამორჩევით — გივი ამილახორი, რომელიც
შაჰს ძალიან მოსწონებია „შვენიერობისთვის და კარგ საქცი-
ელობისთვის“.

ამილახორი და სხვანი ქართველნი თეიმურაზს გამოეთხო-
ვენ და საქართველოსკენ გამობრუნდნენ.

დღე და ღამე არ შორდებოდა შაჰი თეიმურაზს. „ანადი-
მებდა და ანადირებდა თვისთა-თანა და ნიჭვიდა მრავალსა“.

სტუმარ-მასპინძლის „შეხმატკბილებული ცხოვრება“ ერთ-
ბაშად მოვარდნილმა საშფოთარმა ამბავმა შეაჩუჩა.

ისევ საქართველოდან მოდიოდა ეს „შემარყეველი“ ცნობა.

თურმე საქართველოს მთაში — თუშ-ფშავ-ხევსურეთში
ისევ აუსხამთ იარაღი ქართველებს. „ბახტრიონული ომი“ მხო-
ლოდ დასაწყისად მიუჩნევიათ მთიელ მამულიშვილებს. ელ-
ნი და სპარსელნი დიახაც დავიფრინეთ, მაგრამ კახეთი მაინც
სპარსეთის შაჰისა და „გათათრებული ქართველი“ ხელმწიფისა-
გან საბოლოოდ უნდა გათავისუფლდეს და ისევ თავისი საკუ-
თარი ბატონ-პატრონი დაუბრუნდესო!

კახეთის „საკუთარი ბატონ-პატრონი“, რასაკვირველია, თე-

იმურაზი იყო, მაგრამ, რაკი მოხუცმა მეფემ იმერეთიდან, ქართლის გავლით, სპარსეთს „ჩაიტანა სული“, კახეთის მთიანეთში თურმე ხელმწიფედ და „პატრონად“ რუსეთიდან მოიხმო თეიმურაზის შვილიშვილი ნიკოლოზ დაგითის ძე.

ნიკოლოზი აგერ რვა წელიწადი იმყოფებოდა მოსკოვში, „ვითარცა ძე“ რუსთა ხელმწიფე ალექსი რომანოვისა.

.

ალექსიმ თავის „საყვარელ შვილობილს“ საქართველოში წამოსვლის წინ დიდი „გაცილება“ მოუწყო. სამჯერ „სამსაფეხურიანი მიღებით“ მიიღო, ნადიმ-ღრეობანი გაუმართა უმაღლეს სახელმწიფო მოხელეთა და ბოიართა თანდასწრებით; თავის გვერდით, სადაფის მაგიდასთან, ხელმარჯვნივ დაისვა, ტბილად, „შინაურულად“ ესაუბრა, უხვად დაასაჩუქრა და შინ თავისი, სამეფო კარეტით გაისტუმრა.

ბოლო შეხვედრა სოფელ პოკროვსკოეში დაუნიშნა ალექსიმ „ქართველ შვილობილს“. მეფესთან მიმავალი ნიკოლოზის კარეტას სამასორმოცდაათი რუსი მხედარი მიაცილებდა. ამდენივე ცხენოსანი და მოისარი მისთვის განკუთვნილი ბინის წინ ჩამწყრივებულებოდა სახელმწიფო აღმებითა და დაფდაფებით.

მთელი დღე ერთად გაატარეს მეფემ და „სამეფოდ გამზადებულმა“ უფლისწულმა. ბოლოს, ალექსიმ ახალ ტანსაცმელში გამოაწყო ნიკოლოზი, ძვირფასი საჩუქრებიც უბოძა, სახარჯო ფულიც „ჩაუჯიბა“, დალოცა, გამოეთხოვა და გამოუშვა.

1660 წლის 3 ივნისს გამოემგზავრნენ საქართველოსკენ ნიკოლოზი და დედამისი ელენე.

მოსკოვიდან თერგამდე, მეფის ბრძანებისამებრ, ყველგან დიდის ზარზეიმით ეგებოდნენ ქართველ უფლისწულს.

1661 წლის ზაფხულის მიწურულს თუშეთს მოაღწია ნიკოლოზმა. მოაღწია და მაშინვე შემოეყარნენ „მის იმედად დამდგარი“ მთიელი პატრიოტები.

მოსკვისთანავე თუშებმა უფლისწულს სახელი გამოუცვალეს და ერეკლე დაარქვეს (ამიერიდან ჩვენც ასე ვუწოდოთ — ერეკლე ბატონიშვილი, ანუ ერეკლე პირველი).

ერეკლე და დედამისი ელენე გამალებით შესდგომოდნენ საომარ სამზადისს...

შაჰ აბას II-ს თავზარი დასცა ამ ამბავმა. მაგრამ „თავიდან ზარი“ მოიშორა და თეიმურაზ მეფეს „ტკბილად“ ჩაუჯდა სალაპარაკოდ, — შენი შვილიშვილი ჩამობრძანებულა რუსეთიდან კახეთში, თურმე ხალხს მიჯანყებსო. მე კი შენთვის მინდოდა დამებრუნებინა კახეთით. ახლა ამას გირჩევ — იმ შენს შვილიშვილს კაცი გაუგზავნო და ჩემთან მოვიდეს და მეაზღოს. სიტყვას გაძღვევთ, არაფერს ვაგნებ, ძმასავით შევიყვარებ და შევიტებობ, ოღონდ კი რუსეთს თავი დაანებოს და ჩემს სამსახურად დადგესო. თუ ამას აღასრულებთ, მაშინვე თქვენს კახეთს დაგიბრუნებთ, თქვენსავე სამეფოდ და საპატრონოდ, თუ არა და...

გასაგებად იყო ნათქვამი. ენდობოდა თუ არ ენდობოდა შაჰის „პატიოსან სიტყვას“ თეიმურაზი, სულ ერთია, ტყვეს მისი მეუფის ბრძანება მაინც უნდა შეესრულებინა.

თეიმურაზმა გიორგი ჩერქეზი და თამაზ ბებურიშვილი გაამზადა საქართველოში გასაგზავნად. შაჰმა თავისი კაცი, აბას-ყული-ბეგი გააყოლა ქართველ შათირებს. ამათ უნდა ჩამოეყვანათ ერეკლე ბატონიშვილი საქართველოდან სპარსეთში.

მალე უკანვე მობრუნდნენ სპარსეთს გიორგი ჩერქეზი, თამაზ ბებურიშვილი და აბას-ყული-ბეგი — მობრუნდნენ ხელცარიელნი, გაწბილებულნი და პირში ჩალაგამოვლებულნი. ერეკლეს ცივი უარი ეთქვა რუსთა და ქართველთა დალატზე და სპარსეთს წამოსვლაზე. დედამისი ელენეც და საომრად შემართული მთიელებიც აღეშფოთებინა შაჰ აბას II-ისა და თეიმურაზის „მიწვევას“.

„ყველაფერი მაინც თეიმურაზის ბრალიაო, — აილესა შაჰი, — ალბათ, ამ ცბიერმა ბებერმა რაიმე კალამბურით მიანიშნა თავის შვილიშვილს, ღმერთი არ გაგიწყრეს და მართლად არ წამოხვიდე სპარსეთს...“.

დიდხანს იჯდა შაჰ აბას II ალესილი, ბალანაშლილი და ნამე ფიქრებით დარეგვილი.

— სანადიმო სუფრა გააწყვეთ და თეიმურაზი მომიპატრონეთ, — თქვა ბოლოს.

ისევ მოვიდა თეიმურაზი. ღვინო და წანადირევი მიაძალა მასპინძელმა სტუმარს.

ახლა ჩვენებური მარხვა დგას და სახსნილოს ვერ გვახლებით, — მოწიწებით იუარა თეიმურაზმა.

— ჩვენებურიო?! ქართულიო?! ქრისტიანულიო?! ჰო, მართლა, ეგ კარგი გამახსენე, — ბოლოს და ბოლოს, სანან უნდა სდიო ამ ქართულსა და ქრისტიანულს?! მე გირჩევ, გირჩევ კი არა — მოვითხოვ ქრისტიანული დააგდო და მაჰმადის სჯულს ეზიარო! — იყვირა შაჰმა და ისევ მიაძალა ხორცეული სტუმარს.

— ვერც ქრისტიანობას მივატოვებ და ვერც მარხვას გავტეხავ, — ცივად მოსჭრა თეიმურაზმა.

ღვინით სავსე ყანწი აუქაგდაგდა ხელში შაჰ აბასს: ერთბაშად გაიქნია და ღვინო შიგ სახეში შეაქცია თეიმურაზს.

თხუთმეტი წლის ბიჭივით წამოფრინდა ფეხზე მსცოვანი მეფე გულაწყვეტილი და სახეალეწილი.

— მაპატიე, — უმაღვე შეაგება შაჰმა, — აკი შვილი შეცდება ხოლმე და მშობელ მამას ჰკადრებს რაიმე უკადრისსა, ხოლო მამა დიდსულოვნებით შეუნდობს შვილსა!

რა გაეწყობოდა! „მამას შვილისთვის“ უნდა შეენდო და თეიმურაზმაც „შეიწყნარა“ შაჰის უზრდელობა.

მეორე დღეს შაჰმა შეუთვალა თეიმურაზს: აშრაფს ვაპირებ წასვლას, თქვენც თან უნდა წაგიყვანოთ, მაგრამ მანამ ქრისტიანობა უნდა დააგდოთ და მაჰმადიანად მოინათლოთო.

თეიმურაზმა მაშინვე, უყოყმანოდ შეუბრუნა პასუხი: მე უკვე მოგახსენეთ და ახლაც იმავე აზრზე გახლავართ, — არამც და არამც არ მოხდება, ცოცხალის თავით ქრისტიანობას და ქართველობას გადავუდგე და თათრად მოვინათლოო!

სხვა რალა იყო საჭირო?!

შაჰ აბას II-ის ბრძანებით თეიმურაზ მეფეს ბორკილები გაუყარეს და ასტრაბადის ციხეში ჩააგდეს.

ასტრაბადის ციხე!

რამდენი ქართველი მამულიშვილის გული გაცივებულა მინტრემლიან ჯურღმულეებში!

(ერთხანზე ასტრაბადის ციხეში იტანჯებოდა თეიმურაზ მეფის თანამებრძოლი, წათესავი და მოყვარე ქართლის მეფე

ლუარსაბ II — მამულისთვის თავდადებული, პირმშვენიერი
ქაბუკი გვირგვინოსანი. იგი სწორედ ასტრაბადიდან წაიყვანეს
შირაზს და იქ მოჰკლეს...).

და იქდა თეიმურაზ მეფე ასტრაბადის ციხეში.

იქდა და ელოდა... რას, სიკვდილს?!

არავინ იცის... მაგრამ სიკვდილმა კი მოაკითხა.

1663 წელი დამდგარიყო, მკაცრი, ყინვიანი ზამთრით.

და იყო თეიმურაზი 74 წლისა, როცა სიკვდილმა ასტრა-
ბადის ნესტიან კედლებში გაიარა, მსცოვანი ხელმწიფის სა-
რეცლის წინ დაიმუხლისთავა და ნოტიო საბნისა ქვეშ, გულის
გასწვრივ გათოშილი ხელი შეაცურა.

დაწყნარდა... და გაჩერდა სამშობლოზე ზრუნვით და ურ-
ვით დამდნარი გული.

ყოვლის დამაწყნარებელი სიკვდილის საუფლოში იწვა
მთელი მისი წუთისოფელი დაუწყნარებელი კაცი, — კაცი,
რომელიც მცირე ხნით, „სულის მოსაბრუნებლად“ თუ მიაყრ-
დნობდა ხოლმე მძიმე ცხოვრებით დამაშვრალ თავს ხან სა-
ომარი ცხენის უნაგირს, ხან ლირიკულ და ეპიკურ მუხათა
კალთას.

მთელი სიცოცხლის მანძილზე არც ერთი არ გაუგდია ხე-
ლიდან — არც მამულის საკეთილდღეოდ აღმოხდენილი უქ-
არქაშო ხმალი, არც შემეკული ხატოვანი, სიტყვიერების შე-
მამკობელი პოეტური ქნარი.

ასე იყო, — რამეთუ „ორივე ბუნება“ მძლავრად ჩაბუდე-
ბულიყო მის სხეულში — „ბუნებაი კაცობრივი“ და „ბუნებაი
საღმრთოი“ (ეითარცა იტყოდა იოანე დანასკელი).

თუმცა იყო შემოხვევები, როცა მისი უდროჟამოდ მოქნე-
ული ხმალი შინაურ თანამომძმეს უფრო მეტ სისხლს აქცევი-
ნებდა ხოლმე, ვიდრე ქართველი ხალხის მტერს და მოსისხ-
ლეს; და, ზოგჯერაც მისი „პოეტური პიი-პუიცი“ მისსავე ხალხს
საბედისწერო „ვაი-ვაის“ გმინვად უჯდებოდა.

მაგრამ თვითონ — მეფეს, სარდალს, მხედარს და პოეტს—
ყოველთვის გულწრფელად სჯეროდა რომ მისი ხმალიც და
ქნარიც მხოლოდ სამშობლოს საკეთილდღეოდ იღვწოდა, იღ-
ვწოდა და იხარჯებოდა.

... ამიტომაც ძნელი ხდება ეგზომ რთული, წინააღმდეგობრივ

თვისებათა მქონე პიროვნების განსაზღვრებად მოიძებნოს რამდენიმე ერთი სახელნართაული სიტყვა.

მაგრამ მაინც მის პიროვნებაში იყო ერთი ყველაზე დიდი „მთლიანობა“ — მარად შეურყეველი რწმენა საკუთარი ხალხის ძალმოსილებისა, უძლეველობისა და უკვდავებისა. დავით აღმაშენებლისა და გიორგი ბრწყინვალის შემდგომ, საკუთარ ხალხში არავის ისე თვალნათლივ არ ესახებოდა მარად „თვითაღდგომადი“ და „თვითამაღორძინებელი“ ფენიქსი, როგორც მეფე თეიმურაზ პირველს. ეს რწმენა, ვითარცა „განუჭრელი თვისება“ (იოანე დამასკელის ფორმულაა) მასში ყოველთვის „მალალ დონეზე“ იდგა ერთნაირად — მისი პირადი თუ მისი ხალხის უზემოესი აღზევების დროსაც და უჭვემოესი დაცემის ქამსაც.

საქართველო მისთვის „უნივერსალური ფენომენი“ გახლდათ. სამშობლოსთან მიმართების გარეშე ყოველი „სხვა-არსი“ მისთვის იყო მხოლოდ „არ-არსი“.

მთელი მისი პირადი ცხოვრება უმძიმესი გოლგოთა იყო. მთელი მისი წუთისოფელი ამ „ქართველ იობს“ სამგლოვიარო თალხის გაძრობა არ ჰღირსებია, ყრმობის ქამს დაობლდა მამით, მერე დედა მოუკლეს გაუგონარი ტანჯვა-წამებით. ორი ოჯახი ჰყავდა და ორივე მის სიცოცხლეშივე ამოუწყდა: მოესწრო ორივე მეუღლის სიკვდილს, ორი ვაჟი შაჰ აბასმა დაუსახიჩრა და დაუხოცა, ერთიც სპარსელებს შეაკვდა, ერთი ასულიც სპარსეთის შაჰის კარზე დაახრჩვეს. ერთი ქალიშვილი დარჩა და ისიც უშვილძიროდ გადაეგო. შვილიშვილ „გვარის გამგრძელებელთაგან“ ორი მოუკვდა და ერთი ძლივს დაურჩა...

მაინც იბრძოდა. იბრძოდა, რადგანაც ყოველივე პირადულზე მაღლა, გაცილებით უფრო მაღლა — მაინც საქართველო იდგა!

იგი იბრძოდა მაშინაც, როცა მისი სამშობლოს ძალ-ღონე ლამის „ნოლზე“, გინა „უკანასკნელ მამულიშვილზე“ იყო დასული. იბრძოდა, რადგან რაღაცნაირი, აუხსნელი მისტიურობით სწამდა, რომ არასოდეს მისი სამშობლო და მისი ხალხი არ დავიდოდა არც „ნოლზე“ და არც „უკანასკნელ მამულიშვილზე“. მისი ღრმა (გინა „მისტიური“) რწმენით, საქართ-

ველოს ახლავს მხოლოდ ფენიქსისებური „მოქცევანი“ — ჟამნი დაცემისა და ჟამნი აღორძინებისა — და ქართველი ხალხიც მანამ იარსებებს ამ ქვეყანაზე, სანამ არსებობს „სხეული ცისაი“ და „სხეული მიწისაი“...

გამეფდა 16 წლისა, იმეფა და იომა 58 წელიწადი, აღესრულა შობითგან 74 წლისა.

საქართველოს დალოცვა მოასწრო.

ესეც დაასწრო სიკვდილს: აქ არ დატოვოთ ჩემი ცხედარი, მტრის მიწაზეო; საქართველოში წაასვენეთ და იქ დაკრძალეთ, ჩემი კახეთის მიწაშიო.

„არ დატოვოთო“, „წაასვენეთო“, „დაკრძალეთო“, — ისე ამბობდა, თითქოს მარტო გაციებულ სხეულს გულისხმობდა, ხოლო „თვითონ“, — რასაც მისი სული ერქვა, „საკუთრივ თეიმურაზი“ ერქვა — თითქოს, იგი „თვითონ“ გაიკვლევდა გზას — აღბათ, ისევ საქართველოსკენ გაიკვლევდა.

ერთგულ კახელთა ხვეწნა-მუდარას შაჰ აბას II-მ ყურიც არ ათხოვა და „არ გამოუშვა“ თეიმურაზი საქართველოში. ზამთრიდან შემოდგომამდე ისევ გრძელდებოდა „ტყვეობა“ აღსრულებული გმირი ხელმწიფისა. მერე ვახტანგ ქართლის მეფემ შეუთვალა შაჰს: მაინცდამაინც სჯობია, ნება დართოთ წამოასვენონ საქართველოში გარდაცვლილი ქართველი ხელმწიფეო.

შაჰმა „შაჰ-ნავაზის“ თხოვნაზე მაშინვე თანხმობა ბრძანა.

წამოასვენეს კახელებმა თავისი ხელმწიფისა და პატრონის ცხედარი.

ალავერდს მოასვენეს.

ვახტანგ მეფემ ბრძანა, საკადრისი დიდებამოსილებით დაეკრძალათ „დიდი თეიმურაზი“.

„შეკრბნენ კათალიკოზ-ეპისკოპოსნი ქართლ-კახეთისანი“, აუარებელი ხალხი მოაწყდა ალავერდს დიდი მამულიშვიდის, ხელმწიფის, პოეტის, გმირისა და „პატრონის“ დასატირებლად.

ალავერდის ტაძარში, სამეფო საძვალეში ჩაასვენეს.

გვერდით სამარტვილეში მისი წამებული დედის წმინდა ნაშთები ესვენა.

• • • • •

შუალამე გადასული იყო,
 ალაზნის გასწვრივ კახელ მხედართა რაზმი მითქარუნობდა
 და მღეროდა:

„აიმ ადგილის ჭირიმე,
 სად თეიმურაზ ბრძანდება;
 დაიცივს წითლის კარავსა,
 ზედ ოქროს სვეტი დადგება“.

ა ზ მ ა მ ი რ ვ ი

„დედა-ტახტის“ გარშემო

ივერიეთიდან—კახეთში...
 საარსებითს „გავლით“

ერანის შაჰი თეიმურაზ მეფის სიკედილით ჯერ კარგად არც
 კი დამტკბარიყო, რომ თურქეთის სულთნისაგან ასეთი რის-
 ხვიანი წერილი მოუვიდა: გაიხსენეთ, ჩვენს შორის ზავი გახ-
 ლავსთ; ხოლო თუ ზავი არის, ეს როგორ მოხდა, რომ თქვენს
 ქვეშევრდომს ვახტანგ-შაჰ-ნავაზს ჩემ ქვეშევრდომ იმერეთში
 მეფედ თავისი შვილი დაუსვამსო? ჩვენ მოვითხოვთ, ახლავე
 გაიყვანოთ არჩილ ვახტანგის ძე იმერეთიდან, ხოლო უკეთუ
 არ აღასრულებთ, მაშინ ომი გსურვებით და ჩვენც აღარ და-
 ვაყოვნებთ — დაუყოვნებლივ წამოვალთ ჩვენის მხედრობითო!
 ძმარმა გადაუარა გულზე შაჰ აბას II-ს.

ესეც იმ დღესვე აცნობეს ერანის მბრძანებელს: თურმე
 ოსმალეთის ფაღიშაჰს პასუხისთვისაც არ დაუცდია, — ახალ-
 ციხეში ასლან ფაშასთვის შეუთვლია, ბარემ ჯარი წაიყვანე და
 იმერეთიდან არჩილ ვახტანგის ძე გააძევეო. ასლან ფაშაც თურ-
 მე, სადაცაა მიადწევს ჯარით ზეკარის გადასასვლელსო...

შაჰ აბას II-ს თურქეთთან ომი იმჟამად უიმედო საქმედ მიაჩნდა და მაშინვე, ყოველგვარი ყოყმანისა და ბჭობა-ჭრის გარეშე, ტფილისში ფაიქი აფრინა და ვახტანგ მეფეს შემოუთვალა: შენი ვაჟი არჩილი იმერეთს მოაშორეთ; ოღონდ თურქეთთან ზავს ნუ ჩამიშლი, არჩილი ჩემთან გამოგზავნე და იმერეთზე „უმჯობეს“ ქვეყანას მივცემ სამეფოდო.

ეგზომ გამწვავებულ მდგომარეობაში არც ვახტანგ მეფეს უნდა დაეწყო ყოყმანი. მან იმერეთიდან წამოყვანილი ესინათლო ბაგრატ IV-ს ჯერ ცოლად შერთო თავისი ძმისწული თითია (იქნებ — თათია?) — სილამაზით სახელგანთქმული თამარის დაი (თამარი ხომ მაშინ ლევან III დადიანს ჰყავდა ცოლად), მერე ბაგრატი თავისი ცოლით და იორამ სააკაძის (გიორგი სააკაძის ძე) თანხლებით ქუთათისს გაგზავნა და შვილსაც ეს შეუთვალა: ახლავე იმერეთის ტახტი ბაგრატს ჩააბარე, ხოლო შენ სასწრაფოდ გადმოდი, ტფილისშიო.

ერთი სიტყვით, ვახტანგ მეფეს ბაგრატთან დამოყვრებით იმერეთზე „რალაც უფლების“ შენარჩუნებაც სურდა და შაჰის ბრძანებასაც „უყოყმანოდ“ აღასრულებდა.

ეს ამბავი 1663 წლის ზაფხულში მოხდა.

არჩილის ეს „პირველი იმერული მეფობა“ ორ-ნახევარი წელიწადი გაგრძელდა.

იმერეთის ტახტზე ისევ ბრმა ბაგრატ IV იჯდა.

ასლან ფაშა კი უკვე გადმომდგარიყო ფერსათის მთაზე ჯარით.

იმერეთის სამეფო კარმა ასლან ფაშას დიდი ქრთამი შეაგება და უკან გააბრუნა.

ქრთამით პირამოტენილმა ასლან ფაშამ ხონთქარს აცნობა: იმერეთის საქმე მოგვარებულია, ქართლის უფლისწული განდევნილია და ქუთათისის ტახტზე ისევ თქვენი ყმა ბაგრატი ზისო...

თავადმა და სახლთუხუცესმა სეხენია ჩხეიძემ ასლან ფაშას ოსმალთა ჯარი გამოართვა, „მოიპარა ციხე ქუთათისისა და შეაყენნა ოსმალნი“.

(ეს სამწუხარო ამბავი აქედანვე დავიმახსოვროთ, მკითხველო: დასავლეთ საქართველოს მესვეურებმა, თვითონ აქაური თავადის მეთაურობით, ქუთათისის ციხეში თურქული ცი-

სიონი შეუშვეს! განა, ასე არ დაიწყო მესხეთის მიწაზე ფეს-
ვების გადგმა უსაშინლესმა უბედურებამ — „ოსმალობამ“,
განა „გათურქებამ“?)

იორამ სააკაძე, რომელმაც ვახტანგ მეფის დავალებით, ბრმა
ბაგრატი იმერეთში ჩაიყვანა, ქართლში ველარ დაბრუნდა:
1664 წელს მას ქუთათისში ყვავილი შეეყარა და გარდაიც-
ვალა.

როგორც ითქვა, სპარსეთის შაჰი არჩილ ვახტანგის ძეს ერ-
ანში იწვევდა და სამმართველოდ იმერეთზე „უმჯობეს“ ქვე-
ყანას კპირდებოდა. ვახტანგ მეფემ შვილი ისევ სპარსეთის
გზებზე გაჩვეულ სიძესა და სახლთუზუცესს — გივი ამილი-
ხორს ჩააბარა და შაჰთან შესახვედრად გაგზავნა.

შაჰ აბას II მაშინ მაზნანდარანს იყო და აქვე მიიღო ქარ-
თველი სტუმრები. არჩილი „შეიყვარა ფრიად“ და „პატივ-
სცა“ შაჰმა. ორივეს — არჩილს და გივის — გამაჰმადიანება
მოსთხოვეს და არც ერთი არ გადალიანებულა — ორივე „გა-
თათრდა“.

არჩილს სახელიც ახალი დაარქვეს, „თათრული“ — შ ა ჰ
ნ ა ზ ა რ - ხ ა ნ .

როცა ქართველმა ბატონიშვილმა შაჰის ნაბრძანები ყვე-
ლაფერი ასე მორჩილად და თვინიერად აღასრულა, სპარსე-
თის მბრძანებელმა იგი კახეთის მეფედ გამოაცხადა და ისე
გამოისტუმრა საქართველოში. შაჰს ძალიან აშფოთებდა კა-
ხეთში „რუსეთუმე“ ერეკლე ბატონიშვილის ყოფნა და მთი-
ელი ქართველების საომარი ღირსის ქლრიალი. სწორედ იმი-
ტომ აძლევდა კახეთს შაჰი „გათათრებულ არჩილს“, რომ მას,
„გათათრებულ მამასთან“ ერთად, კახეთიდან უნდა გაეძევებინ-
ა ქრისტიანი ქართველებისა და მათი „ქრისტესმიერი ძმების“,
რუსების „რჩეული ბატონიშვილი“ — ერეკლე-წიკოლოზი:
1664 წელი იყო.

არჩილი კახეთის მეფედ იქდა.

ქართლი ხომ მამამისს, ვახტანგ მეხუთეს ეჭირა:

ამასაც „გაერთიანება“ ერქვა — ვახტანგ მეფის ხელქვეით
ქართლ-კახეთის გაერთიანება.

მამა-შვილი სწრაფად შეუდგა თუშეთში ჩასაფრებულნი

ერეკლე ბატონიშვილის განადგურებისათვის სამზადისს. ქართლის ჯართან ერთად, შაჰის ბრძანებით, ვახტანგ მეფეს უნდა შეერთებოდნენ მეზობელი სპარსული პროვინციების ხანები და ბეგლარბეგები.

ერეკლე გამალებით უყრიდა თავს მთისა და ბარის კახელობას.

პირველი შეტაკება მოხდა 1664 წლის ზაფხულში, ურიათუბნის ახლოს.

ბრძოლა მთელი ერთი დღე-ღამე გაგრძელდა.

ერეკლე დამარცხდა და უკუიქცა.

ვახტანგ მეფემ თავისი ძმისწული, და თუნა კონსტანტინეს ძე მუხრან-ბატონი (თამარისა და თითიას ძმა) გამოადევნა ლტოლვილებს.

ერეკლემ თუშეთის მთებში შეასწრო და გაუჩინარდა.

მომდევნო წლის გაზაფხულზე ერეკლე „მარტყოფს მოუხდა ცოტას კაცითა“ ვახტანგ მეფეს, მაგრამ ისევ დამარცხდა და უკუიქცა.

გამოდევნა ვახტანგ მეფე ქართლელთა და სპარსელთა მხედრობით, უჯარმასთან წამოეწია, ისევ დაამარცხა და გააქცია თუშთა ჯარი.

ერეკლე ბატონიშვილმა და დედამისმა ელენემ თორღას ციხეში შეასწრეს და შიგ ჩაიკეტნენ.

შვიდი თვე ალყად ადგა ვახტანგ მეფე კახეთის განთქმულ ციხე-სიმაგრეს. ბოლოს, როცა თორღაში ჩაკეტილებს შიმშილ-წყურვლით სიცოცხლე უკიდურესად გაუმწარდათ, ერეკლეს დედამ, ელენემ მამაკაცის ტანსაცმლით ციხიდან მალულად გამოსვლა მოახერხა, ვახტანგ მეფეს ეახლა და მოახსენა: თქვენ არ დაგშვენდებათ მე და ჩემი შვილის დატყვევება და გასათათრებლად ერანის შაჰთან გაგზავნაო; ამიტომ გეაჭებოთ, მე და ჩემი ერეკლე უვნებლობის ფიცით გაგვიშვათ თორღას ციხიდანო.

ვახტანგმა ფიცი კიდევაც მისცა და კიდევაც აღასრულა: მისი ბრძანებით ერეკლე ბატონიშვილი დედამისთან ერთად იმ ღამესვე გააპარეს.

ერხელ კიდევ წამოვიდა ერეკლე თუშეთიდან თუშთა ლაშ-

ჭრით და „აწყვერთან“ მდგარ ვახტანგს და არჩილს დაეცა ანა-
ზღეულად, ღამესა ბნელსა.

ბანაყის შუაგულში მდგარ კარავზე მიიტანეს მთავარი იე-
რიში თუშებმა, რადგან იქ მეფე ეგულეობდათ. მაგრამ იმ კა-
რავში მარტო გივი ამილახორი აღმოჩნდა. ამილახორმა სიკე-
დილს მაინც გაასწრო.

ვახტანგმა, არჩილმა, თამაზ თურქისტანიშვილმა და ზაზა
ციციშვილმა ბნელ ტალავერში შეირეკეს ერეკლეს მეომრები
და მისდგნენ სასტიკი ჩეხვით.

ერთი გოლიათური ანაგების თუში აგინებდა ხმამალა ვახ-
ტანგ მეფეს. გაუხტა თამაზ თურქისტანიშვილი იმ თუშს,
ხმლით თავი დააგდებინა და მეფეს მოურბენინა.

რიურაეზე, წყვდიადი რომ გაიფანტა, ვახტანგმა ბუკის და-
ცემა და ცხენებზე ამხედრება ბრძანა.

ერეკლეს და მის მეომრებს აქამდე მეფე მოკლული ეგო-
ნათ, მაგრამ ახლა რომ ცოცხლად იხილეს, ბრძოლის გაგრძე-
ლება უსაზმნოდ მიიჩნიეს და სისხლნაქცევ მინდორს გაეცალ-
ნენ.

ერეკლემ ჯერჯერობით ხელი აიღო „თათარ მამა-შვილთან“
ბრძოლაზე და დედასთან ერთად ისევ რუსეთს გაბრუნდა
(1666 წ.).

„19 აპრილს მოსკოვში დიდი ზემით შემოვიდა ქართველი
უფლისწული ნიკოლოზ დავითის ძე“, — ჩაიწერა დღიურში
რუსეთის ჯარის პოლკოვნიკმა, შოტლანდიელმა პ ა ტ რ ი კ
გ ო რ დ ო ნ შ ა.

10 ივნისს მეფე ალექსი მიხეილის ძე „წახნაგოვან პალა-
ტაში“ დიდის ამბით შეხვდა „ნანატრ შვილობილს“.

ისევ გვერდით უჯდა სანადიმო სუფრასთან რუსთა ხელ-
მწიფეს ქართველი უფლისწული. თერთმეტი ახალგაზრდა ბო-
იარი ნიკოლოზს ღვინის მწდედ უდგა და ოცდაათი ქაბუკიც
კერძთა მიმტანად ემსახურებოდა.

ვახტანგ მეფემ კახელებს არჩილის ერთგულებაზე ფიცი
დაადებინა და თვითონ ისევ ქართლში დაბრუნდა.

არჩილი „დაჯდა მეფედ და დაიპყრა ყოველი საზღვარი კახეთისა“. სატახტო ქალაქად, იავარქმნილი გრემის ნაცვლად, თელავი გამოაცხადა. ფრთხილი, „საბუთიერი წიაღსვლებით“, უმაღლესი „სახელოები“ თათარ და გათათრებულ თავკაცებს წაართვა და ერთგულსა და თავდადებულ მამულიშვილებს დაურიგა. მისი ზრუნვით „შენდებოდა კახეთი, ვინადგან იყო მშვიდობა და უმტრობა“.

რამდენჯერმე ლეკებს მოუხდათ არჩილი, სააბრაგო ბუდეები მოუშალათ და კახეთის მშვიდობიან მოსახლეობაზე ყაჩაღური თავდასხმების მადაც დააკარგვინათ.

დიდ სააღმშენებლო საქმეებს განასრულებდა არჩილი კახეთს. „ამან არჩილ ჰყო სასახლე თელავს და განაახლნა ეკლესიანი ყოველნი კახეთისანი და დასხნა ეპისკოპოსნი, მატა სჯულსა და შენობასა ქვეყნისასა“.

კახელებს ძალიან მოსწონდათ ეს საოცრად მომხიბლავი ყმაწვილი კაცი, რომელიც „იყო ახოვნებითა, შვენიერებითა, სიმხნითა და ყოვლითა სამხედრო სანადიმო ზნითა სრული, რომლისა ისარი 12 მუჭი სიგრძითა, შემმართებელი, ძლიერი, ლალი და ამაყი, მონადირე და მოასპარეზე, წარჩინებული და საღმრთოთი აღმატებული“.

უკვე ლექსებსაც წერდა მაღალი პოეტური ხელოვნებით, თუმცა თვითონ კრძალვით ამბობდა, მე ვწერ მხოლოდ „ნაღვლის რასმე საქარეველადო“.

სიტყვა ნაგრები არ მითქვამსო, ამბობდა წრფელად და მართლაც მსმენელს და მკითხველს ატკობდა მისი მშვენიერი, დახვეწილი, უცხოური „მიმძლავრებისგან“ განწმენდილი ქართული სიტყვა და სიტყვათა წყობა.

მაგრამ ჯერ იგი მხოლოდ „გზების“ დასაწყისში დგას — პოეზიისა და პოლიტიკის უმძიმესი გზების დასაწყისში...

არჩილ მეფე ჯერ ისევ უცოლო იყო. უკვე ორჯერ გასცუდებოდა საქორწინო წინდი სიმშვენიერით და ნიჭიერებით სახელგანთქმულ ვაჟკაცს. პირველად ნოდარ ციციშვილის ქალთან ჩაეშალა საქორწინო პირობა, მეორედ ხომ ვამიყ დადიან-

წის ასული უნდა შეერთო ცოლად, მაგრამ ქართლელი უფლისწულის ნაცვლად დადიანმა თავისი ქალი აკი ბეეან ლოდობერიძეს მიათხოვა...

ახლა შეუჩნდნენ კახელი კარისკაცები და უჩიჩინეს: შენტვის ღირსეული საცოლე ქეთევანი არისო — საოცრად ქიკლუცი, საოცრად მშვენიერი, თანაც კახეთის მეფური შტოს ნაშიერი — თეიმურაზ მეფის შვილიშვილი, დიდი მამულიშვილის დათუნა (დავით) უფლისწულის ასული.

(ქეთევანი, როგორც მკითხველს ახსოვს, პირველი ქორწინებით ცოლად ჰყავდა იმერეთის მეფეს, ბაგრატ IV-ს).

არჩილს გულშიც ჩაუვარდა და ჰკუაშიც დაუჯდა ქეთევანის შერთვა. მამასაც მაშინვე გაანდო თეიმურაზ მეფის შვილიშვილზე დაქორწინების „სიკეთე“, — ქეთევანი კახეთის მეფეების პირდაპირი ნაშიერია და მისი დედოფლად აყვანა ჩემს უფლებებს კახეთის ტახტზე ძალიანაც განამტკიცებსო.

ვახტანგ მეფესაც მოეწონა შვილის განაზრახი და მისცა დასტური.

ქეთევანი, მამიდამისი დარეჯანი და დარეჯანის მეუღლე, თვალებდათხრილი ვახტანგ ჭუჭუნაშვილი მაშინ სამცხეში იყვნენ, ასლან ფაშას კარზე.

ვახტანგ მეფემ ასლან ფაშას 2 000 თუმანი გაუგზავნა, ვინმე „ტფილისელი ვაჭრის“ ხელით. ამ ფულით ქეთევანი „დაუიხსნეს“ და ახალციხიდან ტფილისს ჩამოიყვანეს.

1667 წელს არჩილმა და ქეთევანმა ჯვარი დაიწერეს.

საქორწინო სუფრა თელავში ახალი გაშლილი იყო, რომ ჭურმურტელი ლეკები შემოცვივდნენ ენისელში ძარცვით და ტყვევით წამოიჭრა არჩილ მეფე, საქორწინო სამოსელზე საომარი საჭურველი აისხა, ამხედრდა, მექორწილენი მხედრობად გაიყოლია და ენისელისკენ გაფრინდა.

ლეკებმა ძარცვა-გლეჯას თავი მიანებეს და უკანვე გაქუწლეს. გამოედევნენ არჩილი და მისი გუნდი. ჭურმურტამდე სდიეს, იქაც შეუხდნენ, „შემუსრნეს სიმაგრენი, მოსწყვიტნეს, მოსტყვევნეს და მოვიდნენ გამარჯვებულნი...“.

ცოტა ხნის შემდგომ არჩილ მეფე ჰარ-ბელაქანის ლეკებს მიუხდა. ლეკებმა ხელის გამოღება ვერ გაბედეს და მაშინვე მორჩილება და ხარკის ძლევა დაიკისრეს.

• • • • •
 არჩილ-მეფეს ქეთევანისგან შეეძინა: დ ა რ ე ჯ ა ნ ი, ა ლ ე ქ-
 ს ა ნ დ რ ე, მ ა მ უ ჯ ა და დ ა ვ ი თ ი.

• • • • •
 არჩილი კახეთს „მეფური მეფობით“ განაგებდა, მაგრამ იგი
 მაინცდამაინც მამის, ვახტანგ ქართლის მეფის, ქვეშევრდომად
 უფრო ჩაითვლებოდა. ევროპელებსაც (ჟან შარდენი) არჩილი
 მამამისის „მოადგილედ“ მიაჩნდათ. არჩილი ასეთ „ქვეშევრ-
 დომობას“ არც უჩიოდა და არც უწუხდებოდა. საბედნიეროდ,
 შვილიც და მამაც „მთავარ საქმედ“ მაინც ქართლისა და კა-
 ხეთის ერთიანობას მიიჩნევდნენ. ასეთადაც იყო, მამა-შვილის
 „პოლიტიკური სიმფონია“ აღმოსავლეთ საქართველოს ერთი-
 ანობას და ერთიან აღორძინება-გამძლავრებას ემსახურებოდა.

ერანის სახელმწიფო კარსაც ქართლ-კახეთის საქმეთა მთა-
 ვარ გამგებლად ვახტანგ შაჰ-ნავაზი მიაჩნდა.

ვახტანგ მეფის „სპარსული პოლიტიკა“ როსტომ მეფის
 პოლიტიკის გაგრძელება იყო, მაგრამ ვახტანგს მაინც უფრო
 დამოუკიდებლად ეჭირა თავი. ამას ევროპელი ჟან შარ-
 დენიც ამჩნევდა და კიდევაც წერდა: „საქართველოს მეფე
 ვახტანგი მაინცდამაინც არც ისე ძლიერ ემორჩილება სპარ-
 სეთის შაჰის ბრძანებასო“.

ქართველი მეფის ეს „დამოკიდებულება“ გამორჩევით მი-
 სი სამეფოს შინაურ საქმეებში იგრძნობოდა. ვახტანგი და არ-
 ჩილი სპარსეთის შაჰის დაუკითხავად იღვწოდნენ თავგამო-
 დებით ქართული მიწა-წყლის აყვავებისათვის კულტურული
 აღმშენებლობისათვის, ხალხის სულიერი ამაღლებისა და ნივ-
 თიერი გამდიდრებისათვის.

ვახტანგი ევროპელ ვაჭრებს იწვევდა საქართველოში, ტფი-
 ლისში ბინებისა და ქარვასლების აშენებას ჰპირდებოდა, ბა-
 ქისაგან გათავისუფლებას აღუთქვამდა და დაბეჭითებით არ-
 წმუნებდა: ევროპელები რომ ინდოეთში მიმავალ გზებს ეძი-
 ებენ, „ქართულ გზაზე“ უკეთეს გზას ვერსადაც ვერ იპოვ-
 ნიან, — ოღონდ ერთხელ გაიარონ საქართველოზე და მერე
 სწვა გზას არასოდეს აღარ დაადგებიანო...

შენდებოდა ქართლ-კახეთი. ისევ ყვავილობდა სამამულე
 რქა ახლად მომძლავრებულ ზვრებში. ჰყვოდა ბალი. შენდე-

ბოდა სარწყავი არხები, მარნები, წისქვილები, ზეთსახდევები, ქარვასლები, დუქნები, გზები, ხიდები, ბოსლები, საჯინბოე-ბი, სრა-სასახლენი, ციხესიმაგრენი.

ვახტანგ მეფე მის „მეგობარ“ კათოლიკე მისიონერებს ევ-როპიდან ინჟინრებსა და მექანიკოსებს „აწერინებდა“.

ისევ მოეშენენ ამოგდებული სოფლები, დაქცეული ქალა-ქები და დაბებები; აღმოცენდნენ „ახალ-სოფლენი“, „ახალ-და-ბანი“, „ახალ-ქალაქნი“. მაშინ დაიბადნენ: ახალქალაქი, ატენი, ბოლნისი და წინწყარო; აღორძინდნენ და ამალდნენ ახალ-დაბანი: ნაბახტევი, ალი, სურამი და ახალდაბა.

ერთხელ კიდევ აშენდა და აღორძინდა მრავალგზის ნაო-ხარი, ნაჭირგალი და ნაწამები დიდი ქართული ქალაქი — გორი.

ხოლო საქართველოს სატახტო ასე აღუწერია ჟან შარ-ლენს:

„ტფილისი ერთი უკეთესი და უმშვენიერესი ქალაქია... სახლების უმეტესი ნაწილი ციცაბო კლდეზე დგას. ქალაქი შემოზღუდულია მშვენიერი და მაგარი კედლით. მდინარისკენ კი კედელი არა აქვს...“

ტფილისში რამდენიმე ეკლესიაა, ექვსი მათგანი ქართვე-ლებისაა... დედა ეკლესია, რომელსაც სიონს უწოდებენ, დგას მდინარის პირზე და მშვენიერი თლილი ქვებით არის ნაშენი...

ტფილისში რამდენიმე კარგი საჯარო შენობაა. აქ არის ქვით ნაშენი და კარგად შენახული დიდი საბაზრო ნაგებობა-ნი. ასეთივეა ქარვასლებიც, რომელშიც უცხოეთიდან მოსულ-ნი ბინადრებიან დროებით. თვითონ ქალაქში აბანოები ცოტაა და ხალხი ბანაობს იმ თბილ წყლებში, რომელიც ციხის გა-ლავეანს შიგნითაა. ამ აბანოების წყალი არის გოგირდიანი და ძალიან ცხელი. ჯანმრთელთა გარდა, აქ სნეულებიც ბანაობენ სამკურნალოდ... დუქნებიც კარგად არის მოწყობილი, სუფ-თად მოვლილი, მაღლობზე წამოჭიმული და დიდი მოედნის პირას ჩარიგებული.

მეფის სასახლე ერთი უმშვენიერესი შენობაა ტფილისში. სასახლეში არის დიდი დარბაზები, რომლებიც მდინარესა და ბაღებს გადასცქერიან. ბაღები ძალიან ფართოა... სასახლის წინ არის ოთხკუთხი მოედანი, რომელზეც ათას ცხენამდე და-

ეტევა, მოედანი ღუქნებით არის შემოზღუდული და ბოლოს გრძელი ბაზარი გახლავთ სასახლის პირდაპირ. მშვენიერი სანახავია მოედანი და სასახლის ფსადი ამ ბაზრის თავიდან...

ტფილისის მიდამო შეკრულია რამდენიმე სალხინო სახლით და მშვენიერი ბაღებით. ყველაზე დიდი მეფის ბაღია. ხეხილი ცოტაა, მაგრამ იმისთანა ხეებით არის სავსე, რომლებიც ამშვენიებენ ბაღს და ჩრდილსა და სიგრილეს ავრცობენ ირგვლივ...

თვითონ მეფის სასახლის დარბაზი სიგრძით ას ათი ფუტი იყო, სიგანით — ორმოცი; სასახლე მტკვრის პირას იდგა და მტკვრის დარბაზი ახდილი იყო. საროთი ნაკეთებს დარბაზის ქერს რამდენიმე დახატული და ოქროთი მოვარაყებული სვეტი ედგა; სვეტებს სიმაღლე 35 ფუტიდან 40 ფუტამდე ჰქონდა. მთელი დარბაზი მშვენიერი ორბოებით იყო მორთული...“.

ზინააზლილოგათა გუდე

1666 წელს მოკვდა შაჰ აბას II და ერანის მბრძანებელი შეიქნა მისი ძე სულეიმანი (1666 — 1694 წწ.).

სულეიმან შაჰმა ქართველთა „დამოუკიდებელი პოლიტიკა“ თავიდანვე ავად დასუნთქა, იგი ვახტანგ მეფის „ფრთხილ ნაბიჯებში“ ერანისათვის დიდ სამომავლო საფრთხეს ხედავდა, ხოლო არჩილი მას სპარსეთის ნამდვილ მტრად მიაჩნდა.

კიდევაც იძლეოდა კახეთის გამგებელი სპარსელთაგან ამნაირი შეფასების საფუძველს, — რამეთუ „არჩილ იყო მოძულე მაჰმადიანთა და მაჰმადიანობისა“.

შაჰ სულეიმანმა გადაწყვიტა დაერღვია მამა-შვილის „პოლიტიკური სიმფონია“ და უფრო მძიმე კირთებით დაეთრგუნა „კადნიერ გურჯთა დამოუკიდებლობა“. საამისოდ ხელსაყრელ ჟამს ეძებდა შაჰი. და დადგა კიდევ „უამი იგი“.

მკითხველმა უკვე იცის, როგორ მოაკვლევინა ვახტანგ მეფემ თავის დისწულებს — ოთარს, ედიშერს, იასონს, პაპუას და დათუნას—ზაალ არაგვის ერისთავი. მას შემდგომ, მკვლელ-

თავან უფროსი — ოთარი ვახტანგმა არაგვის ერისთავად დას-
ვა, ედიშერი — ქართლის მსაჯულთუხუცესად, იასონი — დე-
ლოფლის მსახურთუხუცესად.

სხვათა შორის, — როცა ოთარმა მისგანვე მოკლული ბი-
ძის მემკვიდრეობა ჩაიბარა, საარაგვოში მაშინ კახური მიწა-
წყლიდან ერწო-თიანეთიც შედიოდა. როცა ვახტანგი და არ-
ჩილი რუსეთიდან ჩამოსულ ერეკლე ბატონიშვილს ებრძოდ-
ნენ, მაშინ მათ შეატყობინეს: ოთარ ერისთავი და მისი ძმები
ერეკლეს მხარს იჭერენ და კახეთში მის გამეფებას აპირებე-
ნო. ვახტანგმა ოთარს ერწო-თიანეთი წაართვა. მაგრამ ერის-
თავეებმა „სამსჭვალსა ზედა დაიფიცეს“: ერეკლე ბატონიშვილ-
თან ჩვენ არაფერი გვესაქმებაო.

(სამსჭვალნი, სუღარა და საბელი — მცხეთის სვეტიცხოველ-
ში ინახებოდა, ვითარცა იესო ქრისტეს „პირადი ნივთები“).

დაფიცება „სამსჭვალსა ზედა“ ძლიერი, შეუვალი ფიცო
იყო. ვახტანგ მეფემაც დისწულების ესოდენ „მაღალ დონეზე“
დაფიცება დაიჯერა და ერწო-თიანეთი ისევ ოთარს დაუბრუნა.

ახლა არჩილ მეფეს შეუჩნდნენ მისი „ერთგული“ კახელი
კარისკაცები: კახეთის ბატონი ბრძანდები და ეგ როგორი მო-
სათმენია, შენი საბატონოს დიდი წილი რომ არაგვის ერისთავს
უჭირავსო.

არჩილი წაქეზებას წაექეზა და მამას ტფილისში შეუთვა-
ლა: ოთარ ერისთავს უბრძანე, ერწო-თიანეთი დამიბრუნოსო,
ვახტანგმა უპასუხა: ეგ ჩვენი საქმე არ არის, რადგან რაც ოთ-
არს უჭირავს, არც მე მიმიცია და არც შენ, — ყველაფერი
მამა-პაპათაგან დარჩენია მემკვიდრეობადო.

არჩილი გაფიცხდა და მამას ფრიად მკვახელ შეუტრია-
ლა: „რაც საკახეთო არისო, ბედნიერმან ყაენმან მე მიბოძაო
და მეც არავის არ დავანებებო; ერისთავი თქვენი ყმა არისო
და თუ მისთვის მისაცემი გინდაო, ქართლიდამენ უბოძეთო“.

ვახტანგმა ძალიან იწყინა საყვარელი შვილის ეგზომ კად-
ნიერი სიტყვა. მცირე ხანს კიდევაც შემდურდნენ. მაგრამ მა-
მამ „შვილი ვერ დათმო“ და ოთარ ერისთავს ბრძანება გა-
უგზავნა: რაც კახური მამულები გიჭირავს, ხელი აიღე და
ისევ კახეთს დაუბრუნეო.

ოთარ ერისთავმაც სასტიკად იტკიცა და ვახტანგ მეფეს შე-

მოუთვალა: ჩემზე წინ ბედნიერმა ყაენმა ნახევარი კახეთი ბიძაჩემს ზაალს მისცაო; მერე მე და ჩემმა ძმებმა თქვენი გულსათვის ამნაირი — „შვიდსა სამეფოში ქებული და სწორუპოვარი ბიძა მოვჰკალით“ და მთელი კახეთი თქვენ მოგართეთ; ამას გარდა, „საცა თქვენი მტერი გაჩნდა, ყველა ჩვენ წაგისდინეთ“, და ახლა იმის ნაცვლად, რომ ამდენი ნამსახურის სამაგიეროდ თქვენგან მრავალ წყალობას მოველოდეთ, რაც გვაქვს, თურმე იმის წართმევასაც გვიპირებთ; მაგრამ უნდა შეგახსენოთ, რომ, რაც რაიმე გვაქვს, ყველაფერი „თავად ყაენისგან გვაქვს მოცემული და ვერც ვინ უყაენოდ წაგვართმევსო“.

მაშ, ოთარ არაგვის ერისთავი „ყაენის სახელით“ იმუქრებოდა. შაჰ სულეიმანმაც მაშინვე იცოდა „ქართლ-კახური დიპლომატიის“ ამბები და თავის მხრივაც უმატებდა ამინდის მღვრევას ქართული ცის ქვეშ.

ვახტანგმა და არჩილმა ითათბირეს და ბოლოს ასე გადაწყვიტეს: ერისთავების ამოუწყვეტლად მამულების დაბრუნება კი არა, საერთოდ ვერ მოისვენებს ვერც ქართლი და ვერც კახეთიო.

მაგრამ ოთარ ერისთავი უფრო სწრაფად ამოქმედდა. ერთნაშვილი ფაიქი აფრინა და შაჰს შეუთვალა: თქვენი ერთგული სამსახური მწადია და ნება მომეცით პირადად გინახულოთო.

ცას შესწვდა სიხარულით შაჰ სულეიმანი. ვგონებ, ახლა დამიდგა დრო, „ფრიად განდიდებული“ ვახტანგ მეფე „დავაკნინოო“ და მაშინვე „მიუწოდა ოთარს თვის წინაშე“.

სპარსეთს მიმავალმა ოთარ ერისთავმა მცხეთა და ტფილისი ისე ჩაიარა, ვახტანგ მეფემ უბატონოდ ხმის გაცემაც ვერ გაუბედა.

ჯავრით გულგასივებულ მეფეს იმ დღეს ვილაცამ აცნობა: ოთარ ერისთავი შაჰთან წასვლას თვითონ არ აპირებდა, მაგრამ იორამ გოჩაშვილმა წააქეზაო, — ერანს წადი, და შაჰი ერისთავობას დაგინარჩუნებს კი არა, უეჭველად მეფობასაც მოგცემსო.

(იორამი იყო შვილი როსტომ მეფისგან დასჯილი გიორგი გოჩაშვილისა და შვილიშვილი დიდი სვიმონ მეფის თანამებრძოლის — გოჩა ბატონიშვილისა).

ვახტანგ მეფემ იმ ცხელ გულზე იორამ გოჩაშვილი შეიპყრო, თვალები დათხარა, ადვილ-მამული ჩამოართვა და ხმელა პურზე დააგდო ცოლშვილიანად.

მერე დუშეთისკენ გაქუსლა ჯარით. არჩილიც თიანეთის გზით შემოიჭრა საარაგვოში, კახელთა ლაშქრით.

დაუხვდნენ მამა-შვილ ხელმწიფეებს ოთარ ერისთავის ძმები — ედიშერ, იასონ, პაპუა, დათუნა. პირველი მძიმედ დაშავდა პაპუა — ვახტანგ მეფის მეომრებმა ბარძაყი დაულეწეს, შეიპყრეს და მეფეს მოჰგვარეს. დანარჩენმა ძმებმაც იკადრეს იარაღის დაყრა, კისერზე შიშველი ხმლები აპეურებით შეიბეს და ისე დაიმუხლისთავეს ვახტანგის წინაშე.

ვახტანგმა შეუნდო, „ვინადგან იყვნენ ისინი დის-წულნი“, მეფემ ტფილისს დაბრუნება ძლივს მოასწრო, რომ დუშეთში დატრიალებული ამბები ისფაჰანის კარზე უკვე მარცვალ-მარცვალ ჩაეკაკლათ სულეიმან შაჰისთვის.

ბრაზიანად იყვირა სულეიმანმა: ისე გამოდის, ვახტანგ შაჰნავაზს საარაგვოში სისხლი იმიტომ დაუღვრია, საარაგვოს ბატონი ჩემს კარზე სტუმრად რომ მოსულაო.

ძალიან დამძიმდა სუნთქვა ისფაჰანის სასახლეში. სადაც არის, რაღაც ავი საბრძანისი უნდა ებრძანებია შაჰს „შაჰნავაზისა“ (ვახტანგი) და „შაჰ ნაზარ-ხანის“ (არჩილი) „კაღნიერებათა“ საპასუხოდ.

მაგრამ კვანძი ერთბაშად ჩასჭრა ისევე გაათათრებულმა ქართველმა, სპარსეთის მაშინდელმა ყულარალასმა მ ა ნ ს უ რ - ხ ა ნ ბ ა რ ა თ ა შ ე ი ლ მ ა . მან დინჯად, წყნარად და დაბეჯითებით მოახსენა შაჰს: საქართველო ყოველთვის არაგვის ერისთავებისაგან არის აშლილი და აოხრებული; და ახლაც, თუ ოთარ ერისთავსა და მის ძმებს ლაგამს აპყრით და „სადავეს დაანებებთ“, მაშინ იცოდეთ, ქართლსა და კახეთს ყოველ დღე თითო ბატონი მაინც უნდა გამოუტყველოთ.

ძლიერად იყო ნათქვამი, სპარსეთის კარზე ეგზომ „ძლიერი ხელისუფლებისგან“. ბარათაშვილი ყულარალასი იყო — სამეფო გვარდიის უფროსი! (ზოსრო-მირზას დროიდან აკი სპარსეთის ყულარალასობა და ისფაჰანის ტარულობა, „როგორც წესი“, მხოლოდ ქართულ ხელსა და გონებას მიენდობოდა!)

რისხვა ჩაითრგუნა სულეიმან შაჰმა. ოთარ ერისთავი ცივ

თვალთ აზომ-ჩაზომა და უთხრა: დაბრუნდი საქართველოში, ვახტანგ მეფე ინახულე და ჩემის სახელით სთხოვე, ისევ დაგაბრუნოს ერისთავად საარაგვოშიო.

წამოვიდა უცხოთა კარის სამართლის მაძიებელი. მეფობას ელოდა და, რაც ჰქონდა, ისიც მტრად გადაკიდებული მეუფის სამათხოვროდ გაუხდა.

მაინც დიდსულოვნად მოექცა ვახტანგ მეფე „გზააბნეულ დისწულს“. არაგვის ერისთაობა ისევ დაუმტკიცა და დუშეთს გამოუშვა.

მაგრამ ნახევარმა წელმა ძლივს გაიარა და უეცრად გარდაიცვალნენ ოთარიც და ედიშერიც.

ძმათა ერისთავთა ანაზღაიბთა სიკვდილმა ორნაირ ხმას აუღდა ფეხი საქორაოზე: ერთი — „სამსჭვალზედ“ რომ ტყუილად დაიფიცესო, ღმერთმა ამისთვის დასაჯათო; მეორე — „ვილაცამ“ საწამლავი შეაყოლათო საქმელში, თუ სასმელშიო...

ვახტანგმა საარაგვის ბატონად რე ვ ა ზ ე რ ი ს თ ა ვ ი და-ნიშნა.

იბერეთის „საზოგველად“ ახალციხეში მიღიან

როგორც გვახსოვს, ვახტანგ მეფის ასული — ანუკა შაპაბას II-ს ჰყავდა ცოლად. როცა შაპაბასი მოკვდა, ანუკას, ძალიან ლამაზსა და სათნო „გურჯი-ხათუნს“ ბევრი წარჩინებული სპარსელი აედევნა ხელის სათხოვრად. „ანუკას სასიძოთაგან“ მაინც ორი პირველობდა — ეთიმაღოვლე (დიდგეზირი) შ ი ხ ა ლ ი - ხ ა ნ ი და ლორეს გამგებელი შ ა ვ ე რ დ - ხ ა ნ ი.

სულემიან შაჰმა შემოუთვალა ვახტანგ მეფეს: რომელს აირჩევ სიძედო, შიხალი-ხანს თუ შავერდ-ხანსო. ვახტანგმა ლორეს მმართველი ამჯობინა და ანუკა მას გაატანეს ცოლად.

იუკადრისა ეს შიხალი-ხანმა და დაუძინებელ მტრად აუჩინდა ქართველ ხელმწიფეს.

ვახტანგი მტერთან დახვედრის თადარიგს იჭერდა, ტფილისის ციხეებსა და კედელ-გალავნებს ამაგრებდა და განამტკიცებდა. სულეიმან შაჰმაც კი გამოუგზავნა ვახტანგს „ვერცხლი დიდი, რათა მოავლოს ზღუდე ტფილისს“. ვახტანგი ყიზილბაშებს მაინც არ ენდობოდა და ერთი „საგანგებო“ ციხესიმაგრე ტფილისს გარეთაც ალაშენა — „ქალაქის სამხრით ასპარეზის თავსა ზედა მტკვრის კიდისა სასახლედ თვისად“.

ა რ ჩ ი ლ ის ა და ქ ე თ ე ვ ა ნ ის დაქორწინების შემდგომ, ვახტანგ მეფემ კიდევ სამი ბატონიშვილი მოჰკიდა ოჯახს: გიორგის ცოლად შერთო თ ა მ ა რ ი „ელიზბარის შვილის ასული“; ლუარსაბს — მ ა რ ი ა მ ი, რევაზ არაგვის ერისთავის ასული; და ლევანს — თ უ თ ა, ქაიხოსრო გურიელის ასული (ვახტანგ მეფის კიდევ ერთი ძე — ალექსანდრე იმეამად სპარსეთს იყო, ისფაჰანის ტარულად. ჭერჭერობით უცოლოდ იყო ძმათაგან ყველაზე უმცროსი — სოლეიმანი).

საქორწინო ღრეობანი ახალი ჩამთავრებული იქნებოდა, როცა მეფეს მოახსენეს, დვალეთი აჯანყებულა და ბეგარის გადახდაზე უარი უთქვიათო. ვახტანგი გაეშურა ლაშქრით და, ცხინვალს რომ მიატანა, შემოეგებნენ დვალეები, მუხლებში ჩაუცვივდნენ, პატიება შეჰლადადეს და სრული მორჩილებისა და ერთგულების პირობაც დასდეს. ვახტანგმა დვალეთი უსისხლოდ შეიწყალა და ტფილისს მობრუნდა.

აქ კიდევ ახალი უამური ამბავი დაახვედრეს მეფეს ქართლის სპასპეტი ზ ა ზ ა ც ი ც ი შ ვ ი ლ ი იქცევით „ამაყად“ და „უგვანად“. მოაყვანინა ვახტანგმა ციციშვილი „საწურთნელად“.

როგორც კი ზაზა ციციშვილი სასახლის ეზოში შემოვიდა, ფიცხელმა გიორგი უფლისწულმა მაშინვე ბრძანა მისი შეპყრობა. ფავლენიშვილი დაწინაურდა ბრძანების აღსასრულებლად. ციციშვილმა სატევარი გაიძრო, ფავლენიშვილს შიგ გულში შესთხარა და იქვე გაათავა. კიდევ რამდენიმე მსახურეულის დახანჯვლა მოასწრო გამხეცებულმა ციციშვილმა და ბოლოს ისიც აკუთწეს გიორგის „მონებმა“.

სასახლეში ასეთი მოულოდნელი სისხლის დაქცევით „დამძიმდა მეფე ფრიად“.

მოკლული ციციშვილის ნაცვლად ქართლის სპასხეტობა მიიღო თ ა მ ა ზ ყ ა ფ ლ ა ნ ი შ ვ ი ლ მ ა .

არ სცხრებოდა შიხალი-ხანი, ანუკა ბატონიშვილის საქმროდ დაწუნებული სასიძო. იარალით რომ ვერაფერი გაუბედა, მალული ხვანჭებით სცადა ვახტანგ მეფის „ბედნიერი ცხოვრების“ დაშლა და დაბალთვა.

თუმცა გადამთიელი შიხალი-ხანი რას გააწყობდა, თუ საქართველოს სამეფო ტახტზე აღზევებული „მუხრანული დიდი ბუდე“ თვითონ, „თავისით“, შინაგანად არ ყოფილიყო დასანგრევად სენმორეული. მართლაც, ყველა ბატონიშვილს თურმე თავისი საკუთარი საფიქრალი და საკუთარი უემური ჰქონია გულში ჩაბუდებული და ჩალექილი.

დაიწყო ლუარსაბ ბატონიშვილით. ლუარსაბს ხომ რევან არაგვის ერისთავის ასული — მარიამი ჰყავდა ცოლად. რევანს ერისთავი კი რაჭის ერისთავის შო შ ი ტ ა ს სიძე იყო — დის ქმარი. ესე იგი, მარიამი რაჭის ერისთავის დისწული იყო და ამდენად ლუარსაბიც სიძედ ეკუთვნოდა შო შ ი ტ ა ს. ეს მოყვრულნადესაური რკალი იმიტომ ავიჩემეთ, რომ იგი ლუარსაბ ბატონიშვილს „აუჩემებია“ თავისი „პოლიტიკური ზრახვების“ აღსასრულელებად. საქმე იმაში ყოფილა, რომ ლუარსაბ ბატონიშვილს იმერეთის მეფობა სდომებია, ხოლო ქუთათისის ტახტის დაპყრობა ორი ძლიერი ერისთავის — არაგვისა და რაჭის ბატონების დახმარებით დიახაც საიმედო გაანგარიშებად გამოსჩანდა.

ლუარსაბ ბატონიშვილის „იმერული სურვილები“ სადღაცოდან შიხალი-ხანის ყურსაც მისწვდომია. შიხალი-ხანი ახალციხის გამგებელს, ქრთამის მოყვარე ასლან ფაშას შეუჩნდა, ქრთამიც უხვად მიართვა და სამაგეეოდ ლუარსაბ ბატონიშვილის „გადმობირებაზე“ შეიპირა. ასლან ფაშამ ლუარსაბს აგრძნობინა — იმერეთის ტახტს მე გაშოვნინებო, რამეთუ იმერეთი ოსმალეთის ხონთქარს ეკუთვნის, ხოლო ხონთქარი იმერეთის ყოველ საქმეს მე მეკითხება და მე შავალებსო.

ვახტანგ მეფე ვერც მუდართ და ვერც მუქართ ვერაფერს გახდა, — ლუარსაბ ბატონიშვილი ქართლიდან ცოლშვილიანად აიყარა და ახალციხეს გადაიხვეწა.

ამ დროს არჩილი სხვა საქმით იყო დაკავებული კახეთში.

სულეიმან შაჰს ზომ ვახტანგისა და არჩილის შეთანხმებულ-
ლი „ერთხელმწიფობა“ და სპარსეთისგან „დამოუკიდებელი
არსებობა“ ჰვერემდა გულგვამს. ის კი არა და, საკუთარი ფუ-
ლიც კი მოუჭრია ვახტანგ V- ტფილისში!

ისევე შიხალი-ხანმა შეაგონა შაჰს: რუსეთიდან ერეკლე ბა-
ტონიშვილი გამოიძახე და ის დანიშნე კახეთის გამგებლად...
ეს აზრი სწორედ ზედ მისწრება იყო შაჰ სულეიმანისთვის;
ქართლისა და კახეთის ერთიანობაც დაინგროდა, ვახტანგისა
და არჩილის „სიმფონიური მმართველობაც“ გაქრებოდა, მათი
მეტოქე ერეკლე ბატონიშვილი სპარსეთის ყმა იქნებოდა და
გაზვიადებული ქართლის მეფეც უადრესად დაკნინდებოდა.

ერთი სიტყვით, სპარსეთის მბრძანებელმა განიზრახა, „მტე-
რობითა ვახტანგ და არჩილ მეფისათა მეტოქედ მოყვანა ერეკ-
ლესი“.

ისევ „მოსკოველი ქართველი უფლისწული“ A

1. ერეკლე ბატონიშვილი მოსკოვის ქართველ „კოლონისტთა“
იმედი და სასოება იყო. ერეკლეს უნდა აღესრულებინა მისი
დიდი პაპის თეიმურაზის მარად აუსრულებელი ოცნებანი —
ჯერ კახეთისა და ქართლის დაუფლება, ყიზილბაშთაგან გა-
თავისუფლება და ბოლოს „ყოველი საქართველოს“ გაერთიან-
ება და გამძლავრება. დროც ხელსაყრელად მიაჩნდათ „მოს-
კოველ ქართველებს“. დიდი შაჰ აბას I-ის შემდგომ საქართვე-
ლოს მოსისხლე სპარსეთი სწრაფად ეცემოდა და კნინდებოდა.
რამდენიმე ათასეული რუსი ჯარისკაცი, თანამოძმე ქართულ
ლაშქართან ერთად, ადვილად გაანადგურებდა სპარსეთს —
ქრისტიანთა ამ მარადიულ სამტრო-საბუღარს.

დრო „ხელსაყრელი“ იყო იმ მზრვივაც, რომ „ცარევიჩ ნი-
კოლაი“ რუსთა ხელმწიფის დიდი პატივისცემით სარგებლობ-
და.

მოსკოვის კარზე ძალიან სჩანდა ეს მომზიბლავი ქართველი
ჭაბუკი — ახოვანი წელწვრილი და მხარბეჭიანი, ნებიანი სა-

ხის ნაკვთებით და ძლიერი შუქმოსიერი თვალებით, ერთდროულად ფიცხელი და დარბაისელი, მამაცი მახვილოსანი და სწორუბოვარი ცხენოსანი.

რუსულ „წრეებში“ ყველამ იცოდა, რომ საქართველო ამ ახალგაზრდა ქართველ რაინდს „ეკუთვნოდა“.

რაც მთავარია — ეს იცოდა თვითონ ხელმწიფემ.

ალექსი რომანოვს დიახაც „ესურვილებოდა“, რომ კავკასიის საქრისტიანო, ქრისტიანი შვილობილის საშუალებით, თავისი დიდი სახელმწიფოს საზღვრებში მოექცია...

მაგრამ რუსეთის სახელმწიფოს საშინაო და საგარეო მდგომარეობანი ერთბაშად ისე აიწეწა, რომ „საქართველოს საქმეებისთვის“ ისევ ვეღარ მოიცალა მოსკოვის უმაღლესმა კარმა. ყველაფერი ერთმანეთს მიჰყვა: ნიკონის რეფორმა და სასულიერო „ბუნტები“, ომები პოლონეთთან და შვეციასთან, „სპილენძის აჯანყება“ მოსკოვში, დონელი კაზაკების გამოსვლა ვასილი უსის მეთაურობით, გლეხთა ომი სტენკა რაზინის წინამძღოლობით და ბოლოს — მეფე ალექსი რომანოვის მეუღლისა და დედოფლის, მარია ილინიჩნა მილოსლავსკაიას გარდაცვალება.

ძალიან სჩანდა მოსკოვის კარზე ქართველი უფლისწული, მაგრამ საქართველოსთვის ისევ არავის ეცალა.

თვითონ მეფე ალექსი რომანოვი, მამამისის მიხედვით მსგავსად, ცინგიტა და წყალმანკით იყო სნეული. ალექსის მილოსლავსკაიას ქალისაგანაც ცამეტი ავადმყოფი შვილი შეეძინა და ცამეტიდან სამი ძლივს შემორჩა — ცინგიან-წყალმანკიანი თევდორე, ნევრასთენული სოფიო და ენაბლუ, ბეცი და გონებაჩლუნგი ივანე.

1671 წლის იანვარში ალექსი რომანოვმა ცოლად შეირთო ოცი წლის ნატალია კირილეს ასული ნარიშკინა — ქალი დიდად ლამაზი, ჰკვიანი, ნებიანი, ვნებიანი და თამამი. იგი ახლადშერთულ ხელმწიფეზე ოცდაორი წლით უმცროსი იყო.

მეფე-დედოფლის ქორწინების დღეებში განსაკუთრებულად გამოჩნდა უფლისწული ნიკოლოზი. იგი ქორწილის „ტისიაცკად“ ყოფილა დანიშნული. „ტისიაცკი“ მთელი საქორწინო განწესების, ხარჯების, მსვლელობისა და დაგვირგვინების მე-

თაური იყო „ტისიაკი“, — ვითარცა ნეფე-დედოფლის მეგვარე, განუყრელად თან ახლდა ახლად შეუღლებულთა წყვილს, იგი იზდიდა საქორწინო ფულს, ჯვარსაწერად მიუძღოდა ნეფე-დედოფალს, საქორწინო ბეჭდებსაც თვითონ უცვლიდა შეუღლებულებს, სანადიმო სუფრის გაწყობასაც იგი მეთვალყურეობდა და მეურვეობდა...

ქორწინებიდან წლინახევრის შემდგომ — 1672 წლის მაისის ბოლოს — დაიბადა უფლისწული, ცხოველმყოფელი, ძლიერი სულით და სხეულით.

ეს იყო პეტრე — მომავალში უდიდესი ხელმწიფე რუსეთისა.

30 მაისს, მიძინების ტაძარში, საგანგებო პარაკლისზე, მეფე ალექსის უფლისწულის დაბადება მიულოცეს რუსეთის სახელმწიფო კარის უახლოესმა ადამიანებმა.

პარაკლისზე დიდი სიტყვა-მილოცვა წარმოსთქვა ქართველმა უფლისწულმა.

მეფე ძალიან მოიხიბლა.

პეტრე უფლისწულის ნათლობის დღეს (1672 წლის 29 ივნისს) წახნაგოვან პალატაში გაშლილ უმდიდრეს სუფრაზე ისევ დიდი პატივის ქვეშ იმყოფებოდნენ ნიკოლოზ ბატონიშვილი და დედამისი ელენე.

მოსკოვის სასახლის კარზე რუსთა და ქართველთა სიყვარულსა და სიახლოვეს დიდი სამომავლო პირი უჩანდა.

მოსვენება დაჰკარგვოდათ ერანისა და ოსმალეთის სატანტოებს.

გამორჩევით ერანის შაჰი ვერ შერიგებოდა რუსეთის კარზე ქართველი უფლისწულის დაწინაურებას და აღზევებას.

ვაითუ ამიერიდან „გარუსებულმა ქართველებმა“ შესცვალონ „გათათრებული ქართველები“ საქართველოს სამეფო ტანტზე!

ნიკოლოზ-ერეკლემ ერანის შაჰის წერილი მოუვიდა: ხპარსეთს მეწვიე და კახეთს მეფობას ისე ჩავაბარებ, ქრისტიანობის გამოცვლასაც არ მოგთხოვო.

რუსეთის მეფის დახმარებით საქართველოში გამეფების იმედი, როგორც ეტყობა, საგნებით დაჰკარგვოდა ნიკოლოზს. ამიტომ, იგი დათანხმდა წასულიყო სპარსეთს.

იგი ცივად გამოისტუმრეს მოსკოვიდან.

დარიალს რომ გამოაღწია, ერანის შაჰის შათირებმა ხმალი და „საფიცარი რაყამი“ შეაგებეს.

„ამ ხმალსა და საფიცარს მოენდევ და სპარსეთს მეწვიეო“, სწერდა შაჰი რუსეთიდან წამოსულ ქართველს.

1674 წელი იდგა. ერეკლე ბატონიშვილი კახეთს მოსულიყო. თელავში არჩილს მიეღო თავისი ცოლისძმა, დიდის პატივით, სიყვარულით და სიხარულით. მოსალოდნელი კი იყო, რომ არჩილი კახეთის ტახტის მოცილეს ხმლით ხელში უნდა შეხვედროდა. მაგრამ აქაც თურმე იმერეთი იყო „შუაში“. არჩილი იმერეთის ტახტის დაბრუნებაზე ოცნებობდა და კახეთის დანარჩუნებაზე თავს აღარ იტკივებდა.

არჩილმა „ისტუმრა სიყვარულითა დიდი ერეკლე, ანადიმა, ანადირა მრავალ-დღე“, მერე კახელთა ამაღლა აახლა და სპარსეთს გაისტუმრა.

ნიკოლოზ-ერეკლე დიდის ამბით მიიღეს სპარსეთში. ყაზმის იდგა და იქ ელოდებოდა მაშინ შაჰ სულეიმანი ქართველ ბატონიშვილს. მისი ბრძანებით, წინასწარ „გზის ხარჯათ“ ათასი თუმანი შეაგებეს სტუმარს. ხუთი დღის შემდეგ კიდევ დაახვედრეს გზაზე „ათასი თუმანი ნაღდი და ათასის თუმნისა სხვა მორთულობა და იარაღი“, ბოლოს, ყაზმინს რომ მოუახლოვდა, შაჰმა ქალაქის მთელი მოსახლეობა შეაგება ბატონიშვილს. შემოვიდა ყაზმინში ერეკლე ქართველთა ამალით, „ქართულად მოკაზმულნი, ყველანი ახალგაზრდა ვაჟკაცი, ტურფანი და შვენიერნი, ნამეტნავად ბატონიშვილს ერეკლეს წვერულვაში ახლა ეხვეოდა და ტანად ყველას უმაღლე იყო და ნაქმარათ ყველას ამჯობინეს“. შაჰის მეჯლისზე რომ შევიდა, — „ბატონიშვილის სიტურფემან და შვენიერებამან და ტანადობამან ყველაკანი გააკვირვა“. შაჰ სულეიმანმა გვერდით დაისვა, „რუსეთის ხელმწიფის ანბავი ჰკითხა, მერე თავისი და რუსთ შექცევა, განწყობა და მათი კაცობა გამოჰკითხა“: შემდეგ, როგორ იგზავრეო, ეს გამოიძია დაწვრილებით. ერთი სიტყვით, შაჰ სულეიმანმა ერეკლე ბატონიშვილი თავიდანვე „ქარგის თვალთ ნახა და შეიყვარა, თავად დიდ გვარის კაცო-

ბისათვის და მერმე შევნიარობისათვის და კარგად აგებულ ბისათვის“. მაშინვე „საზრდელიც“ დაუდგინა სულეიმანმა ერეკლეს: „წელიწადში ორი ათასი თუმანი თეთრი, დღეში თორმეტი ჭიქა შირაზული ღვინო და ხუთასი თუმანიც სხვა რამეების ფასათ გაუჩინა“.

ბოლოს, ის დღეც დადგა, როცა შაჰმა ერეკლეს საქართველოს მეფობაზე ჩამოუგდო სიტყვა...

ერეკლემ სპარსეთს მისვლისთანავე ცოლის შერთვა გადაწყვიტა და საცოლის საძებრად კახეთში გამოგზავნა მაქანკალ-მოციქულები. ბევრმა კახელმა წარჩინებულმა უარი სთქვა „უცხო უფლისწულისთვის“ ქალის გამეტებაზე, ვაითუ, ცოლად კი არა, ხარჭად დაისვას ჩვენი შვილიო, სთქვეს და გაათავეს. მაგრამ ალავერდელი ეპისკოპოსის სახლეულმა, თავადმა ჩოლოყაშვილმა „გაიმეტა“ თავისი ასული კახეთის „მომავალი მეფისათვის“.

მაშ, 1675 წელს ერეკლემ ისფაჰანში ჯვარი დაიწერა ანა ჩოლოყაშვილის ქალზე (დიახ, ჯვარი დაიწერა, ვითარცა ქრისტიან-ქართველმა!). სპარსეთში ყოფნის ეამს ანანას და ერეკლეს შეეძინებათ დავითი, კონსტანტინე და ელენე, ხოლო შემდგომ, საქართველოში გაუჩნდებათ თეიმურაზი და მაკრინე.

ერთი ასულიც, სახელად ქეთევანი — ხარკისაგან გაუჩნდება „ქალთამოლაღე“ ერეკლეს.

ვახტანგ მეხუთის საწუთროს დასასრული

არჩილ მეფემ შეიტყო, რომ მისი ძმა ლუარსაბი „იმერეთის საშოვნელად“ ახალციხის ფაშასთან გაქცეულა. მან იფიქრა, ლუარსაბი ასეთ რაიმეს მამის დაუკითხავად და მისი წაქეზების, თუ თანხმობის გარეშე ვერ გაბედავდაო და მაშინვე „გაუვაგულდა“ არჩილი მამას.

არჩილი თვითონაც ოჯახით აიყარა და ახალციხისკენ ვახტანგის დაუკითხავად გაუდგა გზას.

„ფრიად წყინებულმა“ ვახტანგმა დომენტი კათალიკოსი გამოადევნა შვილს „ჭკუაზე მოსაყვანად“. ცოტა ხანს მობრუნდი, სიკვდილი მაცალე და მერე რაც გენებოს, ის ჩაიდინეო, უთვლიდა ვახტანგი არჩილს, „გარნა არჩილ არლა-რა ისმინა, არცა შეიგონა ვედრება მამისა თვისისა“. იგი ახალციხეს მივიდა.

რაც ლუარსაბმა და არჩილმა ასლან ფაშას კარზე იმერეთი „იშოვნეს“, ამას ქვემოთ, თავის ადგილზე დავინახავთ დაწვრილებით. ხოლო ვახტანგ მეფეს უკვე აშკარად დაადგა ავი თვალი ერანის ხელმწიფემ. ლუარსაბისა და არჩილის გაქცევა ოსმალეთის ფაშასთან სპარსეთის ღალატი და, როგორც ეტყობა, ეს „ღალატი“ შვილებმა მამის წაქეზებით ჩაიდინესო.

ვახტანგმა სასწრაფოდ შეატყობინა სულეიმან შაჰს: საუბედუროდ, შვილები გამიურჩინენ და ახალციხეშიც ჩემდა უნებურად გაიქცნენ; შეიძლება, ვინმე მტრებმა „ჩემი თავი ტყვილად შემოგაბეზლონ“, მაგრამ იცოდეთ, მე ამ საქმეში უბრალო და უცოდველი გახლავართ და, უკეთეს საქიროდ ჩასთვალეთ, მზად გახლავართ სპარსეთს გეწვიოთ და ყოველივე პირადად მოგახსენოთო.

სულეიმან შაჰმა საქართველოში მ უ ს ტ ა ფ ა ყ უ ლ ი ბ ე გ ყ ა ჯ ა რ ი გამოგზავნა და ვახტანგ მეფეს შემოუთვალა: რაკი შენ თვითონ სპარსეთს ჩამოსვლა ამჯობინე, უეჭველად მობრძანდი ისფაჰანს, მოუთმენლად გელოდებიო.

ენაზე იკბინა ვახტანგ მეფემ, — რა მრჯიდა, მაინცაღამაინც სპარსეთს ჩასვლა რომ მივაძალეო შაჰს. მერე იმაზე გაჯავრდა, ახლობელთაგან რატომ არავინ დამიშალა ამნაირი რამეს შეთვლაო.

სწორედ აღარ უნდოდა „სათათრეში წასვლა“ ვახტანგ მეფეს. ისედაც, ლუარსაბისა და არჩილის „გაქცევის“ შემდგომ, „აშენებულ ქვეყანას“ უკვე „დაქცეულად“ მიიჩნევდა. „კახეთი უპატრონოთ იდგა“. ქართლიც შინააშლილობით იმღვრეოდა. ქსნის ერისთავი ი ა ს ე, რომელიც ერისთავად ვახტანგის ხელდასხმული იყო, ახლა სწორედ ვახტანგს გადასდგომოდა და ისიც თურმე სპარსეთს აპირებდა გაქცევას და გათათრების გზით საქართველოში „დაწინაურებას“.

წაუსვლელობა მაინც აღარ მოხერხდებოდა და აღიკაზმა

ერანს სამგზავროდ ვახტანგ მეფე „დიდებითა დიდითა და ხელმწიფურითა, რამეთუ იყო მდიდარ ფრიად“.

ქართლის გამგებლად თავისი ძე, გიორგი დატოვა. ორივე შვილს — გიორგის და ლევანს დაუბარა: სანამ მე ერანიდან დაებრუნდებოდე, ქსანზე იასე ერისთავი აღარ დამახვედროთო.

ვახტანგ მეფე რომ ტფილისიდან გავიდა, გიორგიმ შიდა ქართლის ჯარი იხმო, სარდლად ლევანი უჩინა და ქსანზე სალაშქროდ გაგზავნა. ლევანს გიორგიმ თან გაატანა მის კარზე აღზრდილი დათუნა შალვას ძე (იგულისხმეთ ბახტრიონის აჯანყების ბელადი, სპარსეთს წამებული შალვა ქსნის ერისთავი). დათუნა იასეს ნაცვლად ურდა დაესვათ ქსნის ერისთავად.

შეუხდნენ ლევანი და დათუნა ქსნის საერისთაოს. იასე ერისთავი მისმა ყმებმაც მიატოვეს და ლევანის ლაშქართან ერთად იასეს მომხრეებს „თოფები დააყარეს“. იასემ გაასწრო, — სახლი, კარი, დედა და ცოლ-შვილი მტერს შეატოვა და თვითონ სპარსეთისკენ გაქუსლა.

ქსნის საერისთაო ჭაბუკმა დათუნა შალვას ძემ დაიჭირა...

ვახტანგ მეფე ჯერ ისევ გზაში იყო. „ყველგან მებატონენი ხანნი და სულთანნი წინ მოეგებოდნენ, დიდის პატივით მიჰყვანდათ“, მაგრამ მაინც არ უხაროდა მეფეს, — გული კარგს არას ეუბნებოდა, შვილებზე ფიქრსაც ძალზე დაეთრგუნა მისი გული და გონება. ძალიან ცუდად გრძნობდა თავს; მუცლის საღმობა აუტყდა გზაზე, საშველი არ მისცა, უფრო და უფრო უმწარდებოდა ტკივილები.

ყაზმინს რომ მიაღწია, იქ კიდევ ახალი უსიამო ამბავი შემოაგებეს: „ქსნის ერისთავს იასეს ჩაუვლია და ყაენთან წასულაო“.

ძალიან ეწყინა ავადმყოფ მეფეს, მაგრამ რას გააწყობდა.

გზა განაგრძო.

ქალაქ ხოშკარუს მიაღწია და უკვე აღარ შეეძლო წიარული, აღარც ცხენზე ჯდომა.

ერთ დიდ „ქარვან სარაში“ შეიყვანეს და დააწვინეს.

იქვე მიიცვალა.

შაჰ სულეიმანს შეატყობინეს.

შაჰმა ალექსანდრეს უხმო — გარდაცვლილი ხელმწიფობ

შვილსა და ისფაჰანის ტარულას. მამის სიკვდილი მიუსამძიმრა და ხოშკარუს გაგზავნა სამგლოვიარო ამალით. თან ესეც დააბარათ სულეიმანმა: ყოველივე საქონელი და სიმდიდრე, რაც ქართველ მეფეს სპარსეთში მოჰქონდა, გულდასმით აღწერეთო; თვითონ ვახტანგ მეფე წამოასვენეთ და ყუმში დაკრძალოთო.

ასედაც მოხდა. ყუმში, ძველ სპარსულ ქალაქში დაკრძალეს ქართველთა მეფე ვახტანგ მეხუთე, მისი მამობილის როსტომ მეფის გვერდით (იქვე, სულ ახლოს, დიდი შაჰ აბასის ძეგლები განისვენებდნენ).

1675 წელი იდგა.

დაესრულებია თავისი წილხვედრი წუთისოფელი მეფე ვახტანგ მეხუთეს, გონებავრცელ ქართველ ხელმწიფეს, ქვეყნისა და ერის ღირსეულ წინამძღოლს, ჭკვიან სჯულმდებელსა და მამაც მხედარს.

გამეფდა 40 წლისა, იმეფა 17 წელი, აღესრულა შობითგან 57 წლისა.

ახმა მცხრო

ახალი მებრძენი

მის იმეფა ახალი „მეფე“, „ვალი“ თუ „ხანი“?

ქართლისა და კახეთის ტახტები ერანის ხელმწიფეს „ვაკანტურად“ შემორჩა. ქართველთა ყველაზე საწადნიერო მმართველად სულეიმან შაჰს ისევ ერეკლე ბატონიშვილი მიაჩნდა. დაიბარა სულეიმანმა ერეკლე და ორივე სამეფო ერთად შესთავაზა — ქართლიც და კახეთიც!

ასეთი წყალობა სწორედ მოულოდნელი უნდა ყოფილიყო ერეკლესათვის.

მაგრამ მოულოდნელად აღმოჩნდა შაჰის მოთხოვნაც: ერეკლე ბატონიშვილმა სარწმუნოება უნდა გამოიცვალოსო!

აკი ქრისტიანობის დაგდებას არ მოვთხოვ, ისე გაგამეფებ საქართველოშიო, — ასე არ სწერდა ერეკლეს შაჰი რუსეთში?!

ხელად ის ბარათიც აჩვენა ერეკლემ სულეიმანს და მოაგონა მისი „საფიცარი“ — შენს სარწმუნოებას „ხელს არ ვპყობო“.

შაჰმა თვალითაც არ შეხედა თავის ნატყუარ წერილს.

ერეკლე კი განაგრძობდა:

— მეფენი მბრძანებლობენ, გარნა არ უნდა სტყუოდნენ; მე წავიკითხე შენი ბარათი, ვერწმუნე შენს ფიცს და დაუქვებლად მოვედი შენთან. შე ჩემს სარწმუნოებას ვერ გადავუდგები. ხოლო თქვენი დიდებულებისათვის ლამაზი არ იქნება ფიცის გატეხვა.

ტახტიდან წამოდგა შაჰ სულეიმანი, ერეკლეს მკლავში ჩააფრინდა და მუდარით უთხრა:

— მეტი რაღა გინდა: გაძლევ კახეთს, ტფილისს, მთელს საქართველოს და ყოველივეს თერგიდან ვიდრე არეზამდე, — ეს ერანის ერთი მეხუთედია. ამას გარდა მოგანიჭებ ისფაჰანის ტარულობას და შენც იმდენსავე ჯამაგირს მოგცემ, რამდენსაც შაჰ-ნავაზ-ხანს ვაძლევდი. მხოლოდ სითქვი: დიღია ალლაჰი და მუჰამედი მისი წინასწარმეტყველი! სთქვი, რომ ღებულობ ჩვენს სჯულს, რათა აღსრულდეს სიტყვა ჩემი, რათა არა მკიცხავდნენ გარემო სახელმწიფოთა მეფენი იმის გამო, რომ მუსლიმანთა სამფლობელო მიწა მე ქრისტიანს მივეცი. გამიგონე და დამეთანხმე, რასაც გეუბნები, ხოლო როცა საქართველოში დაბრუნდები, იქ ის სჯული იწამე, რომელიც შენ მოგესურვოს. მაშინვე შეაგება „ორი ქრისტიანი ქვეყნის შვილმა“:

— მართო საქართველო კი არა, მთელი ერანიც რომ მიბოძო, ჩემთა ბაგეთაგან არ ამოვუშვებ ქრისტიანობის მგმობელ არც ერთ სიტყვას, ჩემს სარწმუნოებას არ ვუღალატებ სიმდიდრისა და ხელმწიფობის მოპოვებისათვის. უკეთუ ღმერთსა ჩემსა მოვატყუებ და წარმავალი ხელმწიფებისათვის ხარ-

წმუნობას განვუდგები, მაშინ შენი ერთგულიც როგორღა ვიქნები?

შაჰმა მუქარა შემოურია სიტყვაში:

— მე რომ შევიწყნარო ურწმუნობაში შენი ტანჯვა, ეს დიდ ცოდვად ჩამეთვლება და ალლაჰი დამსჯის. შენი საკუთარი კეთილდღეობისათვის გატან ძალას! ხოლო, უკეთუ ჩემსას არ შეისმენ, ვუბრძანებ და ძალით გაგამაჰმადიახებენ!

— შენ ძალა გაქვს და მე შენს ხელთა ვარ, — მწარე სიცილით უთხრა ერეკლემ, — მხოლოდ ისევ მოგაგონებ შენს დანაფიცარს. მე კი, მთელი ჩემი სხეულიც რომ ნაკუწ-ნაკუწად აქციონ და თავიც გამაგდებინონ, მაინც ვერ განვუდგები ჩემს სარწმუნოებას და არც სხვის სჯულს ვირწმუნებ.

— რა გაეწყობა, — მე სამოთხეში ყოფნას გირჩევდი და რაკი არ ინებე, ჯოჯოხეთში მიბრძანდი! — შესძახა გაცოფებულმა შაჰმა და ერეკლე ბატონიშვილი ციხეში ჩააგდო.

და საქართველოდან გიორგი ვახტანგის ძე გაიძახა ერანის ხელმწიფემ.

გიორგიმ ქართლი დროებით ძმას — ლევანს დაუტოვა და თვითონ სპარსეთს გასწია.

ექვი არ იყო — ქართლის ტახტი შაჰ სულეიმანს გიორგისთვის უნდა მიეცა, მაგრამ მოულოდნელად (თუმცა ქართველთათვის არც ისე მოულოდნელად) ძმა ძმას გადაეღობა წინ.

ალექსანდრე ვახტანგის ძე ხომ თავიდანვე სპარსეთში იყო და იმჟამად დიდი „სპარსული სახელო“ — ისფაჰანის ტარულობაც მას ეჭირა. სპარსეთში დაგროვილი სიმდიდრე და მამის დიდძალი ოქრო-ვერცხლიც (რომელიც ვახტანგ მეფეს ერანს მიჰქონდა) ალექსანდრეს დაენარჩუნებია.

ჰოდა, ალექსანდრესაც — ქართლის მეფის „ნამდვილ შვილსა“ და მემკვიდრე-უფლისწულს, თანაც ამოდენა სპარსული თანამდებობის, გავლენისა და სიმდიდრის პატრონს — მოსურვებია ქართლის სამეფო ტახტი და სკიპტრა. თითქოს აქ უჩვეულოც არაფერი უნდა ყოფილიყო (თუ მხედველობაში არ მივიღებთ იმას, რომ უბრალოდ, „ქართულად“ — ძმა ძმას ხელს თუ არ შეუწყობს, ხელს მაინც არ უნდა უშლიდეს!).

ერთი სიტყვით, ძლიერად ამოძრავებულა ალექსანდრე ბატონიშვილი, — ისე სწრაფად და ძლიერად, რომ, სანამ გიორ-

გი ისტაპანს ჩააღწევდა, მანამ მის ძმას შაჰის სასახლის ყოველი „წერტილი“ ქრთამით ამოევისო და ამოეგლისა და ქართლის მეფობაც თითქმის თავისთვის „განემტკიცებინა“.

ამიტომ გიორგი რომ ისტაპანს მივიდა, მისი „მეფობა უკუვარდა“.

რუსეთის ხელმწიფესაც შუამდგომლობა გამოეგზავნა სპარსეთის შაჰისთვის: ნიკოლოზ ბატონიშვილი ქრისტიანად დატოვე და ისე მიეცი ქართული ტახტიო.

საქმე გართულდა და გამწვავდა.

შაჰი ყოყმანობდა, საგონებელში ჩავარდნილი:

ქართლის ტახტისთვის სამი ქართველი ებრძოდა ერთმანეთს — ერეკლე, გიორგი, ალექსანდრე.

უცებ მეოთხეც გამოჩნდა. არჩილი წამოვიდა ახალციხიდან ჭართით: სადგერს მოვიდა და გამოაცხადა: თუ ქართლის მეფობას გიორგის არ მისცემენ, მაშინ მე თვითონ შევალ ტფილისს და ქართლსაც დავიჭერ და კახეთსაცო.

შაჰს უნდა ეფიქრა, რომ არჩილის უკან მარტო ასლამ ფაშა კი არა, ოსმალეთის სულთანიც უნდა მდგარიყო...

ამიტომ, ბოლოს და ბოლოს, სულეიმან შაჰმა ყოყმანს თავი დაანება. გიორგი გაამაჰმადიანა, „შაჰ-ნავაზ II-ის“ სახელით ქართლის მეფედ დაამტკიცა, „სახელმწიფო თავი, ხმალი და ხალათი და სხვა მორთულობა გაურიგა და ორი ათასის თუმნის ნაღდი და ჭინსი (ქონება) მის მხლებელ ქართველთ უბოძა“.

ალექსანდრე ბატონიშვილმა ძმას არც მეფობა მიულოცა, არც მამის ქონებიდან არაფერი მისცა (მამის მემკვიდრეობა მერე მაინც ოხრად დარჩა ალექსანდრეს. მისი სიკვდილის შემდეგ ვახტანგ მეფის ქონებას ქალიშვილი და სიძე — ანუკა და ლორეს გამგებელი შავერდ-ხანი დაეპატრონენ. ლორეს სასახლეში ხანძარი გაჩნდა და ის ქონება დაიწვა. კიდევ მცირე ხნის შემდგომ სპარსეთის შაჰმა ანუკას „ქმარი მოუკლა და რაც ებადათ ქმრისაცა და ცოლსაც სულ საყაენოთ წაართვეს. ნაძალადევმან ასრე იცის და ღმერთი ჭიშმარიტ ყოვლის ძრიელის გამქარებელია“...).

1677 წელი იდგა.

საქართველოსკენ ქართლის ახალი მეფე მოჰქროდა.

ხოლო კახეთი სულეიმან შაჰს ყიზილბაში ბეჟანხანის-
თვის ებოძებინა.

ტფილისი დიდის ზეიმითა და „შადლუხის ცემით“ შეხვდა
გიორგი მეფეს. ესეც მოახსენეს: ვილაც ზალინა ჩითახაშვილი
„რალაც ხმებით“ ხალხისა და „თემის შეშინებასა“ და არევას
ცდილობდაო. ახლავე თავი გააგდებინეთ მაგ ბინძურ ვიგინ-
დარასო, ცივად ბრძანა გიორგიმ...

საქართველოს კათალიკოსმა დომენტიმ ქართულად, ქრის-
ტიანულად აკურთხა ქართლის ახალი საქეთმპყრობელი.

ტფილისში, საქართველოს „დედა-ტახტზე“, ახალი მეფე
იჯდა — გიორგი XI (1677—1688 წწ.).

ხელმოწერა გიორგი მეთერთმეტისა

„ხოლო იყო ესე გიორგი მეფე მხნე, ახოვანი, ძლიერი ძა-
ლითა და ტანითა, შვენიერ-ჰაეროანი, პირ-მხიარული, ენა-
ტკბილი, უხვი და მრისხანე, მოისარ-მოასპარეზე უებრო“.

მისი მეფედ კურთხევიდან მცირე ხნის შემდგომ გარდაიც-
ვალა გამოჩენილი საეკლესიო და სახელმწიფო მოღვაწე კა-
თალიკოსი დომენტი. მის ნაცვლად გიორგი მეფემ საქართველოს
მწყემსმთავრად დანიშნა ნიკოლოზი, გივი ამილახორის
ძმა.

გიორგის სულეიმან შაჰმა სპარსეთშივე დაავალა — შენი
ძმა არჩილი ქართლიდან გააძევეო, ხოლო გიორგის არჩილი
ძალაინ უყვარდა და მისგან დავალებულიც იყო: აკი ახალცი-
ხიდან ქართლში არჩილის შემოჭრა გიორგის გამეფების და-
საჩქარებლად იყო გამიზნული. როცა გიორგი ტფილისში მე-
ფედ დაჯდა, მისი უფროსი ძმა სადგერიდან სურამს გადმო-
ვიდა და იქ დადგა.

სულეიმან შაჰმა ახალი ბრძანება გამოადევნა საქართველო-
ში ფეხშემოდგმულ გიორგის: შენი ძმა არჩილი ან შეიპყარ და
გამომიგზავნე, ან ახლავე ქართლიდან ფეხი ამოუკვეთეო.

გიორგიმ ისევ აავლო ყური სპარსელი ხელმწიფის ბრძა-

ნებას. მაგრამ მალე თვითონ არჩილმა იხსნა ძმა უხერხულობისაგან: დაჰკრა ფეხი და იმერეთს წავიდა, სადაც მან ერაზხანზე მეფობაც „იშოვნა“.

მაინც არ დასცხრა სულეიმანი, რამეთუ დაუტყადავლად ახრჩობდა ბოლმა გიორგი მეფის ორივე ძმისა — არჩილისა და ლუარსაბისა, რომლებიც ერანის მოსისხლე თურქეთს ელაციცებოდნენ.

ახლა ასე შემოუთვალა სულეიმანმა ქართლის მეფეს: შენი ძმა ლუარსაბი გამომიგზავნე სპარსეთშიო.

— წავალ, იქნებ ოქიდან, სპარსეთიდან უფრო გამოვადგე, — თვითონ უთხრა ლუარსაბმა ძმას, და გიორგიმაც გაუშვა ლუარსაბი შაჰთან.

იმავე უამს მოკვდა ლუარსაბის სიმამრი რევაზ არაგვის ერისთავი. გიორგიმ საარაგვო ჩააბარა თავის მამიდაშვილს, იასონს, ოთარ ერისთავის ძმას (ოთარი ზომ რევაზის წინ განაგებდა არაგვის საერისთავოს).

ხოლო არჩილმა ქუთათისის ტახტზე ერთი წელიც ვერ მოათია და ისევ ქართლს გადმოვიდა. ისევ აფრინა ბრძანება შაჰმა გიორგი მეფესთან: „შეიპყარ არჩილ და წარმოავლინე წინაშე ჩემსა ანუ განაძე!“

ადგა არჩილი და ქართლიდან დვალეთს გადავიდა. გიორგიმ შაჰს აცნობა: თქვენი ბრძანება შესრულებულია, არჩილი გაძევებულიაო.

მაგრამ შაჰმა კარგად იცოდა, რომ დვალეთიც საქართველო იყო და გიორგი მეფის „ეშმაკობაც“ — აშკარად საცნაური. ამიტომ ერთხელ კიდევ მოსწერა შაჰმა მეფეს: „მოღალატე ძმას“ ქართლიდან ფეხი ამოაკვეთინეო.

გიორგი მეფე კათალიკოსისა და ეპისკოპოსების თანხლებით ძმას შეხვდა და შაჰის ახალი ბრძანება გააცნო.

არჩილმა საესებით მოულოდნელი რამ უთხრა მეფე-ძმასა და მის მხლებელ სულიერ მამებს: მე გადავწყვიტე რუსეთს წავიდე, ოღონდ ქრისტეს სამსჯვალი, სუდარი და საბელი უნდა მომცეთო!

ასეთმა მოთხოვნამ ყველა გააოცა. როგორც ითქვა, მცხეთის სვეტიცხოველში საუკუნეების მანძილზე მართლაც დიდნი მოწიწებით ინახებოდა ძველისძველი ლურსმანი, სუდარა და

თოკი, რომლებიც ვითომც უკანასკნელი მოწამენი და „მონაწილენი“ იყვნენ იესო ქრისტეს წამებისა.

გაიოცეს, უარიც უთხრეს, მაგრამ არჩილმა იმ პირობით, რომ „ქრისტეს ნიეთებს“ ისევ უკან დააბრუნებდა, თავისი გაიტანა (ალბათ, თვითონაც არ სჯეროდათ მეფეს და კათალიკოსს იმ „ქრისტესმიერი ზღაპრისა“).

არჩილმა ფიცი დასდო, „ქრისტეს ნიეთები“ მიითვალა რა რუსეთისაკენ გასწია.

არჩილი წავიდა, მაგრამ სპარსეთის შაჰი გიორგი მეფეს უკვე აღარ ენდობოდა. იგი ხედავდა, რომ ქართლის ახლანდელ მეფეს თავი გაცილებით უფრო „დამოუკიდებლად“ ექიარა, ვიდრე წინარე მეფე-ხანებს — როსტომს და ვახტანგს.

მაღე ამკარად საცნაური შეიქნა, რომ გიორგი სპარსეთის დაუკითხავად და ანგარიშგაუწევლად ამყარებდა მეგობრობას, მოყვრობას, თუ მტრობას და მესისხლეობას — ვისთანაც როგორ მოისურვებდა. უფრო მეტიც — სპარსეთის მტრებთან უფრო სიახლოვესა და „სიყვარულს“ ამქლავებდა, ვიდრე თვითონ სპარსეთის ერთგულ მეგობრებთან და ქვეშევრდომებთან.

ამიტომ „კვალად არა დასცხრა შური შაჰ-სულეიმანისა გიორგი მეფესა ზედა და მცდელობდა შემუსრვასა მისსა“.

„გურგინ-ხანი მეგონა გამაჰმადიანდა, მაგრამ ისევ ქალარი (ურჯულო, ქრისტიანი) დარჩენილათ“, იძახდა გამწარებული შაჰი.

ჯერ დიდი ხნის „ნაცადი ხერხით“ დაიწყო ერანის მბრძანებელმა, — ქართველი მეფისაგან ქართველი თავადების გადაბირებით, ლალატით, რენეგატობით. ამ საქმის მოგვარება სულეიმანმა თავრიზის ბეგლარბეგს ჰაჯი-ალი-ხანს დაავალა.

ჰაჯი-ალი-ხანმა აეშაგები დაუგზავნა ქართლის თავადებს, ბევრი მართლაც ჩაითრია და „დაითრია“, მაგრამ გიორგი მეფეც არ დარჩა ვალში: მისდგა და ყველა მოლაღატე „მოთათრე“ თავადი დაუნდობლად ამოწყვიტა დედამბუდიანად.

მერე იმერეთის საქმეებს „ჩაულრმავდა“ მეფე გიორგი მეთერთმეტე. იგი ცდილობდა, ქუთათისის ტახტზე ყოველთვის მჯდარიყო „ნებისყოფელი თვისი“. სპარსეთის მომტერე

და ოსმალეთის ქვეშევრდომ ახალციხის ფაშასთანაც გააბა ურთიერთობა გიორგიმ. იმერეთის ტახტიდან მოძალადე გიორგი გურიელი გადააგდო და ასლან ფაშას დახმარებით მის ნაცვლად გაამეფა ალექსანდრე ბაგრატიის ძე, რომელსაც მანამდე თავის კარზე „ძეებრ ზრდიდა“ გიორგი. კიდევაც დაუმოყვარდა გიორგი ალექსანდრეს — ცოლად შერთო თავისი ძმის, ლუარსაბის ასული ელენე.

თავის ერთადერთ ვაჟს — ბაგრატს — გიორგიმ ცოლად შერთო ჩერქეზთა ბატონის ასული რუსუდანი.

იმ ხანად დედინაცვალი გარდაეცვალა — სახელოვანი მარიამ დედოფალი. მალე მეუღლეს მოუჟკვდა გიორგის — თამარი.

გიორგი მეფე მეორე ქორწინებით დაუმოყვარდა რაჭის ერისთავს პაპუნას, — ცოლად შეირთო პაპუნას მამიდაშვილი ხვარაშანი, ასული გიორგი მიქელაძისა.

ყველა ეს „მოყვრობანი“ და „კავშირები“ გულზე ლახვრად ერჭობოდა ერანის შაჰს.

ისევ „დაუტრიალდა“ პაჯი-ალი-ხანი ქართველ თავადებს, „რამეთუ არღარა აქვნდათ სიმტკიცე სჯულისა და მეფეთა თვისთა ერთგულებისა, ვინადგან მცირედითა ნიჭითა გამაჰმადიანდებოდნენ“.

სპარსეთიდან ლუარსაბ ბატონიშვილი ატყობინებდა ძმან მოლაღატე თავადების სახელებს.

ამჯერად მეფეს გადასდგომოდნენ და „სათათრო გზაზე“ შემდგარიყვნენ: იასონ არაგვის ერისთავი (გიორგის მამიდაშვილი, თვითონ გიორგისაგან ერისთავად დასმული), ქვემო ქართლის მელიქი ქამარ-ბეგი, ერეკლე მუხრან-ბატონი (რომელსაც თვითონ მეფე „ზრდიდა, ვითარცა ძესა“), იესე და ელიზბარ — ძენი ზაზა მაჩაბელისა.

გიორგი მეფეს მისდგა სასტიკი დაუნდობლობით.

მელიქ ქამარ-ბეგს კოჯრის გზაზე გულში ცხელი ტყვია გაართყეს და გააგორეს.

ერეკლე მუხრან-ბატონი და ძმანი მაჩაბელნი მეფემ დააბორკილა და ციხეში ჩაჰყარა.

იასონ ერისთავი მისმა „შეჩენილმა კაცმა“ ფეხინადგილში თოკით მოგულდა.

არაგვის საერისთაო მეფემ გიორგი ოთარის ძეს მისცა.

მერე რუსეთში არჩილთან ორი ბერი გაგზავნა და შეუთვალა: ჩამოდი, ძალიან მჭირდები, კახეთიც და იმერეთიც შენს მეფობას ნატრულობენო... მაგრამ ის ბერები დაღესტანში რომ გადავიდნენ, შაჰხალის ბატონმა შეიპყრო და შაჰს შეატყობინა...

ბოლოს, ყოველ „სიკეთესთან“, გიორგი მეფეს „ძველ ქართულ ქრისტიანობასთან“ ერთად, იღუმალ კათოლიკური ქრისტიანობაც მიუღია თურმე.

გველის კაპრობამ შეიპყრო ერანის ხელმწიფე.

ერთ დღეს გიორგი მეფეს შაჰისგან ახალი ბრძანება მოუვიდა: ჩემო გურგინ-ხან, შენი ძმა ლევანი უნდა გამომიგზავნო უსათუოდ სპარსეთშიო.

ლამის გული შემოეყარა მეფეს. ლევანი მარტო ძმა კი არა, პირდაპირ მისი მარჯვენა ხელი იყო. სწორედ ეს შეეტყო შაჰ სულეიმანს: გიორგი მეფის „ყოველი საქმის წარმმართველი“ ლევანი არისო, და სწორედ ამიტომაც „სჭრიდა მარჯვენს“ ერანის შაჰი ქართლის მეფეს.

ლევანს ცოლი მოჰკვდომოდა — თუთა გურიელის ქალი. ის იყო გლოვა ჩაეთავებინა და მეორე ცოლი შეერთო — თინათინ, ასული გიორგი ავალიშვილისა. სწორედ იმ უამს მოვიდა ტფილისში შაჰის ბრძანება ლევანის გაწვევისა.

დიდხანს აწვალა ფიქრმა გიორგი მეფე. მერე დაჯდა და წერილი მისწერა შაჰ სულეიმანს: ოღონდ ლევანს ნუ წამართმევ და მძევლად ჩემს ერთადერთ შვილს — ბაგრატს გამომიგზავნო!

გაოცდა სპარსეთის მბრძანებელი. სწორედ ნამეტანი იყო! გიორგი მეფე ძმის სანაცვლოდ იამავარ (დედისერთა) ძეს იმეტებდა! ალბათ, მართლა დიდი რამ ჯადო ყოფილა გურგინ-ხანისთვის მისი ძმაო! — იფიქრა შაჰმა და უცებ ისეთი რამ მოიფიქრა, რაიც სწორედ აღმოსავლელ ურჯუკ ხელმწიფეს შეეფერებოდა. მან გიორგი მეფეს შეუთვალა: ერთადერთ შვილს რომ იმეტებ, მართლა ყოფილა დასაჯერი შენი ერთგულებათ; მაგრამ კიდევ უფრო რომ დავიჯერო, ორივე გამომიგზავნე — ძმაც და შვილიცო!

ავარდა და აზვავდა გიორგი მეფე. უსისხლოდ შეუძლებელი ყოფილა შაჰ სულეიმანთან მორიგებაო, — და სასწრაფოდ შეუდგა საომარ სამზადისს.

ეტყობა, დიდი მოცულობის აჯანყებას აპირებდა გიორგი მეფე. მარტო ქართლის ჯარი საკმარისად არ მიიჩნია და კახეთის ჩათრევაც სცადა სპარსელებთან მოსალოდნელ შეტაკებაში.

კახეთს ხომ ყიზილბაშთა ხანები განაგებდნენ, ყარაღაშში ჩამსხდარნი და კახელთა აჯანყების მუდმივი შიშით დათართულნი.

გიორგი რომ ქართლის მეფედ წამოვიდა, მაშინ შაჰმა კახეთის მმართველად, როგორც ითქვა, ბეჟან-ხანი გამოგზავნა. ბეჟან-ხანი ყარაღაჯიდან გამოსვლას ვერა ბედავდა, რადგან არც კახელი თავადი, არც გლეხი, არც ერი და არც ბერი სისხლდაუქცევლად არ აპირებდა თავისუფლების დათმობას. კახეთის ყოველ სათავადოს ისევ კახელი თავადი განაგებდა ყველასაგან (სპარსელი შაჰისა, თუ ქართველი მეფისაგან) დამოუკიდებლად. მაშინ ბეჟან-ხანმა მიპარვით, ზურგიდან ჩარტყმით, მოწამვლით, ცილისწამებითა და ურთიერთწაქეზება-წაკიდებით სცადა კახელთა დასუსტება. კახელებიც ასე იოლად არ ტყუვდებოდნენ და იმათაც „იწყეს კრძალვა და ფრთხილობა“.

გიორგიც იღუმალ შეეცადა ბეჟან-ხანის მოსპობას. მისმა გაზრახებულმა კაცმა თოფი ესროლა ბეჟან-ხანს, მაგრამ ტყვიამ განაწირს მხოლოდ მხარი მოსტება და სიკვდილს ვერ მისწია. გიორგიმ, კვალი რომ წაეშალა, დოსტაქარი გაუგზავნა დაჭრილს. ბეჟანი მაინც არ მოტყუებულა და უთქვამს კიდევ: „უმჯობესი იყო, გურგინ-ხანს არც თოფი ესროლა და არც დოსტაქარის გამოგზავნა დასჭირვებოდაო“.

ჭარელი ლეკები წააქეზა და გამოუშვა ბეჟან-ხანმა კახეთის სოფლების საძარცვავად და საოხრებლად. თვითონ, როგორც კახეთის „პატრონი“ და „მფარველი“, ვითომ ხელს იბანდა და ორჭოფობდა. თუ კახელები ამოქლევდნენ ლეკებს, მაშინვე ხმას აიმაღლებდა: ქრისტიან გიაურებს ნება არა აქვთ, მაჰმადიანების სისხლი დააქციონო, ხოლო თუ ლეკები კახელს მოჰკლავდნენ, — რა გაეწყობა, მაჰმადიანს

ქრისტიანი გიაურის მოკვლა ალლაპისაგან მაღლად ეთვლებო.

მაგრამ კახელები მაინც მძლავრობდნენ რევაზხოლოცაშვილის, აბელანდრონიკაშვილისა (ქიზიყის მოურავი) და მერაბვაჩინაძის (ენისელის მოურავი) შეთაურობით.

სწორედ ამ სამ კახელ მამულიშვილს დაუკავშირდა გიორგი მეფე. ამათაც „მისცეს პირი მტკიცე“. ერთმანეთს შეეკრნენ და შეეთქვენენ. დღეც დაინიშნეს, სად უნდა შეყრილიყვნენ ქართლელთა და კახელთა ჯარებით, როგორ უნდა დასცემოდნენ ყარაღაჯს, მოეკლათ ხანი და გაეწყვიტათ ყიზილბაშთა ციხიონი.

ის ღამეც დადგა. კახელები დათქმულ ადგილზე უკვე მისულიყვნენ და ქართლელებს ელოდნენ.

ქართლის ჯარს მიუძღოდა თამაზ ყაფლანიშვილი, გიორგი მეფის ბიძა (დედის — როდამ დედოფლის ძმა), ქართლის სპასბეტად თვითონ გიორგისგან აღზევებულნი.

უკებ თამაზ ყაფლანიშვილი სიბნელეში გაუჩინარდა. იგი ყარაღაჯს მივიდა და ბეჟან-ხანს ქართველთა განზრახვა შეატყობინა. ატყდა განგაში. ყიზილბაშთა ციხიონი ფეხზე დადგა. ფაიქები გაფრინდნენ მეზობელ სახანოებში იქაური ჯარების გამოსაწვევად.

ამაო ლოდინით გულგასენებული კახელები უკან გაბრუნდნენ.

უსარდლოდ დარჩენილი ქართლელებიც გაიფანტნენ.

გიორგი მეფის ეგზომ დიდი განაზრახი ეგზომ ბოროტი ნაბიჯის წყალობით ჩაიშალა.

გიორგიმ ისევ შაჰთან შერიგება ამჯობინა და მისი ბრძანებაც აღასრულა: შვილი და ძმა ორივე ისტაჰანს გაგზავნა.

ლევანი და ბაგრატი ცივად მიიღეს შაჰსულეიმანის კარზე.

მალე გიორგის შაჰის ფიცხელი ბრძანება მოუტანეს კოჯრის სასახლეში: ქართლის მეფობა ერეკლე ბატონიშვილს ვუბოძეთ, შენ კი ჩემს წინაშე მობრძანდი, რამეთუ „მოგცე ქვეყანა სხვა და ნიჰნი დიდნი“!

გიორგიმ შაჰის რაყამი შორს მოისროლა.

• • • • •

1688 წელი იდგა.

სპარსეთ-საქართველოს გზაზე ქართლის ახალი მეფე მოაქნებდა ცხენს, ბრწყინვალე ამალით, შაჰისგან ნაწყალობევი სიმდიდრითა და მისართმეველით.

ქართლის ეს ახალი „მეფე“, „პატრონი“, „ხანი“ თუ „ვალი“ — გახლდათ ერეკლე ბატონიშვილი, რუსეთში „ცარევიჩ ნიკოლაის“ სახელით ცნობილი, ძე დათუნასი, ძის-ძე სახელოვანი თეიმურაზ მეფისა.

მაგრამ ერეკლე-ნიკოლოზს უკვე მესამე სახელიც „ეშოვანა“, თათრული სახელი — ნ ა ზ ა რ - ა ლ ი - ხ ა ნ. თუგრძე მაინც ვერ გადაურჩა „თათრად მონათვლას“ იმპარტავანი ქართველი უფლისწული, „ორგზის ქრისტიანი“, ორი ქრისტიანული ჭკეცნის აღზრდილი.

მაინც ქართული სახელით დაივანა ქართველ გვირგვინოსანთა გრძელ ნუსხაში — ერეკლე I (1688—1703 წწ.).

.....

საქართველოში რომ შემოვიდა, ცხენიდან გარდახდა, განმარტოვდა, მუხლებზე დაეცა, მიწას აკოცა და დიდხანს ილოცა, ჯვარსახოვნად, ქრისტიანულად, ქართულად.

ხელმწიფობა ერეკლე პირველისა

ქართველი ხალხის მოღალატე თამაზ ყაფლანიშვილი შემოუძღვა ქართლში ახალ ხელმწიფეს.

ყარალაჯელი და ყაზმინელი ხანები გაეფრთხილებინა შაჰს სულეიმანს: თუ ქართლელებმა ნაზარ-ალი-ხანს რაიმე ცუდი შეჰკადრონ, მაშინვე თქვენის ჯარებით მიეშველეთო.

თუშთა და ქიზიყელთა ჯარებიც წინასწარ გაემზადებინათ ერეკლეს შათირებს — „ყოველ შემთხვევისათვის“, რამეთუ იგი „ვერა ეგდენ ენდობოდა ქართლელთა“.

მაგრამ „ისეთი“ არაფერი მომხდარა. ქართლელები წყნარად და მშვიდად შეეგებნენ „მაინც ქართველ“ მეფეს.

გიორგის ზომ შაჰის ბრძანება ჰქონდა — ერანს მეწვიეო, —

მაგრამ არც ერანს წავიდა, არც მის მეტოქეს შეეგება, კოჭრიდან ცხინვალს მივიდა, ცხინვალიდან რაჭისკენ გაქუსლა. მას თან გაჰყვა კათალიკოსი ნიკოლოზი და რამდენიმე ქართლელი თავადი და აზნაური. რაჭის გზას რომ შეუდგნენ, გიორგიმ ერთხელ კიდევ სთხოვა თანალტოლვილებს: ნუ მომერიდებით, ვისაც გული გეთანაღრებათ, ჯერ კიდევ გვიან არ არის და ახალ მეფესთან დაბრუნდითო. რამდენიმემ მართლაც შემოაბრუნა ცხენი.

მალე შაჰ სულეიმანს ასეთი საშფოთარი ამბავი ჩაუტანეს საქართველოდან: რაჭაში, პაპუნა ერისთავის კარზე, თავი მოუყრიათ ძმებს — გიორგისა და რუსეთიდან ახლად დაბრუნებულ არჩილს.

„არჩილი და გიორგი რაჭას შეიყარნენო და იმერეთს ეჭიდებიანო“.

დაფეთებულმა შაჰ სულეიმანმა ფიცხელი ბრძანება აფრინა საქართველოში: თუ მართლა გიორგიმ და არჩილმა ქუთათისის ტახტისკენ გაიწიონ, მაშინვე იმერეთის მეფეს ქართლელთა და კახელთა ჯარებით მიეშველეთო. ისეთივე ბრძანება აზერბაიჯანის ბეგლარბეგსაც გაუგზავნა სულეიმანმა.

მაგრამ გიორგიმ და არჩილმა კიდევაც „გაიწიეს“ და თავისივე გაიტანეს. არჩილი ისევ დაჯდა იმერეთის ტახტზე. ერეკლე მეფემ ხელის განძრევაც ვერ მოახერხა (თუ „არ მოახერხა“?).

მხოლოდ ეს იყო, რომ იგი დიდის პატივით შეხვდა იმერეთიდან გორში გამოქცეულ ალექსანდრე IV-ს.

.

გიორგის ურჩობით ბალანაშლილმა სულეიმან შაჰმა ხელი წამოუსვა გიორგის ძეს — ბაგრატს და ძმას — ლევანს, და ორივენი ჰერათში (ავღანისტანში) გადაასახლა ბორკილგაყარილნი, ხოლო გიორგის მეორე ძმა — ლუარსაბი ქირმანს გააგდო იქაურ ციხეში ჩასაგდებად. ქირმანისკენ მიმავალ ლუარსაბს ქრისტიანობის დაგდება და მაჰმადიანობის მიღება მოსთხოვეს. ლუარსაბი გაძლიანდა. დამით ცხვირ-პირი სილაქებით დაილეწა და დაისისხლიანა. მეორე დღეს, როცა სპარსელმა „სამართლის ქურუმებმა“ ეგზომ დაშავებულობის მიზეზი ჰკითხეს, ლუარსაბმა ეს აიჩემა: წუხელის მო-

ლები და იმამები მომიხტნენ, რატომ მაჰმადის რჯულს არ ღებულობო, და ასე უღმერთოდ მცემესო. არ დაუჯერეს ამნაირი „პროვოკაცია“, ძალით შეიპყრეს, ხელფეხშეკრულს წინა დაუცივთეს და მაჰმადიანად „მორჯულებული“ ქირმანის ციხეში ჩააგდეს.

ერეკლე I გამეფების ეამს 46 წლის კაცი იყო. საქართველოდან მას მხოლოდ ბავშვობა და ყრმობა ახსოვდა. 22 წელიწადი რუსეთში გაატარა, 14 წელიწადი — სპარსეთში. გარეგნულად დიახაც უმშვენიერესი ვაჟკაცი იყო — ტანად ტანოვანი და სახედ სახიერი. მაგრამ მისი შინაგანი სამყარო საგრძნობლად აემღვრია უცხოობაში ხანგრძლივ ცხოვრებას. თამარ მეფის პირველი ქმრის შემდგომ საქართველოს ტახტს არ მოსწრებია ეგზომი „მსმელი“ და „ქალთა მოლაღე“, როგორც „ცარევიჩ ნიკოლაი“ აღმოჩნდა. ღვინო მაინცდამაინც ძალიან არ უყვარდა. თურმე ვერ შეუსრულებია თავისი პაპის თეიმურაზ მეფის შეგონება და მაინც მისჩვევია „ფიცხელი სასმელის“ ყლურწვას რუსეთში. ხშირი „სმისა და შეება-ლბინის მოყვარეს არ შეეძლო „ზარხოშობის დონემდე“ თავის შეკავება და თრობით დათრგუნვილი „ლირწიანად და უშვერად“ ენამყარალობდა, შიმუნეარ ქალებს უგვანად ელაციცებოდა. ცოლ-შვილი სპარსეთში დაეტოვებინა. ასე „უჯობდა“ ხარკების მოყვარულს.

ბუნებით გულმოწყალე იყო, „მცირეთა ყურის მიმპყრობი“, თანაც „დიდთა დამამდაბლებელი“. ერანის შაჰის გარდა ძალადაც არავის აგდებდა (თუ დავაზუსტებთ: მხოლოდ მას სცნობდა უზენაეს „გენიად“, ვინც შაჰის ტახტზე მოასწრებდა და დაჯდომას!).

ტახტზე დაბრძანებისთანავე ძველი საერო და სასულიერო თანამდებობის პირნი გადააყენა და ახლები დანიშნა: კათალიკოსი — იოანე დიასამიძე, მთავარეპისკოპოსი — ნაცვლიშვილი (იმერეთიდან რომ წაჰყვა და აღარ მოშორებდა), ტფილელი — დომენტი ყაფლანიშვილი, მანგლელი — იოსებ ჯავახიშვილი („რომლის ძმისწული ერეკლემ მოიყვანა ხარკად მისად“), მსაჯულთუხუცესი — ბარძიმ ერისთავი (გიორგი არაგვის ერისთავის ძმა), სახლთუხუცესი — თამაზ ბებური-

შვილი, ვეზირად — ყიასი, ყულარადასად — ლუარსაბ ყაფლანიშვილი (ვიორგი მეფის მოლაღატე თამაზ ყაფლანიშვილი სულ მოიცილა თავიდან).

ამათ მიანდო ერეკლე მეფემ ქართლის მართვა-გამგეობა, ხოლო თვითონ „მარადის იშვებდა და იხარებდა და ნადირობდა“.

მაინც კახეთისკენ უფრო ეჭირა თვალი კახეთის ბაგრატიონთა ნაფესვარს. სულეიმან შაჰმაც შეიწყნარა მისი „კახური მისწრაფებანი“ და „სახასოდ“ მისცა ქიზიყი და თუშეთი.

ქართლის ძველ თავადობას არ შეიძლებოდა მოსწონებოდა „რუსეთუმეს“ ახალი „უცნაური“ ღონისძიებანი — ძირძველ ფეოდალთა დაკნინება, ჩამოქვეითება და „ახლების“ (ლამის „ვიგინდარების“) დაწინაურება. მათ არ სურდათ შერიგებოდნენ, რომ ერეკლე მეფე „ძველების“ დაქვეითებით და „ახლების“ ამალგებით, თავის საკუთარ, ასე ვთქვათ, „ცენტრალიზებულ“ ხელისუფლებას ქმნიდა. მანამდე რომ, „ვისაც როგორ ენება, ისე სჯიდა“. ერეკლემ ესეც „იუცნაურა“ და ახალი, „ყველასათვის ერთნაირად სავალდებულო სამართალი“ შენიღოდა.

ერეკლემ იცოდა, რომ მისგან დაქვეითებული ძველი ქართლელი თავადობა, იდუმალ თუ აშკარად, ისევე გიორგი მეფეს „ეძიებდა“ ტფილისის ტახტზე დასაბრუნებლად. მაგრამ არც ამაზე ფიქრით იწამლავდა „ორი ღლის წუთისოფელს“ ლხინისა და დროსტარების მოტრფიალე მეფე. არხეინად იყო, რადგან ქართლის მთავარ ციხეებში ყიზილბაშური ციხიონები ჭყავდა.

ქართველები მთელს აზიაში უმამაცესი ხალხია და მათ საშინაო თანხმობა რომ ჰქონოდათ, მაშინ ვერავითარი საგარეო მტრული ძალა უმცირეს ზიანსაც კი ვერ მიაყენებდა.

პ. ლევანოვი, რუსი დიპლომატი, 1766 წ.

მას შემდეგ, რაც მეფე გიორგი მეთერთმეტემ თავისი ძმა არჩილი ქუთათისის ტახტზე „განამტკიცა“, თვითონ ჯერ გურიას ჩავიდა, იქიდან — გონიას, შემდეგ სამცხეს გადავიდა და ოშორას ციხეში ჩადგა. აქ შეიტყო, რომ იმერეთიდან გამოქცეული ალექსანდრე იმერთა მეფე წედისში დამდგარიყო და მაშინვე ჯარი გამოგზავნა მის შესაპყრობად. მაგრამ ბეჟან სააკაძისგან გაფრთხილებულმა ალექსანდრემ გორის ციხეში შეასწრო და გიორგის ჯარი სამცხეში ხელცარიელი დაბრუნდა.

ერეკლე მეფემ სულეიმან შაჰს აცნობა ეს ამბები.

სულეიმანმა ოსმალეთის სულთანს დიდი ძღვენით დატვირთული დესპანი გაუგზავნა და შეუთვალა: ვინაიდან ჩვენს შორის არის ზავი და მშვიდობა, გთხოვთ მომცეთ ჩემი ქვეშევრდომნი — არჩილი და გიორგი, ხოლო თქვენი ქვეშევრდომი ალექსანდრე თქვენსავე იმერეთში დააბრუნეთ.

ხონთქარს მოეწონა ერანის შაჰის ეგზომ „სამართლიანი“ მოწოდება და ასლან ფაშას ბრძანება გამოუგზავნა: ახლავე არჩილი და გიორგი შეიპყარ, ორივე სპარსეთს გაგზავნე და იმერეთის მეფედ ისევ ალექსანდრე აღადგინეო.

გიორგის ერთგულმა მესხებმა ამცნეს საშიშროება. მეფე ახალციხის სიმაგრეში ჩაიკეტა. აქ ქართლელ თავადთა წერილები და მისართმეველი მიუვიდა. ამოთან მუხრან-ბატონი, გივი ამილახორი და ნიკოლოზ მაღალაშვილი (ყველანი ერეკლესაგან განაწყენებულნი) სწერდნენ გიორგის: ოღონდ ქართლს მობრუნდი, მხარში დაგიდგებით, შენტვის სიცო-

ცხლეს გავსწირავთ და ტახტზე ისევ აგიყვანთო; ეს ოქრო-ვერცხლი ქრთამად მიეცი ქრთამზე გაგიყებულ ოსმალებს და გამოგიშვებნო.

ქრთამზე ლაპარაკი აღარ დასჭირვებია გიორგის. იმ დამით ერთგულმა დოღენჯი ხმალაძემ ციხის კედელზე თოკით გადმოუშვა მეფე.

ქართლისკენ გაქუსლა გიორგიმ.

ქართლიდან ახალციხისკენ ალექსანდრე მიემართებოდა, ასლან ფაშასაგან მიწვეული.

გზაზე შესცილდნენ ერთმანეთს მტრები.

ერეკლე მეფე კოჯრის სასახლეში იდგა, როცა გიორგის შემოჭრის ამბავი შეატყობინეს. მაშინვე გაქუსლა მეფემ, ტფილისში შეასწრო და ჩაიკეტა.

1691 წელი იდგა.

ქართლში ორი მეფე იწყებდა „ერთმეფობისთვის“ ბრძოლას.

ალექსანდრე იმერთა მეფეს ცოლ-შვილი რუისში დაეტოვებინა. გიორგი მიუხტა და ყველანი შეიპყრო.

თვითონ გიორგის მეუღლე ხვარეშან დედოფალი და სახლელი ახალდაბას ჰყავდა. ერეკლემ ქაიხოსრო ციციშვილი („ლოპინა“) გაგზავნა მათ შესაპყრობად.

მაგრამ ქაიხოსროს გზა გადაუჭრა გიორგის ძმისწულმა ვახტანგ ლევანის ძემ (შემდგომში — ვახტანგ VI), დაამარცხა და უკუაქცია გიორგის ოჯახის მომტერენი.

გიორგიმ ტფილისს გვერდი აუქცია და ჯერ დუშეთს მივიდა, მერე თიანეთს, შემოეგებნენ გიორგი და ბარძიმ ერისთავები, „სიყვარულითა თაყვანის-მცემელნი და ითხოვეს შენდობა“.

ამასობაში ქაიხოსრო ციციშვილის ძმისწულმა — ციცი ციციშვილმა ბიძას მთელი საციციანო წაართვა და გიორგი მეფეს დაუმორჩილა.

თიანეთიდან დიდგორს დაეშვა გიორგი. აქ მას შეუერთდნენ ქვემო ქართლელი ბარათაშვილები.

დიდგორიდან კოჯორს ავიდა, „მშობლიურ სასახლეში“ ფეხი მოირთხა და ისევ შეუდგა ქართლის „განგებულობას“.

კათალიკოსად ისევ ნიკოლოზ ამილახორი აღადგინა, მსა-

ჯულთუხუცესად ბარძიმ ერისთავი დატოვა. ერთი სიტყვით, ყველა „ძველ წარჩინებულს“ თავისი „ძველი სახელო“ დაუბრუნა.

ბარძიმ ერისთავი ჯარით აფრინა, — იმერეთს გადადი და არჩილს მიეშველეთ. მაგრამ უკვე გამოეძევებინათ არჩილი იმერეთიდან. რაჭის გზით წამოსულიყო. ერწოზე შეხვდა ბარძიმი და გამოუძღვა ქართლის შუაგულისაკენ.

ძმები ტფილისს მიაღვნენ, „ფრიალ შეამჭირვეს“, მაგრამ მაინც ვერ აიღეს.

გიორგი მეფე კახეთის თავადობას „ეზრახა“: ისევ დაბრუნეთ არჩილი მეფედო. არჩილს კახელთა შორის დიდი სიყვარული და პატივისცემა დაემსახურებინა და მაშინვე „მათ სიხარულით მოსცეს პირი მტკიცე ფიცითა და აცნობეს ესე არჩილს“.

მაგრამ არჩილმა თვითონ აღარ ინება კახეთის ტახტი და გვირგვინი, მას მტკიცედ გადაეწყვიტა რუსეთში წასვლა...

ოთხი წელიწადი გაგრძელდა საშინელი, ძმათაშორისი სისხლმათხევარი „ორიანობა“ — ბრძოლა გიორგისა და ერეკლეს შორის. ცოდვიანი ომის სასწორი წონასწორად ქანაობდა. ზიარი ჭურჭლებივით ერთიმეორეს „ანაკლულებდნენ“ და „ავსებდნენ“ ერთმანეთის სისხლით: ერთიმეორის ბანაკში მიმორბოდნენ „პოლიტიკურ წყველიადში“ ბრძალ მოფართხალე საომარი ძალები. იდგა ხმალთა გაუთავებელი კვეთება — „კვეთებითა მებისათა“, ჩალიბად ბრძოლა (ნინოწმინდაში, ქიზიყის მოურავმა დუშია ანდრონიკაშვილმა ქართლის სახლთუხუცესს ბარძიმ ერისთავს უბრალოდ, „შესაშინებლად“, ტყვიით ბეჭი დაუმხვრია), თოფების ბათქაბუთქი, ზარბაზნების გრიალი (ერთი ჭურვი მცხეთის სვეტიცხოველსაც დაეტაკა, მაგრამ გადაურჩა არსუციძის ნახელავი უგუნურად ნასროლს), განუკითხავი ყელის დაჭრა და თვალთა „აღმოსდომანი“ (გიორგიმ შეიპყრო და თვალები დათხარა ერეკლეს მომხრე ბეჟან სააკაძეს).

ერთჯერ შერიგებაც სცადეს გიორგიმ და ერეკლემ. კიდევაც შეთანხმდნენ: გიორგი ქართლის ტახტს დაიჭერდა; ერეკლე — კახეთისას. კიდევაც უნდა ეუწყებინათ ეს შეთანხმება შაჰისათვის. მაგრამ „არა აუფლეს მეშფოთეთა ესე ყოფად“ —

არც ერთი „ბანაკის“ თავადობამ არ ინება იარაღის დაყრბა; გრძელდებოდა თვითამოწყვეტა და თვითდაქცევა ქართლ-კახეთის ცის ქვეშ.

1694 წელი იყო.

ერთ დღეს გიორგის ამბავი მოუტანეს: სამასი თუში და კახი მეომარი, გივი ჩოლოყაშვილისა და ბაადურ შანშიაშვილის მეთაურობით, ერეკლეს მოსაშველებლად მოეშურებო. გიორგიმ ისევ გაგზავნა ჯარით თავისი მამაცი ძმისწული — ვახტანგ ლევანის ძე.

„ტალავრის-ბოლოს გორასა ზედა... იქმნა კვეთებული ბრძოლა ძლიერი“. სულ ერთიანად ამოწყვეტეს ქართლელებმა კახელები. ბრძოლაში სარდლებიც დაიხოცნენ — გივი ჩოლოყაშვილი და ბაადურ შანშიაშვილი.

ქართლელებმა კახელთა ელეტა რომ მოათავეს, უცებ ტფილისისკენ მიმავალი ყიზილბაშური ჯარი დაინახეს.

ვახტანგმა მაშინვე მტერს გზა მოუჭრა და ჯარი საომრად გააწყო.

სპარსელებიც შედგნენ.

ვახტანგმა შათირი გაგზავნა ამბის შესატყობად, — საიდან მოდიან, სად მიდიან, რისთვის მიდიანო?!

სპარსელებმაც გამოატანეს პასუხი შათირს: შაჰი სულეიმანი მომკვდარა და ერანის ტახტზე მისი შვილი დაბრძანებულია — შაჰ სულთან ჰუსეინი; ახლა ეს ჯარი ტფილისს მიეშურება, იქაური სპარსული ციხიონი უნდა შეცვალონ და თანაც ერეკლე ნაზარ-ალი-ხანს ახალი შაჰისგან გამოგზავნილი ხალათი უნდა მიართვან!

მაშ, სულეიმან შაჰი მომკვდარა!

მაშ, ერანის ტახტზე ახალი შაჰი — სულთან ჰუსეინი აღზევებულა!

ხოლო, ახალი შაჰიც, რაკი იგი ხალათს ერეკლეს უგზავნის, ისევ ერეკლეს სცნობს ქართლის გამგებლად და არა გიორგის!

მაშინვე საომრად დასძრა ჯარი ვახტანგ ლევანის ძემ.

სპარსელებიც შემოეგებნენ გულსრულად და გააფთრებულად.

ვახტანგმა სპარსელთა სარდალი ამოიღო მიზანში, ცხენი გააქანა, ჰოროლით მკერდი შეუხვრია და მიწას უსულოდ დაანარცხა.

მოკლული ყიზილბაში სარდლის საჭურველმტვირთველმა შორიდან მშვილდი მოზიდა და ვახტანგის გულს დაუსისწორა ისარი.

ბეწვზე დაასწრო ხოხონა ხერხეულიძემ, — ვახტანგს მკერდზე ფარი უფარა. სპარსის ისარი მაინც ჩაერჭო ხერხეულიძის ფარს, მაგრამ სხეულამდე ვერ გაატანა და აშკარა სიკვდილს გადაურჩა ქართველთა სარდალი.

ბრძოლა გრძელდებოდა.

ერთი ახოვანი სპარსი დაწინაურდა. ზედიზედ ხუთი ქართველი ვაჟკაცი — დიდად „მხნე ჭაბუკნი“ უსულოდ ჩამოპყარა ცხენებიდან.

გაუხტა ნიკოლოზ გოსტაშაბიშვილი, დაეძგერა, ცხენიდან დაითრია და მიწას დაანარცხა გმირი სპარსელი. ძირს დაცემულს დასწვდა და წამოაყენა.

შენი დიდი სიმხნისა და ვაჟკაცობისათვის მიპატიებიაო, უთხრა გოსტაშაბიშვილმა და ცოცხლად გაუშვა მოულოდნელი მარცხით და მოპირდაპირის დიდსულოვნებით გაოგნებული სპარსელი...

ყიზილბაშთაგან მცირე გუნდმა სიკვდილს გაასწრო და შაჰის გამოგზავნილი ხალათი ერეკლეს მისართმევად წაიყოლია.

მობრუნდა ვახტანგ ლევანის ძე გამარჯვებული.

გიორგის მოახსენეს: ერეკლე მეფე ბოლნისს ყოფილა, იქედან წამოსულა და ახლა ტფილისს უახლოვდებო.

გზა გადაუჭრა მეტოქეს გიორგიმ.

ლამე იყო.

ერეკლე გამოჩნდა. ფრთხილად მოდიოდა, ამალით.

გიორგი აიშართა საიერიშოდ.

არჩილმა არ დაანება: ხელს ნუ ახლებ, რა ვაჟკაცის საქმეა ასე ქურდულად დაცემას!

გიორგიმაც აიღო ხელი „მოპარულ გამარჯვებაზე“.

.

იმავე 1694 წელს ერანის ახალ მბრძანებელს პატიმრობი-

დან გამოეშვა გიორგი მეფის ძმები — ლევანი და ლუარსაბი. ხოლო ბაგრატ გიორგის ძე პერობილობასვე მომკვდარიყო, ჰერათის ციხეში.

ერთადერთი შვილის სიკვდილმა უძძიმეს წუხილში ჩააგლო გიორგი მეფე.

დედოფალი ხვარაშანი შვილის ჯავრს გადაჰყვა.

ამაოდ ცდილობდა არჩილი, შავნაღვლიანობიდან გამოეხსნა ოჯახამოწყვეტილი ძმა.

მცირე ხანიც გამოხდა და, ახლა არჩილსაც ეწვია ყველაზე მძიმე უბედურება: მისი ძე მამუჯა მომკვდარიყო რუსეთში.

მთელი ზამთარი ორივე ძმა ჩაიკეტა საგლოველ და ცრემლსათხვეველ სენაკებში.

1695 წლის გაზაფხულზე შაჰ სულთან ჰუსეინმა ერეკლეს თხოვნით ცინცხალი მხედრობა გამოგზავნა საქართველოში. ყიზილბაშთა ჯარს კახეთის ახალი მმართველი მოუძღოდა — ქ ა ლ ბ ა ლ ი - ხ ა ნ ი, რომელსაც ყარაღაჯში უნდა შეეცვალა ერეკლესთან წაჩხუბებული აბაზ-ყული-ხანი.

ერეკლე და ქალბალი-ხანი ერთიანი ძალებით მიეტევნენ გიორგი მეფეს. გიორგიც დაუხვდა რამდენჯერმე გულსრულად, მაგრამ მისი ბანაკი, უკვე დაქანცული და სულიერად დაცემული, ბრძოლის დაწყებამდე გაურბოდა მტრის გამოჩენას.

ისევ გამოჩნდა ქართლში იმერეთის მეფე ალექსანდრე IV. მაგრამ იმერელმა წარჩინებულებმა თვითონ შეიპყრეს თავისი უზიაგი მეფე და ცოცხლად მიართვეს რუისში მდგარ გიორგის და არჩილს. გიორგის ბრძანებით ალექსანდრე დაახრჩვეს და იქვე დაფლეს, რუისის ეკლესიაში.

მთავარი მაინც ის იყო, რომ გიორგის საომარი ძალები სავსებით დაშრეტოდა.

იმავე 1695 წელს მან ქართლი დატოვა და იმერეთს გადავიდა.

მისი მამაცი ძმისწულები — ქ ა ი ხ ო ს რ ო და ვ ა ხ ტ ა ნ გ ლევანის ძენი — ერთმანეთს გამოეთხოვეს. ქაიხოსრო, გიორგისა და არჩილის უცნობებლად, სპარსეთს წავიდა შაჰთან შესარიგებლად, ვახტანგი კი ბიძებს წაჰყვა იმერეთს.

ქაიხოსროს სპარსეთში დიდის ამბით შეხვდნენ მამამისი ლევანი, ბიძამისი ლუარსაბი და ბოლოს შაჰ სულთან ჰუსეინი. შაჰი გახარებული იყო, რომ კიდევ ერთი მამაცი და ჭკვიანი ვაჟკაცი შეემატა სპარსეთის „გურჯთა სათვისტომოს“.

იმერეთში უქმად მდგარ გიორგის ერევნის ხანმა წერილი გაუგზავნა: ეახელ შაჰ სულთან ჰუსეინს პირადად და შეურიგდიო; მე ვიქნები შენი თავმდები, რომ არამცთუ რაიმე წყენა შეგემხთხვეს, „არამედ უფროსად სარგებელი და წყალობა და მრავალწილად კეთილის ყოფა ყაენის მიერო“.

გიორგის ჭკუაში დაუჯდა ერევნის ხანის წინადადება. ისიც გასაგები იყო, რისთვისაც ირჯებოდა ერევნის ხანი: იგი ქალბალი-ხანის მოსისხლე მტერი იყო, ხოლო ქალბალი-ხანისა და ერეკლე მეფის მეგობრობა თავისთავად ერეკლესა და ერევნის ხანის ურთიერთ მტრობასაც „მოიცავდა“.

წამოვიდა ქუთათისიდან გიორგი მეფე. ხარაგოულს შეჩერდა მცირე ხნით. აქ თავისი რძალი, ბაგრატ უფლისწულის ქვრივი — რუსუდან ჩერქეზი, ცოლად შერთო ძმისწულს — ვახტანგ ლევანის ძეს (თითქოს, ასეთი ქორწინების მეოხებით, კიდევაც იშვილა ერთგული ძმისწული უშვილძიროდ დარჩენილმა გიორგიმ).

ქორწილი იყო „არა დიდებული“, ულხინო და გაუხარელი.

აქ ბიძა-ძმისწული დაემშვიდობნენ ერთმანეთს. ვახტანგი ცოლით იმერეთს დარჩა. გიორგი ქართლისკენ წამოემართა.

აღს რომ მოატანა, შაჰის გამოგზავნილი მეჰმანდარა (მესტუმრე) შემოეგება დიდძალი ძღვენით. თურმე ერევნის ხანს უკვე მიუხარებია შაჰ სულთან ჰუსეინისთვის: გიორგი მეფე უკვე გზაზე ადგას თქვენთან შესახვედრად და შესარიგებლად. სამახარობლოდ თოფანგჩილასობა („რომელ არს ყოვლის მეთოფის ბატონობა და უფროსობა“) უბოძებია შაჰს ერევნის ხანისთვის.

გიორგიმ ქართლში დატოვა თავისი უმცროსი ძმა სულეიმანი, ცოლ-შვილით, და ნიკოლოზ კათალიკოსი. ამათ უნდა „მოევლოთ“ აქაური საქმეებისთვის, რამეთუ გარდაცვლილიყო მეფის უახლოესი კარისკაცი და ყოველ „სამეფო საქმეთა“ გამგებელი გივი ამილახორი.

გიორგი არაგვის ერისთავი და ზურაბ ზურაბიშვილი აი-
ყოლია მეფემ, წინ სპარსელი მეჰმანდარი გაიძლო და გა-
უდგა საქართველო-სპარსეთის ცოდვიან გზას...

დიდი ზეიმით შეხვდა ერანის სატახტო სახელოვან გურ-
გინ-ხანს.

შაჰმა „კეთილად შეიწყნარა, მისცა ნიჭნი და გაკვეთილ-
ნი“.

შემოეგებნენ გიორგის ძმები — ლევან და ლუარსაბ, და
ძმისწული ქაიხოსრო ლევანის ძე. სპარსეთს ნებით თუ უნებ-
ლიეთ გადახვეწილი უამრავი ქართველი შემოეჭვია უმძიმესი
წუთისოფლით დარეგვილ რაინდს.

მაინც რას უპირებს ერანის შაჰი გურგინ-ხანს, იმდენი სი-
სხლისა და სირცხვილის სანაცვლოდ, რაიც მისმა მზეაობარ-
მა გულმა და სალმასურის ხმალმა აგემა სპარსეთს?

მალე შეიქნა საცნაური: რაც მოხდა მოხდა, ყველაფერი
დავიწყებულია!

გიორგი მეფე, დიდი ქართველი მხედარი და მხედართ-
მთავარი, მისი გულუძვრელობით, გრანიტის ნებიანობით და
სალმასურის ხმალით, ერანის სახელმწიფო კარს ახლა ძა-
ლიან, ძალიან სჭირდება!..

ქართლში მეფედ ისევ ერეკლე პირველი დარჩა.

იგი კიდევ რვა წელი იმეფებს, ფრიად უფერული მეფო-
ბით.

ისევ აღამაღლებს „თავის ხალხს“ და დაამდაბლებს გი-
ორგის ერთგულთ.

ისევ კახეთის საკეთილდღეოდ უფრო იღვწის ქართლის
მეფე, ვიდრე ქართლისთვის.

ეს უცნაური „მიკრო-პატრიოტი“ საქართველოს სატახ-
ტოს დაცვას მხოლოდ „თანამემამულე კახელებს“ ანდობს.
როცა ვაჭირვებულ ქართლელ გლეხს შეხვდება, მტკვარზე
საგანგებოდ გადებულ „კახეთის ხიდზე“ მიუთითებს და ეტყ-
ვის:

„აი, იმ ხიდზე გადადი, შე უბედურო, იარე და კახეთში
შეხვალ, სიმდიდრისა და სიმშვიდის ქვეყანაში. დაესახლე იქ,
იშრომე, იცხოვრე, იხარე!“

და იყრებოდა ქართლსა მოსახლეობა და სახლდებოდა „ბედნიერ კახეთში“.

ზოგადქართული ისტორიისთვის ეს იგივე იყო, რაიც — „ლუკმა გაგარდეს, ჯამში ჩავარდეს“, — მაგრამ ერეკლეს ამნაირი „კახური პოლიტიკა“ ამ ანდაზის ფილოსოფიით მაშინ არ ესმოდა არც ქართლელს, არც კახელს და არც თვითონ ერეკლეს.

ახმა მიათი

თვითთავკლავლოგის საუკუნე იმერეთისა

ხოლო ამ დროს დასავლეთ საქართველო თავისი ხელითვე დაქცეული სისხლის მორევში იხრჩობოდა.

ფეოდალური ომები, ძმათაშორისი ხოცვა-ჟლეტა, ძარცვა, რბევა, ნგრევა და — ყველაზე დიდი უბედურება და უმწარესი სირცხვილი —

ადამიანთა ტყვევნა და ყიდვა-გაყიდვა — ყოველგვარ ზომასა და საზღვარს გადაშორებოდა.

„ბაში-აჩუკის“ ქვეყანა დაღუპვის ქვესკნელისკენ მიეჭანებოდა.

„მოიპარა ციხე“ და „შეიტყუა ციხესა“

წინარე თხრობას დაეუბრუნდეთ და გავიხსენოთ:

1661 წელს ქართლის მეფემ ვახტანგ მეხუთე შაჰ-ნავაზმა ოდიშ-სამეგრელოს მთავრად, ვამიყ დადიანის ნაცვლად, დასვა ლევან III დადიანი, რომელსაც ცოლად შერთო

თავისი ძმის, კონსტანტინეს ასული — თამარი, საოცრად ლამაზი ქალი (დაიმახსოვრეთ, — ეს თამარის პირველი ქორწინება გახლავთ).

იმავე წელს ვახტანგ მეფემ იმერეთის მეფე, დედინაცვლისაგან (თეიმურაზის ასული დარეჯანი) თვალუბდაობრილი ბაგრატი IV ტყვედ აიყვანა და მის ნაცვლად ქუთათისის ტახტზე დასვა თავისი უფროსი ვაჟი, 14 წლის არჩილი.

ასე დაიწყო არჩილის „პირველი მეფობა“ იმერეთში.

მაგრამ ოსმალეთის სულთანმა „მის საკუთრება იმერეთში“ სპარსეთის ქვეშევრდომი ქართლელის გამეფება ოსმალეთის შინაურ საქმეებში „უხეშ ჩარევად“ მიიჩნია და მაშინდელ შაჰ აბას II-ს მუქარა გაუგზავნა: ან არჩილი გაგიყვანია იმერეთიდან, ან მე ომი დამიწყიაო.

1663 წელს, ორწლინახვერის მეფობის შემდგომ, არჩილი მამამისმა ვახტანგ მეფემ, შაჰის ბრძანებით, ქართლში წაიყვანა.

სამაგიეროდ მაშინვე ვახტანგ მეფემ იმერეთის ტახტზე აღადგინა უსინათლო ბაგრატი IV, რომელსაც ქართლიდან ცოლად გაატანა თავისი ძმისწული თითია, სილამაზით განთქმული თამარის დაი (ამრიგად, ბაგრატი IV და ლევან III დადიანი ქვისლები შექნილან).

მაშ, 1663 წელს ბაგრატი IV მეორედ ადის იმერეთის ტახტზე.

იმავე წელს ლევან III დადიანი, რომელიც მტრულად შეხვედრია ბაგრატის გამეფებასაც და დამოყვრებასაც, სამეგრელოს ჯარით იმერეთს შემოიჭრა.

ბაგრატიც შეეგება იმერთა ლაშქრით.

დადიანი დამარცხდა და ტყვედ ჩავარდა.

ბაგრატს ერთი დაი ჰყავდა, სახელად თინათინი, ვინმე გოშაძის ნაცოლარი. ეს ქალი იმ დამით, ბაგრატის წაქეზებით ტყვე დადიანს შეუწვა ლოგინში. დილით მეფე თავზე დაადგა მოტრფიალეებს. დაადგა და უბრძანა დადიანს: ოჯახის გაბახებას ვერ გაპატიებ და, თუ სიცოცხლე არ მოგძულდება, ცოლად უნდა წაიყვანო თინათინიო.

დადიანმა სიკვდილს სირცხვილი არჩია და დათანხმდა.

დასა და სიძეს ქორწილიც კი გადაუხადა მეფემ.

ხოლო, ყოველივე ეს ბაგრატიმა იმისთვის ჩაიდინა, რომ „მშვენიერ თამარს“ დაუფლებოდა.

ერთი სიტყვით, მეფე ბაგრატ IV-მ თავისი ცოლი — თითა ცოლობიდან განუტევა და მის ნაცვლად ლევან დადიანის ნაცოლარი ცოლისდა შეირთო.

(ეს თამარის მეორე ქორწინება გახლავთ).

ლევან დადიანი ბოღმით იხრჩობოდა, დღე და ღამე ბაგრატ მეფის შურისძიებასა და თამარის დაბრუნებაზე ოცნებობდა.

ამასობაში შინათავადური ომები არ წყდებოდა. ტყვეთა სყიდვა უფრო და უფრო ვრცელდებოდა და ბოროტდებოდა. იყო განუწყვეტელი „ხდომა, შფოთი, კირთება ერთმან მეორესა ზედა და ოხრება ქვეყანათა“.

იმერელ თავადთა შორის ყველაზე მეტად თავს გაუვიდა სახლთუხუცეს სეხნია ჩხეიძეს. მან ბაგრატ მეფეზე გამამტერებულმა, ახალციხის ფაშას, ასლანს, თურქთა ჯარი გამოართვა და ქუთათისის ციხეში ციხიონად შეაყენა („მოიპარა ციხე ქუთათისისა და შეაყენა ოსმალნი“).

მაშ, ქართველმა თავადმა მის „მშობლიურ“ ქართულ სხეულში მომაკვდინებელი კიბოს („ოსმალობა“, „გათურქება“) მეტასტაზი ჩაასახლა!

ბაგრატ მეფემ და თავადებმა კრინტიც ვერ დასძრეს ოსმალთა შიშით.

მაგრამ მაინც გამოჩნდა გმირი მამულიშვილი — მოურავი ბეჟან ლორთქიფანიძე. იგი ერთ ღამეს, მამაც იმერთა მცირე გუნდით, „შეეტყუა ქუთათისის ციხესა, მოსრნა ოსმალნი და აღიღო ციხე... და მისცა ბაგრატსა“.

ეს „ქართულობის“ დიდი გამარჯვება იყო.

ოსმალეთმა დრომდე შესჭამა მწარე ჯავრი.

ამასობაში ისევ გამოჩნდნენ „საასპარეზოდ დარეჯან დედოფალი და ვახტანგ ჭუჭუნაშვილი, ისინი ხომ ვამიყ დალიანმა ჩამოყარა იმერეთის ტახტიდან. ვახტანგ ჭუჭუნაშვილს მაშინ თვალებიც დასთხარეს. ბოლოს დარეჯანი, დარეჯანის ძმისწული ქეთევანი (ბაგრატ IV-ის ცოლყოფილი) და ვახტანგ უსინათლო ასლან ფაშამ შეიფარა და ოლთისს დააბინავეა.

ესეც გავიხსენოთ, რომ ქეთევანი ცოლად წაიყვანა არ-
ჩილმა, ხოლო დარეჯანი და ქუტუნაშვილი ისევე ელოდნენ
„სასიკეთო ამინდის“ დადგომას.

როცა იმერლებმა ბეჟან ლორთქიფანიძის მეთაურობით
ქუთათისში თურქები გაელიტეს, დარეჯანი და ვახტანგი ას-
ლან ფაშას შეუჩნდნენ: როგორ ითმენთ ქუთათისის ციხეში
ოსმალთა ციხიონის ამოწყვეტასო; ხონთქარიც ამისთვის
ჯავრს თქვენზედ იყრისო, თუ მანამდე არ დაასწარით და სა-
მაგიერო არ მიუზღეთ ბაგრატ მეფესო; ნულარ აყოვნებთ,
ჯარით დავიძრათო და ბევრი იქაური თავადიც ჩვენ მოგვემხ-
რობაო, ბაგრატს ჩამოვაგდებთ და ჩვენ მის აღვილზე მარად
თქვენი ფერხთა მტვერი ვიქნებითო.

1665 წელს ასლან ფაშამ ოსმალთა ჯარით ზეკარი გად-
მოლახა და ხანისწყლის ხეობაზე დაეშვა. დარეჯანი და მისი
ბრმა ქმარი გვერდით მოსდევდნენ.

ასლან ფაშას მაშინვე მიეგებნენ და შეუერთდნენ ლე-
ვან III დადიანი, დემეტრე გურიელი და სენნია ჩხეიძე.

ბაგრატ IV-მ ბრძოლა უიმედოდ ჩათვალა და ქართლში
გაიქცა ვახტანგ V-თან.

„მაშინ ოსმალთა მოსრნეს, მოსტყვევნეს იმერეთი, შე-
მუსრნეს მრავალნი ხატნი და ჯვარნი, მოსწვეს ქვეყანანი და
ეკლესიანი“.

პოლიტიკოსები და რაყიშვიდი

„რომელიც გაძლიერდეს, მისი იყვის“.

ფარსადან გორგიჯანიძე

ასლან ფაშამ იმერეთის ტახტზე დარეჯანი და ვახტანგ
ქუტუნაშვილი აღადგინა და თვითონ ახალციხეს გასწია, დიდ-
წალი ნაძარცვით დატვირთულმა.

ახალმა მეფე-დედოფალმა სასახლის კარზე ლეჩხუმის ბა-

ტონი ხოსია ლაშხიშვილი გაიშინაურეს (აი, ის ხოსია ლაშხიშვილი, ვამიყ დადიანი რომ მოაკვლევინა სვანეთში). დარეჯანმა მირონიც კი „ჰსცხო“ ხოსიას. ამიერიდან იმერეთის სამეფო კარზე ყველაფერი ხოსია ლაშხიშვილს ეკითხებოდა.

იმერელი თავადები კი შეთქმულებას ამზადებდნენ. იმდენი ჰქნეს, ხოსიაც „გარდმოიბირეს“ და დარეჯანს „შეუჩინეს“.

ერთ დღეს, დილით, როცა დარეჯან დედოფალი სასახლეში, სარკის წინ შილიფად იდგა, თმას ივარცხნიდა და იკაშმებოდა, უცებ შევარდა ხოსია ლაშხიშვილი და დედოფალს შუბი აძგერა შიგ მარცხენა ძუძუში.

მკვდარი დაეცა თეიმურაზ მეფის უკანასკნელი შვილი — ცოლყოფილი ჯერ ზურაბ ერისთავისა, შემდგომ მეფე ალექსანდრე III-ისა, ბოლოს ვახტანგ ბაგრატიონ-ჭუჭუნაშვილისა.

სანამ დარეჯან დედოფლის განგმირული სხეული ცივდებოდა, მანამ დანარჩენმა შეთქმულებმა ბრმა ვახტანგ ჭუჭუნაშვილი სასახლის მოედანზე ჩაათრეს, კარგა ხანს ათრიეს და, ბოლოს, ქვაფენილზე თავის რაჯგარუჯგით ამოხადეს სული.

შეთქმულებმა იმერეთის ტახტზე დემეტრე გურიელი მოიწვიეს.

მცირე დროც გამოხდა და ახალი შეთქმულება გაიჩარხა. ახლა დემეტრე გურიელი შეიპყრეს, თვალები „აღმოხადნეს“ და გააძევეს.

როცა ბრმა დემეტრე გურიაში დაბრუნდა, გურიელის ტახტი უკვე დაკავებული დახვდა: ასლან ფაშას ქაიხოსრო გურიელის შვილი გამოეგზავნა — გიორგი.

გიორგი გურიელი „იყო კაცი მხნე, შემმართებელი, შვილდოსან-მომასპარეზე რჩეული, უღვთო, მესისხლე და ტყვის მსყიდველი უწყალო“.

იგი უმჯველად იტყვის „თავის სიტყვას“.

.

დემეტრე გურიელი რომ დაასახიჩრეს და განდევნეს,

იმერეთის მესვეურებმა ქართლის მეფესთან კაცი აფრინეს და მეფედ ისევ ბაგრატ IV-ის გამოგზავნა სთხოვეს.

გახტანგ მეფე დათანხმდა და ქუთათისის ტახტზე მესამედ ავიდა ბაგრატ IV უსინათლო.

მაინც არ დაიშალა ქვეყნის ღალატი სეხნია ჩხეიძემ. ბაგრატის ხელახალი გამეფებისთანავე ისევ „აღიღო მოპარვით და ზაკვით ქუთათისის ციხე და მისცა ოსმალთა“. ამიერიდან — 1669 წლიდან, მთელი ასი წლის მანძილზე ვეღარ მოხერხდა ოსმალთა ჯარის განდევნა ქუთათისიდან. ასეთი იყო ქუთათელთა და გულგამოკმული ჩხეიძის „ღვაწლი“ სამშობლოს წინაშე!

სატახტო ქალაქის გაყიდვით არ დაწყნარდა სეხნია ჩხეიძე. მან ბაგრატ მეფის დასამხოზად შემოიყარა კიდევ სხვა ძლიერი თავადები და მათთან ლევან III დადიანი.

ხოლო, ბაგრატ მეფის საომარი დროშის ქვეშ დადგნენ ოკრიბა და რაჭა-ლეჩხუმი.

ბრძოლა მოხდა ჩ ხ ა რ თ ა ნ, 1669 წელს.

ორივე მხარემ დიდი ზარალი იწვნია.

ბაგრატ მეფემ გაიმარჯვა.

მოღალტე საეხნია ჩხეიძე ბრძოლაში დაიღუპა.

ლევან დადიანი, დამარცხებული, შერცხვენილი და თამარის ამო მონატრული — ოდიშს გაიქცა.

ბაგრატ მეფემ შემოიმტკიცა იმერეთი.

მაგრამ მაინც არ „დასცხრა დადიანი. რამეთუ შური აქუნდა ცოლისა თვისისა თამარისათვის, რომელი იყო ფრიად კეჭლუცი და აღმატებული შეენიერებითა სრული უმეტესად“.

ისევ დაიძრა ჯარით ლევან დადიანი, იმერეთის თავადთა ღმრავლესობა მიემხრო და შეუერთდა სამეგრელოს მთავარს.

ბაგრატ მეფე რაჭას გაიქცა.

დადიანისა და იმერელ თავადთა ჯარებმა გეგუთს მოიყარეს თავი...

ბაგრატმა ისევ შემოიყარა რაჭველთა და ლეჩხუმელთა დაშქარი.

„რაოდენნიმე იმერნიც“ შეიერთა და მიუხდა გეგუთთან მდგარ მოსისხლეს.

ისევ დამარცხდა დადიანი. ჯარის უდიდესი ნაწილი ბრძო-

ლაში დაკარგა. დანარჩენები ტყვედ დაირჩინეს რაჭველებმა და ლეჩხუმელებმა.

თვითონ ლევან დადიანიც — ეს მეორეჯერ — ჩავარდა ტყვედ.

ბაგრატ მეფე ხომ იმდროინდელი „მოდის“ — თვალების დათხრის მსხვერპლი იყო, მაგრამ მაინც არ აპყვა „მოდას“ სწორედ დადიანების ხელით თვალდაშრეტილი მეფე. თვალები არ დასთხარა „თვალდაუხუჭავ“ მტერს, მხოლოდ „აფუცა ერთგულებასა ზედა“ ლევან დადიანი და გაუშვა საღსალამათად. „ასე იყოს ჩემი დის ხათრითო, რაც არ უნდა იყოს, მაინც სიძე ხარ ჩემიო“, — ეს სიტყვაც გააყოლა გამარჯვებულმა დამარცხებულს. თანაც, არავინ იცის, გულწრფელი მოყვრობით სთქვა ეს ბაგრატმა, თუ მწარე დაციხვით — ავი რაყიფის გულმოსაკლავად.

მალე ახალი „პოლიტიკური მეტოქე“ და „ქალისთვის აღძრული რაყიფი“ გამოუჩნდა ბაგრატ მეფეს.

ეს იყო გიორგი გურიელი (1665—1684 წწ), რომელსაც ახლანდელ გურიის საძარცვევად შემოჭრილი აფხაზები გაუნადგურებია სასტიკად. გურიის მთავარს ორი რამ ერთდროულად ჰქონია გულში ღრმად ამოჭრილი: ბაგრატ მეფის ხელთაგან წართმევა იმერეთის სამეფო ტახტისა და უმშვენიერესი ცოლის, თამარ ქალისა.

დღე და ღამე მოსვენება დაკარგული ჰქონდა გიორგი გურიელს თამარზე ფიქრით, მისდამი სიყვარულით და „ტრფილებით“. ყოველნაირად ცდილობდა ბაგრატიანისგან მის „წაგვრასა და თვით შერთვასა“, მაგრამ ვერ იქნა და „ვერ ეწია“, ვერაფერს გახდა.

ბოლოს ისევ ასლან ფაშა ახალციხელს გაურიგდა გიორგი: დიდძალი ქრთამი მისცა ქრთამზე შეშლილ ფაშას, ბაგრატ მეფე ხონთქართან „ორგულობაზე“ დააბეზღებინა და ოსმალთა ჯარით იმერეთში გადმოიყვანა.

როსტომ ჩხეიძე მოიჭრა ქუთათისის სასახლეში და მეფეს აცნობა: ასლან ფაშა და გიორგი გურიელი მოეშურებიან ოსმალთა და გურიელთა ჯარებითო.

ბაგრატი მიხვდა, რაც სურდა გიორგი გურიელს. მაშინვე დედოფალი თამარი რაჭაში აფრინა და მიუვალ კვარა-ციხეში

ჩაკეტა, თვითონ სასწრაფოდ იმერთა ჯარი შემოიყარა და მტერს გაეკება.

ბრძოლა მოხდა ქუთათისის ახლოს.

იმერთა ჯარი დამარცხდა და უკუიქცა.

ხოლო, მიტოვებული ბაგრატ მეფე, „უთვალობითა ვერ-ლარა ივლტოდა“, გურულებმა შეიპყრეს და ოსმალთა ფაშას მიჰგვარეს.

ბაგრატმა მაშინვე ქრთამზე ჩამოუგდო სიტყვა ასლან ფაშას. „და აღუთქვა ქრთამი დიდი“, ღღონდ გამიშვი და ისევ დამაბრუნე იმერეთის ტახტზეო.

ასლან ფაშა ყოყმანობდა. გიორგი გურიელისაგან უკვე აღებული ჰქონდა „დიდი ქრთამი“, მაგრამ ბაგრატისგან აღთქმული „დიდი ქრთამის“ დაკარგვაც არ უნდოდა. არც გიორგის „მთავარი სურვილის“ აღსრულება ხერხდებოდა: საოცნებო თამარ ქალი კვარა-ციხეში ჩაკეტათ რაჰველებს, ვითომც — ნესტან-დარეჯანი ქაჯეთის ციხეში! არც ოსმალთა ფაშას და არც გურიის მთავარს ძალა არ შესწევდათ „რაჭული მასშტაბის“ ლაშქრობისა და მიუდგომელი კვარა-ციხის დაუფლებისა.

ფაშა რომ ყოყმანობდა, უცებ ბაგრატ მეფემ შეძლეულ ქრთამს ახალი „სართი“ დაუმატა — ჩემს შვილს ალექსანდრეს მძევლად გაგატნევ ახალციხეშიო.

(ალექსანდრე ბაგრატ მეფის ერთადერთი ძე იყო, ისიც „ნამალევად გაჩენილი“: ვინმე „ლენხუმელი კოჩილას“ ცოლთან იყოფდა თურმე სარეცელს ბაგრატი. ასე დაბადებულა ალექსანდრე, რომელიც მამამისს, რაკი სხვა ძე არ ჰყავდა, ტახტის მემკვიდრედ წამოუყვანია ქუთათისს).

ასლან ფაშამ ყოყმანი გაათავა და ბაგრატ მეფის პირობები მიიღო: ქრთამიც გამოართვა, ალექსანდრეც მძევლად აიყვანა, ბაგრატი ისევ იმერეთის მეფედ გამოუშვა და თვითონ თავისი ჯარით ახალციხეს გაბრუნდა.

გიორგი გურიელი დარჩა პირში ჩალაგამოვლებული.

იმ ზამთარს ბაგრატ მეფე ჩაუხტა ჯარით გურიას. გიორგი დამარცხდა და იმერეთის მეფემ „მოსტყვევნა და მოსწვა გურია და წარმოვიდა ალაფითა და იავართა“.

გერჯერობით ორი „პოლიტიკოსისა და რაყიფის“ ბრძოლა მეფის სასარგებლოდ ჩათავდა.

.

ქართლის სამეფო სახლელუსა და დადიანებს შორის ხომ კარგა ხნის მოყვრობა და ნათესაობა იყო გაჩაღებული. ლევან II დადიანის დაი, სახელგანთქმული მარიამ დედოფალი დიდხანს „ასაზრდოებდა“ ქართლელთა და მეგრელთა სიახლოვეს — ერთდროულად მოყვრულსაც და პოლიტიკურსაც.

მაგრამ ვახტანგ მეხუთე შაჰ-ნავაზმა, მარიამის იმეამინდელმა ქმარმა (ადრე — გერი და დედინაცვალი), მაინც მოინდომა დადიანების ოჯახთან მოყვრობის განახლება და „გადახალისება“.

არჩილ ვახტანგის ძეს და ქეთევან დათუნას ასულს, რომელთა ქორწინება, როგორც ზემოთ ითქვა, 1667 წელს მოხდა, ჰყავდათ ასული, სახელად დარეჯანი.

ხოლო ლევან III დადიანს ჰყავდა ძე, სახელად მანუჩარი.

დარეჯანი და მანუჩარი იმეამად იყვნენ შვიდი წლისა.

და ვახტანგ მეხუთემ შესთავაზა ლევან დადიანს: გამომიგზავნე ძე შენი მანუჩარი და შეერთავ მას ცოლად ჩემს შვილიშვილს, დარეჯან არჩილის ასულსო.

გახარებულმა დადიანმა მაშინვე გაგზავნა მანუჩარი ქართლში, მეგრელ წარჩინებულთა ამალით.

ქორწინება შედგა, მაგრამ უმაღვე ჩაიშალა.

ბაგრატ იმერთა მეფეს არ მოსწონებია ქართლისა და სამეგრელოს სიახლოვის განმტკიცება და ამნაირი ცბიერი „დასმენა“ დაუდევნებია სასიძოს ასაბისათვის: ვაი, თქვე უბედურნო, როგორ ჰლუპავთ ყმაწვილ ბატონიშვილს; განა არ იცით, რომ ვახტანგ მეფე მანუჩარს სპარსეთის შაჰთან მძევლად აგზავნისო?!

მანუჩარის მხლებლები დაფრთხნენ და, ყოველგვარი გამოძიება-გამოკითხვის გარეშე, „წარმოიპარეს ყრმა იგი და მოგვარეს მამასა თვისსა“ ოდიშში.

ეს ამბავი 1671 წელს მოხდა.

.

1674 წელს ბაგრატ მეფემ თავისი სატახტო ქალაქის ცი-

ხე აიღო და გამოყარა იქიდან მოდალატე სეხნია ჩხეიძის წყალობით შესახლებული თურქები.

მაშინვე ახალციხიდან მოვარდა ასლან ფაშას დესპანი და გამოუცხადა ბაგრატს: თუ შეაბრუნებ თურქთა ჯარს ქუთათისის ციხეში, შენს შვილს ალექსანდრეს ცოცხლად დაგიბრუნებთ, თუ არა და, რაც დაემართოს, შენს თავს დააბრალო.

წახდა და შეშინდა უსინათლო მეფე. თავადებმაც ბედთან შერიგება ურჩიეს და ისევ შეაბრუნა ქუთათისის ციხეში ოსმალთა ციხიონი. ასლან ფაშას მოციქულმა ბაგრატის ძე გამოუშვა და თვითონ ახალციხეს გაბრუნდა.

1676 წელს ბაგრატ მეფეს მისმა მშვენიერმა მეუღლემ — დედოფალმა თამარმა, აჩუქა ძე, რომელსაც უწოდეს გიორგი, „და განიხარა ფრიად მეფემან“.

გიორგი მათი მეორე შვილი იყო. ადრე თამარს ბაგრატისგან შესძენოდა ასული, სახელად დარეჯანი.

ბაგრატ მეოთხეს იმერეთის ტახტის წართმევას ცალ-ცალკე უპირებდნენ არჩილი და გიორგი გურიელი. ორივე ასლან ფაშას ეწვევნენ ახალციხეში. ორივემ ცალ-ცალკე შეაძლია ქრთამი შემწეობის თხოვნით. ასლან ფაშამ ორივეს ცალ-ცალკე გამოართვა ქრთამი, ორივეს ცალ-ცალკე აღუთქვა იმერეთის ტახტი, მაგრამ რაკი ტახტი მაინცადამაინც ერთი იყო, გიორგი გურიელი მოადორა, ხოლო არჩილს მართლა გაუბირდა დახმარებას ფულზე გაწუწუებული ფაშა.

პირში ჩალაგამოვლებული დაბრუნდა ახალციხიდან გურიელი.

ბაგრატ მეფეს ახლა შეეძლო „საერთო ენა“ გამოენახა მეტოქესთან, რომელიც ისე თავაწყვეტით მორღტვოდა ქუთათისის ტახტისა და მშვენიერი თამარის (ქონადამ წამომცდა — „მშვენიერი ელენეს“) დასაუფლებლად.

ბოლოს და ბოლოს, ბაგრატმა „იაზრა“ — იქნებ დარეჯანმა დამიხსნას ამ მოუშორებელი ჭირისაგანო, იქნებ ჩემი ქაღის წყალობით „დაუტეოს“ გიორგი გურიელმა „ტრფიალებაცა თამარისა და მცდელობა მეფობასა იმერეთისა“.

და შესთავაზა ბაგრატ მეფემ გიორგი გურიელს: ეგზომ

უსაზმნო მტრობასა და სისხლისთხევას სჯობია თავი დავანებოთ, შევრიგდეთ და კიდევაც დავმოყვრდეთო — ცოლად გაძლევ ჩემს ქალს, თამარისგან შობილს დარეჯანსო!

დაუჯდა ჰკუაში რაყიფს რაყიფისგან შეთავაზებული; დრომდე ასე აჯობებსო, იფიქრა გიორგი გურიელმა; დარეჯანიც ლამაზი ქალი უნდა ყოფილიყო, რადგან ბაგრატი ფრად სახიერი კაცი იყო და, რაც მთავარია, დარეჯანი „მშვენიერი თამარის“ ნაშობი იყო... ძლიერად ეღერდა — „თამარის ნაშობი“!

და 1677 წელს გიორგი გურიელმა ცოლად შეირთო დარეჯანი, ასული ბაგრატი იმერთა მეფისა (და, რაც მთავარია) — „ნაშობი თამარისაგან“.

• • • • •

სამეგრელოს მთავარი ლევან III დადიანი იმყამად ვეღარც იმერეთისთვის იცლიდა, ვეღარც გურიისთვის. აფხაზები ესხმოდნენ თავს ოდიშის მიწა-წყალს, ძარცვავდნენ, აოხრებდნენ, ადამიანებს იტაცებდნენ და თურქ ვაჭრებზე ჰყიდდნენ.

ლეჩხუმელი ძმები — ჩიქოვანები დაწინაურებულიყვნენ დადიანის კარზე. მათი მამა, „გორდელი მდაბალი აზნაური“, თურმე სვანეთში თავს ეზიდებოდა საკუთარი ზურგით, და ასე, მძიმე ნაოფლარ-ნაეაჭრით ინახავდა ოჯახს. მისმა უფროსმა ვაჟმა იმდენი „ფხა გამოიჩინა“, ჰყონდიდის ეპისკოპოსობა ჩაიგდო ხელში და „იქმნა მისანდო ლევან დადიანისა ყოველსა შინა“. მერე უფროსმა ძმამ უმცროსი გამოიბა წელზე და გაითრია. უმცროსი ძმაც — კაცია ჩიქოვანი, უკვე მთელს ლეჩხუმში ყოფილა ცნობილი, ვითარცა „კაცი მხნე და შემძლებელი საქმეთა“.

შეუჩნდა ჰყონდიდელი ლევან დადიანს: ჩემს ძმას, კაციას სალიპარტიანო მიეციო და, ვინაიდან მას ლეჩხუმელები ყველაფერს უსმენენ და უჯერებენ, სალიპარტიანოდან ლეჩხუმსაც შენ შემოგიმტკიცებსო.

დაიჯერა ლევან დადიანმა და მისცა მედროვე-ვიგინდარას სალიპარტიანო. სადაც მანამდე მხოლოდ ოდიშის მთავართა გვერდითი შტოის წარმომადგენელი ჯდებოდნენ გამგებლებად. ამის შემდგომ კაცია ჩიქოვანი ოდიშის მთავრის უახ-

ლოესი „მრჩეველი“ და „დამსმენელი“ შეიქნა. იგი — კაცი „უღვთო და მესისხლე აზრახებდა დადიანსა და მოსრვიდინან წარჩინებულთა ოდიშისათა“.

დიდი „სასისხლო საზრუნავი“ გაუჩინა კაცია ჩიქოვანმა სამეგრელოს მთავარს, მაგრამ მაინც „მშვენიერი თამარისა“ და „მშვენიერი იმერეთის“ ჯავრი ახრჩობდა ლევან დადიანს.

მაშ, ასლან ფაშა შეჰპირდა არჩილს: ისევე ჩაგაგდებინებ ხელში იმერეთის ტახტსო. ჯერ ხონთქარს შეატყობინა არჩილის განაზრახი ასლანმა, რადგან ეგონა ხონთქარი მოუწონებდა არჩილის „გულის მოგებას“. მაგრამ ოსმალეთის მბრძანებელმა, იმერეთს გამეფება კი არა, არჩილის შეპყრობა უბრძანა ახალციხის ფაშას. ასლანმა არჩილი ჯერ ვითომ პატიმრად დასვა, მერე ერთგულმა მესხებმა არჩილი ისე გააქციეს, ვითომც ფაშას არაფერიც არ გაეგოს.

ქრთამი ქრთამად დაკარგა არჩილმა, მაგრამ ესეც მიღწევა იქნებოდა, თუ იმერეთის ტახტისთვის ბრძოლაში ახალციხის ფაშა საერთოდ არ ჩაერეოდა.

ახლა იმერელთა და მეგრელთა იმედი უნდა ჰქონოდა „სასურველი იმერეთის“ ტახტზე ეგზომ ჩაციებულ არჩილს.

1678 წლის სექტემბერში მეორედ შემოვიდა იმერეთში არჩილი ვახტანგის ძე. შემოვიდა და „მაშინვე მიერთნენ ყოველნი იმერნი და დადიანი ლევან“.

ბაგრატ IV-მ „მშვენიერი თამარი“ ამჯერად სკანდის ციხეში ჩაკეტა და თვითონ გურიაში გაიქცა, „საყვარელ სიძესთან“ — გიორგი გურიელთან.

იმერლებმა და მეგრელებმა არჩილი ზეიმით შეიყვანეს ქუთათისის სატახტოში.

ეს არჩილის „მეორე მეფობა“ იყო იმერეთს, 1678—1679 წწ.

არჩილმა ლევან დადიანს აღუსრულა მისი „უმადლესი სურვილი“: სკანდის ციხიდან გამოიყვანა „მშვენიერი თამარი“ და დაუბრუნა ცოლად „თავდაპირველ ქმარს“ (ეს თამარის მესამე ქორწინება იყო).

სამაგიეროდ არჩილმა წამოიყვანა ლევან დადიანის ვაჟი მანუჩარი, მისი „ადრინდელი სასიძო“, დააქორწინა თავის

ქალზე — დარეჯანზე და ორივე — სიძე და ქალიშვილი დაიტოვა თავისთან, ქუთათისში.

უბედურება არ ივიწყებდა უსინათლო ბაგრატ მეფეს. უეცრად მოუკვდა ძე, გიორგი, ნაშობი „მშვენიერი თამარი-საგან“. მერე ესეც შეატყობინეს: მეორე ძე, ალექსანდრე, რომელიც ისევ ახალციხის ფაშას კარზე ყოფილა, ქართლის მეფე გიორგი XI-ს მოუტაცნია.

ძლივს დასწიწქნა ხელიდან სასოწარკვეთას გიორგი გურიელმა ბაგრატ მეფე. ასლან ფაშას კვლავ დიდძალი ქრთამი მიართვეს და „შეევედრნენ“: შემწეობა აღმოგვიჩინე არჩილის გასაძევებლად, იმერეთის ტახტზე ბაგრატის აღსადგენად და ალექსანდრე უფლისწულის გადასარჩენადო.

ასლან ფაშამ ხონთქარს შეუთვალა ყოველივე. განრისხდა ხონთქარი — როგორ თუ არ იშლიან სპარსეთის ქვეშევრდომი ქართლები „ჩემი იმერეთის“ საქმეებში ხელის ფათურსო! და მაშინვე არზრუმის ფაშა გამოგზავნა იმერეთში დიდის მხედრობით.

მიეგებნენ ბაგრატ მეფე და გიორგი გურიელი ფერსათზე გადმოსულ თურქთა ლაშქარს.

არჩილ მეფემაც „შემოიკრიბნა სრულიად იმერნი, შეიფიცნა და ლამოდა ბრძოლასა“.

1679 წლის აგვისტოს შეხვდნენ ერთმანეთს მოწინააღმდეგენი.

მაგრამ ბრძოლა არ მომხდარა, რადგან იარაღის დაძვრამდე იმერთა ჯარმა არჩილი მიატოვა და ბაგრატს ეახლა.

მარტო დარჩენილმა არჩილმა ცხენი შემოაბრუნა და რაჭისკენ გაქუსლა. „მიჰყვნენ ოსმალნი არჩილს“. რაჭველებიც დაუხვდნენ მტერს. ხრეითის მთაზე ატყდა „ცემა თოფთა“, ბრძოლაში დაიღუპა საზვერელი ჩიჯავაძე. სამაგიეროდ რაჭველებმა ჩაელიტეს მრავალი ოსმალთა მეომარი.

მაგრამ სიმრავლემ მაინც თავისი გაიტანა. „სიმრავლითა სძლეს ოსმალთა, გარდვიდნენ რაჭას, მოსწვენეს და მოსტყვევნეს“.

ასე დაარბიეს თურქებმა რაჭა, რომელიც „მისდღეში არვისგან დარბეულიყო“.

ერთხანს კვაცხუთში დადგა არზრუმის ფაშა.

აქ არჩილის წერილი მოუვიდა: რაც მოხდა, სულ ასლან ფაშასგან მოხდაო; დიდძალი საგანძური გამომართვა, ხონთქარს უნდა გავუგზავნო, იმერეთი შენთვის გვიბოძებიაო, და „აწ რაი არს შეცოდება ჩემი?!“ — იწერებოდა რაჭიდან დვალეთს გადასული არჩილი.

არზრუმის ფაშამ მაშინვე ხონთქარს მისწერა ყოველივე. რისხვით ატანილმა ხონთქარმა ასლან ფაშას თავის დაგდებინება ბრძანა.

კვაცხუთს გამოიძახა არზრუმელმა ფაშამ ახალციხელი ფაშა. თავი მოჰკვეთა და ხონთქარს გაუგზავნა სტამბოლს.

მამის თავს სტამბოლში გაჰყვა შვილი — უსუფ ჯაყელი, რომელმაც ფადიშაჰს სწორედ მამისგან ნაგროვები საგანძურები ჩაუტანა და სამაგიეროდ ახალციხის ფაშობა „გაირტყა“.

ასე დაიწყო „მოღვაწეობა“ უსუფ ფაშასი, ისეთივე ანტიქართულობით, როგორც მისი ახლო წინაპრები — „გათათრებულნი ქართველნი“.

ხოლო არჩილს გამოდევნებული თურქები რაჭიდან მობრუნდნენ. ერთხანს კვახჭირს დადგნენ. აქედან არზრუმის ფაშამ „მოსტყვევნა და მოსრნა ურჩნი იმერნი“, ბაგრატ IV ისევ დასვა ქუთათისის ტახტზე და ამის შემდეგ გაბრუნდა საქართველოდან.

ეს ბაგრატ IV-ის მეოთხე გამეფება იყო.

ახალი გამეფებისთანავე ბაგრატმა „მოიმტკიცა იმერნი, შემოიკრიბნა და წარვიდა ოდიშს“. ლევან დადიანიც შემოეგება ჯარით.

სასტიკი ბრძოლა.

გაიმარჯვა ბაგრატ მეფემ.

მაშინვე წაართვა დადიანს ცოლი — „მშვენიერი თამარი“, დაიბრუნა თავისივე ცოლად „და მოვიდა ქუთათისს გამარჯვებული“.

ეს „მშვენიერი თამარის“ მეოთხე ქორწინება იყო.

(დიდებულად კი გამოვიდა: ბაგრატი — მეოთხედ გამეფებული, თამარი — მეოთხედ გათხოვილი!).

.

მიდიოდა არჩილი მძიმე ფიქრებით დატვირთული და დარეგვილი.

ჩრდილოეთისკენ მიდიოდა.

რამეთუ მას და მის სამშობლოს ყოველი სხვა გზა დასშობოდა სამარადისოდ (სამარადისოდ?) — აღმოსავლეთიც, დასავლეთიც და სამხრეთიც.

მხოლოდ ჩრდილოეთი დარჩენილიყო საქართველოს „დახსნის უნარით“ — რუსეთი, დიდი თეთრი ქვეყანა, „თეთრი ქრისტიანებით“ დასახლებული სამყარო.

მაინც უცხო ქვეყანაში მიდიოდა არჩილი.

მაგრამ რაღა მაინცადამაინც არჩილს უნდა აშინებდეს „უცხო“, „უცხოური“ და „უცხოეთი“?

აკი ყოველი ქართველისთვის „უცხო“ უეჭველად „კარგს“ ნიშნავს, „უცხოური“ — „უკეთესს“, „საუცხოო“, — „საუკეთესოს“, „უცხოეთი“ — „უკეთესთა ქუეყანას“?

ისედაც — უცხოეთში უფრო ძლიერად გამოსჩანან ხოლმე ქართველობა, ვიდრე საქართველოში!

ხოლო — რუსებმა ძალიან „შეყვარება“ და „გაშინაურება“ იციან თურმე ქართველებისა...

თავდავიწყებით მიელტვოდა მეფე-პოეტი ჩრდილოეთისკენ.

.

ლევან დადიანი ახალი შურისგებისთვის ემზადებოდა. იგი „ეზრახა“ გიორგი გურიელს და მძევლად თავისი ვაჟი, მანუჩარი მისცა, გურია-სამეგრელოს „მუდმივი ზავის“ პირობად.

დღეს-ხვალ, ალბათ, კიდევაც უნდა გამოსულიყო დადიანი ბაგრატ მეფესთან საომრად, მაგრამ სამეგრელოს მთავარი მოულოდნელად გარდაიცვალა (1680 წ.).

ლევან დადიანი რომ მიწას მიაბარეს, სამეგრელოს მესვეურებმა გიორგი გურიელს მასთან მძევლად მყოფი მანუჩარ ლევანის ძე გამოსთხოვეს „საყოფლად დადიანად“.

გიორგი გურიელმა პირდაპირ გამოუცხადა ოდიშარებს: მე ამიყვანეთ დადიანის ტახტზეო.

მთელმა სამეგრელომ იარაღი აისხა გურიელის ესოდენ კადნიერი სურვილის გამყლავნების გამო. ციხესიმაგრეებში ჩასაფრდნენ, გზები შეკრეს და გურიელს შეუთვალეს: „ვიდ-

რემდის მანუჩარ ბატონიშვილი ცოცხალია, ოდიშს და მის ციხეებს არავის დავანებებთო!“

გიორგი გურიელმა ოდიშართა ამნაირი განცხადება „თავისებურად გაიგო“: რაკი ჩემს დადიანობას მანუჩარის სიცოცხლე აბრკოლებსო... და მოჰკლა მანუჩარ ლევანის ძე, მოჰკლა და წავიდა გურულთა ჯარით ოდიშის ტახტის დასაპყვრად. მაგრამ მეგრელებმა უკუაქციეს იგი, დამარცხებული და სისხლდადენილი.

1681 წელს გარდაიცვალა იმერეთის მეფე ბაგრატ IV.

გელათს დაკრძალეს კიდეც ერთი „მიკრო-მონარქი“, რომელსაც დაბადებიდან სამარის კარამდე ჰაპანწყვეტით მიეთრია თავისი ქონდრისკაცური წუთისოფელი.

უცნაური რამ არის გულგრილობა არსთა მშობელი და მასაზრდოებელი „დედა-მიწისა“. იგი ხომ ერთნაირი „განუსხვავებლობით“ ღებულობს. ათბობს და ამიწებს ყველას — „დიდსა“ და „მცირეს“.

გულგრილი იყო „გელათის დედა-მიწაც“, რამეთუ აქაური მიწის წიალში ერთმანეთის გვერდით (იქნებ ერთმანეთშიც არეულნი?!), ერთმანეთისგან განუსხვავებლად ეყარა ძვლები იმერელ მეფეუკა გვირგვინოსნებისა ბუმბერაზი დავით აღმაშენებლისა და ღვთაებრივი თამარ შვიდმნათობიერისა!

რა გაეწყობა! ნებიტა და ბუნებიტა „დედა-მიწისათა“ არც ძვლები წითლდებიან სირცხვილისაგან.

უმეფოდ დარჩენილმა იმერეთის მესვეურებმა ქუთათისის ტახტზე მოიწვიეს ეს გიორგი გურიელი.

აღესრულა გურიის მთავრის ნიადაგეული ნაოცნებარი. იგი ახლა იმერეთის მეფე იყო. ხოლო მეფეს აქვს „ყველაფრის უფლება“ — ნივთიერიც, ზნეობრივიც, სულიერიც, სჯულიერიც, თუნდაც — ის, რაიც ჩვეულებრივი ადამიანებისათვის „უზნეოა“, მეფისთვის (თუკი იგი ამ „საყოველთაო უზნეოს“ აიჩემებს) — უცებ „ზნეობრივი“ გახდება, მორჩა და გათავდა!

ასე, — სავსებით „ზნეობრივი“ ყოფილა გიორგი გურიელისათვის ის, რომ მან ცოლად შეირთო ბაგრატ IV-ის ქვრი-

ვი — „მშვენიერი თამარი“. (ეს ამ ქალის მეხუთე ქორწინება იყო). არ დაგვავიწყდეს, რომ თამარი გიორგი გურიელის სიდედრი გახლდათ; აქი ბაგრატიისა და თამარის ასული — დარეჯანი ცოლად ჰყავს გურიელს!

ჰოდა, გიორგი გურიელმა ცოლად შეირთო სიდედრი, ანუ — გაუშვა კანონიერი ცოლი და მის ნაცვლად შეირთო დედამისი! (ძალიან დიდი მანძილი აღარც კი დარჩენილა ყბადღებული „ოიდიპოსის კომპლექსამდე“).

რუსეთის ცის ძველ

რაჭიდან წასულმა არჩილმა ცოლ-შვილი დვალეთს „დასადგურნა“, თვითონ ჩხერის ციხეს მივიდა და იქიდან კიდევ რვა თვე ამაოდ „ეზრახებოდა“ იმერეთის მესვეურებს ბაგრატი მეფის ჩამოსაგდებად და ქუთათისის ტახტის დასაბრუნებლად.

კიდევ ერთი წელიწადი არჩილმა ფაიქომს გაატარა და აქვე, „ვითაც მოწყენილმა კაცმა“, დაწერა ექვსას სამოცდაშვიდი სტროფი თავისი პოემისა — „გაბაასება თეიმურაზისა და რუსთველისა“.

1682 წელს იგი რუსეთს გაემგზავრა „დედა-წულითა თვისითა“ — ცოლი ქეთევანი, შვილები — ჩვიდმეტი წლის დარეჯანი, რვა წლის ალექსანდრე, ექვსი წლის მამუკა (მათე) და ერთი წლის დავითი.

გაიარეს თერგი და გავიდნენ „აშტრახანს“. აქ მათ თევდორე რუსთა მეფის სიკვდილი შეატყობინეს და სამი წელიწადი აყურყუტეს „აშტრახანს“.

აქვე, 1683 წლის საახალწლო დღესასწაულზე არჩილისა და მისი სახლეულის სადგომს ხანძარი გაუჩნდა. ხის სახლი მთლიანად დაიწვა. ყველაფერი დაეღუპათ, ოღონდ ცოცხლები დარჩნენ თვითონ და „სასწაულებრივად“ გადარჩა ნივთები, რომელთაც „ქრისტეს წმიდა ნაწილებს“ ეძახდნენ („სამსკვალნი, სუდარა, საბელი“).

„ასტრახანს“ არჩილმა დაწერა კიდევ ოთხას ოცი სტროფი და ამით დაასრულა „გაბაასება თეიმურაზისა და რუსთველისა“.

ამასობაში არჩილის ელჩი — თავადი დიმიტრი ქვარციანი ამაოდ „აწუხებდა“ რუსეთის სამეფოს კარს — მიეცათ მოსკოვს გამგზავრების უფლება „მუსულმანთაგან შეეწროებული ივერიელი მეფისთვის“.

რუსეთის მაშინდელი სასახლის კარი, სადაც იმჟამად ყმაწვილი ძმანი — პეტრე და ივანე მბრძანებლობდნენ, არჩილს მხოლოდ თერგში ცხოვრების უფლებას „სთავაზობდა“.

ამის თაობაზე მოსკოვიდან ასტრახანს საგანგებოდ გამოემგზავრნენ თედორე ვოლკონსკი და ვასილ მიხაილოვი. ჩამოვიდნენ და არჩილს მიართვეს სიგელი რუსეთის ქვეშევრდომობაში მისი მიღებისა და უკაზი თერგში, საგანგებოდ „მოწყობილ სასახლეში“, „ვაუჭირვებლად“ ცხოვრებისა.

არჩილი მიხვდა, რატომ გაურბოდა რუსეთის სამეფო კარი მოსკოვში მის „დაშვებას“. რუსეთის ხელისუფლება „ივერიის ტახტის მეუფებას“, არჩილსა და გიორგიზე მეტად, ისევ უფლისწულ ნიკოლოზს (ერეკლეს) ანიჭებდა.

მაშინ არჩილმა მოსკოვში ჩასვლის „პირველ ნაბიჯად“ თავისი ვაჟიშვილების გაგზავნა გადაწყვიტა და რუსეთის მეფეებს წერილი გაუგზავნა:

„...დიდო ხელმწიფენო, მოგეხსენებათ, მე დიდსა და კურთხულს თქვენს ძმას — ხელმწიფე ალექსის შვილს ამისთვის დავეუკარ თავი, რომ მის წინაშე თავის დაკვრა მღირსებოდა და დიდმა ხელმწიფემა თედორე ალექსის შვილმაც მაგისი წყალობა მიყო და ეს ეწერა წიგნსა და ბრძანებასა მისსა: „შენ შენი თქმული გაათავე და წამოდიო და ჩემის დიდი ხელმწიფობისაგან დიდი წყალობის იმედი გქონდესო“. მე ჩემი მოხსენება გავათავე და დიდის ხელმწიფის მეფის თედორე ალექსის შვილის ბრძანება და წამოველ და იქნა ბრძანება მლთის და ამ საწუთროს სოფლისაგან საუკუნეს და წარუღოს ცხოვრებას მიიცვალა, აწ, თქვენ სხედხართ მას ტახტზე, დიდნო ხელმწიფენო, მეფენო ივანე ალექსის შვილო და პეტრე ალექსის შვილო, ყოველის დიდისა და ცოტას, თეთ-

რის რუსეთის მჭირავენლნო და თქვენც დიდს მეფობასა და ხელმწიფობასაც ამას ვეხვეწებით, დაგიკრავ თავსა, რომ თქვენს წინ თავის დაკვრა მაღირსოთ.

თუ არა და, ჩემს თქვენ ტახტს წინ მოსვლას არ ბრძანებთ, სამი პატარა შვილი მაპირჩენია, თქვენის ძალით, ურჯულოთ ხელთაგან და მლთის გულისათვის დაიმდაბლეთ მაღალი თავი და წმიდასა ღვთისმშობელსა დაამადლეთ, ამ ჩემს შვილებს თქვენ საფარველ ქვეშ მისვლა აღირსეთ, რომ ამითი ურჯულოთ ხელთ ჩაცვივნის ეჭვიდამ გამოვიდე...“.

1684 წლის იანვარში მოსკოვიდან ასტრახანს პასუხი მოვიდა. სამეფო სიგელში შეწყნარებული იყო არჩილის თხოვნა: მოსკოვს უნდა გამგზავრებულიყო მისი ორი ვაჟი — ათი წლის ალექსანდრე და რვა წლის მათე (მამუკა), ხოლო დავითი მცირეწლოვანების გამო დედ-მამასთან უნდა დარჩენილიყო.

არჩილმა თავისი ამალიდან სამოცდაცხრა კაცი გამოჰყო და აახლა მოსკოვს მიმავალ შვილებს.

იალქნიანი გემი გამართეს, სურსათ-სანოვაგით დატვირთეს და, თედორე ვოლკონსკის მეთაურობით, 1684 წლის 28 აპრილს ჩრდილოეთისკენ შეუყვანენ ვოლგას.

4 ივნისს, სიმბირსკში მეფეთა პირადი კარეტა შემოაგებეს ქართველ მეფეწულთ. აგვისტოში უკვე მოსკოვში იყვნენ.

ბასმანის სლაბოდაზე, რუსეთის ხელმწიფეთა საგანგებო ბრძანებით, ქართველებს დიდი საზეიმო შეხვედრა მოუწყვეს. მერე პოკროვკაზე „დავიდოვის სასახლეში“ დააბინავეს. ქართველ უფლისწულებზე ზრუნვასა და მეურვეობის მეთაურობა დაეკისრა „მეფის დიდი ბეჭდის და დიდ სახელმწიფო საქმეთა მცველს, ნოვგოროდის მთავარს ვასილ ვასილის ძე გოლიცინს“.

არჩილი შვილების საშუალებით უფრო საიმედოდ „ჩაეჭიდა“ დიდი საქრისტიანო ქვეყნის სამეუფო კარს. იგი ზედმიზეზად აგზავნიდა ერთგულ თანამგზავრებს მოსკოვში, წერალებს უგზავნიდა შვილებს, მათ მზრუნველ გოლიცინს და თვითონ ხელმწიფეებს. ასე რომ, ასტრახანში არჩილი ყო-

ველთვის დაწვრილებით ტყობილობდა რუსეთის სატახტოში მომხდარ ამბებს.

მან იცოდა, როგორ შეხვედრიან მის შვილებს რუსეთის ხელმწიფენი. გამორჩევით, პეტრეს მოსწონებია არჩილის უფროსი ძე — ალექსანდრე: ახოვანი, წყობილნაკუთოვანი, ჭკვიანი, არწივული გამოხედვით, ენერგიული ლოყა-ნიკაპით; მუქი წაბლისფერი გრძელი თმებით და ფიცხელი ხასიათით. ძმასავით ახლობელ და განუყოფელ მეგობრად აუყვანია პეტრეს ალექსანდრე. განუტევებლად თან დაჰყავს თურმე პრეობრაჟენსკოეში და ახლა მასთან ერთად მართავს საომარ წრეთნასა და თამაშ-გარჯიშობებს. უერთმანეთოდ წყალს არ გადააქცევენ თურმე რუსი და ქართველი ძმანი.

არჩილმა ისიც შეიტყო, რომ მოსკოვში „რაღაც ისეთიც“ მოხდა, რამაც რუსეთის უმაღლესი ხელისუფლება მოულოდნელად ყმაწვილ ხელმწიფეთა უფროს დას — სოფიოს არგუნა. არავინ იცოდა, რამდენად მდგრადი იქნებოდა „სოფიოს მმართველობა“, მაგრამ არჩილს ესეც სცოდნია, რომ მისი შვილების მეურვე ვასილ ვასილის ძე გოლიცინი სწორედ სოფიოს „საყვარელი თავადი“ ყოფილა. დრო დაიცა არჩილმა და ისევ გაუგზავნა წერილი გოლიცინს, ერთგულ კაცთა — ბეჟან „შიოს შვილისა“ და ნოდარ „იასეს შვილის“ ხელით.

არჩილი ახლა, „გოლიცინის გზით“, დედოფალ სოფიოს სთხოვდა მოსკოვში წვევის ნებართვას.

თანხმობა მართლაც მოვიდა.

1685 წლის 14 დეკემბერს არჩილ მეფე, დედოფალი ელენე და მათი შვილები — დარეჯანი და დავითი უკვე მოსკოვში იყვნენ.

ისევ გამორჩეული პატივით მიიღეს რუსებმა ქართველები.

სამი წელიწადი იცხოვრა, იშრომა და იბრძოლა არჩილმა მოსკოვში.

ბედნიერი იყო (თუ შეიძლება ბედნიერი ერქვას სამშობლოდან გადაკარგულ კაცს), რამეთუ იყო რუსთაგან დიდი ყურადღების ქვეშ. ცხოვრობდა საკუთარ ოჯახურ ბუდეში (თუმცა მისი მშობლიური მიწა-საყრდენიდან „გადაბუდებულ-

ში“), ჰქონდა დაუმაღლებელი ლუკმა (თუმცა მაინც სხვისა ხელით „მოშავებული“).

რუსული ენა მალე შეითვისა. კითხულობდა ყველაფერს, რასაც ხელი მოუხვდებოდა, თარგმნიდა ყველაფერს, რისი თარგმნაც მისი აზრით ქართველ მკითხველს „შეერგებოდა“. გატაცებით წერდა ლექსებს, პოემებს, შეგონებებს — ყველაფერს, რასაც მერე „არჩილიანი“ უნდა დარქმეოდა.

ნიკოლსკის ქუჩაზე დადიოდა ხშირად, სტამბას ეწვეოდა, უკირკიტებდა, ოსტატებს ესაუბრებოდა, სწავლობდა, ყველაფერს ითვისებდა და ითავისებდა, რაიც მესტამბეობასა და წიგნის ბეჭდურ ხორცსმას ესაჭიროებოდა. ოცნებობდა იმ ბედნიერ დღეზე, როცა საქართველოშიც ახმაურდებოდა სასტამბო დაზგები და ლიტერები, როცა მისი თანამემამულენი თრთოლვით აიღებდნენ ხელში ქართული ასო-ნიშნებით თვალახელილ „ვეფხისტყაოსანს“, „დაბადებას“, „სახარებას“ და იქნებ... „არჩილიანსაც“.

შეიტყო, რომ ჰოლანდიაში, ამსტერდამში — მსოფლიო სასტამბო ხელოვნების შუაგულში — ცხოვრობდა და მოღვაწეობდა კ ი შ ტ ო ტ ფ ა ლ უ შ ი, მთელს ქვეყანაზე უპირველესი მესტამბე, ასოთმოქანდაკე, შრიფტის ჩამომსხმელი. ფიქრით და ოცნებით ტანში იჭმებოდა არჩილი — როგორ დაკავშირებოდა ტოტფალუსს და შეეკვეთა მისთვის ქართული შრიფტი.

იმჟამად მოსკოვში შვედი მეცნიერი — შ პ ა რ ვ ე ნ ფ ე ლ დ ი გამოჩნდა. არჩილი შეხვდა მას, მოხიბლა, დაიახლოვა, დაასაჩუქრა და მოციქულობა სთხოვა ტოტფალუსთან. შვედმა სიამოვნებით იკისრა ქართველი მეფისა და მწერლის შუამავლობა. თვითონ წერდა შემდგომ შპარვენფელდი:

„ჩემს დროს ბაგრატიონთა გვარეულობა მეფობდა იმერეთში, გურჯისტანის ნაწილში, და არჩილ მეფეს, რომელიც გამოძევებული იყო და იდევნებოდა ოსმალთაგანაც და სპარსელთაგანაც, ვიცნობდი მე მოსკოვში. წასვლისას მან მაჩუქა ხალათი... და მისი თხოვნით მე შევუკვეთე ქართული სასტამბო შრიფტი ამსტერდამში კ ი შ ტ ო ტ ფ ა ლ უ შ ს“.

ამ შუამდგომლობის შემდგომ არჩილმა ამსტერდამს გაგზავნა ქართული ანბანის ნიმუშები ხელნაწერად. ამასთან არ-

ჩილმა წერილი მისწერა ამსტერდამის ქალაქის თავს — ნიკოლოზ ვიტცენს, რომელიც ქართველი მეფის საპატიოდ „ძალიან გაისარჯა“.

ტოტფალუშმა ჩამოასხა ქართული ასო-ნიშნები და გამოგზავნა მოსკოვს. არჩილმა და მოსკოველმა „კოლონისტმა ქართველებმა“ შრიფტი დაიწუნეს. ტოტფალუშმა ბოდიში იხადა, — ასეთი „უცხო ანბანი“ კი არა, ხელნაწერიდან „უბრალო ლათინურის“ უნაკლოდ ჩამოსხმაც არ მოხერხდებო. ამიტომ ჩემი ნამუშევარი „ჩაასწორეთ“, გამომიგზავნეთ და გეცდები უფრო ზუსტად ჩამოვასხაო.

მოსკოველმა ქართველებმა შრიფტი „გაასწორეს“ და გაგზავნეს. მეორედ ჩამოასხა ტოტფალუშმა ქართული ანბანი. ამჯერად ყოველი ასო-ნიშანი „სრულიად უშეცდომოდ“ იყო შესრულებული.

მაგრამ ქართულმა სასტამბო ანბანმა, მიზეზთა სხვათა და სხვათა (მოგვიანებით ვისაუბრებთ ამ მიზეზებზე), მოსკოვისა და საქართველოს მაგივრად, თავი ამოჰყო შვეიციაში.

• • • • •

უხაროდა არჩილს, რომ მისი შვილები უგანათლებულესა მეურვის ხელში მოხვდნენ. ვასილ გოლიცინის ბრწყინვალე სასახლე ოხოტნი რიადზე მალალი გემოვნებითა და სინატიფით გაწყობილი, ევროპული ავეჯი, ხელოვნების ძეგლები, ფერწერული ნამუშევრები, საწიგნობელნი — რუსული, ბერძნული, ლათინური, პოლანდიური და გერმანული წიგნებით, გეოგრაფიული რუკებით; სწავლულთა, მწერალთა, ხელოვანთა და პოლიტიკოსთა შეხვედრები; საუბრები მეცნიერებაზე, მწერლობაზე, ხელოვნებაზე...

უხაროდა, რომ მისი ძე ალექსანდრე ისე დაეახლოვებინა და დაუქმობილებია მეფე პეტრეს. არჩილმაც იცოდა, რომ პეტრე იმ ორი პოლკის — პრეობრაჟენსკისა და სემიონოვის პოლკთა საომარი წრთვით იყო გართული და ჭაბუკი მეფის „მარჯვენა ხელად“ იქცა მისი საყვარელი „იმერეტინსკი პრინც ალექსანდრ არჩილოვიჩი“ ჰყავდა.

საოცარი მხოლოდ ის იყო, რომ არჩილი და მისი ჯალაბი ერთნაირი, „თანაბარი საყვარულით“ იყვნენ მიღებულნი რუსეთის სახელმწიფოს ორივე მმართველ წრეში — დანასისხ-

ლად გადამტერებულ მილოსლავსკებისა და წარიშვინების¹ ოჯახებში.

არჩილმა იცოდა, რომ რუსეთის სამეფო კარისგან საქართველოსთვის დახმარების აღმოჩენის საქმეში დიდი გავლენის მოხდენა შეეძლო რუსული ეკლესიის საკეთმბურობელს — პატრიარქ იოაკიმს. ამიტომ არჩილმა ამისდა კვალად შემოუთვალა საქართველოს კათალიკოსს — ნიკოლოზს — გაემართა მიმოწერა იოაკიმთან.

მართლაც, 1687 წლის 15 ივლისს საქართველოდან მოსკოვს ჩამოვიდა არქიმანდრიტი ლავრენტი, რომელმაც არჩილს აახლა ნიკოლოზ კათალიკოსის წერილი პატრიარქ იოაკიმისადმი.

ქართველი მღვდელმთავარი რუს მღვდელმთავარს სწერდა:

„დიდო მღვდელ-მთავარო იოაკიმ!

ჩვენი ქვეყანა და ჩვენი ქრისტიანენი და საყდარნი და მონასტერნი დიად ძალდამართებული შეიქმნა უსჯულოთა აგარიანთა ხელისაგან და მრავალი უწესური და ავი საქმე მოინდომეს საქნელად. ამდონი ავი საქმე ჩვენის რჯულისა ვერ დაითმინა და ამათ უსჯულოს ბრძანებას დაემონა და მომართა დიდს მეფესა, დიდს კნიაზსა თედორე ალექსის შვილსა და მისის დიდის იმედითა და ზურგით წამოვიდა ბატონი მეფე არჩილ, ვახტანგის შვილი, იმერეთისა და კახეთისა.

აწე მოვიდა და მობრძანდა თქვენგან კურთხეულისა და თქვენის მადლით კეთილად დამწყსულს, თქვენის მადლთ ხელმწიფეთ ტახტსა და საბატონოზე და რომელიც თქვენს პატიოსნებასა და ღირსებასა ეკადრების პატივით შეწყნარება და ნუგეშინის ცემა გიქნიათ. მაგაზე ჯერ ღმერთი დაგიმადლებსთ, რომე უსჯულოთაგან ძალდამართებული ხელმწიფე არის იმერეთისა და კახეთისა. მართლმადიდებელი მეფე ბატონი არჩილ, ვახტანგის შვილი, შემწე ეყავ, ვითარცა ეყო უფალი იაკობს უცხოებასა შინა, შემწე ეყავ, ვითარცა დამბადებელი დავითს გოლიათზედა.

სოლომონ ბრძანებს, ბრძენთან ერთი სიტყვა კმა არსო აწე, ჩვენ მრავალ სიტყვით ამას გვევდრებით და გებვეწებით,

რომელიც სჯობდეს და ქრისტიანობას მოუხდებოდეს, იმის-
თანა მამულიშვილური საქმე მოუხდინეთ რომ, ეს ჩვენი ქვე-
ყანა და ქრისტიანობა, მონასტერი და საყდარი, ხატი, ჯვარი
უსჯულოთ აგარიანთაგან დასატაცები და წასახდენი არ შეიქ-
ნას...“.

ეს წერილი არჩილმა და ლავრენტიმ ერთად განიხილეს,
ყველაფერი აწონ-დაწონეს და ბოლოს ლავრენტი ეახლა კი-
დეც პატრიარქ იოაკიმს მისი მეუფის წერილით ხელში.

იოაკიმმა გულდასმით მოისმინა წერილიც და თვითონ
ლავრენტის პირადად მონახსენები. საკითხი ახლაც ისე იდგა:
ვის უნდა მინიჭებოდა რუსეთის მესვეურთა თვალში უპი-
რატესობა — ნიკოლოზ (ერეკლე) ბატონიშვილს, თუ არჩილ-
სა და გიორგის. ლავრენტიმ ფრთხილად „გადაჰკრა“: ნიკო-
ლოზ ბატონიშვილმა სპარსეთში მუსლიმანობა უკვე მიიღო
და თათრული სახელი — „ნაზარ-ალი-ხანი“ დაირქვაო. იო-
აკიმმა მაშინვე ჩაუჭრა: ეგ დიახაც დიდი ცოდვია, მაგრამ არ-
ჩილ მეფემაც ხომ მიიღო სპარსეთში „ურჯულო სახელი“ —
„შაჰ-ნაზარ-ხანიო“.

მაშ, არც ისე „უვიცი“ ყოფილა რუსეთის მღვდელმთავა-
რი „საქართველოს საქმეებში“ და არც ისე იოლი ყოფილა
მისი მოტყუება!

მაგრამ ბოლოს მაინც არჩილისა და მისი ძმის სასარგებ-
ლოდ გადასწონა სასწორი იოაკიმმა: რაკი ნიკოლოზ ბატო-
ნიშვილი ისე გაათათრდა, რომ არავითარი გულისტკივილი
ქრისტიანობისადმი არ გამოუჩენია, ხოლო არჩილი და გი-
ორგი მუდამ ქრისტეს სჯულის განმტკიცებისათვის იბრძვი-
ან, ამიტომ ჩვენიც ხელი უნდა შეგუფყოთ, რამეთუ სწორედ
ესენი დაემკვიდრონ საქართველოს მეფეებადო.

.

1687 წლის ნოემბერში არჩილ მეფემ თავის ძეს — ალექ-
სანდრეს ცოლად შერთო თ ე ო დ ო ს ი ა ივანეს ასული მი-
ლოსლავსკაია, დედოფალი სოფიოს ახლო ნათესავი. ეს ქა-
ლი ქართველი უფლისწულის საცოლედ შეარჩია თვითონ
დედოფალმა სოფიომ და მისმა „წრემ“, გინა „გოლიცინის
წრემ“. ქორწინებასაც ესწრებოდა სოფიო, ვითარცა ახლო
ნათესავი პატარძლისა. ხელმწიფე-დედოფალმა სიძეს საქორ-

წინო საჩუქრები მიართვა: ათგირვანქიანი ოქროს თანი, ათადლიანი ოქროსფერი ატლასი, ათადლიანი წითელი ატლასი, ათადლიანი ორპირი ქამხა, ხუთადლიანი სილისფერი ფარჩა, სამასი მანეთის სიასამური.

პეტრეს მოძულე მიღოსლავსკებთან ალექსანდრეს დამოყვრებას ოდნავადაც არ შეუსუსტებია ქაბუკი ხელმწიფისა და „იმერელი პრინცის“ მეგობრობა და „განუყრელობა“...

იმეამად რუსეთი, ავსტრია, ბოლონეთი და ვენეცია თურქეთთან ომისათვის ემზადებოდნენ. არჩილმა იფიქრა, რომ ახლა „დაუდგა დრო“ საქართველოს — შეერთებოდა „ჯვაროსნულ ლაშქრობას“ მარად მოსისხლე ოსმალეთის დასამხობად.

ეს ოსმალეთი, მაგრამ სპარსეთი?!

სპარსეთზე სამტრო სიტყვას მოსკოვის კარზე ჯერჯერობით არავინ ისმენდა. ჯერჯერობით რუსეთის „დიდი ხელმწიფენი“ შაჰთან ურთიერთობასა და მეგობრობაში არიანო“, ეუბნებოდნენ არჩილს.

რა გაეწყობოდა, — დაე, ჯერ „ოსმალ-თათრებისთვის“ გაესწორებიათ ქართველებს ანგარიში და მერე, ალბათ, „ყიზილბაშ-თათართა“ განკითხვის ეამიც დარეკავდა!

არჩილმა თავის ორ შვილთან — ალექსანდრესთან და მათე-მამუკასთან ერთად საქართველოში გამოშვება ითხოვა.

რუსხელმწიფენი დათანხმდნენ: დაე, გაემგზავროს არჩილი და დაეუფლოს „თავის სამეფოს“ — იმერეთს, ეომოს თურქებს, ხოლო, რაც შეეხება ქართლს — „ქართლის საქმეები“ მოსკოვს არ ეხება!

მაშ, რუსეთის უზენაესი ხელისუფლება არჩილს ისევ მხოლოდ „იმერეთის მეფედ“ აღიარებს, მის ვაყებსაც „იმერეთის პრინცებს“ ეძახის, ხოლო ქართლი და კახეთი ისევ ერანის „შინაურ საქმეებად“ შიანდა.

ეს „პირობები“ უნდა იკმაროს არჩილმა — უნდა იკმაროს ჯერჯერობით მაინც.

.

1688 წლის 30 მაისს პეტრეს დღეობა იყო — იგი თექვსმეტი წლისა შესრულდა (მისი „ძმობილი“ ალექსანდრე არჩილის ძე ორი წლით უმცროსი იყო).

პეტრეს დღეობა ქართველებთან გამოშვებობების დღედ გადაიქცა.

სუფრასთან პეტრე საკუთარი ხელით უმასპინძლდებოდა ალექსანდრეს, მის მამას და ძმებს.

ითქვა „გულითადი“ და „გულშეხარვანი“ სადღეგრძელონი.

ერთხელ კიდევ „დაიდო პირობა“, — რომ ქართველები მხოლოდ „დროებით“ მიდიოდნენ საქართველოში და ისევ დაბრუნდებოდნენ მოსკოვში.

დარიგდა საჩუქრები — ძვირფასი დიბა-ატლასი, ფარჩა-ფხრეშუმი, ოქრო-ნემსული ტანსაცმელი, სიასამური, ოქრო-ვერცხლის თასები და ფული.

ერთმანეთს დაემშვიდობნენ.

ქართველები ხომალდებში მოეწყვნენ და გამოემართნენ.

მოდიოდა საქართველოში არჩილ მეფე და არ იცოდა, რომ არც თურქეთის წინააღმდეგ „ჯვაროსნული ომი“ მოხდებოდა და არც მის „კუთვნილ იმერეთში“ დახვდებოდა გაწყობილი „სამეფო სუფრა“.

ოცი წლის უამბომა

გიორგი გურიელს იმერეთის მპყრობელობა და „მშვენიერი თამარის“ მფლობელობა აღარ ესაკმარისებოდა. მას დადიანობის ჯავრიც აწუხებდა და „მცდელობდა ოდიშსაც დაპყრობად“.

მაგრამ მაგრად იყო კაცია ჩიქოვანი, სალიპარტიანოს გამგებელი და „უდადიანოდ“ დარჩენილი ოდიშის „პატრონი“. ბევრი წარჩინებული მეტოქე გამოასალმეს წუთისოფელს ძმებმა ჩიქოვანებმა — ჭყონდიდელმა და კაციამ. წაქეზება არ სჭირდებოდა კაციას, მაგრამ მაინც შეაგონებდა ხოლმე ჭყონდიდელი: „იმ კაცს, ჩვენ რომ თვალში გვეჩხირება, მხოლოდ ერთი თოფი ეყოფის!“ კაციამაც კარგად იცოდა, რომ აღამიანს ნახევარი ნეკის ტოლა ჭყოფნის სასიკვდილოდ. და

ასე — „ერთი თოდის“ სროლით „მოსრნა მრავალნი შემძლებელნი და წარჩინებულნი ოდიშისანი“. ბევრი მეგრული ოჯახი ააწიოკა მედროვემ, ბევრი თურქ ვაჭარს მიჰყიდა და სამუდამოდ დაუკარგა ამოწყვეტილ და გაჩანაგებულ მშობელ ქვეყანას.

კაცია რომ მოკვდა, სალიპარტიანო მემკვიდრეობად მისმა შვილმა გიორგიმ მიიღო. გიორგი ლიპარტიანმა მამამისი სულ დაჩრდილა სიაგვაცით, სიბოროტით, სიხარბით. იყო იგი „უღვთო, ცრუფიც, უპირო, ტყვის-მყიდველ“. ხალხში ხმა დავარდნილიყო: იმ სულძალ კაციას შვილისთვის დაუბარებია — ჩექმიანი და კოხუნჯიანი (ქალამნიანი) არავინ დატოვო ცოცხალი და მაშინ შეიძლებ ბატონობასო. და გიორგი ჩიქოვან-ლიპარტიანიც „უმეტეს მამისა თვისისა სრვიდა უწყალოდ და ჰყიდდა ტყვედ ოდიშართა“.

ისარგებლეს აფხაზეთის მთავრებმა სამეგრელოს შინა სისხლთათხევით და გაახშირეს თავდასხმეში, ძარცვა-რბევა და მოსახლეობის გატაცება-გაყიდვა ოდიშის მიწებზე, კოდორიდან ენგურამდე. შარვაშიძენი მოუძლოდნენ აფხაზთა მახარ ლაშქრობებს, ჯერ სუსტარ შარვაშიძე, მერე მისი ძე სორეხ და სახლიკაცი ყვაპუ. საქრისტიანო სამწყსოები — საეპისკოპოსონი მოიშალა მოქვსა და დრანდას.

სამეგრელოში მაშინ იმყოფებოდა იტალიელი კათოლიკე მისიონერი — ძამპი, რომელიც წერდა: „სამეგრელო აღარ არის სამეგრელო, რადგან გაუთავებელმა ომებმა იგი ჩაადო სილატაკეში, დააქცია და გაათილა. აღარავის ჰყავს საქონელი და სარჩო ყველას აკლია... ახლა აქ კაცს აღარ შეუძლია უშიშრად იყოს, გამუდმებული შიში სუფევს აფხაზების დაცემისა“.

გიორგი ლიპარტიანი სამეგრელოს „ვანუყოფელი“ გამგებელი იყო. მაგრამ ლეჩხუმიდან მოსულ „მდაბიო აზნაურს“ მაინც არ შეეძლო დადიანის ტახტზე დამკდარიყო. ხოლო „სათნოებისათვის მეგრელთა და წინააღმდეგად გურიელისად“ საჭირო იყო „ნამდვილი დადიანი“. ამიტომ მედროვე თვითონ შეუდგა „მისთვის სასარგებლო“ სადადიანო კაცის გამოძებნას. გამოძებნა კიდევ. ეს იყო აწ გარდაცვლილი ლევან III დადიანის უკანონო (მხვეალთან გაჩენილი) შვილი,

ესეც სახელად ლევანი. და მას ჩააბარა ოდიშის მთავრის ტახტი. ასე, — წყალობითა და ნებითა გიორგი ჩიქოვან-ლიპარტიანისა — მოექცა სამეგრელოს სათავეში **ლევან IV და დიანი (1683—1691 წწ.)**.

გიორგი გურიელს „დადიანობის“ ხელში ჩავდების იმედი დაუპატარავდა და დაუკნინდა. ქუთათისის ტახტზეც სუსტად და „უხერხულად“ იჯდა, რადგან „იმერეთის თავადებს გურიელის მეფობა ეთაკილებოდათ“. ჩვენ თვითონ მაგის ტოლნი და „ამხანაგნი“ ვართ და მაგნიირი „თანატოლი“ მეფედ რატომ უნდა დავისვათ კისერზეო, გაიძაზოდნენ იმერელი თავადები.

ქართლის მეფეც, გიორგი მეთერთმეტე, აღშფოთებული იყო, რომ იმერლებმა სამეფო ტახტი „უღირს გურიელს“ დაანებეს და არა მის „მირონცხებულ ძმას“ — არჩილს.

თან ყველამ იცოდა, რომ იმერეთის ტახტის კანონიერი მემკვიდრე — ალექსანდრე ბაგრატის ძე, სწორედ ქართლის მეფეს ჰყავდა წაყვანილი.

ბოლოს და ბოლოს, იმერეთის თავადობამ ცალკე და გიორგი მეთერთმეტემ ცალკე, ახალციხეში უსუფ ფაშას შეუთვალეს: ქუთათისის ტახტს უკანონო და უღირსი გიორგი გურიელი მოაშორეთ და კანონიერი ხელმწიფე — ალექსანდრე ბაგრატის ძე დანიშნეთო.

უსუფ ფაშამ ხონთქარს შეატყობინა ქართველთა სათხოვარი. ხონთქარი დათანხმდა. გიორგი მეფემ ალექსანდრე ახალციხეში გამოგზავნა. აქ ხონთქარისგან მოძღვნილი ხალათი და ხმალი დაახვედრეს სამეფოდ გამზადებულ უფლისწულს.

შემოიყარა ჯარი უსუფ ფაშამ და წამოიყვანა იმერეთში ალექსანდრე ბაგრატის ძე.

გიორგი გურიელი ქუთათისიდან გურიაში გაიქცა.

იმერეთის ტახტზე ახალი მეფე დაბრძანდა — **ალექსანდრე IV (1683—1695 წწ.)**.

გიორგი გურიელს იმერთა და ოდიშართა გაერთიანების შიში ჰქონია. ამიტომ ქუთათისიდან გაქცევისთანავე თავისი „მშვენიერი ცოლისიდვარი“ დადიანთან გაუშვა მოციქულად, „რათა არა მიერთვნენ ოდიშარნი ალექსანდრეს“.

და ამ „მოციქულობაში“ მოულოდნელად მოკვდა „თამარ მშვენიერი“.

მაშინვე აიშვეს ჭორებმა და ლეგენდებმა ამ „საოცარი ქალის“ შესახებ. ისიც კი ითქვა — სამეგრელოში ფეხმძიმედ მოსულს მუცელი ასტივდაო, ბავშვის ნაცვლად ცეცხლმოკიდებული მუგუზალი დაჰბადაო (ვითომ ჰეკუბა ყოფილიყოს — ტროას ლეგენდარული დედოფალი!) და ასე გადაჰყვა „ცეცხლოვან მუცელსო“.

მაშ, მომკვდარიყო თამარ ქალი, კონსტანტინე მუხრან-ბატონის ასული, შვილიშვილი მარაბდის გმირის თეიმურაზ მუხრან-ბატონისა და გიორგი სააკაძის ასულისა, ძმისწული მეფე ვახტანგ V შაჰ-ნავაზისა.

ქალი, — მხოლოდ რომლის გულისთვისაც „უღირდათ სიცოცხლე“ დასავლეთ საქართველოს უილაჯო და უძარღვო მესვეურებს.

ქალი, — რომლის მხურვალე საბნის ქვეშ სრული ოცი წლის სიგრძეზე ირჩეოდა და წყდებოდა დასავლეთ საქართველოს სამომავლო ბედი და იღბალი.

ხელმწიფობა ალექსანდრე მეოთხისა

თამარის სიკვდილის გამოისობით გიორგი გურიელს სიკვდილი არ უფიქრია. მან იმ თვეშივე ცოლად შეირთო კაცია ჩიქოვანის მეორე ნაცოლარი, ანუ გიორგი ჩიქოვან-ლიპარტიანის დედინაცვალი, დისწული შოშიტა რაჭის ერისთავისა.

„პოლიტიკური გაანგარიშება“ ჰქონდა გიორგი გურიელის ახალ ქორწინებას. მას ისევ იმერეთის ტახტი ამოელო მიზანში და ახალი მოყვრები — ლევან IV დადიანი, გიორგი ლიპარტიანი და შოშიტა რაჭის ერისთავი — მისი საიმედო მოკავშირენი და თანამდგომნი უნდა ყოფილიყვნენ ალექსანდრეს დამხობისათვის მომავალ ბრძოლაში.

თავის მხრივ ალექსანდრესაც უცდია ქუთათისის დიდად მორყეული ტახტის გამაგრება. მან თავიდანვე მიაპყრო თვა-

ლი იმჟამად იმერეთის ყველაზე ძლიერ თავადს — პ ა ა ტ ა ა ბ ა შ ი ძ ე ს, რომელსაც „მორჩილებდნენ სრულიად მარგველნი“. მეფემ აბაშიძეს ცოლად შერთო თავისი დაი — დარეჯანი, გიორგი გურიელის წაცოლარი. მეორე დიდი თავადი — გ ი ო რ გ ი შ ი ქ ე ლ ა ძ ე, ალექსანდრეს ბიძად ერგებოდა. ამ ორი თავადის გავლენით მეფემ მოიმტკიცა უმეტესი საიმერეთო.

მომტერენი ერთმანეთს შეხვდნენ სოფელ რ ო კ ი თ ს, 1684 წელს.

მეფის ბანაკში იდგნენ „აბაშიძენი და ზემოურნი და მიქელაძე გიორგი და მარგველნი“. ხოლო გიორგი გურიელის გვერდით გურულთა გარდა დარაზმულიყვნენ: „საჩინოელი ჩიჯავაძენი, გიორგი ლიპარტიანი ოდიშარებით, რაჭის ერისთავი რაჭველებით, ლორთქიფანიძენი და ლეჩხუმელნი“.

სასტიკი იყო როკითის ბრძოლა. უმრავლესობა დაიხრცა, ან მიძიმედ დაიჭრა ორივე მხრისა. ამ ცოდვიანი ხოცვა-ჟლეტის მთავარ გმირს — გიორგი გურიელს რომელიდაცამ ლაჯებში შუბი შესცა და უსულოდ დააგორა მიწაზე. ბრძოლაში დაეცნენ შოშიტა რაჭის ერისთავი და ლევან აბაშიძე. მიძიმედ დაიკოდა პაატა აბაშიძე. გიორგი ლიპარტიანს სიკვდილს ყოველთვის სირცხვილი ურჩევნოდა და „დროზე“ გაიქცა ბრძოლიდან ოდიშართა და ლეჩხუმელთა ჯარებით. გურულებმაც მათი მთავრის სიკვდილისთანავე გაქუსლეს გურიისკენ.

გამარჯვებული მობრუნდა სასახლეში ალექსანდრე მეფე. მისი ბრძანებით, ტყვედ წამოყვანილი მეომრები „დაპყიდნენ ვეცხლსა ზედა“ (ეს, „როგორც წესი“ — ქართველები ჰყიდიან ქართველებს!).

ალექსანდრე მეფის ბრძანებით, გურიის მთავრად დაჯდა აწ მოკლული გიორგის უმცროსი ძმა — მ ა ლ ა ქ ი ა გ უ რ ი ე ლ ი.

გიორგის ვაჟებმა — ქაიხოსრომ და მამიამ — ახალციხეში გადაასწრეს და უსუფ ფაშას შეათარეს თავი.

ალექსანდრემ „სამომავლო სიმძლავრისათვის“ გადაწყვიტა დამოყვრებოდა და დაახლოებოდა ქართლის მეფე გიორგი მეთერთმეტეს, და ასეთი წერილი მისწერა მას: რაც აქამდე

სიკეთე მჭირს, სულ თქვენგან მჭირს; მინდა ვიყო „მონად და ძედ შენდა და მომეც ასული შენი ცოლად“.

გიორგის იმერეთის მეფის შემოთავაზება დიხაბაც „განე-ხარა“, მაგრამ მისი ასული დავით ერისთავზე იყო დაწინდუ-ლი და ამიტომ უარი შემოუთვალა „სინანულით“. მაშინ ალექ-სანდრემ ძმისწული სთხოვა გიორგის — ლუარსაბის ასული ელენე.

აქ რაჟის ერისთავი პ ა პ უ ნ ა შოშიტას ძე ჩაერია საქ-მეში. როკითის სისხლი ჯერ კიდევ არ გამშრალიყო და რა-ჟის ერისთავისა და იმერეთის მეფის მტრობაც ჯერჯერობით „ხელუხლებელ მტრობად“ დარჩენილიყო.

ერთი სიტყვით, პაპუნა ერისთავმა გიორგი მეფეს ალექ-სანდრესთან დამოყვრება არ დაანება (ქართლის მეფე და რა-ჟის ერისთავი ხომ მოყვრები იყვნენ — გიორგის მეორე ქორ-წინებით ცოლად ჰყავდა პაპუნას მამიდაშვილი ხვარაშანი).

ალექსანდრემ იფიქრა, არ იშლიან მტრობას რაჟის ერის-თავებშიო, — შეჰყარა იმერთა ჯარი და დაიძრა რაჟისაკენ.

წვევისა და ველიეთის მთები გადაიარეს და ნინიას-ციხეს დაეცნენ იმერნი. მაგრამ რაჰველთა ნიჯადი (დამხმარე) ჯარი გამოჩნდა, ქართლიდან მომავალი. გიორგი მეფეს გამოეგ-ზანა პ ა პ უ ნ ა ხ ე რ ხ ე უ ლ ი ძ ი ს სარდლობით.

პაატა აბაშიძემ ურჩია მეფეს: არ გამოგვადგება ქართ-ლელებთან შერკინებაო. ალექსანდრემაც დაიჯერა, ნინიას-ციხეს თავი მიანება და იმერეთს დაბრუნდა.

მალე პაატა აბაშიძე გარდაიცვალა როკითის ბრძოლაში მიღებული ჭრილობისაგან. მეფის დაი — დარეჯანი ისევ დაქვ-რივდა.

ალექსანდრე მეფემ აგრძნობინა რაჟის ერისთავს — ახლა შეიძლება ჩვენი „შერიგება და დამოყვრებაო. ისიც აცნობა, რანაირად უნდა მომხდარიყო ეს „სასურველი დაახლოება“: შენ რომ ბეჟან ლორთქიფანიძის ქალი ცოლად გიზის, ის განუტევე და ჩემი დაი დარეჯანი დაისვი შეუღლედი.

პაპუნა ერისთავი დათანხმდა. გარიგება შედგა და ამნა-ირად „ჩააწყნარა“ ალექსანდრე მეფემ „გაფიცვებული რაჰ-ველობა“.

ხოლო, პაატა აბაშიძის მემკვიდრეობა დაიჭირა მისმა

ქმამ გიორგიმ, რომელიც მანამდე ბერად იდგა მალაქიას სახელით. „ნაბერალმა“ მეორე ცოლად შეირთო „ყველაზე მდიდარი“ ქალი — კაცია ჩიქოვანისა და გიორგი გურიელის ნაცოლარი ქალბატონი.

პირველი ცოლისაგან (გიორგი მიქელაძის დაი) გიორგი აბაშიძეს ჰყავდა ასული ელენე, რომელსაც გამოუჩნდა საქმრო ფრიად „მომავლიანი“.

როგორც ითქვა, გიორგი გურიელი რომ მოკლეს, მისი შვილები — ქაიხოსრო და მამია, ახალციხეში გაიქცნენ და უსუფ ფაშას შეეფარნენ. სწორედ ქაიხოსრო იყო მთხოვნელი ელენე გიორგი აბაშიძის ასულისა. ქაიხოსრომ ქალი დანიშნა, ახალციხეს გაბრუნდა, მის მწყალობელ უსუფ ფაშას ჯარი გამოართვა და გურიას შემოიჭრა.

გურიას მაშინ ხომ გიორგი გურიელის ძმა მალაქია განაგებდა. ქაიხოსრომ ბიძა შეიპყრო, „თვალეები აღმოხადნა“ და გურიელის ტახტი თვითონ დაიჭირა.

თვალეზდათხრილმა მალაქიამ ახალციხის ფაშას აუწყა მისგან წარმოგზავნილი ქაიხოსროს სისასტიკე.

უსუფ ფაშა დაფრთხა, — ვაითუ რა მოხდა, ხონთქარმა შეიტყოსო და გამირისხდესო და შავშეთის ბეგს დაავალა ქაიხოსროს იღუმალ მოკვლა. შავშეთელმაც „პირნათლად“ აღასრულა ეს „საპატიო დავალება“. ქაიხოსროს გაუშინაურდა, ეწვია, მიიწვია და... თავი გააგდებინა. ოსმალებმა „წარიდეს თავი მისი და წარვიდნენ და გურიელად დაუტოვეს მალაქია უთვალო“.

ახლა გიორგი გურიელის მეორე ვაჟი, ქაიხოსროს ძმა — მამია ამოიმართა სასპარეზოდ. გურულებმა თვითონ მოითხოვეს იგი გურიის მთავრად, უსინათლო მალაქიას მაგივრად. სთხოვეს „და აღუთქვეს ქრთამი დიდი“ გურიის მესვეურებმა უსუფ ფაშას. დაქრთამულმა ფაშამ მაშინვე გამოგზავნა „ბედის ნებეირი“ ჭაბუკი. „უცნაური“ იყო, რომ ასე „უსისხლოდ“ ავიდა მთავრის ტახტზე იგი — მამია III გურიელი. მან ტახტიდან გადაგდებული, თვალდამდგარი ბიძა — მალაქია „გულკლებულად“ არ დატოვა, ბერად აღკვეცა და შემოქმედის მთავარეპისკოპოსობა („შემოქმედებლობა“) ჩააბარა.

„მეორე ღონისძიებად“ ახალმა შთაგარმა ცოლად შეირ-
თო თავისი ძმის, ქაიხოსროს დაწინდული ელენე, ასული „ნა-
ბერალი“ გიორგი აბაშიძისა.

.

გიორგი ლიბარტიანი გახარებული იყო და ლევან დადი-
ანსაც „ახარებდა“, რომ როკითის ბრძოლაში იმერეთმა ბევ-
რი ძლიერი პიროვნება დაჰკარგა. მაგრამ თვითონ ომის გა-
რეშეც აუარებელი ხალხი დაუქარგა სამეგრელოს ბოროტმა
მედროვე-ვიგინდარამ. ლიბარტიანის სააგვაცო წებით კვლავ
გრძელდებოდა „ღალატით სრვა და კლვა წარჩინებულთა ოდი-
შისათა, ყიდვა უწყალოდ ტყვეთა მაჰმადიანთა ზედა“. ყო-
ველწლიურად თორმეტი ათასი ადამიანი იყიდებოდა სამეგ-
რელოდან.

ლევან IV დადიანს დადიანობა მხოლოდ სახელად და
„სახელოდ“ შემორჩენოდა, თორემ ყოველი დიდი თუ მცირე
საქმის წამომწყებიც და გადამწყვეტიც მხოლოდ ლიბარტია-
ნი იყო („სახელით ოდენ იყო დადიანი ლევან, გარნა მოქ-
მედი ყოველისავე იყო ლიბარტიანი“). ასე იდგა „ოდიშს
ჭირი გიორგი ლიბარტიანისაგან კლვითა და ტყვეთა ყიდ-
ვისათა“.

ისევ სარგებლობდნენ შარვაშიძენი სამეგრელოს შინა-
არეულობით, შინაგაჩანაგებით, შინაგაყიდვით და „მოვიდიან
ლაშქრად და აოხრებდიან ქვეყანათა ავაზაკობით და ცხა-
დად“.

მოსალოდნელი იყო, რომ იმერეთის მეფეც შეეცდებოდა
ოდიშის მიწა-წყლის ხელყოფას და იქნებ დაპყრობასაც. ამი-
ტომ „მოყვრობით“ დაასწრო გიორგი ლიბარტიანმა. სწო-
რედ ლიბარტიანის ჩაგონებითა და ნებით (ლამის, ბრძანე-
ბით) შეირთო ცოლად ლევან IV დადიანმა ალექსანდრე მე-
ფის დაი — თინათინი, ნაშობი „თამარ მშვენიერისა“ ნაცო-
ლარი გიორგი გურიელისა.

თვითონ მეფე ალექსანდრე IV იმყამად ისევ ქართლის მე-
ფეებთან ურთიერთობის საფიქრალით იყო დაკავებული.
იგი ვერ შერიგებოდა იმას, რომ გიორგი მეთერთმეტემ „ყო-
ველი ვარიანტით“ უარი უთხრა დამოყვრებაზე. ბოლოს

ალექსანდრემ, გიორგისგან შეურაცხყოფილმა, „განაცხადა მტერობა მისი და მოყვრობა ერეკლე მეფისა“.

ეს განზრახვა ალექსანდრემ გაანდო პაპუნა რაჭის ერისთავს და თან გააფრთხილა, — საჭირო რომ გახდეს, გიორგი მეფეს რაჭაში სახიზარი არ მისცეო.

პაპუნა ერისთავმა ასეთი ბრძანების შესრულებაზე უარი თქვა და კიდევაც შეიხიზნა ქართლიდან ლტოლვილი გიორგი მეფე.

გაგულისებულმა ალექსანდრემ იმავე 1688 წელს შემოიყარა იმერთა ჯარი და რიონის ხეობას აუყვა ჭენებით. ლეჩხუმელები და ქვემო რაჭველები გზაზედ შეუერთდნენ მეფეს.

პაპუნა ერისთავმა სიდიკარის ვიწრობები გაამაგრა, თავისი ქართლელი ხიზნებთ ბარაკონიდან აიყარა და ოსს მიამურა.

ალექსანდრემ ჯეჯორამდე დაუბრკოლებლივ ილაშქრა, აქ კი შემოეგებნენ საომრად პაპუნა ერისთავი და გიორგი მეფე. შემოეგებნენ, მაგრამ „ერ წინააღმდეგნენ“ და მთების სიღრმეში — სოფელ გლოლას გადაინაცვლეს.

გამოედევნა ალექსანდრე იმერთა ჯარით. უწერამდე მივიდნენ, „მოსწვეს უწერა“ და უკან გამობრუნდნენ ძარცვითა და რბევით.

1688 წელი იყო.

არჩილმაც მძობატანა რუსეთიდან. თავისი ვაყებიც ჩამოიყვანა — ალექსანდრე და მამუკა, შეილები დვალეთს გაგზავნა, თვითონ კი რაჭას ჩავიდა ლტოლვილ ძმასთან და მოყვარე მასპინძელთან.

მტკიცედ გადაწყვიტეს: არჩილი ისევ გაემეფებინათ იმერთაში. შეუდგნენ მხარდამჭერ ძალთა შეკრებას. მოლაპარაკება გააბეს იმერეთის თავადებთან და სამეგრელოს მესვეურებთან. დავით აურქისტანიშვილი დიდი ძღვენით, არმანითა და დახმარების თხოვნით გაგზავნეს ყირიმის ხანთან.

მომხრეთა შესაყარ ადგილად დათქვეს გველისთავი — რაჭა-ლეჩხუმის საზღვარზე. აქ, არჩილს, გიორგის და პაპუნას ეახლნენ გიორგი ლიპარტიანი სამეგრელოდან, ჭილაძეები, მიქელაძეები და ბეკან ლორთქიფანიძე იმერეთიდან.

ალექსანდრეს ერთგულ შემწეებად დაურჩნენ გიორგი აბაშიძე და სვიმონ ქუთათელი. ეს სვიმონ ქუთათელი იყო შვილი სეხნია ჩხეიძისა, — იმ სეხნიასი, ქუთათისის ციხე რომ „მოიპარა“ და შიგ ოსმალთა ჯარი „შეაპარა“. საოცარი ის არის, რომ სვიმონ ქუთათელს უმალლესი მღვდელმთავრობაც არ უშლიდა ხელს, ყოფილიყო „ტყვის მყიდველი, მეძავე-მემრუშე, კაცის მკვლელი, ცრუ-ფიც და უწირავ-ულოცავი“. ერთი სიტყვით, თოკიდან აწყვეტილი ავაზაკი, მკვლელი და ადამიანებით მოვაჭრე ქურდი — უზენაესი, ღვთაებრივი ზნეობის მქადაგებლის ანაფორაში!..

ერთბაშად, მოულოდნელად მიადგა ალექსანდრე მეფე იმერთა ჯარით გველისთავს.

დამხვდურები მოუშხადებელნი დაუხვდნენ, ჯარი ჯერაც არ შემოეყარათ. ლეჩხუმელებიც უკვე ალექსანდრესთან შერიგების გუნებაზე დამდგარიყვნენ. რაჭაშიც ბევრი შინაგამცემი ეგულებოდა პაპუნა ერისთავს.

ამიტომ გიორგი და არჩილი ბრძოლას განერიდნენ და გიორგი ლიპარტიანს წაჰყვნენ ოდიშში.

აქ არჩილმა შეიტყო, რომ დავით თურქისტანიშვილი უკვე ყირიმს მისულიყო. ყირიმის ხანსაც უკვე გაუგზავნია შუამდგომლობა ოსმალეთის სულთანთან, იმერეთის ტახტზე არჩილის აღდგენის თხოვნით.

არჩილმა საჭიროდ ჩათვალა თვითონაც წასულიყო ყირიმს. გაუდგა კიდევ გზას, მაგრამ აფხაზეთს იქით ვეღარ გააღწია, — გზები შეკრული იყო. ხოლო აფხაზეთის მთავარი სორეხ შარვაშიძე ბრწყინვალე მასპინძლობით შეხვდა არჩილს, თავის სატახტო ზუფეში. ისე ექცეოდა, „ვითარცა მეფეს“.

აქვე არჩილმა შეიტყო, რომ მისი შვილები — ალექსანდრე და მამუკა — დეაღეთიდან ისევ ასტრახან-მოსკოვის გზას შესდგომოდნენ.

აფხაზეთიდან ისევ ოდიშს მობრუნდა და შეიტყო, რომ გიორგი ლიპარტიანს უკვე ელაღატნა ქართლელი სტუმრებისათვის. იგი იმერეთის მეფის ბანაკს მიჰყვებოდა და სამაგიეროდ ალექსანდრეს მისთვის ლეჩხუმი უჩუქნია!

სამეგრელოში დარჩენა უკვე საშიში იყო და არჩილი და

გიორგი სასწრაფოდ საჭილაო-სამიქელაძეოში გადავიდნენ. აქედან ალექსანდრეს შეუთვალეს, გაგვიშვი, გზა მოგვეცი და უკან დაბრუნებით აღარ შეგაწუხებთო. იმერეთის მეფემაც ეს მოსთხოვა არჩილს: „უკეთუ მომცემ ფიცს, რომ იმერეთს აღარ შემეცილები, გაგიშვებ და წადი რუსეთში, ხოლო თუ არ შემომფიცავ, არც გზას არ მოგცემო“.

რაკი „არღარა იყო სხვა რაიმე ღონე“, არჩილმა შეპფიცა, ალექსანდრეს გზა „გამოართვა“ და რაჭისაკენ გაუტია. რაჭიდან გადავიდა დიგორს და თან წაიყვანა ძმისწულნი, ძენი ლევანისა — ქაიხოსრო, ვახტანგი (შემდგომში ვახტანგ VI) და დომენტი.

ხოლო გიორგი მეფე საჭილაოდან წავიდა გურიისში, სადაც მამია გურიელმა იგი „ისტუმრა პატივითა დიდითა“. გიორგიმ თავის მხრივ უხვად დაასაჩუქრა აქაური წარჩინებულნი. ამის გამო, ვილაც „ჩვეულებრივმა მოენეებმა“, მამია გურიელს შეაგონეს: გიორგი მეფე ჩვენებურ თავადებს იმიტომ ასაჩუქრებს, მათი გულის მოგებით და დახმარებით სურს გურია წაგართვასო. ჭაბუკმა მთავარმა ეს ბოროტი შესმენა ადვილად დაიჯერა და სტუმრისგან დასაჩუქრებული წარჩინებულნი ზოგი ციხეში ჩაპყარა, ზოგიც „უპატიო ჰყვნა“. გიორგიმ იფიქრა, — აქაც თურმე ნაფიქრი უკუღმა ესმითო, და გურიიდანაც აიკვეთა ფეხი.

იგი, ამჯერად, მივიდა გონიას, აჰმედ-ბეგ თავადგირიძესთან, რომელიც სიხარულით „მოეგება და დიდითა პატივითა დაასადგურა და წარსაგებელითა თვისითა უმასპინძლებდა რთოდენსამე ქამს“.

გონიაში გიორგის ეახლა დავით თურქისტანიშვილი, რომელსაც მოევლო ყირიმიც და სტამბოლიც; ქართველ ელჩს ჩამოჰყვა თურქი ყაფუჩი (კარის მცველი), რომელმაც თან ჩამოიტანა ხონთქარის ბრძანება: „დაეკითხეთ იმერლებს, რომელი ნებავთ მეფედ — არჩილი თუ ალექსანდრე — და, რომელსაც აირჩევენ, ის დასვით ქუთათისის ტახტზეო. მაშინვე ახალციხეში გადავიდნენ და მაშინდელ ფაშას — სალიმს (გარდაცვლილი უსუფ ფაშას ძმა) გააცნეს ხონთქარის ბრძანება. სალიმ ფაშამ ყაფუჩი ქუთათისში გამოგზავნა და ხონთქარის ბრძანება ალექსანდრეს შეატყობინა.

რისხვით გონდაკარგულმა ალექსანდრემ „ინება მოკვლა ყაფუჩისა“. თურქმა კარისკაცმა ძლივს გაასწრო ახალციხეში.

იქ გიორგის ასეთი რჩევა მისცა ყაფუჩმა: ყოველმა წარჩინებულმა იმერელმა „სვინტატიკოსის წიგნზე“ თავისი ბეჭედი დასვას, არჩილის გამეფების სურვილით, და მერე მე მოვუვლი მაგ საქმესო.

გიორგი მეფემ მართლაც შეძლო ამის გაკეთება. ყაფუჩმა იმერელ თავადთა ბეჭედები და ხელრთვანი სტამბოლს წაიღო. მალე უკანვე დაბრუნდა და თან ჩამოიტანა ხონთქარის ბრძანება: იმერეთი არჩილისთვის მიბოძებია და მისი ტახტზე აყვანა არზრუმის ფაშას დაეკისროსო. თან ხმალი და ხალათი გამოეგზავნა ოსმალეთის ფადიშაჰს იმერეთის ახალი მეფისთვის.

ფერსათის მთაზე ამოვიდნენ გიორგი მეფე და არზრუმის ფაშასგან წარმოგზავნილი თურქი სარდალი („ქეჰა“), „თვისი სპითა დიდითა“. მალემსრბოლიც გაეგზავნათ დიგორს, სიდაც მაშინ იღგა არჩილი.

წამოვიდა არჩილი, რაჭა ჩამოიარა, მიეგება პაპუნა ერისთავი და „სრულიად რაჭველნი“ და გამოეშურნენ იმერეთს.

შეატყობინეს ალექსანდრეს: ფერსათიდან თურქთა მხედრობა მოეშურება, რაჭიდან არჩილი და პაპუნა ერისთავიო. იმერეთის ყველა თავადიც, გიორგი აბაშიძის გარდა, არჩილის საყმოდ გამზადებულიყო.

არ შეეძლო ალექსანდრეს „წინააღმდეგობა“, მაშინვე ქუთათისიდან აიყარა და ქართლს გადავიდა, ერეკლე მეფესთან.

არჩილი შემოვიდა თურქთა და რაჭველთა ჯარებით ქუთათისში.

ოსმალეთის ფადიშაჰის ხმლით და ხალათით მოიკაზმა და ჯერ კიდევ თბილ ტახტზე დაბრძანდა.

ეს არჩილის „მესამე იმერული მეფობა“ გახლდათ — 1690—1691 წწ.

გიორგი მეფემ თავისი ძმისწული — ელენე ლუარსაბის ასული (რომლის შერთვა ამაოდ დააპირა ალექსანდრე IV-მ), ქალი, „ფრიად კეკლუცი“, ცოლად მისცა რაჭველ წარჩინებულს, ქაიხოსროიაშვილს. ქორწილი რომ ჩათავდა, გიორგი რაჭიდან ახალციხეში გადავიდა დედაწულიანად.

ხოლო არჩილი უკვე გულსრულად შესდგომოდა იმერეთის შერთვა-გამგეობას. ერთადერთი, რაც მის სიმშვიდეს ასე თუ ისე „აწვალებდა“, ეს იყო ისევ „ნაბერალი“ გიორგი აბაშიძე, რომელიც გაძევებული ალექსანდრე IV-ის ერთგულებას არ ღალატობდა და ახალ, „ნაძალადევ მეფეს“ არ ურიგდებოდა.

1690 წლის მიწურულს დიდი ზამთარი დადგა. გიორგი აბაშიძემ იფიქრა, ამოდენა თოვლსა და ყინვა-ბაზანებაში თურქები ზეკარს ვერ გადმოივლიან და არჩილს ვერ მოეშველებიანო; სასწრაფოდ გიორგი ლიპარტიანს „ეზრაბა“ და გადმოიყვანეს ქართლიდან ალექსანდრე IV.

არჩილმაც იხმო თავისიანები: პაპუნა რაჭის ერისთავი, სვიმონ ქუთათელი, გიორგი მიქელაძე და ბექან ლორთქიფანიძე.

ბრძოლა მოხდა სოფელ გოდოგანთან, 1691 წლის დამდეგს.

„ბრძოლა ძლიერი“ არჩილის გამარჯვებით ვათავდა. ალექსანდრე ისევ ქართლს გაიქცა.

გიორგი ლიპარტიანი ისევ სამეგრელოში ჩაიკეტა.

არჩილმა „მოიმტკიცა იმერეთი და მეფობდა მცდელობითურთ უკეთურებისა მოფხვრისა“. მაგრამ არაფერი გამოსდიოდა, რადგან მაინც „ძლიერ იყვნენ მთავარნი“.

ყველაზე დიდი სიკეთე, რაც არჩილ მეფეს განუზრაბავს, ეს ქუთათისის ციხიდან თურქთა ჯარის განდევნა უნდა ყოფილიყო.

შემოიყარა იმერთა და რაჭველთა ჯარი არჩილმა. „ახლად შემორიგებული“ გიორგი ლიპარტიანიც მოვიდა ოდიშართა ლაშქრით.

გარშემოადგნენ ქართველები ქუთათისის ციხეს. თურქთა ციხიონში შიმშილი დადგა, — ისეთი შიმშილი, რომ დაოსებული ოსმალონი, რაც რამე ტყავისა გააჩნდათ, იმას ხარშავდნენ და ჭამდნენ („ჯლანთა ხარშვიდიან და ნჭამდნენ“). ციხე წუთ-წუთზე უნდა დაცემულიყო.

და უცებ, გიორგი ლიპარტიანი ეახლა მეფეს და ეაჯა ცბიერი ღრეჯვით: მომეცით ლეჩხუმი საბატონოდ და სამუდამოდ თქვენი მონა ვიქნებიო.

რა დროს ეს იყო?!

მაგრამ მაინც აღუთქვა თხოვნის აღსრულება არჩილმა.

ვირეშმაკას რაღა გამოეპარებოდა. ლიპარტიანმა შეატყო, რომ უსიამოდ სახეაშლილმა მეფემ რაღაც ცალყბად თქვა თავისი დასტური ლეჩხუმის გაჩუქებაზე.

„არ მომცემსო“, დარწმუნებით გაიფიქრა ლიპარტიანმა და სხვა რამ საფიქრალს ჩაუღრმავდა განმარტოებით.

იმ ღამით ოსმალებს მიეყიდა გიორგი ლიპარტიანი; თუ რამე საჭმელ-სასმელი ოდიშართა ბანაკში ჰქონდა, სულ ერთიანად შეუგზავნა ციხეში შიმშილით ძალაწართმეულ მტერს.

ეს უმაგალითო ღალატი რომ მოითავა და ქართული ციხე მტრისთვის „განამაგრა“, ლიპარტიანმა მაშინვე თავისი ჯარი აპყარა და ოდიშისაკენ გაქუსლა.

მეორე დღეს ქართველებმა იხილეს მტრის ციხიონი მკვდრეთით აღმდგარი, გამძღარი, გამხნევებული და გამძღავრებული.

არჩილ მეფემ „შემოიფიცნა იმერნი“, მაგრამ არაფერმა აღარ გაჭრა, — თავადებმა ზედიზედ დატოვეს საომარი ბანაკი.

მეფე იძულებული გახდა ალყა მოეხსნა.

აღუა მოგვეხსნაო? დრო დაიცეს თურქებმა, ციხიდან გამოიჭრნენ და ბაგრატიის ტაძარს მიესივნენ.

მათთვის ჩვეული, ველური სიბოროტით გაძარცვეს, გააოხრეს, შემუსრეს და შებილწეს „დიდ-შვენიერად გებული“ ძეგლი, — სიამაყე და სიქადული ქართული კულტურისა.

ასე „იქმნა საკმე საგლოველი“ ქართულ მიწაზე, ქართველი კაცის ღალატის წყალობით.

.

სწორედ ამ წელს, გიორგი მეფემ რუისში ხელთ იგდო ალექსანდრე იმერთა მეფის ცოლ-შვილი, ხოლო თვითონ ალექსანდრემ ახალციხეში გადაასწრო.

ახალციხეში ქრთამს ხომ ძალიან „დიდი ბრუნვა“ ჰქონდა. ამჯერად ისევ ალექსანდრეს ქრთამს უჯობნია... და სალიმ ფაშა ჯარით გამოჰყვა ალექსანდრეს იმერეთისკენ.

არჩილმა ისევ მოუხმო „ფიცით შემომტკიცებულ“ იმერელ თავადებს. მაგრამ არაფინაც არ მოუვიდა. ახლა ისევ ალექსანდრეს „შემტკიცებოდნენ ფიცით“ არჩილ მეფის გუშინდელი მაფიცარნი „კუბოს კარამდი ერთგულებისა“.

მარტოდ დარჩენილმა არჩილმა რაჟა გადაიარა, ნაგვიანევად შემოყრილი ბარძიმ ერისთავიც უკანვე შემოაბრუნა და ქართლში ჩამოვიდა.

.

არჩილმა იმერეთის ტახტის დაბრუნებაზე ფიქრს თავი დაანება, კახეთის შემოთავაზებულ მეფობაზეც უარი თქვა და ისევ რუსეთს წასვლა დაასკვნა.

ღვალეთი უნდა გაეარა და გაიარა მშვიდობით.

ჩერქეზეთი უნდა გაეარა და ველარ გაიარა მშვიდობით.

დალესტნიდან შამხალის ბატონმა შეუთვალა ჩერქეზთა ბატონს — ყ ი ლ ჩ ი ყ ო ს: ქართველი გიაური არჩილ მეფე მიდის გიაურ რუსეთში; გზად და სტუმრად შენთან უნდა გამოიაროს; სპარსეთის შაჰმა მისი შეპყრობა შემოგვასახე-

ლა; დიდ სასყიდელსაც გვპირდება შაპი; მიდი, შეიპყარ არ-
ჩილ მეფე და გავუგზავნოთ სპარსეთის ხელმწიფესო...

ყილჩიყო ჩერქეზთ ბატონმა პატივით და თავაზით მიი-
ლო ქართველი სტუმრები — არჩილ მეფე, ორი ბერ-მონაზო-
ნი — ნიკოლოზ აბაშიძე და შალიკაშვილი, და კიდევ მცირე
ამალა ქართველებისა. დიდებულად უმასპინძლა, როგორც
„ნამდვილ ჩერქეზს“ დაშვენებოდა.

ბოლოს ქართველები წასასვლელად აიყარნენ. მასპინძელ-
მა შეგზურად და მცველად ჩერქეზთა ჯარი აახლა მეფეს.
არჩილმა პირდაპირ უთხრა ყილჩიყოს: მე მინდა შენ იყო
ჩემი მეგზური და თანამგზავრი, სანამ შენს საბატონო მიწა-
წყალს გავივლიდეთო.

ყილჩიყომ დაარწმუნა მეფე, რომ რაღაც „მძიმე საქმის“
გამო არ შეეძლო პირადად ხლებოდა ეგზომ „საპატიო სტუმ-
რებს“. დააჯერა, რომ უამისოდაც ერთგულად და ღირსეუ-
ლად მოემსახურებოდა ჩერქეზთა ამალა ქართველ სტუმრებს.
გაუდგნენ გზას ჩერქეზები და ქართველები.

გზა დროს ჰგავს, და თუ რამ საეჭვო ჰქონდათ გულში
ქართველებს, სწორედ მასპინძლებთან მთელი დღე-ღამის
თანამგზავრობაში გაუქარდათ და გაუქრათ.

სტუმარმასპინძლობის მაღლით მოხიბლული ქართველები
ველარ ამჩნევდნენ, როგორ ჭამდნენ თვალებით ჩერქეზები
ქართველი მეფის ახოვან ტანსა და მძლავრად გაშლილ მხარ-
მკლავებს.

ორი გოლიათი ჩერქეზი დაწინაურდა ნაბიჯ-ნაბიჯად.

არც ამისთვის მიუქცევიათ ყურადღება ქართველებს.

უეცრად, ის ორი რჩეული არჩილს ზურგიდან დაეძგერა
და მკლავებში ჩააფრინდნენ „იმიერ და ამიერ“.

დანარჩენი ჩერქეზები ქართველთა მცირე გუნდს დაე-
ტაკნენ ყოველის მხრიდან.

ზერ-მონაზონი არაგის გახსენებია, ვითარცა ბრძოლისთვის უძლურნი და უმაქნისნი.

არაგის გახსენებია და... აწაფორის შიგნიდან იშიშვლეს ხმდები აბაშიძემ და შალიკაშვილმა. იშიშვლეს და წამად შემოჭკრეს „იმიერ და ამიერ“ არჩილის შემპყრობელთ.

მაშინ „იხადა მშვილდ-კაპარჭი მეფემან“ და დაუშინა უგრძესი „არჩილისეული“ ისრები მომხდურთ, დაუშინა და „მოსჩნა მრავალნი“.

ისრები შემოიხარჯა და ხმალი გაიძრო მეფემ.

მაინც მიატანა ახლოს ერთმა ჩერქეზმა და პოროლი მძლავრად აძგერა მკერდში. „რგოლმან იკისამან“ აისხლიტა ის წაძგერალი და სამაგიეროდ ხმალი უჭირა თავში მტერს არჩილმა. ჩერქეზი დაეცა თავგაპობილი.

იბრძოდა მეფე.

იბრძოდნენ ბერნი.

იბრძოდნენ მსახურნი.

მაინც გააფთრებით მოიწევდნენ წინ ჩერქეზები.

შემოერთყნენ და შეკრეს წრე ყოველის მხრიდან.

უკვე შეეპყროთ დაჭრილ-დაკოდილნი — აბაშიძე და შალიკაშვილი.

კიდევ თითო-ორილა ქართული ხმალი ელავდა ასეულ ჩერქეზულ ხმალთა შორის.

გამხეცდა არჩილ მეფე. საშინელი ყიყინითა და ჩეხვით შეუტია საბედისწერო წრეს. შეუტია და „განვლო ბრძოლთა მეფემან რაზმი მათი და წარვიდა ლტოლვეით“.

გამოედევნენ ჩერქეზები ლაგამაწყვეტილი ჰენებით.

მიჭკროდა არჩილი. მაგრამ „ქროლვა“ ჩაუწყდა ცხენს. ფეხები დასიებოდა პირუტყს. აღარ შეეძლო აღარც ჰენება, აღარც ტვირთვა გოლიათი მხედრისა.

ტანხედაც „განსივდა ცხენი მეფისა“ და დაეცა.

გადმოხტომა მოასწრო არჩილმა და ისევ შემოესივნენ გა-

ხელებული ყივილითა და ყარყაშით ზედმოვარდნილი ჩერქეზნი.

ისევ „ბრძოდა ძლიერად“ არჩილ მეფე.

უტეხ ვილაცამ მეფის გარშემო შეკრული წრე გაარღვია, შიგ შეეარდა და რაღაც იყვირა სასტიკი ხმით.

ჩერქეზებმა უმაღვე შეაყენეს ხმლები.

მივიდა ის კაცი არჩილთან, კეთილად გაუღიმა და უთხრა:

„მე ლეკი ვარ და გთხოვ, მისმინო, საოცარო გმირო! ნულარ მოიკლავ თავსა უებროსა; რაც ჩაიღინე, ისიც გეყოფა სიმხნედ და სივაჟაკედ: აწ დაიმდაბლე თავი და წამოდი ჩემთან; ეფუცავ, განგარიდო ყოველგვარ განსაცდელსა!“

მაშინვე იწამა მეფე-პოეტმა ამ კეთილი თვალებისა (როგორ არ ჰგავდა ეს ლეკი იმათ, ხმალდახმალ რომ შემოჰყრიან არჩილ მეფეს, ქურდის თვალებით, ყადორისა და ქარბელაქანის ხევსუგებში).

„კარგი! არა მივენდო ამიერიდან ჩერქეზთა, გარნა წამოვივალ შენდა!“ — თქვა არჩილმა და წაჰყვა იმ ლეკს, თავისი გადარჩენილი ყმებით.

მიიყვანა ლეკმა სახლში არჩილ მეფე. უმასპინძლა, ვითარცა ჭეშმარიტმა კავკასიელმა მასპინძელმა კავკასიელ სტუმარს. ბოლოს უთხრა: რაკი შემოგფიცე და მენდე, ბოლომდე უნდა მენდო.

და ისევ ყილჩიყო ჩერქეზთან მიიყვანა არჩილი ლეკმა. გვიან ღამე იყო.

დიდხანს ჩურჩულებდნენ ლეკი და ჩერქეზი განმარტობით.

მცირე სერობის შემდეგ არჩილ მეფეს „განსვენება“ სთხოვეს.

შუალამემდე იწვა არჩილი, ფხიზლად, უძილრად.

არ იცოდა, რა მოხდებოდა.

მხოლოდ იმ ლექს ენდობოდა. ეს იყო და ეს.

შუალამისას ქალი შემოვიდა არჩილ მეფესთან.

ეს ქალი ყილჩიყოს ცოლი იყო.

„აბრძანდითო“ — უთხრა არჩილს. არჩილი ადგა. ქალმა გარეთ გამოიყვანა. გარეთ ცხენები იდგნენ, შეკაზმულნი და დარახტულნი.

შეჯდნენ და წავიდნენ.

მივიდნენ ბასიანს. ერთ სახლს მიადგნენ. ქალმა დააკაკუნა. ქალმა გამოჰხედა. სახლში კიდევ, ეტყობოდა, ქალები იყვნენ.

არჩილი იმ სახლში შეიყვანეს ქალებმა...

მეორე დღეს შამხალის ბატონი მიადგა ჩერქეზთა ბატონის სახლს და ქართველი ტყვე მოიკითხა.

„ქართველი ტყვე ქალებმა მომპარეს და ბასიანს წაიყვანესო!“ — უთხრა ყილჩიყომ.

„აბა, წავიდეთო!“ — შესძახა სახეაშლილმა შამხალმა.

შეჯდნენ ცხენებზე და გაჰყენდნენ ბასიანისკენ.

იმ სახლთან ჩამოხდნენ, სადაც არჩილ მეფე „ჩაემწყვდიათ“ ქალებს.

ეზოში შემოეგებნენ ბატონებს ქალები.

ახლა მათი ჭმრებიც იქ იდგნენ.

ქალებთან რა მესაქმებო და, მამაკაცებს შეუღრინა შამხალმა: ახლავე გამოიყვანეთ ქართველი მეფეო!

უცებ აიშალნენ ქალები, ლეჩაქები ჩამოიხსნეს, ჭმრებს მივარდნენ და შეჰკვივლეს:

„ან ეს ლეჩაქნი თავს დაიბურეთ და თქვენი ქუდეები ჩვენ დაგვახურეთ, ანდა ქართველ მეფეს — ტყვეს კი არა, ჩვენს დიდ სტუმარს — ხელი არ ახლოთო!“

სიჩუმე წამოწვა.

ყილჩიყო მკრთალად იღიმებოდა.

შამხალი იღრინებოდა, მაგრამ იმ „საოცარი ქალების“

ქმრებს უკვე სანახევროდ ამოზიდულ სატევრებზე დაედოთ ხელი.

ჩერქეზ-ბატონმა და შამხალ-ბატონმა ცხენები გაატრიალეს.

.

არჩილი უკან ბრუნდებოდა, ფიქრებით დამძიმებული და დარეგვილი.

უკან მისი მხლებლები მოსდევდნენ (ვინც კი იმდღევანელ დელ ხოცვას გადაურჩა).

ქართლში მოდიოდნენ.

არჩილიდან არჩილამდე

ისევ იდგა 1691 წელი.

ისევ იჯდა ქუთაისის ტახტზე ალექსანდრე IV.

გამეფების წელსვე სამეგრელოს ამბებმა მიიბყრო იმერთის მეფის ყურადღება. ძალიან გამძლავრებულიყო გიორგი ლიპარტიანი, ადამიანთა „კლვითა და ტყვის ყიდვითა“. სულ აღარ ისმოდა ლევან IV დადიანის სახელი. ბოლოს და ბოლოს, საქმე იქამდე მივიდა, რომ დროისგან აღზევებულმა ვიგინდარამ თავისი „მოჩვენებითი“ (გინა — „ფორმალური“) მეუფე აიძულა სულ გაქცეულიყო ოდიშიდან. ლევან დადიანი ჯერ გადავიდა ქართლს — არჩილ მეფესთან, მერე წავიდა სტამბოლს და იქვე, უცხოობაში დაასრულა თავისი უფერული და უწადნიერო წუთისოფელი.

ოდიშ-სამეგრელოს მთავარი შეიქნა გიორგი ლიპარტიანი. იგი მხოლოდ ამას ვერ ბედავდა — „დადიანი“ ეწოდებინა „უგვარო თავისათვის“. მაგრამ მაინც თავისი „აღზევებული მდგომარეობით“ მოახერხა აღზევება ორივე „სისხლიერი“

გვარისა — ლიბარტიანისა და ჩიქვანისა (დიახ, ამერიიდან „ჩიქვანი“ განსხვავებით ლეჩხუმური „მდაბიო ჩიქოვანისაგან“). ლიბარტიანი მარტო სამეგრელოს კი არა, „თავობდა ლეჩხუმსაც კინლა დაპყრობად“.

ალექსანდრე მეფის მდგომარეობაც არ ყოფილა ლევან IV დადიანზე უფრო სახარბიელო. „ალექსანდრე თუმცა მეფობდა“, მაგრამ „არა ეგდენ ნებასა შინა მისსა იყვნენ“ მთავარნი და თავადნი მისი სამეფოსა. „რამეთუ ფრიად განდიდნენ მთავარნი“, მოსალოდნელი იყო ალექსანდრე მეფეც ამ „განდიდებულ“ მთავრებსა და თავადებს ისევე გაეძევებინათ, როგორც ლიბარტიანმა გააძევა და „გადააშენა“ მისი მეუფე დადიანი...

ეს განწყობილებანი მეფესა და მის ქვეშევრდომთა შორის სულ მალე გამეღავნდა ალექსანდრეს ახალ „წამოწყებებთან“ დაკავშირებით.

როგორც წინასწრობილად ითქვა, იმერეთის მეფის ცოლ-შვილი გიორგი მეთერთმეტემ შეიპყრო რუისში. ამათგან ალექსანდრეს ვაჟები — სვიმონი და გიორგი — დათუნა ქსნის ერისთავს შიამბარა გიორგი მეფემ.

ახლა, ხელახალი გამეფების შემდეგ, ალექსანდრემ მეორედ იქორწინა. ამჯერად ცოლად შეირთო გიორგი აბაშიძის ასული თამარი, ათი წლის გოგონა (გიორგი აბაშიძის მესამე ასული — ანუკასა და ელენეს შემდეგ).

ქალმა თავიდანვე „ვერ შეიყვარა“ თავისი „მირონცხებულნი“ ქმარი, თუმცა, ალექსანდრე იყო „მხნე, ახოვანი, ჰაეროვანი და უხვი“, მაგრამ ამავე დროს გახლდათ „ხელადმქცევი, ცუნდრუკი, უღთო და ტყვის-მყიდველი“. ასეთი უამური და გაუსაძლისი თვისებების გამო, ალექსანდრემ „სძულობდა ცოლი თვისი თამარ და მიზეზს უღდა განტეგებად“.

ალექსანდრეს ოჯახური და სახელმწიფოური მდგომარეობა

კიდევ უფრო შეარყია ქართლის მეფეებისადმი მისმა დამოკიდებულებამ. მან ხომ „კვალად იწყო მტრობა გიორგი მეფისა და მოყვრობა ერეკლე მეფისა“. ხოლო, არც ოჯახში და არც სამეფო დარბაზში ალექსანდრეს გიორგისთან მტრობას არ უწონებდნენ. მან ქართლში გალაშქრებაც მოისურვა, მაგრამ იმერეთის წარჩინებულთა წრემ ცივი უარი უთხრა ასეთი განაზრახვის მხარდაჭერაზე.

მაინც არ დაიშალა თავისი მეფემ და „უცნობელად წარჩინებულთა“, თავისი „მორჩილითა სპითა“ ქართლში გადავიდა, ალი აიღო, გაძარცვა, მოსტყვევნა და გამობრუნდა.

არჩილი მაშინ ტაშისკარს ყოფილიყო და გამოედევნა მათხარს, მაგრამ გადმოასწრო ალექსანდრემ იმერეთში.

იმერეთის თავადობა აღშფოთებული იყო, — არა იმდენად ქართლის დარბევის გამო, არამედ უფრო იმისთვის, რომ მეფემ სწორედ თავადთა ნების წინააღმდეგ გადაწყვიტა და განასრულა ესოდენ საჭოჭმანო და სათაკილო საქმე.

ასეთი განწყობილება კარგად გამოიყენეს გიორგიმ და არჩილმა. მათ მოლაპარაკება გამართეს იმერეთის თავადებთან და ადვილად დაარწმუნეს ისინი, რომ „ალარ შეიძლება ესე ვითარებისა“ გაგრძელება და აუცილებელია „შეანანონ ალექსანდრე მეფესა“.

ერთხანს ჯიუტობდა მეფის სიმამრი გიორგი აბაშიძე, მაგრამ, როცა შეიღმა, თამარმა, დაარწმუნა მამა — მე ალექსანდრეს ალარ გაფუჩერდები და ცოლად გიორგი მეფეს უნდა წავყვეო (!) — აბაშიძეც მაშინვე შეუერთდა შეთქმულებს.

უკანასკნელად შეიკრიბნენ იმერეთის თავადები, კათალიკონი, ეპისკოპოსი, პაპუნა რაჭის ერისთავი.

და უეცრად დაეცნენ სკანდას, სადაც მაშინ იდგა მეფე.

შეიპყრეს ალექსანდრე, — „შეიპყრეს და წარგზავნეს მღვიმეს, მერმე სვერს“. სვერიდან ქართლში გადაიყვანეს და რუისში მიპვარეს გიორგი მეფეს.

გიორგის ბრძანებით, იმერთა მეფე, ალექსანდრე IV, და-
პბრჩვეს და დაფლეს იქვე, რუისის ეკლესიაში.
ეს მოხდა 1695 წელს.

არჩილი მეოთხედ... არჩილი მეხუთედ

მეფედ ვიწოდე, ვერ გავიწოდე დეხი ჩემისა გუნებისადა.

არჩილი

არჩილი მეოთხედ ავიდა იმერეთის ტახტზე.

ქართლიდან გიორგი მეფე გადმოვიდა ძმასთან სტუმრად.

შეუჩნდა თამარი — ალექსანდრე მეფის ნაცოლარი — გი-
ორგი მეფეს: ცოლად შემირთე, მამაჩემი დაიხმარე და იმე-
რეთის ტახტი შენ დაიჭიროე.

შორს დაიჭირა გიორგიმ: ასეთ რაიმეს ჩემს ძმას, არჩილს,
არ ვკადრებო.

მერმე გიორგი აბაშიძე მიეძალა არჩილს: ცოლად შეირთე
ჩემი ქალი, თამარი და უფრო მკვიდრად დაიმკვიდრებ იმე-
რეთსო.

არჩილმაც შორს დაიჭირა: მე ერთი ცოლი უკვე მყავს და
უსჯულო არ გახლავართ, რომ მეორეც შევიერთოო. მაგას ისა
სჯობია, ჩემს ძეს ალექსანდრეს შევრთოთ შენი ასულიო.

(ალექსანდრე ბატონიშვილს მოსკოვში დაბრუნებისას მი-
სი ცოლი — თეოდოსია ივანეს ასული მილოსლავსკაია მკვდა-
რი დახვდა).

ცივად და უმძრახად დაშორდა გიორგის და არჩილს აბა-
შიძე.

გიორგი მეფე ისფაჰანს წავიდა.

გიორგი აბაშიძე გიორგი ლიპარტიანს დაუტყავშირდა და



ორივე გიორგიმ თამარს საქმროდ გამოუწახეს კიდევ ერთი გიორგი, ვითომცდა „ბაგრატიონთა ნათესავი“.

გაქნილი ლიბარტიანისაგან გამოქეპილი და ახლად გამომცხვარი „გიორგი ბაგრატიონი“ დააქორწინეს თამარზე და ორივე გამოაცხადეს იმერეთის მეფე-დედოფლად.

ეს მოხდა 1696 წელს.

იმერეთი სრული დუმლით შეხვდა ამ „ახალ ამბავს“. თითქოს უკვე სულ ერთი იყო, ვინც დაჯდებოდა ქუთათისის „სათამაშო ტახტზე“.

არჩილმაც მიატოვა იმერეთი, „წარვიდა დვალეთს და იყოფოდა მუნ“.

.

ახალი მეფე იმერეთისა — გიორგი — იყო „უმსგავსო ყოვლითურთ და შეუგვანი შეფობისა“.

იყო უვიცი (არა რა გაეგებოდა, „თვინიერ გლეხთა მუშაკობისა“). იყო ართვალი, ხეიბარი, ცრიმოლა, კვახში ჩასასმელი.

„მცირე ტანის“ კაცს სახელიც დამამცირებელი მოჰყვა — გოჩია.

გიორგი გოჩიას „აღმოჩენით“ პირდაპირ დასცინა იმერეთის ტახტს გველადუა ლიბარტიანმა.

გოჩიას ვინ რას ჰკითხავდა და, იმერეთის საქმეებს სინამდვილეში გიორგი აბაშიძე განაგებდა. ძლიერად კი განაგებდა რამეთუ იგი „თაობდა ყოველთა იმერთა ზედა და მორჩილებდნენ დადიანი, გურიელი, და წარჩინებულნი“.

ერთი წელი როგორც იყო გაუძლო თამარმა გოჩიასთან თანამეცხედრობას და მერე „ინება განტევება მისი“.

ისევ გაუგზავნა კაცი გიორგი აბაშიძემ არჩილს და შეუთვალა: შეირთე ცოლად ჩემი თამარი და მარადის იქნები იმერეთის მეფეო.

ისევ უარი შემოთვალა არჩილმა.

მაინც „შეითქვნეს აბაშიძესთანა ყოველნი იმერნი და რაჭის ერისთავი შოშიტა (პაპუნა გარდაცვლილიყო და რაჭის ერისთავად მისი ძე შოშიტა დამჯდარიყო). შეითქვენ და სასახლიდან ძალღვივით გაისროლეს გოჩია.

მაშინვე კაცი გაუგზავნეს არჩილს: იმერეთის სამეფო ტახტი მაინც შენ გიციდის, მობრძანდი და დაბრძანდიო!

მაინც უარი შემოთვალა არჩილმა, „მცირე-ყამობის მეფობად“ ჰქონდა დაცდილი იმერეთის ტახტი; აღარც ჰლირსო, რამეთუ იმერთა შორის აღარ არის „პირ-მტკიცობა, არამედ არიან განრყენილნი, ფიცის-მტეხელნი, ტყვის-მყიდველნი, მხდომნი, მკრებელნი, უკეთურნი, არა-თუ წარჩინებულნი, არამედ მღაბიურნიცა, მოქმედი ამის ყოველთა!“

ისედაც გაემწარებია წუთისოფელს არჩილი. სამი ვაჟი-შვილიდან ორი უკვე აღარ ჰყავდა ცოცხალი — დავითი და მამუკა. ორივე ნოვოდევნიის მონასტერში დაესაფლავებინათ, მამისგან ცრემლულფრსებელნი.

მაინც აღარ დაეხსნენ იმერნი და რაჭველნი და ბოლოს დათანხმდა არჩილი.

დღალეთიდან წამოსულს „მეგებნენ სრულიად რაჭველნი“, ქუთათისამდე ჩამოაცილეს და იმერეთის სამეფო სასახლეში შეიყვანეს ზარზემით.

იღვა 1698 წელი.

არჩილი მეხუთედ ავიდა იმერეთის ტახტზე.

ავიდა და მაშინვე მოსკოვის სახელმწიფო კარს წერილი გაუგზავნა — ალექსანდრე ბატონიშვილი გამომიგზავნეთ იმერეთშიო. მაგრამ არჩილის თხოვნის „სიგელმა“ ველარ ჩაუსწრო ალექსანდრეს მოსკოვში: მეფე პეტრეს საზღვარგარეთ წაეყვანა თავისი „უახლოესი ძმობილი“.

.

არჩილის მეხუთე „იმერულმა მეფობამ“ ნახევარი წელიწადი ძლივს გაათრია.

ხონთქარმა, მუსტაფა II-მ, სალიმ ფაშა ახალციხელს უბრ-
ძანა, არჩილი ქუთათისიდან გააძევეო.

სალიმ ფაშამ ერეკლე მეფეს მისწერა: ქართლში რომ
ალექსანდრე IV-ის ვაჟები იზრდებიან, იმათგან უფროსი —
სვიმონი, იმერეთის მეფედ გამოგზავნეო.

ერეკლემ სვიმონ ალექსანდრეს ძე ახალციხეს გაგზავნა.
სალიმ ფაშა გამოუძღვა ოსმალთა ჯარით. ზეკარი გადმოიარეს
და კაკას ხიდთან „მიერთენენ იმერნი ფაშასა და სვიმონს“.

ისევ მარტოდ დარჩენილი არჩილი ქუთათისიდან აიყარა
და ისევ რაჭისკენ გაქუსლა.

სამუდამოდ მიდიოდა იგი ეგზომ „საყვარელი და სასურ-
ველი იმერეთიდან“.

მიდიოდა ქვეყნიდან, სადაც იგი ხუთჯერ გამეფდა და
მეფედ ხუთი წელი ძლივს მოათია...

ამ უკანასკნელი იმერულ-რაჭული მგზავრობისას მის ოჯახ-
თან ერთად თან ახლდა ძმისწული — ვახტანგ ლევანის ძე.

იმ წელსვე რუსეთში წასვლა ეწადა არჩილს, მაგრამ გვი-
ანი შემოდგომა იყო და უკვე „კავკასი თოვლით კრულ-იყო
და დედა-წულით ვერლარა ვიდოდა“.

ვახტანგი რაჭას დატოვა, შოშიტა ერისთავთან, ხოლო
თვითონ არჩილმა „შევლო ლიახვი, გარდავიდა თაგაურს,
დაპყო ზამთარი იგი მუნ და გაზაფხულს წარვიდა რუსეთს
სპითა რუსთხელმწიფისათა“.

როგორ ხვდებიან ახალ საუკუნეს

მაშ, 1698 წლის შემოდგომაზე იმერეთის ტახტზე ავიდა
კიდევ ერთი ჯუჯა მეფუჯა — ს ვ ი მ ო ნ ალექსანდრეს ძე.

ისევ პირველობდა იმერეთს გიორგი აბაშიძე (ბერობა-

ში — მალაქია). მას ერთი ქალიშვილი, სახელად ანიკა, წმ-
 ცოლედ დაუწინდავს ნასყიდაია შვილზე, მაგრამ, რო-
 ცა იმერეთის ტახტზე უცოლო ჭაბუკი აღმოჩნდა, აბაშიძემ
 სიძედ ისევ მეფე „ამჯობინა“ და ანიკა სვიმონს შერთო ცო-
 ლად.

„ნაბერალ“ გიორგი აბაშიძეს ხომ ორი ცოლი ჰყავდა.
 პირველ ცოლად გიორგი მიქელაძის ქალი ჰყავდა და ამისგან
 შეეძინა სამივე ასული: ანიკა, ელენე (მამია III გურიელის
 ცოლი) და თამარი. ანიკა რომ გათხოვდა და გადედოფლდა,
 მალე ამის შემდგომ დედამისი გარდაიცვალა. პირველი ცო-
 ლით დაქვრივებულმა გიორგი აბაშიძემ მეორე ცოლი (გა-
 ორგი გურიელისა და კაცია ჩიქოვანის ნაცოლარი დარეჯანი)
 თვითონ განუტევა და მის ნაცვლად მესამე ცოლად შეირთო
 ქვრივი პაპუნა რაჭის ერისთავისა, დედა შოშიტა ერისთავი-
 სა, ასული ბეჟან ლორთქიფანიძისა. რაჭველებთან დამოყვ-
 რებით გიორგი აბაშიძემ „მოიმტკიცა იმერეთი უმეტესად“.

სვიმონ მეფეს ოჯახში „გაუთვალისწინებელი ღირსება“
 ჰუტყდა. მეფის ცოლისდა, გიორგი აბაშიძის მესამე ასული —
 თამარი, მტრულად შეხვედრია თავისი დის, ანიკას გადედოფ-
 ლებას.

თამარს ორი ქმრობა უკვე მოთავებული ჰქონდა — ერთი
 ალექსანდრე IV-თან და მეორე გიორგი გოჩიასთან. ძლიერი
 ნების ქალი იყო, თანაც ლამაზი და მომხიბლავი. იმერეთის
 წარჩინებულნი სწორედ თამარში ხედავდნენ ნამდვილ „დე-
 დოფლურ ხასიათს“. მას ეთაყვანებოდნენ, თვალეში შესცი-
 ცინებდნენ და მის ნება-სურვილთა შესასრულებლად თავს
 არ იზოგავდნენ.

ერთი სიტყვით, თამარი „აეშურა“ დასა და სიძეს, ხოლო
 იმერეთის თავადობამ მეფის სასახლიდან თამარ აბაშიძის სან-
 თიობოში გადაინაცვლა.

სვიმონ მეფემაც ისეთ „ლონეს“ მიმართა, როგორც მას

„მეფობას“ ეკადრებოდა: დაიბნა, დაფრთხა, „შეშინდა და (არც მეტი, არც ნაკლები) ივლტოდა ქართლსა“.

იმერეთი ხელში ჩაუვარდა დისა და სიძის „დამამზობელ“ თამარს და მამამისს გიორგი აბაშიძეს.

მაშინ მოკვდა კათალიკოსი ევდემონ ჩხეტიძე და მის ნაცვლად დასავლეთ საქართველოს ეკლესიის საჭეთმპყრობლად, „შეწევნითა აბაშიძისათა“ გამოცხადდა გ რ ი გ ო ლ ი, ძე ბე-
ქან ლორთქიფანიძისა, ცოლის ძმისშვილი გიორგი აბაშიძისა.

ამ დროს ლეჩხუმში განუდგა გიორგი ლიპარტიანს. ლიპარტიანმა დახმარება „სთხოვა გიორგი აბაშიძეს, რამეთუ, ისინი „იყვნენ მეგობარნი მტკიცენი“. მიეშველა აბაშიძე იმერთა ჯარებით, „განთხარეს მთა რაჭა-ლეჩხუმისა თოვლიანნი და შევიდნენ ლეჩხუმს, ურჩი მოსწვეს, მოსტყვევნეს“, და ისევ დაუმორჩილა ლეჩხუმში აბაშიძემ ლიპარტიანს.

მაშინ დაიბადა კიდევ ერთი „სახელმწიფოებრივი განაზრახი“, იმერეთისა და ოდიშის კარზე. გიორგი აბაშიძის ასულს, „თითქმის გადედოფლებულ“ თამარს, გადუწყვეტია ჭმრად შეერთო „თითქმის მეფის ტოლი“ გიორგი ლიპარტიანი. ოდიშის მთავრის „სახელოში შემძვრალ“ ვიგინდარასაც მოსწონებია „განაზრახი ესე“, რომელიც მას საშუალებას მისცემდა „ხელი ეფათურებია“ იმერეთის სამეფო ტახტზე და სადედოფლო სარეცელზე.

იყვნენ „ზოგ-ზოგები“, წინააღმდეგნი ამ „უზნეო განაზრახისა“. მაგალითად, დიდი თავადი, გიორგი მიქელაძე, „უჯიშო ჩიქოანს“ სიკვდილით დამუქრებია მისი დისწულის (თამარი გიორგის დისწული იყო) შერთვის განაზრახვისათვის, მაგრამ არაფერი გამოვიდა. გიორგი ლიპარტიანმა განუტევა ცოლი, რომლისგანაც ჰყავდა „ძენი შვიდნი მოწიფულნი“, და ნაცვლად შეირთო თამარი, გიორგი აბაშიძის ასული.

ამიერიდან ლიპარტიანი თავს არწმუნებდა, რომ მისი ხელი იმერეთის მეფის „სახელოშიც“ იყო „შემძვრალი“. ხოლო

თამარს ხალხში უფრო ბეჯითად „უხმობდნენ ოდიშისა და იმერეთის დედოფლად“.

აბაშიძისა და ლიპარტიანის კავშირი და დამოყვრება არ მოეწონა პაპუნა რაჭის ერისთავს, „და განდგნენ რაჭველნი აბაშიძისაგან“. მაშინ შემოიყარა „სპანი იმერეთისა აბაშიძემ, შეუხდა რაჭას, მოსწვა, მოსტყვევნა, დაიმორჩილნა და მოვიდა იმერეთს“.

არც გურიის მთავარს, მამია III გურიელს, ექაშნიკა იმერეთისა და ოდიშის „შეხმატკბილება“ და ახალციხის ფაშას სთხოვა: ისევ სვიმონ ალექსანდრეს ძე დაგვიბრუნე იმერეთის ხელმწიფედო. საღიმ ფაშამ ერეკლე მეფეს გამოართვა სვიმონი და გურიელს გამოუგზავნა გურიაში: შენ გენდობი და შენ მოგანდობ სვიმონის აყვანას იმერეთის ტახტზეო.

დაუტრიალდა „თავისთვის“ და „თავისებურად“ მამია გურიელი. სვიმონ „ტიკინას“ (გინა — „თოჯინას“), ცოლი გაჰყარა — ანიკა, გიორგი აბაშიძის ასული, და სამაგიეროდ შერთო თავისი დაი. ქორწილიც იქვე გადაუხადა ახალ „მეფედედოფალს“.

ამით მამია გურიელმა „ერთი ნაბიჯი“ უკვე გადადგა იმერეთის ტახტისაკენ (რატომაც არა, — მამამისი გიორგი გურიელი ხომ იჯდა და მაგრადაც იჯდა — ქუთათისის ტახტზე?!).

ფეხზე დადგა გიორგი აბაშიძე. მაშინვე იხმო გიორგი ლიპარტიანი — სიძე, მეგობარი და მოკავშირე. ჯარები შეჰყარეს და საჭილაოს დაიბანაკეს. მამია გურიელსაც დიდი ნიჭიერება და შორსმჭვრეტელობა არ დასჭირდებოდა, რომ აბაშიძე-ლიპარტიანის საომარი გამოსვლა გაეანგარიშებინა. და თვითონაც დაიძრა ჯარით მეტოქეებთან შესახვედრად.

ალბათ, შეშინდნენ აბაშიძე და ლიპარტიანი, რამეთუ „ეზრაზნენ გურიელსა“: რაც იყო — იყო, შევრიგდეთ და გავრიგდეთო, რად გვინდა მეფედ უმწეო და უხიაგი სვიმონი; ჩვენ გვსურს იმერეთის ტახტზე ავიყვანოთ შენ — მამია გუ-

ბელი, ძე მეფე გიორგი გურიელისა; ოღონდ უნდა მოჰკლა სვიმონი, რომელიც შენს სასახლეში განისვენებს და მერეთის სამეფო გვირგვინსაც შენგან ელოდებაო.

აილეწა გურიელი.

როგორ მოქცეულიყო?

რომელი სჯობდა — კარგი, პატიოსანი და სინდისიერი კაცის სახელი, თუ სამეფო გვირგვინი, რომელიც თავზე უნდა დაედგა სიძის, მეფის, სტუმრისა და საერთოდ „მინდობილი კაცის“ სისხლში ამოსვრილი ხელით?!

კარგა ხანს იფიქრა გურიელმა და ბოლოს მოიფიქრა „საუკეთესო გამოსავალი“:

„კარგი, თანახმა ვარ მოკვდეს სვიმონი, მაგრამ მე ვერ ვავისვრი ხელს მის სისხლში. ამიტომ თქვენ თვითონ მოჰკალით, უჩემოდ, თქვენის მოფიქრებით და მოხერხებით...“.

ორი კაცი აარჩიეს აბაშიძემ და ლიპარტიანმა — ხელთუცთომელი მეთოფენი, გულუძვრელნი და ადამიანის სისხლზე დაგერშილნი.

.

მიდიოდნენ და ჩურჩულებდნენ მკვლელები:

„რომ არ გამოვიდეს?“

„როგორ დავიჯერო, რომ ამ წლისოდენა ღამეს კაცი-შვილს, — სულ ერთია, მეფესა თუ ყმას — ერთხელ მაინც არ დასჭირდეს გარეთ გამოსვლა... გარეთ... ფეხისადგილში...“.

მინაწერი მენვიფეხამ საუკუნისა

მეჩვიდმეტე საუკუნემ უზღვავი სისხლი გაართვა საქართველოს.

მარტო ქართლ-კახეთმა მხოლოდ შაჰ აბასის ველური შემო-

სევების წყალობით, ნახევარი მილიონი ადამიანი დაჰკარგა.

საუკუნის მანძილზე უმძიმესი სისხლთა თხევანი მაინც ქართველთა „აქტიური ბალანსით“ განესრულა: გარეშე მტრებთან გამართული 28 ბრძოლიდან მათ მოიგეს 21, წააგეს 7.

მარტო ტაშისკარის, მარტყოფის, მარაბდის, ქსანისა და ბახტრიონის ბრძოლები კმარა ქართველთა საარაკო გმირობისა, უზემოესი მამულიშვილობისა და მარადიული უკვდავების დასამოწმებლად.

მაგრამ მეჩვიდმეტე საუკუნის სიგრძეზე ქართველებმა არანაკლები სისხლი აღინეს ერთიმეორეს. მარტო ბაზალეთის ცოდვიანი, ძმათაშემმუსვრელი ომის განსენებაც იკმარებს უამური ქრეოლის აღსაძვრელად.

გამორჩევით — დასავლეთ საქართველოს მესვეურებმა „ისახელეს თავი“ უთავყამო შინამტრობით და შინაომებით. აქ, მთელი საუკუნის გასწვრივ მძვინვარებდა ქართველთა ხელით ქართველთა სისხლის ღვრა. — მძვინვარებდა, რამეთუ „გადაწყვეტილიყო“: ვინ ვის „ტახტზე“ დამჯდარიყო, ვინ ვის „სახელოში“ გამძვრალიყო, ვინ ვის სარეცელში ჩაწოლილიყო.

ისევ იღველფებოდა ქართული მიწა „ტყვეთა სყიდვისგან“ აშლილი უმძიმესი მდულარე ცრემლით.

.

მაინც ამშვენებდნენ მეჩვიდმეტე საუკუნის საქართველოს მათიანეს:

სამშობლოსათვის „წმიდა მოწამენი“ — თევდორე მღვდელი, ქეთევან დედოფალი, ალექსანდრე და ლევან თეიმურაზის ძენი, მეფე ლუარსაბ II, ჰაატა სააკაძე, ბიძინა ჩოლოყაშვილი, შალვა და ელიზბარ ქსნის ერისთავნი;

მარტყოფისა და მარაბდის გმირნი — გიორგი სააკაძე, ავთანდილ სააკაძე, ზურაბ ერისთავი, მეფე თეიმურაზ I, ელია



დიასამიძე, პაპუნა ვაშაყაშვილი, დავით ერისთავი, ბაადურ ციციშვილი, დავით ჯანდიერი, ბარათა ბარათაშვილი, იასე ქსნის ერისთავი, თეიმურაზ მუხრან-ბატონი, ქაიხოსრო მუხრან-ბატონი, მანუჩარ III ათაბაგი, ლომი ჩრდილელი, დომენტი მროველი, ალავერდელი, რუსთველი, ხარჭაშენი, ცხრა ძმა ხერხეულიძე, ცხრა მაჩაბელი, შვიდი ჩოლოყაშვილი;

ბახტრიონის სახალხო გმირნი — ზეზვა გაფრინდაული, ნადირა ხოშარეული, გურგენ ჭინჭარაული, გოგოლაური, გულუხიძენი, ფუნჩაიშვილი, შველაიძე, საღირიშვილი;

კიდევ — ალექსანდრე II კახთა მეფე, ბატონიშვილები ერეკლე და გიორგი ალექსანდრეს ძენი. ქაიხოსრო ჩოლოყაშვილ-ომანიშვილი, შერმაზან ჩოლოყაშვილი, ქართლის მეფე გიორგი X, აბელ ანდრონიკაშვილი, პაპუნა ამილახორი, ზაქარია და იარალი ბარათაშვილნი, ზაზა ციციშვილი, თამაზ მაჩაბელი, როსიტა გედევანიძე, პაპუნა ჩივაძე, თამაზ ქარციძე, მათარსი შიხაიდრიძე, კვლივიძე, ინაშვილი, გარასპი ფავლენიშვილი, ადამ ანდრონიკაშვილ-აბელიშვილი, ნოდარ ჯორჯაძე, თამაზ ვაჩნაძე, ბაინდურ ერისთავი, გიორგი ხუცესი, იორამ სააკაძე, ზურაბ სააკაძე, ივანე სააკაძე, გერმანოზ ბარათაშვილი, გიორგი ქავთარიშვილ-ბარათაშვილი, დემეტრე საგინაშვილი, თანუნა დიასამიძე, დავით გოგორიშვილი, როსტომ შალიკაშვილი, ელიზბარ თაქთირიძე, ბეჟან თაქთირიძე, ნიკიფორე (ნიკოლოზ) ჩოლოყაშვილ-ირუბაქიძე (ირბახი), მამია II გურიელი, ყაფლან ბარათაშვილი, პაპუნა მაღალაძე, ბატონიშვილი დათუნა თეიმურაზის ძე, რევაზ ჩოლოყაშვილი, ქაიხოსრო მაყაშვილი, ბიძინა დიასამიძე, მერაბ ვაჩნაძე, მეფე ვახტანგ V, მარიამ დედოფალი, მეფე გიორგი XI, არჩილ მეფე, გივი ამილახორი, დავით თურქისტანიშვილი, ნიკოლოზ აბაშიძე, ბერი შალიკაშვილი, ლევან მუხრან-ბატონი, ვახტანგ და ქაიხოსრო ლევანის ძენი, მამა-შვილი ზაალ

და ზურაბ არაგვის ერისთავნი, ნოხოხონა ხერხეულიძე, ნიკოლოზ გოსტაშაბიშვილი, ბეჟან ლორთქიფანიძე, პაპუნა რაჭის ერისთავი, ევდემონ ჩხეტიძე.

ქართველნი — „უცხო თესლთა ისტორიის მკვდელნი“.

სპარსეთში — ალავერდი-ხან უნდილაძე, იმამ-ყული-ხან უნდილაძე, დავით უნდილაძე, კონსტანტინე-მირზა თეიმურაზის ძე, იესე (ისა-ხან) ლევანის ძე, თამაზ-ყული-ხანი, მანუჩარ-ბეგი (შაჰ აბასის ელჩი ინდოეთში), გიორგი სააკაძე, ბაგრატ-მირზა (მეფე ბაგრატ VII), სვიმონ-ხანი (მეფე სვიმონ II), ხოსრო-მირზა (როსტომ მეფე), ყარა-ბეჟან-ბეგ სააკაძე, როსტომ-ხან სააკაძე, ფარსადან გორგიჯანიძე, პაატა-ბეგი, ალექსანდრე მუხრან-ბატონი, ხოჯასთე-ბეგი, რამაზ-ბეგი, იოთამ-სულთან გურჯი, ფეროხ-სულთანი, დაუდ-ბეგ გურჯი, ალი-ყული-ბეგ სააკაძე, მუსლიმბეგი, ადამ სულთან ანდრონიკაშვილი, სიაოშ-ხანი, მერაბ-ხანი, ოთარ-ხანი, მანსურ-ხან ბარათაშვილი, პოეტები — მირზა მოჰამედ თაჰერ ნასრაბადი, ქაიხოსრო-ხანი (როსტომ-ხან სააკაძის დისწული), ზეინალ-ბეგი, ზურაბ-ბეგი, ფაზალ-ალი-ბეგი, შერმაზან-ბეგი, ალი ხან-ბეგი;

თურქეთში — გიორგი-ბეგი, მეჰმედ ფაშა, გულჩარა, მეფე გიორგი მეათის ასული, ფერად ფაშა, ქენან ფაშა „კოჯა“ („ზორბა“), გურჯი მეჰმედი, საფარ ფაშა, მურთაზა ფაშა.

მაინც ბრწყინვალედნენ ქართული სააზროვნო, თეოლოგიურ-თეოსოფიური, სამეცნიერო და სახელოვნებო კერები: ტფილისი, ქუთათისი, მცხეთა, გელათი, ალავერდი, ნიკორწმინდა, დავით გარეჯა, წილკანი, სამთავისი, თელავი, გრემი, ლარგვისი, ჯრუჭი, იკორთა, კაბენი, ქვათაბეგი, მუხრანი, მძოვრეთი, ტანძია, ცაიში, ბეღია, მარტვილი, ხობი, შემოქმედი, უშგული.

მარიამ დედოფალი ამზადებინებს „ქართლის ცხოვრების“ ხელნაწერს.

სულხან-საბა ორბელიანი ადგენს ქართულ განმარტებით ლექსიკონს.

ძმებმა სულხან და ბეგთაბეგ თანიაშვილებმა გალექსეს „ამირან-დარეჯანიანი“.

ბარძიმ ვაჩნაძემ „შაჰ-ნამეს“ მოტივებზე დაწერა პოემა „უთრუთიან-საამიანი“.

მამუკა თავაქალაშვილმა — „ზააქიანი“.

მეფე თეიმურაზ პირველმა — „ვარდ-ბულბულიანი“, „შამი-ფარვანიანი“, „ლეილ-მაჯნუნიანი, „იოსებ-ზილიხანიანი“, „შედარება გაზაფხულისა და შემოდგომისა“, „მაჯამა“, „წამება ქეთევან დედოფლისა“, „სოფლის სამღურავი“, „გრემის სასახლეზე“, „თამარის სახედავით გარეჯას“, „ანბანთქებანი“, „შვიდთა კრებათათვის“.

მეფე არჩილმა — „გაბაასება თეიმურაზისა და რუსთველისა“, „საქართველოს ზნეობანი“, „გაბაასება კაცისა და სოფლისა“, „სამიჯნურონი“, „ლექსნი ასეულნი“, „გალექსილავისრამიანი“, „მეფეთა საქებელნი და სამხილებელნი“, „ანბანთქებანი“.

იოსებ ტფილელმა — პოემა „დიდმოურავიანი“.

ფარსადან გორგიჯანიძემ — „საქართველოს ისტორია“.

მაინც მძიმე წყევლიადი წევს საქართველოს ცისგვამში.

ქართული სისხლით გაღეშილი XVII საუკუნე საქართველოს ყოფნა-არაყოფნის სასწორს ულოცავს ახალ ასწლეულს.

მძიმედ, უძვრელად დგას წყევლიადი.

სიბნელეში მიცურავენ მკვლევები — ზელუცთომელი მეოთხენი, გულუძვრელნი და ადამიანის სისხლზე დაგერშილნი, მიუახლოვდნენ სასახლეს.

„თაფლის თვე“ წევს ახალგაზრდა მეფე-დედოფლის სარეცელზე.

ლამე განზოგადდა.

სანთიობოდან გამოდის კაცი.

კიბეზე ეშვება. ვიწრო ბილიკს მიჰყვება ზმორებით.

.

საუკუნე იწურება, — XVII საუკუნე.

და ახალი, XVIII ასწლეულის შემობრძანებას მათი „ლირ-სების“ შესაფერისად ეგებებიან დასავლეთ საქართველოს ცოდვიანი მესვეურები:

ფეხისადგილთან თოფი გაგარდა...

პერანგა კაცი თავდამხე-დაენარცხა ცვარმოსილ დედამიწას.

მისამი წიგნის დასასრული

შინაარსი

კარი მირვი

ყოფნა-არყოფნა

| | |
|--|-----|
| ა ბ შ ა ბ ი რ ვ ე ლ ი — შორღვეული კარიბჭეები | 5 |
| ნაჯვარი სისხლი | 5 |
| „მთავარი ძარღვი“ | 10 |
| კახეთის კარზე | 17 |
| ისევ — „წესადც არს წინამბრძოლობა ქართველთა“ | 25 |
| შორღვეული კარიბჭეები | 28 |
| ბაგეში, 12 მარტი 1605 წლისა | 34 |
| შურისმგებლური | 42 |
| ყმაწვილ მეფეთათვის | 54 |
| გულჩარა | 63 |
| „გაზრდილი“ ეურჩება „გამზრდელს“ | 64 |
| „დიდებული მანდილოსანი“ | 68 |
| შპ აბასის გოჭები | 69 |
| ა ბ შ ა მ ე ო რ ე — წიგნი „უძღები შვილისა“ | 73 |
| „ახალ-კაცი“ | 73 |
| მოსკლა „მგლას-ტყაოსანთა“ | 77 |
| თევდორე | 79 |
| სხერტა, ტაშისკარი | 84 |
| „ისევ ქართველს უჯობნია“ | 90 |
| წელიწადი ქორწინებათა | 98 |
| „საიდუმლო სერობა“ | 107 |
| მოთხრილი სააკაძე | 109 |
| გაპყვეული სააკაძე | 113 |

| | |
|---|------------|
| გათათრებული სააკაძე | 118 |
| „დაიღწა გონების სარკე“ | 125 |
| „საქართველო ინადირეთო“ | 133 |
| ქალეთი | 136 |
| „წოჯოხეთი ორმოცდაათი დღით“ | 140 |
| „მოდირდა და სატანა მოუძლოდა“ | 144 |
| „უკან დაბრუნება აღარ მიწვრია“ | 153 |
| შვილის მკვლელი | 161 |
| სისხლიანი ალავერდობა | 164 |
| არაგვი და წიწამური | 168 |
| „ბაბილონის ტყვეობა“ | 172 |
| „უტყვისა და მეტყველის მოსასპობად“ | 181 |
| ისევ — „ტყვეობა ბაბილონისა“ | 185 |
| დედოფლის სიზმარი | 190 |
| „ვინც ქართველობას უკეთ „მოიხმარდა“ | 194 |
| ისფაჰანის ახალი ტარულა | 199 |
| „საქართველოს ქართველთა“ და „სპარსეთის ქართველთა“ | 201 |
| უფლისწულნი — სიკვდილისწულნი | 206 |
| ტახტთან და არა ტახტზე | 208 |
| „დავსდევ თავი ჩემი ქუეყანისათვის“ | 212 |
| მკედელნი „სხვათა ისტორიისა“ | 215 |
| აოთეოზი მესამე ქალი — მნათობისა | 222 |
| მამა-შვილი | 237 |
| კვლავ გაქართველებული სააკაძე | 242 |
| მარტყოფი — აოთეოზი „ხარებისა“ | 246 |
| მარტყოფის შემდგომ | 253 |
| აოთეოზი პაატა სააკაძისა | 258 |
| მარაბდის წინარე წუთისოფელი | 262 |
| მარაბდა — აოთეოზი უიღბლო გმირობისა | 266 |
| „შიოსობას“ — არაგვი, „მოისობას“ — ქსანი | 283 |
| ფიქრები მესხურ გზაჯვარედინზე | 290 |
| ზავი და ფიც-ვერცხლი | 296 |
| ბაზალეთის წინარე წუთისოფელი | 300 |
| გლოვის სამანი | 311 |
| კვლავ გათათრებული სააკაძე | 320 |
| „მაინც ვერ მოგერიე“ | 327 |
| ხმალი და ანდერძი | 331 |
| აღსრულებული სააკაძე | 334 |
| ბ წ მ ა მ ე ს ა მ ე — დიდი ხეების საგოდებელი | 342 |
| კათოლიკური ეპისტოლეონი | 342 |
| სიკვდილი ზურაბ ერისთავისაგან | 352 |
| სიკვდილი ზურაბ ერისთავისა | 358 |
| უმეტოქეოდ | 363 |

| | |
|---|-----|
| ფიქრები გრემში, ფიქრები ისფაჰანში | 367 |
| ძმადნაფიცები იორზე ნადირობენ | 372 |
| ქინქრით ცხვირდასუსხული ლომი | 376 |
| უნდილაძეთა საწუთროს დასასრული | 383 |
| როსტომი და როსტომი | 389 |
| ა ზ მ ა მ ე ო თ ხ ე — ხატყვარანი „ბაში-აჩუყისა“ | 398 |
| ქართველები, კახაეები, თურქები | 399 |
| კოჭორაულის ბრძოლა | 403 |
| „რქანაყარი პოლიტიკოსები“ | 405 |
| თვალდამწვართა და თვალდამდგართა | 407 |
| არქანჯელო ლამბერტი ახასიათებს ლევან დადიანს | 410 |
| ა ზ მ ა მ ე ხ უ თ ე — თეიმურაზი და როსტომი | 418 |
| მეფე — „ხერხიანი და ილათიანი“ | 418 |
| პოლიტიკური სარეცლისათვის | 422 |
| ისევ საარაგვოში | 427 |
| ისევ „რჭულშეუცვლელი“ თეიმურაზი | 430 |
| ქართული შეთქმულება და „თათრული ხუმრობა“ | 434 |
| აღსასრული როსტომ სააკაძისა | 437 |
| ქალისა და დედის პატივით | 439 |
| ისევ ქალი... | 443 |
| „შვენება შეშლილი“ დედოფალი | 446 |
| ქართულობის ღალატის ფასი | 448 |
| ისევ აიშალნენ | 452 |
| ავბედითად ნასროლი ტყვიები | 454 |
| ხორეშან დედოფლის შუამავლობით | 457 |
| დატირება უკანასკნელი ძისა და ძირისა | 464 |
| როსტომ მეფე კახეთს მოგზაურობს | 466 |
| მესხური საგოდებელი | 468 |
| ისევ ფესვების იმედით | 472 |
| რუსული სიასამური სპარსული ხალათის წინააღმდეგ | 476 |
| როსტომ მეფის საწუთროს დასასრული | 487 |
| ა ზ მ ა მ ე ე ქ ვ ს ე — ბახტრიონული | 493 |
| ტახტზე აღის ვახტანგ მეხუთე | 493 |
| „დიდი ბუდე“ | 496 |
| ისევ კახეთის საგოდებელი | 499 |
| „გაწვეტილა“ | 502 |
| როცა ხალხს ვერ უბედავენ... | 506 |
| ა ზ მ ა მ ე შ ე ი დ ე — მეფე-მთავართა საომარ სასწოროზე | 512 |
| „მძლავრებდა დიდად დადიანი“ | 517 |
| წამწარებული დღესასწაულები | 520 |
| მამუკა ბატონიშვილი | 520 |
| „ამაოება ამაოებათა“ | 523 |
| ბანძის „გმირები“ | 525 |

| | |
|--|-----|
| სათამაშო ტახტის გარშემო | 529 |
| „უამნი მეფენი არიან“ | 534 |
| თეიმურაზის საწუთროს დასასრული | 536 |
| ა ზ მ ა მ ე რ ვ ე — „დედა-ტახტის“ გარშემო | 544 |
| იმერეთიდან — კახეთში... სპარსეთის „გაგლით“ | 544 |
| მამა-შვილის „სიმღონია“ | 549 |
| შინააშლილობათა ბუდე | 553 |
| იმერეთი „საშოვნელად“ ახალციხეში მიდიან | 557 |
| ისევ „მოსკოველი ქართველი უფლისწული“ | 560 |
| ვახტანგ მეხუთის საწუთროს დასასრული | 564 |
| ა ზ მ ა მ ე ც ხ რ ე — ახალი მეტოქენი | 567 |
| ვინ იქნება ახალი „მეფე“, „ვალი“ თუ „ბანი“? | 567 |
| ხელმწიფობა გიორგი მეთერთმეტისა | 571 |
| ხელმწიფობა ერეკლე პირველისა | 578 |
| „ორხელმწიფობა“ | 582 |
| ა ზ მ ა მ ე ა თ ე — თვითმკვლევლობის საუკუნე იმერეთისა | 590 |
| „მოიპარა ციხე“ და „შეეტყუა ციხესა“ | 590 |
| პოლიტიკოსები და რაყიფები | 593 |
| რუსეთის ცის ქვეშ | 606 |
| ოცი წლის შემდგომ | 615 |
| ხელმწიფობა ალექსანდრე მეოთხისა | 618 |
| ისევ არჩილი | 627 |
| არჩილიდან არჩილამდე | 633 |
| არჩილი მეოთხედ... არჩილი მეხუთედ | 636 |
| როგორ ხედებიან ახალ საუკუნეს | 639 |
| ჩინაწერი XVII საუკუნისა | 642 |

მხატვარი სპ. ცინცაძე
მხატვრული რედაქტორი ჯ. ზენაიშვილი
ტექნიკური რედაქტორი დ. რაზმაძე
კორექტორები: თ. ფირცხალავა, ნ. ლომაძე
გამომშვეები ნ. ხავთასი

ს. ბ. 4950

ჩაბარდა წარმოებას 5.10.89. ხელმოწერილია დასაბეჭდად 17.02.90. ფორ-
მატი 84×108¹/₃₂. საბეჭდი ქაღალდი საწიფნე-საყურნაღე. გარნიტურა
ჩვეულებრივი. ბეჭდვა მაღალი. პირობითი ნაბეჭდი ფურცელი 34,44.
სააღრიცხვო-საგამომცემლო ფურცელი 30,09. პირობითი საღებავგატარე-
ბა 34,44. ტირაჟი 40.000. შეკვ. № 1976.
ფასი 10 მან.

გამომცემლობა „მერანი“, რუსთაველის გამზ. № 42.
თბილისი 1991

САНИКИДЗЕ ЛЕВАН ДАВИДОВИЧ

САБЛИ БЕЗ НОЖЕН

Книга III

Документальная проза

(На грузинском языке)

Издательство «Мерани»


пр. Руставели, 42

Тбилиси

1991

საქართველოს რესპუბლიკის ბეჭდვითი სიტყვის დეპარტამენტის თბილისის
სიბ. ი. კვეციავაძის სახ. წიგნის ფაბრიკა, გრ. რობაქიძის გამზირი № 7.

Handwritten text in purple ink, likely a title or description, possibly reading "The Church of the Holy Spirit" or similar, written in a cursive script.





K _____



BIBLIOTEKA PAŃSTWA POLSKIEGO

WYDZIAŁ
BIBLIOTEK
I
MUSEUM